


Ya habi ni apo namalyari: Bayon tsipan - Ayta

Mag-antsi



New Testament in Ayta, Mag-antsi

## **Ya habi ni apo namalyari: Bayon tsipan - Ayta Mag-antsi**

**New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

### **The New Testament**

in Ayta, Mag-antsi

**© 2006, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files dated 29 Jan 2022  
d2289d90-e8af-5f04-a1e1-312fd0921aff

## Contents

Mateo	1
Marcos	61
Lucas	98
Juan	159
Dyag	203
Roma	263
1 Corinto	290
2 Corinto	317
Galacia	333
Efeso	343
Filipos	352
Colosas	358
1 Tesalonica	364
2 Tesalonica	370
1 Timoteo	374
2 Timoteo	381
Tito	386
Filemon	390
Hebreo	392
Santiago	413
1 Pedro	420
2 Pedro	428
1 Juan	433
2 Juan	440
3 Juan	442
Judas	444
Impamwang	447

## Ya Mangêd ya Habi tungkol kan Apo Jesu-Cristo ya inhulat ni apostol Mateo

### *Paunan habi*

Di ha inhulat ni apostol Mateo ay an-ipamwang na ya hi Apo Jesu-Cristo ay pinili ni Apo Namalyari hên mag-in habaytoy Mámiligtas, ya mamaala, ya impangako na kanlan Israelita hên haton lagi. Napaidi ya hi Apo Jesu-Cristo ha bansom Israel. Embayro man, ya nakahulat di ay para ha balang miha, alwan bêngat para kanlan Israelita.

Di ha hinulat ni apostol Mateo ay mabáha ya tungkol ha pangianak kan Panginoon Jesus, ya pamawtismo kana, haka ya pamanukso kana. Mabáha êt di ya tungkol ha pamaalih na hên hakit la bayro ha probinsyan Galilea. Nakahulat êt di ya tungkol ha pamanoro na ha probinsyan Galilea, haka ha kaatag ya legal hên angga ha hiyay nilumatêng ha balayan Jerusalem. Nakahulat êt di ya nalyari ha tawlin parominggo hên biyay na di ha luta, ya pangamatsi na ha koros, haka ya pangabiyay nan oman.

Mabáha êt di ya humonol: (1) Ya toro ni Panginoon Jesus ha tawgtug (kapitolo 5-7). (2) Ya utoh na ha labinloway tagahonol na (kapitolo 10). (3) Ya alimbawa tungkol ha pamanlokop ni Apo Namalyari (kapitolo 13). (4) Ya toro hên tungkol ha labay habiên hên mag-in tagahonol na (kapitolo 18). (5) Ya toro hên tungkol ha kaanggaan hên panaon amêhêñ, haka ya pamanlumatêng hên pamanlokop ni Apo Namalyari (kapitolo 24-25).

Bayrin bêngat ha hulat ni apostol Mateo, ay mabáha ya tungkol ha mangatalino ya lalaki, ya ubat ha marayo ya naniraw ha Betlehem, haka ya tungkol ha pammita ni apostol Pedro ha lanêm. Embayro êt, bayrin bêngat mabáha ya tungkol ha pamayad hên buwih hên Templo ya atsi ha bêbêy hên kênan lanêm. Bayrin bêngat mabáha ya alimbawa tungkol kanlan nag-obra ha ubasan, haka ya alimbawa tungkol ha loway anak ya in-utoh hên mag-obra. Haka bayrin bêngat mabáha ya alimbawa ya tungkol ha kaluto hên kasálan hên anak hên mihay ari, haka ya alimbawa ya tungkol ha mapoy dalaga ya nanupa ha mihay lalaki ya an-ikasal.

### Kabooan hên pinakalaman

Listahan hên ninuno haka pamianak kan Apo Jesu-Cristo 1:1-2:23

Ya pamanoro ni Juan Bautista 3:1-12

Ya pamawtismo haka ya pamanukso kan Panginoon Jesus 3:13-4:11

Ya pamanoro ni Panginoon Jesus ha probinsyan Galilea 4:12-18:35

Ya pamanoro ni Panginoon Jesus ha kaatag ya legal paubat ha Galilea  
angga ha nilumatêng ya ha balayan Jerusalem 19:1-20:34

Ya tawlin parominggo hên biyay ni Panginoon Jesus ha luta 21:1-27:66

Ya pangabiyay oman ni Panginoon Jesus haka ya pagpahlék nan oman  
28:1-20

### *Ya ninuno ni Apo Jesu-Cristo (Lucas 3:23-38)*

<sup>1</sup> Habaytsi hilay ninuno ni Apo Jesu-Cristo. Hi Apo Jesu-Cristo ay kaapo-apoan ni Arin David haka hi Arin David ay kaapo-apoan ni apo Abraham.

<sup>2</sup> Hi Isaac ay anak ni apo Abraham, hi Jacob ay anak ni Isaac, hi Juda, haka hilay kaka nan lalaki, haka hilay ali nan lalaki, ay anak ni Jacob.

<sup>3</sup> Hi Fares haka hi Zara ay anak ni Juda kan Tamar. Hi Esrom ay anak ni Fares, hi Aram ay anak ni Esrom. <sup>4</sup> Hi Aminadab ay anak ni Aram, hi Naason ay anak ni Aminadab, hi Salmon ay anak ni Naason. <sup>5</sup> Hi Booz ay anak ni Salmon kan Rahab, haka hi Obed ay anak ni Booz kan Ruth, hi Jesse ay anak ni Obed. <sup>6</sup> Hi Arin David ay anak ni Jesse, hi Solomon ay anak ni Arin David ha manan ahawa ni Urias.

<sup>7</sup> Hi Rehoboam ay anak ni Solomon, hi Abias ay anak ni Rehoboam, hi Asa ay anak ni Abias. <sup>8</sup> Hi Josafat ay anak ni Asa, hi Joram ay anak ni Josafat, hi Ozias ay anak ni Joram. <sup>9</sup> Hi Jotam ay anak ni Ozias, hi Acaz ay anak ni Jotam, hi Ezequias ay anak ni Acaz. <sup>10</sup> Hi Manases ay anak ni Ezequias, hi Amos ay anak ni Manases, hi Josias ay anak ni Amos. <sup>11</sup> Hi Jeconias haka hilay kapotoh pohêl na, ay anak ni Josias. Hêñ angkabiyyay hila, ay dinakêp hilan taga-Babilonia hêñ dinyag ipoh ya Israelita ha bansan Babilonia.

<sup>12</sup> Bayro ha Babilonia, ay hi Salatiel ay nag-in anak ni Jeconias, hi Zorobabel ay anak ni Salatiel. <sup>13</sup> Hi Abiud ay anak ni Zorobabel, hi Eliaquim ay anak ni Abiud, hi Azor ay anak ni Abiud. <sup>14</sup> Hi Sadoc ay anak ni Azor, hi Aquim ay anak ni Sadoc, hi Eliud ay anak ni Aquim. <sup>15</sup> Hi Eleazar ay anak ni Eliud, hi Matan ay anak ni Eleazar, hi Jacob ay anak ni Matan. <sup>16</sup> Ya anak ni Jacob, ay hi Jose, ya ahawa ni Maria, ya indo ni Jesus. Hi Jesus ya ambaêgêñ Mesias, ya Cristo, ya impangakon Mâmiligtas ya pinili ni Apo Namalyari hêñ mamaala.

<sup>17</sup> Ha êmbayro, ay main labin-apat ya ninuno ha láhi ni apo Abraham angga kan Arin David, haka labin-apat ya ninuno paubat kan Arin David angga ha dinakêp lan taga-Babilonia hêñ dinyag ipoh ya Israelita ha bansan Babilonia, haka labin-apat ya ninuno paubat hêñ dinakêp hila hêñ taga-Babilonia angga ha in-anak ya Mesias, ya Cristo, ya impangakon Mâmiligtas ya pinili ni Apo Namalyari hêñ mamaala.

*Ya pamianak kan Apo Jesu-Cristo, ya Mesias  
(Lucas 2:1-7)*

<sup>18</sup> Èmén ya di ya pangianak kan Apo Jesu-Cristo, ya Mesias. Hi Maria ya indo na, ay kabaan ni Jose, noa, bayo hila nitakêh, ay nabuktot ya ha kapangyarihan hêñ Espiritu ni Apo Namalyari. <sup>19</sup> Hi Jose, ya kabaan ni Maria, ay mahonol ha Kautuhan. A na pon muwang ya dinyag nan Espiritu ni Apo Namalyari, kabay hêñ namwangan na, ya nabuktot hi Maria, ay naihipan na ya a nay nan kasalêñ. Noa, a na labay ya mipakarêng-êy hi Maria, kabay a na labay ya mamwangan hêñ kal-atan ya naihipan na. <sup>20</sup> Noa, hêñ an-ihipêñ na, no ay-êmén na madyag ya habayto, ay main anghel ni Apo Namalyari ya nagpahlêk kana ha taynêp na, ya wana kana, “Jose, ya kaapo-apoan ni Arin David, paan kan malimo hêñ kasalêñ hi Maria, ta hiya ay ampangalêk gawan ha kapangyarihan hêñ Espiritu ni Apo Namalyari. <sup>21</sup> Lalaki ya ianak na, haka patangalan mo yan Jesus, ta hiyay mamiligtas hêñ pinili na hêñ mag-in kana, ha parusa hêñ kasalanan la.”

<sup>22</sup> Ha nalyari ya habayto ngan, ay natupad ya impamwang hêñ mampamwang hêñ an-ipaihip kana ni Apo Namalyari, ya wana, <sup>23</sup> “Pakalêng-êñ yo, main mihay dalaga, ya a pon nakitakêh ha hinoman, ya mangalêk haka mangianak hêñ mihay bingot ya lalaki, ya patangalan lan ‘Emmanuel’ ya labay habiêñ, ay ‘kalamo tamo hi Apo Namalyari.’ ”\*

<sup>24</sup> Hêñ nimata yay na hi Jose, ay hinonol nay in-utoh kana hêñ anghel ni Apo Namalyari, ta kinasal na hi Maria. <sup>25</sup> Noa, a na ya pinakitakêhan ni Jose, angga ha nangianak yan mihay bingot ya lalaki. Ya pinata-ngalanan nan Jesus.

\* <sup>1:23</sup> Isaías 7:14.

## 2

*Hi Jesus ay hiniraw hēn manga-talino ya lalaki ya ubat ha marayo*

<sup>1</sup> Hi Jesus ay in-anak ha balayan Betlehem ha probinsyan Judea, hēn hi Arin Herodes pon ya manungkulān la. Hēn habayto ay main nilumatēng ha balayan Jerusalem, ya manga-talino ya lalaki ya ubat ha marayo, ha dapit awahan allo. <sup>2</sup> Nangotang hila no ay-iri hēn in-anak ya ari lan Israelita. Haka la hinabi ya nahēlēk la hēn inumawah ya bêtewēn ya palatandaan ya in-anak yay na, kabay simbaēn la ya dayi. <sup>3</sup> Hēn nagilam ni Arin Herodes ya tungkol kanla, ay hadyay limo na, ta kayno halanghangēn ya hēn bayoy Ari. Haka malimo hilay kapareho nan taga-Jerusalem ha huluk ni Arin Herodes.

<sup>4</sup> Kabay impa-tsipon ni Arin Herodes ya kaganawan mánoron Kautuhan ni apo Moises, haka hilay ampamaala kanlan pari, ta kinotang na hila no ay-iri hēn ianak ya Mesias, ya Cristo, ya impangakon Mámilitas ya pinili ni Apo Namalyari hēn mamaala. <sup>5</sup> Wanla etaman kana, “Ha balayan Betlehem ha probinsyan Judea, ta êmēn ya di ya inhulat nan mámipamwang hēn an-ipaihip kana ni Apo Namalyari, ya wana, <sup>6</sup> ‘Hika balayan Betlehem, ay miha ka kanlan maalagáy balayan ha luta ni Juda, gawan bahēn kamo ay ianak ya mihay mamaala, haka hiyay manayhay kanlan Israelita ya pinili ko hēn mag-in maának ko.’ ”\*

<sup>7</sup> Bayo lihim nan impabaēg ni Arin Herodes ya habaytoy manga-talino, haka namwangan na kanla no nakano lan nahēlēk hēn immawah ya habaytoy bêtewēn. <sup>8</sup> Bayo pinabita na hilay na ha Betlehem, ya wana, “Hali, mita kaw na, ta pakatapolēn yoy habaytoy anak. No natapol yo yay na, ay mag-orong kaw di ta ipamwang yo kangko, ta êmēn ko ya simbaēn etaman.”

<sup>9</sup> Hēn nagilam lay habi ni Arin Herodes, ay nammita hilay nay manga-talino. Ha pammita la, ay nahēlēk lan oman ya habaytoy bêtewēn, haka habaytoy hinonol la angga ha tinunggēn ya habayto, ha ugton dyanan ni Apo Jesus ha Betlehem. <sup>10</sup> Ayn kapantag ya higla la hēn tinunggēn ya bêtewēn. <sup>11</sup> Panhumwēn la ha bali, ay nahēlēk lay anak ya atsi ha dani ni Maria ya indo na. Nandoko hila ha arapan na ha pamagsimba la kana. Nilloat la ya pinamyanan lan idigalo la kana ya main ginto, haka makamal ya pabango ya ambaēgēn lan libanon, haka main êt mira ya in-ubuh lan indin kana.

<sup>12</sup> Kaatag tanay dann ya dinanan lan manga-talino ha pamag-orong la, gawan impataynēp kanla ni Apo Namalyari, ya paan hilan mag-orong kan Arin Herodes.

*Intakah ni Jose ya mitaindo hēn gintan ha bansan Egipto*

<sup>13</sup> Hēn nakabita hilay nay manga-talino, ay nanaynēp hi Jose. Ha taynēp na, ay nagpahlēk kana ya mihay anghel ni Apo Namalyari, ya wana, “Mimata ka, ta itákah mo hilay mitaindo, hēn gētan ha bansan Egipto. Paan kaw mag-alih bayro, angga ha a ko habiēn kamoyu, ta tapolēn ni Arin Herodes ya habain ya anak, ta labay na yan patsēn.” <sup>14</sup> Kabay hēn habayton yabi, nimata ya hi Jose ta intakah nay mitaindo hēn gintan ha bansan Egipto. <sup>15</sup> Bayro hila tana hēn angga ha natsi hi Arin Herodes. Nalyari ya habayto ta êmēn matupad ya hinabi nan mihay mámipamwang ya impaihip kana ni Apo Namalyari, ya wana, “Binaēg koy anak ko, ya umawah yay na ha bansan Egipto.”†

*Impapatsi ni Arin Herodes hilay nanganaway anak ya lalaki ya angkalokopan hēn balayan Betlehem*

<sup>16</sup> Hēn namwangan ni Arin Herodes ya niloko ya hēn habaytoy manga-talino, ay nagtulaw ya. Kabay impapatsi na hilay anak ya lalaki, ya loway

\* <sup>2:6</sup> Mikas 5:2. † <sup>2:15</sup> Oseas 11:1.

taon paaypa, ha balayan Betlehem haka ha mamalibot, gawan ha namwangan na kanlan manga-talino ya loway taon nanan immawah ya habaytoy bêtêwén.

<sup>17</sup> Ha dinyag nay habayto, ay natupad ya hinabi ni Propeta Jeremias, ya mihay mâmipamwang hên impaihip kana ni Apo Namalyari, ya wana, <sup>18</sup> “Nagilam ha balayan Rama ya makhaw ya pamanyêngên lan kaapo-apoan ni Raquel<sup>†</sup> gawan ha impapatsi ya maának la. A hila taganán naamung-mung.”<sup>§</sup>

### *Ya pag-orong lan Jose ha bansan Israel*

<sup>19</sup> Hên natsi hi Arin Herodes, ay main mihay anghel ni Apo Namalyari ya nagpahlék kan Jose ha taynêp na ha bansan Egipto, ya wana, <sup>20</sup> “Mimata ka, ta iuli mo hilay nay mitaindo, hên gêtan ha bansan Israel, gawan natsi yay na, ya labay mamatsi kanan anak.” <sup>21</sup> Kabay nimata hi Jose, haka na hilay na in-uli ya mitaindo ha bansan Israel.

<sup>22</sup> Noa, hên Namwangan ni Jose ya hi Arquelaoy a anak ni Arin Herodes, ay ampamaala ha probinsyan Judea hên kahagili hên tatang na, ay nalimwan hi Jose hên mag-orong bayro. Hên nakataynêp yay na êt, ya kaillag hila kano, ay nagpakha hila tana ha probinsyan Galilea. <sup>23</sup> Bayro hila tanan nanugêl ha balayan Nazaret ha probinsyan Galilea, ta êmén matupad ya hinabi lan mâmipamwang hên an-ipaihip kanla ni Apo Namalyari, ya wanla, “Baêgêyan Nazareno.”

## 3

### *Ya panoro ni Juan Bautista*

(Marcos 1:1-8; Lucas 3:1-18; Juan 1:19-28)

<sup>1</sup> Hên nabuyot hilay na ha balayan Nazaret, hilan Apo Jesus, ay ampanoro yay na hi Juan Bautista kanlan dinumani kana, ha probinsyan Judea, ha legal ya kabalah-balahan. <sup>2</sup> Habaytsi ya an-ipamwang na, “Paghêhêan haka talibatokan yoy nay pamanyag yon kasalanan, ta nilumatêng ya pamanlokop ni Apo Namalyari.” <sup>3</sup> Hi Juan Bautista ya inungkat ni Propeta Isaias, hatoy mihay mâmipamwang hên an-ipaihip kana ni Apo Namalyari, ya wana, “Main ampan-angaw ha legal ya kabalah-balahan, ya wana kanlan kal-atan ya naka-tsipon,

‘Il-an yoy nakêm yo ha pamanlumatêng hên Panginoon,  
Ya nanad ha pamil-an hên dann ha pamanlumatêng hên mihay matag-ay ya manungkulang.’ ”\*

Habaytoy hinabi ni Propeta Isaias ya tungkol kan Juan Bautista.

<sup>4</sup> Hi Juan ay nakatakop hên dyag ha habot hên kamelyo, haka ya tagkêh na ay dyag ha balat. Ya angkênaén na ay doron haka main bayron pulot panilan ya an-inêmén na. <sup>5</sup> Kal-atan lan taga-Jerusalem, haka kaatag pon ya legal ha probinsyan Judea, haka hilay ampaidi ha mitatalipay hên Ilog Jordan, ay dinumani kan Juan. <sup>6</sup> Inamin haka inhuko lay kasalanan la, bayo nagpabawtismo hila kana ha Ilog Jordan.

<sup>7</sup> Noa, hên nahêlék na ya mal-at ya Pariseo, haka Saduseo ya dinumani kana, ta êmén hila pabawtismo, ay wana kanla, “Nanad kaw utan, ya ampiag-ahug ha angkaulam. Hinoy namipamwang kamoyu hên tumakah kaw ha parusa ya lumatêng? <sup>8</sup> Daygên yo ya pamaptêg hên naghêhê kaw ha kasalanan yo. <sup>9</sup> Paan kaw mangihip hên mailigtas kaw ha parusa ni

<sup>†</sup> **2:18** Hi Raquel ay ahawa ni apo Israel ya ninuno lan pinatsi. In-alimbawa hi Raquel ha maindo ya kinamatsan anak. <sup>§</sup> **2:18** Jeremias 31:15. <sup>\*</sup> **3:3** Isaias 40:3-5.

Apo Namalyari, gawan hi apo Abraham ay ninuno yo. Agyan hata bato, ay madyag ni Apo Namalyari hēn kaapo-apoan ni apo Abraham. <sup>10</sup> Ya pamanatol ni Apo Namalyari ay nanad ha payakol ya naitag-ay hēn mihay ampamotoh hēn kayo. Balang kayo ya a ampanagēy hēn mangangēd, ay potohēn ta iulam ha apoy. Haka hikaw ay maialimbawa ha kayo ya a ampanagēy hēn mangangēd. <sup>11</sup> Ya impangakon Māmiligtas, ya lumatēng, ay matag-ay ya tungkulan kangko. Agyan mantan hēn pag-apin bitsih na, ay ayn akon karapatan. Hikoy ampamawtismo kamoyu ha lanēm, ta êmēn ipahlēk ya pinaghēhēan yon tinalibatokan ya kasalanan yo. Noa, hiyay mamawtismo kamoyu ha Espiritu ni Apo Namalyari haka ha apoy. <sup>12</sup> Hiyay mamipapawa hēn mapanyag kangēran kanlan mapanyag karawakan hēn nanad ha mihay ampamalohboh. Ta ya trigo ya binalohbohan ay ihmpan, noa, ya apa haka tatap ay ulamēn ha apoy ya a angkaparê.”

*Ya pamawtismo kan Apo Jesus  
(Marcos 1:9-11; Lucas 3:21-22)*

<sup>13</sup> Hēn ampamawtismo hi Juan, ay nilumatēng hi Apo Jesus, ya ubat ha balayan Nazaret, ha probinsyan Galilea, ta nagpabawtismo ya kan Juan ha Ilog Jordan. <sup>14</sup> Noa, binawal ya ni Juan, ya wana, “Hika ya dapat mamawtismo kangko! Pata hiko pon ya mamawtismo kamo!” <sup>15</sup> Noa, hinabi ni Apo Jesus, “Paulayan mon malyari ya habaytsi, ta êmēn matupad ya kalabayan ni Apo Namalyari.” Kabay nabay etaman hi Juan hēn mamawtismo kan Apo Jesus. <sup>16</sup> Hēn nabawtismoan yay na hi Apo Jesus, hēn inumawah ya ha lanēm, ay biglan nagloat ya langit, haka na nahēlēk ya Espiritu ni Apo Namalyari, ya anumaypa hēn nanad ha mihay pati-pati, ya inumugpa kana. <sup>17</sup> Hēn habayto, ay main habi ya ubat ha langit, ya wana, “Hatsi ya panlugurēn kon Anak ya ampamahigla kangko.”

## 4

*A ya napatuksa hi Apo Jesus hēn antuksoēn ya ni Satanas, ya diyablo  
(Marcos 1:12-13; Lucas 4:1-13)*

<sup>1</sup> Pangayari yan nagpabawtismo hi Apo Jesus ha Ilog Jordan, ay hiyay gintan ha legal ya kabalah-balahan, hēn Espiritu ni Apo Namalyari, ta tuksoēn ya ni Satanas. <sup>2</sup> Apatapo ya allo haka yabi, ay nagtēêh ya hēn a nangan. Kabay hēn nalabah ya habayto, ay angkablay yay nan lonoh. <sup>3</sup> Nilumatēng hi Satanas ya mānukso, ta wana kan Apo Jesus, “No hika ya Anak ni Apo Namalyari, ay daygēn mon puto ya hata bato.” <sup>4</sup> Noa, hinabi kana ni Apo Jesus, “A ko! Ha habi ni Apo Namalyari ay nakahulat ya êmēn di, ‘Hilay tawo ay a mabyay ha kaēn bēngat, noa, kailangan la etaman ya balang anhabiēn ni Apo Namalyari.’”

<sup>5</sup> Pangayari, ay gintan ya ni Satanas, hi Apo Jesus, ha Jerusalem, ya banal ya balayan, ha tēngēl hēn Templo. <sup>6</sup> Haka hinabi ni Satanas kan Apo Jesus, “No pētēg hēn hika ya Anak ni Apo Namalyari, ay magnabo kan paubat di, ta nakahulat ha Kahulatan, ya impahulat ni Apo Namalyari, ya êmēn di, ‘Iutoh ni Apo Namalyari hilay anghel na hēn mangillag kamo, haka halorēn la ka êmēn a mahakitan ya bitsih mo ha bato.’” <sup>7</sup> Noa, hinabi ni Apo Jesus, ya wana, “Nakahulat etaman ha impahulat ni Apo Namalyari, ‘Paan mon subukēn ya Panginoon mo, hi Apo Namalyari.’”

<sup>8</sup> Pangayari, ay gintan yay na êt ni Satanas, hi Apo Jesus, ha hadyay tag-ay ya tawtgug, ta impahlēk ni Satanas kana ya balang bansa ha boon luta haka ya kahampatan la. <sup>9</sup> Biha hinabi na kan Apo Jesus, ya wana, “Iubuh ko kamo ya habayto no mandoko kan mandēngdēng hēn magsimba kangko.” <sup>10</sup> Noa,

hinabi ni Apo Jesus, ya wana, “Satanas, mag-alíh ka di! Ta nakahulat ha habi ni Apo Namalyari: ‘Simbaén moy Panginoon mo, hi Apo Namalyari, ta hiyan bengat ya huyuén mo.’”

**11** Amêhén, ay nag-alíh yay na hi Satanas, haka main anghel ya nilumaténg, ya nipanawop kan Apo Jesus.

*Ya unan panoro ni Apo Jesus ha probinsyan Galilea  
(Marcos 1:14-15; Lucas 4:14-15)*

**12** Hén namwangan ni Apo Jesus, ya impakulung\* hi Juan Bautista, ay nag-orong ya ha balayan Nazaret ha probinsyan Galilea. **13** A ya naglaêh ha Nazaret ta naglaêh ya ha balayan Capernaum, bayro êt ha probinsyan Galilea. Ya balayan Capernaum, ay atsi ha laylay hén Dagat-dagatan hén Galilea, ha nag-in logal lan kaapo-apoan ni Zabulon, haka Neftali ya lowa kanlan anak ni apo Israel. **14** Ha panoro na bayro, ay nakatupad ya hinabi ni Propeta Isaias hatoy mihay mámpamwang hén an-ipaihip kana ni Apo Namalyari. Ya habi na ay nakahulat hén hato, ya êmén di,

**15** “Ha Galilea, ha logal lan kaapo-apoan ni Zabulon, haka lan kaapo-apoan ni Neftali ya atsi ha laylay hén dagat-dagatan, boy ha lipay hén Illog Jordan, ya ampaidyanan etaman hén mal-at ya alwan Israelita ya a ampagpalokop kan Apo Namalyari,

**16** ay nanad hilan atsi ha kariglêman haka ha kamatsan, gawan marayo hila kan Apo Namalyari. Noa, lano ay main mamahawang hén kaihipan la.”

**17** Paubat hén habayto, ay namipamwang yay na hi Apo Jesus, ya wana, “Maghêhê kaw na, haka talibatokan yoy pamanyag yon kasalanan, ta nilumaténg ya pamanlokop ni Apo Namalyari.”

*Ya pamanagyat ni Apo Jesus ha apat ya unan nag-in tagahonol na  
(Marcos 1:16-20; Lucas 5:1-11)*

**18** Ha pammita ni Apo Jesus ha laylay hén Dagat-dagatan hén Galilea, ay nahêlêk nay loway mikapotoh pohêl, ya magdadakêp hén kênan lanêm, ya hi Andres haka hi Simon, ya ambanhagan lan Pedro. Hila ay ampayhabwag hén lambat ha lanêm, ta ampandakêp hila dayi hén kêna. **19** Hinabi na kanla, “Makihonol kaw kangko, ta daygén kataw hén mámpakarani hén tawo kangko, ta êmén hila maniwala.” **20** Tampol lan imbalag ya lambat la, ta nakihonol hila kana.

**21** Ha pammita lan Apo Jesus ha laylay hén lanêm, ay nahêlêk na êt ya maának ni Zebedeo, ya hi Santiago haka hi Juan. Hila ay atsi ha bangka hén kalamoy tatang la, hén ampamitoyo hén lambat la. Hinagyat hila ni Apo Jesus. **22** Tampol lan imbalag ya bangka la haka ya tatang la, ta nakihonol hila kana.

*Hí Apo Jesus ay nanoro haka namaalíh hén hakit  
(Lucas 6:17-19)*

**23** Nanoro yay na ha mal-at ya sinagoga lan Israelita ha boon probinsyan Galilea. Impamwang nay Mangêd ya Habi tungkol ha pamanlokop ni Apo Namalyari haka namaalíh ya êt hén kaganawan hakit la. **24** Ya tungkol kana ay nibahwag ha boon Siria. In-ubuh lan gintan kana ya main hakit, pokol, lumpo, pilay, hilay nagtugaw, haka hilay hinapatan hén nangarawak ya a angkahêlêk ya ampamairap kanla. Namaalíh ya hén kaganawan hakit la, haka kaganawan nangarawak ya a angkahêlêk ya ampamairap kanla.

\* **4:12** Lucas 3:19-20.

<sup>25</sup> Kabay haday kal-atan ya ubat ha probinsyan Galilea, Decapolis, probinsyan Judea, balayan Jerusalem, haka ha lipay hēn Ilog Jordan, ya nangamat kan Apo Jesus.

## 5

### *Iningalwan hilay atsi ha lokop ni Apo Namalyari (Lucas 6:20-23)*

<sup>1</sup> Hēn nahēlēk ni Apo Jesus ya kal-atan ya ampangamat kana, ay nilumakat yan pērad ha tawtgug, ta bayro yan nikno hēn manoro kanla. Kabay dinumani hila kana ya tagahonol na. <sup>2</sup> Haka tinoroan na hila, ya wana, <sup>3</sup> “Iningalwan kaw ya alwan mapaglalang, gawan hikaw ay milamo ha pamanlokop ni Apo Namalyari. <sup>4</sup> Iningalwan kaw ya ampaglunkot gawan ha kasalanan yo, ta amung-mungēn kaw ni Apo Namalyari. <sup>5</sup> Iningalwan kaw ya maaypa ya nakēm, ta midin kamoyu ya impangako ni Apo Namalyari. <sup>6</sup> Iningalwan kaw no labay-labay yon manonol ha kalabayan ni Apo Namalyari, ta hawpan na kaw hēn manonol. <sup>7</sup> Iningalwan kaw ya maingaloēn, ta ihundo na kaw hēn ingalwan ni Apo Namalyari. <sup>8</sup> Iningalwan kaw ya nakapēptēng ya nakēm kan Apo Namalyari, ta mahēlēk yo ya. <sup>9</sup> Iningalwan kaw ya māmilatan, ta hikaw ay itad ni Apo Namalyari hēn anak na. <sup>10</sup> Iningalwan kaw no ampairapan la kaw gawan ha pamanhumonol yo ha kalabayan ni Apo Namalyari, ta milamo kaw ha pamanlokop na.

<sup>11</sup> “Iningalwan kaw no gawan bēngat ha paniwala yo kangko, ay pairapan la kaw, haka musmusēn la kaw, haka no habiēn lay hinon nangarawak ya alwan pētēg ya pamanira la kamoyu. <sup>12</sup> No malyari ya habayto, ay magpakahigla kaw, ta ayn kapantag ha kangēran, ya primyo ya matanggap yo lano ha langit. Panēmtēmēn yoy êmbayro êt ya pamairap lan ninuno la kanlan māmipamwang hēn an-ipaihip kanla ni Apo Namalyari.”

### *Ya ahin haka ya hawang (Marcos 9:50; Lucas 14:34-35)*

<sup>13</sup> Inhundo ni Apo Jesus ya panoro na, ya wana, “Hikaw ya anhumonol ha kalabayan ni Apo Namalyari, ay maialimbawa ha ahin bayri ha luta. Ihipēn yo no ay-êmēn anggamitēn ya ahin. Mangēd ya ahin, noa, no naalihan yay nan alat, ay ahinan maiorong ya alat na. Ayn yay nan pukat! Itapon ya tana haka pitu-tuk-anan.\*

<sup>14</sup> “Hikaw ay maialimbawa etaman ha hawang ya ampakahawang hēn kaihipan hēn balang miha ha boon luta. Ya kangēran ya andaygēn yo, ya angkahēlēk lan kaatag, ay nanad ha a maitago ya balayan ya atsi ha bungoy. <sup>15</sup> Ayn mamagkēt hēn atáng, bayo ihmpan o itagpēn. Noa, ya atáng ay idin ha mantēg hēn pamyanan atáng, ta êmēn mahawangan hilay atsi ha bali. <sup>16</sup> Êmbayro êt ya pakapakikwanan yon mamiyay, hēn main kangēran ha arapan hēn kapareho yo, ta êmēn la puriēn hi Apo Namalyari, ya Tatang tamo ha langit.”

### *Ya toro ni Apo Jesus ya tungkol ha Kautuhan ni Apo Namalyari*

<sup>17</sup> Inhundo ni Apo Jesus ya panoro na, ya wana, “Paan yon ihipēn ya atsi ko di, ta êmēn alihan hēn alagā ya Kautuhan ni apo Moises, haka ya inhulat lan kaatag ya māmipamwang hēn an-ipaihip kanla ni Apo Namalyari. Atsi ko di, ta êmēn ko tuparēn haka ipamwang ya habayto kamoyu. <sup>18</sup> Pakagilamēn yo, kaban main pon angkahēlēk ha langit, haka kaban main pon luta, ay a malyarin daygēn ayn pukat ya miha man ya nanaway letra o naipēk

\* <sup>5:13</sup> pitorak-torakan, pito-torakan.

ya gulis hēn habaytoy Kautuhan ni Apo Namalyari, o hēn Kahulatan lan māmipamwang hēn an-ipaihip kanla ni Apo Namalyari, angga ha a pon matupad ya kaganawan ya habayto. <sup>19</sup> Kabay hilay a anhumonol ha miha man kanlan habaytoy Kautuhan, bayo manoro êt ha kapareho la hēn paan hilan humonol, ay hilay mag-in pinakamaaypa ha pamanlokop ni Apo Namalyari. Noa, hilay anhumonol ha Kautuhan, haka ampanoro hēn dapat honolēn ya habayto, ay mag-in matag-ay ha pamanlokop ni Apo Namalyari. <sup>20</sup> Pakagilamēn yo, a kaw makapakilamo ha pamanlokop ni Apo Namalyari, no ya pamanhumonol yo kana ay alwan ubat ha nakēm. Paan yon tuwarēn ya alwan mantēg ya pamanhumonol lan Pariseo haka mánoron Kautuhan ni apo Moises.”

### *Ya toro ni Apo Jesus ya tungkol ha pamanhumuluk*

<sup>21</sup> Inhundo ni Apo Jesus ya panoro na, ya wana, “Nagilam yoy in-utoh hēn haton lagi, ‘Paan mamatsi hēn kapareho ta hilay mamatsi, ay hatolan hēn parusaan.’ <sup>22</sup> Noa, hikoy ampaghabi kamoyu, ya hilay anhumuluk ha kapareho la, ay hatolan ni Apo Namalyari hēn parusaan, haka hilay ampam-musmus ha kapareho la, ay hatolan hēn parusaan hēn Sanedrin. Haka hilay ampaghabi ha kapareho la, ya ‘Mulala ka!’ ay ipalako ha apoy ha impiyerno. <sup>23</sup> Kabay bayo kaw mam-in digalo kan Apo Namalyari ha pamiulaman hēn an-iátang kana ha Templo, ta main kaw napanémtēman ya dinyag yoy alwan mangēd ha kapareho yo, haka main hilan hakit nakēm kamoyu, <sup>24</sup> ay paan pon idin ya idigalo yo. Lakwēn yo hila pon, ta makikahundo kaw pon. Bayo maidin yoy nay idigalo yo kan Apo Namalyari ha pamiulaman hēn an-iátang kan Apo Namalyari ha Templo.

<sup>25</sup> “No main labay hēn mamidikil kamoyu, ay mangēd ya tampol kaw makikatoynungan kanla, ta êmēn a la kaw gētan ha mánlingon kaso. Ta kayno idin na kaw ha magbantay hēn hukulan, ta ikulung kaw. <sup>26</sup> Kabay bayro kaw tana ha hukulan angga ha a yo maubuh hēn mabayaran ya ipabayad la kamoyu.”

### *Ya toro ni Apo Jesus ya tungkol ha karawakan kalabayan lawini*

<sup>27</sup> Inhundo ni Apo Jesus ya panoro na, ya wana, “Nagilam yoy in-utoh hēn haton lagi, ya wanla, ‘Paan mamabayi haka paan makilalaki.’ <sup>28</sup> Noa, hikoy ampaghabi kamoyu, ya paan mangihip man hēn kalabayan lawini ha pamanlēk ha alwan ahawa, ta habaytoy kasalanan hēn mamabayi haka makilalaki. <sup>29</sup> Kabay, no mata yo ya anggamitēn yon manyag kasalanan, ay kēwētēn yo, haka yon itapon. Ta mangēd pon ya maalihan kaw mata, kanan mihamwag kaw ha impiyerno, boo man ya lawini yo. <sup>30</sup> No gamēt yo ya anggamitēn yon manyag kasalanan, ay mangēd ya potohēn yo ta itapon, kanan mihamwag kaw ha impiyerno, boo man ya lawini yo.”

### *Ya toro ni Apo Jesus ya tungkol ha pamihiyay hēn miahawa*

*(Marcos 10:11-12; Lucas 16:18)*

<sup>31</sup> Inhundo ni Apo Jesus ya panoro na, ya wana, “Muwang yoy Kautuhan ya hinulat ni apo Moises, ya wanana hulat, ‘Hilay lalaki ya mamihiyay hēn ahawa la, ay dapat dyanan lay ahawa la hēn kahulatan† ya inhiyay hila.’ <sup>32</sup> Noa, amêhēn hiko ya ampaghabi kamoyu, ya hilay lalaki ya mamihiyay hēn ahawa la, no a hila nakilalaki, ay daygēn lan māmakilalaki ya ahawa la no makiahawa hilan kaatag ya lalaki. Haka hilay makiahawa ha babayi ya inhiyay, ay mikasalanan hila etaman.”

† <sup>31</sup> Deuteronomio 24:1.

*Ya toro ni Apo Jesus ya tungkol ha paghumpa*

<sup>33</sup> Inhundo ni Apo Jesus ya panoro na, ya wana, “Nagilam yoy in-utoh hēn haton lagi, ya wanla, ‘Paan kaw mangako hēn main lamoy paghumpa, no ayn ha nakēm yo ya tuparēn ya habayto, ta dapat tuparēn ya inhumpa ya pangako kan Apo Namalyari.’ <sup>34</sup> Noa, hikoy ampaghabi kamoyu, ya paan kaw nan maghumpa no mangako kaw! Paan maghumpa hēn manggamit hēn langit, ta habaytoy dyanan ni Apo Namalyari, <sup>35</sup> o ha luta man, gawan habaytoy nanad paypaluntoan bitsih na, o ha balayan Jerusalem, ta habaytoy balayan ni Apo Namalyari, ya Ari ya matag-ay ya tungkulan. <sup>36</sup> Paan êt habiēn ya ‘Matsi ko man.’ Ta yarin mapauban, o mapauyang yo ya habot yo! <sup>37</sup> Habiēn yo tanan, ‘Awo,’ o ‘Ahē.’ Paan yoy nan pahanan hēn humpa, ta hi Satanas ya pangubatan hēn habayto.”

*Ya toro ni Apo Jesus ya tungkol ha pamanumbah hēn kangēran*  
(Lucas 6:29-30)

<sup>38</sup> Inhundo ni Apo Jesus ya panoro na, ya wana, “Nagilam yoy in-utoh hēn haton lagi, ya wanla, ‘No binuwag yoy mata hēn kapareho yo, ay kailangan buwagēn êt ya mata yo. No nanira kaw hēn gogot hēn kapareho yo, ay kailangan hiraēn êt ya gogot yo.’ <sup>39</sup> Noa, amêhēn hiko ya ampaghabi kamoyu, paan yon tumbahan karawakan hilay mapanyag karawakan. No main manampaling kapakan pingi yo, ay ipatampaling yo êt kanla ya kapaka. <sup>40</sup> No main mangidikil kamoyu, ta êmēn la makway kamiseta yo, ay idin yo kanla ya sambra yo etaman. <sup>41</sup> No patolukēn la kaw hēn mangarga hēn kalga la ha mihay kilometro, ay kargaēn yoy na hēn loway kilometro. <sup>42</sup> Mami kaw kanlan kaganawan ya ampakikwa kamoyu, haka no main labay hēn mandam pibandian yo, ay paan kaw mangimot.”

*Ya toro ni Apo Jesus ya tungkol ha pamanlugud ha kapatsi*  
(Lucas 6:27-28, 32-36)

<sup>43</sup> Inhundo ni Apo Jesus ya panoro na, ya wana, “Nagilam yoy in-utoh hēn haton lagi, ya wanla, ‘Dapat yon lugurēn ya kapareho yo, haka dapat yon kahēmēkan ya kapatsi yo.’ <sup>44</sup> Noa, panhabiēn ko kamoyun atsi di hēn ampanggilam, ya dapat yon lugurēn ya kapatsi yo, haka dapat yon ihalangin hilay ampamairap kamoyu gawan ha paniwala yo, <sup>45</sup> ta êmēn mamwangan ya hikaw ay maának ni Apo Namalyari, ya Tatang tamo ha langit. Gawan hiyay ampam-in allo boy uran kanlan mahonol kana haka kanlan mapanyag karawakan. <sup>46</sup> No anlugarēn yon bēngat hilay ampanlugud kamoyu, ay yarin main kaw hēn maêngganan ya primyo kan Apo Namalyari. Ta hila man ya máningil buwih, ya ampangwan sobra ha an-ipakwa kanla hēn gobyernon Roma, ay ampanlugud êt ha ampanlugud kanla. <sup>47</sup> Haka no ampansinēn yon bat hilay ampamansin kamoyu, ay hinon kangēran ya andaygēn yo ya igit ha pandaygēn lan kaatag, ta hila man ya a ampagpalokop kana, ay ampamansin kanlan ampamansin kanla. <sup>48</sup> Kabay dapat kaw mag-in mangēd ya ayn hinon kapintasan hēn nanad kan Apo Namalyari, ya Tatang tamo ha langit.”

## 6

*Ya toro ni Apo Jesus ya tungkol ha pamanawop ha mangairap*

<sup>1</sup> Inhundo ni Apo Jesus ya panoro na, ya wana, “Paan kaw magbabara hēn mangēd kaw, ta no magbabara kaw hēn mangēd kaw, ay ayn kaw bayton maêngganan ya ubat ha Tatang tamo ya atsi ha langit.

<sup>2</sup> “Kabay no manawop kaw ha mangairap, ay paan yon ipamwang ya habayto. Paan yon tuwarēn hilay ampagbabara hēn mangēd bayro ha

sinagoga haka ha kalsada. Ampanawop hilan bat gawan ampanapol hilan pamandayêw. Pakagilamên yo, ayn hilay nan maêngganan kan Apo Namalyari, gawan dinayêw hilay nan kapareho la.<sup>3</sup> Noa, hikaw, no manawop kaw ha mangairap, ay paan yoy nan ipamwang agyan ha kalamo yo,<sup>4</sup> ta êmên a mamwangan ya habayto, haka main kaw hên maêngganan ubat ha Tatang tamo ha langit ta angkahêlêk nay kaganawan.”

*Ya panoro ni Apo Jesus ya tungkol ha panalangin  
(Lucas 11:2-4)*

<sup>5</sup> Inhundo ni Apo Jesus ya panoro na, ya wana, “No manalangin kaw, ay paan yo hilan tuwarêñ hilay ampagbabara hên mangêd hila, ta labay-labay lan mirêng hên manalangin ha sinagoga haka ha pihobangan dann, ta êmên hila mahêlêk hên kaatag. Pakagilamên yo, ayn hilay nan maêngganan kan Apo Namalyari, gawan tinanggap lay nay pamandayêw hên kapareho la, ya tinapolla.<sup>6</sup> Noa, hikaw, no manalangin kaw, ay humwêñ kaw ha bali yo haka ihara yoy kabat, ta ya Tatang tamo, ya a angkahêlêk, ay hiyay ampakahêlêk kamoyu, haka main kaw hên maêngganan ya ubat kana.

<sup>7</sup> “No manalangin kaw, ay paan yon piorong-orong ya ayn labay habiêñ hên nanad ha andaygêñ lan a ampagpalokop kan Apo Namalyari ya êndat la no gilamên hila, gawan kakarangan panalangin la.<sup>8</sup> Paan yo hilan tuwarêñ, ta bayo kaw ampakidawat ha Tatang tamo, ya hi Apo Namalyari, ay mana nay nan muwang ya angkailanganêñ yo.

<sup>9</sup> “Manalangin kaw hên êmên di:  
‘Tatang naêñ ha langit, puriêñ ka dayi hên balang miha.  
<sup>10</sup> Dayi lumatêng ya pamanlokop mo di ha luta.  
Madyag ya kalabayan mo di ha luta, hên nanad ha langit.  
<sup>11</sup> Dyanan mo kay dayi hên kaêñ ya kailangan naêñ amêhêñ.  
<sup>12</sup> Patawarêñ mo kay ha kasalanan naêñ ta ampatawarêñ naêñ etaman ya kaganawan ya nakadyag kasalanan kannaêñ.  
<sup>13</sup> Paan mo kay paulayan hên matukso, haka idayo mo kay ha karawakan.  
Gawan hika ya pinakapoon hên balang hino, haka atsi kamo ya kapangyarihan ya ayn kapantag.  
Hika ya puriêñ hên ayn angga! Amen.’  
<sup>14</sup> Ta no patawarêñ yoy nakadyag kasalanan kamoyu, ay patawarêñ na kaw etaman ni Apo Namalyari ya Tatang tamo ha langit. <sup>15</sup> Noa, ta no a yon patawarêñ ya nakadyag kasalanan kamoyu, ay a na kaw patawarêñ ni Apo Namalyari, ya Tatang tamo ya atsi ha langit.”

*Ya toro ni Apo Jesus ya tungkol ha pag-aayuno, ya pamagtêêh hên a mangan, ta êmên a maabala ya panalangin*

<sup>16</sup> Inhundo ni Apo Jesus ya panoro na, ya wana, “No ampagtêêh kaw hên a mangan, ta êmên a maabala ya panalangin yo, ay paan kaw manoto kanlan magbabara hên mangêd, ya a ampag-ayos, haka ampaglungkot, ta êmên mamwangan hên kaatag ya a hila ampangan. Dinayêw hilay na, kabay ayn hilay nan maêngganan kan Apo Namalyari. <sup>17</sup> Noa, hikaw, no ampagtêêh kaw hên a mangan, ta êmên a maabala ya panalangin yo, ay dyanan yon laro ya habot yo, maghuklay kaw haka magkulamêñ,<sup>18</sup> ta êmên a madambi hên kaatag ya a kaw ampangan, ta hi Apo Namalyari, ya Tatang tamo, ya a angkahêlêk, ay hiyay ampakahêlêk kamoyu, haka main kaw hên maêngganan ya ubat kana.”

*Ya toro ni Apo Jesus ya tungkol ha pibadian ha langit  
(Lucas 12:33-34)*

<sup>19</sup> Inhundo ni Apo Jesus ya panoro na, ya wana, “Paan kaw manipon hēn pibandian bayri ha luta, ta main mal-at ya maniran habayto, nanad ha anag, o taēy. Haka malyarin maplak ya êt gawan main manakaw. <sup>20</sup> Noa, manyag kaw hēn ikahigla ni Apo Namalyari ya nanad ha ampanipon kaw hēn pibandian ha langit, ta ha êmbayro ay nanad kaw hēn main pamyanan pibandian ya a mahira hēn anag, o taēy, haka a maplak. <sup>21</sup> Dapat yon daygēn ya habayto, ta no anto ya pibandian yo, ay atsi êt bayro ya nakēm yo.”

*In-alimbawa ni Apo Jesus ha pag-atáng ya mata  
(Lucas 11:34-36)*

<sup>22</sup> “Ya mata yo ay nanad pag-atáng hēn nakēm yo. No nahawang ya mata yo, ay mahawangan êt ya nakēm yo. <sup>23</sup> Noa, no napukakê ya angkahêlêk yo, ay dumiglêm êt ya nakēm yo. No ya ampamahawang dayin nakēm yo, ay nariglêm awud, ay taganán ampamiyay kaw ha hadyay kariglêman.”

*Unaén ya pagpalokop kan Apo Namalyari  
(Lucas 16:13; 12:22-31)*

<sup>24</sup> “Ayn hinoman ya makapaghuyo ha loway amo hēn booy nakēm. Ta lugurēn nay miha, haka kahêmékan nay miha, o huyuên nan mantêg ya miha, ta hatoy miha, ay pahawaan na. Êmbayro êt, ay a yo kayan huyuên hi Apo Namalyari no ubuhêن yoy hêkaw yo hēn magkamain pibandian.

<sup>25</sup> “Kabay anhabiên ko kamoyu ya paan kaw manyagah, no hinoy maêkan haka mainêm yo, ta êmên kaw mabiyay. Paan kaw êt manyagah no hinoy maitakop yo. Gawan ya biyay ay maalagá ha kaên, haka ya lawini ay maalagá ha takop. <sup>26</sup> Hêlkêن yo hilay manok lalê, a hila mananêm, a hila ampangapah, ayn hilan pamyanan hēn nagapah la. Êmbayro man, ay ampakanêن hila ni Apo Namalyari, ya Tatang tamo ha langit. Taganán maalagá kaw kanlan manok lalê kabay a na kaw paulayan! <sup>27</sup> Manyagah kaw man, ay a yo mapakarang ya biyay yo!

<sup>28</sup> “Awta manyagah kaw no hinoy itakop yo! Ihipêن yo tanay paman-tumubo hēn bulaklak. A hila ampag-obra o ampanayi man hēn takop la.

<sup>29</sup> Agyan hi Arin Solomon, ha kal-atan bandi na, ay a ya nakapagtakop hēn nanad kahampatan hēn mihay bulaklak. <sup>30</sup> No ya lamon, ya angkabiyyay pon amêhêن, bayo ulamêن pangawatah, ay ampa-hampatêni Apo Namalyari, yarin a na kaw dyanan takop! Kulang awud ya paniwala yo kana. <sup>31</sup> Kabay paan kaw manyagah ha panapol yon maêkan yo, mainêm yo haka maitakop yo. <sup>32</sup> Ta hilay a ampagpalokop kan Apo Namalyari, ay panay hēn ampanagah no hinoy maêkan, mainêm haka maitakop la. Noa, hikaw, ay paan yo hilan totoên, ta muwang nan Tatang tamo ha langit, ya hi Apo Namalyari, ya kailangan yoy habayto. <sup>33</sup> Unaén yoy pagpalokop yo kan Apo Namalyari, hēn mamiyay hēn mahonol ha kalabayan na, ta idin na ya kaganawan kailangan yo. <sup>34</sup> Kabay paan yon ikayagah ya kailangan yo lano, ta muwang ni Apo Namalyari no hinoy kailangan yo. Hukad ya kairapan ya an-arapêni yo amêhêن. Paan yon ikayagah ya kairapan ya lumatêng lano.”

*Paan miyahatol  
(Lucas 6:37-38, 41-42)*

<sup>1</sup> Inhundo ni Apo Jesus ya panoro na, ya wana, “Paan kaw miyahatol, ta êmên a kaw hatolan ni Apo Namalyari. <sup>2</sup> Ta no ay-êmên ya pamanatol yo ha kaatag, ay êmbayro êt ya pamanatol ni Apo Namalyari kamoyu. Ta ya pamanatol ay nanad ha an-itakal. No ay-êmên ya pamaytakal yon pamanatol

ha kaatag, ay êmbayro êt ya pamaytakal hên pamanatol ni Apo Namalyari kamoyu. <sup>3</sup> Panhêlkên yoy alwan nabyat ya kasalanan ya nanad poling ha mata hên kaatag, noa, a yo ampansinêñ ya nabyat ya kasalanan yo, ya nanad batang ya atsi ha sarili yon mata. <sup>4</sup> Ay-êmêñ yon mahabi ha kapareho yo, ‘Paulayan mo kon alihêñ ya poling ha mata mo,’ no hikaw êt, ay a yo angkahêlêk ya nanad batang ya atsi ha mata yo. <sup>5</sup> Hikaw ya ampagbabara hên mangêd! Unaêñ yon alihêñ ya nanad batang ya atsi ha mata yo, bayo makahêlêk kaw hên mangêd, ta êmêñ yo maalih ya nanad poling ha mata hên kaatag.

<sup>6</sup> “Paan yon ipalêkpêk hên ipamwang ya tungkol kan Apo Namalyari kanlan a mabay manggilam, ta habaytoy nanad ha ampam-i kaw hên maalagá ha aho ya mangayat kamoyu. Haka nanad êt ha mamitapon ha baboy, hên makamal ya perlas, ta bat la tanan pitu-tuk-anan.”\*

### *Intoro ni Apo Jesus ya dapat panay hên makidawat kan Apo Namalyari*

<sup>7</sup> Wana êt ni Apo Jesus, “Paka-pakikwaan yoy kailangan yo kan Apo Namalyari, ta dyanan na kaw. Pakatapolêñ yo ya kailangan yo kana, ta hawpan na kaw. Pakabaêgêñ yo ya, ta pakibatan na kaw hên nanad ha kabat ya loatêñ. <sup>8</sup> Daygêñ yoy habayto, ta hilay ampamalêkpêk hên kikwa ay dyanan. Hilay ampamalêkpêk hên manapol hên kailangan la kana ay makatapol. Hilay ampamalêkpêk hên mamaêg, ay pakibatan hên nanad ha kabat ya loatêñ. <sup>9</sup> Ayn miha man kamoyu ya mam-in bato ha anak na, no kikwa yan puto. <sup>10</sup> Ayn etaman miha man kamoyu ya mam-in nabiyay ya utan ya makamatsi ha anak na, no kikwa yan kênan lanêm. <sup>11</sup> Makasalanan kaw man, ay kamwang kaw hên mam-in ikakangêd ha maának yo. Hi Apo Namalyari pon kaya, ya Tatang tamo ya atsi ha langit, ya ayn kasalanan, ay yarin a ya mam-in ikakangêd lan kikwa kana!

<sup>12</sup> “Ya kangêran ya labay yo hên daygêñ la kamoyu hên kaatag, ay êmbayro êt ya dapat yon daygêñ kanla, ta habaytoy nakahulat ha Kautuhan ni apo Moises, haka ha inhulat lan kaatag ya propeta ni Apo Namalyari.”

### *Ya toro ni Apo Jesus ya tungkol ha loway dann*

(Lucas 13:24)

<sup>13</sup> “Pakangêrêñ yon humwêñ ha makpit ya ilwangan, ta malawang ya ilwangan boy dann ya palako ha kaparusaan ya ayn angga, haka mal-at ya ampagdann hên anhumwêñ bayro. <sup>14</sup> Noa, nakpit ya ilwangan boy dann ya palako ha biyay ya ayn anggaan, haka pêpêrad ya ampakatapol boy ampagdann bayro.”

### *In-alimbawa ni Apo Jesus ya dyag lan ampagbabara hên ampanoro hilan kaptêgan ha kayo ya ampanagêy hên nangarawak*

(Lucas 6:43-44)

<sup>15</sup> “Kaillag kaw kanlan ampagbabara hên ampanoro hilan kaptêgan, ta naayang ya pamaghabi la. Nanad hilan matonud ya tupa, noa, ya an-itoro la ay ampakahira. <sup>16</sup> Mabalayan yo hila ha dyag la. A ya managêy hên ubas ya tanyuong! A etaman managêy hên igos ya korêrêng-êy! <sup>17</sup> Êmbayro êt, hilay mangêd ya kayo, ay ampanagêy hên mangangêd, noa hilay narawak ya kayo, ay ampanagêy hên nangarawak. <sup>18</sup> Ya mangêd ya kayo ay a ampanagêy hên nangarawak, haka ya narawak ya kayo ay a ampanagêy hên mangangêd. <sup>19</sup> Hilay kayo ya ampanagêy hên nangarawak ay potohêñ ta ulamêñ. <sup>20</sup> Hilay

\* **7:6** pitorak-torakan, pito-torakan.

kayo ay angkabalayan ha tagêy la. Êmbayro êt, ay mamwangan hilay ampagbabara hên ampanoro hilan kaptêgan ha dyag la.”

*Hilay a makahowên ha langit*

(Lucas 13:25-27)

<sup>21</sup> Hinabi nay na êt ni Apo Jesus, “Alwan kaganawan ya ampamaêg kangkon, ‘Panginoon, Panginoon,’ ay makapakilamo ha pamanlokop ni Apo Namalyari, ya Tatang ko ha langit, noa, hilan bat ya ampanyag kalabayan na. <sup>22</sup> Lumatêng ya Allon Pamanukom ni Apo Namalyari, ay mal-at ya maghabi kangko hên, ‘Panginoon, Panginoon, pahowênen yo kay! Ta impamwang naen ya impamwang mo, haka ha kapangyarihan mo, ay namipaplag kay hên nangarawak ya hinumapat ha tawo, haka kay nanyag hên kaatag êt ya kapapaêpapah ha langan mo.’ <sup>23</sup> Gawan a la dinyag ya kalabayan ni Apo Namalyari, ay arap-arapan kon habiên kanla ya, ‘Ayn kaw hên karapatan hên humwén di! Pakarayo kaw kangko, ya nipanyag hên karawakan!’ ”

*Hilay mahonol ay in-alimbawa ha lalaki ya namairêng bali na ha aplag*

(Lucas 6:47-49)

<sup>24</sup> Inhundo ni Apo Jesus ya panoro na, ya wana, “Hilay ampanggilam habi ko, haka anhumonol ha nagilam la, ay maialimbawa ha mihay lalaki ya matalino, ya nanyag bali. Nangali yan malalê hên angga ha nidaoh ha aplag, ta bayro nan impairêng ya bali na. <sup>25</sup> Hên nanguran, nanlanab, haka nangangin hên makhaw, ay bininhêkan ya bali, noa, a ya natumba, ta impairêng ya ha aplag. <sup>26</sup> Noa, hilay ampakgilam hên habi ko, bayo a ampanyag hên nagilam la, ay nanad hên lalaki, ya ayn minuwang, ya namairêng bali ha kabalahuan ya alwan napah-êy. <sup>27</sup> Hên nanguran, nanlanab, haka nangangin hên makhaw, ay bininhêkan ya bali, haka tampol natumba boy nangaagwat ya habayto.”

*Ya panoro ni Apo Jesus ay pamanoro hên mihay main tungulan*

<sup>28</sup> Hên nayari yan naghabi hi Apo Jesus, ay naubuh hilan nag-êpapah ha panoro na, <sup>29</sup> gawan ya pamaghabi na, ay pamaghabi hên mihay main tungulan, alwan nanad pamaghabi lan mánoron Kautuhan ni apo Moises.

## 8

*Namaalih hi Apo Jesus hên hakit ketong ha mihay lalaki*

(Marcos 1:40-45; Lucas 5:12-16)

<sup>1</sup> Hên nakalohan hi Apo Jesus hên ubat ha tawtgug, ay main kal-atan ya nangamat kana. <sup>2</sup> Dinumani kana ya mihay lalaki ya nag hakit ketong. Nandoko ya ha arapan na, ta wanana nakiingalo, “Panginoon, no kalabayan mo, ay paalihêñ moy hakit ko, êmén luminis ya lawini ko.” <sup>3</sup> Impalunto ni Apo Jesus ya gamêt na ha nag hakit hên ketong, bayo wana, “Labay kon paalihêñ ya hakit mo. Luminis ka!” Tambêng naalih ya hakit na. <sup>4</sup> Bayo wani Apo Jesus kana, “Paan mo pon ipamwang ya hatsi ha hinoman. Pakha ka ha pari ta ipahlêk mo kana ya ayn kay nan ketong. Mantan kan maiparaya ha pamanhumonol mo ha utoh ni apo Moises,\* ta êmén mapaptêgan mo kanlan kaatag ya malinis kay na.”

*Namaalih hi Apo Jesus hên hakit hên ipoh hên kapitan hên hundaloh ya taga-Roma*

(Lucas 7:1-10)

<sup>5</sup> Hên nilumatêng yay na hi Apo Jesus ha balayan Capernaum, ay main mihay kapitan hên hundaloh ya taga-Roma ya nakiingalo kana, ya wana,

\* **8:4** Levítico 14:2-33.

**6** “Panginoon, ya ipoh ko ay a makaalih ha papag, ta main yan nabyat ya hakit, haka a na maigalaw ya lawini na. Pérad tana ay a nay na matéêh ya hadyay ilab.” **7** Kabay wani Apo Jesus, “Mita kitay na, ta paalihén koy hakit na.” **8** “Panginoon, paan kay nan paabala hén humwén ha bali ko, ta angkaréng-éy ako kamo. Iutoh mo tana, ay maalih ya hakit hén ipoh ko. **9** Hiko man, ay atsi ko ha aypa hén kapangyarihan hén kaatag, bayo nag hundaloh ha aypan kapangyarihan ko. Ya kaganawan utoh ko, ay daygén la. No habiên ko kanan miha, ‘Mita ka,’ ay mita yay na. No habiên ko kanan kaatag, ‘Paidani ka di,’ ay dumani ya. No habiên ko kanan ipoh ko, ‘Daygén moy hatsi,’ ay daygén na.” **10** Hén nagilam nay habayto ni Apo Jesus, ay nag-épapah ya. Inarap nay kalatan ya ampipanonol kana, ta hinabi na, “Pakagilamén yo, ayn akon nahélék ya miha man ya Israelita, ya êmbayro ya kataniêh ya paniwala. **11** Pakaihipén yoy hatsi, mal-at ya alwan Israelita, ya ubat ha ay-irin logal di ha luta, ay kiaém ha kaluto hén kalamo hi apo Abraham, apo Isaac, haka apo Jacob ha pamanlokop ni Apo Namalyari ha langit. **12** Noa, kal-atan ya Israelita ya unan hinagyat, ya a nabay ha pamanlokop ni Apo Namalyari, ay itapon ha kariglêman hén impiyerno. Hadyay tangih la bayro, haka mipang-ngê-ngêt hila ha hadyay huluk la boy ha hadyay ilab ya angkatanam la.” **13** Bayo hinabi ni Apo Jesus ha kapitan hén hundaloh, ya wana, “Muli kay na, ta gawan ha paniwala mo, ay maalih ya hakit hén ipoh mo.” Hén habayto êt, ay naalih ya hakit hén ipoh hén kapitan.

*Namaalih hi Apo Jesus hén hakit lan kal-atan ha bali lan Simon Pedro  
(Marcos 1:29-34; Lucas 4:38-41)*

**14** Hén nakahowén yay na hi Apo Jesus ha bali ni Simon Pedro, ay nahélék nay ampo ni Simon Pedro, ya an-omotén, ya atsi ha papag. **15** Tinalan ni Apo Jesus ya gamêt hén bakêt. Tambéng nag-alih ya hakit na, kabay nirêng yan namakan kanlan Apo Jesus.

**16** Hén ampinaboy nay allo, ay gintan la kan Apo Jesus ya kal-atan ya hinapatan hén nangarawak ya a angkahélék, haka hilay nipaghakit, ta ha utoh nan bat, ay namipaplag yan hinumapat kanlan hinapatan, haka namaalih yan hakit lan nipaghakit. **17** Dinyag ni Apo Jesus ya habayto, ta êmén matupad ya hinabi ni Propeta Isaias, ya êmén di ya pangahabi, “Hiya ya namaalih hén kaganawan hakit tamo.”

*Hilay labay hén kihonol kan Apo Jesus  
(Lucas 9:57-62)*

**18** Hén nahélék ni Apo Jesus ya kal-atan ya nakapalibot kana, ay in-utoh nay tagahonol na, ya wana, “Magbangka kitamo hén lumipay.” **19** Bayo hila hinumakay ha bangka, ay main mihay mánoron Kautuhan ni apo Moises ya dinumaní kana, ya wana kan Apo Jesus, “Mánoro, kihonol ako kamo ay-iri man ya lakwén mo.” **20** Hinabi etaman kana ni Apo Jesus, “Hila man ya ahon lalé ay main lêyang ya ampaidyanan, haka hilay manok lalé ay main halay, noa, hiko ya Taga-Langit, ya In-anak Tawo, ay ayn ampaidyanan di ha luta.”

**21** Wanan miha pon kanan tagahonol na, “Panginoon, paulayan mo ko pon hén mamilbêng tatang ko.” **22** Noa, wani Apo Jesus kana, “Kihonol ka kangko, haka paulayan mo hilay ayn biyay ya ayn anggaan, hén mamilbêng kapareho lan natsi.”

*Pinatunggén ni Apo Jesus ya hadyay angin  
(Marcos 4:35-41; Lucas 8:22-25)*

**23** Bayo hinumakay yay na ha bangka hi Apo Jesus, hén kalamo na hilay tagahonol na haka nag-umpisa hilay nan lumipay. **24** Ha pamanlumipay la,

ay nabêlêw ya hi Apo Jesus ha bangka. Amêhén, nagkamain hên hadyay angin, haka ya bangka la ay angkapnoy nan lanêm, noa, hi Apo Jesus ay nabêlêw pon. <sup>25</sup> Pinukaw la ya, ya wanla, “Panginoon! Panginoon! Iligtas mo kay, ta ampilêmêh kitamina!” <sup>26</sup> Wana kanla, “Ayn kaw awud hên tsiwala kangko! Pata hadyay limo yo!” Nimata ya, ta binawal nay angin haka hadyay tandulon. Tinunggén etaman ya angin haka tandulon, hên namapatékbék. <sup>27</sup> Nag-êpapah hilay tagahonol na. Nihahabi hila, ya wanla, “Hino kaya ya hatsi ya ampakabawal hên angin haka tandulon bayo anhumonol hila kana?”

*Namaalíh hi Apo Jesus hên nangarawak ya a angkahêlêk, ya hinumapat ha loway Gadareno*

(Marcos 5:1-20; Lucas 8:26-39)

<sup>28</sup> Hên nilumatêng hilan Apo Jesus ha legal lan Gadareno, ha lipay lanêm, ay tinupa hila hên loway lalaki ya ubat ha pay-ilbêngan, ya hinapatan hên nangarawak ya a angkahêlêk. Gawan hadyay tobag la, ay ayn ampakadann bayro. <sup>29</sup> Nan-angaw hila, ya wanla, “Jesus, ya Anak ni Apo Namalyari, awta ampakiêmênan mo kay? Labay mo kay hên parusaan hên alwa pon ya intakda ya panaon?” <sup>30</sup> Main kal-atan baboy bayro ya ampipambuk ha bung-oy ya narani ha lanêm. <sup>31</sup> Nakiingalo hilay hinumapat kanlan lalaki, ya wanla kan Apo Jesus, “No ipaplag mo kay, ay paulayan mo kay hên mipanhumapat kanlan baboy.” <sup>32</sup> Pinaulayan na hila ni Apo Jesus. Kabay inumalih hila kanlan lalaki, ta nipanhumapat hila kanlan baboy. Hilay baboy ya hinapatan la, ay nipamwayun palohan ha natalindah ya laylay lanêm hên nilêmêh ha dagat-dagatan.

<sup>33</sup> Hilay manayhay hên baboy, ay nipamwayu ha balayan la, ta habaytoy nalyari kanlan hinapatan hên nangarawak ya a angkahêlêk, ay impamwang la ha kabalyan la. <sup>34</sup> Hên nagilam lay balita la, ay naubuh lan nilako hilan Apo Jesus. Nakiingalo hila kana ya mag-alíh ya ha legal la.

## 9

*Ya mihay a ampakabita, ya in-arap kan Apo Jesus*

(Marcos 2:1-12; Lucas 5:17-26)

<sup>1</sup> Hinumakay hilan Apo Jesus ha bangka ta nilumipay hila ha balayan ya ampagdahêlan la. <sup>2</sup> Main nilumatêng ya ungnoy lalaki ya ampantan hên mihay lumpo ya atsi ha langkayan. Hên nahêlêk ni Apo Jesus ya paniwala la kana, ay hinabi na kanan lumpo, “Pakhawên moy nakêm mo, ta pinatawad ya kasalanan mo.” <sup>3</sup> Main bayron móñoron Kautuhan ni apo Moises ya êmbayri ya laman ihip, “Hinoy hatsi ya an-ipantag nay sarili na kan Apo Namalyari hên mamatawad hên kasalanan? Yarin a nan ammusmusén hi Apo Namalyari ya tawo yan bêngat! Mimiha na ni Apo Namalyari ya makapatawad hên kasalanan.” <sup>4</sup> Muwang ni Apo Jesus ya laman ihip la. Kabay hinabi na kanla, “Awta ampangihipan yo ko hên narawak? <sup>5</sup> Hino awud ya maparah hên habiêñ kanan mihay a ampakabita, no wangko, ‘Napatawad kay na ha kasalanan mo,’ o no wangko, ‘Hali, mirêng ka ta mita kay na?’ <sup>6</sup> Noa, êmén yo mamwangan ya hiko, ya Taga-Langit, ya In-anak Tawo, ay main tungkulon di ha luta hên mamatawad kasalanan, ay habiêñ ko kanan lumpo, ‘Mirêng ka. Hapwatén moy langkayan mo ta muli kay na.’” <sup>7</sup> Tambêng yan nirêng ha arapan la ya hata lumpo, ta nuli ya. <sup>8</sup> Naubuh hilan nag-êpapah ya atsi bayro. Pinuri la hi Apo Namalyari, ya nam-in êmbayroy kapangyarihan ha tawo.

*Hi Levi ya ambaêgên Mateo, ya máningil buwih, ay hinagyat ni Apo Jesus  
(Marcos 2:13-17; Lucas 5:27-32)*

<sup>9</sup> Pangayari hén habayto, ay nammita yay na hi Apo Jesus. Ha pammitta na, ay nakahélék yan mihay máningil buwih ya nag langan Mateo, ya ampikno ha paningilan na. Hinabi ni Apo Jesus kana, ya wana, “Kihonol ka kangko.” Kabay nakhonol ya kana.

<sup>10</sup> Améhén, hén atsi hilan Apo Jesus ha bali ni Mateo hén ampangan, ay main nilumatêng ya kal-atan máningil buwih, ya kapareho ni Mateo, haka kaatag êt ya makasalanan, ya kalamo la hén nangan. <sup>11</sup> Hén nahélék lan Pariseo ya ampangan hi Apo Jesus hén kalamoy máningil buwih, haka kaatag êt ya makasalanan, ay nangotang hila kanlan tagahonol ni Apo Jesus, ya wanla, “Pata ampangan ya mónero yo, hén kalamo lan máningil buwih, haka kaatag êt ya makasalanan?” <sup>12</sup> Hén nagilam nay hinabi la, ay nangalimbawa hi Apo Jesus, ya wana, “Hilay main hakit, ay ampangailangan doktor, alwan hilay ayn hakit. <sup>13</sup> Êmbayro êt, atsi ko di ha luta ta êmén ko mahagyat hilay ampangamin hén makasalanan hila, hén maghêhê hén manilibokot ha pamanyag lan kasalanan. Noa, hilay ampaghabin ayn hilan kasalanan, ay a ko hawpan. Ihipén yoy hinabi ni Apo Namalyari, ya wana, ‘A ko labay ya mamiátang kaw. Ya labay ko ay mag-in kaw hén maingaloén.’ ”\*

*Pinakibatan ni Apo Jesus ya kotang tungkol ha pagtêeh hén a mangan ta  
êmén a maabala ya panalangin  
(Marcos 2:18-22; Lucas 5:33-39)*

<sup>14</sup> Main ungnoy tagahonol ni Juan Bautista ya naghabi kan Apo Jesus, ya wanla, “Pata hikay haka hilay Pariseo, ay panay hén ampagtêeh hén a mangan, ta êmén a maabala ya panalangin naén? Pata alwan êmbayro ya andaygén lan tagahonol mo?” <sup>15</sup> Kabay in-alimbawa ni Apo Jesus ya sarili na ha lalaki ya an-ikasal, ya wana, “Endat yon manyêngén ya bisita hén an-ikasal kaban kalamo la ya? Ahê! Lumatêng ya allo ya ipakarayo ya lalaki ya an-ikasal, ay bayro hilay nan a mangan.”

<sup>16</sup> Améhén, intoro ni Apo Jesus ya a mailamo ya toro na, ha toro lan ninuno la, ya wana, “Ayn mamitagpi hén bayoy tela, ya a pon napipi ha gihi hén manan takop. No alimbawa ta daygén nay habayto, ta pipién nay na, ay kumpêh ya intakap, haka humlay ya gihi. <sup>17</sup> Ayn mamitungtug hén bayon alak ha ubatan hén manan alak, gawan lumtoh ya pamyanan, haka mabullog ya alak.† Ya bayoy alak ay dapat itugtug ha bayoy pamyanan, ta êmén parehon a tampol mahira.”

*Biniyay ya anak ya babayi nan mihay ampamaala ha sinagoga, haka  
pinaalih ya hakit hén mihay babayi ya labinloway taon nanan ampaghakit  
(Marcos 5:21-43; Lucas 8:40-56)*

<sup>18</sup> Kaban ampaghabi ya pon hi Apo Jesus, ay main dinumani hén nandoko ha arapan na, ya mihay ampamaala bayro ha sinagoga. Labay na, ya kihonol ya kana ha bali na, hi Apo Jesus, hén ipalunto nay gamêt na ha anak nay babayi, ta pabyayén na dayi. <sup>19</sup> Kabay nakhonol kana hi Apo Jesus haka hilay tagahonol na.

<sup>20</sup> Kaban ampammita hila, ay dinumani kana, ya mihay babayi ya labinloway taon nanan angkairapan ha hakit nan andayaén. Ginapa nay laylayan takop ni Apo Jesus. <sup>21</sup> Dinyag nay habayto, ta hinabi na ha sarili na, no magapa nan bat ya takop ni Apo Jesus, ay maalih ya hakit na. <sup>22</sup> Hén

\* <sup>9:13</sup> Oseas 6:6. † <sup>9:17</sup> Ya pamyanan la hén alak ay dyag ha balat kambing, kabay minghan lan bêngat magamit gawan angkumita.

namalingay hi Apo Jesus, ay nahêlêk na ya, haka wana kanan babayi, “Pakhawên moy nakêm mo. Inalih ya hakit mo, gawan ha paniwala mo kangko.” Habayto êt, ay naalih ya hakit na.

<sup>23</sup> Inhundo lan Apo Jesus ya pammita la ha bali nan habaytoy manungkul-an, ha sinagoga. Hêñ hinumwêñ hilay na, ay nahêlêk ni Apo Jesus hilay ampag-bulongudyong, haka nagilam nay labak hêñ kal-atan. <sup>24</sup> Hinabi ni Apo Jesus kanla, “Mag-alih kaw di, ta a ya natsi. Nabêlêw yan bêngat.” Noa, kinailyan la ya. <sup>25</sup> Hêñ naipaawah na ya kal-atan ya atsi bayro, ay hinumwêñ yay na ha pinaypakanluyan kanan anak. Tinalan ni Apo Jesus ya gamêt nan anak, haka tambêng yan nirêng. <sup>26</sup> Namwangan ha boon legal hêñ habayto ya nalyari.

### *Namamukat hi Apo Jesus hêñ loway buwag*

<sup>27</sup> Hêñ paalih hilan Apo Jesus bayro ha bali nan habaytoy manungkul-an ha sinagoga, ay main loway buwag, ya nangamat kan Apo Jesus, ya nan-angaw, ya wanla, “Apo Jesus, ya kaapo-apoan ni Arin David, ingalwan mo kay dayi!” <sup>28</sup> Inhundo lan Apo Jesus ya pammita la, haka hila hinumwêñ ha bali ya lakwêñ la. Hinumwêñ êt ya loway buwag, kabay wani Apo Jesus kanla, “Ampaniwala kaw hêñ mapamukat kataw?” Wanla etaman, “Awo, Panginoon.” <sup>29</sup> Bayo ginap-an nay mata la, ta wana kanla, “Gawan ha paniwala yo, ay makahêlêk kaw.” <sup>30</sup> Tambêng hila etaman nakahêlêk. Impapakabawal na hila hêñ ipamwang ha kaatag ya hiyay namamukat kanla. <sup>31</sup> Noa, hêñ nammita hilay na, ay impamwang la ha boon legal ya habayto, ya pamamukat ni Apo Jesus hêñ mata la.

### *Nakapaghabi ya mihay pipi*

<sup>32</sup> Hêñ paalih dayi hilan Apo Jesus, ay main gintan kana ya mihay lalaki, ya pipi ya hinapatan hêñ narawak ya a angkahêlêk. <sup>33</sup> Namipaplag hi Apo Jesus hêñ narawak ya a angkahêlêk, kabay nakahabi yay nay lalaki. Naubuh hilan nag-êpapah ya atsi bayro, ya wanla, “Bayri kantamo ha bansan Israel, ay ayn êt nakahêlêk hêñ êmbayri ya kapapaêpapah.” <sup>34</sup> Noa, hilay Pariseo ay naghabi, ya pamaalih ni Apo Jesus hêñ nangarawak ya hinumapat ha tawo, ay ha kapangyarihan ni Satanas, ya poon lan nangarawak ya a angkahêlêk.

### *Iningalwan ni Apo Jesus ya kal-atan*

<sup>35</sup> Nammita hilan Apo Jesus ha mal-at ya balayan haka baryo, ta namitoro yan Mangêd ya Habi tungkol ha pamanlokop ni Apo Namalyari ha sinagoga la, haka namaalih yan hino-hino kay na hêñ ya hakit. <sup>36</sup> Hêñ nahêlêk nay kal-atan, ay iningalwan na hila, gawan hadyay kairapan ya angkatanam la, haka angkahiraan hilan nakêm, ta nanad hilan tupa ya ayn pastol. <sup>37</sup> Bayo hinabi na kanlan tagahonol na, “Hilay kal-atan ya labay hêñ manggilam hêñ tungkol kan Apo Namalyari, ay nanad pali ya nawto, ya maranin gapahêñ. Maialimbawa hila hêñ êmbayro gawan nakal-an hilay na hêñ maniwala. Mal-at ya gapahêñ, noa, u-ungnon bêngat hilay manggapah. <sup>38</sup> Kabay ihalangin yo dayi kan Apo Namalyari, ya nag nawtoy pali, ya mamiutoh ya dayi hêñ kaatag êt, ya kapareho yon nanad manggapah, ta êmêñ hila etaman manoro hêñ tungkol kana.”

## 10

### *Ya labinloway tagahonolya binaêg nan apostol etaman*

(Marcos 3:13-19; Lucas 6:12-16)

<sup>1</sup> Mihay allo, ay tsinipon ni Apo Jesus ya labinloway tagahonol na, ta dinyanan na hila hêñ kapangyarihan hêñ mamaalih hêñ nangarawak ya

a angkahêlêk ya hinumapat ha tawo, haka hên mamaalih hên kaganawan hakit. <sup>2</sup> Habaytsi ya langan lan labinlowa ya pinili na hên mag-in apostol na: Hi Simon, ya pinata-ngalanan nan Pedro, haka hi Andres ya kapotoh pohêl ni Pedro. Pinili na êt ya loway anak ni Zebedeo ya hi Santiago, haka ya kapotoh pohêl na, hi Juan. <sup>3</sup> Pinili na êt hi Felipe, hi Bartolome, hi Tomas, hi Mateo ya máningil buwih, hi Tadeo, hi Santiago ya anak ni Alfeo, <sup>4</sup>hi Simon ya Makabayan, haka hi Judas Iscariote ya nay-upit kan Apo Jesus.

*Inutuhan na hilan manoro ni Apo Jesus ya labinloway tagahonol na ya binaêg lan apostol etaman*  
*(Marcos 6:7-13; Lucas 9:1-6)*

<sup>5</sup> In-utoh ni Apo Jesus ya labinloway tagahonol na hên mamitoro hên tungkol ha pamanlokop ni Apo Namalyari, haka hên mamaalih hên hakit. Bayo hila nammita, ay hinabi na kanla, “Paan kaw manoro kanlan alwan Israelita, haka ha hinon balayan lan Samaritano. <sup>6</sup> Noa, ya dapat yon toroan ay hilay kapareho yon Israelita, ya nanad tupa ya nitama. <sup>7</sup> Mita kaw na ta ipamwang yo ya Mangêd ya Habi, ya marani yanay pamanlokop ni Apo Namalyari. <sup>8</sup> Mamaalih kaw hên hakit, nanad ha ketong. Mamabiyay kaw oman kanlan natsi. Mamipaplag kaw hên nangarawak ya a angkahêlêk ya hinumapat kanlan tawo. Ya tungkulon ya indin ko kamoyu, ay a ko impabayad, kabay a yo ipabayad ya pamanawop yo. <sup>9</sup> Paan kaw mantan hên hinon pera ya nanad ha ginto, o pilak, o tangso. <sup>10</sup> Ha pammita yo ay paan kaw mantan balutan o hinon maihagili yoy takop, pag-apin bitsih, o têkên. Kaén yo ya hinon iarap la kamoyu, ta habayto ay nanad upa la kamoyu ha pamitoro yo kanla.

<sup>11</sup> “Ha kaganawan baryo, o balayan ya lakwên yo, ay manapol kaw bayron mapanyag kangêran ya mapagdahêlan yo. Bayro kaw tanan maglaêh angga ha a pon nayari ya pamitoro yo ha legal ya habayto. <sup>12</sup> Ha panhumwên yo ha bali, ay habiên yo, ‘Dayi ingalwan kaw ni Apo Namalyari.’ <sup>13</sup> No tanggapêñ la kaw bayro ha bali, ta marapat-dapat na hilan ingalwan ni Apo Namalyari, ay ingalwan na hila, no ahê, ay a hila ingalwan. <sup>14</sup> No a la kaw tanggapêñ ha mihay legal, o a hila manggilam toro yo, ay bayo kaw mag-alih bayro, ay ikampag yoy tuwapok ya atsi ha bitsih yo, ta êmêñ la mamwangan ya atsi tana kanla no lumatêng kanla ya parusa ni Apo Namalyari. <sup>15</sup> Pakagilamêñ yo, lano ha Allon Pamanukom ni Apo Namalyari, ay mabyat ya pamarusa kanlan taga-balayan Sodoma, haka Gomorra ya inulam ni Apo Namalyari hên hato, gawan ha hadyay kasalanan la. Noa, mas mabyat ya pamarusa kanlan habaytoy a nananggap kamoyu.”

*Ya lumatêng ya pamairap*  
*(Marcos 13:9-13; Lucas 12:12-17)*

<sup>16</sup> “Hikaw ay nanad tupa ya an-iutoh kon manoro kanlan nanad ahon lalê, ya mapamatsin tupa. Kabay dapat kaw mag-in alisto, haka dapat ayn maipintas ha pamimiyay yo. <sup>17</sup> Kaillag kaw, ta gêtan la kaw kanlan toa ya nag tungkulon ha hinon sinagoga haka pagpapatokêñ la kaw bayro. <sup>18</sup> Gawan ha paniwala yo kangko, ay gêtan la kaw kanlan ari haka gobernador, ha êmbayro ay maipamwang yo kanla, haka kanlan alwan Israelita, ya Mangêd ya Habi tungkol kangko. <sup>19</sup> Uston kotangêñ la kaw, ay paan kaw manyagah no hino ya habiên yo, ta habayto êt, ay ipamwang kamoyu no hinoy dapat yon habiên, <sup>20</sup> ta ya Espiritu ni Apo Namalyari, ay mamaihip kamoyu no hinoy habiên yo.

<sup>21</sup> “Hila man ya kapotoh pohêl yo, haka ya toa yo, ay may-upit kamoyu. Hilay maának ay manalanghang ha toa la hên angga ha ipapatsi la hila.

<sup>22</sup> Kahêmêkan la kaw hên kal-atan, gawan ha paniwala yo kangko. Noa, no maihundo yoy paniwala yo kangko, angga ha anggaan biyay yo, agyan ampagdanas kaw hên hadyay pamairap, ay madyanan kaw hên biyay ya ayn angga. <sup>23</sup> No pairapan la kaw ha mihay legal, ay tumakah kaw ha kaatag ya legal. Pakagilamên yo, a yo pon maubuh hên maabutan ya balang balayan haka baryo bayri ha bansan Israel, ay mag-orong ako, ya Taga-Langit, ya In-anak Tawo.

<sup>24</sup> “Ayn ampag-aral ya anggalangên igit ha ampanoro kana. Ya tungkulan hên mihay ipoh, ay alwan matag-ay ha tungkulan hên amo na. <sup>25</sup> Kabay dapat pahalamat hilay antoroan, no ampairapan hila hên nanad ha angkaranasan lan ampanoro kanla, haka dapat pahalamat hilay ipoh, no pairapan hila hên nanad ha angkaranasan lan amo la. Hiko ya nanad nag bali, haka hikaw ay nanad kalamo ko ha bali. Minusmus akon binaêg Satanas,\* kabay taganán lalo kaw musmusên.”

### *Ya dapat kalimwan*

(Lucas 12:2-7)

<sup>26</sup> “Kabay paan kaw malimo kanlan anhumêmek kamoyu, ta ayn intago ya a mamwangan haka mihungbung. <sup>27</sup> Ya anhabiên ko kamoyun bêngat, ay dapat yon habiên ha kal-atan. Ya an-iinanah ko kamoyu, ay dapat yon ipamwang ha kal-atan. <sup>28</sup> Paan yon kalimwan ya labay mamatsin lawini yo, ta lawini yon bêngat ya mapatsi la. A la man maipalako ha impiyerno ya kaêlwa yo. Dapat yon kalimwan hi Apo Namalyari, ta panga-ubat nan mangwan biyay, ay main ya êt hên kapangyarihan hên mamitapon kaêlwa yo ha apoy ya taganán a maparê ha impiyerno. <sup>29</sup> Noa, hadyay lugud ni Apo Namalyari, ta hila man ya nanaway manok lalê, ay a na ampaulayan. <sup>30</sup> Agyan habot ulo yo, ay muwang nay bilang. <sup>31</sup> Kabay paan kaw malimo. A na kaw paulayan, ta maalagá kaw kanlan mal-at ya manok lalê.”

### *Ya pagpalokop kan Apo Jesus*

(Lucas 12:8-9)

<sup>32</sup> “Hilay alwan marêng-êy hên mamaptêg ha arapan hên kal-atan ya hila ay ampaniwala kangko, ay a ko etaman ikarêng-êy ha langit, ha arapan ni Apo Namalyari, ya Tatang ko. <sup>33</sup> Noa, hilay ampaghabin ha arapan hên kal-atan, ya a hilâ ampaniwala kangko, ay habiên ko etaman lano ha langit, ha arapan ni Apo Namalyari, ya Tatang ko, ya a ko hila muwang.”

### *Main hubakan gawan main maniwala kan Apo Jesus haka main a maniwala*

(Lucas 12:51-53; 14:26-27)

<sup>34</sup> “Paan yon ihipêñ ya nantan akon pamakiúmang ha miha ta miha, ta hikoy pangubatan hên hubakan, gawan main maniwala kangko, haka main a maniwala. <sup>35</sup> Ta hilay ampaniwala haka hilay a ampaniwala, ay alwan parehoy ihip. Ya tatang ay mihay ihip ha anak nay lalaki. Ya indo ay mihay ihip ha anak nay babayi. Ya ampo ya babayi, ay mihay ihip ha manuyang nay babayi, kabay mihalang-hangan hila. <sup>36</sup> Haka mismon kapamilya ay mihubuk, gawan main maniwala boy main ahê.

<sup>37</sup> “Hilay manlugud ha toa la hên igit ha pamanlugud la kangko, ay alwan hépat hên mag-in tagahonol ko. Haka hilay manlugud ha anak la hên igit ha pamanlugud la kangko, ay alwan hépat hên mag-in tagahonol ko. <sup>38</sup> Boy hilay alwan nakal-an hên magtêeh hên pamairap, o matsi man, gawan ha paniwala la kangko, ay alwan hépat hên mag-in tagahonol ko. <sup>39</sup> Hila etaman ya a anhumonol kangko, gawan a la labay hên matsi, o mangoman ya pamimiyay

\* **10:25** Beelzebul ha habin Griego.

la, ay matsu etaman. Noa, hilay matsu gawan ha paniwala la kangko, ay dyanan biyay ya ayn angga.”

*Ya ikakangêd tamo ya maêngganan tamo ya ubat kan Apo Namalyari  
(Marcos 9:41)*

<sup>40</sup> “Hilay ampananggap kamoyu, ay hiko êt ya antanggapêñ la. Haka hilay ampananggap kangko ay antanggapêñ la hi Apo Namalyari ya namiutoh kangko. <sup>41</sup> Hilay ampananggap kanlan mámipamwang hên an-ipaihip kanla ni Apo Namalyari, gawan habaytoy mámipamwang ay in-utoh na, ay dyanan digalo ya pareho ha tanggapêñ lan mámipamwang hên an-ipaihip kanla ni Apo Namalyari. Haka hilay ampananggap kanlan mahonol kana, gawan hilay habayto ay mahonol kana, ay tumbahan na etaman hên kangêran ya pareho ha tanggapêñ lan mahonol kana. <sup>42</sup> Hilay mam-i kamoyu hên miha man ya baso hên lanêm ya nakêbêl, gawan hikaw ay tagahonol ko, ay taganán tumbahan hila etaman ni Apo Namalyari hên kangêran.”

## 11

*Ya kotang ni Juan Bautista, ya atsi ha hukulan  
(Lucas 7:18-35)*

<sup>1</sup> Hêñ natoroan nay na ni Apo Jesus ya labinloway tagahonol na ha dapat lan daygêñ, ay nanoro ya ha balayan ya namalibot bayro, ta impamwang na ya Mangêd ya Habi.

<sup>2</sup> Hêñ atsi ya ha hukulan hi Juan Bautista, ay namwangan na ya tungkol ha kapapaêpapah ya andaygêñ ni Cristo, kabay in-utoh ni Juan ya ungnó kanlan tagahonol na hêñ mangotâng kan Apo Jesus, <sup>3</sup> no hiya ya pinili ni Apo Namalyari hêñ mag-in Mámiligtas, ya impangako ni Apo Namalyari, o no mangênggan hila pon hêñ kaatag. <sup>4</sup> Noa, wani Apo Jesus kanla, “Mag-orong kaw kan Juan ta ipamwang yo kana ya nahêlêk yo haka nagilam yo.

<sup>5</sup> Ampakahêlêk hilay nay buwag, ampakabita hilay nay lumpo, angkaalih ya hakit lan nag ketong, ampakagilam hilay nay têkkêñ, ampangoman mabiyay hilay natsi, haka ya Mangêd ya Habi ay an-ipamwang kanlan mairap.

<sup>6</sup> Iningalwan hilay a ampag-alangan ha paniwala la kangko.”

<sup>7</sup> Hêñ nakabitay nay in-utoh ni Juan, ay namipamwang hi Apo Jesus hêñ tungkol kan Juan kanlan kal-atan, ya wana, “Hinoy nilako yo ha legal ya kabalahan-balahan? Èndat yo no ya ihip ni Juan ay nanad tsimbo, ya mantêwêg ya angkadian angin? <sup>8</sup> Hino awud ya nilako yo? Yarin nilako yo ya mihay nakatakop hêñ mangahampat! Alwa! Hilay nakatakop hêñ mangahampat, ay mahêlêk ha balin ari. <sup>9</sup> Hino awud ya nilako yo? Ya mihay propeta? Awo. Pakagilamén yo! Hiyay mihay mámipamwang hêñ an-ipaihip kana ni Apo Namalyari, ya ayn kapantag. <sup>10</sup> Gawan tungkol kan Juan Bautista ya hata nakahulat di ha habi ni Apo Namalyari, ya wana,

‘Mangiutoh ako hêñ muna kamo ya mangil-an hêñ danan mo.’

<sup>11</sup> Anhabiêñ ko kamoyu, ha kaganawan tawo, ayn matag-ay kan Juan Bautista. Èmbayro man, ya pinakamaaypa ya nakapakilamo ha pamanlokop ni Apo Namalyari, ay matag-ay kan Juan. <sup>12</sup> Paubat hêñ ampanoro ya hi Juan anggan amêhêñ, ay main ampaypilit hêñ tampol hêñ mangiaral hêñ Mangangêd ya Habi ya tungkol ha pamanlokop ni Apo Namalyari, haka malat ya ampamilit hêñ tampol palokop kana. <sup>13</sup> Gawan ya impamwang lan mámipamwang, hêñ an-ipaihip kanla ni Apo Namalyari, haka ya impamwang lan Kautuhan ya indin na kan apo Moises, ay tungkol ha pamanlokop ni Apo Namalyari. Haka hi Juan Bautista ya nag-umpisa hêñ nanupad

hén habaytoy impamwang la. <sup>14</sup> No ampaniwala kaw ha pamwang hén mihay mámpamwang\* hén hato, hén impaihip kana ni Apo Namalyari, ay maintindihan yo ya hi Juan Bautista, ya nanupad hén habaytoy papéti na, ya main nanad kan Propeta Elias ya lumaténg. <sup>15</sup> Pakaihipén yo ya nagilam yo!”

<sup>16</sup> Hinabi nay na êt ni Apo Jesus, ya wana, “Hino awud ya pangiparisan ko kanlan tawo améhén? Nanad hino hila kaya? Nanad hilan anak ya ampipammikno ha pangalindagan hén ampibabaé, ya wanla, <sup>17</sup> ‘Nanigtsig kay, noa, a kaw tsimmalék. Nanyéngén kay, noa, a kaw nakiyéngén.’ <sup>18</sup> Ta nilumaténg hi Juan Bautista hén panay hén ampagteéh hén a ampangan, ta êmén a maabala ya panalangin na, haka a ya ampiném hén alak, noa gawan habayto, ay anhabién yo, ya hiyay hinapatan hén narawak ya a angkahélék. <sup>19</sup> Hiko etaman, ya Taga-Langit, ya In-anak Tawo, ay nilumaténg di hén ampangan haka ampiném alak hén kalamo yo, noa gawan habayto, anhabién yo ya hikoy mahiba, mamminém hén alak, kaluguran lan máningil buwih, haka kaatag ya mapanyag kasalanan. Émbayro man, ay mapaptégan ya pêtég ya toro naén ni Juan Bautista, gawan habaytoy mahélék ha pamimiyay lan anhumonol ha toro naén.”

### *Ya babalá kanlan a nipaghéhê*

(Lucas 10:13-15)

<sup>20</sup> Hinabyanan ni Apo Jesus hilay a êt nipaghéhê hén nanalibokot ha mapanyag lan kasalanan, mal-at man ya kapapaépapah ya dinyag na ha balayan la, ya wana, <sup>21</sup> “Kaingalo kaw ya taga-balayan Corazin haka taga-balayan Betsaida, gawan a yo paghéhénan hén talibatokan ya mapanyag yon kasalanan, agyan mal-at ya kapapaépapah ya dinyag ko bahén. Mabyat ya kasalanan lan taga-balayan Tiro haka taga-balayan Sidon. Noa, no nadyag dayi kanla, ya kapapaépapah ya dinyag ko bahén ha Corazin, haka Betsaida, ay tampol la dayi bayton impahlék ha dyag la ya pinaghéhénan hén tinalibatokan la ya mapanyag lan kasalanan hén taga-Tiro haka Sidon.

<sup>22</sup> Pakgilamén yo! Lumaténg lano ya allon pamipapawa ni Apo Namalyari hilay nagpalokop kana, ha a nagpalokop kana, ay mas mabyat ya pamarusa kamoyun taga-Corazin haka Betsaida kanan pamarusa kanlan taga-Tiro haka Sidon. <sup>23</sup> Hikaw êt, ya taga-balayan Capernaum, êndat yo no mipalako kaw ha langit hén mananggap papuri, noa, ihamwag kaw ha impiyerno. Mabyat ya kasalanan lan taga-balayan Sodoma, noa, no nadyag na dayi kanla ni Apo Namalyari ya kapapaépapah ya dinyag ko bahén ha Capernaum, ay nabuyot lay na dayin pinaghéhénan ya kasalanan la, haka a dayin nahira ya balayan la. <sup>24</sup> Noa, pakgilamén yo, ha Allon Pamanukom, ay mas mabyat ya pamarusa kamoyun taga-Capernaum, kanan pamarusa kanlan taga-Sodoma.”

### *Dapat dumani kan Apo Jesus ya angkabyatan ha pamanghip*

(Lucas 10:21-22)

<sup>25</sup> Hén habayto êt, ay nanalangin ya hi Apo Jesus kan Apo Namalyari hén êmén di, “Tatang ko ha langit, ampurién kata, ya ampamaala ha langit haka luta, gawan impamwang mo ya tungkol kangko kanlan maaypa ya nakém, ya a mo impamwang kanlan manga-talino ya matag-ay ya pinag-aralan haka matag-ay ya nakém. <sup>26</sup> Awo, Tatang, ta habaytoy kalabayan mo.”

<sup>27</sup> Bayo wani ni Apo Jesus kanlan kal-atan, “In-ubuh nan impamwang kangko hén Tatang ko, hi Apo Namalyari ya tungkol kana. Ayn taganán makakilala kangko, ya Anak na, no alwan hiyan bêngat ya Tatang ko. Ayn

\* **11:14** Malakias 3:23-24.

êt taganá hê makakilala kanan Tatang ko, no alwan hikon bêngat, ya Anak na, haka hilay pilién ko hê ipamukat hê tungkol kana.

<sup>28</sup> “Paidani kaw kangko, ya hikaw ya angkabyatan ya nakêm ha pamangihip yo, ta dyanan kataw hê kapatêkbêkan nakêm. <sup>29</sup> Honolên yoy an-iutoh ko kamoyu, ta hiko ay maaypa ya nakêm haka maamêy ya pamanoro ko, kabay mag-in mapatêkbék ya nakêm yo. <sup>30</sup> Gawan naêpaw ya an-ipadyag ko kamoyu ha pamanoro ko kamoyu.”

## 12

*Ya toro ni Apo Jesus tungkol ha allon pamagsimba  
(Marcos 2:23-28; Lucas 6:1-5)*

<sup>1</sup> Mihay allon pamagsimba lan Israelita, hê nipadann hilan Apo Jesus ha nag trigo ha narani ha dann, ay nantê hilay tagahonol na hê pêrad. Niyêhê la ya hata trigo, ta nilêêm la ha pammita la, gawan anlonohê hila. <sup>2</sup> Noa, nag Pariseo bayro ya naghabi kan Apo Jesus, ya wanla, “Hêlkêñ mo! Pata nantê hilay tagahonol mo hê trigo ha allon pamagsimba, bawal man ya habayto ha Kautuhan tamo?” <sup>3</sup> Wana etaman ni Apo Jesus, “Kayno a yo pon nabaha ya dinyag ni Arin David hê hiya haka hilay kalamo na, ay angkablai hê lonoh. <sup>4</sup> Hinumwêñ ya ha bali ni Apo Namalyari, ta nangwa yan puto ya imparaêp kan Apo Namalyari ya pangkaêñ lan bat hê pari. Bawal man ha Kautuhan ni apo Moises hê mangan hê habayto, ay nangan ya, haka hilay kalamo na. <sup>5</sup> Kayno a yo pon nabaha ya Kautuhan ni apo Moises, ya ha allo man hê pamagsimba, ay andaygêñ lan pari ya dapat lan daygêñ ha Templo. Noa, alwan kasalanan ya habayto, ta mal-at ya dapat lan daygêñ ha Templo ha allon pamagsimba. <sup>6</sup> Pakagilamêñ yo, ya main di ya mas maalagá ha Templo. <sup>7</sup> No naintindihan yo dayi ya hata Kahulatan, ‘A ko labay ya mamiâtang kaw. Ya labay ko ay mag-in kaw hê maingaloën,’\* ay a yo dayin intad mapanyag kasalanan, ya ayn kasalanan. <sup>8</sup> Gawan hiko ya Taga-Langit, ya In-anak Tawo, ay nag tungkul hê maghabi no hinoy malyarin daygêñ ha allon pamagsimba.”

*Ya lalaki ya natsi ya mihay gamêt  
(Marcos 3:1-6; Lucas 6:6-11)*

<sup>9</sup> Nammita hi Apo Jesus ta hinumwêñ ya ha sinagoga ta manoro. <sup>10</sup> Main lalaki bayro ya natsi ya gamêt. An-imatonan la ya hi Apo Jesus hê ungnoy lalaki, no mamaalih yan hakit ha allon pamagsimba la, ta êmêñ la yan badan hê ampanyag yan bawal ha Kautuhan. Nangotang hila kana, “Bawal ha Kautuhan ni apo Moises ya mamaalih hê hakit ha allon pamagsimba, o ahê?” <sup>11</sup> Amêhêñ, hinabi ni Apo Jesus kanla, “No alimbawa ta mimihay tupa yo, haka habaytoy manabo ha malalê ya pangahoyan, a yo ya warin tampol hê iawah allo man hê pamagsimba? <sup>12</sup> Mas maalagá ya tawo ha tupa! Kabay alwan bawal ha Kautuhan ni apo Moises hê manyag kangêran ha allon pamagsimba.” <sup>13</sup> Bayo wana kanan lalaki ya natsi ya mihay gamêt, “Ipaktang moy gamêt mo.” Kaban an-ipaktang na ya, ay naalih ya hakit ha gamêt na, ta hatoy gamêt na ay nag-in nanad ha kapaka ya ayn hakit. <sup>14</sup> Kabay nammita hilay nay Pariseo, ta pinipupulungan lay na hi Apo Jesus.

*Hi Apo Jesus ya impamwang ni Propeta Isaias*

\* <sup>12:7</sup> Oseas 6:6.

<sup>15</sup> Hêñ namwangan ni Apo Jesus ya pamulong kana, ay nag-alíh ya bayro. Kal-atan ya nakihonol kana, haka namaalíh yan kaganawan hakit lan ni-paghakit. <sup>16</sup> Binawal na hila hêñ ipamwang ya tungkol kana. <sup>17</sup> Habaytoy nalyari ta êmén matupad ya impamwang ni Propeta Isaias, ya wana,  
<sup>18</sup> “Atsi di ya pinili kon tagahuyo ko, ya anlugarûn ko, ya ikahigla ko. Ipahapat ko kana ya Espiritu ko, ta êmén na ipamwang ha tawo ha balang bansa, no ay-êmén hila mag-in ayn kapintasan ha hêlêk ko.

<sup>19</sup> A ya makihubakan, haka makiangawan. Naamêý yan mag-habi ha dann.  
<sup>20</sup> Hawpan na hilay alwan makhaw ya lawini, haka hilay alwan nakataniêh ha paniwala. Daygên nay habayto angga ha mabalayan la ya kaligtasan ya an-idin na.  
<sup>21</sup> Habaytoy kaligtasan ya an-êngganan lan tawo ha balang bansa kana.”†

*Ya kapangyarihan ni Apo Jesus ay ubat kan Apo Namalyari, alwan ubat kan Satanas*

(Marcos 3:20-30; Lucas 11:14-23)

<sup>22</sup> Bayo main gintan kan Apo Jesus ya mihay lalaki ya buwag haka pipi ya hinapatan hêñ narawak ya a angkahêlêk. Namiplag hi Apo Jesus hêñ habaytoy narawak ya a angkahêlêk, kabay nakahabi, haka nakahêlêk yay nay lalaki. <sup>23</sup> Naubuh hilan nag-êpapah ya kal-atan ya atsi bayro, ya wanla, “Habaytsi ya lawêh ya kaapo-apoan ni Arin David ya impangako kantamo ni Apo Namalyari!” <sup>24</sup> Noa, pahabtan lan Pariseo, ya pamaalíh ni Apo Jesus hêñ nangarawak ya hinumapat ha tawo, ay ha kapangyarihan ni Satanas,‡ ya poon lan nangarawak ya a angkahêlêk. <sup>25</sup> Muwang ni Apo Jesus ya laman ihip la, ya êndat la no ubat kan Satanas ya kapangyarihan na. Kabay hinabi na, “No alimbawa ta mipapatsi ya angkalokopan hêñ mihay bansa, o balayan ay mahira ya habayto. Embayro êt ya malyari ha mipapamilya ya mipapatsi. <sup>26</sup> No mamipaplag hi Satanas hêñ sarili na, ay mahira bayto ya pamanlokop na. <sup>27</sup> No ampamipaplag akon nangarawak ya a angkahêlêk ha kapangyarihan ni Satanas, hino bayto ya nam-i hêñ kapangyarihan kanlan tagahonol yo, ya ampamipaplag hêñ nangarawak ya a angkahêlêk? Hila tana êt ya mamaptêg ya mali kaw. <sup>28</sup> Ha kapangyarihan nan Espiritu ni Apo Namalyari ya pamaalíh ko hêñ nangarawak ya a angkahêlêk. Ya labay habiêñ hêñ habayto, ay atsi kamoyu ya pamanlokop ni Apo Namalyari.

<sup>29</sup> “Hi Satanas ay nanad ha mihay makhaw, ya mal-at ya almas, ya ampamantay ha bali na. A makwa, ya hinon atsi kana, no a ya pon hambutêñ, haka gapohêñ. Noa, no gapohêñ ko ya, ay makwa ya kaganawan ya atsi kana.

<sup>30</sup> “Hilay ayn pon ha lokop ko, ay kapatsi ko. Haka hilay a ampanawop hêñ manipon hêñ tawo, ta êmén hila makilamo kangko, ay ampamidayo hêñ tawo kangko. <sup>31</sup> Pakagilamêñ yoy habaytsi. Mapatawad hilay mipaghêhê ha nadyag lay kasalanan, haka ha hinabi lan pamaniran kapareho lan tawo, noa, ayn hinoman ya mapatawad ha hinabi lan pamaniran Espiritu ni Apo Namalyari. <sup>32</sup> Hilay maghabi hêñ halanghang kangko, ya Taga-Langit, ya Ìnanak Tawo, ay mapatawad. Noa, hilay maghabi hêñ halanghang ha Espiritu ni Apo Namalyari, ay a mapatawad. Ta habaytoy kasalanan, ay taganán ayn kapatawaran.”

*Ya balang miha ay mabalayan ha dyag la*

(Lucas 6:43-45)

† **12:21** Isaias 42:1-4. ‡ **12:24** Beelzebul ha habin Griego.

<sup>33</sup> “No habiên tamoy mangêd ya mihay kayo, ay mangêd etaman ya tagêy na. No habiên tamon alwan mangêd ya mihay kayo, ay alwa etaman mangêd ya tagêy na. Ta hilay kayo ay angkabalayan ha tagêy la. <sup>34</sup> Nanad kaw utan ya makamatsi! A yon mahabi ya hinoman ya mangêd, gawan ha karawakan yo! Ta ya laman nakêm ay an-umawah ha bêbêy. <sup>35</sup> Hilay mangangêd ay mapanyag hêñ kangêran, gawan mangêd ya nakêm la. Hilay nangarawak ay mapanyag hêñ karawakan, gawan narawak ya nakêm la.

<sup>36</sup> “Pakagilamên yo, ha Allon Pamanukom, ay dapat yon ipamulah kan Apo Namalyari no awta hinabi yo ya balang hinabi yo ya ayn kapukatan. <sup>37</sup> Parusaan na kaw no alwan mangêd ya hinabi yo, haka a na kaw parusaan no mangêd ya hinabi yo.”

*Pinanapolan hi Apo Jesus hêñ kapapaêpapah ya palatandaan ya ubat ha langit*

(Marcos 8:11-12; Lucas 11:29-32)

<sup>38</sup> Main Pariseo haka mánoron Kautuhan ni apo Moises ya labay manubuk kan Apo Jesus, ya mamipahlêk yan palatandaan ya ubat ha langit, ta êmên la mamwangan no pêtêg hêñ atsi kana ya kapangyarihan ni Apo Namalyari.

<sup>39</sup> Noa, wani Apo Jesus kanla, “Bapan dawak hilay tawo amêhêñ. Ampanapol hilan kapapaêpapah ya palatandaan ya ubat ha langit. Noa, ayn ipahlêk kanla, no alwan nanad ha kapapaêpapah ya nalyari kan Propeta Jonas hêñ haton lagi. <sup>40</sup> No ay-êmên hi Propeta Jonas ha tatloy allo haka tatloy yabi, ha bitokan kahlayan pating, ay êmên bayro êt, ay hiko, ya Taga-Langit, ya In-anak Tawo, ay tatloy allo haka tatloy yabi ko ha pinay-ilbêngan kangko.

<sup>41</sup> Ha Allon Pamanukom ni Apo Namalyari, ay mirêng hilay biniyay oman, ya taga-Ninive, ya nipaghêhêñ pamanyag kasalanan la, hêñ nagilam lay toro ni Propeta Jonas, ta habyanan la kaw, gawan main di ya matag-ay ya tungkulon kan Propeta Jonas, yan a kaw naghêhêñ nanalibokot ha pamanyag yon kasalanan. <sup>42</sup> Ha Allon Pamanukom ni Apo Namalyari, ay habyanan na kaw hêñ Reyna ha Sheba hêñ haton lagi. Mipakarêng-êy kaw, ta agyan bapan dayo na, ay nilako na hi Arin Solomon, ta labay nan gilamên ya toro na. Amêhêñ, ay main di, ya mas matag-ay ya tungkulon kan Arin Solomon, noa, a kaw ampanggilam.

*Ya pamag-orong nan narawak ya a angkahêlêk*

(Lucas 11:24-26)

<sup>43</sup> “No umalih ha mihay tawo ya narawak ya a angkahêlêk, ya hinumapat kana, ay tawak-tawakêñ nay namala ya luta, ta manapol yan mapagpatékbêkan na. Noa, ayn yan matapol. <sup>44</sup> Kabay wana ha nakêm na, ‘Mag-orong ko ha tawo ya ubatan ko.’ Pag-orong na, ay malatêng nay ubatan na, ya ayn êt napahili kana, haka habaytoy tawo ay nanad yan bali ya malinis, haka nakakumpini, ya nakal-an hêñ togêlan. <sup>45</sup> Kabay managyat yan pitoy a angkahêlêk ya narawak êt kana, ta paglamo na bayro. Haka humwêñ hila, kabay lalo yay nan kaingalo ya hatoy tawoy inorongan na. Êmbayro êt ya malyari kamoyu ya nakagilam hêñ Mangêd ya Habi, noa, a kaw naghêhêñ nanalibokot kasalanan yo.”

*Hilay ampanggilam habi ni Apo Jesus, ay anlugurêñ na hêñ nanad ha pamalugud na ha indo na, haka hilay patêl na*

(Marcos 3:31-35; Lucas 8:19-21)

<sup>46</sup> Kaban ampaghabi ya pon hi Apo Jesus ha kal-atan, ay nilumatêng ya indo na, haka hilay patêl na, ta labay la yan makahabi. <sup>47</sup> Main naghabi kana, ya wana, “Atsi di ha ilwangan ya indo mo haka hilay patêl mo. Labay la

kan makahabi.” <sup>48</sup> Wani Apo Jesus kana, “Hino ya indo ko, haka hino hilay patêl ko?” <sup>49</sup> Intoro nay tagahonol na, ta wana, “Hilay habaytsi ya anlugurên ko hén nanad ha pamanlugud ko ha indo ko, haka hilay patêl ko. <sup>50</sup> Hilay manyag kalabayan ni Apo Namalyari, ya Tatang ko ha langit, ay yabay ya anlugurên ko hén nanad ha pamanlugud ko ha indo ko, haka hilay patêl ko.”

## 13

### *Ya alimbawa ya tungkol ha bini ya inhabwag (Marcos 4:1-9; Lucas 8:4-8)*

<sup>1</sup> Habayto êt hén allo, ay inumawah hilan Apo Jesus ha bali, ta nikno ya ha laylay lanêm hén nanoro kanla. <sup>2</sup> Gawan ha hadyay kal-atan ya ampipagtspion hén labay manggilam toro na, ay hinumakay ya ha mihay bangka, ta bayro yan nikno hén nanoro kanlan kal-atan ya atsi ha laylay hén lanêm. <sup>3</sup> Ha pamanoro na kanla, ay mal-at ya paalimbawa, ya wana, “Main mihay lalaki ya namihabwag hén bini. <sup>4</sup> Ha pamihabwag nan bini, ay main bini ya natata ha dann. Habaytoy tinuktuk hén manok. <sup>5</sup> Ya kaatag ay natata ha mabato. Tampol yan tinumubo, gawan ha mababo ya luta. <sup>6</sup> Noa, hén nangallo, ay nayanto ya, gawan a nipakalalê ya yamot. <sup>7</sup> Ya kaatag ay natata ha kadiwian. Tinumubo ya bini, noa, tinuméytéy, gawan diwi. <sup>8</sup> Ya kaatag ay natata ha mataba ya luta. Tinumubo ya habaytoy bini haka naubuh hén nanagéy, hén main manimagatoh ya lahí, anêmapo, haka tatlumpo.” <sup>9</sup> Hén nahabi nay habayto ni Apo Jesus, ay wana êt, “Pakaihipên yo ya nagilam yo!”

### *No pata paalimbawa ya panoro ni Apo Jesus (Marcos 4:10-12; Lucas 8:9-10)*

<sup>10</sup> Dinumani kan Apo Jesus hilay tagahonol na ta nangotang hila, ya wanla, “Pata panay paalimbawa ya pamanoro mo kanlan kal-atan?” <sup>11</sup> Kabay wani Apo Jesus kanla, “Hikaw bat ya makamwang hén inlihim ya tungkol ha pamanlokop ni Apo Namalyari, noa, a na impamwang ya habayto ha kaatag. <sup>12</sup> No honolên yoy toro ko, ay mapahanan ya pamangintindi yo, noa, no a yon honolên, ay alihén êt kamoyu ya pêpérâd ya naintindihan yo. <sup>13</sup> Kabay an-idann ko ha alimbawa ya pamanoro ko kanla, ta ‘Manlék hila man, ay a la mamwangan ya anhélkén la. Magilam la man, ay a hila manggilam, haka a la angkaintindihan ya angkagilaman la.’ <sup>14</sup> Angkatupad kanla ya impamwang ni Propeta Isaias, ya wana hén hato, ‘Pakagilamén yo man, ay a yo maintindihan, haka pakahélkén yo man, ay a yo mamwangan ya anhélkén yo.

<sup>15</sup> A hila malyarin maniwala gawan kinumdêy ya ulo la. Ampagtêtékk hila, haka an-ipérêng lay mata la. Ta kayno maintindihan la, haka maghêhê hilan dumani kangko, bayo patawarên ko hila.”\*

<sup>16</sup> Noa, hikaw, ay iningalwan, kabay angkaintindihan yo ya angkakit yoy andaygén ko, haka angkaintindihan yoy anhabiên ko. <sup>17</sup> Hén hato, ay mal-at ya mámpamwang hén an-ipaihip kanla ni Apo Namalyari, haka kaatag pon ya mahonol kana, ya labay-labay dayi hén makahélék hén angkakit yo ya andaygén ko. Labay-labay la dayin magilaman ya anhabiên ko ya angkagilaman yo. Noa, a la nahélék ya angkakit yo, haka a la êt nagilam ya angkagilaman yo.”

### *Impamwang ni Apo Jesus ya labay habiên hén habaytoy alimbawa ya tungkol ha bini ya inhabwag (Marcos 4:13-20; Lucas 8:11-15)*

\* <sup>13:15</sup> Isaias 6:9-10.

<sup>18</sup> “Gilamén yoy habaytsi ya labay habiên hēn alimbawa ya tungkol ha bini. <sup>19</sup> Ya bini ay habi ni Apo Namalyari hēn tungkol ha pamanlokop na. Ya nakêm tawo ay in-alimbawa ha natataan bini. Ya bini ya natata ha dann ay habi ni Apo Namalyari ya nagilam lan tawo, noa, a la naintindihan, bayo tampol nilumatêng hi Satanas, ta inalih nay habaytoy habi ha nakêm la. <sup>20</sup> Ya bini ya natata ha kabatoan, ay habi ni Apo Namalyari ya nagilam haka tinanggap lan tawo hēn main kahiglaan, <sup>21</sup> noa, a nimana ha nakêm la. Naniwala hila pon, noa, hēn nilumatêng ya kairapan o ya pamairap, ay tampol naalih ya paniwala la. <sup>22</sup> Ya bini ya natata ha kadiwian ay habi ni Apo Namalyari ya ginilam lan tawo, noa, tampol nialih ha nakêm la, gawan kayagahan, pibandian, haka katsighaw hēn biyay. Kabaya nabayo ya biyay la, hēn nanad ha a nanagêy ya bini. <sup>23</sup> Ya bini ya inhabwag ha mataba ya luta ay habi ni Apo Namalyari ya nagilam haka naintindihan lan tawo, bayo nimana ha nakêm la, ya nanad ha lahí ya naubuh hēn nanagêy hēn main manimagatoh ya lahí, anêmapo, haka tatlumpo.”

### *Ya alimbawa ya tungkol ha lamon ya tinumubo ha pinay-êharan trigo*

<sup>24</sup> Impamwang kanla ni Apo Jesus ya miha pon ya alimbawa, ya wana, “Ya pamanlokop ni Apo Namalyari ay maialimbawa ya êmén di: Main mihay lalaki ya namiéhad hēn mangêd ya bini hēn trigo. <sup>25</sup> Noa, hēn mihay yabi, hēn angkabêlêw hilangan, ay nilumatêng ya kapatsi na hēn namihabwag hēn tagêy hēn lamon ha pinay-êharan trigo, bayo nammita yay na. <sup>26</sup> Tinumuboy trigo haka nakisabay hēn tinumuboy lamon. Hēn nanagêy ya trigo, ay napansin lan tagahuyo nan lalaki ya lamon. <sup>27</sup> Kabaya dinumani hila kana, ta wanla, ‘Êndat naêñ ya mangêd ya binin trigo ya in-êhad. Ay-irin ubat ya hata lamon?’ <sup>28</sup> Hinabi nan lalaki, ya wana, ‘Main kapatsi ya namihabwag hēn tagêy hēn lamon bayri.’ Kabaya nangotang hilay tagahuyo na, ‘Labay mon lamonêñ naêñ ya?’ <sup>29</sup> Noa, wanana lalaki, ‘Paan pon. Ta no lamonêñ yo, ay maulot yoy trigo etaman. <sup>30</sup> Paulayan yoy na hēn makisabay, hēn angga ha panggapah. No panaon hēn panggapah, ay habiên ko tana ha manggapah ya unaêñ la pon alihêñ ya lamon, haka la pêpêthêñ ta ulamêñ. Bayo gapahêñ ya trigo ta ihimpan.’”

### *Ya pamanlokop ni Apo Namalyari ay in-alimbawa ni Apo Jesus ha pamantumubo hēn mihay nanaway but-o*

*(Marcos 4:30-32; Lucas 13:18-19)*

<sup>31</sup> Namitoro hi Apo Jesus hēn miha pon ya alimbawa, ya wana kanla, “Ya pamanlokop ni Apo Namalyari ay maialimbawa ha pamantumubo hēn mihay nanaway but-o ya intanêñ. <sup>32</sup> Iibon man ya but-o, ay hinumlay yan nag-in kayo, kabaya nipanyag halay ya manok-lalê ha hanga na.”

### *In-alimbawa ni Apo Jesus ya pamanlokop ni Apo Namalyari ha pampaalsa (Lucas 13:20-21)*

<sup>33</sup> Namitoro hi Apo Jesus hēn miha pon ya alimbawa, ya wana kanla, “Ya pamanlokop ni Apo Namalyari ay maialimbawa ha pampaalsa ya pinaki-gawgaw hēn mihay babayi ha kal-atan hēn arina, haka nilum-at ya habaytoy kal-atan.”

### *Impamwang hēn haton lagi ya paalimbawa ya toro nan Mesias, ya Cristo (Marcos 4:33-34)*

<sup>34</sup> Hēn nanoro hi Apo Jesus kanlan kal-atan, ay panay main hēn alimbawa ha panoro na. <sup>35</sup> Embayroy panoro na ta êmén matupad ya impamwang nan mihay mâmipamwang hēn impaihip kana ni Apo Namalyari, ya wana, “Ya panoro ko kanla ay paalimbawa.

Ipamwang ko ya inlihim paubat hēn dinyag ya hata luta.”†

*Impamwang ni Apo Jesus ya labay habiēn hēn alimbawa ya tungkol ha lamon ha trigo ya in-êhad*

<sup>36</sup> Amêhêñ, imbalag ni Apo Jesus ya kal-atan, ta hinumwēñ ya ha bali. Haka dinumani kana ya tagahonol na, ta wanla, “Ipamulah mo kannaēñ ya alimbawa ya tungkol ha lamon ha trigo ya in-êhad.” <sup>37</sup> Hinabi na etaman, ya wana, “Hiko, ya Taga-Langit, ya In-anak Tawo, ay in-alimbawa ha namiêhad hēn mangêd ya bini hēn trigo. <sup>38</sup> Ya in-alimbawa ha pinay-êharan ay boon luta, haka ya in-alimbawa ha mangêd ya bini hēn trigo, ay hilay palokop kan Apo Namalyari. Ya in-alimbawa ha lamon, ay hilay angkalokopan ni Satanas, <sup>39</sup> haka ya in-alimbawa ha namihabwag tagêy lamon, ay hi Satanas. Ya in-alimbawa ha panggapah, ay yabay ya kaanggaan hēn hata luta, haka ya in-alimbawa ha manggapah, ay hilay anghel ni Apo Namalyari. <sup>40</sup> No ay-êmêñ tsinipon ya hatoy lamon, bayo inulam, ay êmbayro etaman ha anggaan hēn hata luta. <sup>41</sup> Gawan hiko, ya Taga-Langit, ya In-anak Tawo, ay mamiutoh hēn anghel ko ha boon pamanlokop ko, ta tsiponêñ lay balang ampangubatan kasalanan, haka hilay mapanyag karawakan, <sup>42</sup> ta ihamwag hila ha apoy ya a angkaparê. Hadyay tangih la bayro, haka mipang-ngê-ngêt hila ha hadyay huluk la, boy ha hadyay ilab ya angkatanam la. <sup>43</sup> Noa, hilay mahonol kana, ay mag-in nanad allo ya ampam-in hawang ha pamanlokop ni Apo Namalyari ya Tatang la. Pakaihipêñ yo ya nagilam yo.”

*In-alimbawa ni Apo Jesus ya pamanlokop ni Apo Namalyari ha maalagáy pibandian ya ayn kapantag*

<sup>44</sup> Inhundo ni Apo Jesus ya panoro na, ya wana, “Ya pamanlokop ni Apo Namalyari ay maialimbawa ha maalagáy pibandian ya ayn kapantag, ya nakali ha lutan kaatag, bayo hinapolan oman. Ha hadyay kahiglaan nan nakatapol, ay nuli ya, ta in-ubuh nan inhaliw ya atsi kana, ta hinaliw nay habaytoy luta ya nag maalagáy pibandian ya ayn kapantag.”

*In-alimbawa ni Apo Jesus ya pamanlokop ni Apo Namalyari ha mihay maalagáy perlas*

<sup>45</sup> Inhundo ni Apo Jesus ya panoro na, ya wana, “Ya pamanlokop ni Apo Namalyari ay maialimbawa êt ha mihay mangalakal ya ampanapol hēn maalagáy perlas. <sup>46</sup> Hēn nakahêlêk yan mihay perlas ya hadyay maalagá, ay in-ubuh nan inhaliw ya atsi kana, ta hinaliw nay habaytoy hadyay maalagáy perlas.”

*In-alimbawa ni Apo Jesus ha lambat, ya pamanlokop ni Apo Namalyari*

<sup>47</sup> Inhundo ni Apo Jesus ya panoro na, ya wana, “Ya pamanlokop ni Apo Namalyari ay maialimbawa êt ha lambat ya inhamwag ha dagat, ya nakakwa hēn hino-hino kay na hēn ya kênan lanêm. <sup>48</sup> Hēn napno ya habayto, ay ginuloy la ha laylay, ta nikno hilan impapawa ya habaytoy makêna haka a makêna. Bayo la intapon ya a makêna. <sup>49</sup> Êmbayro etaman ha anggaan hēn hata luta. Ipapawa lan anghel, hilay mapanyag karawakan kanlan mahonol kan Apo Namalyari. <sup>50</sup> Hilay mapanyag karawakan, ay ihamwag ha impiyerno ya hadyay apoy ya a angkaparê. Hadyay tangih la bayro, haka mipang-ngê-ngêt hila ha hadyay huluk la, boy ha hadyay ilab ya angkatanam la.”

*Dapat parehon dyanan alagá ya manan toro haka ya bayon toro*

---

† 13:35 Awit 78:2.

<sup>51</sup> Kinotang ni Apo Jesus hilay tagahonol na hēn tungkol ha intoro na kanla, ya wana, “Naintindihan yoy habayto?” Wanla etaman, “Awo. Angkaintindihan naen.” <sup>52</sup> Wanay na êt ni Apo Jesus, “Kabay maintindihan yo etaman ya habaytsi: hilay mánoron Kautuhan ni apo Moises ya ampaniwala ha an-itoro ko ya tungkol ha pamanlokop ni Apo Namalyari, ay maialimbawa ha mihay main bali, ya tampol hēn maiawah ha dyanan pibandian na ya mana haka ya bayo. Gawan pareho lan maitoro ya manan toro haka ya bayon toro.”

*Aya pinaniwal-an hi Apo Jesus ha balayan Nazaret, ya pinanhumlayan na (Marcos 6:1-6; Lucas 4:16-30)*

<sup>53</sup> Hēn naitoro nay na ya habaytoy alimbawa, ay nag-alíh yay na bayro. <sup>54</sup> Hēn nilumatêng ya ha Nazaret, ya balayan ya pinanhumlayan na, ay hinumwēn ya ha sinagoga la, ta nanoro ya. Haka ha pamanoro na, ay nipag-épapah hilay nakagilam, ya wanla, “Ay-iri nan nakwa ya kamwangan na boy ya kapangyarihan na hēn manyag hēn kapapaépapah?” <sup>55</sup> “Daptay hiyay anak ni Jose, ya kalpintero, ya kabalayan tamo. Yarin alwan Maria ya langan hēn indo na! Yarin alwan hiyay patêl lan Santiago, Jose, Judas, haka hi Simon! <sup>56</sup> Yarin alwan kabalayan tamo ya patêl naybabay! Ay-iri nan nakwa ya kamwangan na, haka kapangyarihan nan manyag hēn kapapaépapah?” <sup>57</sup> Kabay a la ya tinanggap. Noa, wani Apo Jesus kanla, “Hilay propeta ni Apo Namalyari, ay anggalangén ha agyan ayri ya legal, noa, a hila ampansinén hēn kamag-anak la haka kabalayan la.” <sup>58</sup> Gawan ayn hilan paniwala kana, ay pérad bat ya kapapaépapah ya dinyag na bayro.

## 14

*Ya kamatsan ni Juan Bautista  
(Marcos 6:14-29; Lucas 9:7-9)*

<sup>1</sup> Hēn habayto, ya tungkol ha andaygén lan Apo Jesus ay nagilam ni Herodes Antipas, ya ampamaala ha probinsyan Galilea. <sup>2</sup> Kabay wana kanlan ampag-obra ha bali na, “Ya ambaégén lan Jesus, ay taganán hi Juan Bautista ya impapotoh kinay ulo, ya nabiyay oman, kabay ampakadyag yan kapapaépapah!”

<sup>3</sup> Hinabi nay habayto gawan hiyay naypadakép, naypagapoh, haka nay-pahukul kan Juan Bautista gawan bat kan Herodias. Habaytsi hi Herodias, ay ahawa ni Felipe, ya ali ni Herodes Antipas, ya bat nan pinag-ahawa ni Herodes Antipas. <sup>4</sup> Panay nan an-ungkatén kan Herodes Antipas, ni Juan Bautista, ya wana, “Bawal ha Kautuhan ya pamag-ahawa mo kan Herodias, ya ahawan ali mo!” <sup>5</sup> Kabay labay na dayi ni Herodes Antipas hēn ipapatsi hi Juan Bautista, noa, malimo ya kanlan kal-atan, gawan ha muwang la, hi Juan ay mihay propeta ni Apo Namalyari.

<sup>6</sup> Ha kaluto, ha allon pamanémítêm ha pay-anak kan Herodes Antipas, ay timmalék ya anak ni Herodias ha arapan kal-atan. Haka hinumigla hi Herodes Antipas ha pamagtalék nan dalaga, <sup>7</sup> kabay impangako na kana, hēn main kalamoy humpa, ya idin na kana ya hinon pakikwaan na. <sup>8</sup> Gawan ha hinabi kana hēn indo na, ay pinakikwaan nan dalaga ya ipapotoh ni Herodes Antipas ya ulo ni Juan Bautista, ta idin kanan dalaga ya habayto, hēn nakapalunto ha pinggan. <sup>9</sup> Hadyay lungkot ni Herodes Antipas hēn pakikwaan kana hēn dalaga ya habayto, noa, a nay na mapag-agkoan, gawan naghumpa ya, haka gawan ha kal-atan ya hinagyat na ha kaluto. Hēn habayto êt, ay in-utoh nay mihay hundaloh ha hukulan hēn potohēn nay ulo ni Juan Bautista. <sup>10</sup> Tampol yan nammita ya in-utoh na ha hukulan, ta pinotoh nay ulo ni Juan, haka <sup>11</sup> na impalunto ya ulo ha pinggan, ta indin

kanan dalaga, bayo indin nan dalaga ha indo na. <sup>12</sup> Hên namwangan lan tagahonol ni Juan ya nalyari kana, ay kingwa la ya bangkay na, haka lay na in-ilbêng. Bayo impamwang la kan Apo Jesus ya nalyari.

*Liman libo ya pinakan ni Apo Jesus  
(Marcos 6:30-44; Lucas 9:10-17; Juan 6:1-14)*

<sup>13</sup> Hên nagilam lan Apo Jesus ya nalyari kan Juan Bautista, ay nagbangka hilan palipay ha legal ya kabalah-balahan. Noa, hên namwangan lan kalatan ya pagpalakwan lan Apo Jesus, ay binitisih lan inunaan hilan Apo Jesus, hên kalamo hilay ubat ha kaganawan balayan ya dinanan la. <sup>14</sup> Hên pataoy hilan Apo Jesus ha bangka, ay nahêlêk lay kal-atan. Naingalwan na hila, ni Apo Jesus, haka namaalih yan hakit lan nipaghakit ya gintan la.

<sup>15</sup> Hên maranin matata ya allo ay dinumani kana ya labinlowa hên naghabi kana, ya wanla, “Ayn bali di, haka maranin matata ya allo. Dayi ipalako mo hilay kal-atan ha balang baryo, ya narani di, ta êmén hila makatsikap hên maêkan la.” <sup>16</sup> Noa, hinabi na kanla, ya wana, “A la kailangan hên mita. Hikaw tanay mam-i kanla hên maêkan la.” <sup>17</sup> Hinabi la etaman, “Main kitamon bêngat hên limay puto haka loway kênlan lanêm.” <sup>18</sup> Wana kanla ni Apo Jesus, “Gêtan yo di kangko ya habayto.” <sup>19</sup> Amêhêñ, pinaikno ni Apo Jesus ya kal-atan ha pagpastolan bayro. Kingwa ni Apo Jesus ya limay puto haka loway kênlan lanêm. Naningla ya, ta pinahalamatan nay habayto kan Apo Namalyari. Pino-potoh nay habayto, bayo indin na kanlan tagahonol na, ta itayak la kanlan kal-atan. <sup>20</sup> Balang miha kanla ay nakaêkan angga ha nangabhoj hila. Hên tsinipon la ya tagan, ay nakapno hila êt hên labinloway lubon. <sup>21</sup> Main liman libo ya lalaki ya nangan. Main êt kal-atan ya babayi haka anak ya nangan.

*Nammita hi Apo Jesus ha babon lanêm  
(Marcos 6:45-52; Juan 6:15-21)*

<sup>22</sup> Tampol nan pinahakay ni Apo Jesus ha bangka hilay tagahonol na hên impauna hên lumipay, kaban nagtsipan ya pon kanlan kal-atan. <sup>23</sup> Hên nagtsipan yay na ha kal-atan, ay nilumakat yan nanalangin hên kakapag na. Namawatah ya bayron miha na. <sup>24</sup> Ya bangka ya anhakyen lan tagahonol na, ay atsi ha marayo-dayo hên panhalungatêñ hên makhaw ya angin haka tandulon. <sup>25</sup> Hên mawatah, ay nilako na hila hên nammita ha babon lanêm. <sup>26</sup> Hên nahêlêk la yan ampita ha babon lanêm, ay nipan-angaw hila ha hadyay limo la, ya wanla, “Main kamana!” <sup>27</sup> Noa, tampol nan hinabi kanla, “Paan kaw malimo. Pakhawêñ yoy nakêm yo! Hikoy habaytsi.” <sup>28</sup> Hên nagilam ni Pedro ya habayto, ay wana, “Panginoon, no pêtêg hên hika ya habain, ay palakwêñ mo ko bahêñ hên mita ha babon lanêm.” <sup>29</sup> Wani Apo Jesus etaman kana, “Galing mina di awud!” Kabay nagtaoy hi Pedro ha bangka, ta nammita yay na ha babon lanêm hên palako kan Apo Jesus. <sup>30</sup> Noa, hên napansin nay hadyay angin, ay nalimwan ya, haka ampilêmêh yay na, kabay nan-angaw ya, ya wana, “Panginoon, iligtas mo ko!” <sup>31</sup> Tampol yan dinwang ni Apo Jesus, bayo wana kana, “Kulang pon awud ya paniwala mo! Pata ampag-alangan ka!” <sup>32</sup> Hên nakahakay hilay na ha bangka, ay tinunggêñ ya angin. <sup>33</sup> Sinimba hi Apo Jesus hên hilay atsi ha bangka, ya wanla, “Taganán pêtêg hên hika awud ya Anak ni Apo Namalyari!”

*Pinaalih ni apo Jesus ya kaganawan hakit la ha legal hên Genesaret  
(Marcos 6:53-56)*

<sup>34</sup> Pamakalipay lan Apo Jesus, ay tinumaoy hila ha bangka ha legal hên Genesaret. <sup>35</sup> Hên nabalayan la yan taga-bayro, ay pinarah lan impamwang

ha boon logal ya habayto, ya nilumatêng hilan Apo Jesus. Kabay gintan la ya kaganawan ya main hakit kana. <sup>36</sup> Ampakiingalo hila kan Apo Jesus ya agyan laylayan dayin takop na, ya magapa lan ampaghakit. Haka hilay nakagapa takop na, ay naalihan etaman hakit.

## 15

*Ya natotoan la ha ninuno la, ay alwan pareho ha Kautuhan ni Apo Namalyari*

(Marcos 7:1-13)

<sup>1</sup> Panga-ubat hên habayto, ay main ungnoy Pariseo haka mánoron Kautuhan ni apo Moises ya ubat ha balayan Jerusalem, ya nipandumani kan Apo Jesus, ta nangotang hila kana, ya wanla, <sup>2</sup> “Pata a hila anhumonol ya tagahonol mo ha natotoan tamo ha ninuno tamo, no ay-êmén ya pamag-uyah bayo mangan?” <sup>3</sup> Bayo wana êt ni Apo Jesus, “Magaling kaw hên itad hên ayn alagá ya in-utoh ni Apo Namalyari, mahonol yon bat ya natotoan yo ha ninuno yo! <sup>4</sup> Ta namiutoh hi Apo Namalyari, ‘Galangén moy tatang haka indo mo,’ haka ‘Hinoman ya maniran toa na, ay dapat patsên.’ <sup>5</sup> Noa, an-itoro yo ya malyarin ialay kan Apo Namalyari, ya dapat ihawop ha toa. Ha pamanoro yon habayto, ay an-ibawal yoy pamanawop ha toa. <sup>6</sup> Antotoén yoy ninuno yo, ta an-itad yon ayn alagá ya Habi ni Apo Namalyari. Haka kal-atan pon ya êmbahên ya andaygén yo. <sup>7</sup> Ampagbabara kaw hên mangéd! Pêtêg ya impapêt ni Propeta Isaias ya tungkol kamoyu, ya wana ha Kahulatan ya impahulat ni Apo Namalyari,

<sup>8</sup> ‘Ya pamagpuri la kangko, ay atsin bat ha bêbêy la, ta ayn ha nakêm la.

<sup>9</sup> Ayn kapukat-pukat ya pamagsimba la kangko, ta ya natotoan la ha ninuno, ay an-itoro la hên nanad ha paytoro la hên Kautuhan ko.’ ”\*

*Ya ampakarêmék ha hêlêk ni Apo Namalyari ay angkaubat ha nakêm*

(Marcos 7:14-23)

<sup>10</sup> Bayo pinarani ni Apo Jesus ya kal-atan, ta wana kanla, “Manggilam kaw haka pakaintindién yoy habaytsi. <sup>11</sup> Alwan pamangan ya an-ihubo ha bêbêy ya ampakarêmék hên tawo ha hêlêk ni Apo Namalyari, noa, ya nangarawak ya habi ya angkaubat ha bêbêy.”

<sup>12</sup> Pangayari nan naghabi, ay dinumani hila kan Apo Jesus hilay tagahonol na, ta wanla kana, “Muwang mo ya nahakitan ya nakêm lan Pariseo ha hinabi mo?” <sup>13</sup> Hinabi ni Apo Jesus kanla ya wana, “Ya kaganawan tanaman ya a intanêm ni Apo Namalyari, ya Tatang ko ha langit, ay ulutên. <sup>14</sup> Paulayan yo hila. Nanad hilan buwag ya ampangakay ha kapareho lan buwag. Ya mihay buwag ay a makaakay hên kapareho nan buwag, ta pareho hilan minabo ha malalê ya lubot.” <sup>15</sup> Bayo hinabi ni Pedro kan Apo Jesus, ya wana, “Ipamulah mo kannâen daw, ya labay habiên hên habaytoy alimbawa ya tungkol ha ampakarêmék hên tawo ha hêlêk ni Apo Namalyari.” <sup>16</sup> Wana etaman kanlan Pedro, “Hikaw man, ay a kaw ampakaintindi? <sup>17</sup> Alwan pamangan ya an-ihubo ha bêbêy ya ampakarêmék hên tawo ha hêlêk ni Apo Namalyari, ta ya pamangan, ay ampidann ha bitoka bayo itaká. <sup>18</sup> Noa, ya nangarawak ya habi ya angkaubat ha bêbêy, ay yabay ya ampakarêmék hên tawo ha hêlêk ni Apo Namalyari. <sup>19</sup> Ta angkaubat ha nakêm ya kaihipan hên manyag karawakan, nanad ha manyag karawakan kalabayan lawini, manakaw, mamatsin kapareho, mamabayi haka makilalaki, manistigos ha alwan pêtêg, haka maniran kapareho. <sup>20</sup> Habaytoy dyag ay angkaubat ha nakêm, haka ampakarêmék hên tawo ha hêlêk ni Apo Namalyari. Noa, a

\* <sup>15:9</sup> Isaias 29:13.

ampakadêmek ha hêlêk ni Apo Namalyari ya mangan hêñ a pon nag-uyah, hêñ nanad ha toro hêñ ninuno tamo.”

*Ya paniwala hêñ mihay babayi ya alwan Israelita  
(Marcos 7:24-30)*

<sup>21</sup> Immalih hilan Apo Jesus bayro, ta nunta hila ha Tiro haka Sidon, ya legal hêñ alwan Israelita. <sup>22</sup> Main bayron babayi ya taga-Canaan, ya dinumani kan Apo Jesus, ya namaëg, ya wana, “Panginoon, ya kaapo-apoan ni Arin David! Ingawan mo ko! Ya anak koy babayi ay hinapatan hêñ narawak ya a angkahêlêk, ya hadyay ampamairap kana.” <sup>23</sup> Noa, ayn yan hinabi hi Apo Jesus. Kabay dinumani kan Apo Jesus ya tagahonol na ta wanla, “Paalihêñ mo yay na, ta ampi-angaw-angaw ya.” <sup>24</sup> Hinabi na ha babayi ya wana, “In-utoh akon bêngat kanlan Israelita ya nanad tupa ya nitama.” <sup>25</sup> Noa, nandoko ya ha arapan ni Apo Jesus ta wana, “Panginoon, hawpan mo ko!” <sup>26</sup> Noa, wani Apo Jesus kana, “Pakangêren kon antoroan haka anhawpan ya hilay Israelita. Ta habaytoy taganán usto.” <sup>27</sup> Noa, hinabi nan babayi, ya wana, “Panginoon, mangêd ya habayto, noa, yarin a minan hawpan ya alwan Israelita, no hadyay pamairap ya angkatanam la!” <sup>28</sup> Kabay hinabi ni Apo Jesus kana, ya wana, “Makhaw awud ya paniwala mo! Mahonol ya kalabayan mo!” Tampol etaman impaplag ya namairap ha anak na.

*Namaalih hi Apo Jesus hêñ hakit lan kal-atan*

<sup>29</sup> Hêñ nag-alih ya bayro hi Apo Jesus, ay nagdann ya ha laylay hêñ Dagat-dagatan hêñ Galilea. Bayo nilumakat ya ha tawtgug, ta nikno ya bayro. <sup>30</sup> Main kal-atan ya dinumani kana ya ampantan hêñ pilay, buwag, pokol, pipi, haka kaatag pon ya ampipaghakit. Indin hila ha arapan ni Apo Jesus, haka hiyay namaalih hêñ hakit la. <sup>31</sup> Kabay nipag-êpapah hilay kal-atan ha nahêlêk lay ampakahabi hilay pipi, naalih ya pagkasingkol lan singkol, ampakabitay nay pilay, haka ampakahêlêk hilay nay buwag. Ha nahêlêk la ay pinuri la hi Apo Namalyari ya Diyos lan Israelita.

*Apat ya libo ya pinakan ni Apo Jesus  
(Marcos 8:1-10)*

<sup>32</sup> Binaëg ni Apo Jesus ya tagahonol na, ta wana kanla, “Kaingalo hilay kal-atan, ta tatloy nay allo la di, haka ayn hilay nan maëkan. No pauliën ko hilan angkablay lonoh, ay kayno mawê hila ha dann.” <sup>33</sup> Wanlan tagahonol na etaman, “Ay-êmén tamo hilan mapakan ya hata kal-atan?” <sup>34</sup> Kinotang hila ni Apo Jesus, “Main kitamo pon hêñ puto?” Hinabi la kana, ya wanla, “Main tanan pito, haka uungnay nanaway kênan lanêm ya pinirito.” <sup>35</sup> Bayo pinaikno na hilay kal-atan ha luta. <sup>36</sup> Haka dinampot nay pitoy puto boy ya kênan lanêm, ta impahalamat na kan Apo Namalyari, bayo pino-potoh nay habayto, ta impatayak na kanlan tagahonol na. <sup>37</sup> Naubuh hilan nangabhoy ya kal-atan, haka hêñ tsinipon lay natagan, ay nakapno hila hêñ pitoy tiklis. <sup>38</sup> Main apat ya libo ya lalaki ya nakaëkan. Main êt babayi haka anak ya nakaëkan.

<sup>39</sup> Bayo nagtsipan yay na kanlan kal-atan hi Apo Jesus, ta hinumakay hilan Apo Jesus ha bangka hêñ palako ha legal hêñ Magadan.

## 16

*Ampanapol hilay Pariseo haka hilay Saduseo hêñ kapapaêpapah ya ubat ha langit  
(Marcos 8:11-13; Lucas 12:54-56)*

<sup>1</sup> Main Pariseo haka Saduseo ya labay manubuk kan Apo Jesus, ya mampahlék yan kapapaépapah, ya ubat ha langit, ta êmén la mamwangan no pêtèg hén atsi kana ya kapangyarihan ni Apo Namalyari. <sup>2</sup> Noa, wani Apo Jesus kanla, “No angkatatay nay allo ta nag yayo, ay habiên yo, ‘A ya manguran nobukah ta nag yayo.’ <sup>3</sup> No ha maranon ta tsinumilêm ya ginêm, ay habiên yo, ‘Manguran améhén.’ Muwang yo no hinoy labay habiên hén angkahélék yo ha langit. Yarin a yo muwang ya balang kapapaépapah ya andaygén ko, ay palatandaan hén nilumatêng ya pamanlokop ni Apo Namalyari! <sup>4</sup> Bapan dawak kaw, ta antalibatokan yo hi Apo Namalyari. Ampanapol kaw hén kapapaépapah ya ubat ha langit. Noa, ayn ipahlék kamoyu, no alwan ya nanad ha naipahlék hén hato, ya tatloy allo yan nabiyay ha bitokan pating hi Propeta Jonas.”\* Habayto tanay hinabi ni Apo Jesus, bayo nammita yay na.

*In-alimbawa ni Apo Jesus ha pampaalsa, ya panapol lan Pariseo hén kapapaépapah ya ubat ha langit*

*(Marcos 8:14-21)*

<sup>5</sup> Hén anlumipay hilay na ha Dagat-dagatan hén Galilea, ay napansin lan tagahonol ni Apo Jesus ya naliwaan la hén mantan puto. <sup>6</sup> Bayo wani Apo Jesus kanla, “Taganán dapat kaw hén kaillag ha pampaalsa lan Pariseo haka Saduseo.” <sup>7</sup> Gawan ha hinabi ni Apo Jesus, ay êndat lan tagahonol na, no mantêg pampaalsa hén arina ya hinabi na kanla, kabay nihahabi hila, ya wanla, “Hinabi nay habayto gawan a kitamo nakagêtan puto.” <sup>8</sup> Muwang ni Apo Jesus ya ampihabian la, kabay wana kanla, “Kulang ya paniwala yo kangko! Pata an-ikayagah yoy a kaw nakagêtan puto! <sup>9</sup> A kaw pon awud hén ampakaintindi! A yo pon angkakwan ihipén no ay-irin ubat ya kapangyarihan ko! Naliwaan yoy na lawêh hén pinakan koy liman libo ha liliimay puto, haka no ungnoy lubon ya napno hén tagan! <sup>10</sup> Naliwaan yoy na lawêh hén pinakan koy apat ya libo ha pi-pitoy puto, haka no ungnoy tiklis ya napno hén tagan! <sup>11</sup> Yarin a kaw pon ampakaintindi ya alwan tungkol ha puto ya hinabi ko hén wangko ya dapat kaw kaillag ha pampaalsa lan Pariseo haka Saduseo!” <sup>12</sup> Naintindihan lay na bayto, ya alwa awud pampaalsa hén puto ya anhabiên na kanla. Noa, ampaillagén hila ha alwan pêtèg ya toro lan Pariseo haka Saduseo, ta ya panoro la ay makaalit hén ihip hén nanad ha pamikalat hén pampaalsa ha arina ya andaygén puto.

*Hinabi ni Pedro ya hi Apo Jesus, ay hiyay Mesias, ya Cristo, ya impangakon Mámiligtas*

*(Marcos 8:27-30; Lucas 9:18-21)*

<sup>13</sup> Hén nilumatêng hilan Apo Jesus ha logal hén Cesarea Filipos, kinotang na hilay tagahonol na, “Hinoy anhabiên lan tawo ya tungkol kangko, ya Taga-Langit, ya In-anak Tawo?” <sup>14</sup> Kabay hinabi la, “Wanlan kaatag ya hika ay hi Juan Bautista. Noa, wanlan kaatag êt ya hika ay hi Propeta Elias. Hilay kaatag êt ay ampaghabin nabiyay oman hi Propeta Jeremias, o ya miha kanlan kaatag ya propeta ni Apo Namalyari.” <sup>15</sup> Wana êt kanla ni Apo Jesus, “Kamoyu etaman, hino ko ha ihip yo?” <sup>16</sup> Wani Pedro etaman, “Hika ya Mesias, ya Cristo, ya impangakon Mámiligtas, ya Anak nan angkabiyay hén ayn angga ya hi Apo Namalyari.” <sup>17</sup> Wani Apo Jesus kana, “Iningalwan ka Simon, anak ni Jonas, ta kakapag ni Apo Namalyari, ya Tatang ko ha langit, ya namipamwang hén habayto kamo. <sup>18</sup> Pakagilamén moy anhabiên ko kamo, Pedro. Ya labay habiên hén langan mo ay bato. Haka ha bato ya habaytsi,

\* **16:4** Hêlkên ya langan Jonas ha panlêkan habi di ha bokotan Bibliya.

ya nanad pampah-êy bali, ay ipairêng ko ya nanad bali ko, ya kabooan hên kapareho mon ampaniwala ya hikoy Cristo. Haka a hila mahambut hên kapangyarihan hên kamatsan, ta dyanan hila hên biyay ya ayn angga. <sup>19</sup> Idin ko kamo ya tungkulon ya nanad antalanêm moy susi hên pamanlokop ni Apo Namalyari. Kabay ya bawalên mo bayri ha luta, ay bawalên ni Apo Namalyari ya atsi ha langit, haka ya a mo bawalên bayri ha luta, ay a etaman bawalên ni Apo Namalyari.” <sup>20</sup> Bayo impapakabawal hila ni Apo Jesus hên ipamwang ha hinoman ya hiyay Mesias, ya Cristo.

*Impamwang ni Apo Jesus ya hiyay patsén  
(Marcos 8:31-9:1; Lucas 9:22-27)*

<sup>21</sup> Paubat hên habayto, ay impamulah nay na ni Apo Jesus kanlan tagahonol na ya malyari kana ha lumatêng ya allo, ya wana, “Hiko ya Taga-Langit, ya In-anak Tawo, ay kailangan hên magdanas hên hadyay pamagdusa ha Jerusalem. Hikoy araên lan mónoron Kautuhan ni apo Moises. Araên la kon toa ya nag tungkulon ha bansa, haka araên la ko êt hên ampamaala kanlan pari. Ipapatsi la ko, noa, ha ikatlon allo ay biyayén akon oman.” <sup>22</sup> Kabay indayo yan pérâd ni Pedro ta hinabyanan na ya, gawan êndat nan a patsén ya Mesias, ya Cristo, ya wana, “Panginoon! Paan dayi palyarién ni Apo Namalyari ya habayto!” <sup>23</sup> Noa, inumarap hi Apo Jesus kan Pedro ta hinabyanan na ya, “Pedro, paan mo kon tuksóen hên nanad ha pamanukso kangko ni Satanas! An-abalaên mo ko. Ya pan-ihipén mo ay alwan kaihipan ni Apo Namalyari, noa, kaihipan hên tawo!”

<sup>24</sup> Améhén, wana kanlan tagahonol na, “Hilay labay hên humonol kangko, ay dapat liwaan lay sarili lan kalabayan haka humonol kangko. Dapat nakalan hilan magdanas hên hadyay pamagdusa haka matsi, ya maialimbawa ha pamakay hên nabyat ya koros. <sup>25</sup> Hila etaman ya a anhumonol kangko, gawan a la labay hên matsi o mangoman ya pamimiyay la, ay matsi etaman. Noa, hilay matsi gawan ha paniwala la kangko, ay dyanan biyay ya ayn angga. <sup>26</sup> Mikamihan man kanan mihay tawo ya pibandian di ha luta, ay a na mapakinabangnan ya habayto, no hiya etaman ay mipalako ha kaparusaan ya ayn angga! Yarin matanggap ya pibandian na hên pagbii, ta êmén a mipalako ha kaparusaan ya ayn anggaan ya kaélwa na! <sup>27</sup> Hiko ya Taga-Langit ya In-anak Tawo, ay mag-orong bayri ha luta. Ha pag-orong ko, ay atsi kangko ya kapangyarihan haka ya kapahilêw ya kahampatan ni Apo Namalyari, ya Tatang ko, haka kalamo ko hilay anghel na. Tumbahan ko bayto ya balang miha, ha dinyag la. <sup>28</sup> Pakagilamén yo! Main ungro di kamoyu ya a matsi angga ha mahélêk la ko, ya Taga-Langit, ya In-anak Tawo, hên ampamaala.”

## 17

*Nakikit hi Apo Jesus, hi apo Moises, haka hi apo Elias  
(Marcos 9:2-13; Lucas 9:28-36)*

<sup>1</sup> Hêñ nalabah ya aném ya allo paubat hên hinabi nay habayto ni Apo Jesus ay pinaglamo na hi Pedro, hi Santiago haka hi Juan ya kapotoh pohêl ni Santiago, hên nilumakat ha matag-ay ya tawtgug hên kakapag la. <sup>2</sup> Kaban atsi hila bayro, ay naoman ya itsura ni Apo Jesus. Ya lupa na ay nag-in kapahilêw hên nanad ha allo, haka ya takop na ay nag-in bapan putsi ya kapahilêw. <sup>3</sup> Namakonkaynaman ay main mámpamwang ya an-ipaihip kanla ni Apo Namalyari ya ubat ha langit, ya hi apo Moises haka hi apo Elias ya kalamo ni Apo Jesus hên ampihahabi. <sup>4</sup> Bayo hinabi ni Pedro, ya wana, “Panginoon, mangêd ya atsi kitamo di. No labay mo, ay manyag akon tatloy

hawong di. Miha kamo, miha kan apo Moises, haka miha kan apo Elias.” <sup>5</sup> Ampaghabi ya pon hi Pedro hēn inupungan hila hēn ginêm, haka main hilan nagilam ya habi ya ubat ha ginêm, ya wanana habi, “Hatsi ya anlugarén kon Anak ya taganán an-ikahigla ko. Gilamén yoy habi na.” <sup>6</sup> Hēn nagilam lan Pedro ya habayto, ay hadyay limo la, haka hila nipandoko hēn nakadéngdēng. <sup>7</sup> Noa, dinanian hila ni Apo Jesus hēn inahwil, ta wana kanla, “Miréng kaw, paan kaw malimo!” <sup>8</sup> Hēn naningla hila, ay mimiha na tana ni Apo Jesus ya nahélêk la.

<sup>9</sup> Ha paglohan la hēn ubat ha tawtgug, ay impapakabawal ni Apo Jesus hilay habaytoy tatloy tagahonol na hēn ipamwang ha hinoman ya nahélêk la ha tawtgug, angga ha a ya pon matsi haka mabiyay oman, ya hiya, ya Taga-Langit, ya In-anak Tawo. <sup>10</sup> Gawan nahélêk la bayro ha tawtgug hi apo Elias, ay kinotang la hi Apo Jesus, ya wanla, “Awta panhabiên lan móñoron Kautuhan ni apo Moises ya kailangan mag-orong ya pon di ha luta hi apo Elias, bayo ya lumaténg ya Mesias, ya Cristo, ya impangakon Mámiligtas ya pinili ni Apo Namalyari hēn mamaala?” <sup>11</sup> Hinabi na kanla ni Apo Jesus, ya wana, “Pétêg ya habaytoy anhabiên lan móñoron Kautuhan ni apo Moises. <sup>12</sup> Noa, anhabiên ko kamoyu, ya nilumaténg yay na di ha luta ya nanad kan apo Elias, haka a la ya nabalayan ya hiyay habayto ya lumaténg bayo ya lumaténg ya Mesias, ya Cristo, ta pinairapan la ya. Èmén êt bayro, ay hiko, ya Taga-Langit, ya In-anak Tawo, ay magdanas hēn hadyay pamairap ha gamêt la.” <sup>13</sup> Hēn hinabi nay na ya habayto ni Apo Jesus, ay naintindihan lay na ya hi Juan Bautista awud ya inungkat ni Apo Jesus ya nanad kan apo Elias.

*Namipaplag hi Apo Jesus hēn hinumapat haka ampamatugaw ha mihay anak ya lalaki*

(Marcos 9:14-29; Lucas 9:37-43a)

<sup>14</sup> Hēn ubat hilay na ha tawtgug, ay tinupa hilan Apo Jesus hēn kal-atan. Kalamo lay mihay lalaki ya nandoko ha arapan ni Apo Jesus. <sup>15</sup> Wanana lalaki, “Panginoon, ingalwan mo dayi ya anak koy lalaki ta main yan tugaw. Hadyay pamairap ya angkatanam nan anak, ta panay yan ampitumba ha apoy, haka ampihugno ha laném. <sup>16</sup> Gintan ko ya ha tagahonol mo, ta paalihêl la dayi ya hakit na, noa, a la ya kayan paalihêl.” <sup>17</sup> Améhêl, wani Apo Jesus, “Hikaw ya angkabiyay améhêl ay ayn paniwala, haka hadyay dawak kaw. Ay-irin angga kataw hēn pakilamoan haka pakitagalán?” Bayo wana kanan lalaki, “Gétan mo di ya anak mo.” <sup>18</sup> Bayo hinabyanan haka impaplag ni Apo Jesus ya narawak ya hinumapat kanan anak, kabay paubat hēn habayto, ay a yay na tinugaw ya habaytoy anak.

<sup>19</sup> Hēn hila-hila tana hilan Apo Jesus, haka hilay tagahonol na, ay kinotang la ya, “Awta a naén ya napaalih ya hinumapat kanan anak?” <sup>20</sup> Wana etaman ni Apo Jesus, “Gawan kulang ya paniwala yo ha kapangyarihan ni Apo Namalyari. Pakgilamén yo, pêpérâd man ya paniwala yo, hēn nanad ha pinakananaway but-o, ay mahabi yo kanan hata tawtgug ya, ‘Mag-álih ka ha dagat!’ haka humonol ya kamoyu. Hilay ampaniwala kan Apo Namalyari ay makadyag hēn kaganawan! <sup>21</sup> Noa, ya êmbayroy narawak ya a angkahélêk, ay mapaalih bêngat ha panalangin haka ha pamagtéêh hēn a mangan, ta èmén a maabala ya panalangin.”

*Inoman nan hinabi ni Apo Jesus ya patsén ya*

(Marcos 9:30-32; Lucas 9:43b-45)

<sup>22</sup> Hēn napi-tsi-tsipon hilan Apo Jesus ha probinsyan Galilea, ay wana kanlan tagahonol na, “Hiko, ya Taga-Langit, ya In-anak Tawo, ay i-upit ha

kapatsi ko. <sup>23</sup> Patsên la ko, noa, ha ikatlon allo, ay mabiyay kon oman.” Kabay hadyay lungkot hêñ nakêm lan tagahonol na, hêñ nagilam lay habayto.

### *Ya pamayad ni Apo Jesus hêñ buwih ha Templo*

<sup>24</sup> Hêñ nilatêng hilan Apo Jesus ha balayan Capernaum, ay main napaidani kan Simon Pedro ya máningil buwih hêñ Templo, ta nangotang kana no ampamayad yan buwih hêñ Templo hi Apo Jesus. <sup>25</sup> “Awo. Ampamayad yan buwih,” wani Pedro. Hêñ nilumatêng hila ha bali ya anlakwêñ la, ay tampol nan kinotang ni Apo Jesus hi Pedro, “Simon, ha ihip mo, hino ya ampaningilan buwih hêñ hilay ari ya ampamaala bayri ha luta? Hilay mitataanak la, o hilay kaatag?” <sup>26</sup> Hinabi ni Pedro, ya wana, “Hilay kaatag.” Kabay wani Apo Jesus kana, “No êmbayro awud, ay a la ampaningilan buwih ya pamilya la. <sup>27</sup> Êmbayro man, ta êmén hila ayn mahabi, ay mamaniwit ka, ta ya una mon makwa, ay bibitêñ moy bêbêý ta mahêlêk mo bayro ya mihay pera ya pilak ya sakto ha pamayad hêñ buwih hêñ Templo ha loway katawo. Kowêñ moy habayto ta ibayad mo ha buwih ta.”

## 18

### *No hino ya matag-ay ya tungkulan*

(Marcos 9:33-37; Lucas 9:46-48)

<sup>1</sup> Hêñ habayto, ay dinumani kan Apo Jesus, ya tagahonol na, hêñ nangotang no hino kanla ya pinakamatag-ay ya tungkulan lano ha pamanlokop ni Apo Namalyari. <sup>2</sup> Binaêg nay mihay anak ya nanawa hêñ mirêng ha arapan la. <sup>3</sup> Bayo wana kanla, “Pakagilamêñ yo, magbayo kaw hêñ mag-in maaypa ya nakêm, hêñ nanad kanan hata nanaway anak, ta no alwan maaypa ya nakêm yo, ay taganán a kaw makapakilamo ha pamanlokop ni Apo Namalyari. <sup>4</sup> Hilay maaypa ya nakêm, ay hilay mag-in pinakamatag-ay ha pamanlokop ni Apo Namalyari. <sup>5</sup> Hinoman ya ampaniwala kangko, ya ampananggap kanlan maaypa ya nakêm ya nanad hata nanaway anak, hêñ gawan habaytoy paniwala la kangko, ay nanad hiko ya antanggapêñ la.”

### *Ya pangubatan hêñ pamanyag kasalanan*

(Marcos 9:42-48; Lucas 17:1-2)

<sup>6</sup> Inhundo ni Apo Jesus ya pamaghabi na, ya wana, “Hinoman ya pangubatan hêñ pamanyag kasalanan hêñ mihay maaypa ya nakêm hêñ nanad kanan hata nanaway anak ya ampaniwala kangko, ay mangêd pon kana, ya bayo ya mag-in pangubatan hêñ habayto, ay patsên ya hêñ êl-an yan mahlay ya bato ha lêêy na, ta ilêmêh ya ha malalê ya lanêm. <sup>7</sup> Taganán kapaingalo hilay tawo bayri ha luta, ta mal-at ya pangubatan hêñ pamanyag kasalanan. Taganán lumatêng kantamo ya tukso hêñ manyag kasalanan, noa, kaingalo ya ampangubatan hêñ tukso.

<sup>8</sup> “No gamêt o bitsih mo ya anggamitêñ mon manyag kasalanan, ay mangêd ya potohêñ mo ya habayto. Ta mangêd ya milamo ka ha biyay ya ayn angga ha langit hêñ ayn gamêt o bitsih kanan mitapon ha impiyerno ha apoy ya taganán a maparê hêñ main gamêt o bitsih. <sup>9</sup> No mata mo ya anggamitêñ mon manyag kasalanan, ay kêwêtêñ mo haka mon itapon. Ta mangêd pon ya ayn mata hêñ milamo ha biyay ya ayn anggaan ha langit, kanan main mata hêñ mihamwag ha apoy ha impiyerno.”

### *Hilay a pon nagpalokop kan Apo Namalyari, ay nanad hilan tupaya nitama*

(Lucas 15:3-7)

<sup>10</sup> Amêhêñ, ay wanay na êt ni Apo Jesus, “Paan yo hilan musmusêñ ya miha man ya ampaniwala kangko ya maaypa ya nakêm hêñ nanad kanan hata

nanaway anak, ta hilay anghel ha langit, ya ampangillag kanla, ay panay hēn ampampipamwang kan Apo Namalyari, ya Tatang ko, ha kaganawan angkalyari kanla. <sup>11</sup> [Gawan hiko, ya Taga-Langit, ya In-anak Tawo, ay atsi di ha luta, ta êmén iligtas ha kaparusaan ya hilay nitama.]

<sup>12</sup> “No alimbawa ta main miha kamoyu ya nag magatoh ya tupa, ta nitama ya miha, ay hinoy daygēn na? Siguradon ibalag na pon ya siyamapo boy siyam bayro ha pagpastolan la, ta tapolēn nay miha ya nitama hēn angga ha matapol nay habayto. <sup>13</sup> No natapol nay habaytoy nitama, ay taganán mas ikahigla nay habayto, kanan siyamapo boy siyam ya a nitama. <sup>14</sup> Embayro êt hi Apo Namalyari, ya Tatang ko ha langit. A na labay hēn midayo kana ya miha man kanlan ampaniwala kangko ya maaypa ya nakêm hēn nanad hata nanaway anak.”

### *No makadyag kasalanan ya mihay patêl ha Panginoon*

<sup>15</sup> Inhundo ni Apo Jesus ya pamaghabi na, ya wana, “No makadyag kasalanan kamo ya mihay patêl mo ha Panginoon, ay pagkahabi mo ya hēn kakapag yo. No gilamén na ka, ay miúmang ya pamipatêl yo ha Panginoon, haka naiúmang mo ya kan Apo Namalyari. <sup>16</sup> Noa, no a na ka gilamén, ay mangilamo ka hēn miha o lowa ya kaatag ya patêl ha Panginoon, ta êmén main manggilam ha pinihabian yon lowa hēn main lowa o tatloy tistigos. <sup>17</sup> No a ya pon êt manggilam, ay ipamwang mina ha arapan lan kapareho yon patêl ha Panginoon ya angkapi-tsi-tsipon. No a ya pon êt manggilam kanla man ya kapareho yon patêl ha Panginoon ya angkapi-tsi-tsipon, ay dayuán yo ya hēn itad kanlan a ampagpalokop kan Apo Namalyari, haka nanad kanlan mapanyag karawakan.”

### *Magkamiha ha panalangin*

<sup>18</sup> Inhundo ni Apo Jesus ya pamaghabi na, ya wana, “Ya bawalēn yo bayri ha luta, ay bawalēn êt ha langit, haka ya a yo bawalēn bayri ha luta, ay a etaman bawalēn ha langit.”

<sup>19</sup> “Pakagilamén yo. No main lowa kamoyu di ha luta, ya magkamiha ha panalangin yo, ay ipatupad ni Apo Namalyari, ya Tatang ko ha langit ya habaytoy labay yo kana. <sup>20</sup> Ta no anto ya main lowa o tatlo ya naka-tsipon gawan ha pamakimiha la kangko, ay atsi ko hēn kalamo la.”

### *Ya alimbawa ya tungkol ha ipoh ya a mamatawad*

<sup>21</sup> Amêhēn, ay napaidani hi Pedro kan Apo Jesus hēn nangotang, “Panginoon, makaungno kon patawarêن ya patêl ko ha Panginoon, ya panay hēn ampanyag kasalanan kangko? Katapito kaya?” <sup>22</sup> Hinabi kana ni Apo Jesus, “Alwan bat katapito, noa, pitumpon oman. <sup>23</sup> Gawan êmén di ya maialimbawa ya pamanlokop ni Apo Namalyari. Main mihay ari ya labay maningil hēn impautang na kanlan ipoh na. <sup>24</sup> Ya una hēn gintan kana, ay main utang hēn milyun-milyun ya pera. <sup>25</sup> Gawan ha hiya ay taganán ayn maibayad, ay in-utoh hēn ari ya ihaliw hilay mitataanak haka pibandian la, ta êmén mabayaran ya utang. <sup>26</sup> Kabay nandoko ya ipoh ha arapan hēn ari ta nakiingalo ya, ‘Dyanan mo ko pon hēn panaon ta ubuhēn kon bayaran kamo ya utang ko.’ <sup>27</sup> Gawan ha naingalwan na ya, ay a na yay na pinabayad ta binura nay na ya utang.

<sup>28</sup> “Noa, hēn nammitay nay habaytoy ipoh, ay nakatupa nay kapareho nan ipoh ya main utang kana hēn alagán magatoh ya allon pamag-obra. Dinakêp na ya ta sakalén na ya dayi, ya wana, ‘Bayaran minay utang mo kangko!’

<sup>29</sup> Nandoko ya ha arapan na ya kapareho nan ipoh hēn nakiingalo, ya wana, ‘Dyanan mo ko pon hēn panaon, ta bayaran koy utang ko.’ <sup>30</sup> Noa, a ya nabay

hêñ dyanan yan panaon. Yan impahukul na ya hêñ angga ha makabayad ya kana. <sup>31</sup> Hêñ nahêlêk lan kapareho lan ipoh, ya nalyari, ay namalagêhbêg ya nakêm la, kabay inhumbung la kanan ari ya nalyari. <sup>32</sup> Kabay impabaêg yay na êt hêñ ari, ta wana kana, ‘Narawak ya ugali mo! Pinatawad kata ha boon utang mo kangko, gawan ha ingalo ko kamo. <sup>33</sup> Pata a ka nalonos ha kapareho mon ipoh, hêñ nanad ha pangingalo ko kamo!’ <sup>34</sup> Ha hadyay huluk hêñ ari, ay impahukul nay ipoh, hêñ angga ha a nan nabayaran ya boon utang na. <sup>35</sup> Êmbayro êt ya daygêñ kamoyu ni Apo Namalyari ya Tatang ko ha langit, no a yo patawarêñ ya kapareho yon patêl ha Panginoon hêñ booy nakêm.”

## 19

### *Intoro ni Apo Jesus ya tungkol ha pamihiyay hêñ miahawa (Marcos 10:1-12)*

<sup>1</sup> Hêñ naitoro nay na ni Apo Jesus ya tungkol ha pamatawad, ay immalih hila bayro ha probinsyan Galilea, ta nagdann hilay na ha probinsyan Judea, hêñ nilumipay ha Ilog Jordan. <sup>2</sup> Kal-atan ya nangamat kana, haka namaalih yan hakit la.

<sup>3</sup> Main ungnoy Pariseo bayro ya napaidani kan Apo Jesus ya labay mandakêp kana ha pamaghabi na. Kabay nangotang hila kana, “Malyari ha mihay lalaki hêñ ihiyay nay ahawa na, agyan hinoman ya pagbad-an?”

<sup>4</sup> Hinabi hi Apo Jesus, “A yo pon nabaha, ya hêñ hato, hêñ dinyag ni Apo Namalyari ya luta, ay nanyag yan lalaki, haka nanyag ya êt hêñ babayi?\*

<sup>5</sup> Kabay lakwanan nan lalaki ya toa na, ta milamo hilay nay miahawa. Hilay miahawa ay mag-in mimiha,† <sup>6</sup> kabay alwa hilay nan lowa, ta mimiha hila tana. Ya pinilamo ni Apo Namalyari, ay paan pihiyayêñ.” <sup>7</sup> Wanlay na êt, “Pata in-utoh ni apo Moises ya malyarin dyanan lan lalaki hêñ kahulatan hêñ pamihiyay ha ahawa la, bayo malyari lay nan ihiyay?” <sup>8</sup> Hinabi nay na êt ni Apo Jesus, “Pinaulayan ni apo Moises hêñ manyag hêñ êmbayro, ya ninuno yo, gawan ha kakdêyan ulo la ha a la labay humonol ha kalabayan ni Apo Namalyari. Noa, hêñ dinyag ni Apo Namalyari ya luta, ay tinalagá na ya miahawa ay paan mihiyay. <sup>9</sup> Kabay anhabien ko kamoyu amêhêñ, ya hinon lalaki ya mamihiyay hêñ ahawa na, no a ya nakilalaki, bayo mag-ahawan kaatag, ay nanyag kasalanan gawan namabayi ya.”

<sup>10</sup> Amêhêñ, wanlan tagahonol ni Apo Jesus, “No êmbayroy angkalyari, ay paan pon awud hêñ mag-ahawa ya mihay lalaki.” <sup>11</sup> Noa, wani Apo Jesus, “Hilay kaatag ay dinyanan ni Apo Namalyari hêñ pamagtêeh hêñ a mag-ahawa, noa, hilay kaatag ay a makatêeh hêñ a mag-ahawa. <sup>12</sup> Alwan parepareho ya ampangubatan no pata main lalaki ya a mag-ahawa. Ya kaatag, ay gintanan lay na ya habayto ha pagkaanak la. Ya kaatag ay dinyag êmbayro hêñ kapareho la. Haka ya kaatag, etaman ay tinalagá la hêñ a mag-ahawa, ta êmén a maabala ya pamitoro la hêñ tungkol ha pamanlokop ni Apo Namalyari. Hila ya ampakaintindi hêñ hinabi ko hêñ tungkol ha pamag-ahawa, ay dapat lan honolêñ ya habayto.”

### *Inhalangin ni Apo Jesus ya nanganaway anak (Marcos 10:13-16; Lucas 18:15-17)*

<sup>13</sup> Nanganaway anak man, ay anggêtan kan Apo Jesus, ta ihalangin na hila hêñ ipalunto nay gamêt na ha ulo la. Hêñ nahêlêk lan tagahonol ni Apo Jesus ya manianak-anak ay binawal lay ampantan kanla. <sup>14</sup> Noa, wani Apo Jesus kanlan tagahonol na, “Paulayan yo hilay anak hêñ paidani kangko. Paan yo

\* <sup>19:4</sup> Genesis 1:27. † <sup>19:5</sup> Genesis 2:24.

hilan bawalên. Ta hilay maaypa ya nakêm ya nanad kanla, ay hila ya ilamo ha pamanlokop ni Apo Namalyari.” <sup>15</sup> Hêñ naipalunto nay gamêt na ha ulo hêñ inhalangin na hila, ay nammita yay na.

*Ya mihay mabandi, ya Israelita, ya nangotang no hino ya dapat nan daygêñ ta êmên ya madyanan biyay ya ayn angga  
(Marcos 10:17-31; Lucas 18:18-30)*

<sup>16</sup> Main mihay lalaki ya dinumani kan Apo Jesus, hêñ nangotang, “Mánoro, hinoy kangêran ya dapat kon daygêñ, ta êmên ako madyanan hêñ biyay ya ayn angga?” <sup>17</sup> Hinabi kana ni Apo Jesus, “Pata kinotang mo kangko no hinoy mangêd? Hi Apo Namalyarin bêngat ya mangêd. No labay mon madyanan kan biyay ya ayn angga, ay dapat mon honolên ya Kautuhan na.” <sup>18</sup> Kabay kinotang na êt hêñ lalaki, “Hinoy Kautuhan?” Hinabi nay na êt ni Apo Jesus, “Paan mamatsin kaparehon tawo. Paan mamabayi. Paan makilalaki. Paan manakaw. Paan manistigos ha alwan kaptêgan. <sup>19</sup> Galangêñ moy toa mo, haka lugurêñ moy kapareho mo hêñ nanad ha pamanlugud mo ha sarili mo.” <sup>20</sup> “Mánoro, anhonolên kina ya habayto ngan paubat hêñ anak ako pon. Hino pon ya kailangan kon daygêñ?” <sup>21</sup> Hinabi nay na êt ni Apo Jesus, “No labay mon ayn kan pamagkulang kan Apo Namalyari, ay iubuh mon ihaliw ya pibandian mo, bayo idin moy naablian kanlan mangairap, ta madyanan kan mantêg hêñ pibandian ha langit. Pangayari mon nadyag ya habayto, ay mag-orong ka di, ta humonol ka kangko.” <sup>22</sup> Noa, hêñ nagilam nay habi ni Apo Jesus, ay nammita yay na hêñ ampaglunkot, ta miha yay mabandi.

<sup>23</sup> Bayo wani Apo Jesus kanlan tagahonol na, “Pakagilamêñ yo! Alwan nataluh hêñ makapakilamo ha pamanlokop ni Apo Namalyari ya hilay mabandi! <sup>24</sup> Anhabiên ko etaman kamoyu, ya nataluh hêñ magdann ha lubot karayêm ya mihay kamelyo kanan makapakilamo ha pamanlokop ni Apo Namalyari ya mihay mabandi.” <sup>25</sup> Angkalipang ya ihip lan tagahonol na ha hinabi na, kabay kinotang la ya, “Hino awud ya miligtas hêñ makapakilamo ha pamanlokop ni Apo Namalyari?” <sup>26</sup> Pinakahêlêk hila ni Apo Jesus, bayo wana, “Ya a madyag hêñ tawo, ay madyag ni Apo Namalyari.”

<sup>27</sup> Amêhêñ, wani Pedro, “Ay-êmên kay, ya tagahonol mo? Imbalag naêñ ya kaganawan, ta êmên kay humonol kamo. Hino etaman ya idin kannaêñ?”

<sup>28</sup> Hinabi etaman ni Apo Jesus, “Pakagilamêñ yo! Lano no bayoêñ ni Apo Namalyari ya luta, ta hiko, ya Taga-Langit, ya In-anak Tawo ay mamaala hêñ main kapangyarihan, ay mikno kaw ha iknoan hêñ ari ta mamaala kaw kanlan Israelita, ya hilay kaapo-apoan lan labinloway anak ya lalaki ni apo Israel. <sup>29</sup> Hilay nangibalag balì la, o kapotoh pohêl la, o toa la, o anak la, o luta la, gawan ha pamanhumonol la kangko, ay matumbahan hêñ katamagatoh kanan imbalag la, kaban atsi hila pon di ha luta. Bayo lano madyanan hila êt hêñ biyay ya ayn angga. <sup>30</sup> Noa, mal-at kanlan matag-ay ya tungkulon ha hêlêk hêñ kapareho la, ay alwan matag-ay ha hêlêk ni Apo Namalyari, haka mal-at kanlan maaypa ya tungkulon ha hêlêk hêñ kapareho la, ay matag-ay ha hêlêk ni Apo Namalyari.”

## 20

*Hi Apo Namalyari ay in-alimbawa ni Apo Jesus ha nag ubasan*

<sup>1</sup> Inhundo ni Apo Jesus ya pamanoro na, ya wana, “Ya pamanlokop ni Apo Namalyari, ay maialimbawa ya êmên di: Main mihay nag ubasan. Dali allo pon, ay inumawah yan nanapol hêñ mabay mag-obra ha ubasan na. <sup>2</sup> Hêñ napikasundo hilay na ha upa ha mihay allon pamag-obra, ay pinaobra na hilay na. <sup>3</sup> Hêñ alas nuwebe hêñ matag-ay ya allo, ay main yan nahêlêk ya ayn

an-obraên ha palengke,<sup>4</sup> kabay wana kanla, ‘Mag-obra kaw ha ubasan ko ta upaan kataw ha hukad ya upa.’ Kabay nammita hilay nan nag-obra.<sup>5</sup> Hêñ mag-aalas dose hêñ ugtô, haka hêñ mag-aalas tres hêñ maapon, ay nakatapol yay na êt hêñ mabay mag-obra ta pinaobra na hila ha ubasan na.<sup>6</sup> Hêñ mag-aalas singkoy na hêñ maapon hêñ immawah ya, ay nakahêlêk yay na êt hêñ ayn an-obraên, ta wana kanla, ‘Pata nakaiirêng kaw di hêñ ayn an-obraên hêñ boon allo?’<sup>7</sup> Wanla kana, ‘Gawan ayn namaobra kannaêñ.’ Hinabi na kanla, ‘Mag-obra kaw tana etaman ha ubasan ko.’

<sup>8</sup> “Hêñ anyumabi, ay wanana nag ubasan kanan paypaniwal-an na, ya wana, ‘Baêgêñ mo hilay nay mag-obra, ta idin mina kanla ya upa la. Ya una mon dyanan, ay hatoy natawli hêñ pinaobra.’<sup>9</sup> Hêñ nilumatêng hilay nay pinaobra hêñ paubat alas singko hêñ maapon, ay dinyanan hilan alagá hêñ pamag-obra ha mihay allo.<sup>10</sup> Amêhêñ, hêñ nilumatêng hilay unan pinaobra, ay êndat la no maupaan hila hêñ mahlay kanan upa lan natawli hêñ pinaobra. Noa, pare-pareho hilan dinyanan etaman hêñ upa ha mihay allon pamag-obra nanad ha napikasundo la.<sup>11</sup> Hêñ nakwa lay nay upa la, ay nagmulongan hila ha nag ubasan,<sup>12</sup> ya wanla, ‘Mimihay oras ya pamag-obra lan natawli hêñ pinaobra mo, yan pareho ya upa la, haka upa naêñ, ya nagobran patingapon, ha hadyay omot allo.’<sup>13</sup> Noa, wanana nag ubasan kanan miha kanlan una nan pinaobra, ‘A kata niloko. Napikahundoan ta ha upa ha mihay allon pamag-obra.<sup>14</sup> Kowêñ minay upa mo ta mita kay na. Atsi kangko no piparehoêñ koy upa yon una haka natawli.<sup>15</sup> Yarin ayn akon karapatan ha pibandian ko, hêñ daygêñ ya kalabayan ko! Kayno angkahêñ ka kangko, gawan mapam-i ko!’<sup>16</sup> Embayro êt ha pamanlokop ni Apo Namalyari. Mal-at kanlan matag-ay ya tungkulon ha hêlêk hêñ kapareho la, ay alwan matag-ay ha hêlêk ni Apo Namalyari, haka mal-at kanlan maaypa ya tungkulon ha hêlêk hêñ kapareho la, ay matag-ay ha hêlêk ni Apo Namalyari.”

*Ikatlon pangungkat ni Apo Jesus, ya patsêñ ya  
(Marcos 10:32-34; Lucas 18:31-34)*

<sup>17</sup> Hêñ atsi hila ha dann, hilan Apo Jesus, hêñ palako ha balayan Jerusalem, ay impapawa nay labinloway tagahonol na kanlan kal-atan, ta wana kanlan bêngat,<sup>18</sup> “Pakagilamêñ yo! Anlumakat kitamo ha Jerusalem, haka hiko, ya Taga-Langit, ya In-anak Tawo, ay i-upit kanlan máñoron Kautuhan ni apo Moises haka kanlan ampamaala kanlan pari. Habiên lan habayto ya dapat akon patsêñ.<sup>19</sup> Idin la ko kanlan alwan Israelita ta êmêñ ako musmusêñ, pagpapatokêñ haka patsêñ lan habayto ha koros. Noa, ha ikatlon allo, ay mabiyay kon oman!”

*Ya labay nan ahawa ni Zebedeo  
(Marcos 10:35-45)*

<sup>20</sup> Nandoko hêñ nangotang kan Apo Jesus ya ahawa ni Zebedeo, hêñ kalamoy loway anak la, ya lowa kanlan tagahonol ni Apo Jesus, ya wana, “Panginoon, main ako dayin pakihabi kamo.”<sup>21</sup> Kabay kinotang ni Apo Jesus, “Hinoy labay mo kangko?” Wana etaman kana, “Labay ko, ya lano ha pamanlokop mo, ay paiknoêñ moy hata loway anak ko ha dani mo, ya miha ha dapit panabtab, haka miha êt ha dapit uki.”<sup>22</sup> Wani Apo Jesus kanlan loway anak na, “A yo angkaintindihan ya pamagdusa ya maranasan yo, no mahonol ya kalabayan yo. Matêêh yoy pamagdusa ya danasêñ ko? Taganán nakal-an kaw hêñ matsi hêñ nanad kangko?” Wanla etaman kana, “Awo. Nakal-an kay.”<sup>23</sup> Kabay wani Apo Jesus kanla, “Madanasan yoy pamagdusa ya danasêñ ko, haka matsi kaw hêñ nanad kangko. Noa, ayn akon karapatan

hén maghabi no hinoy mikno ha dani ko, ta habaytoy tinalagá nay na ni Apo Namalyari ya Tatang ko.”

<sup>24</sup> Hén nagilam lan mapoy tagahonol na, ya labay ni Santiago haka Juan, ay hinumuluk hila. <sup>25</sup> Kabay pinarani na hila ni Apo Jesus, ta wana kanla, “Muwang yo ya hilay manungkulán lan a ampagpalokop kan Apo Namalyari, ay andaygén lan ipoh ya angkalokopan la, haka an-iatay la hilan manyag kalabayan la. <sup>26</sup> Noa, dapat alwan êmbayro ya daygén yo. No labay yon mag-in matag-ay ya tungkulán, ay dapat yon huyuén ya kapareho yon tawo. <sup>27</sup> Ya labay mag-in pinakamatag-ay ya tungkulán, ay dapat mag-in nanad ipoh hén kalamo na. <sup>28</sup> Ta hiko man ya Taga-Langit, ya In-anak Tawo, ay atsi bayri améhén ha luta, alwan para paghuyuan, noa, para maghuyo angga ha idin koy biyay ko, ha pangakbus hén kal-atan.”

### *Nakapamukat hi Apo Jesus hén loway buwag*

(Marcos 10:46-52; Lucas 18:35-43)

<sup>29</sup> Améhén, nilumaténg hilan Apo Jesus ha balayan Jerico. Haka hén paalíh hila bayro ha balayan, ay main kal-atan ya nangamat kanla. <sup>30</sup> Main bayron loway buwag ya ampikno ha danin dann. Hén nagilam lay ampanlibah hi Apo Jesus ay in-angaw la, ya wanla, “Panginoon, ya kaapo-apoan ni Arin David, ingalwan mo kay dayi!” <sup>31</sup> Binawal hilan maglabak hén hatoy kal-atan ya ampakihonol kan Apo Jesus, noa, impakakhaw lan in-angaw, “Panginoon, ya kaapo-apoan ni Arin David, ingalwan mo kay dayi!” <sup>32</sup> Hén nagilam ni Apo Jesus ya angaw la, tinunggén ya ta nangotang ya kanla, “Hinoy labay yon daygén ko kamoyu?” <sup>33</sup> Kabay wanlan buwag, “Panginoon, labay naén hén makahélék.” <sup>34</sup> Iningalwan na hila ni Apo Jesus, kabay ginap-an nay mata la. Tambéng hila etaman nakahélék, haka nakihonol hilay na kanlan Apo Jesus.

## 21

### *Mal-at ya ampagpuri kan Apo Jesus hén ampandaraho yay na ha balayan Jerusalem*

(Marcos 11:1-11; Lucas 19:28-40; Juan 12:12-19)

<sup>1</sup> Nahén andumaní hilan Apo Jesus ha Jerusalem, ta atsi hilay na ha balayan Betfage ha Tawgtug Olibo, ay impauna ni Apo Jesus ya lowa kanlan labinloway tagahonol na, <sup>2</sup> ta wana kanla, “Muna kaw ha balayan. Tampol yon mahélék ya nakah-él ya mihay asno, ya nag bisero. Okalén yoy habayto, ta gétan yo hila di. <sup>3</sup> No main mangotáng kamoyu no awta an-okalén yoy habayto, ay habién yo, ya kailangan lan Panginoon, haka tampol nan ipagtán kamoyu.”

<sup>4</sup> Nalyari ya habayto, ta êmén matupad ya hinabi nan mámpamwang hén an-ipaihip kana ni Apo Namalyari hén hato, ya wana, <sup>5</sup> “Habién yo kanlan taga-Jerusalem,\*

‘Hélkén yo, atsi di ya ampamaala kamoyu, ya nagpakaaypan nakém hén himmakay ha asno,’ ”†

haka ya biseron asno.’ ”†

<sup>6</sup> Kabay nammita hilay nay loway tagahonol na ya in-utoh na, ta hinonol lay hinabi ni Apo Jesus kanla. <sup>7</sup> In-akay lay na kan Apo Jesus ya mitain-doy asno, haka la inamakan pangkébel la, bayo himmakay hi Apo Jesus.

<sup>8</sup> Inhundo lan Apo Jesus ya pammita lan palakon Jerusalem. Ha pandanan lan Apo Jesus, ay nami-amak hilay kaatag ya atsi bayro hén takop la. Kaatag ay nanigpah hén bulong ya in-amak la etaman ha pandanan na, gawan ha

\* 21:5 Sion ha habin Griego. Isaias 62:11. † 21:5 Zacarias 9:9.

panggalang la kana. <sup>9</sup> Hilay kal-atan ya atsi ha unaan ni Apo Jesus haka hilay anhumonol kana ay nipan-angaw, “Hosanna kan Apo Jesus, ya kaapo-apoan ni Arin David! Iningalwan ya habaytsi ya in-utoh ni Apo Namalyari! Purién hi Apo Namalyari!”

<sup>10</sup> Hêñ nilumatêng hilan Apo Jesus ha Jerusalem, ay nagulo ya boon balayan ta nikokotang hila, “Hinoy habaytsi?” <sup>11</sup> Hinabi lan kal-atan kalamo ni Apo Jesus, “Habaytsi hi Apo Jesus ya propeta ni Apo Namalyari ya taga-Nazaret ha probinsyan Galilea.”

*Namitaboy hi Apo Jesus hêñ ampipagtinda ha Templo  
(Marcos 11:15-19; Lucas 19:45-48; Juan 2:13-22)*

<sup>12</sup> Hêñ nilumatêng hilan Apo Jesus ha Jerusalem, ay nagpakha ya ha Templo. Intaboy na hilay ampipagtinda haka ampipanaliw bayro. In-iitwag nay lamisaan lan mâmihagili hêñ pera, haka in-iitwag na êt ya iknoan lan mâmihaliw hêñ pati-pati. <sup>13</sup> Hinabi na kanla, “Nakahulat ha Kahulatan ya impahulat ni Apo Namalyari, ya wanana hulat, ‘Ya bali ko ay ambaêgêñ balin panalanginan.’† Noa, dinyag yo yan logal ya panlokoan yon kapareho yo!”§

<sup>14</sup> Main bayron buwag haka pilay ya nipandumani kan Apo Jesus, haka namaalîh ya hêñ hakit la. <sup>15</sup> Main êt bayro hêñ anak ya atsi ha lalêñ Templo ya ampagpuri kan Apo Jesus, ya wanla, “Purién ya Kaapo-apoan ni Arin David!” Noa, hêñ nahêlêk lan mánoron Kautuhan ni apo Moises boy hilay poon pari ya kapapaêpapah ya dinyag ni Apo Jesus, haka la nagilam ya pamagpuri lan anak, ay hinumuluk hila. <sup>16</sup> Kabay wanla kan Apo Jesus, “A mo angkagilaman ya pamagpuri lan anak kamo?” Wana etaman ni Apo Jesus, “Awo! Angkagilam koy pamagpuri la kangko. Yarin a yo êt nabaha ha Kahulatan ya impahulat ni Apo Namalyari ya êmén di, ‘Tinoroan moy anak haka hilay ampanoho pon ta êmén mag-in ayn pamagku-lang ya pamagpuri la kamo!’”\*

<sup>17</sup> Améhêñ, ay immalîh yay na bayro hi Apo Jesus ta namayabi ya ha baryon Betania.

*Inhumpa ni Apo Jesus ya mihay poon igos  
(Marcos 11:12-14, 20-24)*

<sup>18</sup> Pangamaranon hêñ mag-orong hilan Apo Jesus ha balayan Jerusalem hêñ ubat ha Betania, ay nilonoh hi Apo Jesus. <sup>19</sup> Hêñ nahêlêk nay mihay poon igos ha dann, ay dinanian nan hinlêk no main tagêy. Noa, bulong bêngat ya nalatngan na. Kabay wana kanan kayo, “Angga-angga, ay a kay na managêy oman!” Haka tambêng nayangoy habaytoy kayo. <sup>20</sup> Hêñ nahêlêk lan tagahonol na ya tambêng nayango ya habaytoy kayo, ay nag-êpapah hila, haka hila nangotang kan Apo Jesus no awta tampol nayango ya habayto. <sup>21</sup> Wani Apo Jesus, “Pakagilamên yo, no ampaniwala kaw kan Apo Namalyari, haka no a kaw ampag-alangan, ay madyag yo êt ya dinyag ko ha kayon igos, haka alwan bat habayto ya madyag yo, noa, maiutoh yoy hata tawtgug hêñ mitapon ya ha dagat, ay daygêñ nay na ni Apo Namalyari ya habayto. <sup>22</sup> No ampaniwala kaw, ay matanggap yoy hinoman ya pakikwaan yo ha panalangin.”

*No antoy ubatan hêñ tungkulon ni Apo Jesus  
(Marcos 11:27-33; Lucas 20:1-8)*

<sup>23</sup> Mihay allo hêñ atsi ya hi Apo Jesus ha Templo hêñ ampanoro, ay dinumani kana hilay toa ya nag tungkulon ha bansa, haka hilay ampamaala kanlan pari. Hinabi la kana, “Habién mo kannaén no hinoy tungkulon mo

† <sup>21:13</sup> Isaias 56:7. § <sup>21:13</sup> Jeremias 7:11. \* <sup>21:16</sup> Awit 8:2.

hén manyag hén pandaygén mo. Habién mo êt no hinoy nam-i kamoyu hén habain ya tungkulan.” <sup>24</sup> Kabay wani Apo Jesus, “Main ako pon hén kotangén kamoyu. No pakibatan yo ko, ay habién ko kamoyu no hinoy nam-i kangko hén tungkulan hén manyag hén pandaygén ko.” <sup>25</sup> Hinoy nam-i hén tungkulan kan Juan Bautista hén mamawtismo? Hi Apo Namalyari o tawo?” Kabay pinihahabian la, ya wanla, “Hinoy habién tamo? No habién tamo ya ‘Ubat kan Apo Namalyari ya tungkulan ni Juan Bautista,’ ay habién na bayto, ‘Pata a yo yan pinaniwal-an?’ <sup>26</sup> Noa, no habién tamo ya ‘Ubat ha tawo,’ ay hino kaya ya daygén lan kal-atan kantamo, ta ha ihip la, hi Juan ay mihay propeta, ni Apo Namalyari.” <sup>27</sup> Kabay hinabi la kan Apo Jesus, ya wanla, “A naén muwang no antoy ubatan tungkulan ni Juan Bautista.” Bayo wani Apo Jesus, “No êmbayro awud, ay a ko etaman habién kamoyu no antoy ubatan tungkulan ko.”

*Hilay ampamaala ha Templo ay in-alimbawa ni Apo Jesus ha maának ya a nanyag kalabayan toa*

<sup>28</sup> Inhundo ni Apo Jesus ya panoro na, ya wana, “Hino ha ihip yo ya tungkol di ha ialimbawa ko kamoyu? Main mihay lalaki ya nag loway anak ya lalaki. Intoro nay miha, ya wana, ‘Anak ko, mag-obra ka ha ubasan amêhén.’ <sup>29</sup> Wana ha tatang na, ‘A ko mabay.’ Noa, nangoman ya ihip na, kabay nag-obra yay na ha ubasan. <sup>30</sup> Êmbayro êt ya intoro nan tatang kanan ikalwan anak. Nabay ya, noa, a ya nammitan nag-obra.” <sup>31</sup> Amêhén, kinotang hila ni Apo Jesus, “Hino kanlan lowa ya nanyag kalabayan tatang la?” Wanlan ampamaala ha Templo, “Hatoy unan intoro na.” Wani Apo Jesus kanla, “Awo! Pakagilamén yo! Hilay mapanyag kasalanan nanad kanlan máningil buwih haka hilay hostis ya naghêhê hén tinalibatokan ya kasalanan la, ay nanad hatoy unan intoro hén tatang, kabay muna hila kamoyu hén makapakilamo ha pamanlokop ni Apo Namalyari. <sup>32</sup> Habaytoy malyari gawan a kaw naniwala kan Juan Bautista, hén nanoro ya hén tungkol ha pamimiyay ya mahonol kan Apo Namalyari, nahêlêk yo man ya naniwala ha intoro na, ya hilay mapanyag karawakan hén nanad hilay máningil buwih haka hilay hostis.”

*In-alimbawa ni Apo Jesus ya sarili na ha anak ya anlugurén ya pinatsi, haka ha bato ya intapon*

*(Marcos 12:1-12; Lucas 20:9-19)*

<sup>33</sup> Amêhén, nangalimbawa yay na êt hi Apo Jesus, ya wana kanlan am-panggilam, “Minghan main lalaki ya nag luta ya tinamnan nan ubas. Bayo binakoran nay habayto. Nangali yan pangunaban hén ubas, haka ya êt namairêng hén tawer ya pagbantayan. Impatsiwala na ha kaatag ya ubasan na, ta maglaêh ya ha kaatag ya bansa. <sup>34</sup> Hén pamutsi hén habaytoy ubas, ay in-utoh nay tatloy ipoh na, hén kowén ya atag na kanlan paypaniwal-an ubasan na. <sup>35</sup> Noa, dinakêp lay ipoh na. Pinakahakitan lay mihay ipoh, pinatsi lay ikalwa haka pinagbabato lay ikatlo. <sup>36</sup> Hén namwangan nan nag ubasan ya nalyari kanlan tatloy ipoh na, ay mal-at êt ya in-utoh na kanan haton una, noa, êmbayro êt ya dinyag la kanlan habayto. <sup>37</sup> Hén ayn yay nan kaatag ya maiutoh, ya nag ubasan, ay in-utoh nay anlugurén nan anak nay lalaki, ta wana, ‘Siguradon igalang lay anak ko.’ <sup>38</sup> Noa, hén nahêlêk lan paypaniwal-an ubasan, ya anak nan nag ubasan, ay nihahabi hila, ya wanla, ‘Hatsi ya paypamanaan na hén ubasan. Patsên tamo ya, ta êmén mapagbandi tamo ya hata ubasan na.’ <sup>39</sup> Kabay dinakêp la ya, pinaalíh la ya ha ubasan haka pinatsi la ya.”

<sup>40</sup> Amêhén, kinotang ni Apo Jesus, hilay ampamaala ha Templo, “Hino kaya ya daygên hên nag ubasan kanlan paypaniwal-an na?” <sup>41</sup> Hinabi la, “Siguradon lakwên nay nangarawak ya paypaniwal-an na, ta patsên na hila, bayo ipatsiwala nay ubasan na ha taganán mam-in atag na no pamutsin ubas.” <sup>42</sup> Wana êt ni Apo Jesus kanlan ampamaala ha Templo, “Yarin a yo êt nabaha ya habaytsi ya nakahulat ha Kahulatan ya impahulat ni Apo Namalyari?

‘Ya bato ya intapon lan manyag bali,  
ay nag-in pinakamaalagáy bato  
ta êmén mag-in napah-éy ya bali.

Dinyag ni Apo Namalyari ya habayto, ya kapapaêpapah.’ ”†

<sup>43</sup> Wana êt kanla, “Kabay anhabiên ko kamoyu, alwan hikaw ya Israelita ya milamo ha pamanlokop ni Apo Namalyari, noa hilay taganán ampanyag hên kalabayan na ya milamo bayro. <sup>44</sup> Hilay matata kanan hata bato ay mangatukihan but-o, haka hilay matat-an hên hata bato ay mangatatapong.”

<sup>45</sup> Naintindihan lan Pariseo haka hilay ampamaala kanlan pari, ya hila ya in-alimbawa di ha manyag bali, haka ha nangarawak ya paypaniwal-an hên ubasan. <sup>46</sup> Kabay labay la yan dakpêñ hi Apo Jesus, noa, malimo hila ha kalan ta ha muwang lan kal-atan, hiyay mihay propeta ni Apo Namalyari.

## 22

### *Ya alimbawa ya tungkol ha mahlay ya kaluto hên kasálan (Lucas 14:15-24)*

<sup>1</sup> Amêhén, nangalimbawa yay na êt hi Apo Jesus kanlan nangotang no antoy ubatan hên tungkulan na, ya wana, <sup>2</sup> “Ya pamanlokop ni Apo Namalyari ay maialimbawa ya êmén di: Main mihay ari ya nagkaluto, ta magkasal ya anak nay lalaki. <sup>3</sup> Hên nakalutoy na, ay in-utoh na hilay ipoh na hên baégén hilay hinagyat na, noa, a hila mabay. <sup>4</sup> Namiutoh yay na êt hên kaatag ipoh, ta habiên la kanlan hinagyat na, ya êmén di, ‘Kaw na di ha kasálan, nakal-an ya kaén tamo. Main kay hên pinatsi ya baka haka hên pinataba ya biseron baka.’ <sup>5</sup> Noa, a la dinambi ya habayto ta inhundo la tanay andaygên la. Ya miha ay nammita ha panamnan na, haka ya miha ay nammitan nagtsinda. <sup>6</sup> Ya kaatag ay nandakép kanlan in-utoh ta pinairapan hila, bayo pinatsi. <sup>7</sup> Hadyay huluk hên habaytoy ari. In-utoh nay hundaloh na hên patsên hilay namatsin maipoh na, haka na impaulam ya balayan la. <sup>8</sup> Bayo hinabi na ha ungro kanlan kaatag ipoh na, ya nakal-an ya kaluto hên kasálan, noa, hilay hinagyat, ay alwan hépat hên makiaêm ha kaluto. <sup>9</sup> Kabay in-utoh na hilay ipoh na hên managyat kaganawan ya mahélék la ya atsi ha dann. <sup>10</sup> Hinagyat lay kaganawan ya nahélék la bayro ha dann, mangangéd man o nangarawak ya ugali la, haka napno ya panganan lan kaluto hên kasálan.

<sup>11</sup> “Amêhén, hinumwén ya ari ha pangangan ta hêlkén na hilay impahagyat na. Noa, nahélék nay mihay lalaki ya a nakatakop hên indigalo na kanlan impahagyat na, ya dapat lan ihulod ha kasálan. <sup>12</sup> Kabay wana kana, ‘Pata a mo inhulod ya impahulod kamo! Ay-êmén ka nakahowén di!’ Hatoy lalaki, ay ayn maipakibat. <sup>13</sup> Bayo wanen ari kanlan ipoh na, ya gapohén la ya gamêt haka bitsih na, ta ihamwag ya ha kariglêman. Hadyay tangih na bayro, haka mang-ngê-ngêt ya ha hadyay huluk na boy ha hadyay ilab ya angkatanam na. <sup>14</sup> Ya labay habiên hên habaytoy alimbawa ko, ay mal-at ya hinagyat hên makilamo ha pamanlokop ni Apo Namalyari, noa, pêpérada ya pilién na hên makilamo, gawan pêpérada ya mapagtsiwal-an.”

† 21:42 Awit 118:22-23.

*Ya pamayad hên buwih  
(Marcos 12:13-17; Lucas 20:20-26)*

<sup>15</sup> Amêhén, immalíh hilay Pariseo ya nakagilam hinabi ni Apo Jesus, ta pinihahabian la no ay-êmén la yan madakép ha pamaghabi na. <sup>16</sup> Bayo namiutoh hilan ungnoy kalamo la, haka ungnoy kagampi ni Herodes Antipas kan Apo Jesus. Wanlan in-utoh kana, “Mánoro, muwang naén ya kaptégan ya panhabién mo haka pan-itoro mo. An-itoro moy kalabayan ni Apo Namalyari, ha hinoman ya ampanggilam gawan alwa kan mapamili, ta pantag ya panlék mo ha balang miha.” <sup>17</sup> Kabay main kay hên labay mamwangan kamo. Ayon ha Kautuhan tamon Israelita, ay malyarin mam-in buwih kanan Emperador o ahê?” <sup>18</sup> Noa, muwang ni Apo Jesus ya karawakan la, kabay hinabi na kanla, ya wana, “Hikaw ya magbabaran mangéd, pata labay yo kon dakpén ha pamaghabi ko! <sup>19</sup> Ipahlék yo kangko ya sintimos hên pilak ya pamayad hên buwih.” Namiawah hilan habayto, <sup>20</sup> bayo kinotang na hila, “Hinoy nag lupa hên angkakit yo bahén? Hinoy nag langan ya nakahulat bahén?” <sup>21</sup> Hinabi la, “Kanan Emperador.” Kabay wani Apo Jesus, “No êmbayro awud, ay idin yo kanan Emperador ya kana, haka idin yo kan Apo Namalyari ya kan Apo Namalyari.” <sup>22</sup> Hêñ nagilam lay hinabi na, ay nag-épapah hila. Kabay nammita hilay na.

*Ya kotang ya tungkol ha pangabiyay oman  
(Marcos 12:18-27; Lucas 20:27-40)*

<sup>23</sup> Habayton allo êt, ay main ungnö kanlan Israelita ya ambaégén Saduseo ya dinumani kan Apo Jesus. Hilay Saduseo ay a ampaniwala ha pangabiyay oman. Haka hinabi la kan Apo Jesus, ya wanla, <sup>24</sup> “Mánoro, nanulat ya hi apo Moises ha Kautuhan, ya wanana hulat, ‘No main mitaahawa, ta natsi ya lalaki hên a hila nagkaanak, ay dapat ya kahonol nan natsi, ay ipaahawa kanan bawo. No magkaanak hila, ay habaytoy anak, ay itad anak na hên natsi.’ <sup>25</sup> Minghan, ay main pitoy mikakahonol ya lalaki. Nakapag-ahawa ya punganay, noa, natsi ya hên a ya nagkaanak. Bayo pinag-ahawa nan humonol ha punganay ya hata bawo. <sup>26</sup> Noa, natsi ya etaman ya humonol ha punganay hên a ya nagkaanak. Êmbayro êt ya nalyari ha ikatlon kahonol. Balang miha kanlan pitoy mikakahonol ay nakapag-ahawa hên hata babayi, noa, naubuh hilan natsi hên a nagkaanak. <sup>27</sup> Bayo natsi ya êt ya hata bawo. <sup>28</sup> Amêhén, ha allon pangoman mabiyay, hinoy nay taganán mag-in ahawa nan hata babayi, ta balang miha kanlan habaytoy pitoy mikakahonol ay nag-in ahawa na?”

<sup>29</sup> Kabay wani Apo Jesus kanlan Saduseo, “Mali ya paniwala yo, ya a biyayén oman ya natsi, gawan a yo angkaintindihan ya Kahulatan ya im-pahulat ni Apo Namalyari haka a yo angkaintindihan ya kapangyarihan na! <sup>30</sup> Ha pangoman biyayén hilay natsi, ay ayn nanan pamag-ahawa, ta maubuh hilay nan manoto kanlan anghel ha langit ya a ampag-ahawa. <sup>31</sup> Ya hulat man ni apo Moises ay ampamaptéñ ya hilay natsi ay biyayén oman, ta bayro ha hulat na ay mabáha tamo ya hinabi ni Apo Namalyari, <sup>32</sup> ‘Hikoy Diyos ni Abraham, Isaac, haka Jacob.’\* Hiya ya Diyos lan angkabiyay, ta balang miha ya natsi, ay angkabiyay ha hélêk na.” <sup>33</sup> Nikaépapah hilay kal-atan ha pamanoro na.

*Ya pinakamaalagáy utoh ni Apo Namalyari  
(Marcos 12:28-34; Lucas 10:25-28)*

<sup>34</sup> Ni-tsi-tsipon hilay Pariseo gawan nagilam la, ya ayn hilan mahabi, ya hilay Saduseo, ha hinabi ni Apo Jesus. <sup>35</sup> Main miha kanla ya taganán main

\* <sup>22:32</sup> Exodus 3:6.

kamwangan ya tungkol ha Kautuhan ni apo Moises ya nakagilam hēn pa-makipalinawan la. Labay na yan subukēn hi Apo Jesus, kabay nangotang ya kana,<sup>36</sup> “Mánoro, hinoy pinakamaalagáy utoh ha Kautuhan ni apo Moises?”<sup>37</sup> Hinabi ni Apo Jesus, “‘Lugurēn mo hi Apo Namalyari, ya Panginoon hēn boon nakêm, boon ihip, haka boon hēkaw.’<sup>38</sup> Habaytoy pinakamaalagáy utoh.<sup>39</sup> Ya ikalwan pinakamaalagáy utoh ay ‘Lugurēn moy kapareho mo hēn nanad pamanlugud mo ha lawini mo.’<sup>40</sup> Bayro ha loway utoh, ay imboo ya Kautuhan ni Apo Namalyari ya impahulat na kan apo Moises, haka ya toro lan propeta ni Apo Namalyari.”

*Hi Cristo, ya Mesias, ay alwan bēngat kaapo-apoan ni Arin David, noa, hiyay Panginoon ni Arin David etaman  
(Marcos 12:35-37; Lucas 20:41-44)*

<sup>41</sup> Hēn naka-tsipon hila pon bayro hilay Pariseo, ay kinotang na hila ni Apo Jesus,<sup>42</sup> “Ha ihip yo, ay hino ya Mesias, ya Cristo, ya impangakon Mámiligtas ya pinili ni Apo Namalyari hēn mamaala? Hinoy nag-anak kana?” Wanla etaman, “Hiyay kaapo-apoan ni Arin David.”<sup>43</sup> Wanay na êt kanla, “Pata binaêg ni Arin David ya Mesias, ya Cristo, hēn ‘Panginoon ko’ hēn hinabi nay humonol ya habi ha kapangyarihan nan Espiritu ni Apo Namalyari?

<sup>44</sup> ‘Hinabi ni Apo Namalyari ha Panginoon ko,  
“Mikno ka ha dapit panabtab ko hēn mamaala hēn kalamo ko,  
angga ha mahambut ko hilay kapatsi mo,  
ta idin ko hila ha aypan kapangyarihan mo.”, †

<sup>45</sup> Wana êt ni Apo Jesus, “Hēn hato, ay hi Arin David ya namaêg hēn ‘Panginoon ko’ ha Mesias, ya Cristo, ya impangakon Mámiligtas ya pinili ni Apo Namalyari hēn mamaala. Kabay muwang tamo, ya hiyay Panginoon haka kaapo-apoan ni Arin David.”<sup>46</sup> Miha man kanla, ay ayn makaihip hēn mahabi la kana. Paubat hēn habayto ay marêng-êy hilay na hēn mangotâng pon kan Apo Jesus ya hilay labay hēn mandakêp kana ha pamaghabi na.

## 23

*Kaillag ha toro lan mónoron Kautuhan ni apo Moises haka ha toro lan Pariseo  
(Marcos 12:38-39; Lucas 11:43, 46; 20:45-46)*

<sup>1</sup> Amêhêñ, wani Apo Jesus kanlan kal-atan haka kanlan tagahonol na, ya wana,<sup>2</sup> “Hilay mónoron Kautuhan ni apo Moises, haka hilay Pariseo, ay dinyanan tungkulán hēn mamipamulah hēn Kautuhan ni Apo Namalyari ya hinulat ni apo Moises.<sup>3</sup> Kabay daygén yoy an-itoro la kamoyu. Noa, paan yon totoén ya pamimiyay la, gawan a la anhonolén ya an-itoro la.<sup>4</sup> Bapan bêyat ya an-ipadyag la kanlan kaatag, noa, pérâd man, ay a hila ampanawop.

<sup>5</sup> Ya kaganawan dyag la, ay ampagpadayêw ha kaatag. Angkahlayén lay pamyanan lan habi ni Apo Namalyari ya an-iuptêh la ha dampal haka takiyay la, haka la êt angkarangén ya pahamoy ya pampahampat hēn takop la.

<sup>6</sup> Ampilién lay pinakamangêd ya iknoan ha sinagoga haka ha kaluto, ta êmén ipamwang ya matag-ay ya tungkulán la.<sup>7</sup> Labay la êt hēn galangén, hilan kal-atan ha balayan haka baêgén hilan ‘Mánoro.’<sup>8</sup> Noa, hikaw, ay paan yon paulayan hēn baêgén kaw ‘Mánoro’ gawan mipapatêl kaw, haka hikon bat ya mónor yo.<sup>9</sup> Haka paan yon baêgén ‘Tatang’ ya kaatag kamoyu di ha luta, ta mimihay Tatang yo, yabay ya hi Apo Namalyari ya atsi ha langit.<sup>10</sup> Haka paan yon paulayan hēn baêgén kaw ‘Tagapagtoro’ ta mimihay Tagapagtoro yo, yabay ya Mesias, ya Cristo, ya impangakon Mámiligtas ya pinili ni Apo

† 22:44 Awit 110:1.

Namalyari hên mamaala. <sup>11</sup> Ya labay mag-in pinakamatag-ay ya tungkulan, ay dapat huyuén nay kapareho na. <sup>12</sup> Hilay mapagmatag-ay, ay iaypa haka hilay maaypa ya nakêm ay itag-ay.”

*Ampagbabaran mangêd hilay mánoron Kautuhan ni apo Moises haka hilay Pariseo  
(Marcos 12:40; Lucas 11:39-42, 44, 52; 20:47)*

<sup>13</sup> “Kaingalo kaw ya mánoron Kautuhan ni apo Moises haka hikaw ya Pariseo! Ampagbabara kaw! Hikaw ay ampag-in habkol lan mabay makapakilamo ha pamanlokop ni Apo Namalyari. A kaw palokop, bayo ambawalên yo hilay mabay hên palokop.

<sup>14</sup> “Kaingalo kaw ya mánoron Kautuhan ni apo Moises haka hikaw ya Pariseo! Anlokoén yo hilay bawo ya babayi, ta êmén yo makwa ya pibandian la, bayo ampagbabara kaw ya mangêd kaw ta an-ikarang yoy panalangin yo ha arapan hên kal-atan. Kabay hadyay pamarusa kamoyu lano.

<sup>15</sup> “Kaingalo kaw ya mánoron Kautuhan ni apo Moises haka hikaw ya Pariseo! Ampagbabara kaw! Ta anlumagay kaw ha ay-iri man ya legal, ta êmén yo mapapaniwala ha toro yo, ya miha man ya alwan Israelita. Bayo no mapapaniwala yo yay na, ay habaytoy taganán makapilako kana ha impiyerno, ta hiyay mag-in hadyay dawak êt kamoyu!

<sup>16</sup> “Kaingalo kaw ya mánoron Kautuhan ni apo Moises haka hikaw ya Pariseo! Ta hikaw ay nanad ha mihay buwag ya ampangakay ha kapareho nan buwag. Pandaygén yon ayn alagá ya pamanumpa ha Templo ya pagsimbaan kan Apo Namalyari. Noa, pandaygén yon maalagá ya pamanumpa ha ginto ya atsi ha Templo! <sup>17</sup> Hikaw ya nanad buwag! Mulala kaw! Hino ya pinakamaalagá kanlan lowa, ya ginto o ya Templo ya ampam-in alagá ha ginto? <sup>18</sup> Pandaygén yon ayn alagá ya pamaghumpa ha pamiulaman hên an-iátang kan Apo Namalyari ha Templo. Noa, pandaygén yon maalagá ya pamaghumpa ha an-iátang. <sup>19</sup> Taganán buwag kaw! Hino ya pinakamaalagá kanlan lowa, ya indigalo ha pamiulaman hên an-iátang kan Apo Namalyari, o ya pamiulaman ya ampam-in alagá ha an-iátang? <sup>20</sup> Kabay hilay maghumpa ha pamiulaman hên an-iátang kan Apo Namalyari ha Templo, ay ampaghumpaan la ya an-iátang etaman. <sup>21</sup> Hilay maghumpa ha Templo, ay ampaghumpa kan Apo Namalyari ya atsi ha Templo. <sup>22</sup> Hilay maghumpa ha langit, ay ampaghumpa kan Apo Namalyari ya ampamaala hên ubat bayro.

<sup>23</sup> “Kaingalo kaw ya mánoron Kautuhan ni apo Moises haka hikaw ya Pariseo! Ampagbabara kaw! Mangêd ya an-idin yo kan Apo Namalyari ya ikamapo hên bulong ya pan-ihabug yo ha habaw yo, noa, angkapaulayan yoy maalagáy Kautuhan, ya katoynungan, haka ya ingalo ha kapareho yo, haka ya mag-in mapaniwal-an. Mu-muna kailangan yon dyanan alagá ya habayto kaban ihundo yoy pam-i yon ikamapo. <sup>24</sup> Hikaw ay nanad ha buwag ya ampangakay ha kapareho lan buwag. Andaygén yoy kaatag ya dapat daygén, noa, angkapaulayan yoy pinakamaalagá!

<sup>25</sup> “Kaingalo kaw ya mánoron Kautuhan ni apo Moises haka hikaw ya Pariseo! Ampagbabara kaw! Hikaw ay maialimbawa ha mihay ampan-guyah bat hên bulin baso haka bokot pinggan, gawan a yon an-uyahan ya mantêg dêmék, ta ampaulayan yoy nakêm yo, ya hadyay kahibaan, haka ayn pamagpigel ha sarili. <sup>26</sup> Buwag kaw ya Pariseo! Unaén yon bayoén ya nakêm yo ta ha êmbayro ay mag-in bayo etaman ya pamimiyay yo.

<sup>27</sup> “Kaingalo kaw ya mánoron Kautuhan ni apo Moises haka hikaw ya Pariseo! Ampagbabara kaw! Noa, nanad kaw pantson ya pinintoraan ya mahampat hêlkên, ya napnon but-o haka bangkay ya anggumata. <sup>28</sup> Ta ha

hêlêk lan kapareho yo ay mahonol kaw ha Kautuhan, noa, ha kaptêgan, ay ampagbabara kaw, haka panay karawakan ya laman nakêm yo.”

*Hilay mánoron Kautuhan ni apo Moises haka hilay Pariseo ay hinabyanan ni Apo Jesus*

(Lucas 11:47-51)

<sup>29</sup> “Kaingalo kaw ya mánoron Kautuhan ni apo Moises haka hikaw ya Pariseo! Ampagbabara kaw! Ampamadyag kaw hén pantson lan propeta ni Apo Namalyari. Haka ampapakahampatén yoy pinangilbêngan kanlan nag-in mahonol kana. <sup>30</sup> Haka anhabién yo êt ya, ‘No atsi kay dayi ha luta hén hato, ay a naén hila impapatsi hilay propeta ni Apo Namalyari.’ <sup>31</sup> Ha pamaghabi yon habayto, ay ampamaptêg kaw, ya hikaw ay kaapo-apoan lan nammatsi kanlan propeta ni Apo Namalyari. <sup>32</sup> Hali! Ihundo yoy pamanyag karawakan ya inumpisaan lan ninuno yo! <sup>33</sup> Nanad kaw utan ya makamatsi, ya ampipag-ahug ha angkaulam! Yarin makatakah kaw ha kaparusaan ha impiyerno! <sup>34</sup> Kabay iutoh ko kamoyu ya hilay propeta ni Apo Namalyari, haka hilay manga-talino, haka hilay ampanoron kalabayan ni Apo Namalyari. Ya kaatag ay patsén yo ha koros. Ya kaatag ay pagpapatokén yo ha sinagoga yo, haka ya kaatag êt, ay pakikamat-kamatén yo ha ay-iri man ya balayan. <sup>35</sup> Kabay parusaan kaw, gawan ha pangamatsi lan mahonol kan Apo Namalyari, paubat hén pinatsi hi Abel, ya ayn kasalanan, angga ha pinatsi hi Zacarias ya anak ni Baraquias, ya pinatsi lan ninuno yo ha Templo ha pilatan hén paypaahukan ya panalanginan haka ya pamiulaman hén an-iátang kan Apo Namalyari. <sup>36</sup> Pakagilamén yo, parusaan kaw ya angkabiyay amêhén gawan ha pangamatsi lan habayto.”

*Ya pamanlugud ni Apo Jesus kanlan taga-balayan Jerusalem*

(Lucas 13:34-35)

<sup>37</sup> Hinabi nay na êt ni Apo Jesus, ya wana, “Kaingalo kaw ya taga-Jerusalem, ta pinatsi yoy propeta ni Apo Namalyari, haka pinagbabato yon pinatsi hilay kaatag ya in-utoh kamoyu. Kata-ungno kataw nan labay lokopén hén nanad ha pamanlokop hén manok ha hiwhiw na. Noa, a kaw mabay hén palokop kangko. <sup>38</sup> Pakagilamén yo! Booy nakêm nan paulayan ni Apo Namalyari ya balayan haka Templo yo. <sup>39</sup> Pakagilamén yo! Paubat amêhén, ay a yo ko pon mahêlêk, angga ha a yo habiên ya hatsi ya habi, ‘Iningalwan ya in-utoh ni Apo Namalyari.’”

## 24

*Inungkat ni Apo Jesus ya pamanira hén Templo*

(Marcos 13:1-2; Lucas 21:5-6)

<sup>1</sup> Hén immawah hi Apo Jesus ha Templo, kaban ampammita ya, ay napaidani kana ya tagahonol na, ta intoro la kana ya kahampatan hén Templo.

<sup>2</sup> Amêhén, hinabi ni Apo Jesus, ya wana, “Lumatêng lanoy allo, ay manga-aagwat ngan ya hata bato ya pinaglolog ya angkahêlêk yo.”

*Ya hadyay pamairap ya lumatêng*

(Marcos 13:3-13; Lucas 21:7-19)

<sup>3</sup> Amêhén, hén pamakalakat lan Apo Jesus ha Tawtgug Olibo, hén kakapag la tana, ay nangotang hilay tagahonol na kana, ya wanla, “Habiên mo kannaén no makanon malyari ya habayto, haka no ay-êmén naén mamwangan no marani yanay pamag-orong mo di, haka makano ya anggaan hén luta.”

<sup>4</sup> Kabay wani Apo Jesus, “Kaillag kaw, ta êmén a kaw maloko, <sup>5</sup> ta mal-at ya maghabin êmén di, ‘Hiko ya Mesias, ya Cristo, ya impangakon Mámiligtas ya

pinili ni Apo Namalyari hên mamaala.’ Gawan bayro, ay mal-at ya maloko la. <sup>6</sup> Paan kaw malimo ha magilaman yoy tungkol ha manigulo-gulo haka patsian, ta habayto ay kailangan lumatêng pon, noa, a pon tambêng lumatêng ya anggaan hên luta. <sup>7</sup> Milalaban hilay bansa haka hilay angkalokopan hên mihay bansa ay milalaban ha kabansa la. Lumatêng ya mangakhaw ya layon ha ay-iri man ya legal. Lumatêng êt ya hadyay lonoh. <sup>8</sup> Noa, habayto ay umpisan bêngat hên hadyay kairapan, hên nanad ha umpisan pan-umilab hên ampanganan.

<sup>9</sup> “Kanan habayto ay kahêmêkan kaw hên tawo ha balang bansa gawan ha paniwala yo kangko. Gêtan la kaw ha manungkulau, ta parusaan haka patsên. <sup>10</sup> Kanan habayto, ay mal-at ya maalihan hên paniwala. Mikakahêmêk hila haka miuupit. <sup>11</sup> Mal-at ya lumtaw ya magbabara ya hila ay propeta ni Apo Namalyari, kabay mal-at ya mapapaniwala la ha alwan pêtêg ya paniwala. <sup>12</sup> Gawan ha parawak hên parawak hilay atsi bayri ha boon luta, ay papérad anan papérad hilay ampanlugud. <sup>13</sup> Noa, hilay makahundo ha paniwala la kangko, angga ha anggaan biyay la, agyan ampagdanas hila hên hadyay kairapan, ay madyanan hên biyay ya ayn angga. <sup>14</sup> Maipamwang pon kanlan tawo ha balang bansa ya Mangêd ya Habi tungkol ha pamanlokop ni Apo Namalyari, bayo lumatêng ya anggaan hên luta.”

*Inungkat ni Apo Jesus ya pamanira hên balayan Jerusalem  
(Marcos 13:14-23; Lucas 21:20-24)*

<sup>15</sup> Inhundo ni Apo Jesus ya pamaghabi na, ya wana, “No mahêlêk yoy nay kapaparêng-êy ya hadyay karawakan ya malyari ha Templo ni Apo Namalyari, ay matupad ya habaytoy inungkat\* ni Propeta Daniel.” Hikaw ya ampamaha ay pakaintindiên yoy habaytsi! <sup>16</sup> “Ha allon habayto ay kailangan muwayun lumakat ha babo, ya hilay taga-probinsyan Judea. <sup>17</sup> Habaytoy allo, no main atsi ha bubungan bali la, ay dapat tampol hilan tumaoy hên muwayun hên lumakat ha babo! Paan hilay nan mangwan pibandian la ha lalêñ bali la! <sup>18</sup> Paan hilay nan muli ya atsi ha panamnan hên mangwan pangkêbêl la! <sup>19</sup> Kanan habayto, ay kaingalo hilay nabuktot haka hilay ampamahoho. <sup>20</sup> Ihalangin yo, ya a dayi malyari ha panaon hên kêbêl o ha allon pamagsimba, ya habaytoy pammuwayu yo hên magtago. <sup>21</sup> Ta di ha luta ay maranasan ya hadyay kairapan, ya ayn kapantag paubat hên dinyag ni Apo Namalyari ya hata luta angga amêhêñ. Haka ahina maranasan oman ya êmbayroy kairapan. <sup>22</sup> No mabuyot ya habaytoy kairapan, ay ayn nanan mabiyay di ha luta, noa, gawan bat ha ikakangêd lan pinili na hên mag-in kana, ay tinalagá ni Apo Namalyari hên paipêkêñ ya habaytoy panaon.

<sup>23</sup> “Kanan habaytoy panaon, no main maghabin, ‘Atsi ya bayri ya Mesias, ya Cristo, ya Mámilitgas, o atsi ya bayro,’ ay paan kaw maniwala kanla. <sup>24</sup> Ta main magbabara hên hila ay Cristo, haka main êt kaatag ya magbabara hên hila ay mámpamwang hên an-ipaihip kanla ni Apo Namalyari. Mamipahlêk hilan kapapaépapah ta labay lan mábungaw ya hilay pinili ni Apo Namalyari hên mag-in kana. <sup>25</sup> Kabay kaillag kaw! In-ubuh kinan hinabi ya malyari, ta êmén a kaw pamungaw kanla.

<sup>26</sup> “No main maghabi, ‘Atsi ya bayro ya Cristo ha kabalah-balahan!’ o ‘Atsi ya bayri ha lalêñ bali’ ay paan kaw maniwala. <sup>27</sup> Ta no ay-êmén magkulibid ya kimat, ya mag-ahnag ha marayo, haka mahêlêk hên balang miha, ay

\* <sup>24:15</sup> Daniel 11:31-32.

êmbayro êt ya pag-orong ko, hên Taga-Langit, ya In-anak Tawo. <sup>28</sup> Ya pag-orong ko ay taganán mamwangan, no ay-êmén taganán mamwangan ya main bangkay ha pagtsiponan lan uwak.”

*Ya pamanlumatêng oman ni Apo Jesus ya Taga-Langit, ya In-anak Tawo  
(Marcos 13:24-27; Lucas 21:25-28)*

<sup>29</sup> Wana êt ni Apo Jesus, “Pangayarin habaytoy hadyay kairapan, ay dumiglêm ya allo, haka ahina humawang ya buwan, mangatata ya bêtêwên, haka maubuh hên mangayêgyêg ya angkahêlêk ha langit. <sup>30</sup> Kanan habayto, ay mahêlêk hên palatandaan ha langit ya lumatêng ako, ya Taga-Langit, ya In-anak Tawo. Mipanyêngên hila bayto ya a naniwala kangko, ta mahêlêk ako, ha lêmm, ya anlumatêng, hên kalamoy kapangyarihan ko, haka kahampatan hawang ya a makwan ihipên. <sup>31</sup> Kayêpan ya tambuyok hên hadyay hêkaw. Kanan habayto, ay iutoh ko hilay anghel ko ha kaganawan bansa ha boon luta, ta êmén la tsiponêni pinili ni Apo Namalyari hên mag-in kana.”

*Ya toro ya makwa ha poon kayon igos  
(Marcos 13:28-31; Lucas 21:29-33)*

<sup>32</sup> Bayo wani Apo Jesus, “Mangwa kaw hên aral ha poon kayon igos. No mamayo yan bulong, ay muwang yoy na bayto ya marani yanay kaingitan. <sup>33</sup> Êmbayro êt, no mahêlêk yoy nan maubuh hên malyari ya habayto ya kapapalimo, ay mamwangan yoy taganán marani yanay pamag-orong ko. <sup>34</sup> Pakgilamên yo. Maubuh hên matupad ya habayto kaban main pon di ha luta hên kapareho yon Israelita. <sup>35</sup> Ya luta haka ya angkahêlêk ha langit ay main anggaan, noa, ya habi ko ay ayn anggaan.”

*Ayn ampakamwang no makanoy pag-orong ni Apo Jesus  
(Marcos 13:32-37; Lucas 17:26-30, 34-36)*

<sup>36</sup> Wanay na êt ni Apo Jesus, “Ayn ampakamwang no hinon allo, o oras ya pag-orong ko. Hila man ya anghel ha langit, o hiko man ya Anak ni Apo Namalyari, ay a ampakamwang hên habayto. Hiyan bat hi Apo Namalyari ya Tatang tamo, ya nag muwang. <sup>37</sup> No ay-êmén ya karawakan pamimiyay la hên haton nabiyyay hi apo Noe, ya nagpalokop kan Apo Namalyari, ay êmbayro êt mag-in narawak ya pamimiyay no marani yanay pag-orong ko, hên Taga-Langit, ya In-anak Tawo. <sup>38</sup> Hên haton nabiyyay hi apo Noe, ay a la ginilam ya pamwang na. Inhundo lan angkabiyay hên hato ya pangan, pamamminêm, haka pamiaahawa la angga ha hinumwênilan apo Noe ha dinyag nay barko. <sup>39</sup> Ayn ha ihip lan a nipanggilam kan apo Noe ya malyari kanla, angga ha bigla hilan nahalipawan lanêm haka naubuh hilan nilêmêh. Êmbayro êt kabigla ya pag-orong ko, hên Taga-Langit, ya In-anak Tawo. <sup>40</sup> Ha pag-orong ko, no alimbawa ta main loway lalaki ya ampilamo hên ampag-obra ha panamnan, ya ampaniwala ay gêtan ha langit, noa, ya a ampaniwala ay ibalag ta parusaan. <sup>41</sup> No alimbawa ta main loway babayi ya ampanggiling, ya ampaniwala ay gêtan ha langit, noa, ya a ampaniwala ay ibalag ta parusaan. <sup>42</sup> Dapat panay kaw nakal-an, ta a yo muwang no makano ya pag-orong ko, ya Panginoon yo. <sup>43</sup> Pakaihipên yoy hatsi, no muwang na dayi hên nag bali no hinon oras ya pamanlumatêng hên manakaw, ay taganán maglêan ya, haka a na paulayan hên mahowên ya bali na. <sup>44</sup> Hikaw man, ay kailangan nakal-an, ta hiko ya Taga-Langit, ya In-anak Tawo, ay biglan lumatêng.”

*Ya mihay ipoh ay dapat mag-in mapaypaniwalan  
(Lucas 12:41-48)*

<sup>45</sup> Wanay na êt ni Apo Jesus, “Ya ipoh ya mapaypaniwal-an haka matalino, ay hiya ya dyanan tungkul-an no main yan lakwên ya amo na. Hiya ya manalan bali na, haka mami-arasyon hên iluto lan kapareho nan ipoh, hên allo-allo. <sup>46</sup> Hadyay higla hên ipoh, no malatêng na yan amo na hên ampanyag kalabayan na ha pag-orong na. <sup>47</sup> Pakagilamên yo, dyanan na yan tungkul-an hên amo na hên manalan hên kaganawan pibandian na. <sup>48</sup> Noa, no alimbawa ta narawak ya habaytoy ipoh, ta an-ihipêñ na ya mabuyot pon lumatêng ya amo na, <sup>49</sup> bayo umpisaan na hên pakatumbukêñ ya kapareho nan ipoh, ya lalaki boy babayi, ta mangan ya tana haka maglahing, <sup>50</sup> haka biglan lumatêng ya amo nan hatoy ipoh, <sup>51</sup> ay parusaan nay ipoh na hên hadyay bêyat. Bayo pakilamo na ya kanlan magbabara, bayro ha parusa ya ayn angga. Hadyay tangih na bayro, haka mang-ngê-ngêt ya ha hadyay huluk na boy ha hadyay ilab ya angkatanam na.”

## 25

### *In-alimbawa ni Apo Jesus ya pamanlumatêng hên pamanlokop ni Apo Namalyari ha istorya hên tungkol ha mapo ya dalaga*

<sup>1</sup> Inhundo ni Apo Jesus ya pamaghabi na, ya wana, “Habaytoy pamanlumatêng hên pamanlokop ni Apo Namalyari, ay maialimbawa ya êmêñ di: Main mapoy dalaga ya nanupa ha mihay lalaki ya an-ikasal. Balang miha kanla, ay main pag-atâng. <sup>2</sup> Ya lima kanla ay ayn minúwang, haka ya lima ay matalino. <sup>3</sup> Ya limay ayn minúwang, ay a nantan hên laro ya pag-gas hên pag-atâng la no maubuh ya laman hên pag-atâng la. <sup>4</sup> Noa, hilay limay manga-talino, ay nantan hên laro ya pag-gas la no maubuh ya laman hên pag-atâng la. <sup>5</sup> Hêñ niabala ya pamanlumatêng hên lalaki ya an-ikasal, ay nabêlêw hilay mapoy dalaga.

<sup>6</sup> “Noa, hên bonak yabi, ay main hên nan-angaw, ya wana, ‘Anlumatêng yay nay lalaki ya an-ikasal! Tupaén yo yay na!’ <sup>7</sup> Tampol hila etaman nimata ya mapoy dalaga ta in-il-an lay nay pag-atâng la. <sup>8</sup> Hinabi lan limay dalaga ya ayn minúwang kanlan manga-talino, ‘Dyanan yo kay etaman hên laro ya pag-gas naen ta ampangulipêndêng ya pag-atâng naen.’ <sup>9</sup> Noa, wanlan limay manga-talino, ‘Kayno a mihekad kantamon mapo ya habaytsi. Mangêd ay manaliw kaw pon ha magtsinda.’ <sup>10</sup> Kabay nammita hilay nay limay ayn minúwang hên nanaliw. Noa, kaban ayn hila bayro, ay nilumatêng ya lalaki ya an-ikasal. Haka hilay limay manga-talino ya nakal-an, ay nakalamo hên hinumwêñ ha pangasalan, bayo impapakahara ya kabat.

<sup>11</sup> “A nabuyot ay nilumatêng ya limay ayn minúwang ta namaêg hila, ‘Apo, Apo, pahowêñen mo kay!’ <sup>12</sup> Noa, wana kanla, ‘A kataw kilala!’ <sup>13</sup> Kabay dapat panay kaw nakal-an, ta a yo muwang no makano ya pag-orong ko, hên Taga-Langit, ya In-anak Tawo.”

*Hilay ampaghuyo ha Panginoon ay dapat lan gamitênyâ impatsiwalâ kanla ha ikakangêd*

*(Lucas 19:11-27)*

<sup>14</sup> Impamwang ni Apo Jesus kanla no ay-êmêñ ya pamimiyay ha pamanlokop ni Apo Namalyari kaban an-êngganan lay pag-orong na, ya wana, “Main mihay lalaki, ya mita ha marayo. Bayo ya nammita ay binaêg na hilay ampaghuyo kana ta impatsiwalâ na kanla ya pibandian na. <sup>15</sup> Dinyanan hilan palak-êñ la hên balang miha ha agyu la, ya peran ginto.\* Ya miha ay dinyanan nan limay pera ya ginto. Ya miha pon ay dinyanan nan loway

\* <sup>25:15</sup> Ya alagá hên mihay peran ginto ay suweldo hên mihay lalaki ha labinlimay taon.

pera ya ginto. Haka ya miha pon ay dinyanan nan mihay pera ya ginto. Bayo nammita yay na. <sup>16</sup> Hatoy dinyanan limay pera ya ginto ay nakatubo hēn limay pera ya ginto. <sup>17</sup> Embayro êt ya dinyanan loway pera ya ginto ay nakatubo ya êt hēn loway pera ya ginto. <sup>18</sup> Noa, ya hatoy nananggap hēn mihay pera ya ginto, ay nangalin luta ta bayro nan inhinêp ya pera hēn amo na.

<sup>19</sup> “Hēn nabuyot yay na ha nilako na, ay nag-orong hatoy amo ya namatubo hēn pera na, ta êmēn na mamwangan no ungnoy tubo lan ampaghuyo kana ha imbalag nay pera kanla. <sup>20</sup> Kabay napaidani ya hatoy dinyanan limay pera ya ginto, ta wana ha amo na, ya nakatubo yan lima ya pera ya ginto.

<sup>21</sup> “Wana kana hēn amo na, ‘Magaling ka! Hika ay mihay mangêd ya tagahuyo. Gawan mapaypaniwal-an ka ha pêrad, ay manalan ka hēn mal-at. Ilamo kata ha kahiglaan ko.’

<sup>22</sup> “Napaidani êt ya hatoy dinyanan loway pera ya ginto, ta wana ha amo na, ya nakatubo yan loway pera ya ginto.

<sup>23</sup> “Wanan amo kana etaman, ‘Magaling ka! Hika ay mihay mangêd ya tagahuyo. Gawan mapaypaniwal-an ka ha pêrad, ay manalan ka hēn mal-at. Ilamo kata ha kahiglaan ko.’

<sup>24</sup> “Amêhêñ, nilumatêng yay na êt ya dinyanan mihay peran ginto, ta wana ha amo na, ‘Apo, muwang ko ya hadyay igpit mo. Ampangwa ka hēn alwa mon pinaghayngêtan, bayo ampamutsi kan alwa mon intanêm. <sup>25</sup> Gawan malimo ko kamo, ay ingkali ko hēn inhinêp ha luta ya pera mo. Hêlkêñ mo, atsi ya pera moy ginto.’

<sup>26</sup> “Hinabi hēn amo na, ‘Narawak ka, haka nabarog! Muwang mo awud ya hadya kon igpit. Ampangwa kon alwa kon pinaghayngêtan, bayo ampamutsi ko hēn alwa kon intanêm! <sup>27</sup> No êmbayro awud, ay awta a mo indin ya pera ko ha bangko, ta êmēn mo dayin maiorong kangko ya habayto hēn kalamoy tubo na ha bangko!’ <sup>28</sup> Bayo wana kanlan kaatag ya ampaghuyo kana, ‘Kowêñ yoy peray ginto, ya atsi kana, ta idin yo ha main mapo. <sup>29</sup> Hilay nakatubo hēn indin kanla, ay dyanan ko pon êt. Noa, hilay a nakatubo hēn indin kanla, ay alihêñ êt kanla ya pêrad ya atsi kanla. <sup>30</sup> Hata ipoh etaman, ya ayn pukat, ay itapon yo ha hadyay kariglêman. Hadyay tangih na bayro, haka mang-ngêngêt ya ha hadyay huluk na boy ha hadyay ilab ya angkatanam na.’”

### *Ha pag-orong ni Apo Jesus, ay pipapawaen nay mapanyag kangêran ha mapanyag karawakan*

<sup>31</sup> “Ha pag-orong ko, ya Taga-Langit, ya In-anak Tawo, ay atsi kangko ya kapahilêw ya kahampatan hēn panga-Diyos ko, hēn kalamo ko hilay anghel ni Apo Namalyari. Bayro kinan mamaala. <sup>32</sup> Kanan habayto ay maubuh hēn paitsipon ha arapan ko hilay ubat ha balang bansa. Ubuhêñ ko hilan pipapawaen hēn nanad ha pamipapawa lan magpastol hēn tupa haka kambing. <sup>33</sup> Hilay mapanyag kangêran, ya maialimbawa ha tupa ay idin ko ha dapit panabtab ko, haka hilay mapanyag karawakan ya maialimbawa ha kambing, ay idin ko ha dapit uki ko. <sup>34</sup> Bayo wangko, ya Ari la, kanlan atsi ha dapit panabtab ko, ‘Hikaw ya iningalwan hēn Tatang ko, ay humwêñ kaw na, ta paidi kaw ha pamanlokop ko, ya in-il-an na para kamoyu paubat hēn dinyag ya luta. <sup>35</sup> Ta hēn nilonoh ako, ay pinakan yo ko. Hêñ naangan ako, ay pinainêm yo ko. A yo ko man muwang, ay pinahowêñ yo ko. <sup>36</sup> Hêñ ayn akon maitakop, ay dinyanan yo kon maitakop. Hêñ nagkahakit ako, ay hinayhay yo ko. Hêñ nakahukul ako, ay hiniraw yo ko.’

<sup>37</sup> “Bayo hinabi la kangko hēn hilay mahonol kana, ‘Panginoon, nakano naen kan pinakan hēn nilonoh ka? Nakano naen kan pinainêm hēn naangan

ka? <sup>38</sup> Nakano naêñ kan pinahowên hêñ a naêñ ka muwang? Nakano naêñ kan dinyanan takop? <sup>39</sup> Nakano naêñ kan hiniraw hêñ nagkahakit ka, o nakahukul ka?

<sup>40</sup> “Bayo habiêñ ko, ya ari la, kanla, ‘Pakagilamêñ yo, ha pamanawop yo kanlan kapareho yon ampaniwala, ya pinakamaaypa man ha hêlêk lan kaatag, ay hiko ya hinawpan yo.’

<sup>41</sup> “Bayo wangko, kanlan atsi ha dapit uki ko, ‘Hikaw ya pinanlêan ni Apo Namalyari hêñ parusa, pakarayo kaw kangko, magtagloh kaw ha impiyerno ha apoy ya taganán a maparê ya inlêan ni Apo Namalyari para kan Satanas haka hilay kalamo nay nangarawak ya anghel. <sup>42</sup> Ta hêñ nilonoh ako, ay a yo ko pinakan. Hêñ naangan ako, ay a yo ko pinainêm. <sup>43</sup> Hêñ a yo ko muwang, ay a yo ko pinahowêñ. Hêñ ayn akon maitakop, ay a yo ko dinyanan takop. Hêñ nagkahakit, haka nakahukul ako, ay a yo ko hiniraw.’ <sup>44</sup> Bayo hinabi la kangko hêñ hilay mapanyag karawakan, ‘Panginoon, nakano naêñ kan a pinakan, o a pinainêm hêñ naangan ka? Nakano naêñ kan a pinahowêñ hêñ a naêñ ka muwang? Nakano naêñ kan a dinyanan takop? Nakano naêñ kan a hiniraw hêñ nagkahakit ka, o nakahukul ka?’ <sup>45</sup> Bayo habiêñ ko kanla, ‘Pakagilamêñ yo, ha a yo pamanawop kanlan kapareho yo, ya pinakamaaypa ha hêlêk lan kaatag, ay hiko ya a yo hinawpan.’ <sup>46</sup> Bayo mipalako hilay mapanyag karawakan ha parusa ya ayn anggaan, noa, hilay mahonol kana, ay mipalako ha biyay ya ayn anggaan ha langit.”

## 26

### *Ya pamamulong kan Apo Jesus (Marcos 14:1-2; Lucas 22:1-2; Juan 11:45-53)*

<sup>1</sup> Hêñ naubuh nay nan naitoro ni Apo Jesus ya habayto, ay hinabi na kanlan tagahonol na, ya wana, <sup>2</sup> “Muwang yoy lowa tanay allo bayo mag Pistan Pangaligtas ha Egipto,\* haka hiko, ya Taga-Langit, ya In-anak Tawo, ay ipulong ta patsêñ ha koros.”

<sup>3</sup> Hêñ habayto êt ha bali ni Caifas, ya pinakapoon pari, ay nipagtsipon hilay ampamaala kanlan pari haka hilay kaatag pon ya toa lan Israelita ya nag tungkulun ha bansa. <sup>4</sup> Ta ampulungêñ la hi Apo Jesus, no ay-êmêñ la yan madakêp haka maipapatsi hêñ ayn makamwang. <sup>5</sup> Noa, wanla, “Paan tamo yan ipapatsi kaban pista, ta kayno magulo hilay kal-atan, ya am panggilam toro na.”

### *Hêñ binullogan hêñ pabango ya ulo ni Apo Jesus (Marcos 14:3-9; Juan 12:1-8)*

<sup>6</sup> Hêñ atsi hilan Apo Jesus ha baryon Betania, ay hinagyat hilan manggan ha bali ni Simon ya inalihan ketong. <sup>7</sup> Hêñ ampangan hila, ay main nilumatêng ya mihay babayi ya ampantan hêñ makamal ya pabango ya atsi ha pamyanan ya dyag ha alabastro, ta intugtug na ha ulo ni Apo Jesus. <sup>8</sup> Hêñ nahêlêk lan tagahonol na ya dinyag nan babayi, ay nanuluk hila, ya wanla, “Pata hinayang nay pabango! <sup>9</sup> Naihaliw na dayi ya habayto hêñ kal-atan pera ya naidin na dayi ha mairap!” <sup>10</sup> Hêñ napansin ni Apo Jesus ya anhabiêñ la, ay wana kanla, “Pata an-abalaêñ yo ya! Paulayan yo ya, ta ya dinyag na, ay taganán mangêd. <sup>11</sup> Hilay mairap ay panay yon kalamo, kabay ha hinon oras, ay mahawpan yo hila, noa, hiko ay a yo panay hêñ mapagkalamo. <sup>12</sup> Ha pamullog nan pabango kangko, ay nanad nay nan in-il-an ya lawini ko ha pamilbêng kangko no matsi kina. <sup>13</sup> Pakagilamêñ yo, ay-iri man ya legal

\* **26:2** Paskwa. Hêlkêñ ha panlêkan labay habiêñ hêñ habi di ha bokotan hêñ hata Bibliya.

bayri ha boon luta hên ipamwang ya Mangêd ya Habi, ay ungkatêñ etaman ya dinyag na ta êmêñ a ya maliwaan.”

*In-upit ni Judas Iscariote hi Apo Jesus  
(Marcos 14:10-11; Lucas 22:3-6)*

<sup>14</sup> Bayo nammita yay na hi Judas Iscariote, ya miha kanlan labinloway tagahonol ni Apo Jesus, ta êmêñ na ya mai-upit kanlan poon pari. <sup>15</sup> Wana kanla, “Hino awud ya idin yo kangko no hawpan kataw hên dakpêñ hi Jesus?” Kabay dinyanan la yan tatlumpo ya pera ya pilak. <sup>16</sup> Paubat hên habayto, ay ampangihip yay na hi Judas no ay-êmêñ na yan maidin ha gamêt la.

*Hi Apo Jesus ay namipal-an hên pangkaêñ la ha Pistan Pangaligtas ha Egipto  
(Marcos 14:12-21; Lucas 22:7-13, 21-23; Juan 13:21-30)*

<sup>17</sup> Ha unan allon Pistan Puto ya ayn Pampaalsa, ya allon pamatsi lan Israelita hên anak tupa, ya kênaêñ la hên habayton yabi hên Pistan Pangaligtas ha Egipto, ay kinotang lan labinloway tagahonol ni Apo Jesus, kana, ya wanla, “Atoy labay moy legal ya pangil-anan naêñ hên pangkaêñ tamô amêhêñ yabi ha Pistan Pangaligtas?” <sup>18</sup> In-utoh hila ni Apo Jesus ya wana kanla, “Muna kaw ha balayan Jerusalem. Panlumatêng yo bayro, ay matupa yoy mihay lalaki. Habaytsi ya habiêñ yo kana, ‘Wanan Mánoro naêñ ya marani yanay panaon ya intakda ni Apo Namalyari kana. Kailangan nay mihay kuwarto ya panganan nan kaêñ ha Pistan Pangaligtas ha bali mo, hên kalamo na kay ya tagahonol na.’” <sup>19</sup> Hinonol lan tagahonol na ya in-utoh na, ta in-il-an lay nay kaêñ ha Pistan Pangaligtas.

<sup>20</sup> Hêñ yabi yana, ay inarap ni Apo Jesus ya kaêñ hên kalamo na hilay labinlowa. <sup>21</sup> Kaban ampangan hila, ay wana kanla, “Pakagilamêñ yo, miha kamoyu bayri ha kaaêñ tamô, ay mangi-upit kangko.” <sup>22</sup> Namalagêhbêg ya nakêñ lan tagahonol na, haka wanlan balang miha kana, “Panginoon, yarin hiko ya inungkat mo!” <sup>23</sup> Kabay hinabi ni Apo Jesus, “Ya kalamo kon namitsil-tsил hên puto ha kolo, ay hiya ya mangi-upit kangko. <sup>24</sup> Hiko ya Taga-Langit, ya In-anak Tawo ay taganán matsi hên nanad ha impahulat ni Apo Namalyari ha Kahulatan hên haton lagi. Noa, taganán kaingalo ya mangi-upit kangko. Mangêd kana, ay a ya dayin in-anak.” <sup>25</sup> Amêhêñ, hi Judas Iscariote, ya nangi-upit kan Apo Jesus, ay nangotang, ya wana, “Mánoro, yarin hikoy inungkat mo!”

Hinabi kana ni Apo Jesus, “Awo, hinabi mina.”

*Nangan hi Apo Jesus haka hilay labinloway tagahonol na hên pangkaêñ ha Pistan Pangaligtas  
(Marcos 14:22-26; Lucas 22:14-20; 1 Corinto 11:23-25)*

<sup>26</sup> Kaban ampangan hila, ay nandampot hi Apo Jesus hên puto ta impahalamat nay habayto kan Apo Namalyari, haka na pino-potoh, bayo inggawang na kanlan tagahonol na, ta wana, “Habaytsi ya lawini ko, kowêñ yo ta kaêñ yo.” <sup>27</sup> Amêhêñ, nandampot yan pamminêman ya nag alak ta impahalamat nay habayto kan Apo Namalyari. Bayo inggawang na kanla, ta wana, “Maubuh kaw hên minêñ. <sup>28</sup> Habaytsi ya daya ko, ya mamoganggang ha pamatawed hên kasalanan hên kal-atan. Yabay ya nanad pinakapirma hên kahundoan ni Apo Namalyari kanlan pinili na hên mag-in kana. <sup>29</sup> Ta anhabiêñ ko kamoyu, ya a ko pon minêñ oman hên alak, angga ha allo hên inumêñ koy bayoy alak hên kalamo yo ha pamanlokop ni Apo Namalyari, ya Tatang ko.” <sup>30</sup> Hêñ nahabi ni Apo Jesus ya habayto, ay nagkanta hilan pamapguri kan Apo Namalyari bayo nilumakat hila ha Tawgtug Olibo.

*Impamwang ni Apo Jesus ya habiên ni Simon Pedro ya a na ya muwang  
(Marcos 14:27-31; Lucas 22:31-34; Juan 13:36-38)*

<sup>31</sup> Hêñ anlumakat hilay na ha Tawgtug Olibo, ay wani Apo Jesus kanlan tagahonol na, “Laamêhêñ yabi, gawan ha malyari kangko, ay lakwanan yo ko, ta impahulat ni Apo Namalyari ha Kahulatan, ya êmêñ di, ‘Patsêñ ko ya pastol, haka mapitatayak hilay nay tupá.’<sup>†</sup> <sup>32</sup> Noa, ha pangoman kon mabiyay, ay muna ko kamoyu ha probinsyan Galilea.” <sup>33</sup> Bayo wani Pedro, “Lakwanan ka man hêñ kalamo ko, gawan ha malyari kamo, ay a kata lakwanan.” <sup>34</sup> Hinabi ni Apo Jesus, “Pakagilamêñ mo, bayo mangkatsi ya manok, amêhêñ yabi, ay katatlo mon habiên ya a mo ko muwang.” <sup>35</sup> Noa, impalêkpêk ni Pedro, ya wana, “Matsi ko man hêñ kalamo mo, ay a ko habiên ya a kata muwang.” Êmbayro êt ya hinabi lan kaatag ya tagahonol na.

*Nanalangin hi Apo Jesus ha katanamanan Getsemani ha Tawgtug Olibo  
(Marcos 14:32-42; Lucas 22:39-46)*

<sup>36</sup> Hêñ nilumatêng hilay na ha katanamanan Getsemani, ay wani Apo Jesus kanlan tagahonol na, “Mikno kaw di kaban manalangin ako bayro ha marayo-dayo.” <sup>37</sup> Bayo pinakilamo ni Apo Jesus hi Pedro, haka hilay loway anak ni Zebedeo, ya hi Santiago haka hi Juan. Bayron nakadanas yan hadyay kalungkutan haka kabyatan. <sup>38</sup> Haka wani Apo Jesus kanla, “A kina agyu ya hadyay kalungkutan ha nakêñ ko, ya nanad kinan ikamatsi. Di kaw pon haka paan kaw mabêlêw.” <sup>39</sup> Napaidayo ya kanla hêñ marayo-dayo ta nandoko yan nanalangin, ya wana, “Tatang ko ha langit, no labay mo, ay a mo ko dayin paulayan hêñ magdanas ako hêñ hatsi ya hadyay pamagdusa ya lumatêng kangko. Êmbayro man ya labay ko, ay alwan kalabayan ko ya mahonol, noa, ya kalabayan mo ya mahonol.”

<sup>40</sup> Hêñ nirêng ya, hêñ ubat nanalangin, ay nag-orong yay na ha andyanan lan Pedro. Nalatngan na hila hêñ angkabêlêw. Pinukaw na hi Simon Pedro, ya wana, “A kaw man makapagpuyat hêñ kalamo ko hêñ miha man ya oras?” <sup>41</sup> Paan yon pakilakwan ya bêlêw. Manalangin kaw, ta êmêñ a kaw mahambut hêñ tukso no ansubukêñ ya paniwala yo. Nakal-an ya nakêñ yo hêñ humonol, noa, a yo agyu.”

<sup>42</sup> Nag-orong hi Apo Jesus ha pinanalanginan na, hêñ nanalangin, ya wana, “Tatang ko ha langit, no taganán kailangan kon magdanas hêñ hatsi ya hadyay pamagdusa ya lumatêng kangko, ay kalabayan mo ya mahonol.” <sup>43</sup> Hêñ inorong na hilan oman ya tatlo, ay angkabêlêw hilay na êt gawan a la matêñ hêñ magpuyat.

<sup>44</sup> Nag-orong yan oman hi Apo Jesus ha pinanalanginan na hêñ katatlo yan nanalangin, ya inhalangin nay na. <sup>45</sup> Hêñ katatlo na hilan inorong, ay wana kanla, “Angkabêlêw kaw pon êt hêñ ampagpainawa! Nilumatêng ya oras ya hiko ya Taga-Langit, ya In-anak Tawo, ay i-upit kanlan makasalan!” <sup>46</sup> Mirêng kaw na, ta anlumatêng ya ampami-upit kangko. Tupaêñ tamo ya!”

*Ya pamandakêp kan Apo Jesus  
(Marcos 14:43-50; Lucas 22:47-53; Juan 18:3-12)*

<sup>47</sup> Kaban ampaghabi ya pon hi Apo Jesus, ay main nilumatêng ya kal-atan ya ampangamat kan Judas Iscariote ya miha kanlan labinloway tagahonol na. Hilay kal-atan ya nipag-almas hêñ êetak haka pamatok, ay in-utoh lan toa ya nag tungkulon ha bansa, haka kanlan ampamaala kanlan pari. <sup>48</sup> Hi Judas ay nam-i kanla hêñ palatandaan, ya no hinoy aroêñ na, ay yabay ya dakpêñ la. <sup>49</sup> Tampol nilako ni Judas hi Apo Jesus hêñ kinumusta hêñ

<sup>†</sup> 26:31 Zacarias 13:7.

main lamoy pamangaro. <sup>50</sup> Kabay wani Apo Jesus kana, “Kalalaki, daygên minay ambalakên mo.” Bayo dinawhong la ya hi Apo Jesus hên dinakêp. <sup>51</sup> Noa, biglan nanigpah ya miha kanlan tagahonol ni Apo Jesus, hên têkk hên mihay ipoh hên pinakapoon pari. <sup>52</sup> Wani Apo Jesus kana, “Igoma moy êetak mo, ta hilay ampanggamit hên êetak ha pamatsi, ay ha êetak êt hên matsi. <sup>53</sup> Èndat yon a ko makadawat ha Tatang ko ha langit hên libo-liboy anghel ya manawop kangko! <sup>54</sup> Noa, no daygên koy habayto, ay êmén bayton matupad ya impahulat ni Apo Namalyari ha Kahulatan ya êmbayri ay taganán dapat malyari!”

<sup>55</sup> Kanan habayto, ay wani Apo Jesus kanlan kal-atan ya ampipandakêp kana, “Andakpên yo ko hên main kalamoy êetak haka pammotok hên nanad pandakêp ha mapanyag karawakan. Allo-allo nanoro ko ha Templo, haka a yo ko dinakêp. <sup>56</sup> Noa, dapat matupad ya Kahulatan ya impahulat ni Apo Namalyari kanlan mámpamwang hên an-ipaihip na kanla.” Bayo naubuh la yan nilakwanan hên tagahonol na hên nipamwayu.

*Hi Apo Jesus ay in-arap kanlan ampamaala ha Templo  
(Marcos 14:53-65; Lucas 22:54-55, 63-71; Juan 18:13-14, 19-24)*

<sup>57</sup> Hilay nandakêp kan Apo Jesus, ay nantan kana ha bali ni Caifas, ya pinakapoon pari ta bayro hilay nan naka-tsipon hilay móñoron Kautuhan ni apo Moises, haka hilay kaatag kanlan toa ya nag tungkulan ha bansa. <sup>58</sup> Hi Pedro ay nangamat kanla ha marayo-dayo ha lote hên bali nan pinakapoon pari. Nakiikno ya hên kalamo lan bantay ta labay nan mahélêk no hinoy malyari kan Apo Jesus. <sup>59</sup> Hilay ampamaala kanlan pari haka ya kaganawan kaatag ya kalamo la ha Sanedrin, ay ampanapol hên manistigos hên alwan pêtêg ya maibara la kan Apo Jesus, ta êmén la ya maipapatsi. <sup>60</sup> Noa, ayn hilan matapol, mal-at man ya nanistigos ha alwan kaptégan ya tungkol kan Apo Jesus. Bayo main nilumatêng ya lowa, <sup>61</sup> ya naghabi, “Nagilam naén ya hinabi na ya hiraén na kano ya Templo ni Apo Namalyari, ta ipairêng nan oman ha tatlon allon bêngat.”

<sup>62</sup> Amêhén, nirêng ya pinakapoon pari la ha arapan lan kal-atan ta kinotang na hi Apo Jesus, ya wana, “Hino ya mahabi mo ha an-ibara la kamo? Pata a ka maghabi?” <sup>63</sup> Noa, minghan man, ay a ya naghabi hi Apo Jesus. Wanan pinakapoon pari kana, “Ha arapan ni Apo Namalyari, ay habiên mo kannaén no hika ya Mesias, ya Cristo, ya Mámilitas, ya Anak ni Apo Namalyari.”

<sup>64</sup> Wana etaman ni Apo Jesus, “Awo, pêtêg ya hinabi mo. Haka paubat amêhén, ay mahélêk yo ko, ya Taga-Langit ya In-anak Tawo, hên nakaikno ha daptit panabtab ni Apo Namalyari ya Makapangyarihan. Haka mahélêk yo kon lumatêng ubat ha langit ha pibonakan hên lêmm.” <sup>65</sup> Gawan huluk nan pinakapoon pari, ay ginihi nay sarili nan takop, ta wana, “A tamina kailangan hên kaatag ya tistigos, ta nagilam tamina man ya hinabi na. Nagilam yoy nay pamipantag nan sarili na kan Apo Namalyari! Yarin a nan ammusmusén hi Apo Namalyari ya tawo yan bêngat! <sup>66</sup> Hino ya labay yon daygên kana?” Naubuh hilan naghabi, ya dapat yan patsén.

<sup>67</sup> Bayo dinul-an lay lupa na haka la ya pinagtutumbuk haka main nag-tatampaling kana, <sup>68</sup> ya wanla, “No hika ya Mesias, ya Cristo, ya Mámilitas, ay habiên mo no hinoy nanampaling kamo!”

*Katatlo nan hinabi ni Pedro ya a na balay hi Apo Jesus  
(Marcos 14:66-72; Lucas 22:56-62; Juan 18:15-18, 25-27)*

<sup>69</sup> Kaban atsi ya hi Pedro hên nakiikno hên kalamo lan bantay, ay napansin yan mihay ipoh ya babayi, kabay wana kana, “Hika êt ya kalamo ni Jesus

ya taga-Galilea.” <sup>70</sup> Noa, wani Pedro, “Alwa. A ko muwang ya anhabiên mo.” <sup>71</sup> Bayo nagdayo yan pérad hén dinumani ha awahan. Noa, napansin yay na êt, hén kaatag ya ipoh ya babayi, ya wana kanlan karani na, “Habain ya lalaki ay kalamo ni Jesus ya taga-Nazaret.” <sup>72</sup> Noa, wani Pedro, “Alwa! Matsi ko man, ay taganán a ko ya muwang!” <sup>73</sup> Hén a nabuyot, ay wanlan karani ni Pedro, “Siguradon hika ya kalamo ni Jesus gawan napansin naén ha pamaghabi mo, ya taga-Galilea ka êt.” <sup>74</sup> Noa, wani Pedro, “Alwa! Matsi ko man, ay taganán a ko ya muwang ya habain!” Kaban ampaghabi ya pon, ay nangkatsi ya mihay manok. <sup>75</sup> Bayo naihipan ni Pedro ya hinabi ni Apo Jesus kana, ya “Bayo mangkatsi ya manok, ay katatlo mon habiên, ya a mo ko muwang.” Kabay inumawah ya hén hadyay tangih na.

## 27

### *Hi Apo Jesus ay in-arap kan Gobernador Pilato (Marcos 15:1; Lucas 23:1-2; Juan 18:28-32)*

<sup>1</sup> Hén dali allo pon, ay nagkamiha hilay toa ya nag tungkulon ha bansa, haka hilay ampamaala kanlan pari, ya dapat yan patsén hi Apo Jesus. <sup>2</sup> Kabay ginapoh la yan gintan kan Gobernador Pilato.

### *Nagpakamatsi hi Judas Iscariote (Dyag 1:18-19)*

<sup>3</sup> Hén nahélék ni Judas Iscariote ya patsén lay na hi Apo Jesus, ay naghéhê ya, haka na in-orong kanlan poon pari boy kanlan toa ya nag tungkulon ha bansa, ya tatlumpo ya pera ya pilak ya in-upa la kana ha pay-upit na kan Apo Jesus. <sup>4</sup> Haka wana kanla, “Nakadyag akon kasalanan, ta nai-upit koy linaw ya tawo.” Noa, wanla, “Ayn kay pakiemén kamo! Atsi kamo!” <sup>5</sup> Inhamwag ni Judas ya hatoy pera ha lalén Templo, haka ya nammita ta nagpakamatsi ya hén nagbitkê.

<sup>6</sup> Hatoy pera ay pinumpun lan ampamaala kanlan pari, ta wanla, “Bawal ha Kautuhan ni apo Moises hén ipahan ha peran Templo ya pinamayad hén mangwan biyay.” <sup>7</sup> Kabay nagkamiha hilay ampamaala kanlan pari, ya habaytoy pera, ay panaliw hén luta hén mihay magdya-dyag korén ya pamilbêngan lan natsi ha Jerusalem, ya a la kilala, ya ubat ha kaatag ya bansa. <sup>8</sup> Kabay angga améhén ay ambaégén lay habaytoy luta hén Luta hén Daya.

<sup>9</sup> Habaytoy nakatupad hén hinabi ni Propeta Jeremias, ya wana, “Kingwa lay tatlumpoy pera ya pilak, ya in-alaga kana hén Israelita, <sup>10</sup> haka la pinanaliw hén luta hén mihay magdya-dyag hén korén, ta habaytoy in-utoh kangkon Panginoon.”\*

### *Hi Apo Jesus ay in-arap kan Gobernador Pilato (Marcos 15:2-5; Lucas 23:3-5; Juan 18:33-38)*

<sup>11</sup> Hén hi Apo Jesus ay in-arap kan Gobernador Pilato, ay kinotang na ya hi Apo Jesus, ya wana, “Awta? Hika ya ari hén Israelita?” Hinabi ni Apo Jesus, “Hinabi mina, Gobernador.” <sup>12</sup> Noa, hén ambad-an la ya hi Apo Jesus hén ampamaala kanlan pari haka hilay toa ya nag tungkulon ha bansa, ay a ya naghabi. <sup>13</sup> Bayo wani Gobernador Pilato kan Apo Jesus, “A mo angkagilaman ya kal-atan ya an-ibara la kamo?” <sup>14</sup> Noa, a ya naghabi hi Apo Jesus, ta miha man ha an-ibara la kana, ay a na pinakibatan. Kabay nag-épapah hi Gobernador Pilato.

\* **27:10** Zechariah 11:12-13, Jeremias 32:6-9.

*Hi Apo Jesus ay hinatolan hên matsu ha koros  
(Marcos 15:6-15; Lucas 23:13-25; Juan 18:39-19:16)*

<sup>15</sup> Main kaugalian, ha balang Pistan Pangaligtas ha Egipto, ya an-ibuhan nan gobernador ya mihay nakahukul ya ampilién lan kal-atan. <sup>16</sup> Kanan habayto ay main nakahukul ya nag langan Barrabas<sup>†</sup> ya kamwangan gawan ha karawakan ya dinyag na. <sup>17</sup> Hêna naka-tsipon ya kal-atan, ay kinotang hilay na ni Gobernador Pilato, ya wana, “Hino awud ya labay yon ibuhan ko, hi Barrabas o hi Jesus, ya ambaégén Cristo?” <sup>18</sup> Ta muwang ni Gobernador Pilato ya hi Apo Jesus, ay gintan la kana, gawan angkahéman la ya.

<sup>19</sup> Kaban ampikno hi Pilato ha panlingonan kasos, ay nilumatêng kana ya pinaypagtanan ahawa na hêna êmén di ya pangahabi, “Paan kan kiêmén hêna parusaan habain ya ayn kasalanan, ta hadyay yagah hêna nakêm ko gawan ha nataynêp ko ya tungkol kana.”

<sup>20</sup> Noa, hilay ampamaala kanlan pari haka hilay toa ya nag tungkulon ha bansa, ay nanulhul hêna kal-atan ya pakikwaan la kan Gobernador Pilato ya ibuhan na hi Barrabas, ta hi Apo Jesus ay patsen. <sup>21</sup> Kabay kinotang na hilan oman ni Gobernador Pilato, “Hino kanlan lowa ya labay yon ibuhan ko?” Wanla kana, “Hi Barrabas!” <sup>22</sup> Kinotang na hilay na êt, “Hino awud ya labay yon daygén ko kan Jesus ya ambaégén Cristo?” Kabay in-angaw la, “Ipako ya ha koros!” <sup>23</sup> Bayo kinotang ni Gobernador Pilato, “Awta? Hinoy kasalanan na?” Noa, impapakaangaw lay na êt, “Ipako ya ha koros!” <sup>24</sup> Hêna nahêlêk ni Gobernador Pilato ya ayn yan madyag, ta magulo hilay na, ay nag-uyah yan gamêt na ha arapan lan kal-atan, haka wana kanla, “Ayn akon kasalanan ha pamatsi kanan habaytsi. Hikaw ya managot ha pamatsi kana!” <sup>25</sup> Hinabi lan kal-atan Israelita, ya wanla, “Ya pamarusa ni Apo Namalyari ay mipalakoy na kannaén haka ha maának naén gawan ha pangamatsi ni Jesus.” <sup>26</sup> Hinonol ni Gobernador Pilato ya kalabayan lan kal-atan, ta imbuhan na hi Barrabas. Impadapi na hi Apo Jesus, haka indin na ya kanla ta êmén la ya ipapako ha koros.

*Hi Apo Jesus ay minusmus hên hundaloh  
(Marcos 15:16-20; Juan 19:2-3)*

<sup>27</sup> Hi Apo Jesus ay gintan lan hundaloh ni Gobernador Pilato ha lalén balin gobernador, haka inubuh la yan pinilolopungan hêna kal-atan kapareho lan hundaloh. <sup>28</sup> Ha pammusmus la kana, ay inalih lay takop na ta pinatakopan la ya hêna mahampat ya takop, ya nanad ha takop lan ari. <sup>29</sup> Bayo nangwa hilan nanad tanyuong, ta pinanyag la yan korona, ya impakopya la ha ulo na. Haka la ya pinatalanan tambo, ya waringan hêna palatandaan ya hiyay mihay ari. Nandoko hila bayto ha arapan na, ya wanla, “Kumara dayi ya biyay hêna Ari lan Israelita!” <sup>30</sup> Pinagdu-dul-an la ya, haka pinagpapatok lay ulo na hêna tambo. <sup>31</sup> Pamakayari la yan minusmus, ay inalih lay takop ari ya impatakop la kana, ta impatakop la kanan oman ya takop na. Bayo gintan la yay na, ta ipako la ya ha koros.

*Hi Apo Jesus ay impako ha koros  
(Marcos 15:21-32; Lucas 23:26-43; Juan 19:17-27)*

<sup>32</sup> Ha pammita lan hundaloh hêna anggétan hi Apo Jesus, hêna ipako ha koros, ay natupa la hi Simon ya taga-Cirene. Dinakêp la ya ta impabalangaw lay koros kana hêna ampakihonol kan Apo Jesus. <sup>33</sup> Inhundo lay pammita la hêna angga ha nilumatêng hila ha legal ya ambaégén Golgota o Bungo.

<sup>†</sup> **27:16** ya taganán langan na ay Jesus-Barrabas.

<sup>34</sup> Painêmén la ya dayin alak, ya naglamo hên tambal ya nag langan mira, noa, hên natawayan na, ay a na ininêm.

<sup>35</sup> Hênaipako lay na hi Apo Jesus ha koros, ay pinagpalabonutan lay takop na, ta êmén la mamwangan no hino kanla ya makakwa. <sup>36</sup> Bayo nikno hilay nay hundaloh ta binantayan la ya. <sup>37</sup> Atsi ha koros, ha ugton ulo na, ay nakahulat ya imbara la kana, “Hatsi hi Jesus, ya Ari lan Israelita.” <sup>38</sup> Main êt loway lalaki, ya parehon mapanyag karawakan ya impako ha koros. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki na.

<sup>39</sup> Minusmus la yan anlumabah hên main lamoy pamaméyêng, <sup>40</sup> ya wanla, “Hika awud ya labay maniran Templo ni Apo Namalyari, ta ipairêng mon oman ha tatloy allo! Iligtas moy sarili mo! Munaoy kan ubat ha koros, no hika ya Anak ni Apo Namalyari!” <sup>41</sup> Embayro êt ya pammusmus la kana hên hilay mónoron Kautuhan ni apo Moises, hilay ampamaala kanlan pari haka hilay toa ya nag tungkulon ha bansa, ya wanla, <sup>42</sup> “Inligtas nay kaatag, pata a na mailigtas ya sarili na! Hiya kanoy Ari lan Israelita! No tumaoy yan ubat ha koros, ay maniwala kitamo kana! <sup>43</sup> Ampaniwala ya kan Apo Namalyari, haka anhabiên na ya hiyay Anak ni Apo Namalyari, kabay hêlkên tamo no labay na yan iligtas ni Apo Namalyari!” <sup>44</sup> Embayro êt ya pammusmus la kana hên hilay loway mapanyag karawakan ya nakapako hên kalamo na.

### *Ya pangamatsi ni Apo Jesus*

(Marcos 15:33-41; Lucas 23:44-49; Juan 19:28-30)

<sup>45</sup> Hênuugtoy nay allo, ay dinumiglêm ya boon luta angga ha alas tres hên maapon. <sup>46</sup> Hênuaranin alas tres hên maapon, ay impakaangaw ni Apo Jesus, ya wana, “Eli, Eli, lema sabachthani,” ya labay habiên, “Diyos ko, Apo Namalyari, pata nilakwanan mo ko?” <sup>47</sup> Hênuagilam lan kaatag ya nakairêng bayro ya in-angaw na, ay êndat lan ambaêgên na hi Propeta Elias, kabay wanla, “Gilamén yo! Ambaêgên na hi Elias!” <sup>48</sup> Tampol yan nuwayu ya miha kanla hên namiptêh hên nanad bolak ha mihay hanga, ta indêrê na ha nangihoy alak, ta painêmén na ya hi Apo Jesus. <sup>49</sup> Noa, wanlan kaatag, “Paulayan tamo ya raw. Hêlkên tamo no iligtas ya ni Elias!” <sup>50</sup> Nan-angaw yan oman hi Apo Jesus hên hadyay hêkaw, bayo natsi yay na.

<sup>51</sup> Sakto kanan habayto ay biglan nawakwak hên napibonak paubat ha babo angga ha aypa, ya makugpa ya takop ya pinagpêlan bayro ha lalê hên Templo ha Jerusalem. Niyégyêg ya boon luta, haka napaka hilay bato.

<sup>52</sup> Nipagloat ya pinay-ilbêngan kanlan kal-atan ya pinili ni Apo Namalyari hên mag-in kana, ya natsi hên hato, ta biniyay hilan oman. <sup>53</sup> Inumawah hila bayro ha pinay-ilbêngan kanla, ta hên nabiyay yan oman hi Apo Jesus, ay nagpahlék hila ha kal-atan ha Jerusalem, ya banal ya balayan ni Apo Namalyari.

<sup>54</sup> Hadyay limo nan ampamaala kanlan hundaloh, haka hilay kalamo nay hundaloh ya ampagbantay kan Apo Jesus, hên nahêlêk lay layon, haka ya kaatag pon ya nalyari ha pangamatsi ni Apo Jesus. Kabay wanla, “Pêtêg bay awud! Hiyay Anak ni Apo Namalyari!”

<sup>55</sup> Bayro ha marayo kan Apo Jesus, ay main mal-at ya babayi ya ampandungaw ha angkalyari. Nakihonol hila kanlan Apo Jesus hên paubat ha probinsyan Galilea hên ampanawop kanla. <sup>56</sup> Kalamo la hi Maria Magdalena, haka ya indo lan anak ni Zebedeo, haka hi Maria ya indo lan Jose haka Santiago.

### *Ya pamilbêng kan Apo Jesus*

(Marcos 15:42-47; Lucas 23:50-56; Juan 19:38-42)

<sup>57</sup> Hêñ ampinaboy nay allo, ay main mihay mabandi ya taga-balayan Arimatea, ya nag langan Jose, ya ampaniwala kan Apo Jesus, ya <sup>58</sup> nilumatêng kan Gobernador Pilato, ta pinakihabi nay bangkay ni Apo Jesus, hêñ iilbêng na. Namiutoh ya etaman hi Gobernador Pilato hêñ ipaulay kan Jose ya bangkay ni Apo Jesus. <sup>59</sup> Kabay kingwa na ya bangkay ni Apo Jesus, hêñ in-aypa, haka na kinêlkêlan hêñ bayoy takop, ya naputsi. <sup>60</sup> Bayo inhowên ni Jose ya bangkay ha sarili nan pay-ilbêngan, ya bayoy dinyag ya lêyang ya bato. Pangayari, ay intulid nay hadyay hêlay bato hêñ intakap na ha pinay-ilbêngan, bayo nammita yay na. <sup>61</sup> Atsi bayro hi Maria Magdalena haka ya katokayo na, ya nakaikno ha êtêb pinay-ilbêngan kan Apo Jesus.

<sup>62</sup> Ha humonoy allo, ya allon Sabado, ay ni-tsi-tsipon hilay Pariseo haka hilay ampamaala kanlan pari ha arapan ni Gobernador Pilato, <sup>63</sup> ta hinabi la, ya wanla, “Napanêmtêman naêñ ya hinabi nan habaytoy magbabara hêñ haton angkabiyyay ya pon, ya ha pantatloy allo, ay mabiyay yan oman. <sup>64</sup> Kabay ampakihabi naêñ kamo ya pakabantayan yon mangêd ya habaytoy pinay-ilbêngan kana hêñ angga ha pantatloy allo. Ta kayno kowêñ lan tagahonol na ya bangkay na, haka la habiêñ ha kal-atan ya hiyay nangoman nabiyyay. No daygêñ lay habayto, ay lalon mapaniwala ya kal-atan kana.” <sup>65</sup> Wana etaman kanla ni Gobernador Pilato, “Hali, mantan kaw hêñ hundaloh ta pakabantayan lan mangêd ya pinay-ilbêngan kana.” <sup>66</sup> Kabay nammita hilay na ta dinyanan lan tatak ya habaytoy bato ya pinanakap ha pinay-ilbêngan kan Apo Jesus, haka binantayan lay habayto, ta êmêñ ayn makahowêñ.

## 28

### *Hi Apo Jesus ay nabiyyay oman (Marcos 16:1-10; Lucas 24:1-12; Juan 20:1-10)*

<sup>1</sup> Dali allo êt hêñ allon Dominggo, ay nammita hi Maria Magdalena haka ya katokayo na ha pinay-ilbêngan kan Apo Jesus. <sup>2</sup> Biglan nanlayon hêñ hadyay hêkaw, haka tinumaoy ya mihay anghel ni Apo Namalyari ya ubat ha langit, ta intulid nay habaytoy bato ya pinanakap ha pinay-ilbêngan kan Apo Jesus, bayo nikno ya bayro ha babon bato. <sup>3</sup> Ya lupa na ay kapahilêw ya nanad kimat haka ya takop na ay bapan putsi. <sup>4</sup> Hêñ nahêlêk lan hundaloh ya ampagbantay bayro ya anghel, ay hadyay limo la. Nipamêgpêg hila haka nipatumba hêñ nanad natsi.

<sup>5</sup> Wanen anghel kanlan babayi, “Paan kaw malimo! Muwang ko ya antapolêñ yo hi Apo Jesus ya impako ha koros. <sup>6</sup> Ayn ya bayri, ta hiya ay nabiyyay oman hêñ nanad ha hinabi na hêñ hato! Hêlkêñ yoy habaytsi ya pinaybul-ihan kanan bangkay na. <sup>7</sup> Parah-parahêñ yon magtaglooh kanlan tagahonol na, ta habiêñ yo hiyay nangoman nabiyyay, haka muna yay na kanla ha probinsyan Galilea. Mahêlêk la yay na bayro. Habayton bat ya mahabi ko kamoyu.” <sup>8</sup> Kabay nag-alíh hila bayro ha pinay-ilbêngan ta pinarah lan nuwayun nagtaglooh kanlan tagahonol na, hêñ main lamoy limo haka hadyay higla.

<sup>9</sup> Ha pamwayu la, ay bigla hilan tinupa ni Apo Jesus ta kinumusta na hila. Nandoko hila hêñ nakadêngdêng hêñ nanalan bitsih na ha pamagsimba la kana. <sup>10</sup> Bayo wani Apo Jesus kanla, “Paan kaw malimo! Mita kaw na, ta habiêñ yo kanlan tagahonol ko, ya nanad kinan patêl, ya muna hila ha Probinsyan Galilea, haka mahêlêk la ko bayro.”

### *Ya balita lan bantay ha pinay-ilbêngan kan Apo Jesus*

<sup>11</sup> Pamakabita lan babayi, ay nammita hila etaman ya kaatag ya hundaloh ya ampagbantay bayro, haka pamanlumatêng la ha balayan Jerusalem, ay in-ubuh lan impamwang kanlan ampamaala kanlan pari ya nalyari ha pinay-ilbêngan kan Apo Jesus. <sup>12</sup> Kabay ni-tsi-tsipon hilay ampamaala kanlan pari haka hilay toa ya nag tungkulon ha bansa. Pinagkamihaan la, ay dyanan lan kal-atan pera ya hilay hundaloh ya nagbantay ha pinay-ilbêngan kan Apo Jesus, ta <sup>13</sup> wanla kanlan hundaloh, “Ya dapat yon habiên kanlan kal-atan, ay tinakaw lan tagahonol na ya bangkay na hên angkabêlêw kaw nayabi. <sup>14</sup> No mamwangan man hên Gobernador ya tinakaw lan tagahonol na, ya bangkay na hên angkabêlêw kaw, ay a kaw mabilian ta atsi kannaên ya habayto.” <sup>15</sup> Kabay kingwa lan hundaloh ya pera ta hinonol lay in-utoh kanla. Kabay angga amêhêñ ay êmbayro êt ya anhabiên lan kaatag ya Israelita.

*Nagpahlék hi Apo Jesus kanlan labinmihay tagahonol na  
(Marcos 16:14-18; Lucas 24:36-49; Juan 20:19-23; Dyag 1:6-8)*

<sup>16</sup> Amêhêñ, hilay labinmihay tagahonol ni Apo Jesus ay nammitay na ha probinsyan Galilea ha tawtgug ya intoro kanla ni Apo Jesus. <sup>17</sup> Hêñ nahêlêk lay na hi Apo Jesus ay sinimba la ya, main man pon kanla hên ampag-alangan. <sup>18</sup> Dinumani hi Apo Jesus kanla, ta wana, “In-ubuh hêñ indin kangko ya kapangyarihan ha langit haka bayri ha luta. <sup>19</sup> Mita kaw na ta ha kapangyarihan ko, ay toroan yo hila ha balang bansa ta êmêñ hila maniwala kangko. Bawtismoan yo hila ha langan nan Tatang, ha langan ko, ya Anak, haka ha langan nan Espiritu ni Apo Namalyari. <sup>20</sup> Bayo toroan yo hila ya dapat lan honolêñ ya kaganawan in-utoh ko kamoyu. Paan yon liwaan ya hiko ay panay yon kalamo, angga ha anggaan hêñ habaytsi ya luta.”

## Ya Mangêd ya Habi tungkol kan Apo Jesu-Cristo ya inhulat ni Marcos

### *Paunan habi*

Ya Mangêd ya Habi tungkol kan Apo Jesu-Cristo ya inhulat ni Marcos ay nag-umpisa hên êmén di, “Ya laman hên hata hulat, ay yabay ya Mangêd ya Habi tungkol kan Apo Jesu-Cristo, ya Anak ni Apo Namalyari.” An-ipahlék êt bayri ya ubat kan Apo Namalyari ya kapangyarihan ni Apo Jesu-Cristo. Mahélék ya habayto ha pamanoro na, ha pamanambut na kanlan Satanas, haka ha pamatawad nan kasalanan lan ampaghêhê. Anhabiên na êt di ni Panginoon Jesus ya tungkol ha sarili na ya hiya, ya Taga-Langit, ya In-anak Tawo, ay atsi bayri ha luta, para idin nay lawini na, ta êmén iligtas ha ayn anggay parusa ya hilay ampaghêhê.

An-ipamwang ni Marcos ya kapangyarihan ni Apo Jesus ya mahélék ha kapapaêpapah ya dinyag na.

Ya katganan hên hata hulat (16:9-20) ay ayn ha kaatag ya hulat ya Griego. Kabay anhabiên lan kaatag ya alwan hi Marcos ya main hulat hên hata tawlin habi di ha 16:9-20.

### Kabooan hên pinakalaman

Ya umpisa hên Mangêd ya Habi 1:1-13

Ya dinyag ni Apo Jesus ha probinsyan Galilea 1:14-9:50

Ya dinyag ni Apo Jesus ya umpisa ha Galilea angga ha Jerusalem 10:1-52

Ya tawlin parominggo hên biyay ni Apo Jesus 11:1-15:47

Hi Apo Jesus ay nabiyyay oman 16:1-8

Ya pagpahlék ni Apo Jesus hên hiya ay nabiyyay oman, haka ya pamag-orong na ha langit 16:9-20

### *Ya panoro ni Juan Bautista*

(Mateo 3:1-12; Lucas 3:1-18; Juan 1:19-28)

<sup>1</sup> Ya laman hên hata hulat, ay yabay ya Mangêd ya Habi tungkol kan Apo Jesu-Cristo, ya Anak ni Apo Namalyari. <sup>2</sup> Habaytsi ay nag-umpisa hên nanupad hên hulat lan mámpamwang hên an-ipaihip kanla\* ni Apo Namalyari, ya wanana Kahulatan,

“Iutoh ko ya mihay muna kamo, ya mangil-an hên danan mo.

<sup>3</sup> Hiyay ampan-angaw ha logal ya kabalah-balahan, ya wana kanlan kal-atan ya naka-tsipon,

‘Il-an yoy nakêm yo ha pamanlumatêng hên Panginoon,

Ya nanad ha pamil-an hên dann ha pamanlumatêng hên mihay matag-ay ya manungkulán.’”

<sup>4</sup> Natupad ya habayto hên nakalatêng hi Juan Bautista hên namipamwang kanlan dinumani kana ha Ilog Jordan, ha logal ya kabalah-balahan, ya dapat lan paghêhêan hên talibatokan ya pamanyag kasalanan, bayo dapat pabawtismo hila, haka patawarêh hila bayto ni Apo Namalyari. <sup>5</sup> Kal-atan lan taga-Jerusalem, haka kaatag pon ya logal ha probinsyan Judea, ay dinumani kan Juan. Inamin haka inhuko lay kasalanan la, bayo nagpabawtismo hila kana ha Ilog Jordan.

<sup>6</sup> Hi Juan ay nakatakop hên dyag ha habot hên kamelyo, haka ya tagkêh na ay dyag ha balat. Ya angkênaen na ay doron haka main bayron pulot

\* <sup>1:2</sup> propeta.

panilan ya an-inêmên na. <sup>7</sup> Panay nan an-ipamwang ya êmên di, “Ya lumatêng ya Mesias, ya Cristo, ya impangakon Mámiligtas ya pinili ni Apo Namalyari hên mamaala, ay makapangyarihan kangko. Agyan mangokal hên héel pag-apin bitsih na, ay ayn akon karapatan ta matag-ay ya tungkulan na. <sup>8</sup> Hikoy ampamawtismo kamoyu ha lanêm, noa, hiyay mamawtismo kamoyu ha Espiritu ni Apo Namalyari.”

*Ya pamawtismo kan Apo Jesus  
(Mateo 3:13-17; Lucas 3:21-22)*

<sup>9</sup> Hên habayto, ay nilumatêng hi Apo Jesus, ya ubat ha balayan Nazaret ha probinsyan Galilea, ta nagpabawtismo ya kan Juan ha Ilog Jordan. <sup>10</sup> Hên inumawah ya ha lanêm, ay nahêlêk ni Apo Jesus ya langit ya biglan nagloat, haka inumaypa kana ya Espiritu ni Apo Namalyari hên nanad ha mihay patipati. <sup>11</sup> Haka main habi ya ubat ha langit, ya wana, “Hika ya panlugurên kon Anak ya ampamahigla kangko.”

*A ya napatukso hi Apo Jesus hên antuksoën ya ni Satanas, ya diyablo  
(Mateo 4:1-11; Lucas 4:1-13)*

<sup>12</sup> Pangayari yan nagpabawtismo hi Apo Jesus, ha Ilog Jordan, ay tampol yan impabita hên Espiritu ni Apo Namalyari ha legal ya kabalah-balahan. <sup>13</sup> Atsi ya bayro hên apatapo ya allo, hên antuksoën ni Satanas, noa, a ya napatukso. Main bayron mangahiléb ya ayop ya kalamo na, noa, main anghel ya nipanawop kana.

*Ya pamanagyat ni Apo Jesus ha apat ya unan nag-in tagahonol na  
(Mateo 4:12-22; Lucas 4:14-15; 5:1-11)*

<sup>14</sup> Hên nakakulung yay na hi Juan Bautista, ay nag-orong hi Apo Jesus ha probinsyan Galilea, ta impamwang na bayro ya Mangêd ya Habi ya ubat kan Apo Namalyari. <sup>15</sup> Impamwang na, ya wana, “Nilumatêng ya panaon ya intakda ni Apo Namalyari, haka marani ya pamanlokop na, kabay paghêhêan yon talibatokan ya pamanyag kasalanan, haka maniwala kaw ha Mangêd ya Habi!”

<sup>16</sup> Ha pammita ni Apo Jesus ha laylay hên Dagat-dagatan hên Galilea, ay nahêlêk nay loway mikapotoh pohêl, ya magdadakêp hên kênan lanêm, ya hi Andres haka hi Simon, ya ambanhagan lan Pedro. Hila ay ampayhabwag hên lambat ha lanêm, ta ampandakêp hila dayi hên kêna. <sup>17</sup> Hinabi na kanla, “Makihonol kaw kangko, ta daygên kataw hên mâmipakarani hên tawo kangko, ta êmên hila maniwala.” <sup>18</sup> Tampol lan imbalag ya lambat la, ta nakihonol hila kana.

<sup>19</sup> Ha pammita lan Apo Jesus ha laylay hên lanêm, ay nahêlêk na ya maának ni Zebedeo, ya hi Santiago haka hi Juan ya ampamitoyo hên lambat la, bayro ha bangka la. <sup>20</sup> Tampol nan hinagyat hi Santiago haka hi Juan hên makihonol kana. Imbalag lay tatang la ha bangka hên kalamoy pan-upaan la ha pamandakêp kênan lanêm, ta nakihonol hila etaman kan Apo Jesus hên nanad kan Simon haka Andres.

*Pamipaplag ni Apo Jesus hên narawak ya a angkahêlêk ya hinumapat ha mihay lalaki  
(Lucas 4:31-37)*

<sup>21</sup> Nilumatêng hilan Apo Jesus ha balayan Capernaum. Ha allon pamagsimba, ay nanoro ya bayro ha sinagoga la. <sup>22</sup> Naubuh hilan nag-êpapah ha panoro na, gawan ya panoro na, ay nanad panoro hên main tungkulan, alwan nanad ha panoro lan mánonon Kautuhan ni apo Moises.

<sup>23</sup> Bayro ha sinagoga, ay main lalaki ya hinapatan hēn narawak ya a angkahēlēk. Nan-angaw ya hinumapat kana, ya wana, <sup>24</sup> “Jesus ya taga-Nazaret, hinoy ampakiéménan mo kannaén? Labay mo kay hēn parusaan? Muwang ko no hino ka. Hika ya banal, ya ayn hinon kasalanan, ya in-utoh ni Apo Namalyari.” <sup>25</sup> Hēn nagilam ni Apo Jesus ya hinabi nan hinumapat kanan hatoy lalaki, ay hinabyanan na ya, haka na ya impaplag, ya wana, “Paan kan maglabak! Mag-alíh ka ha hinapatan mo!” <sup>26</sup> Intumba ya lalaki hēn hatoy hinumapat kana, haka na ya imbuwad-buwad, bayo nag-alíh ya kanan lalaki hēn ampan-angaw. <sup>27</sup> Nag-épapah hilay atsi bayro, ta nihahabi hila, ya wanla, “Hino ya magkatoroañ hēn hatsi? Mihay bayoy toro lawēh! Nag tungkulon haka kapangyarihan ya pami-utoh nan paypaplag hēn nangarawak ya a angkahēlēk ya hinumapat ha tawo.” <sup>28</sup> Habaytoy dinyag ni Apo Jesus, ay tampol nibahwag ha boon probinsyan Galilea.

*Namaalíh hi Apo Jesus hēn hakit lan kal-atan ha bali lan Simon Pedro  
(Mateo 8:14-17; Lucas 4:38-41)*

<sup>29</sup> Pamakaawah ni Apo Jesus ha sinagoga, hēn kalamo na hi Santiago, hi Juan, hi Simon Pedro haka hi Andres, ay nagpakha hila ha bali lan Simon haka Andres. <sup>30</sup> Nalatangan lay ampo ni Simon, ha papag, hēn main hadyay omot. Kabay pinikihabi la kan Apo Jesus ya paalihēn nay omot nan habaytoy bakēt, ya ampo ni Simon. <sup>31</sup> Dinumani hi Apo Jesus kana, tinalan nay gamēt, ta impaimata na ya, haka naalíh ya omot na. Bayo namakan ya kanlan Apo Jesus.

<sup>32</sup> Hēn ampinaboy nay allo, ay gintan la kan Apo Jesus ya nipaghakit, haka hilay hinapatan hēn nangarawak ya a angkahēlēk. <sup>33</sup> Nagtsipon ya boon balayan, ha ilwangan hēn bali lan Simon. <sup>34</sup> Namaalíh hi Apo Jesus hēn hino-hino kay na hēn ya hakit la, haka impaplag nay nangarawak ya a angkahēlēk ya hinumapat kanlan kaatag. A na hila pinaulayan hēn maghabi, ya impaplag na, gawan muwang la, ya hiyay Anak ni Apo Namalyari.

*Nanoro hi Apo Jesus kanlan Israelita ha kal-atan sinagoga  
(Lucas 4:42-44)*

<sup>35</sup> Dali allo pon, ay nammita yay na hi Apo Jesus ha mihay logal ya marayo ha tawo, ta nanalangin ya. <sup>36</sup> Noa, hilan Simon ay ampanapol kana. <sup>37</sup> Hēn natapol la ya, ay hinabi la kana, ya antapolēn la yan kal-atan. <sup>38</sup> Noa, wana kanla, “Lakwēn tamo pon ya balayan di ha mamalibot ha logal ya habaytsi. Dapat ko etaman hēn ipamwang kanla ya Mangēd ya Habi ya ubat kan Apo Namalyari. Kabay atsi ko di.” <sup>39</sup> Nanoro yay na ha mal-at ya sinagoga lan Israelita ha boon probinsyan Galilea. Namipaplag ya hēn nangarawak ya a angkahēlēk ya hinumapat hēn namahakit kanlan atsi bayro.

*Namaalíh hi Apo Jesus hēn hakit ketong ha mihay lalaki  
(Mateo 8:1-4; Lucas 5:12-16)*

<sup>40</sup> Minghan hēn main kal-atan ya nangamat kan Apo Jesus, ay main dinumani kana, ya mihay lalaki ya nag hakit ketong. Nandoko ya ha arapan ni Apo Jesus, ta wanan nakiingalo, “Panginoon, no kalabayon mo, ay paalihēn moy hakit ko, êmēn luminis ya lawini ko.” <sup>41</sup> Naingalwan ya ni Apo Jesus, kabay impalunto ni Apo Jesus ya gamēt na kana, ta wana, “Labay kon paalihēn ya hakit mo. Luminis ka!” <sup>42</sup> Tambēng naalíh ya hakit na. <sup>43</sup> Bayo in-utoh na ya ni Apo Jesus hēn main panaad, ya wana, <sup>44</sup> “Paan mo pon ipamwang ya hatsi ha hinoman. Pakha ka ha pari ta ipahlēk mo kana ya ayn kay nan ketong. Mantan kan maiparaya ha pamanhumonol mo ha

utoh ni apo Moises, † êmén paptégan kanlan kaatag ya malinis kay na.” <sup>45</sup> Noa, hén nammita ya, ay impamwang nay pamipaalih ni Apo Jesus hén ketong na, kabay lalon nibahwag ya kapangyarihan ni Apo Jesus, haka gawan ha kalatan ya mabay manggilam hén toro na, ay a yay na makahowén ha hinon balayan bayro, ta a na hila makwan matoroan hén mangéd. Kabay napaidi ya tana ha marayo ha balayan, êmbayro man, ay nilako la yan kal-atan ubat ha ayri man ya legal.

## 2

### *Ya mihay a ampakabita, ya in-arap kan Apo Jesus (Mateo 9:1-8; Lucas 5:17-26)*

<sup>1</sup> Hén nakalabah ya ungnoy allo, ay nag-orong hilan Apo Jesus ha balayan Capernaum. Ya pamanlumatêng na bayro, ay nibahwag. <sup>2</sup> Kabay ni-tsitsipon ya kal-atan bayro, angga ha napno ya bali haka ayn nanan dyanan agyan ha arapan hén ilwangan. Kaban an-ipamwang kanla ni Apo Jesus ya habi ni Apo Namalyari, ay <sup>3</sup> main nilumatêng ya apat ya lalaki ya ampantan hén mihay lumpo ya atsi ha langkayan. Iarap la ya dayi kan Apo Jesus. <sup>4</sup> Noa, gawan ha kal-atan, ay ayn hilan madanan. Kabay nunik hila ha bubungan ta nilubtan lay atép ha dapit ugto ni Apo Jesus. In-antotoh lay lumpo ha pibonakan lan kal-atan ha arapan ni Apo Jesus. <sup>5</sup> Hén nahélék ni Apo Jesus ya paniwala la kana, ay hinabi na kanan lumpo, “Pakhawén moy nakém mo, ta pinatawad ya kasalanan mo.”

<sup>6</sup> Main bayro hén mónoron Kautuhan ni apo Moises, ya ampangihip hén êmén di, <sup>7</sup> “Hinoy hatsi ya an-ipantag nay sarili na kan Apo Namalyari hén mamatawad hén kasalanan? Yarin a nan ammusmusén hi Apo Namalyari ya tawo yan bengat! Mimiha na ni Apo Namalyari ya makapatawad hén kasalanan.”

<sup>8</sup> Tampol nan namwangan ni Apo Jesus ya laman ihip la. Kabay hinabi na kanla, “Pata ampangihip kaw hén êmbayro? <sup>9</sup> Hino awud ya maparah hén habiên kanan mihay a ampakabita, no habiên ko, ‘Napatawad kay na ha kasalanan mo,’ o no habiên ko, ‘Hali, mirêng ka ta mita kay na.’ <sup>10</sup> Noa, êmén yo mamwangan ya hiko, ya Taga-Langit, ya In-anak Tawo, ay main tungkulon di ha luta hén mamatawad kasalanan, ay habiên ko kanan lumpo, <sup>11</sup> ‘Mirêng ka. Hapwatén moy langkayan mo ta muli kay na.’”

<sup>12</sup> Tambéng yan nirêng ha arapan la ya hata lumpo. Hinapwat nay langkayan na, ta nuli ya. Naubuh hilan nag-êpapah ya atsi bayro, kabay pinuri la hi Apo Namalyari, ya wanla, “Amêhén allo ay nakahélék kitamo hén a tamo êt nahélék.”

### *Hi Levi ya ambaégén êt Mateo, ya máningil buwih, ay hinagyat ni Apo Jesus (Mateo 9:9-13; Lucas 5:27-32)*

<sup>13</sup> Bayo nag-orong yay na hi Apo Jesus ha laylay Dagat-dagatan hén Galilea. Pinakikamat-kamatan yan kal-atan, kabay tinoroan na hila. <sup>14</sup> Pangayarin habayto, hén ampammita-bitá ya, ay nakahélék yan mihay máningil buwih ya anak ni Alfeo, ya nag langan Levi, ya ampikno ha paningilan na. Hinabi ni Apo Jesus kana, ya wana, “Kihonol ka kangko.” Tampol ya etaman nakihonol kana.

<sup>15</sup> Amêhén, hén atsi hilan Apo Jesus ha bali ni Levi hén ampangan, ay main nilumatêng ya kal-atan maningil buwih, ya kapareho ni Levi, haka kaatag êt ya makasalanan, ya ampakihonol kan Apo Jesus, ya kalamo la hén nangan. <sup>16</sup> Hén nahélék lan ungnoy mónoron Kautuhan ni apo Moises, ya

---

† **1:44** Levítico 14:2-33.

Pariseo, ya ampangan hi Apo Jesus hên kalamo lan máningil buwih, haka kaatag êt ya makasalanan, ay nangotang hila kanlan tagahonol ni Apo Jesus, ya wanla, “Pata ampangan ya hên kalamo lan máningil buwih haka kaatag êt ya makasalanan?” <sup>17</sup> Hêñ nagilam nay hinabi la, ay nangalimbawa hi Apo Jesus, ya wana, “Hilay main hakit, ay ampangailangan doktor, alwan hilay ayn hakit. Êmbayro êt, atsi ko di ha luta ta êmén ko mahagyat hilay ampangamin makasalanan hila, hêñ maghêhê hêñ manalibokot ha pamanyag lan kasalanan. Noa, hilay ampaghabin ayn hilan kasalanan, ay a ko hawpan.”

*Pinakibatan ni Apo Jesus ya kotang tungkol ha pagtêêh hêñ a mangan ta êmén a maabala ya panalangin*

*(Mateo 9:14-17; Lucas 5:33-39)*

<sup>18</sup> Minghan hêñ nagtêêh hila hêñ a nangan, ta êmén a maabala ya panalangin la, ya tagahonol ni Juan Bautista haka hilay Pariseo, ay main ungro bayro ya naghabi kan Apo Jesus, ya wanla, “Hilay tagahonol ni Juan haka hilay tagahonol lan Pariseo, ay ampagtêêh hêñ a mangan, ta êmén a maabala ya panalangin la. Pata alwan êmbayro ya andaygêñ lan tagahonol mo?” <sup>19</sup> Kabay in-alimbawa ni Apo Jesus ya sarili na ha lalaki ya an-ikasal, ya wana, “Endat yon a mangan ya bisita hêñ lalaki ya an-ikasal, no kalamo la ya? Siguradon mangan hila! <sup>20</sup> Lumatêng ya allo ya ipakarayo ya lalaki ya an-ikasal, ay bayro hilay nan a mangan.”

<sup>21</sup> Amêhêñ, intoro ni Apo Jesus ya a mailamo ya toro na, ha toro lan ninuno la, ya wana, “Ayn mamitagpi hêñ bayoy tela, ya a pon napipi, ha gihi hêñ manan takop. No alimbawa ta daygêñ nay habayto, ta pipiêñ nay na, ay kumpêh ya intakap, haka humlay ya gihi. <sup>22</sup> Ayn mamitungtug hêñ bayon alak ha ubatan hêñ manan alak gawan lumtoh ya pamyanan, haka mabullog ya alak.\* Ya bayoy alak ay dapat itugtug ha bayon pamyanan.”

*Ya toro ni Apo Jesus tungkol ha allon pamagsimba*

*(Mateo 12:1-8; Lucas 6:1-5)*

<sup>23</sup> Mihay allon pamagsimba, hêñ nipadann hilan Apo Jesus ha nag trigo ya narani ha dann, ay nantê hilay tagahonol na hêñ pêrad. Kinêtêb la kaban ampammitta hila. <sup>24</sup> Noa, nag Pariseo bayro ya naghabi kan Apo Jesus, ya wanla, “Pata nantê hilay tagahonol mo hêñ trigo ha allon pamagsimba, bawal man ya habayto ha Kautuhan tamo?” <sup>25-26</sup> Wana etaman ni Apo Jesus, “Kayno a yo pon nabaha ya dinyag ni Arin David hêñ haton panaon, hêñ hi Abiatar ay pinakapoon pari. Hêñ habayto, hiya, haka hilay kalamo na ay angkablay hêñ lonoh, kabay hinumwêñ ya ha bali ni Apo Namalyari ta nangwa yan puto ya imparaêp kan Apo Namalyari ya pangkaêñ bat hêñ pari. Bawal man ha Kautuhan ni apo Moises hêñ mangan hêñ habayto, ay nangan ya, bayo nam-i ya êt kanlan kalamo na.” <sup>27</sup> Inhundo ni Apo Jesus ya pamaghabi na kanlan Pariseo, ya wana, “Ya allon pamagsimba ay ha ikakangêd hêñ tawo. Ya tawo ay alwan ipoh hêñ allon pamagsimba. <sup>28</sup> Hiko ya Taga-Langit, ya In-anak Tawo, ay nag tungkulon hêñ maghabi no hinoy malyarin daygêñ ha allon pamagsimba.”

### 3

*Ya lalaki ya natsi ya mihay gamêt*

*(Mateo 12:9-14; Lucas 6:6-11)*

---

\* <sup>22</sup> Ya pamyanan la hêñ alak ay dyag ha balat kambing, kabay minghan lan bêngat magamit gawan angkumita.

<sup>1</sup> Ha mihay na êt ya allon pamagsimba la, hên hinumwêñ hi Apo Jesus ha sinagoga ta manoro, ay main lalaki bayro ya natsi ya panabtab gamêt. <sup>2</sup> Hilay Pariseo haka mánoron Kautuhan ni apo Moises, ay ampangimaton kan Apo Jesus, no mamaalíh yan hakit ha allon pamagsimba la, ta êmén la yan bad-an hên ampanyag yan bawal ha allon pamagsimba. <sup>3</sup> Wani Apo Jesus kanan lalaki ya natsi ya gamêt, “Mirêng ka di ha arapan lan kal-atan.” Dinyag nay kalabayan ni Apo Jesus. <sup>4</sup> Bayo kinotang ni Apo Jesus hilay Pariseo haka mánoron Kautuhan ni apo Moises, ya wana, “Hinoy nakahulat ha Kautuhan ni apo Moises ya tungkol ha dapat daygén ha allon pamagsimba? Manyag hên kangéran o manyag karawakan? Mamiligtas o mamatsi?” Noa, ayn miha man ya naghabi. <sup>5</sup> Amêhén, inubuh na hilan hinlêk ni Apo Jesus hên main huluk haka ingalo gawan ha kakdêyan ulo la. Bayo wana kanan lalaki ya natsi ya gamêt, “Ipaktang moy gamêt mo.” Hêñ impaktang na, ay naalíh ya hakit ha gamêt na. <sup>6</sup> Tampol hilan nammita ya hilay Pariseo, haka kalamo lan kagampi ni Herodes Antipas, ay pinipupulungan lay na hi Apo Jesus.

<sup>7-8</sup> Hilan Apo Jesus etaman, ay nammitay na hên palako ha laylay hên Dagat-dagatan hên Galilea. Main hadyay kal-atan ya taga-probinsyan Galilea ya nangamat kanlan Apo Jesus hên manggilam toro na, haka magpaalíh hên hakit la. Main êt bayron kal-atan ya ubat ha probinsyan Judea, balayan Jerusalem, probinsyan Idumea, ha lipay hên Illog Jordan, ha balayan Tiro boy Sidon, haka ha mamalibot bayro. <sup>9</sup> Gawan ha kal-atan, ay in-utoh nay tagahonol na, ya mamil-an hên bangka ya mahakyen na ta êmén ya a mapipiitan hên kal-atan. <sup>10</sup> Gawan mal-at ya inalihan nan hakit, gap-an la ya dayi hi Apo Jesus hên hilay nipaghakit ta êmén maalíh ya hakit la. <sup>11</sup> Hilay hinapatan hên nangarawak ya a angkahêlêk, ay ampandoko ha arapan na haka ampihan-angaw hilay hinumapat kanla, ya wanla, “Hika ya Anak ni Apo Namalyari!” <sup>12</sup> Noa, impakabawal na hila hêñ ipamwang ya hiyay Mesias, ya Cristo.

*Ya pamamili ni Apo Jesus hên labinloway apostolya in-utoh na hêñ manoro  
(Mateo 10:1-4; Lucas 6:12-16)*

<sup>13</sup> Bayo nilumakat hilan Apo Jesus ha mihay tawtgug. Hêñ nakalakat hilay na, ay pinarani na hilay tagahonol na. <sup>14</sup> Namili ya hêñ labinlowa kanla ya pinata-ngalanan nan apostol ya panay nan makalamo, haka iutoh nan mamipamwang hêñ Mangêd ya Habi, <sup>15</sup> haka ya dyanan nan kapangyarihan hêñ mamaalíh hêñ nangarawak ya a angkahêlêk ya hinumapat ha tawo. <sup>16</sup> Habaytsi hilay labinlowa ya pinili na hêñ mag-in apostol na: hi Simon, ya pinata-ngalanan nan Pedro, <sup>17</sup> ya loway anak ni Zebedeo, hi Santiago haka hi Juan. (Pinata-ngalanan na hilan Boanerges, ya labay habiêñ makhaw ya nakêm la.) <sup>18</sup> Ya kaatag ay hi Andres, hi Felipe, hi Bartolome, hi Mateo, hi Tomas, haka hi Santiago ya anak ni Alfeo, hi Tadeo, hi Simon ya Makabayan, <sup>19</sup> haka hi Judas Iscariote ya nay-upit kan Apo Jesus.

*Ya kapangyarihan ni Apo Jesus ay ubat kan Apo Namalyari, alwan ubat kan Satanas  
(Mateo 12:22-32; Lucas 11:14-23; 12:10)*

<sup>20</sup> Hêñ nuli hilan Apo Jesus, ay nipagtsipon hilay na êt ya kal-atan, kabay a lay na maarap hêñ mangan hilan Apo Jesus. <sup>21</sup> Nagilam lan kamag-anak ni Apo Jesus ya panhabiêñ lan kaatag, ya angkamurit yay na, kabay nammita hilay na ta iuli la ya dayi.

<sup>22</sup> Main bayron mánoron Kautuhan ni apo Moises ya nilumohan ya ubat ha Jerusalem. Hinabi la ya hi Apo Jesus ay hinapatan ni Satanas,\* ya poon lan nangarawak ya a angkahélék. Haka hinabi la êt ya pamaalíh ni Apo Jesus hén nangarawak ya a angkahélék ya hinumapat ha tawo, ay ha kapangyarihan ni Satanas. <sup>23</sup> Pinarani na hilay habayto ta hinabi na kanlan paalimbawa, ya wana, “Yarin maipaplag ni Satanas ya sarili na! <sup>24</sup> No alimbawa ta mipapatsi ya angkalokopan hén mihay bansa, ay mahira ya habayto. <sup>25</sup> Êmbayro êt ya malyari ha mipapamília ya mipapatsi. <sup>26</sup> No mipapatsi hilay angkalokopan ni Satanas, ay mahira ya pamanlokop na.

<sup>27</sup> “Hi Satanas ay nanad ha mihay makhaw, ya mal-at ya almas, ya ampamantay ha bali na. A makwa, ya hinon atsi kana, no a ya pon hambutén, haka gapohén. Noa, no gapohén ya, ay makwa ya kaganawan ya atsi kana.

<sup>28</sup> “Pakagilamén yoy habaytsi. Mapatawad hilay mipaghéhê ha nadyag lay kasalanan, haka ha hinabi lan pamaniran kapareho lan tawo, <sup>29</sup> noa, ayn hinoman ya mapatawad ha hinabi lan pamaniran Espiritu ni Apo Namalyari. Ta habaytoy kasalanan, ay taganán ayn kapatawaran.” <sup>30</sup> Hinabi ni Apo Jesus ya habayto, ta êmén la mamwangan ya ha pangahabila, ya hiyay hinapatan hén narawak ya a angkahélék, ay anhiraén lay Espiritu ni Apo Namalyari ya ampangubatan hén kapangyarihan ni Apo Jesus.

*Hilay ampanggilam habi ni Apo Jesus, ay anlugurén na hén nanad ha pamanlugud na ha indo na, haka hilay patêl na*

*(Mateo 12:46-50; Lucas 8:19-21)*

<sup>31</sup> Hén nilumatêng ya indo ni Apo Jesus haka hilay patêl na, ay a hila midani kana gawan ha kal-atan. Kabay impabaég la ya tana. <sup>32</sup> Main naghabi kana, ya wana, “Atsi di ha ilwangan ya indo mo haka hilay patêl mo. Labay la kan makahabi.” <sup>33</sup> Wani Apo Jesus kana, “Hino ya indo ko, haka hino hilay patêl ko?” <sup>34</sup> Hinlék nay nakaiknon nakapalibot kana, ta wana, “Hilay habaytsi ya indo ko, haka hilay patêl ko. <sup>35</sup> Hilay ampanyag kalabayan ni Apo Namalyari, ay yabay ya anlugurén ko hén nanad ha pamanlugud ko ha indo ko, haka hilay patêl ko.”

## 4

*Ya alimbawa ya tungkol ha bini ya inhabwag*

*(Mateo 13:1-9; Lucas 8:4-8)*

<sup>1</sup> Nanoro yay na êt hi Apo Jesus ha laylay Dagat-dagatan hén Galilea. Gawan ha hadyay kal-atan ya ampiagtsipon hén labay manggilam toro na, ay hinumakay ya ha mihay bangka, ta bayro yan nikno hén nanoro kanlan hadyay kal-atan ya atsi ha laylay. <sup>2</sup> Ha pamanoro na kanla, ay mal-at ya paalimbawa, ya wana, <sup>3</sup> “Pakagilamén yoy habaytsi! Main mihay lalaki ya namihabwag hén bini. <sup>4</sup> Ha pamihabwag nan bini, ay main bini ya natata ha dann. Habaytoy tinuktuk hén manok. <sup>5</sup> Ya kaatag ay natata ha mabato. Tampol yan tinumubo, gawan ha mababo ya luta. <sup>6</sup> Noa, hén nangallo, ay nayanto ya, gawan a nipakalalê ya yamot. <sup>7</sup> Ya kaatag ay natata ha kadiwian. Tinumubo ya bini, noa, a hinumlay gawan diwi. <sup>8</sup> Ya kaatag ay natata ha mataba ya luta. Tinumubo ya habaytoy bini haka naubuh hén nanagéy hén main manimagatoh ya lahí, anêmapo, o tatlumpo hén oman.” <sup>9</sup> Hén nahabi nay na ya habayto ni Apo Jesus, ay wana êt, “Pakaihipén yoy nagilam yo!”

*No pata paalimbawa ya panoro ni Apo Jesus*

*(Mateo 13:10-17; Lucas 8:9-10)*

\* <sup>3:22</sup> Beelzebul ha habin Griego.

<sup>10</sup> Hêñ nakabita hilay nay kal-atan, ay main tanan ungro bayro ya kalamo lan labinloway tagahonol ni Apo Jesus, ya nangotang no hinoy labay habiên hêñ habaytoy alimbawa. <sup>11</sup> Kabay wani Apo Jesus kanla, “Hikaw bat ya makamwang hêñ inlihim ya tungkol ha pamanlokop ni Apo Namalyari, noa, kanlan kaatag ay anhabiên ko ha alimbawan bêngat. <sup>12</sup> Ta êmêñ, ‘Manlêk hila man, ay a la mamwangan ya anhêlkêñ la. Manggilam hila man, ay a la maintindihan. Ta kayno maintindihan la, haka maghêhê hilan dumani kan Apo Namalyari, bayo patawarêñ hila.’ ”\*

*Impamwang ni Apo Jesus ya labay habiên hêñ habaytoy alimbawa ya tungkol ha bini ya inhabwag  
(Mateo 13:18-23; Lucas 8:11-15)*

<sup>13</sup> Bayo wanay na êt kanlan tagahonol na, “Awta a yo angkaintindihan ya alimbawa ya tungkol ha bini ya inhabwag! Ay-êmêñ yon maintindihan ya kaatag ya alimbawa! <sup>14</sup> Ya ampamihabwag bini, ay ampamibahwag hêñ habi ni Apo Namalyari. <sup>15</sup> Ya nakêm tawo ay in-alimbawa ha natataan bini. Ya bini ya natata ha dann ay habi ni Apo Namalyari ya nagilam lan tawo, noa, tampol nilumatêng hi Satanas, ta inalih nay habaytoy habi ha nakêm la. <sup>16</sup> Ya bini ya natata ha kabatoan, ay habi ni Apo Namalyari ya tinanggap lan tawo hêñ main kahiglaan, <sup>17</sup> noa, a nimana ha nakêm la. Naniwala hila pon, noa, hêñ nilumatêng ya kairapan o pamairap, ay tampol naalih ya paniwala la. <sup>18</sup> Ya bini ya natata ha kadiwian ay habi ni Apo Namalyari ya ginilam lan tawo pon, <sup>19</sup> noa, tampol nialih ha nakêm la, gawan ha kayagahan, pibandian, haka katsighaw hêñ biyay la. Kabay a nabayo ya biyay la, hêñ nanad ha a nanagêy ya bini ya inhabwag. <sup>20</sup> Ya bini ya inhabwag ha mataba ya luta ay habi ni Apo Namalyari ya ginilam lan tawo, bayo nimana ha nakêm la, ya nanad ha lahí ya naubuh hêñ main manimagatoh ya lahí, anêmapo, o tatlumpon oman.”

*Ya atâng ay dapat idin ha taganán pamyanan  
(Lucas 8:16-18)*

<sup>21</sup> Wanay na êt ni Apo Jesus, “Ayn mamagkêt hêñ atâng, bayo halokoban. A etaman idin ya atâng ha hilong pangkatuluyan. Noa, ya atâng ay idin ha mantêg hêñ pamyanan atâng. <sup>22</sup> Ayn inhimpan ya a miawah. Ayn êt inlihim ya a mamwangan haka mihungbung. <sup>23</sup> Hikaw ya ampanggilam, ay pakaihipêñ yoy habayto.”

<sup>24</sup> Inhundo ni Apo Jesus ya panoro na, ya wana, “Pakaihipêñ yoy angkagilam yo, ta no honolêñ yoy toro ko, ay taganán maintindihan yo. Ta no ay-êmêñ ya pamaytakal yon pamanggilam, ay êmbayro êt ya takal hêñ pamangintindi ya idin kamoyu ni Apo Namalyari. <sup>25</sup> No honolêñ yoy toro ko, ay mapahanan ya pamangintindi yo, noa, no a yon honolêñ, ay alihêñ êt kamoyu ya pêpêrad ya naintindihan yo.”

*Ya pamanlokop ni Apo Namalyari ay in-alimbawa ni Apo Jesus ha pamtumubo hêñ bini ya in-êhad*

<sup>26</sup> Wanay na êt ni Apo Jesus kanla, “Ya pamanlokop ni Apo Namalyari ay maialimbawa ha pamantumubo hêñ bini ya in-êhad hêñ mihay lalaki.

<sup>27</sup> Pinaulayan nan tinumubo, ta inhundo nay pamag-obra na hêñ allo-allo. Ya pamantumubon habayto, ay a na angkaintindihan no ay-êmêñ. <sup>28</sup> Nag-in malakarayêñ ya habayto gawan ha luta, haka tinumubo angga ha nanagêy

\* <sup>4:12</sup> Isaias 6:9-10.

hēn mangataba ya lahí. <sup>29</sup> Hēn nawtoy na, ay tampol nay nan ginapah gawan nilumatēng ya pamanggapah.”

*Ya pamanlokop ni Apo Namalyari, ay in-alimbawa ni Apo Jesus ha paman-tumubo hēn mihay nanaway but-o*

(Mateo 13:31-32, 34; Lucas 13:18-19)

<sup>30</sup> Amēhēn, inhundo ni Apo Jesus ya panoro na, ya wana, “Nanad hino kaya ya pamanlokop ni Apo Namalyari? Hino kaya ya pangialimbawaan ko hēn pamanlokop na? <sup>31</sup> Ya pamanlokop ni Apo Namalyari ay maialimbawa ha pamantumubo hēn mihay nanaway but-o ya intanēm. Iibon man ya but-o, <sup>32</sup> ay hinumlay yan nag-in kayo, kabay nipanyag halay ya manok-lalē ha hanga na.”

*Paalimbawa ya pamanoro ni Apo Jesus*

(Mateo 13:34)

<sup>33</sup> Mal-at pon ya êmbayroy alimbawa ya intoro ni Apo Jesus kanlan kalatan ya agyu lan maintindihan. <sup>34</sup> Hēn nanoro hi Apo Jesus kanlan kalatan, ay taganán mal-at ya alimbawa ha panoro na. Noa, hēn hila-hila tanay labinloway tagahonol na, ay inubuh nan impamulah kanla ya habayto.

*Pinatunggēn ni Apo Jesus ya hadyay angin*

(Mateo 8:23-27; Lucas 8:22-25)

<sup>35</sup> Habaytoy allo, hēn yabi yana, ay hinabi ni Apo Jesus ha tagahonol na, “Magbangka kitamo hēn lumipay ha dagat-dagatan.” <sup>36</sup> Imbalag lay kal-atan ta hinumakay hila ha bangka ya andyanan ni Apo Jesus, ta nagumpisa hilay nan lumipay. Main êt hēn kaatag ya bangka, ya nilumipay.

<sup>37</sup> Amēhēn, nagkamain hēn hadyay angin, haka ya bangka la ay angkapnoy nan lanēm. <sup>38</sup> Hi Apo Jesus ay nabêlêw hēn nakaulon ha dapit bulian hēn bangka. Pinukaw la ya, ya wanla, “Máñoro! A mo muwang ya ampilêmêh kitamina?” <sup>39</sup> Nimata ya, ta pinatunggēn nay angin haka hadyay tandulon. Tinunggēn etaman ya angin haka hadyay tandulon. <sup>40</sup> Bayo wana kanlan tagahonol na, “Pata hadyay limo yo! Ayn kaw pon awud hēn paniwala kangko!” <sup>41</sup> Na-êngap hila ha hadyay limo la, haka ha pag-êpapah la, ay nihahabi hilan êmēn di, “Hino kayay hatsi ya ampamipatunggēn hēn angin haka tandulon bayo anhumonol hila kana?”

## 5

*Namaalih hi Apo Jesus hēn nangarawak ya a angkahêlêk, ya hinumapat kanan mihay lalaki ya Geraseno*

(Mateo 8:28-34; Lucas 8:26-39)

<sup>1</sup> Nilumatēng hilan Apo Jesus ha logal lan Geraseno\* ha lipay dagat-dagatan ha êtēb hēn probinsyan Galilea. <sup>2</sup> Pagtaoy ni Apo Jesus ha bangka, ay tinupa ya hēn mihay lalaki ya hinapatan hēn nangarawak ya a angkahêlêk ya ubat ha pay-ilbêngan. <sup>3</sup> Ampaidi ya tana ha pay-ilbêngan. A la yay na maigapoh, hēn taykala man. <sup>4</sup> Kata-ungno lay nan an-igapoh, noa, panay nan pamboytoén ya taykala ha bitsih haka ha gamêt na. Ayn taganán ampakapatgēn kana. <sup>5</sup> Allo-yabin nagkotawan ya ha pay-ilbêngan haka ha kabung-oyan hēn ampiangaw-angaw hēn anhugatēn nay lawini na hēn bato.

<sup>6</sup> Hēn nahêlêk na ya hi Apo Jesus ha marayo-dayo, nuwayu yan napaidani hēn nandoko hēn nakadêngdêng ha arapan na. <sup>7</sup> Nan-angaw ya, ya wana, “Jesus, ya Anak ni Apo Namalyari ya ayn kapantag ha kapangyarihan, awta ampakiêmênan mo ko? Maghumpa ka ha arapan ni Apo Namalyari, ya a mo

\* 5:1 Gergeseno o Gadareno ha kaatag ya Kahulatan Griego.

kon parusaan!” <sup>8</sup> Hinabi nay habayto gawan ampaalihêni Apo Jesus ya nangarawak ya a angkahêlêk ya nipanhumapat kana. <sup>9</sup> Amêhêni, kinotang ya ni Apo Jesus, “Hinoy langan mo?” Wanlan hinumapat kana etaman, “Libo-Libo.” Hinabi lay habayto gawan mal-at hilay nangarawak ya a angkahêlêk ya nipanhumapat kana. <sup>10</sup> Habaytoy nipanhumapat ay nakiingalo kan Apo Jesus, ya paan hila dayin ipaplag ha legal ya habayto.

<sup>11</sup> Main kal-atan baboy ya ampipambuk bayro ha talindah hêni bung-oy ya nahêned ha dagat-dagatan. <sup>12</sup> Nakiingalo hilay hinumapat hêni paulayan hila dayi hêni mipanhumapat kanlan baboy. <sup>13</sup> Pinaulayan na hila etaman ni Apo Jesus. Kabay inumalih hila kanan lalaki ta nipanhumapat hila kanlan baboy. Hilay manga lowan liboy baboy ya hinapatan la, ay nipamwayun palohan ha natalindah ya laylay lanêni hêni nilêmêha dagat-dagatan.

<sup>14</sup> Hilay manayhay hêni baboy, ay nipamwayu, ta habaytoy nalyari, ay impamwang la ha kabaryo haka kabalayan la. Hêni nagilam lan kaatag ya balita la, ay nilako lan hinlêk ya nalyari. <sup>15</sup> Hêni nilumatêng hila kanlan Apo Jesus ay nahêlêk lay lalaki ya inalihan nangarawak ya a angkahêlêk. Nakatakop yay na haka ampi kno hêni napatékbék ya ihip. Naubuh hilan nalinwan ha kapangyarihan ni Apo Jesus. <sup>16</sup> Impamwang lan nakahêlêk no ay-êmén yan namaalih hêni nangarawak ya a angkahêlêk ya hinumapat kanan lalaki, haka ya nalyari kanlan baboy. <sup>17</sup> Hêni nagilam lay habayto, ay nakiingalo hila kan Apo Jesus ya mag-alíh ya ha legal la.

<sup>18</sup> Hêni anhumakay yay na hi Apo Jesus ha bangka, ay nakiingalo ya inalihan nangarawak ya a angkahêlêk hêni gêtan ya dayi. <sup>19</sup> A na ya pinaulayan, ta impaorong na ya ni Apo Jesus, ya wana, “Muli kay na ha bali mo ta ipamwang mo ya kangérän ya dinyag kamo hêni Panginoon, haka no ay-êmén na kan iningalwan.” <sup>20</sup> Nammisa yay nay lalaki, ha mapoy balayan ha legal na, ya ambaégén lan Decapolis, ta impamwang nay tungkol ha dinyag kana ni Apo Jesus, kabay naubuh hêni nipag-êpapah hilay nakagilam.

*Biniyay ya anak ya babayi ni Jairo haka pinaalih ya hakit hêni babayi ya labinloway taon nanan ampaghakit*

*(Mateo 9:18-26; Lucas 8:40-56)*

<sup>21</sup> Amêhêni, ha pag-orong lan Apo Jesus hêni nagbangkan ubat ha lipay, ay kal-atan ya nanupa kanla ha laylay lanêni. <sup>22</sup> Main dinumani hêni nandoko hêni nakadêngdêng ha bitsih ni Apo Jesus ya mihay ampamaala ha sinagoga, ya nag langan Jairo. <sup>23</sup> Impapakahabi na kan Apo Jesus, ya kihonol ya kana ha bali na, ta ipalunto nay gamêt na ha anak nay babayi, hêni paalihêni dayi ya hakit na, ta êmén ya mabiyay ya ampamérad tanan matsu. <sup>24</sup> Kabay nakihonol hilan Apo Jesus kan Jairo. Kal-atan ya nakihonol kanla haka ampi-pipiitan la hi Apo Jesus.

<sup>25</sup> Kalamo lan hata kal-atan, ya mihay babayi ya labinloway taon nanan ampag-irap ha hakit nan andayaén. <sup>26</sup> Naiubuh nay na ya pibandian na ha hino-hino kay na hêni ya doktor, haka nairapan ya êt ha pamanambal la hêni hakit na, bayo nilumdêg êt ya habayto. <sup>27</sup> Hêni namwangan na, ya tungkol kan Apo Jesus, ay dinumani ya kana hêni ginapa ya takop ni Apo Jesus. <sup>28</sup> Dinyag nay habayto ta hinabi na ha sarili na, no magapa nan bat ya takop ni Apo Jesus, ay maalih ya hakit na. <sup>29</sup> Tambéng etaman tinunggén ya ampantoloy daya na, kabay natanam nay naalih ya hakit na. <sup>30</sup> Tampol nan natanam ni Apo Jesus ya main inalihan hêni hakit, gawan ha kapangyarihan na. Namalingay ya, ta wana, “Hinoy nakagapa hêni takop ko?” Hêni ayn mangamin, ay hinabi lan tagahonol na, <sup>31</sup> “Panginoon, ampilolopungan la ka, haka la kan ampi-pipiitan hêni kal-atan! Pata ampangotang ka no hinoy

nakagapa kamo!” <sup>32</sup> Noa, ampakatapolên ni Apo Jesus no hinoy nakagapa kana. <sup>33</sup> Nalimwan ya babayi gawan muwang na ya nalyari kana. Kabay ampamêgpêg yan nandoko hên nakadêngdêng ha arapan ni Apo Jesus, ta inamin na ya hiyay nakagapa kana haka naalih ya hakit na. <sup>34</sup> Wani Apo Jesus kanan babayi, “Inalih ya hakit mo gawan ha paniwala mo kangko. Muli kay na, hên mapatêkbék ya ihip ta inalih ya hakit mo.”

<sup>35</sup> Kaban ampaghabi ya pon hi Apo Jesus, ay main nilumatêng ya ubat ha bali ni Jairo, ya naghabi, “Natsi ya anak mo. A minan abalaên hi Apo Jesus hên maniraw ha bali.” <sup>36</sup> Noa, hên nagilam ni Apo Jesus ya habayto, ay wana kan Jairo, “Paan kan maglunkot. Ihundo moy paniwala mo ya maalih koy hakit na.” <sup>37</sup> Kabay inhundo lay pammita la. Ya pinaulayan nan bêngat ni Apo Jesus hên makilako kanla, ay hi Pedro, hi Santiago haka hi Juan ya kapotoh pohêl ni Santiago. <sup>38</sup> Panlumatêng la ha bali lan Jairo, ay nahêlêk ni Apo Jesus ya ampipanangih haka ampipanyêngén ya atsi bayro. <sup>39</sup> Kabay hinabi na kanla, “Paan kaw manangih, ta a ya natsi. Nabêlêw yan bêngat.” <sup>40</sup> Kinailyan la ya hi Apo Jesus, ta muwang la ya pêtêg yay nan natsi. Hêñ naipaawah na hilay kal-atan ya atsi bayro, ay hinumwêñ yay na ha pinaypakanluyan kanan anak, hêñ kalamoy toa na, haka ya tagahonol na hi Pedro, hi Juan, haka hi Santiago. <sup>41</sup> Tinalan ni Apo Jesus ya gamêt nan anak, ta hinabi na, “Talita kumi,” ya labay habiên, “Anak ko, mimata ka.” <sup>42</sup> Tambêng yan nimata ya anak, haka namita-bitia. (Labinloway taon na.) Hadyay pag-êpapah lan atsi bayro. <sup>43</sup> Binawal na hila hêñ ipamwang ha kaatag ya biniyay nay anak. Hinabi na êt ya pakanêñ la ya.

## 6

*A ya pinaniwal-an hi Apo Jesus ha balayan Nazaret, ya pinanhumlayan na (Mateo 13:53-58; Lucas 4:16-30)*

<sup>1</sup> Amêhêñ, nuli ya hi Apo Jesus ha balayan Nazaret, ya pinanhumlayan na. Kalamo na hilay tagahonol na. <sup>2</sup> Hêñ allon pamagsimba, ay hinumwêñ ya ha sinagoga la, ta nanoro ya. Haka ha pamanoro na, ay nipag-êpapah hilay nakgilam, ya wanla, “Ay-iri nan nakwa ya kamwangan na boy ya kapangyarihan na hêñ manyag hêñ kapapaêpapah? <sup>3</sup> Daptay hiyay kalpintero ya kabalayan tamo ya anak ni Maria! Yarin alwan hiyay patêl lan Santiago, Jose, Judas, haka hi Simon! Yarin alwan kabalayan tamo ya patêl nay babayi!” Kabay a la ya tinanggap.

<sup>4</sup> Bayo wani Apo Jesus kanla, “Hilay propeta ni Apo Namalyari, ay anggalangêñ ha agyan ayri ya logal, noa, a hila ampansinêñ hêñ kamaganak la haka kabalayan la.” <sup>5</sup> Gawan ayn hilan paniwala kana, ay pêrad bat ya inalihan nan hakit. Ayn kaatag ya kapapaêpapah ya dinyag na bayro ha Nazaret. <sup>6</sup> Nag-êpapah hi Apo Jesus, ta taganán ayn hilan paniwala kana.

*Inutuhan na hilan manoro ni Apo Jesus ya labinloway tagahonol na ya binaêg lan apostol*

*(Mateo 10:5-15; Lucas 9:1-6)*

Bayo nanoro ya hi Apo Jesus ha mal-at ya baryo ha namalibot hêñ Nazaret. <sup>7</sup> Haka tsinipon na ya labinloway tagahonol na, ta dinyanan na hilan kapangyarihan, hêñ mamaalih hêñ nangarawak ya a angkahêlêk ya hinumapat ha tawo, bayo in-utoh na hila hêñ manilowa hêñ manoro. <sup>8</sup> Bayo hila nammita, ay hinabi na kanla, “Paan kaw mantan hêñ hinoman ya nanad ha puto, balutan, haka pera. Magtêkêñ kaw tana. <sup>9</sup> Mag-apin kaw bitsih, noa, paan kaw mantan hêñ maihagili yoy takop. <sup>10</sup> Magdahêl kaw ha balin managyat kamoyu, haka bayro kaw tana, hêñ angga ha a pon nayari ya

pamanoro yo, ha legal ya habayto. <sup>11</sup> No a la kaw tanggapén, ta a hila mabay manggilam habi yo, ha mihay legal, ay bayo kaw mag-alih bayro, ay ikampag yoy tuwapok ya atsi ha bitsih yo, ta émén la mamwangan ya atsi tana kanla no lumaténg kanla ya parusa ni Apo Namalyari.” <sup>12</sup> Kabay nammita hilay nay labinlowa hén nampipamwang ha kal-atan ya dapat lan paghêhêan hén talibatokan ya kasalanan la. <sup>13</sup> Namaalih hila hén kal-atan nangarawak ya a angkahélék ya hinumapat ha tawo. Pinunihan lan pérad ya laro ya kal-atan nipaghakit haka namaalih hilan hakit la.

*Ya kamatsan ni Juan Bautista*

(Mateo 14:1-12; Lucas 9:7-9)

<sup>14</sup> Nagilam ni Herodes Antipas ya ampamaala ha probinsyan Galilea ya tungkol ha kapapaépapah ya andaygén lan Apo Jesus, gawan habaytoy nibahwag. Main ampaghabin ampakadyag yan kapapaépapah hi Apo Jesus gawan hiya hi Juan Bautista ya nangoman nabiyay. <sup>15</sup> Main kaatag ya ampaghabin kayno hi Apo Jesus ay Propeta Elias, ya nag-orong ha luta. Hilay kaatag êt ay ampaghabi ya hi Apo Jesus ay nanad kanlan kaatag ya propeta, ya mámpipamwang hén an-ipaihip kanla ni Apo Namalyari hén haton lagi.

<sup>16</sup> Noa, hén nagilam ni Herodes Antipas, ya anhabién la, ay wana, “Ya ambaégen lan Jesus, ay taganán hi Juan Bautista ya impapotoh kinay ulo, ya nabiyay oman, kabay ampakadyag yan kapapaépapah!” <sup>17</sup> Hinabi nay habayto gawan hén hato ay hiyay naypadakép, naypagapoh, haka nay-pahukul kan Juan, gawan kan Herodias, ya ahawa ni Felipe, ya ali ni Herodes Antipas, ya bat nan pinag-ahawa ni Herodes Antipas. <sup>18</sup> Panay nan an-ungkatén kan Herodes Antipas, ni Juan Bautista, ya wana, “Bawal ha Kautuhan ya pamag-ahawa mo kan Herodias ya ahawan ali mo!” <sup>19</sup> Gawan habayto, ay main yan hakit nakém hi Herodias kan Juan, haka ipapatsi na ya dayi, noa, ayn yan madyag, <sup>20</sup> gawan a na ya ampaulayan ni Herodes Antipas, ta anggalangén na hi Juan, gawan muwang na, ya mahonol hi Juan kan Apo Namalyari, haka ayn hilan mahabi ha biyay na. Labay-labay nan manggilam toro na, angkalipang man ya ihip na.

<sup>21</sup> Mihay allo nakaihip hi Herodias no ay-émén na yan maipapatsi hi Juan Bautista. Hi Herodes Antipas, ay nagkaluto ha allon pamanémtém ha pay-anak kana. Hinagyat na hilay manungkulán na, haka hilay ampamaala ha hundaloh, haka hilay mabandi ha probinsyan Galilea hén magpakahigla hén kalamo na. <sup>22</sup> Timmalék ya anak ni Herodias ha arapan hén kal-atan. Hinumigla hi Herodes Antipas haka hilay hinagyat na, ha pamagtalék nan dalaga, kabay wani Herodes Antipas kanan dalaga, ya idin na kana ya hinon pakikwaan na kana. <sup>23</sup> Nangako ya êt hén main kalamoy humpa, ya idin na kana ya kapitnan bandi na, no habaytoy labay na.

<sup>24</sup> Inumawah ya dalaga ta kinotang nay indo na no hinoy pakikwaan na. Wana etaman ni Herodias, “Ya ulo ni Juan Bautista.” <sup>25</sup> Tampol yan nag-orong ya dalaga, hén dinumani kan Herodes Antipas, ta pinakikwaan na, ya tampol ipapotoh ya ulo ni Juan Bautista, ta idin kanan dalaga ya habayto, hén nakapalunto ha pinggan.

<sup>26</sup> Hadyay lungkot ni Herodes Antipas hén pakikwaan kana hén dalaga ya habayto, noa, a na ya matanggian gawan naghumpa ya, haka gawan ha kal-atan. <sup>27</sup> Hén habayto êt, ay in-utoh nay mihay hundaloh ha hukulan hén potohén nay ulo ni Juan Bautista. Tampol ya etaman nammita ha hukulan ya habaytoy hundaloh, ta pinotoh nay ulo ni Juan, <sup>28</sup> hén indin ha pinggan, haka gintan kanan dalaga. Indin na etaman hén dalaga, ya habayto kan Herodias, ya indo na.

<sup>29</sup> Hêñ namwangan lan tagahonol ni Juan ya nalyari kana, ay kingwa la ya bangkay na, haka lay na in-ilbêng.

*Liman libo ya pinakan ni Apo Jesus  
(Mateo 14:13-21; Lucas 9:10-17; Juan 6:1-14)*

<sup>30</sup> Amêhêñ, hêñ nag-orong hilay nay labinloway tagahonol ni Apo Jesus ya in-utoh nan namitoro, ya ambaêgêñ la etaman hêñ apostol, ay ni-tsi-tsipon hila, ta in-ubuh lan in-istorya kana ya dinyag la haka intoro la. <sup>31</sup> Noa, a la angkadambi ya pangan la, gawan kal-atan ya angkapiuubah hêñ anlumatêng kanla. Kabay wani Apo Jesus kanla, “Magpainawa kitamo pon bayro ha legal ya kabalah-balahan.” <sup>32</sup> Kabay hila-hila tanay himmakay ha bangka hêñ naglipay ha legal ya kabalah-balahan.

<sup>33</sup> Noa, napansin lan kal-atan ya pamag-alîh la, haka ya pagpalakwan la, kabay binitisih lan inunaan hilan Apo Jesus, hêñ kalamo hilay ubat ha kaganawan balayan ya dinanan la. <sup>34</sup> Hêñ pataoy hilan Apo Jesus ha bangka, ay nahêlêk lay kal-atan, haka naingalwan na hila, gawan nanad hilan tupa ya ayn pastol, kabay mal-at ya intoro na kanla. <sup>35</sup> Hêñ maranin matata ya allo, ay hinabi lan tagahonol na kana, ya wanla, “Ayn bali di, haka maranin matata ya allo. <sup>36</sup> Dayi ipalako mo hilay kal-atan ha balang baryo, ya narani di, ta êmêñ hila makahaliw hêñ maêkan la.” <sup>37</sup> Noa, hinabi na kanla, ya wana, “Hikaw tanay mamakan kanla.” Kabay wanla kana, “Labay mon habiên, hikay ya manaliw hêñ pamangan lan kal-atan, ya magkaalaga hêñ upa hêñ mihay katawo ha waloy buwan!” <sup>38</sup> Nangotang hi Apo Jesus, “Ungnoy puto yo? Hêlkêñ yo.” Hêñ namwangan lay na, ay hinabi la, “Li-limay puto haka lo-loway kênan lanêm.”

<sup>39</sup> Bayo in-utoh ni Apo Jesus ha tagahonol na ya paiknoêñ lay kal-atan hêñ pusto-pusto. <sup>40</sup> Kabay nipammikno hilay na hêñ pusto-pusto ya main mani-magatoh haka main mani-limampo. <sup>41</sup> Dinampot ni Apo Jesus ya limay puto haka loway kênan lanêm. Naningla ya, ta pinahalamatan nay habayto kan Apo Namalyari. Pino-potoh nay na, ta indin na kanlan tagahonol na, ta intayak la kanlan kal-atan. <sup>42</sup> Balang miha ya atsi bayro ay nakaêkan angga ha nangabhoj hila. <sup>43</sup> Hêñ tsinipon la ya tagan, ay nakapno hila êt hêñ labinloway lubon. <sup>44</sup> Main liman libo ya lalaki ya nangan.\*

*Nammita hi Apo Jesus ha babon lanêm  
(Mateo 14:22-33; Juan 6:16-21)*

<sup>45</sup> Tampol nan pinahakay ni Apo Jesus ha bangka hilay tagahonol na, hêñ impauna hêñ lumipay ha Betsaida, kaban ampauliên na pon ya kal-atan. <sup>46</sup> Hêñ nagtsipan ya kanla hi Apo Jesus, ay nilumakat yay nan nanalangin. <sup>47</sup> Hêñ yabi yana, kaban ampanalangin yan miha na, ay atsi hilay na ha bonak dagat-dagatan ya tagahonol na. <sup>48</sup> Nahêlêk na hilay angkairapan hêñ lumipay, gawan panhalungatêñ hilan angin. Hêñ nawatah, ay nilako na hila hêñ nammita ha babon lanêm, hêñ makipantag ya dayi kanla, <sup>49</sup> noa, hêñ nahêlêk la yay ampita ha babon lanêm, ay nipa-angaw hila, ta êndat la no hiyay mihay kamana. <sup>50</sup> Naubuh hilan nakahêlêk kana, haka hadyay limo la. Noa, tampol nan hinabi kanla, ya wana, “Paan kaw malimo! Pakhawêñ yoy nakêm yo! Hikoy habaytsi!” <sup>51</sup> Hêñ nakahakay yay na ha bangka, ay tinunggêñ ya angin. Hadyay êpapah la kana, <sup>52</sup> gawan nahêlêk la man, ya pinalakê nay puto, ay a la pon angkaintindihan ya madyag nay hinoman, ha kapangyarihan ni Apo Namalyari, ta taganán a la makwan ihipêñ ya nalyari.

\* <sup>6:44</sup> Main êt kal-atan ya babayi haka anak ya nangan. Mateo 14:21.

*Namaalih hi Apo Jesus hēn kaganawan hakit lan taga-balayan Genesaret  
(Mateo 14:34-36)*

<sup>53</sup> Pamakalipay lan Apo Jesus, ay impadann lay bangka ha dani hēn Genesaret. <sup>54</sup> Hēn nakataoy hilan Apo Jesus, ay tampol la yan nabalyan. <sup>55</sup> Pinarah lan impamwang ha boon logal ya habayto, ya nilumatēng hilan Apo Jesus. Kabay hinapwat la hila ha angkatuluyan la ya nipaghakit hēn gintan kana ay-iri man ya nilako na. <sup>56</sup> Anto man ya lakwēn nay balayan, baryo, o hinon logal ya main bali, ay anggētan la ha andanan na, ya nipaghakit. Ampakiingalo hila kan Apo Jesus, ya agyan laylayan dayin takop na, ya magapa lan ampaghakit. Haka hilay nakagapa takop na, ay naalihan etaman hakit.

## 7

*Ya natotoan la ha ninuno, ay paan itad ha Kautuhan ni Apo Namalyari  
(Mateo 15:1-9)*

<sup>1</sup> Pang-ubat hēn habayto, ay main ungnoy Pariseo haka mánoron Kautuhan ni apo Moises ya ubat ha balayan Jerusalem ya nipandumani kan Apo Jesus. <sup>2</sup> Nadambi la ya main tagahonol ni Apo Jesus ya bat hēn nangan hēn a hinumonol ha natotoan la ha ninuno, no ay-êmēn ya pamag-uyah bayo mangan. Kabay êndat lan Pariseo, ya marêmēk hilay tagahonol na, ha hêlêk ni Apo Namalyari, <sup>3</sup> ta hilay Pariseo haka hilay kaatag pon ya Israelita, ay a mangan no a hila pon nag-uyah hēn nanad ha natotoan la ha ninuno. <sup>4</sup> Haka a lan bat angkaêñ ya ubat ha palengke, no a la pon uyahan.\* Mal-at pon ya natotoan la ha ninuno ya anhonolên la ya tungkol ha pamanguyah hēn pamminêman, pamyanan lanêm haka kaldero ya dyag ha tangso.

<sup>5</sup> Kabay nangotang hila kan Apo Jesus ya hilay Pariseo, haka mánoron Kautuhan ni apo Moises, ya wanla, “Pata a hila anhumonol ya tagahonol mo ha natotoan tamo ha ninuno tamo, no ay-êmēn ya pamag-uyah bayo mangan?”

<sup>6</sup> Wani Apo Jesus, “Pêtêg ya impapêt ni Propeta Isaias ya tungkol kamoyun mapagbabara, ya wana ha Kahulatan ya impahulat ni Apo Namalyari, ‘Ya pamagpuri la kangko, ay atsin bat ha bêbêy la, ta ayn ha nakêm la.

<sup>7</sup> Ayn kapukat-pukat ya pamagsimba la kangko, ta ya natotoan la ha ninuno, ay an-itoro la hēn nanad ha paytoro la hēn Kautuhan ko.”†

<sup>8</sup> Angkapaulayan yoy Kautuhan ni Apo Namalyari, ta anhonolên yoy natotoan yo ha ninuno yo.”

<sup>9</sup> Bayo wana êt ni Apo Jesus, “Magaling kaw hēn itad hēn ayn alagá ya utoh ni Apo Namalyari, mahonol yon bat ya natotoan yo ha ninuno! <sup>10</sup> Ta ya impahulat ni Apo Namalyari kan apo Moises, ay êmēn di, ‘Galangêñ moy tatang haka indo mo,’ haka ‘Hinoman ya maniran toa na, ay dapat patsêñ.’

<sup>11</sup> Noa, an-itoro yo ya malyarin ialay kan Apo Namalyari, ya dapat ihawop ha toa. <sup>12</sup> Ha pamanoro yon habayto, ay an-ibawal yoy pamanawop ha toa,

<sup>13</sup> ta antuwarêñ yoy ninuno yo, hēn an-itad yon ayn alagá ya Habi ni Apo Namalyari. Haka kal-atan pon ya êmbahêñ ya andaygêñ yo.”

*Ya ampakarêmêk ha hêlêk ni Apo Namalyari ay angkaubat ha nakêm  
(Mateo 15:10-20)*

<sup>14</sup> Bayo pinarani ni Apo Jesus ya kal-atan, ta wana kanla, “Manggilam kaw haka pakaintindiên yoy habaytsi. <sup>15</sup> Alwan ya an-ihubo ha bêbêy ya

\* <sup>7:4</sup> Ha kaatag Kahulatan Griego, ay nakahulat ya “A hila bat ampangan no ubat hila ha palengke, no a hila pon nag-uyah o nagpalyu.” Ta kayno narêmêkan hila ha hêlêk ni Apo Namalyari hēn nakapakidani hila ha bawal ha natotoan la ha ninuno. † <sup>7:7</sup> Isaias 29:13.

ampakarêmêk hên tawo ha hêlêk ni Apo Namalyari, noa, ya ampakarêmêk, ay ya nangarawak ya habi ya angkaubat ha bêbêy. <sup>16</sup> (Pakaihipén yoy nagilam yo!)”

<sup>17</sup> Pamakayari nan naghabi, ay imbalag ni Apo Jesus ya kal-atan, ta hinumwên ya ha lalên bali. Bayo nangotang hilay tagahonol na no hinoy labay habiên hên habaytoy alimbawa. <sup>18</sup> Wana etaman kanla, “Hikaw man, ay a kaw ampakaintindi? Alwan pamangan ya an-ihubo ha bêbêy ya ampakarêmêk hên tawo ha hêlêk ni Apo Namalyari. <sup>19</sup> Ta ya pamangan, ay a ampidann ha nakêm, noa, ha bitoka bayo itaká.” Ha pangahabi ni Apo Jesus hên habayto, ay labay nan habiên ya ayn bawal ya pamangan. <sup>20</sup> Inhundo ni Apo Jesus ya pamaghabi na, ya wana, “Ta ya nangarawak ya habi ya angkaubat ha bêbêy, ay yabay ya ampakarêmêk hên tawo ha hêlêk ni Apo Namalyari. <sup>21</sup> Ta angkaubat ha nakêm ya kaihipan hên manyag karawakan, nanad ha manyag karawakan kalabayan lawini, manakaw, mamatsin kaparehon tawo, <sup>22</sup> makilalaki haka mamabayi, manyag kapanalarêhan, haka kaganawan karawakan nanad ha pamanloko, manyag kagatéan hên ayn pamagpigel ha sarili, bat maridya, maniran kapareho, mag-in mayabang, haka manyag ayn kapukatan. <sup>23</sup> Kaganawan hên habayto ay angkaubat ha nakêm haka ampakarêmêk ha hêlêk ni Apo Namalyari.”

*Ya paniwala hên mihay babayi ya alwan Israelita  
(Mateo 15:21-28)*

<sup>24</sup> Immalih hilan Apo Jesus bayro hên palako ha Tiro ya legal hên alwan Israelita, haka hinumwên hila ha mihay bali bayro. A na labay hên mamwangan hên kaatag ya atsi hila bayro, ta magpainawa hila dayi, noa, napansinan hila. <sup>25</sup> Main bayron babayi ya nag anak ya hinapatan narawak ya a angkahêlêk, ya tampol hên nakamwang hên atsi ya bayro, kabay nilumatêng yan nandoko hên nakadêngdêng ha arapan na. <sup>26</sup> Habaytoy babayi ay alwan Israelita ta hiyay Griego ya taga-Sirofenicia. Nakiingalo ya kan Apo Jesus ya ipaplag ya hinumapat ha anak nay babayi. <sup>27</sup> Wani Apo Jesus kana, “Pakangêrên ko pon hên toroan haka hawpan ya hilay Israelita. Ta habaytoy taganán usto.” <sup>28</sup> Noa, hinabi nan babayi, ya wana, “Panginoon, mangêd ya habayto, noa, yarin a minan hawpan ya alwan Israelita no hadyay pamairap ya angkatanam la!” <sup>29</sup> Bayo wana kana, “Gawan ha paniwala mo kangko, ay muli kay na, ta naipaplag ya hinumapat ha anak mo.”‡ <sup>30</sup> Hêl nuli ya habaytoy babayi, ay nalatngan nay anak nay ampamatuloy hên napatêkbék ha papag gawan naipaplag ya hinumapat kana.

*Ya têkkên haka a makayn makahabi, ay pinahabi haka pinagilam ni Apo Jesus*

<sup>31</sup> Ha pag-orong lan Apo Jesus hên ubat ha legal Tiro ay nagdann ya ha legal hên Sidon ha palakon Dagat-dagatan hên Galilea ha mapoy balayan ha legal, ya ambaêgên lan Decapolis. <sup>32</sup> Main ungno bayro ya nantan kan Apo Jesus hên mihay lalaki ya têkkên haka a makayn makahabi. Nakiingalo hila kana ya ipalunto nay gamêt kanan têkkên ta paalihêñ nay hakit na. <sup>33</sup> Indayo ni Apo Jesus ya lalaki kanlan kal-atan, ta ingkulug nay panoro na ha têkk nan lalaki, pangayari, ay nandula ya ha gamêt na ta impunih na ha dila nan lalaki. <sup>34</sup> Naningla hi Apo Jesus ha langit hên nakauyamêh ha panalangin na, bayo wana kanan lalaki, “Effata!” ya labay habiên, “Magloat!” <sup>35</sup> Tampol ya etaman nakgilam haka nakapaghabí yay nan mangêd. <sup>36</sup> Kata-ungno

‡ <sup>7:29</sup> Ha pamipaplag ni Apo Jesus ha hinumapat ha anak hên alwan Israelita, ay mamwangan ya anhêlkên ni Apo Namalyari ya laman hên nakêm hên balang miha, ayn kana no hinoy ninuno la.

na hilan binawal ni Apo Jesus ya paan lan ipamwang ya habayto. Noa, lalo lan impamwang. <sup>37</sup> Hadyay êpapah la, ya wanla, “Mangêd ya kaganawan andaygên na. Ampagilamên nay têkkên haka ampahabiên nay pipi!”

## 8

### *Apat ya libo ya pinakan ni Apo Jesus (Mateo 15:32-39)*

<sup>1</sup> Hêñ habayto, ay naka-tsipon hilay na êt ya kal-atan ya nanggilam hêñ toro ni Apo Jesus. Hêñ ayn hilay nan maêkan, ay binaëg ni Apo Jesus ya tagahonol na, ta wana kanla, <sup>2</sup> “Kaingalo hilay kal-atan, ta tatloy nay allo la di, haka ayn hilay nan maêkan. <sup>3</sup> No pauliên ko hilan angkablay lonoh, ay kayno mawê hila ha dann, ta marayo ya ubatan lan kaatag.” <sup>4</sup> Wanlan tagahonol na etaman, “Ay-êmén tamo hilan mapakan ya hata kal-atan di ha kabalah-balahan?” <sup>5</sup> Kinotang hila ni Apo Jesus, ya wana, “Main kitamo pon hêñ puto?” Wanla kana, “Main tanan pito.”

<sup>6</sup> Bayo pinaikno na hilay kal-atan, haka na dinampot ya pitoy puto, ta imparahalamat na kan Apo Namalyari, bayo pino-potoh nay habayto, ta impatayak na kanlan tagahonol na. <sup>7</sup> Main hila etaman hêñ ungnoy nanganaway kênán lanêm ya pinirito. Impahalamat na êt kan Apo Namalyari ya habayto, bayo impatayak na etaman kanlan tagahonol na. <sup>8</sup> Naubuh hilan nangabhoy ya kal-atan, haka hêñ tsinipon lay tagan, ay nakapno hila hêñ pitoy lubon. <sup>9</sup> Main manga apat ya libo ya nangabhoy. Bayo nagtsipan yay na kanla. <sup>10</sup> Hilan Apo Jesus etaman, ay hinumakay ha bangka hêñ palako ha logal hêñ Dalmanuta.

### *Ampanapol hilay Pariseo hêñ kapapaêpapah ya ubat ha langit (Mateo 16:1-4)*

<sup>11</sup> Main ungnoy Pariseo ya nilumatêng, ta pinakihubakan la ya hi Apo Jesus. Sinubuk la yan mamipahlék yan kapapaêpapah ya ubat ha langit, ta êmén la mamwangan no pêtêg hêñ atsi kana ya kapangyarihan ni Apo Namalyari. <sup>12</sup> Nakauyamêh ya hi Apo Jesus, bayo wana, “Hay! Awta ampanapol kaw hêñ kapapaêpapah! Pakagilamên yo! Taganán ayn ipahlék kamoyu ya palatandaan ya hikoy in-utoh ni Apo Namalyari!” <sup>13</sup> Bayo nilakwanan na hilay na, ta himmakay hilay na ha bangka hêñ palipay hilan Apo Jesus.

### *In-alimbawa ni Apo Jesus ha pampaalsa, ya panapol lan Pariseo hêñ kapapaêpapah ya ubat ha langit (Mateo 16:5-12)*

<sup>14</sup> Naliwaan lan tagahonol ni Apo Jesus hêñ mantan puto, kabay mimiha tanay puto ya atsi ha bangka. <sup>15</sup> Bayo binilinan hila ni Apo Jesus ya wana, “Kaillag kaw ha pampaalsa lan Pariseo haka ha pampaalsa ni Herodes Antipas.” <sup>16</sup> Gawan ha hinabi ni Apo Jesus, ay êndat lan tagahonol na no mantêg pampaalsa hêñ arina ya hinabi na kanla, kabay nihahabi hila, ya wanla, “Hinabi nay habayto gawan a kitamo nakagêtan puto.” <sup>17</sup> Muwang ni Apo Jesus ya ampihabian la, kabay wana kanla, “Pata an-ikayagah yoy a kaw nakagêtan puto! A kaw pon awud hêñ ampakaintindi! A yo pon angkakwan ihipêñ no ay-irin ubat ya kapangyarihan ko! <sup>18</sup> Nanad kaw ayn mata, haka ayn têkk! Naliwaan yoy na lawêh hêñ pinakan koy liman libo ha li-limay puto! <sup>19</sup> Ugnoy lubon ya napno hêñ tagan ya tsinipon yo?” Wanla kana, “Labinloway lubon.” <sup>20</sup> Wanay na êt ni Apo Jesus, “Haka ungnoy lubon ya napno hêñ tagan ya tsinipon yo hêñ pinakan koy apat ya libo ha pi-pitoy

puto?” Wanla etaman, “Pitoy lubon.” <sup>21</sup> Bayo wana kanla, “A kaw pon ampakaintindi?”

*Naypamukat hi Apo Jesus hēn mihay buwag ha balayan Betsaida*

<sup>22</sup> Hēn nilumatēng hilan Apo Jesus ha balayan Betsaida, ay main ungro bayro ya nantan hēn mihay lalaki ya buwag, ya pinakiingalo la kan Apo Jesus. <sup>23</sup> Inakay ni Apo Jesus ya buwag hēn indayo ha balayan. Bayo nandula ya ha gamēt na, ta impunih na ha mata nan buwag, bayo impalunto nay gamēt na kana, haka kinotang na ya, no ampakahēlēk yay na. <sup>24</sup> Wana etaman hēn buwag, “Naburarēg pon ya angkahēlēk ko, ya tawoy ampammita, ay nanad kayo.” <sup>25</sup> Inapoap nan oman ni Apo Jesus ya mata nan lalaki. Kanan habayto, ay impakamukat nan lalaki ya mata na, haka alway nan naburarēg ya hēlēk na, ta ampakahēlēk yay nan mangēd. <sup>26</sup> Bayo nagtsipan hi Apo Jesus kana, ta wana, “Muli kay na, noa, paan kan magdann ha baryo.”

*Hinabi ni Pedro ya hi Apo Jesus, ay hiyay Mesias, ya Cristo, ya impangakon Māmiligtas*

*(Mateo 16:13-20; Lucas 9:18-21)*

<sup>27</sup> Bayo nammita hilan Apo Jesus palako ha balang baryo ya angkasakopan hēn balayan Cesarea Filipos. Kaban ampita hila, ay kinotang nay tagahonol na, ya wana, “Hino ko kano?” <sup>28</sup> Kabay hinabi la, “Wanlan kaatag ya hika ay hi Juan Bautista. Noa, wanlan kaatag êt ya hika ay hi Propeta Elias. Hilay kaatag êt ay ampaghabin ya nabiyyat oman ya miha kanlan unan māmipamwang hēn an-ipaihip kanla ni Apo Namalyari.” <sup>29</sup> Wana êt kanla ni Apo Jesus, “Kamoyu etaman, hino ko ha ihip yo?” Wani Pedro etaman, “Hika ya Mesias, ya Cristo, ya impangakon Māmiligtas ya pinili ni Apo Namalyari hēn mamaala.” <sup>30</sup> Noa, impapakabawal na hila hēn ipamwang ha hinoman ya hiyay Cristo.

*Impamwang ni Apo Jesus ya hiyay patsēn*

*(Mateo 16:21-28; Lucas 9:22-27)*

<sup>31</sup> Bayo impamwang ni Apo Jesus kanlan tagahonol na, ya malyari kana lumatēng ya allo, ya wana, “Hiko ya Taga-Langit, ya In-anak Tawo, ay kailangan magdanas hēn hadyay pamagdusa. Hikoy araēn lan mānoron Kautuhan ni apo Moises. Araēn la kon toa ya nag tungkulon ha bansa, haka araēn la ko êt hēn ampamaala kanlan pari. Ipapatsi la ko, noa, ha ikatlon allo ay biyayēn akon oman.” <sup>32</sup> Impapakamulah ni Apo Jesus ya habayto kanla. Kabay indayo yan pērad ni Pedro ta hinabyanan na ya, gawan êndat nan a patsēn ya Mesias, ya Cristo. <sup>33</sup> Noa, immarap hi Apo Jesus ha kaatag ya tagahonol na, bayo hinabyanan na hi Pedro, ya wana, “Pedro, paan mo kon tuksoēn hēn nanad ha pamanukso kangko ni Satanas! Ya pan-ihipēn mo ay alwan kaihipan ni Apo Namalyari, noa, kaihipan hēn tawo!”

<sup>34</sup> Bayo pinarani nay kal-atan hēn kalamoy tagahonol na, ta wana kanla, “Hilay labay hēn humonol kangko, ay dapat liwaan ya sarili lan kalabayan haka humonol kangko. Dapat nakal-an hilan magtēēh hēn pamairap haka matsi, ya maialimbawa ha pamakay hēn nabyat ya koros. <sup>35</sup> Hila etaman ya a anhumonol kangko, gawan a la labay hēn matsi o mangoman ya pamimiyay la, ay matsi etaman. Noa, hilay matsi gawan ha paniwala la kangko haka ha pamipamwang lan Mangēd ya Habi tungkol kangko, ay dyanan biyay ya ayn angga. <sup>36</sup> Mikamihan man kanan mihay tawo ya pibandian di ha luta, ay a na mapakinabangnan ya habayto, no hiya etaman ay mipalako ha kaparusaan ya ayn angga! <sup>37</sup> Yarin matanggap ya pibandian na, ta êmēn a mipalako ha kaparusaan ya ayn angga ya kaēlwa na! <sup>38</sup> Hilay tawo amēhēn ay taganán

makasalanan, haka tinalibatokan la hi Apo Namalyari. No araên la ko, ya Taga-Langit, ya In-anak Tawo, haka no araên lay toro ko, ay araên ko hila êt ha pag-orong ko di. Ha pag-orong ko, ay atsi kangko ya kapahilêw ya kahampatan ni Apo Namalyari, ya Tatang ko, haka kalamo ko hilay anghel na.”

## 9

<sup>1</sup> Inhundo ni Apo Jesus ya pamaghabi na kanlan tagahonol na, ya wana, “Pakagilamên yoy habaytsi, ya main ungno di kamoyu ya a matsi angga ha mahêlêk la, ya nilumatêng ya pamanlokop ni Apo Namalyari hên main kapangyarihan.”

*Ampihahabi hi Apo Jesus, hi apo Moises, haka hi apo Elias  
(Mateo 17:1-13; Lucas 9:28-36)*

<sup>2</sup> Hêñ nalabah ya anêm ya allo paubat hêñ hinabi nay habayto ni Apo Jesus, ay pinaglamo na hi Pedro, hi Juan haka hi Santiago, hêñ nilumakat ha matagay ya tawtgug hêñ kakapag la. Kaban atsi hila bayro, ay naoman ya itsura ni Apo Jesus. <sup>3</sup> Ya takop na ay nag-in bapan putsi ya kapahilêw, ya ayn kapantag ha kaputsian. <sup>4</sup> Namakonkaynaman ay main loway mâmipamwang ya anipaihip kanla ni Apo Namalyari ya ubat ha langit, ya hi apo Moises haka hi apo Elias ya kalamo ni Apo Jesus hêñ ampihahabi. <sup>5</sup> Bayo hinabi ni Pedro, ya wana, “Mánoro, mangêd ya atsi kitamo di. Manyag kay hêñ tatloy hawong. Miha kamo, miha kan apo Moises, haka miha kan apo Elias.” <sup>6</sup> Hinabi nay habayto ni Pedro gawan nakatsigag ya haka hilan Juan. <sup>7</sup> Ampaghabi ya pon hi Pedro hêñ inupungan hila hêñ ginêm, haka main hilan nagilam ya habi ya ubat ha ginêm, ya wanana habi, “Hatsi ya anlugarûn kon anak. Gilamên yoy anhabîen na.” <sup>8</sup> Hêñ tinunggêñ ya habi, ay nanlêk hilan Pedro ha palibot, noa, mimiha na tana ni Apo Jesus ya angkahêlêk la.

<sup>9</sup> Ha paglohan la hêñ ubat ha tawtgug, ay impapakabawal ni Apo Jesus hilay habaytoy tatloy tagahonol na hêñ ipamwang ha hinoman ya nahêlêk la ha tawtgug, angga ha a ya pon matsi haka mabiyay oman, ya hiya, ya Taga-Langit, ya In-anak Tawo. <sup>10</sup> Kabay a la impamwang ya habayto ha hinoman. Pinihahabian la no hinoy labay habiên ya mabiyay yan oman. <sup>11</sup> Gawan nahêlêk la bayro ha tawtgug hi apo Elias, ay kinotang la ya, ya wanla, “Awta panhabiên lan mónoron Kautuhan ni apo Moises, ya kailangan mag-orong ya pon di ha luta hi apo Elias bayo ya lumatêng ya Mesias, ya Cristo, ya impangakon Mámiligas ya pinili ni Apo Namalyari hêñ mamaala?”

<sup>12</sup> Wana etaman ni Apo Jesus, “Taganán nakahulat<sup>\*</sup> ha habi ni Apo Namalyari ya main nanad kan apo Elias ya manlêan hêñ nakêm ha pamanlumatêng ko. Haka nakahulat<sup>†</sup> etaman ya hiko, ya Taga-Langit, ya In-anak Tawo, ay araên haka dapat magtêêh hêñ hadyay pamagdusa. <sup>13</sup> Noa, anhabîen ko kamoyu, ya nilumatêng yay na ya nanad<sup>‡</sup> kan apo Elias, haka a la ya nabalayan, ya hiyay habayto ya lumatêng bayo ya lumatêng ya Mesias, ya Cristo, ta dinyag la kana, ya labay la, hêñ nanad ha impamwang ha Kahulatan<sup>§</sup> ya tungkol kana.”

*Namipaplag hi Apo Jesus hêñ hinumapat hêñ ampamatugaw ha mihay anak  
ya lalaki*

*(Mateo 17:14-21; Lucas 9:37-43a)*

<sup>14</sup> Hêñ nakalohan hilay na ha tawtgug, hêñ marani hilay na ha andyanan lan kaatag ya tagahonol na, ay nahêlêk lay kal-atan ya nakapalibot kanla.

\* **9:12** Malakias 4:5, 6.   † **9:12** Isaias 53:3-12.   ‡ **9:13** Mateo 17:13.   § **9:13** Malakias 4:5, 6.

Haka napansin la ya main mánoron Kautuhan ni apo Moises ya ampakihubak kanla. <sup>15</sup> Hêñ nahélêk lan kal-atan hi Apo Jesus, ay nipag-êpapah hilan nuwayun nanupa kana. <sup>16</sup> Kinotang ni Apo Jesus hilay tagahonol na ya wana, “Hinoy ampihubukan yo?”

<sup>17</sup> Wanan miha bayro, “Mánoro, gintan ko di kamo ya anak koy lalaki, ya anhapatan hêñ narawak ya a angkahélêk, haka a yay na ampakahabi. <sup>18</sup> No andawhongén na yan anhumapat kana, ay an-itumba na ya ha luta, bayo maggalak ya bêbêy na. Ampag-ngê-ngêt ya, haka angkumdêy ya lawini na. Pinakihabi kina ha tagahonol mo ya paalihêñ lay hinumapat, noa, a la ya agyu hêñ paalihêñ.”

<sup>19</sup> Kabay wani Apo Jesus, “Hikaw ya angkabiyay amêhêñ ay ayn paniwala! Aydin angga kataw hêñ pakilamoan haka pakitagalán?” Bayo wana kanan lalaki, “Gêtan mo di ya anak mo.”

<sup>20</sup> Gintan lay anak kan Apo Jesus. Hêñ nahélêk na hi Apo Jesus, hêñ hatoy hinumapat kanan anak, ay impatumba nay anak hêñ imbuwad-buwad hêñ ampaggalak ya bêbêy. <sup>21</sup> Kinotang ni Apo Jesus ya toa nan anak, “Nakano yan unan hinapatan?”

Wanan toa na, “Paubat hêñ nanawa ya pon. <sup>22</sup> No andawhongén na ya, ay panay na yan an-itapon ha apoy, o an-ihugno ha lanêm ta patsêñ na ya dayi. Noa, no main kan madyag, ay ingalwan mo kay dayi, hêñ paalihêñ mo ya kana.”

<sup>23</sup> Bayo wani Apo Jesus, “Pata nahabi mo, no main akon madyag? Hilay ampaniwala kan Apo Namalyari ay makadyag hêñ kaganawan!”

<sup>24</sup> In-ikhaw nan inhabi hêñ toa nan anak, ya wana, “Ampaniwala ko! Noa, no main pamägkulang ha paniwala ko, ay pahanan mina dayi!”

<sup>25</sup> Hêñ nahélêk ni Apo Jesus ya kal-atan ya anlumatêng, ay namipaplag ya hêñ hinumapat kanan anak, ya wana, “Hika ya namatékk haka namaomêl kanan hata anak, ay mag-alíh ka kana, haka paan kay nan humapat kana!”

<sup>26</sup> Hadyay angaw nan hinumapat kanan anak, intumba nay anak, haka hadyay pamibwad-bwad na kana, bayo inumalih yay na. Haka nanad hêñ bangkay ya lawini nan anak. Kabay êndat lan kal-atan ya natsi yay na. <sup>27</sup> Noa, tinalan ni Apo Jesus ya gamêt na ta impairêng na ya, nirêng ya etaman ya anak.

<sup>28</sup> Hêñ nakahowêñ hilan Apo Jesus ha bali ya ampaidyanan la, ay kinotang la yan tagahonol na no awta a la ya napaalih ya hinumapat kanan anak.

<sup>29</sup> Wana etaman ni Apo Jesus, “Ya êmbayroy narawak ya a angkahélêk, ay a mapaalih no alwan gawan ha pamanalangin.”

### *Inoman nan hinabi ni Apo Jesus ya patsêñ ya*

(Mateo 17:22-23; Lucas 9:43b-45)

<sup>30</sup> Nag-alíh hilan Apo Jesus bayro, haka nagdann hila ha probinsyan Galilea, ta êmén ayn makamwang no antoy andyanan la, <sup>31</sup> ta antoroan nay tagahonol na, ya wana, “Hiko ya Taga-Langit, ya In-anak Tawo, ay i-upit ha kapatsi ko. Patsêñ la ko, noa, ha ikatlon allo, ay mabiyay kon oman.” <sup>32</sup> Noa, a la naintindihan hêñ tagahonol na ya habaytoy hinabi na. Malimo hila etaman hêñ mangotáng kana.

### *No hino ya matag-ay ya tungkulan*

(Mateo 18:1-5; Lucas 9:46-48)

<sup>33</sup> Hêñ nilumatêng hilay na ha balayan Capernaum, hêñ atsi hilay na ha mihay bali, ay kinotang ni Apo Jesus hilay tagahonol na no hino ya pinihuhubakan la ha dann. <sup>34</sup> Noa, ayn kanla ya naghabí, gawan marêng-êy hila ta pinihuhubakan la no hino kanla ya matag-ay ya tungkulan. <sup>35</sup> Nikno

hi Apo Jesus, ta binaêg na hilay labinloway tagahonol na hên dumani kana, ta wana kanla, "Hilay labay mag-in matag-ay, ay kailangan magpakaaypa hên maghuyo kanlan ampangailangan hên hawop." <sup>36</sup> Binaêg nay mihay anak ya nanawa hên mirêng ha arapan la ta tinakêh na ya, bayo wana kanlan tagahonol na, <sup>37</sup> "Hinoman ya ampaniwala kangko, ya ampananggap kanlan maaypa ya nakêm nanad hata anak, hên gawan habaytoy paniwala la kangko, ay nanad hiko ya antanggapêñ la. Hila etaman ya ampananggap kangko, ay antanggapêñ la hi Apo Namalyari ya namiutoh kangko."

*Hilay a ampanalanghang kantamo, ay ampanawop kantamo  
(Lucas 9:49-50)*

<sup>38</sup> Wani Juan kan Apo Jesus, "Manoro, nahêlêk naêñ ya mihay lalaki ya ampanggamit hên langan mo ha pamaalih hên nangarawak ya a angkahêlêk. Binawal naêñ ya gawan alwa tamo yan kalamo." <sup>39</sup> Noa, wani Apo Jesus kana, "Paan yo yan bawalêñ, ta ayn manyag hên kapapaêpapah ha langan ko, bayo maghabin halanghang kangko. <sup>40</sup> Hilay a ampanalanghang kantamo ay ampanawop kantamo. <sup>41</sup> Pakagilamêñ yo! Hilay mam-i kamoyu hên mihay baso hên lanêm, gawan hikaw ay ambaêgên tagahonol ko, ay taganán tumbahan hila etaman ni Apo Namalyari hên kangêran."

*Ya pangubatan hên pamanyag kasalanan  
(Mateo 18:6-9; Lucas 17:1-2)*

<sup>42</sup> Inhundo ni Apo Jesus ya pamaghabi na, ya wana, "Hinoman ya pangubatan hên pamanyag kasalanan hên mihay maaypa ya nakêm hên nanad kanan hata nanaway anak ya ampaniwala kangko, ay mangêd pon kana, ya bayo ya mag-in pangubatan hên habayto, ay patsêñ ya hên êl-an yan mahlay ya bato ha lêey na, ta ilêmêh ha malalê ya lanêm. <sup>43</sup> No gamêt mo ya anggamitêñ mon manyag kasalanan, ay mangêd ya potohêñ mo ya habayto. Ta mangêd pon ya milamo ka ha biyay ya ayn angga ha langit, hên ayn gamêt, kanan mipalako ka ha impiyerno ha apoy ya ayn angga, hên main gamêt. <sup>44</sup> (Bayro ha apoy ya ayn angga, ay main owêl ya a angkamatsi ya mangna kanlan mipalako bayro.)\* <sup>45</sup> No bitsih mo ya anggamitêñ mon manyag kasalanan, ay mangêd ya potohêñ mo ya habayto. Ta mangêd ya milamo ka ha biyay ya ayn angga ha langit, hên ayn bitsih, kanan mitapon ka ha impiyerno, hên main bitsih. <sup>46</sup> (Bayro ay main owêl ya a angkamatsi ya mangna kanla.)† <sup>47</sup> No mata mo ya anggamitêñ mon manyag kasalanan, ay kêwêtêñ mo haka mon itapon. Ta mangêd ya milamo ka ha biyay ya ayn angga ha langit, hên ayn mata, kanan mitapon ka ha impiyerno, hên main mata. <sup>48</sup> Bayro ha impiyerno ay main owêl ya a angkamatsi ya mangna kanla, haka ya apoy bayro ay a angkaparê.

<sup>49</sup> "Ya balang miha ay magdanas hên kairapan, ta êmêñ mag-in mangêd ya ugali la. Habayto ay nanad ha kêna ya dinyanan ahin, bayo imparann ha apoy. <sup>50</sup> Mangêd ya ahin. Noa, no naalihan yay nan alat, ay ahinan maiorong ya alat na. Ihipêñ yoy pamanggamit hên ahin. Dapat panay kaw mag-in nanad ahin ya a naalihan, ta êmêñ main kapatêkbêkan ya pamilalamo yo."

## 10

*Intoro ni Apo Jesus ya tungkol ha pamihiyay hên miyawawa  
(Mateo 19:1-12; Lucas 16:18)*

---

\* **9:44** Habaytsi ay ayn ha kaatag ya Kahulatan Griego. † **9:46** Habaytsi ay ayn ha kaatag ya Kahulatan Griego.

**1** Amêhén, ay immalíh hilan Apo Jesus bayro ha probinsyan Galilea, ta nagdann hilay na ha probinsyan Judea, hén nilumipay ha Ilog Jordan. Kalatan ya nagtsipon hén nagpatoro kana. Tinoroan na hila etaman hén nanad ha panay nan andaygén.

**2** Main ungnoy Pariseo bayro ya napaidani kan Apo Jesus, ya labay mandakép kana ha pamaghabi na. Kabay nangotang hila kana, ya wanla, “Malyari ha mihay lalaki hén ihiyay nay ahawa na, hinoman ya pagbad-an?”

**3** Nangotang hi Apo Jesus, “Hinoy utoh ni apo Moises ya tungkol bayro?”

**4** Wanla etaman, “Pinaulayan ni apo Moises ya lalaki hén mamihiyay hén ahawa la no main hilay nan kahulatan ya an-ihiyay lay ahawa la.” **5** Wanay na êt ni Apo Jesus, “Gawan ha kakdéyan ulo yo, ha a yo labay humonol ha kalabayan ni Apo Namalyari, ay kabay nanulat hi apo Moises hén habaytoy utoh. **6** Noa, hén haton lagi, hén dinyag ni Apo Namalyari ya luta, ay nanyag yan lalaki, haka nanyag ya êt hén babayi.\* **7** Kabay lakwanan nan lalaki ya toa na, ta milamo hilay nay miahawa. **8** Hilay miahawa ay mag-in mimiha,† kabay alwa hilay nan lowa, ta mimiha hila tana. **9** Ya pinilamo ni Apo Namalyari, ay dapat a pihiyayén.”

**10** Hén nilumaténg hilan Apo Jesus ha ampaidyanan la, ay hilay tagahonol na etaman ya nangotang kana, no hinoy labay habiên hén habaytoy hinabi na. **11** Kabay hinabi ni Apo Jesus, ya wana, “Ya lalaki ya mamihiyay hén ahawa na, bayo mag-ahawa yan kaatag, ay nanyag kasalanan ha una nan ahawa gawan namabayi ya. **12** Embayro êt ya babayi ya nakihiyay ha ahawa na, bayo makiahawa ha kaatag ya lalaki, ay nanyag kasalanan gawan nakilalaki ya.”

*Inhalangin ni Apo Jesus ya nanganaway anak  
(Mateo 19:13-15; Lucas 18:15-17)*

**13** Nanganaway anak man, ay anggétan kan Apo Jesus, ta ihalangin na hila hén ipalunto nay gamêt na ha ulo la. Hén nahélék lan tagahonol ni Apo Jesus ya hata manianak-anak, ay binawal lay ampantan kanla. **14** Noa, hén napansin ni Apo Jesus, ya angkalyari, ay hinuluk nay tagahonol na, ya wana, “Paulayan yo hilay anak hén paidani kangko. Paan yo hilan bawalén. Ta hilay maaypa ya nakém ya nanad kanla, ay hila ya ilamo ha pamanlokop ni Apo Namalyari. **15** Pakagilamén yoy hatsi. Hilay a manoto ha paniwala lan nanaway anak ha pagpalokop la kan Apo Namalyari, ay a makapakilamo ha pamanlokop na.” **16** Tinakéh nay manianak-anak, bayo impalunto nay gamêt na ha ulo la, ta inhalangin na hila.

*Ya mihay mabandi, ya Israelita, ya nangotang no hino ya dapat nan daygén  
ta êmén ya madyanan biyay ya ayn angga  
(Mateo 19:16-30; Lucas 18:18-30)*

**17** Hén paalíh hilan Apo Jesus, ay main mihay lalaki ya nuwayun dinumani hén nandoko ha arapan na hén nangotang, “Mangéd ya Mánoro, hino ya dapat kon daygén, ta êmén ako madyanan hén biyay ya ayn angga?” **18** Wani Apo Jesus kana, “Pata binaég mo kon mangéd? Hi Apo Namalyarin bêngat ya mangéd. **19** Muwang moy Kautuhan ni Apo Namalyari, ‘Paan mamatsin kaparehon tawo. Paan mamabayi. Paan makilalaki. Paan manakaw. Paan manistigos ha alwan pêtêg. Paan manloko. Galangén moy toa mo.’” **20** Bayo wanana lalaki, “Mánoro, anhonolén kina ya habayto ngan, paubat hén nanawa ko pon.” **21** Hén nagilam ni Apo Jesus ya hinabi na, ay hinlêk na ya lalaki hén main pamanlugud, ta wana, “Miha pon ya kailangan mon daygén. Iubuh

\* **10:6** Genesis 1:27. † **10:8** Genesis 2:24.

mon ihaliw ya pibandian mo, bayo idin moy habaytoy naablian kanlan mangairap, ta madyanan kan mantèg hèn pibandian ha langit. Pangayari mon madyag ya habayto, ay mag-orong ka di, ta humonol ka kangko.” <sup>22</sup> Noa, hèn nagilam nay hinabi ni Apo Jesus, ay ayn yay nan higla haka nammita ya hèn ampaglungkot, ta miha yay mabandi.

<sup>23</sup> Hinlêk ni Apo Jesus hilay tagahonol na, bayo wana kanla, “Alwan nataluh hèn makapakilamo ha pamanlokop ni Apo Namalyari ya hilay mabandi!” <sup>24</sup> Angkalipang ya ihip lan tagahonol na ha hinabi na. Noa, inoman nan hinabi ni Apo Jesus, “Hikaw ya nanad anak ko, alwan nataluh hèn makapakilamo ha pamanlokop ni Apo Namalyari! <sup>25</sup> Nataluh hèn magdann ha lubot karayêm ya mihay kamelyo, kanan makapakilamo ha pamanlokop ni Apo Namalyari ya mihay mabandi.” <sup>26</sup> Angkalipang ya ihip lan tagahonol na ha hinabi na, kabay nipakotang hila, “Hino awud ya miligtas, hèn makapakilamo ha pamanlokop ni Apo Namalyari?” <sup>27</sup> Pinakahêlêk hila ni Apo Jesus, bayo wana, “Ya a madyag hèn tawo, ay madyag ni Apo Namalyari.”

<sup>28</sup> Amêhêñ, wani Pedro, “Ay-êmén kay, ya tagahonol mo? Imbalag naén ya kaganawan, ta êmén kay humonol kamo.” <sup>29</sup> Wana etaman ni Apo Jesus, “Hilay nangibalag bali la, kapotoh pohêl la, toa la, anak la, haka luta la, gawan ha pamanhumonol la kangko, hèn maypamwang hèn Mangangêd ya Habi ya tungkol ha kaligtasan, <sup>30</sup> ay matumbahan hèn katamagatoh kanan imbalag la. Kaban atsi hila pon di ha luta, ay matumbahan hilan bali, kapotoh pohêl, indo, anak haka luta. Pairapan hilan kaatag, noa, lano, ay madyanan hila hèn biyay ya ayn angga. <sup>31</sup> Noa, mal-at kanlan matag-ay ya tungkulon ha hêlêk hèn kapareho la, ay alwan matag-ay ha hêlêk ni Apo Namalyari, haka mal-at kanlan maaypa ya tungkulon ha hêlêk hèn kapareho la, ay matag-ay ha hêlêk ni Apo Namalyari.”

*Ikatlon pangungkat ni Apo Jesus, ya patsênya  
(Mateo 20:17-19; Lucas 18:31-34)*

<sup>32</sup> Hèn atsi hila ha dann, hilan Apo Jesus, hèn palako ha balayan Jerusalem, ay angkauna hi Apo Jesus ha pammita la. Ampag-êpapah hilay tagahonol na, haka hilay kaatag ya ampakihonol kanla, ay angkalimwan, gawan muwang lay main labay mamatsi kan Apo Jesus bayro ha Jerusalem. Amêhêñ, impapawa nay labinloway tagahonol na, ta impamwang na kanlan bêngat ya malyari kana, <sup>33</sup> ya wana, “Pakagilamén yo! Anlumakat kitamo ha Jerusalem ta hiko, ya Taga-Langit, ya In-anak Tawo ay i-upit bayro ha gamêt lan mánoron Kautuhan ni apo Moises, haka kanlan ampamaala kanlan pari. Habiên lan habayto ya hikoy dapat patsên, bayo idin la ko kanlan alwan Israelita. <sup>34</sup> Musmusén, dul-an, haka pagpapatokên la ko, bayo patsên la ko. Noa, ha ikatlon allo, ay mabiyay kon oman!”

*Labay ni Santiago haka ni Juan, ya lowa kanlan tagahonol ni Apo Jesus, ya paiknoén hila ha dani na  
(Mateo 20:20-28)*

<sup>35</sup> Dinumani hèn nangotang kan Apo Jesus ya loway anak ni Zebedeo, ya hi Santiago haka hi Juan, ya wanla, “Manoro, main kay dayin pakihabi kamo.” <sup>36</sup> Wani Apo Jesus etaman, “Hinoy labay yo kangko?” <sup>37</sup> Wanla etaman kana, “Labay naén, ya lano ha pamanlokop mo, ay paiknoén mo kay ha dani mo, ya miha ha dapit panabtab, haka miha êt ha dapit uki.” <sup>38</sup> Wani Apo Jesus kanla, “A yo angkaintindihan ya pamagdusa ya maranasan yo, no mahonol ya kalabayan yo. Matêêh yoy pamagdusa ya danasên ko? Taganán nakal-an kaw hèn matsi hèn nanad kangko?” <sup>39</sup> Wanla etaman kana, “Awo. Nakal-an

kay.” Kabay wani Apo Jesus kanla, “Madanasan yoy pamagdusa ya danasêñ ko, haka matsu kaw hêñ nanad kangko. <sup>40</sup> Noa, ayn akon karapatan hêñ maghabi no hinoy mikno ha dani ko, ta tinalagá nay na ni Apo Namalyari no hinoy mikno ha dani ko.”

<sup>41</sup> Hêñ nagilam lan mapoy kaatag ya tagahonol na, ya labay ni Santiago haka ni Juan, ay hinumuluk hila. <sup>42</sup> Kabay pinarani na hila ni Apo Jesus, ta wana kanla, “Muwang yo ya hilay manungkuluan lan a ampagpalokop kan Apo Namalyari, ay andaygên lan ipoh ya angkalokopan la, haka an-iatay la hilan manyag kalabayan la. <sup>43</sup> Noa, dapat alwan êmbayro ya daygên yo. No labay yon mag-in matag-ay ya tungkuluan, ay dapat yon huyuêñ ya kapareho yon tawo. <sup>44</sup> Ya labay mag-in pinakamatag-ay ya tungkuluan, ay dapat mag-in nanad ipoh hêñ kalamo na. <sup>45</sup> Ta hiko man ya Taga-Langit, ya In-anak Tawo, ay atsi bayri amêhêñ ha luta, alwan para paghuyuan, noa, para maghuyo angga ha idin koy biyay ko, ha pangakbus hêñ kal-atan.”

### *Namamukat hi Apo Jesus hêñ mihay buwag ya hi Bartimeo*

(Mateo 20:29-34; Lucas 18:35-43)

<sup>46</sup> Amêhêñ, nilumatêng hilan Apo Jesus ha balayan Jerico. Hêñ paalíh hila bayro ha balayan, hêñ kalamo hilay kal-atan, ay main buwag ya ampikno ha danin dann, ya ampakikwan pera. Ya langan na ay Bartimeo, ya anak ni Timeo. <sup>47</sup> Hêñ nagilam nay ampanlibah hi Apo Jesus ya taga-balayan Nazaret, ay nan-angaw ya, ya wana, “Apo Jesus, ya kaapo-apoan ni Arin David, ingalwan mo ko dayi!” <sup>48</sup> Binawal yan maglabak hêñ hatoy kal-atan ya ampakihonol kan Apo Jesus, noa, impakakhaw nan in-angaw, “Kaapo-apoan ni Arin David, ingalwan mo ko dayi!” <sup>49</sup> Hêñ nagilam ni Apo Jesus ya angaw na, tinunggêñ ya, ta main yan in-utoh, hêñ akayêñ lay buwag hêñ ilako kana. Hinabi la kanan buwag, “Pakhawêñ moy nakêm mo! Mirêng ka ta impaakay na ka kana.” <sup>50</sup> Tampol yan nirêng. Imbalag nay pangkêbêl na, ta nagpaakay ya ha dani ni Apo Jesus. <sup>51</sup> Nangotang hi Apo Jesus kana, “Hinoy labay mon daygên ko kamo?” Amêhêñ, wanana buwag, “Panginoon, labay ko dayin makahêlêk.” <sup>52</sup> Kabay hinabi ni Apo Jesus kana, “Makahêlêk ka, gawan ha paniwala mo kangko. Malyari kay nan mita.” Tambêng ya etaman nakahêlêk, kabay nakihonol yay na kan Apo Jesus.

## 11

### *Mal-at ya ampagpuri kan Apo Jesus hêñ ampandaraho yay na ha balayan Jerusalem*

(Mateo 21:1-11; Lucas 19:28-40; Juan 12:12-19)

<sup>1</sup> Nahêñ narani hilan Apo Jesus ha Jerusalem, ha talindah hêñ Tawgtug Olibo, hêñ angkadungawan lay balayan Betfage, haka baryon Betania, ay impauna ni Apo Jesus ya lowa kanlan tagahonol na, <sup>2</sup> ta wana kanla, “Muna kaw ha balayan ha unaan tamo. Panhumwêñ yo ha balayan, ay tampol yon mahêlêk ya mihay biseron asno, ya nakah-êl, ya a pon nahakyen. Okalêñ yoy habayto, ta gêtan yo di. <sup>3</sup> No main mangotâng kamoyu no awta an-okalêñ yoy habayto, ay habiêñ yo, ‘Kailangan yan Panginoon haka tampol nan ipaorong di.’ ” <sup>4</sup> Kabay nammita hilay nay loway in-utoh na. Haka natapol la etaman ya biseron asno ya nakah-êl ha mihay ilwangan ha danin dann. Kaban an-okalêñ la ya, <sup>5</sup> ay main ungnoy nangotang, “Pata an-okalêñ yoy habain ya bisero?” <sup>6</sup> Impamwang la ya hinabi ni Apo Jesus kanla. Kabay pinaulayan hila etaman. <sup>7</sup> In-akay lay nay bisero kan Apo Jesus, haka la inamakan pangkêbêl la, bayo himmakay hi Apo Jesus. <sup>8</sup> Inhundo lan Apo Jesus ya pammita lan palakon Jerusalem. Ha pandanan lan Apo Jesus, ay nami-amak

hilay atsi bayro hên pangkêbêl la o bulong, gawan ha panggalang la kana.  
**9** Hilay atsi ha unaan ni Apo Jesus haka hilay anhumonol kana ay nipa-angaw, “Hosanna! Iningalwan ya habaytsi ya in-utoh ni Apo Namalyari!  
**10** Iningalwan ya anlumatêng ya pamamaala nan kaapo-apoan ni Arin David! Hosanna! Purién hi Apo Namalyari!”

**11** Hên nilumatêng hilan Apo Jesus ha Jerusalem, ay nagpakha ya ha Templo. Inubuh nan hinlêk ya angkalyari bayro. Gawan anyumabi yana, ay immawah ya ta nag-orong ya ha baryon Betania, hên kalamo nay labinloway tagahonol na.

*Inhumpa ni Apo Jesus ya mihay poon igos  
(Mateo 21:18-19)*

**12** Pangamaranon hên mag-orong hilan Apo Jesus ha balayan Jerusalem hên ubat ha Betania, ay nilonoh hi Apo Jesus. **13** Hên naipatanêh nay mihay poon igos ya nagbulong, ay dinanian nan hinlêk no main tagêy. Noa, bulong bêngat ya nalatngan na gawan alwa pon panaon tagêy. **14** Kabay wana kanan kayo, “Angga-angga, ay a kay na managêy oman!” Nagilam lan tagahonol na ya hinabi na.

*Namitaboy hi Apo Jesus hên ampipagtinda ha Templo  
(Mateo 21:12-17; Lucas 19:45-48; Juan 2:13-22)*

**15** Hên nilumatêng hilan Apo Jesus ha Jerusalem, ay nagpakha ya ha Templo. Intaboy na hilay ampipagtinda haka ampipanaliw bayro. In-iitwag nay lamisaan lan mâmihagili hên pera, haka in-iitwag na êt ya iknoan lan mâmihaliw hên pati-pati ya gamitênh átang. **16** Binawal na hilay ampangalga, hên magdann bayro ha Templo. **17** Haka na hila tinoroan ya kal-atan, ya wana kanla, “Nakahulat ha habi ni Apo Namalyari, ya wanana hulat, ‘Ya bali ko, ay ambaêgêñ balin panalanginan para ha balang bansa.’\* Noa, dinyag yo yan legal† ya panlokoan yon kapareho yo!”

**18** Hên nagilam lan mónoron Kautuhan ni apo Moises, haka hilay am-pamaala kanlan pari, ya tungkol ha hinabi haka dinyag ni Apo Jesus, ay pinihabian la no hinoy maibara la kana, ta êmén la ya mapatsi. Angkalimo hila kana, gawan ha kal-atan ya ampag-épapah ha pamanoro na. **19** Hên anyumabi yana, ay nag-alíh hilan Apo Jesus bayro ha balayan Jerusalem.

*Ya toro ya makwa ha nayangoy kayon igos ya inhumpa  
(Mateo 21:20-22)*

**20** Pangamaranon, hên nagdann hilan Apo Jesus bayro ha inhumpay poon kayon igos, ay nayangoy na ya habayto. **21** Napanêmtêman ni Pedro ya inhumpa ya kayo, kabay wana, “Manoro, hêlkên mo! Nayangoy nay inhumpa moy kayo!” **22** Wani Apo Jesus, “Maniwala kaw kan Apo Namalyari. **23** Pakagilamén yo, no main mamiutoh kanan hata tawtgug hên mitapon ya ha dagat, no ampaniwala ya, hên ayn pamikakono, ay itapon nay na ni Apo Namalyari ha dagat. **24** Kabay, pakagilamén yo, no ampaniwala kaw, ay matanggap yoy hinoman ya pakikwaan yo ha panalangin. **25** Haka bayo kaw manalangin, ay patawarén yo pon hilay nakadyag kasalanan kamoyu, ta êmén na kaw etaman patawarén ni Apo Namalyari, ya Tatang tamo ha langit. **26** Noa, ta no a yon patawarén ya nakadyag kasalanan kamoyu, ay a na kaw patawarén ni Apo Namalyari, ya Tatang tamo ha langit.”

*No antoy ubatan hên tungkulán ni Apo Jesus  
(Mateo 21:23-27; Lucas 20:1-8)*

\* **11:17** Isaias 56:7. † **11:17** Jeremias 7:11.

<sup>27</sup> Hêñ atsi hilay nan oman ha Jerusalem hilan Apo Jesus, hêñ ampibita-bitâ ya ha Templo, ay dinumani kana hilay mánoron Kautuhan ni apo Moises, hilay toa ya nag tungkulon ha bansa, haka hilay ampamaala kanlan pari. <sup>28</sup> Hinabi la kana, “Habién mo kannâen no hinoy tungkulon mo hêñ manyag hêñ pandaygên mo. Habién mo êt no hinoy nam-i kamo hêñ habain ya tungkulon.” <sup>29</sup> Kabay wani Apo Jesus, “Main ako pon hêñ kotangén kamoyu. No pakibatan yo ko, ay habién ko kamoyu no hinoy nam-i kangko hêñ tungkulon hêñ manyag hêñ pandaygên ko. <sup>30</sup> Hinoy nam-i hêñ tungkulon kan Juan Bautista hêñ mamawtismo? Hi Apo Namalyari o tawo?” <sup>31</sup> Kabay pinihahabian la, ya wanla, “Hinoy habién tamo? No habién tamo ya ‘Ubat kan Apo Namalyari ya tungkulon ni Juan Bautista,’ ay habién na bayto, ‘Pata a yo yan pinaniwal-an?’ <sup>32</sup> Noa, no habién tamo ya ‘Ubat ha tawo,’ ay hino kaya ya daygên lan kal-atan kantamo, ta ha ihip la, hi Juan ay mihay propeta ni Apo Namalyari.” <sup>33</sup> Kabay hinabi la kan Apo Jesus, ya wanla, “A naén muwang no antoy ubatan tungkulon ni Juan Bautista.” Bayo wani Apo Jesus, “No êmbayro awud, ay a ko etaman habién kamoyu no antoy ubatan tungkulon ko.”

## 12

*In-alimbawa ni Apo Jesus ya sarili na ha anak ya anlugurên ya pinatsi, haka ha bato ya intapon*

(Mateo 21:33-46; Lucas 20:9-19)

<sup>1</sup> Amêhêñ, nangalimbawa yay na êt hi Apo Jesus, ya wana kanlan am-panggilam, “Minghan main lalaki ya nag luta ya tinamnan nan ubas. Bayo binakoran nay habayto. Nangali yan pangjunaban hêñ ubas, haka ya êt namairêng hêñ tawer ya pagbantayan. Impatsiwala na ha kaatag ya ubasan na, ta maglaêñ ya ha kaatag ya bansa. <sup>2</sup> Hêñ pamutsi hêñ habaytoy ubas, ay in-utoh nay mihay ipoh na, hêñ kowêñ ya atag na kanlan paypaniwal-an ubasan na. <sup>3</sup> Noa, dinakêp haka tinumbuk lay ipoh na, bayo impaorong la ya, hêñ ayn anggêtan. <sup>4</sup> Kabay in-utoh nay na êt ya kaatag ya ipoh na, noa, pinatok lay ulo na, impakarêng-êy la ya, bayo impaorong la ya hêñ ayn anggêtan. <sup>5</sup> Nahêñ in-utoh nay na êt ya ikatlon ipoh na, ay pinatsi la ya. Malat êt ya ipoh ya in-utoh na. Ya kaatag kanla ay tinumbuk la, haka ya kaatag, ay pinatsi la. <sup>6</sup> Hêñ ayn yay nan ipoh ya maiutoh, ya nag ubasan, ay in-utoh nay anlugurêñ nan anak nay lalaki, ta wana, ‘Siguradon igalang lay anak ko.’ <sup>7</sup> Noa, hêñ nahêlêk lan paypaniwal-an ubasan ya anak nan nag ubasan, ay nihahabi hila, ya wanla, ‘Hatsi ya paypamanaan na hêñ ubasan. Patsêñ tamo ya, ta êmêñ mapagbandi tamo ya hata ubasan na.’ <sup>8</sup> Kabay dinakêp la ya, haka pinatsi, bayo inhamwag lay bangkay na ha luwal hêñ ubasan.”

<sup>9</sup> Amêhêñ, kinotang ni Apo Jesus, hilay ampamaala ha Templo, ya wana, “Hino kaya ya daygên hêñ nag ubasan kanlan paypaniwal-an nan ubasan? Siguradon lakwêñ nay paypaniwal-an nan ubasan, ta patsêñ na hila, bayo ipatsiwala nay ubasan na ha kaatag.” <sup>10</sup> Wana êt ni Apo Jesus kanlan ampamaala ha Templo, “Yarin a yo êt nabaha ya habaytsi ya nakahulat ha Kahulatan ya impahulat ni Apo Namalyari?

‘Ya bato ya intapon lan manyag bali,  
ay nag-in pinakamaalagáy bato  
ta êmêñ mag-in napah-êy ya bali.

<sup>11</sup> Dinyag ni Apo Namalyari ya habayto ya kapapaêpapah.’ ”\*

\* **12:11** Awit 118:22-23.

<sup>12</sup> Naintindihan lan ampamaala ha Templo, ya hilay in-alimbawa di ha manyag bali, haka ha nangarawak ya paypaniwal-an ubasan, kabay labay la yan dakpēn, noa, malimo hila ha kal-atan. Kabay nammita hilay na.

*Ya pamayad hēn buwih*

(Mateo 22:15-22; Lucas 20:20-26)

<sup>13</sup> Bayo namiutoh hilan ungnoy Pariseo haka ungnoy kagampi ni Herodes Antipas, ya waringan main hilan labay mamwangan kan Apo Jesus. Noa, labay la yan madakēp ha pamaghabi na. <sup>14</sup> Hēn nilumatēng hila kan Apo Jesus, ay hinabi la, “Mánoro, muwang naēn ya kaptēgan ya panhabiēn mo haka panoro mo. An-itoro moy kalabayan ni Apo Namalyari, ha hinoman ya ampanggilam, gawan alwa kan mapamili, ta pantag ya panlēk mo ha balang miha. Kabay main kay hēn labay mamwangan kamo. Ayon ha Kautuhan ni apo Moises, ay malyarin mam-in buwih kanan Emperador o ahē?” <sup>15</sup> Noa, muwang ni Apo Jesus ya pagbabara la, kabay hinabi na kanla, ya wana, “Pata labay yo kon dakpēn ha pamaghabi ko! Ipahlēk yo kangko ya mihay sintimos hēn pilak.” <sup>16</sup> Namiawah hilan habayto, bayo kinotang na hila. “Hinoy nag lupa hēn angkakit yo bahēn? Hinoy nag langan ya nakahulat bahēn?” Hinabi la etaman, “Kanan Emperador.” <sup>17</sup> Kabay wani Apo Jesus, “No êmbayro awud, ay idin yo kanan Emperador ya kana, haka idin yo kan Apo Namalyari ya kan Apo Namalyari.” Hēn nagilam lay hinabi na, ay nag-êpapah hila.

*Ya kotang ya tungkol ha pangabiyay oman*

(Mateo 22:23-33; Lucas 20:27-40)

<sup>18</sup> Amêhēn, ay main ungno ha mihay pangkat lan Israelita ya ambaêgēn Saduseo ya dinumani kan Apo Jesus. Hilay Saduseo ay a ampaniwala ha pangabiyay oman. Haka hinabi la kan Apo Jesus, ya wanla, <sup>19</sup> “Mánoro, nanulat ya hi apo Moises ha Kautuhan hēn para kantamo, ya wanhan hulat, ‘No main mitaahawa, ta natsi ya lalaki hēn a hila nagkaanak, ay dapat ya kahonol nan natsi, ay ipaahawa kanan bawo. No magkaanak hila, ay habaytoy anak, ay itad anak na hēn natsi.’ <sup>20</sup> Minghan, ay main pitoy mikakahonol ya lalaki. Nakapag-ahawa ya punganay, noa, natsi ya hēn a nagkaanak. <sup>21</sup> Bayo pinag-ahawa nan humonol ha punganay ya hata bawo, noa, natsi ya etaman ya humonol ha punganay hēn a nagkaanak. Êmbayro êt ya nalyari ha ikatlon kahonol. <sup>22</sup> Balang miha kanlan pitoy mikakahonol ay nakapag-ahawa hēn hata babayi, noa, naubuh hilan natsi hēn a nagkaanak. Bayo natsi ya êt ya hata bawo. <sup>23</sup> Amêhēn, ha allon pangoman mabiyay, hinoy nay taganán mag-in ahawa nan hata babayi, ta balang miha kanlan habaytoy pitoy mikakahonol ay nag-in ahawa na?”

<sup>24</sup> Kabay wani Apo Jesus kanlan Saduseo, “Mali ya paniwala yo, ya a biyayēn oman ya natsi, gawan a yo angkaintindihan ya Kahulatan ya im-pahulat ni Apo Namalyari haka a yo angkaintindihan ya kapangyarihan na!

<sup>25</sup> Ha pangoman biyayēn hilay natsi, ay ayn nanan pamag-ahawa, ta manoto hila kanlan anghel ha langit ya a ampag-ahawa. <sup>26</sup> Ya hulat man ni apo Moises ay ampamaptēg ya biyayēn oman hilay natsi, ta bayro ha hulat na, ya tungkol ha maaypa ya kayoy andungkēt, mabáha tamo ya hinabi ni Apo Namalyari, ‘Hikoy Diyos ni Abraham, Diyos ni Isaac, haka Diyos ni Jacob.’† <sup>27</sup> Habaytoy labay habiēn ya hiyay Diyos lan angkabiyay, ta balang miha ya natsi, ay angkabiyay ha hēlēk na. Mali ya paniwala yo, ya a biyayēn oman ya natsi.”

† 12:26 Exodus 3:6.

*Ya pinakamaalagá ya utoh ni Apo Namalyari  
(Mateo 22:34-40; Lucas 10:25-28)*

<sup>28</sup> Main mánoron Kautuhan ni apo Moises ya nakagilam hén pamakipag-palinawan la. Hén napansin na, ya mangêd awud, ya hinabi ni Apo Jesus, ay nangotang ya, “Mánoro, hinoy pinakamaalagá ha utoh ni Apo Namalyari?” <sup>29</sup> Hinabi ni Apo Jesus, “Ya pinakamaalagá utoh ni Apo Namalyari, ay ‘Manggilam kaw ya Israelita. Mimihay Panginoon tamo, yabay ya hi Apo Namalyari, ayn nanan kaatag. <sup>30</sup> Lugurên mo hi Apo Namalyari, ya Panginoon hén boon nakêm, boon ihip, haka boon hékaw.’ <sup>31</sup> Ya ikalwa ay, ‘Lugurên moy kapareho mo hén nanad pamanlugud mo ha lawini mo.’ Ayn kaatag ya utoh ya maalagá kanlan habaytoy lowa.” <sup>32</sup> Wanan mánoron Kautuhan ni apo Moises, “Taganán pêtêg ya hinabi mo ya mimihay Panginoon tamo, yabay ya hi Apo Namalyari, ayn nanan kaatag. <sup>33</sup> Haka muwang ko ya maalagá ya lugurên tamo ya hén boon nakêm, boon ihip, haka boon hékaw. Dapat tamo etaman hén lugurên ya kapareho tamo hén nanad ha pamanlugud tamo ha lawini tamo. Maalagá ya habayto kanan hinon imparaya o in-átang kana.” <sup>34</sup> Nadambi ni Apo Jesus ya main kagalingan ya hinabi nan mánoron Kautuhan ni apo Moises, kabay wana kana, “Marani ka ha pamanlokop ni Apo Namalyari, ta pérad tana ay palokop ka kana.” Marêng-éy hilay na hén mangotáng pon kan Apo Jesus, hilay labay hén mandakêp kana ha pamaghabi na.

*Hi Cristo, ya Mesias, ay alwan bêngat kaapo-apoan ni Arin David, noa, hiyay Panginoon ni Arin David etaman*

*(Mateo 22:41-46; Lucas 20:41-44)*

<sup>35</sup> Kaban ampanoro ya hi Apo Jesus ha Templo, ay nangotang ya, “Ay-êmén lan mahabi lan mánoron Kautuhan, ya Mesias, ya Cristo, ya impangakon Mámilitas ya pinili ni Apo Namalyari hén mamaala ay kaapo-apoan bat ni Arin David? <sup>36</sup> Mismon hi Arin David, ya ninuno tamo, ay namihulat ha Kahulatan ha kapangyarihan nan Espiritu ni Apo Namalyari, hén tungkol ha Mesias, ya Cristo, ya wana,  
‘Hinabi ni Apo Namalyari ha Panginoon ko,  
“Mikno ka ha dapit panabtab ko hén mamaala hén kalamo ko,  
angga ha mahambut ko hilay kapatsi mo,  
ta idin ko hila ha aypañ kapangyarihan mo.” , ”‡

<sup>37</sup> Wana êt ni Apo Jesus, “Hén hato, ay hi Arin David ya namaêg hén ‘Panginoon ko’ ha Mesias, ya Cristo, ya impangakon Mámilitas ya pinili ni Apo Namalyari hén mamaala. Kabay muwang tamo, ya hiyay Panginoon haka kaapo-apoan ni Arin David.” Hadyay kahiglaan lan kal-atan hén manggilam hén toro na.

*Kaillag ha toro lan mánoron Kautuhan ni apo Moises  
(Mateo 23:1-36; Lucas 20:45-47)*

<sup>38</sup> Inhundo ni Apo Jesus ya panoro na, ya wana, “Kaillag kaw ha toro lan mánoron Kautuhan ni apo Moises. Labay-labay la hén mibita-bitâ hén nakatakop hén makarang ya takop, ta êmén ipamwang ya matag-ay ya tungkulon la. Labay la êt hén galangén, haka dayêwén hila hén kal-atan ha balayan. <sup>39</sup> Ya kaatag pon ya andaygén la ta êmén ipamwang ya matag-ay ya tungkulon la, ay ampilién lay pinakamangêd ya iknoan ha sinagoga haka ha kaluto. <sup>40</sup> Anlokoén la êt ya bawo ya babayi, ta êmén la makwa ya pibandian la, bayo magma-mangêd hilan ikarang ya panalangin la ha arapan hén kal-atan. Kabay hadyay pamarusa kanla lano.”

‡ 12:36 Awit 110:1.

*Ya alay hēn mihay bawo ya babayi  
(Lucas 21:1-4)*

<sup>41</sup> Kaban atsi ya pon ha Templo hi Apo Jesus, hēn ampikno ha êtēb hēn pamyanan alay, ay anhēlkēn nay kal-atan ya ampam-in alay la ha pamyanan alay. Mal-at ya mabandi ya nam-in kal-atan bandi. <sup>42</sup> Noa, ya mihay bawo ya babayi, ya mairap, ay nam-in lo-loway sintimos ha pamyanan alay. <sup>43</sup> Kabay wani Apo Jesus kanlan tagahonol na, “Pakagilamēn yo, hata bawo ay nam-in mal-at kanan indin lan kal-atan mabandi. <sup>44</sup> Ta hilay kaatag ay nam-in a la pon kailangan, noa, hata bawo, ay in-ubuh nan indin ya panaliw nan maêkan na.”

## 13

*Inungkat ni Apo Jesus ya pamanira hēn Templo  
(Mateo 24:1-2; Lucas 21:5-6)*

<sup>1</sup> Hēn mag-awah hilan Apo Jesus ha Templo, ay wanana miha kanlan tagahonol na, “Mánoro, hēlkēn mo ya pangahlayan bato ya pinaglolog la ha Templo! Hadyay kahampatan na!” <sup>2</sup> Amêhēn, hinabi ni Apo Jesus, ya wana, “Lumatēng lanoy allo, ay manga-aagwat ngan ya hata bato ya pinaglolog ya angkahēlēk yo.”

*Ya hadyay pamairap ya lumatēng  
(Mateo 24:3-14; Lucas 21:7-19)*

<sup>3</sup> Hēn atsi hilan Apo Jesus ha Tawgtug Olibo, hēn nakaikno ya ha êtēb Templo, ay napaidani kana hi Pedro, hi Santiago, hi Juan, haka hi Andres, hēn hilan bēngat. <sup>4</sup> Amêhēn, nangotang hila kana, “Habiēn mo kannaēn no makanon malyari ya habayto, haka no ay-êmēn naēn mamwangan no maranin malyari ya habayto.”

<sup>5</sup> Kabay wani Apo Jesus, “Kaillag kaw, ta êmēn a kaw maloko, <sup>6</sup> ta mal-at ya maghabin êmēn di, ‘Hiko ya Mesias, ya Cristo, ya impangakon Mámiligtas ya pinili ni Apo Namalyari hēn mamaala.’ Gawan bayro, ay mal-at ya maloko la. <sup>7</sup> Paan kaw malimo ha magilaman yoy tungkol ha manigulo-gulo haka pa-tsian, ta habayto ay kailangan lumatēng pon, noa, a pon tambēng lumatēng ya anggaan hēn luta. <sup>8</sup> Milalaban hilay bansa haka hilay angkalokopan hēn mihay bansa ay milalaban ha kabansa la. Lumatēng ya mangakhaw ya layon ha ay-iri man ya legal. Lumatēng êt ya hadyay lonoh. Noa, habayto ay umpisan bēngat hēn hadyay kairapan, hēn nanad ha umpisan pan-umilab hēn ampanganak.

<sup>9</sup> “Dapat kaillag kaw, ta gētan la kaw kanlan toa ya nag tungkulon ha hinon sinagoga, kotangēn la kaw haka pagpapatokēn la kaw ha sinagoga. Gawan ha paniwala yo kangko, ay gētan kaw kanlan ari haka gobernador. Ha êmbayro ay maipamwang yo kanla ya Mangēd ya Habi tungkol kangko. <sup>10</sup> Yabay ya kailangan hēn ipamwang ha balang bansa bayo lumatēng ya kaanggaan hēn hata luta. <sup>11</sup> Uston iarap la kaw kanlan manungkulon, ta kotangēn la kaw, paan kaw manyagah no hinoy habiēn yo, ta ya Espiritu ni Apo Namalyari, ay mamaihip kamoyu no hinoy habiēn yo. <sup>12</sup> Main kapotoh pohēl, haka toa, ya may-upit hēn kamag-anak la. Main maának ya manalanghang ha toa la hēn angga ha ipapatsi la hila. <sup>13</sup> Kahêmēkan kaw hēn kal-atan, gawan ha paniwala yo kangko. Noa, no maihundo yoy paniwala yo kangko, angga ha anggaan biyay yo, agyan ampagdanas kaw hēn hadyay pamairap, ay madyanan kaw hēn biyay ya ayn angga.”

*Inungkat ni Apo Jesus ya pamanira ha balayan Jerusalem  
(Mateo 24:15-28; Lucas 21:20-24)*

<sup>14</sup> Inhundo ni Apo Jesus ya pamaghabi na, ya wana, “No mahélék yoy nay kapaparéng-êy ya hadyay karawakan ya malyari ha Templo ni Apo Namalyari, ay ha allon habayto, ay kailangan muwayun magtago ha babo, ya hilay taga-probinsyan Judea.” Hikaw ya ampamaha ay pakaintindién yoy habaytsi! <sup>15</sup> “Habaytoy allo, no main atsi ha bubungan bali la, ay dapat tampol hilan tumaoj hén muwayun lumakat ha babo! Paan hilay nan mangwan pibandian la ha lalén bali la! <sup>16</sup> Paan hilay nan muli ya atsi ha panamnan hén mangwan sambra la! <sup>17</sup> Kanan habayto, ay kaingalo hilay nabuktot haka hilay ampamahoho. <sup>18</sup> Ihalangin yo, ya a dayi malyari ha panaon hén kēbēl, ya habaytoy pammuwayu yo hén magtago. <sup>19</sup> Ta di ha luta ay maranasan ya hadyay kairapan, ya ayn kapantag paubat hén dinyag ni Apo Namalyari ya hata luta, angga améhén. Haka ahina maranasan oman ya êmbayroy kairapan. <sup>20</sup> No mabuyot ya habaytoy kairapan, ay ayn nanan mabiyay di ha luta, noa, gawan bat ha ikakangéd lan pinili na hén mag-in kana, ay tinalagá ni Apo Namalyari hén paipékén ya habaytoy panaon.

<sup>21</sup> “Kanan habaytoy panaon, no main maghabin, ‘Atsi ya bayri ya Mesias, ya Cristo, ya Mámiligtas, o atsi ya bayro,’ ay paan kaw maniwala kanla. <sup>22</sup> Ta main magbabara hén hila ay Cristo, haka main êt kaatag ya magbabara hén hila ay mámipamwang hén an-ipaihip kanla ni Apo Namalyari. Mamipahlék hilan kapapaépapah ta labay lan mámungaw hilay pinili ni Apo Namalyari hén mag-in kana. <sup>23</sup> Kabay kaillag kaw! In-ubuh kinan hinabi ya malyari, ta êmén a kaw mámungaw.”

*Ya pamanlumaténg oman ni Apo Jesus ya Taga-Langit, ya In-anak Tawo  
(Mateo 24:29-31; Lucas 21:25-28)*

<sup>24</sup> Wana êt ni Apo Jesus, “Pangayarin habaytoy hadyay kairapan, ay du-miglém ya allo, haka ahina humawang ya buwan, <sup>25</sup> mangatata ya bêtewén, haka maubuh hén mangayégyéy ya angkahélék ha langit. <sup>26</sup> Kanan habayto, ay mahélék la ko ha lém̄, ya Taga-Langit, ya In-anak Tawo, ya anlumaténg hén kalamoy kapangyarihan ko, ya ayn kapantag, haka ya kapahiléw ya kahampatan hén panga-Diyos ko. <sup>27</sup> Kanan habayto, ay iutoh ko hilay anghel ha kaganawan bansa ha boon luta, ta êmén la tsiponén ya pinili ni Apo Namalyari hén mag-in kana.”

*Ya toro ya makwa ha poon kayon igos  
(Mateo 24:32-35; Lucas 21:29-33)*

<sup>28</sup> Bayo wani Apo Jesus, “Mangwa kaw hén aral di ha poon kayon igos. No mamayo yan bulong, ay muwang yoy na bayto ya marani yanay kain-gitan. <sup>29</sup> Êmbayro êt, no mahélék yoy nan maubuh hén malyari ya habayto ya kapapalimo, ay mamwangan yoy taganán marani ya pamag-orong ko. <sup>30</sup> Pakagilamén yo. Maubuh hén matupad ya habayto kaban main pon di ha luta hén kapareho yon Israelita. <sup>31</sup> Ya luta haka ya angkahélék ha langit ay main anggaan, noa, ya habi ko ay ayn anggaan.”

*Ayn ampakamwang no makanoy pag-orong ni Apo Jesus  
(Mateo 24:36-44)*

<sup>32</sup> Wanay na êt ni Apo Jesus, “Ayn ampakamwang no hinon allo, o oras ya pag-orong ko. Hila man ya anghel ha langit, o hiko man ya Anak ni Apo Namalyari, ay a ampakamwang hén habayto. Hiyan bat hi Apo Namalyari ya Tatang tamo, ya nag muwang. <sup>33</sup> Kabay pakaalisto kaw! Dapat panay kaw nakal-an, ta a yon muwang no makanon malyari ya habayto.”

<sup>34</sup> Impamwang ni Apo Jesus kanla, no ay-êmén ya dapat mag-in pamimiyay la, kaban an-êngganan lay pag-orong na, ta wana, “Habaytoy nanad ha mihay

lalaki, ya nilumagay ha marayo. Bayo ya nammita ay binaêg nay ipohna, ta dinyanan hilan tsi-tsihan obra la, haka hinabi na ha magbantay hên ilwangan, ya dapat yan panay nakal-an ha pag-orong na.<sup>35</sup> Kabay pakaalisto kaw! Dapat panay kaw nakal-an, ta a yo muwang no makano ya pag-orong nan main bali. A yo man muwang no kapiyabi, bonak yabi, magdadali allo, o maranon ya pag-orong na.<sup>36</sup> Ta kayno malatngan na kaw ya angkabêlêw ha bigla nan pamanlumatêng.<sup>37</sup> Ya anhabiên ko kamoyu, ay anhabiên ko ha balang miha, ya dapat panay kaw nakal-an! Pakaalisto kaw!”

## 14

### *Ya pamamulong kan Apo Jesus (Mateo 26:1-5; Lucas 22:1-2; Juan 11:45-53)*

<sup>1</sup> Amêhêñ, Iowa tanay allo bayo mag Pistan Pangaligtas ha Egipto\* haka Pistan Puto ya ayn Pampaalsa. Hilay mánoron Kautuhan ni apo Moises, haka hilay ampamaala kanlan pari, ay ampamulong kan Apo Jesus, no ay-êmén la yan madakêp haka maipapatsi hên ayn makamwang.<sup>2</sup> Ta wanla, “Paan tamo yan ipapatsi kaban pista pon, ta kayno manulhul hilay kal-atan, ya ampanggilam toro na.”

### *Hêñ tinugtugan hêñ pabango hi Apo Jesus (Mateo 26:6-13; Juan 12:1-8)*

<sup>3</sup> Hêñ atsi hilan Apo Jesus ha baryon Betania, hêñ ampangan ha bali ni Simon, ya inalihan ketong, ay main nilumatêng ya mihay babayi, ya ampantan hêñ makamal ya pabango, ya nardo, ya atsi ha pamyanan ya dyag ha alabastro, ta intugtug na ha ulo ni Apo Jesus.<sup>4</sup> Hêñ nahêlêk lan kaatag ya dinyag nan babayi, ay nanuluk hila, ya wanla, “Pata hinayang nay pabango?<sup>5</sup> Pata a ya inhaliw ya habaytoy pabango, ya ampag-alaga† hêñ suweldo hêñ mihay katawo ha mihay taon, ta indin dayi ha mangairap ya habaytoy pera?” Bayo hinuluk la ya.<sup>6</sup> Noa, wani Apo Jesus kanla, “Pata an-abalaêñ yo ya! Paulayan yo ya, ta ya dinyag na, ay taganán mangêd.<sup>7</sup> Hilay mairap ay panay yon kalamo, kabay ha hinon oras, ay mahawpan yo hila, noa, hiko ay a yon panay hêñ mapagkalamo.<sup>8</sup> Dinyag nay agyu nan daygêñ. Ha pamitugtug nan pabango kangko, ay nanad nay nan in-il-an ya lawini ko ha pamilbêng kangko no matsi kina.<sup>9</sup> Pakagilamêñ yo, ay-iri man ya legal bayri ha boon luta hêñ ipamwang ya Mangêd ya Habi, ay ungkatêñ etaman ya dinyag na, ta êmén ya a maliwaan.”

### *In-upit ni Judas Iscariote hi Apo Jesus (Mateo 26:14-16; Lucas 22:3-6)*

<sup>10</sup> Bayo nammita yay na hi Judas Iscariote, ya miha kanlan labinloway tagahonol ni Apo Jesus, ta êmén na ya mai-upit kanlan poon pari.<sup>11</sup> Hinumigla hila etaman ha pay-upit ni Judas kan Apo Jesus kanla, haka nangako hila ya dyanan la yan pera. Paubat hêñ habayto, ay ampangihip yay na hi Judas no ay-êmén na yan maidin ha gamêt la.

### *Hi Apo Jesus ay nampal-an hêñ pangkaêñ la ha Pistan Pangaligtas ha Egipto (Mateo 26:17-25; Lucas 22:7-13, 21-23; Juan 13:21-30)*

<sup>12</sup> Ha unan allon Pistan Puto ya ayn Pampaalsa ya allon pamatsi lan Israelita hêñ anak tupa, ya kênaêñ la hêñ habayton yabi ha Pistan Pangaligtas ha Egipto, ay kinotang ya hi Apo Jesus, hêñ labinloway tagahonol na, ya wanla, “Atoy labay moy legal ya pangil-anan naêñ hêñ pangkaêñ tamo

\* **14:1** Paskwa. Hêlkêñ ha panlêkan labay habiên hêñ habi di ha bokotan hêñ hata Bibliya. † **14:5** 300 denaryo ha habin Griego.

amêhén yabi ha Pistan Pangaligtas?” <sup>13</sup> Kabay in-utoh ni Apo Jesus ya loway tagahonol na, ya wana kanla, “Muna kaw ha balayan Jerusalem, pamanlumaténg yo, ay matupa yoy mihay lalaki ya ampantan banga ya nag lanêm. Pakihonolan yo ya ha bali ya howênêna, <sup>14</sup> ta habiên yo ha nag bali, ya êmén di, ‘Labay nan Mánoro ya itoro mo kannaên, no antoy kuwarto ya panganan nan kaên ha Pistan Pangaligtas, hên kalamo na kay ya tagahonol na.’ <sup>15</sup> Kabay ipahlék na kamoyu ya mihay mahlay ya kuwarto ya nakal-an ha tag-ay. Bayro yon il-an ya kaên tamo ha Pista.” <sup>16</sup> Nammita hilay nay loway tagahonol, haka natupad ya balang hinabi ni Apo Jesus kanla. Kabay in-il-an lay nay kaên ha Pista.

<sup>17</sup> Hêñ yabi yana, ay nag-tsipon hilay labinlowa hêñ kalamo la hi Apo Jesus, bayro ha mahlay ya kuwarto. <sup>18</sup> Hêñ ampangan hilay na, ay wana kanla ni Apo Jesus, “Pakagilamêñ yo, miha bayri ha kaaêm tamo, ay mangi-upit kangko.” <sup>19</sup> Namalagêhbêg ya nakêñ lan tagahonol na, haka wanlan balang miha kana, “Yarin hiko ya inungkat mo!” <sup>20</sup> Kabay hinabi ni Apo Jesus, “Hiyay miha kamoyun labinlowa. Ya kalamo kon ampami-tsíl-tsíl hêñ puto ha kolo, ay hiya ya mangi-upit kangko. <sup>21</sup> Hiko ya Taga-Langit, ya In-anak Tawo ay taganán matsi hêñ nanad ha impahulat ni Apo Namalyari ha Kahulatan hêñ haton lagi. Noa, taganán kaingalo ya mangi-upit kangko. Mangêñ kana, ay a yay na dayin in-anak.”

*Nangan hi Apo Jesus haka hilay labinloway tagahonol na hêñ pangkaêñ ha Pistan Pangaligtas*

(Mateo 26:26-30; Lucas 22:14-20; 1 Corinto 11:23-25)

<sup>22</sup> Kaban ampangan hila, ay nandampot hi Apo Jesus hêñ puto ta impahalamat nay habayto kan Apo Namalyari, haka na pino-potoh, bayo inggawang na kanlan tagahonol na, ta wana, “Habaytsi ya lawini ko, kowêñ yo ta kaên yo.” <sup>23</sup> Amêhén, nandampot yan pamminêman ya nag alak, ta impahalamat nay habayto kan Apo Namalyari. Bayo inggawang na kanla ta naubuh hilan ninêñ. <sup>24</sup> Haka wana, “Habain ay daya ko, ya mamoganggang ha pamatawad hêñ kasalanan hêñ kal-atan. Yabay ya nanad pinakapirma hêñ kahundoan ni Apo Namalyari kanlan pinili na hêñ mag-in kana. <sup>25</sup> Ta anhabiên ko kamoyu, ya a ko pon minêñ oman hêñ alak, angga ha allo hêñ inumêñ koy bayoy alak ha pamanlokop ni Apo Namalyari.” <sup>26</sup> Hêñ nahabi ni Apo Jesus ya habayto, ay nagkanta hilan pamagpuri kan Apo Namalyari, bayo nilumakat hila ha Tawtgug Olibo.

*Impamwang ni Apo Jesus ya habiên ni Simon Pedro ya a na ya muwang*

(Mateo 26:31-35; Lucas 22:31-34; Juan 13:36-38)

<sup>27</sup> Hêñ anlumakat hilay na, ay wani Apo Jesus kanlan tagahonol na, “Laamêhén ay lakwanan yo ko, ta impahulat ni Apo Namalyari ha Kahulatan, ya êmén di, ‘Patsêñ ko ya pastol, haka mapitatayak hilay nay tupa.’‡ <sup>28</sup> Noa, ha pangoman kon mabiyay, ay muna ko kamoyu ha probinsyan Galilea.” <sup>29</sup> Bayo wani Pedro, “Lakwanan ka man hêñ kalamo ko, ay a kata lakwanan.” <sup>30</sup> Hinabi ni Apo Jesus, “Pakagilamêñ mo, bayo mangkatsi ya manok hêñ katalwa, amêhén yabi, ay katatlo mon habiên ya a mo ko muwang.” <sup>31</sup> Noa, impalêkpêk ni Pedro, ya wana, “Matsi ko man hêñ kalamo mo, ay a ko habiên ya a kata muwang.” Êmbayro êt ya hinabi lan kaatag ya tagahonol na.

*Nanalangin hi Apo Jesus ha katanamanan Getsemani ha Tawtgug Olibo*

(Mateo 26:36-46; Lucas 22:39-46)

‡ 14:27 Zacarias 13:7.

<sup>32</sup> Hêñ nilumatêng hilay na ha katanamanan Getsemani, ay wani Apo Jesus kanlan tagahonol na, “Mikno kaw di kaban manalangin ako.” <sup>33</sup> Bayo pinakilamo ni Apo Jesus hi Pedro, haka hilay loway anak ni Zebedeo, ya hi Santiago haka hi Juan. Bayron nakadanas yan hadyay kalungkutan haka kabyatan. <sup>34</sup> Haka wani Apo Jesus kanla, “A kina agyu ya hadyay kalungkutan ha nakêm ko, ya nanad kinan ikamatsi. Di kaw pon haka paan kaw mabêlêw.” <sup>35</sup> Napaidayo ya kanla hêñ marayo-dayo ta nandoko yan nanalangin, ya no malyari dayi, ay a na ya paulayan ni Apo Namalyari hêñ magdanas hêñ hadyay pamagdusa, ya wana, <sup>36</sup> “Tatang ko ha langit, madyag mo ya hinoman. A mo ko dayin paulayan hêñ magdanas hêñ hatsi ya hadyay pamagdusa ya lumatêng kangko. Êmbayro man, ay alwan kalabayan ko ya mahonol, noa, ya kalabayan mo ya mahonol.”

<sup>37</sup> Hêñ nirêng ya, hêñ ubat nanalangin, ay nag-orong yay na ha andyanan lan Pedro. Nalatngan na hila hêñ angkabêlêw. Pinukaw na hi Simon Pedro, ya wana, “Simon, pata angkabêlêw ka? A ka man makapagpuyat hêñ agyan miha man ya oras?” <sup>38</sup> Paan yon pakilakwan ya bêlêw. Manalangin kaw, ta êmêñ kaw a mahambut hêñ tukso no ansubukêñ ya paniwala yo kangko. Nakal-an ya nakêm yo hêñ humonol, noa, a yo agyu.”

<sup>39</sup> Nag-orong yan oman hi Apo Jesus ha pinanalanginan na, hêñ inhalangin oman, ya inhalangin nay na. <sup>40</sup> Hêñ inorong na hilan oman ya tatlo, ay angkabêlêw hilay na êt, gawan a la matêêh hêñ magpuyat. Hêñ nimata hila, ay ayn hilan maihabi kan Apo Jesus gawan dêng-êy la.

<sup>41</sup> Hêñ katatlo na hilan inorong, ay wana kanla, “Angkabêlêw kaw pon êt hêñ ampagpainawa! Hukad ya! Ta nilumatêng ya oras ya hiko ya Taga-Langit, ya In-anak Tawo, ay i-upit kanlan makasalanan!” <sup>42</sup> Mita kitamina, ta anlumatêng ya mangi-upit kangko. Tupaên tamo ya!”

### *Ya pamandakêp kan Apo Jesus*

(Mateo 26:47-56; Lucas 22:47-53; Juan 18:3-12)

<sup>43</sup> Kaban ampaghabi ya pon hi Apo Jesus, ay main nilumatêng, ya kal-atan ya ampagamat kan Judas Iscariote ya miha kanlan labinloway tagahonol na. Hilay kal-atan ya nipag-almas hêñ êetak haka pamatok, ay in-utoh lan mánoron Kautuhan ni apo Moises, haka kanlan toa ya nag tungkulun ha bansa, haka kanlan ampmamaala kanlan pari. <sup>44</sup> Hi Judas ay nam-i kanla hêñ palatandaan, ya no hinoy aroêñ na, ay yabay ya dakpêñ lan gêtan hêñ pakabantayan.

<sup>45</sup> Tampol nilako ni Judas, hi Apo Jesus hêñ kinumusta hêñ main lamoy pamangaro. <sup>46</sup> Dinawhong la ya hi Apo Jesus hêñ dinakêp. <sup>47</sup> Noa, bat nanigpah ya miha kanlan tagahonol ni Apo Jesus, hêñ têkk hêñ mihay ipoh hêñ pinakapoon pari. <sup>48</sup> Amêhêñ, wani Apo Jesus kanlan ampipandakêp kana, “Andakpêñ yo ko hêñ main kalamoy êetak haka pammatoñ hêñ nanad pandakêp ha mapanyag karawakan. <sup>49</sup> Allo-allo atsi ko bahêñ kamoyu hêñ nanoro ha Templo, unin a yo ko dinakêp. Noa, dapat matupad ya Kahulatan ya impahulat ni Apo Namalyari.” <sup>50</sup> Bayo naubuh la yan nilakwanan hêñ tagahonol na hêñ nipamwayu.

<sup>51</sup> Amêhêñ, main mihay miyawhay ya nangamat kanlan Apo Jesus, ya nakatapih hêñ ayn panlalê. Dinakêp la yan nandakêp kan Apo Jesus, <sup>52</sup> noa, ha pamag-ulabtoh na, ay nabalagan na ya pinagtapih na, kabay nakalaboh ya tanan nuwayu.

### *Hi Apo Jesus ay in-arap ha Sanedrin*

(Mateo 26:57-68; Lucas 22:54-55, 63-71; Juan 18:13-14, 19-24)

<sup>53</sup> Gintan la hi Apo Jesus ha balin pinakapoon pari. Ta bayro hilan ni-tsitsipon hilay mánoron Kautuhan ni apo Moises, hilay toa ya nag tungkulun ha bansa, haka hilay ampamaala kanlan pari. <sup>54</sup> Hi Pedro ay nangamat kanla ha marayo-dayo angga ha lote hèn bali nan pinakapoon pari. Bayro yan nakiikno kanlan bantay ya ampanêngéy. <sup>55</sup> Hilay ampamaala kanlan pari haka ya boon Sanedrin, ay ampanapol hèn maibara la kan Apo Jesus, ta êmén la ya maipapatsi. Noa, ayn hilan matapol. <sup>56</sup> Mal-at ya bat hèn ampanistigos ya alwan pêtèg hèn tungkol kan Apo Jesus, noa, alwan akma ya panhabiên la.

<sup>57</sup> Bayo main ungnoy nirêng ya naghabin alwan pêtèg, ya wanla, <sup>58</sup> “Nagilam naêñ ya hinabi na ya hiraêñ nay Templo ya dinyag tawo, ta ha tatloy allo, ay maypairêng yan kaatag ya Templo ya alwan dyag tawo.” <sup>59</sup> Noa, alwa êt akma ya hinabi la.

<sup>60</sup> Amêhêñ, nirêng ya pinakapoon pari la ha arapan lan kal-atan, ta kinotang na hi Apo Jesus, ya wana, “Hino ya mahabi mo ha an-ibara la kamo? Pata a ka maghabi?” <sup>61</sup> Noa, minghan man, ay a ya naghabi hi Apo Jesus. Wanay na êt hèn pinakapoon pari kana, “Habiên mo kannaêñ no hika ya Mesias, ya Cristo, ya impangakon Mámilitgas, ya Anak ni Apo Namalyari.”

<sup>62</sup> Wana etaman ni Apo Jesus, “Awo, pêtèg ya hinabi mo. Haka lano, ay mahêlêk yo ko, ya Taga-Langit, ya In-anak Tawo, hèn nakaikno ha dapit panabtab ni Apo Namalyari ya Makapangyarihan. Haka ha pag-orong kon ubat ha langit, ay mahêlêk yo ko ha lêmm ya anlumatêng.” <sup>63</sup> Gawan huluk nan pinakapoon pari, ay ginihi nay sarili nan takop, ta wana, “A tamina kailangan hèn kaatag ya tistigos, ta nagilam tamina man ya hinabi na. <sup>64</sup> Nagilam yoy nay pamipantag nan sarili na kan Apo Namalyari! Yarin a nan ammusmusen hi Apo Namalyari ya tawo yan bêngat! Hino ya labay yon daygên kana?” Naubuh hilan naghabi ya dapat yan patsên.

<sup>65</sup> Hi Apo Jesus ay dinul-an haka pinagtutumbuk. Tinagpênan lay mata na, bayo wanla, “Habiên mo no hinoy nanumbuk kamo!” Pinagtatampaling la ya êt hèn ampipagbantay kana.

*Katatlo nan hinabi ni Pedro ya a na balay hi Apo Jesus  
(Mateo 26:69-75; Lucas 22:56-62; Juan 18:15-18, 25-27)*

<sup>66</sup> Kaban atsi ya hi Pedro hèn nakiikno hèn kalamo lan bantay ya ampanêngéy, ay napansin yan babayi ya mihay ipoh hèn pinakapoon pari.

<sup>67</sup> Pinuliah na ya, ta wana, “Hika ay kalamo êt ni Jesus ya taga-Nazaret.”

<sup>68</sup> Noa, hinabi ni Pedro, ya wana, “Alwa. A ko muwang ya anhabiên mo.” Bayo nagdayo yan pérad ha apoy hèn dinumani ha pag-awahan. Kanan habayto ay nangkatsi ya mihay manok. <sup>69</sup> A nabuyot ay napansin yay na êt hi Pedro, hèn habaytoy ipoh ya babayi, ya wana kanlan lalaki ya atsi bayro, “Habain ya lalaki, ay miha ya êt kanla!” <sup>70</sup> Noa, nagpuglaoh yay na êt hi Pedro. Hêñ a nabuyot, ay wanlan karani ni Pedro kana, “Siguradon hika ya kalamo ni Jesus, gawan taga-Galilea ka êt.” <sup>71</sup> Noa, hinabi ni Pedro, ya wana, “Alwa! Matsi ko man, ay taganán a ko ya muwang ya habain!” <sup>72</sup> Kaban ampaghabi ya pon, ay nangkatsi yay na êt ya manok. Bayo naihipan ni Pedro ya hinabi kana ni Apo Jesus, ya wana, “Bayo mangkatsi ya manok hèn katalwa, ay katatlo mon habiên, ya a mo ko muwang.” Kabay inumawah ya hi Pedro hèn hadyay tangih na.

<sup>1</sup> Dali allo, ay nagkamiha ya Sanedrin, ya angkaboo hên toa ya nag tungkulon ha bansa, hilay ampanoro hên Kautuhan ni apo Moises, haka hilay ampamaala kanlan pari, hên gêtan la hi Apo Jesus kan Gobernador Pilato. Kabay ginapoh la yan gintan kana. <sup>2</sup> Amêhén, kinotang ni Gobernador Pilato hi Apo Jesus, ya wana, “Awta? Hika ya ari hên Israelita?” Hinabi etaman ni Apo Jesus, “Hinabi mina, Gobernador.” <sup>3</sup> Mal-at ya an-ibara la kan Apo Jesus hên hilay ampamaala kanlan pari. Noa, a ya naghabi hi Apo Jesus. <sup>4</sup> Wanay na êt ni Gobernador Pilato kan Apo Jesus, “Awta a mon pakibatan ya an-ibara la kamo? A mo angkagilaman ya kal-atan an-ibara la kamo?” <sup>5</sup> Noa, a ya naghabi hi Apo Jesus. Kabay nag-êpapah hi Gobernador Pilato.

*Hi Apo Jesus ay hinatolan hên matsi ha koros  
(Mateo 27:15-26; Lucas 23:13-25; Juan 18:39-19:16)*

<sup>6</sup> Main kaugalian, ha balang Pistan Pangaligtas ha Egipto,\* ya an-ibuhan nan gobernador ya mihay nakahukul ya ampliên lan kal-atan. <sup>7</sup> Kanan habayto, ay nakahukul ya mihay lalaki ya nag langan Barrabas, gawan nakilamo ya kanlan nanalanghang ha gobyernon Roma, haka gawan namatsi yan tawo. <sup>8</sup> Dinumani hilay kal-atan kan Gobernador Pilato hên nakhabi kana ya honolên nay kaugalian, ya ha Pistan Pangaligtas, ay ibuhan nay mihay nakahukul. <sup>9</sup> Kabay wana kanla, “Labay yon ibuhan ko hi Jesus, ya Ari yon Israelita?” <sup>10</sup> Ta muwang ni Gobernador Pilato ya hi Apo Jesus, ay gintan lan ampamaala kanlan pari kana, gawan angkahêman la ya. <sup>11</sup> Noa, hilay ampamaala kanlan pari, ay nanulhul hên kal-atan ya pakikwaan la kan Gobernador Pilato ya ibuhan na hi Barrabas. <sup>12</sup> Kabay kinotang na hila ni Gobernador Pilato, “Hino awud ya labay yon daygén ko kan Jesus ya ambaêgén yon Ari yon Israelita?” <sup>13</sup> Kabay in-angaw la, “Ipako ya ha koros!” <sup>14</sup> Bayo kinotang ni Gobernador Pilato, “Awta? Hinoy kasalanan na?” Noa, impapakaangaw lay na êt, “Ipako ya ha koros!” <sup>15</sup> Hinonol nay kalabayan lan kal-atan, ta imbuhan na hi Barrabas. Impadapi na hi Apo Jesus, haka indin na ya kanla, ta êmén la ya ipapako ha koros.

*Hi Apo Jesus ay minusmus hên hundaloh  
(Mateo 27:27-31; Juan 19:2-3)*

<sup>16</sup> Hi Apo Jesus ay gintan lan hundaloh ha lalên balin gobernador, haka inubuh lan tsinipon ya kal-atan kapareho lan hundaloh. <sup>17</sup> Ha pammusmus la kana, ay pinatakopan la ya hên mahampat ya takop, ya nanad ha takop lan ari. Bayo nangwa hilan nanad tanyuong, ya pinanyag la yan korona, ya impakopya la ha ulo na. <sup>18</sup> Haka in-angaw ya êmén di, “Kumara dayi ya biyay hên Ari lan Israelita!” <sup>19</sup> Pinagpapatok lay ulo na hên tambo, haka la ya pinagdu-dul-an. Nandoko hila ha arapan na ha pamanggalang la waringan kana. <sup>20</sup> Pamakayari la yan minusmus, ay inalíh lay takop ari ya impatakop la kana, ta impatakop la kanan oman ya takop na. Bayo gintan la yay na, ta ipako la ya ha koros.

*Hi Apo Jesus ay impako ha koros  
(Mateo 27:32-44; Lucas 23:26-43; Juan 19:17-27)*

<sup>21</sup> Ha pammita lan hundaloh hên anggêtan hi Apo Jesus, hên ipako ha koros, ay natupa la ya tatang ni Alejandro haka ni Rufo, ya hi Simon ya taga-Cirene, ya ampamuli ha balayan. Dinakêp la ya ta impabalangaw kana ya koros ya paypakoan la kan Apo Jesus. <sup>22</sup> Inhundo lay pammita la, hên angga ha nilumatêng hila ha legal ya ambaêgén Golgota o Bungo. <sup>23</sup> Painêmén

\* **15:6** Paskwa. Hêlkên ha panlêkan labay habiên hên habi di ha bokotan hên hata Bibliya.

la ya dayin alak, ya dyag ha habaw ubas, ya naglamo hēn tambal ilab ya nag langan mira, noa, a na ininêm. <sup>24</sup> Amêhêñ, impako la yay na bayro ha koros. Bayo pinagpalabutan lay takop na, ta êmén la mamwangan no hino kanla ya makakwa. <sup>25</sup> Alas nuwebe hēn habayto, hēn matag-ay ya allo, hēn impako la hi Apo Jesus. <sup>26</sup> Bayro ha koros, ha ugton ulo na, ay nakahulat ya imbara la kana, “Hatsi ya Ari lan Israelita.” <sup>27</sup> Main êt loway lalaki, ya parehon mapanyag karawakan ya impako ha koros. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki ni Apo Jesus. <sup>28</sup> Ha dinyag la kan Apo Jesus, ay natupad ya impahulat ni Apo Namalyari ha Kahulatan ya wanana hulat, “Intad la yan mapanyag karawakan.”†

<sup>29</sup> Minusmus la yan anlumabah hēn main lamoy pamaméyêng, ya wanla, “Hika awud ya labay maniran Templo ni Apo Namalyari, ta ipairêng mon oman ha tatloy allo! <sup>30</sup> Munaoy kan ubat ha koros hēn iligtas moy sarili mo!” <sup>31</sup> Êmbayro êt ya pammusmus la kana hēn hilay mánoron Kautuhan ni apo Moises haka hilay ampamaala kanlan pari, ya wanla ha miha ta miha, “Inligtas nay kaatag, pata a na mailigtas ya sarili na! <sup>32</sup> No tumaoy yan ubat ha koros, habain ya Mesias, ya Cristo, ya Ari tamon Israelita, ay maniwala kitamo kana!” Minusmus ya êt, hēn hilay mapanyag karawakan ya nakapako hēn kalamo na.

### *Ya pangamatsi ni Apo Jesus*

(Mateo 27:45-56; Lucas 23:44-49; Juan 19:28-30)

<sup>33</sup> Hēn ugtoy nay allo, ay dinumiglêñ ya boon luta angga ha alas tres hēn maapon. <sup>34</sup> Hēn alas tres hēn maapon, ay impakaangaw ni Apo Jesus, ya wana, “Eloi, Eloi, lema sabachthani?” ya labay habiêñ, “Diyos ko, Apo Namalyari, pata nilakwanan mo ko?” <sup>35</sup> Hēn nagilam lan kaatag ya nakairêng bayro ya in-angaw na, ay êndat lan ambaêgêñ na hi Propeta Elias, kabay wanla, “Gilamêñ yo! Ambaêgêñ na hi Elias!” <sup>36</sup> Nuwayu ya miha kanla hēn namiptêñ hēn nanad bolak ha mihay hanga, ta indêrê na ha nangihoy alak, ya dyag ha habaw ubas, ta painêmén na ya hi Apo Jesus. Bayo wana, “Paulayan tamo ya raw. Hêlkêñ tamo no iligtas ya ni Elias!” <sup>37</sup> Amêhêñ, nanangaw hi Apo Jesus hēn hadyay hêkaw, bayo natsi yay na.

<sup>38</sup> Ya makugpa ya takop ya pinagpêñlan bayro ha lalê hēn Templo ha Jerusalem, ay biglan nawakwak hēn napibonak paubat ha babo angga ha aypa. <sup>39</sup> Hēn nahêlêk nay pangamatsi ni Apo Jesus hēn ampamaala kanlan hundaloh, ya atsi ha êtêb na, ay pinuri na hi Apo Namalyari, ya wana, “Pêtêg bay awud! Hiyay Anak ni Apo Namalyari!” <sup>40</sup> Main babayi bayro ya ampandungaw ha angkalyari. Kalamo la hi Maria Magdalena, hi Salome haka, hi Maria ya indo ni Jose boy hi Santiago ya ambaêgêñ Ali. <sup>41</sup> Hilay habaytoy babayi ay kalamo lan Apo Jesus hēn nanaglap kanla paubat hēn atsi hila pon ha probinsyan Galilea. Main pon êt hēn kal-atan babayi bayro, ya kala-kalamo la hēn angga ha Jerusalem.

### *Ya pamilbêñ kan Apo Jesus*

(Mateo 27:57-61; Lucas 23:50-56; Juan 19:38-42)

<sup>42</sup> Hēn ampinaboy nay allo, haka gawan ha kaugalian la, ya dapat milbêñ ya natsi, hēn bayo matata ya allo ha Biyernes, ya allon pamaglêan la para ha allon pamagsimba la, <sup>43</sup> ay makhaw ya nakêñ hēn nakiarap kan Gobernador Pilato, ya miha kanlan taga-balayan Arimatea, ya nag langan Jose. Hi Jose, ay miha kanlan kalamo ha Sanedrin, ya anggalangêñ hēn kapareho na,

† **15:28** Isaias 53:12.

ya ampangênggan ha pamanlumatêng hên pamanlokop ni Apo Namalyari. Pinakihabi nay bangkay ni Apo Jesus, ta iilbêng na dayi. <sup>44</sup> Nag-êpapah hi Gobernador Pilato hên nagilam na ya natsi yay na hi Apo Jesus. Kabay impabaêg nay ampamaala kanlan hundaloh, ta labay nan mamwangan no pêtêg yay nan natsi hi Apo Jesus. <sup>45</sup> Hêñ namwangan na ha ampamaala kanlan hundaloh ya pêtêg yay nan natsi hi Apo Jesus, ay nabay yay na etaman. Kabay impaulay nay na kan Jose ya bangkay ni Apo Jesus. <sup>46</sup> Nanaliw hi Jose hên makarang ya takop ya naputsi ya pinangêlkêl na hêñ bangkay ni Apo Jesus hêñ naiaypa nay na. Bayo inhowêñ na ya ha bayoy dinyag ya pay-ilbêngan ya lêyang. Pangayari, ay intulid nay hadyay hêlay bato hêñ panakap na ha bêbêy pinay-ilbêngan. <sup>47</sup> Hi Maria Magdalena haka hi Maria, ya indo ni Jose ay nakahêlêk hêñ pamilbêng la kan Apo Jesus.

## 16

### *Hi Apo Jesus ay nabiyyay oman (Mateo 28:1-8; Lucas 24:1-12; Juan 20:1-10)*

<sup>1</sup> Hêñ yabin Sabado, hêñ nayari ya allon pamagsimba la, ay nanaliw hêñ pabango, hi Salome, hi Maria Magdalena, haka Maria ya indo ni Jose haka hi Santiago, ta habaytoy pabango, ay itugtug la dayi ha bangkay ni Apo Jesus ha humonoy maranon. <sup>2</sup> Dali allo êt hêñ allon Dominggo, ay nagtaglo hila nay babayi ha pinay-ilbêngan, kabay hêñ nilumatêng hila, ay an-umawah ya allo. <sup>3</sup> Kaban atsi hila ha dann, ay nihahabi hila no hino ya mapakihabian la hêñ itulid ya bato ha bêbêy hêñ pinay-ilbêngan kana ta êmêñ hila makahowêñ. <sup>4</sup> Noa, hêñ hinlêk la, ay napansin la ya naitulid ya habaytoy hadyay hêlay bato. <sup>5</sup> Hêñ hinumwêñ hila ha pinay-ilbêngan, ay nahêlêk lay mihay miyawhay ya nakatakop hêñ naputsi ya nakaikno ha dapit panabtab, kabay hadyay limo lan babayi. <sup>6</sup> Noa, wana kanla, “Paan kaw malimo! Antapolêñ yo hi Apo Jesus, ya taga-Nazaret ya impako ha koros. Nabiyyay yan oman! Ayn ya di. Hêlkêñ yoy habaytsi ya pinaybul-ihan kana. <sup>7</sup> Mag-orong kaw, ta habiêñ yo kan Pedro haka kanlan kaatag ya tagahonol na, ya hi Apo Jesus ay nangoman nabiyyay, haka muna yay na kanla ha probinsyan Galilea hêñ nanad ha hinabi na kanla.” <sup>8</sup> Inumawah hila ha pinay-ilbêngan hêñ ampamêgpêg, haka pinarah lan nuwayun nagtaglo kanlan tagahonol. Gawan ha limo la, ay a la inhabi ya nalyari ha hinoman ya atsi ha dann.

### *Nagpahlêk hi Apo Jesus kan Maria Magdalena (Mateo 28:9-10; Juan 20:11-18)*

<sup>9</sup> [Hêñ habayto êt hêñ allon Dominggo, hêñ nabiyyay yan oman hi Apo Jesus, ya una nan pinagpahlêkan, ay hi Maria Magdalena, ya inalihan na hêñ hato hêñ pitoy narawak ya a angkahêlêk ya hinumapat kana. <sup>10-11</sup> Nagtaglo hi Maria Magdalena kanlan tagahonol ni Apo Jesus ya nalatêng nan ampalagêhbêg ya nakêm haka ampipanangih, ta hinabi na kanla ya nabiyyay yan oman hi Apo Jesus haka nahêlêk na ya. Noa, a hila naniwala ha hinabi na.

### *Nagpahlêk hi Apo Jesus kanlan loway tagahonol na (Lucas 24:13-35)*

<sup>12</sup> Panga-ubat hêñ habayto, ay nagpahlêk hi Apo Jesus kanlan loway tagahonol na, ya atsi ha dann hêñ palako ha mihay baryo, noa, kaatag ya itsura na. <sup>13</sup> Tampol hilan nag-orong ha Jerusalem ta imbalita la kanlan kapareho lan tagahonol, ya nahêlêk la hi Apo Jesus, noa, a hila pinaniwal-an.

*Nagpahlék hi Apo Jesus kanlan labinmihay tagahonol na  
(Mateo 28:16-20; Lucas 24:36-49; Juan 20:19-23; Dyag 1:6-8)*

<sup>14</sup> Bayo nagpahlék ya hi Apo Jesus kanlan labinmihay tagahonol na, kaban ampangan hila. Hinabyanan na hila, gawan kulang ya paniwala la kana, haka kakdêyan ulo la, ya a hila naniwala ha balita lan nakahélék kana ya hiyay nabiyay oman. <sup>15</sup> Wana kanla, “Ipamwang yo ha boon luta ya Mangéd ya Habi tungkol kangko. <sup>16</sup> Hilay maniwala ha Mangéd ya Habi, haka pabawtismo, ay miligtas ha kaparusaan hèn kasalanan la. Noa, hilay a maniwala ay parusaan ni Apo Namalyari. <sup>17</sup> Hilay ampaniwala kangko, ay madyanan ni Apo Namalyari hèn kapangyarihan hèn manyag kapapaépapah, hèn nanad ha mamaalíh hèn nangarawak ya a angkahélék, gawan ampanggamit hilan langan ko, haka maghabi hila ha bayoy habi ya a la pinag-aralan. <sup>18</sup> Makatalan hila man hèn utan ya makamatsi, o makainém man hèn hinon makamatsi, ay ayn malyari kanla. No ipalunto lay gamêt la, hèn ihalangin hilay nipaghakit, ay maalíh ya hakit la.”

*Hi Apo Jesus ay nag-orong ha langit  
(Lucas 24:50-53; Dyag 1:9-11)*

<sup>19</sup> Hèn nahabi nay na ya habayto ni Panginoon Jesus, kaban anhélkên la ya, ay antumag-ay yay na hèn palako ha langit, haka ya nikno ha dapit panabtab ni Apo Namalyari. <sup>20</sup> Hilay tagahonol na ay nipammitay na ha ayri man ya legal, hèn naypamwang hèn Mangéd ya Habi tungkol kana. Hi Panginoon Jesus ay ampamaptêg ha pamanoro la, gawan habaytoy kapapaépapah ya angkadyag la ha kapangyarihan na.]

## Ya Mangêd ya Habi tungkol kan Apo Jesu-Cristo ya inhulat ni Lucas

### *Paunan habi*

Ya Mangêd ya Habi tungkol kan Apo Jesu-Cristo ya inhulat ni Lucas kan Teofilo ay ampaypamwang ya hi Apo Jesu-Cristo ay yabay ya impangako, ya pinili ni Apo Namalyari hên mag-in Mámiligtas hên Israelita, haka hiyan bêngat ya mamilitas hên balang miha ya magpaligtas kana. Inhulat na êt ni Lucas ya hi Apo Jesu-Cristo ay dinyanan kapangyarihan hên Espiritu ni Apo Namalyari hên mamitoro hên Mangangêd ya Habi ha mangairap. Mapansin êt di ha inhulat ya haday kahiglaan lan anghel ha paypamwang ha pamanlumatêng ni Apo Jesu-Cristo.

Bayrin bêngat ha hulat ni Lucas ay mabáha ya tungkol ha anghel ya nipagkanta, haka ya tungkol ha pamaniraw lan pastol ha pangianak kan Apo Jesu-Cristo. Embayro êt bayrin bêngat ay mabáha ya tungkol ha nalyari hên hi Apo Jesu-Cristo ay gintan ha Templo hên hiyay anak pon, haka ya alimbawa ya tungkol ha Samaritano ya nakaingalo, haka ya makotaw ya miyawhay ya nanad nitama. Bayri ha hulat ay dinyanan hên alagá ya panalangan, haka ya Espiritu ni Apo Namalyari. Dinyanan êt alagá di ya pamanawop lan babayi kan Apo Jesu-Cristo, haka ya pamatawad ni Apo Namalyari ha kasalanan.

Hi Lucas êt ya nanulat hên hulat ya ambaêgén ya Dyag lan Apostol. Bayro nan impamwang ya pangapalyari kanlan tagahonol ni Apo Jesu-Cristo ubat yan nag-orong ha langit.

Kabooan hên pinakalaman

Umpisan hulat 1:1-4

Ya Pamipamwang hên tungkol ha pamianak kan Juan Bautista 1:5-2:52

Ya pamanoro ni Juan Bautista 3:1-20

Ya pamawtismo haka pamanukso kan Panginoon Jesus 3:21-4:13

Ya pamanoro ni Panginoon Jesus ha probinsyan Galilea 4:14-9:50

Ya pamanoro ni Panginoon Jesus ha kaatag ya legal paubat ha Galilea angga ha nilumatêng ya ha balayan Jerusalem 9:51-19:27

Ya tawlin parominggo hên biyay ni Panginoon Jesus ha luta 19:28-23:56

Ya pangabiyay oman ni Panginoon Jesus, ya pagpahlék nan oman, haka ya pamag-orong na ha langit 24:1-53

### *Ya natupad tungkol kan Apo Jesu-Cristo*

<sup>1</sup> Panggalangén kon Teofilo,

Mal-at ya nanulat hên tungkol ha natupad di kantamo ha bansen Israel.

<sup>2</sup> Ya inhulat la ay hatoy impamwang kannâen lan habaytoy nakahêlêk hên natupad. Hilay nakahêlêk hên natupad, ay namipamwang hên habi ni Apo Jesu-Cristo paubat hên babayo yan nanoro. <sup>3</sup> Hên naubuh kinan pinagaralan hên mangêd ya habayto, paubat hên una, ay naihipan ko etaman hên ipakangêd kon ihulat ya habayto para kamo, panggalangén kon Teofilo.

<sup>4</sup> Anhulatan kata ta êmén mo mapaptégan ya impamwang kamo.

### *Ya pamipamwang hên tungkol ha pamianak kan Juan Bautista*

<sup>5</sup> Ha panaon hên hi Arin Herodes ay manungkulau ha probinsyan Judea, nag mihay pari bayro, ya hi Zacarias. Hi Zacarias, ay miha kanlan pari ha pangkat ni Abias. Hiya haka ya ahawa na, hi Elisabet, ay parehon

kaapo-apoan ni Aaron, ya kauna-unaan pari lan Israelita. <sup>6</sup> Hata miahawa ay mangêd ha arapan ni Apo Namalyari. Hinonol lay balang utoh haka patakaran na. <sup>7</sup> Noa, ayn hilan anak gawan layuh hi Elisabet, haka toa hilay na.

<sup>8</sup> Amêhêñ, mihay allo, hêñ atag lan pangkat ni Zacarias hêñ maghuyo ha arapan ni Apo Namalyari, <sup>9</sup> langan ni Zacarias ay nabonut hêñ nanad ugali lan pari, ta êmêñ ya humwêñ ha Templo, ya pagsimbaan kan Apo Namalyari, êmêñ mamaahuk hêñ pabango ha pamagsimba kana. Kabay hinumwêñ yay na hêñ mimiha na <sup>10</sup> hêñ mamaahuk hêñ pabango, kaban atsi hila ha danin ilwangan ya kal-atan ya ampanalangin. <sup>11</sup> Namakonkaynaman, ay nag anghel ni Apo Namalyari ha dapit panabtab hêñ paybul-ihan\* paypaahukan nan pabango ni Zacarias. <sup>12</sup> Nakatsigag ya hi Zacarias hêñ nahêlêk nay anghel. Hadyay limo na.

<sup>13</sup> Noa, hinabi kana hêñ anghel, ya wana, “Paan kan malimo, Zacarias, ta nagilam ya panalangin mo. Hi Elisabet, ya ahawa mo, ay magkaanak ya kamo hêñ mihay lalaki ya pata-ngalanan yon Juan. <sup>14</sup> Hadyay higla mo. Haka mal-at ya kaatag ya humigla ha pamianak kana, <sup>15</sup> gawan hiyay dayêwêñ ni Apo Namalyari. Hata ianak, ya hi Juan, ay dapat a ya minêñ hêñ alak, haka hinon makalahing. Ya Espiritu ni Apo Namalyari ay humapat kana hêñ paubat ha hiyay ialêk. <sup>16</sup> Paorongêñ nay ihip hêñ mal-at ya Israelita kan Apo Namalyari, ya Diyos la. <sup>17</sup> Hiyay muna kanan Panginoon ha parehon hêkaw haka kapangyarihan ya indin kan apo Elias, ya mâmipamwang hêñ impaihip kana† ni Apo Namalyari hêñ hato. Paorongêñ nay pamanlugud ha balang mitataanak, haka na paorongêñ hilay anhumalanghang hêñ mag-in nanad kanlan mahonol kan Apo Namalyari. Daygêñ nay habayto ta êmêñ mail-an ya ihip lan pinili na, ha pamanlumatêng hêñ Panginoon.”

<sup>18</sup> Amêhêñ, hinabi ni Zacarias kanan anghel, ya wana, “Ay-êmêñ kon mapaptêgan no matupad ya hatsi? Mantêg kinan toa haka mantêg toa ya ahawa ko.” <sup>19</sup> Hinabi nan anghel, ya wana, “Hikoy Gabriel ya panay paniutoh ni Apo Namalyari. In-utoh na ko êmêñ ipamwang kamo ya hata mangangêd ya habi. <sup>20</sup> Noa, gawan a ka naniwala ha hinabi ko, ay a ka pon makahabi angga ha a pon matupad ya hata impamwang ko kamo ya taganán matupad.”

<sup>21</sup> Hilay kal-atan ya atsi ha danin ilwangan, ya ampanalangin, ya am-pangênggan kan Zacarias, ay nag-êpapah no awta hadyay buyot na ha lalê hêñ Templo. <sup>22</sup> Hêñ inumawah ya, ay a yay na makahabi. Panay singyal tana ya ginamit na. Kabay namwangan la ya nakahêlêk yan kapapaêpapah bayro ha lalêñ Templo. Taganán a yay na makahabi hi Zacarias.

<sup>23</sup> Hêñ nayari nay na ya pandaygêñ na ha Templo, ay nuli yay na. <sup>24</sup> A nabuyot ay nangalêk ya ahawa na, hi Elisabet. Mana ya tana ha bali la hêñ limay buwan. <sup>25</sup> Amêhêñ, naghabi ya hi Elisabet, ya wana,

“Dinambi ko ni Apo Namalyari. Dinyag nay hatsi ta êmêñ maalíh ya dêng-êy ko ha kapareho ko.”

### *Ya pamipamwang hêñ tungkol ha pamianak kan Apo Jesus*

<sup>26</sup> Amêhêñ, ha pang-anêm ya buwan hêñ buktot ni Elisabet, ay in-utoh ni Apo Namalyari hi Gabriel, ya habaytoy anghel, ha balayan Nazaret ha probinsyan Galilea <sup>27</sup> ha mihay dalaga ya nag langan Maria, ya kabaan ni Jose, ya mihay kaapo-apoan ni Arin David. <sup>28</sup> Hêñ nilumatêng ya kanlan Maria, ay hinabi nan anghel, ya wana, “Iningalwan ka ni Apo Namalyari

\* <sup>1:11</sup> Hêlkêñ ha panlêkan labay habiên hêñ habi. † <sup>1:17</sup> propeta.

kabay atsi ya kamo.” <sup>29</sup> Nakatsigag hi Maria ha hinabi na haka nan an-ihip-ihipén no hinoy labay nan habiēn hēn hatsi. <sup>30</sup> Noa, hinabi nan anghel kana, ya wana, “Paan kan malimo Maria, ta iningalwan ka ni Apo Namalyari. <sup>31</sup> Manggilam ka! Mangalék ka ta mamianak ka hēn lalaki ya pata-ngalanan mon Jesus. <sup>32</sup> Hiyay itag-ay ni Apo Namalyari haka hiyay baégén Anak ni Apo Namalyari. Idin kana ni Apo Namalyari ya panungkulán ya nanad panungkulán ni Arin David, ya mihay ninuno na. <sup>33</sup> Kabay hiyay manungkulán kanlan Israelita hēn ayn angga. Ya pamanlokop na ay ayn angga.”

<sup>34</sup> Kabay hinabi ni Maria ha anghel, ya wana, “Ay-êmén malyari ya hatsi, ha dalaga ko pon?” <sup>35</sup> Amêhén, wanán anghel ya êmén di, “Ya Espiritu ni Apo Namalyari ay lumaténg kamo ta ya kapangyarihan na ay magdahél kamo. Kabay ya ianak mo ay ayn hinon kasálañan haka baégén yan Anak ni Apo Namalyari. <sup>36</sup> Hêlkén mo hi Elisabet, ya kamag-anak mo. Muwang lan kalan ya layuh ya. Yan nangalék ya, haka atsi yay na ha pang-aném ya buwan hēn buktot na, agyan toa yay na. <sup>37</sup> Hinoman ya labay nan daygén ni Apo Namalyari, ay madyag na.”

<sup>38</sup> Kabay hinabi ni Maria, ya wana, “Humonol ako kan Apo Namalyari. Malyari dayi kangko ya hinabi mo.” Haka nag-alíh yay nay anghel.

### *Naniraw hi Maria kan Elisabet*

<sup>39</sup> A nabuyot, namarah-parah hi Maria ha bali lan Zacarias ha mihay balayan ha kabung-oyan hēn probinsyan Judea. <sup>40</sup> Hēn nilumaténg ya ha bali la, ay binaég na hi Elisabet, bayo hinumwén yay na. <sup>41</sup> Hēn nagilam ni Elisabet ya baég ni Maria, ay nagkimit ya anak ha bitoka na haka hinumapat kana ya Espiritu ni Apo Namalyari. <sup>42</sup> In-ikhaw nay habi na, ya wana, “Iningalwan ka kanlan kaganawan babayi haka ya ianak mo, ay iningalwan etaman ni Apo Namalyari. <sup>43</sup> Hino ko ta hiniraw ako hēn indo hēn Panginoon ko? <sup>44</sup> Nahén nagilam koy baég mo, ay nagkimit ya anak ha bitoka ko, gawan kahiglaan na. <sup>45</sup> Iningalwan ka gawan naniwala ka ya matupad ya impahabi kamo ni Apo Namalyari.”

### *Ya dururoh ni Maria*

<sup>46</sup> Amêhén, hinabi ni Maria, ya wana,  
“Ampurién ko hi Apo Namalyari.

<sup>47</sup> Mahigla ko gawan hiyay Mámiligtas ko.

<sup>48</sup> Hiyay purién ko, gawan miha ko man ya mairap ya ipoh na, ay dinambi na ko. Ubat amêhén angga-angga, ay baégén la ko hēn iningalwan,

<sup>49</sup> gawan ha kapapaépapah ya dinyag na kangko ni Apo Namalyari ya makapangyarihan haka banal.

<sup>50</sup> An-ingalwan nay balang ampagpalokop kana, paubat hēn unan panaon hēn angga-angga.

<sup>51</sup> Impakit nay kapangyarihan na hēn pinitatayak na hilay mapaglalang.

<sup>52</sup> Impaalíh nay manungkulán ha tungkulán la haka impatag-ay na hilay alwan mapaglalang.

<sup>53</sup> Pinabhoy na hilay matsin lonoh hēn mangangéd, haka impaalíh na hilay mabandi hēn ayn hino.

<sup>54</sup> Hinawpan na kitamo ya Israelita ya nagpalokop kana gawan hiyay main-galoén. Ha êmbayro ay tinupad nay pangako na

<sup>55</sup> Kan apo Abraham, ya ninuno tamo, boy kantamo haka kanlan kaganawan kaapo-apoan ni apo Abraham ya hawpan na kitamo hēn angga-angga!”

<sup>56</sup> Naglaéh hi Maria kanlan Elisabet hēn tatloy buwan bayo nuli yay na.

### *Ya pamianak kan Juan Bautista*

<sup>57</sup> Amêhén, hên nilumatêng ya oras hên panganak ni Elisabet ay in-anak nay mihay lalaki. <sup>58</sup> Hên namwangan lan kabaryo na haka kamag-anak na, ya impahlék kana ni Apo Namalyari ya ingangalo na, ay hinumigla hila etaman.

<sup>59</sup> Hên nilumatêng ya pangwalon allo ay naniraw hila kanlan Zacarias, ta tulien lay habaytoy anak. Pata-ngalanan la ya dayin Zacarias nanad hên toa na. <sup>60</sup> Noa, hinabi ni Elisabet, ya wana, “Alwan Zacarias, ta Juan ya ipata-ngalanan kana.” <sup>61</sup> Amêhén, hinabi la kana, “Ayn kanlan kamag-anak mo ya nag langan Juan.” <sup>62</sup> Bayo siningyalan la hi Zacarias no hinoy labay nan ipata-ngalanan ha anak na. <sup>63</sup> Namakwa yan mapanulatan ta nanulat ya hên hatsi, “Ya langan na ay Juan.” Naubuh hilan nag-êpapah. <sup>64</sup> Namakonkaynaman ay nakapaghabi yay nan oman, kabay pinuri na hi Apo Namalyari! <sup>65</sup> Nalimwan ya kabaryo la, haka hata nalyari ay impamwang ha kaganawan baryo ha kabung-oyan hên probinsyan Judea. <sup>66</sup> Habaytoy nalyari ay ampapakaihipên hên balang nakagilam ha nalyari, haka ampikokotang hila no hinoy mag-in kapalaran nan anak, ta malinaw kanla ya atsi kanan anak ya kapangyarihan ni Apo Namalyari.

### *Ya dururoh ni Zacarias*

<sup>67</sup> Amêhén, hinumapat kan Zacarias ya Espiritu ni Apo Namalyari. Impapêt na ya êmén di, ya wana,

<sup>68</sup> “Purién tamo hi Apo Namalyari, ya Diyos tamon Israelita. Iningalwan na kitamoy ampagsimba kana ta inakbus na kitamo.

<sup>69</sup> In-utoh na kantamo ya makhaw ya Mámiligtas, ya mihay kaapo-apoan ni Arin David, ya naghuyo êt kana.

<sup>70</sup> Habaytoy impamwang na kanlan banal ya mámipamwang hên an-ipaihip na kanla hên unan panaon. Hinabi la

<sup>71</sup> ya iligtas na kitamo kanlan kapatsi tamo, haka kanlan kaganawan an-humêmêk kantamo.

<sup>72</sup> Ingälwan nay ninuno tamo ta tuparêñ nay banal ya kahundoan na kanla,

<sup>73</sup> ya impangako na kan apo Abraham, ya ninuno tamo,

<sup>74</sup> ya iligtas na kitamo kanlan kapatsi tamo ta êmén mapaghuyuan tamo ya hên ayn limo,

<sup>75</sup> hên main kabanalan, haka hên main pamanhumonol kana angga ha anggaan biyay tamo ha luta.”

<sup>76</sup> Amêhén, hinabi ni Zacarias kanan anak na, ya wana,

“Hika, anak ko ay baêgén la kan propeta ni Apo Namalyari gawan muna ka ha Panginoon tamo ta êmén mo mail-an ya danan na ha pamanlumatêng na.

<sup>77</sup> Ipamwang mo ha pinili na, ya patawarêñ hila haka iligtas hila ha parusa ya lumatêng kanla gawan kasalanan la.

<sup>78</sup> Hatsi ay gawan ingangalo haka pamanlugud ni Apo Namalyari,

<sup>79</sup> ya mamahawang hên nanad allo kanlan atsi ha kariglêman, ya maranin matsi, haka hiyay mamitoro kantamo hên dann ya palakon kap-atêkbékan.”

<sup>80</sup> Amêhén, hinumlay ya hata anak haka nagkaihip. Napaidi ya ha kabalah-balahan, hên angga ha hiyay napabalay kanlan Israelita.

<sup>1</sup> Amêhén, hén habayton panaon, kaban hi Arin Herodes ay manungkulán ha probinsyan Judea, ya pinakapoon la ha Roma, ay hi Emperador Augusto. Namiutoh ya hi Emperador Augusto hén mangwa hilan sidula, ya balang miha ya angkasakopan na, ta êmén ya makakwan bayad hén buwih la. <sup>2</sup> Habaytsi ya unan utoh tungkol ha mangwan sidula ay nalyari hén hi Cirenio ay gobernador ha probinsyan Siria. <sup>3</sup> Kaganawan ya atsi ha lokop hén bansen Roma, anggan hilay Israelita, ay nammita ha balayan lan ninuno la, ta êmén mangwan sidula.

<sup>4</sup> Hi Jose, ya taga-balayan Nazaret, ha probinsyan Galilea, ay mihay kaapo-apoan ni Arin David ya in-anak ha balayan Betlehem ha probinsyan Judea. Kabay nammita hilan Jose hén mangwan sidula ha Betlehem. <sup>5</sup> Lamo na ya hi Maria, ya kabaan na, ya nabuktot gawan ha kapangyarihan nan Espiritu ni Apo Namalyari. <sup>6</sup> Kaban atsi hila bayro ha Betlehem, ay ampipaanan yay na. <sup>7</sup> Noa, gawan ayn dyanan ha bali lan tawo ay nagdahél hila tana ha paydyanan ayop. Bayron in-anak ya punganay na ya lalaki. Inupungan na yan takop, bayo na ya impakatuloy ha panganan hén baka ya nag aray.

<sup>8</sup> Habayton yabi, bayro êt ha danin Betlehem ay main nagdangho ya pastol ya ampipagbantay ha tupa la. <sup>9</sup> Namakonkaynaman ay nagpahlék kanla ya mihay anghel ni Apo Namalyari, haka hinumawang kanla ya kapahiléw ya kahampatan ni Apo Namalyari. Kabay hadyay limo la. <sup>10</sup> Noa, wanán anghel, “Paan kaw malimo ta ampantan kataw hén mangéd ya habi ya mamahigla hén balang miha. <sup>11</sup> In-anak amêhén yabi ya Mesias, ya Cristo, ya impangakon Mámilitas, ya Panginoon. Bayri yan in-anak ha Betlehem, ya balayan ni Arin David. <sup>12</sup> Êmén di yo yan mamwangan. Matsikap yoy mihay kapianak ya inupong haka nakakatuloy ha panganan hén baka ya nag aray.”

<sup>13</sup> Namakonkaynaman ay nagpahlék kanla ha danin anghel ya mal-at ya kalupa na ya ubat ha langit ya ampagpuri kan Apo Namalyari hén êmén di, <sup>14</sup> “Purién hi Apo Namalyari ya atsi ha langit. Haka magkamain dayin kapatékbékan ya hilay atsi ha luta ya ampamahigla kana.”

<sup>15</sup> Hén nakabita hilay nay anghel paorong ha langit, nihahabi hilay pastol. “Mita kitamina ha Betlehem ta êmén tamo mahélék ya hata nalyari ya impamwang ni Apo Namalyari kantamo.” <sup>16</sup> Kabay pinarah-parah lan nammita. Natsikap la hi Maria haka hi Jose. Habaytoy kapianak ay nakakatuloy ha panganan hén baka ya nag aray. <sup>17</sup> Hén nahélék lay kapianak, ay impamwang lay nay hinabi nan anghel ya tungkol kana. <sup>18</sup> Naubuh hén nikaépapah ya nakagilam hén habaytoy habi lan pastol. <sup>19</sup> Nitaném ha ihip ni Maria ya hata habi la haka na pinag-ihip-ihipan. <sup>20</sup> Kaban ampag-orong hilay pastol, ay ampurién la hi Apo Namalyari bayro ha nagilam la haka nahélék la gawan napaptégan lay hinabi nan anghel.

### *Pinata-ngalanan hi Apo Jesus*

<sup>21</sup> Hén waloy nay allo nan hata anak, hiya ay tinuli haka pinata-ngalanan Jesus, ya langan ya indin nan anghel hén a ya pon in-alék.

### *Hi Apo Jesus ay gintan ha Templo*

<sup>22</sup> Amêhén, nilumaténg ya ikaapatapoy allo ni Maria hén ubat nanganak. Habaytsi ya allo hén pamaglinis\* kanla, ay hinumwén hila ha Templo ha Jerusalem hén pamanhumonol ha Kautuhan ni apo Moises. Gintan la ya etaman hi Jesus ta iarap kan Apo Namalyari.† <sup>23</sup> Dinyag lay habayto hén

\* <sup>2:22</sup> Ha Kautuhan lan Israelita ay nakahulat ya narémék ya balang indo hén 40 ya allo hén ubat nanganak. Ha ikaapatapoy allo ay mamiátang ya ha pagsimbaan la bayo malinis yay na êt. † <sup>2:22</sup> Exodus 13:2.

pamanhumonol ha nakahulat ha Kautuhan ni Apo Namalyari ya balang punganay ya lalaki ay idin kana, ta êmén hila maghuyo kana. <sup>24</sup> Amêhén, namiátang hila gawan Kautuhan ni Apo Namalyari ya wanana hulat, “Loway kokolok o loway oymok hên pati-pati.”

<sup>25</sup> Amêhén, main mihay lalaki ha balayan Jerusalem ya nag langan Simeon. Hi Simeon ay mangéd ha arapan ni Apo Namalyari haka hinonol nay Kautuhan na. Pan-êngganan nay pamilitas kanlan Israelita haka atsi kana ya Espiritu ni Apo Namalyari. <sup>26</sup> Impamwang kana hên Espiritu ni Apo Namalyari, ya a ya matsi, angga ha a na mahélék ya Mesias, ya Cristo, ya impangakon Mámilitas ya pinili ni Apo Namalyari hên mamaala. <sup>27</sup> Amêhén, impalako ya ha Templo hên Espiritu ni Apo Namalyari. Kaban atsi ya bayro, inhowén lan Maria ya bingot ya hi Jesus ta honolén lay Kautuhan. <sup>28</sup> Kingwa ni Simeon ya bingot hên inampon bayo pinuri na hi Apo Namalyari hên êmén di, <sup>29</sup> “Apo Namalyari, tinupad moy pangako mo. Malyari kinan matsi hên napatékbék, <sup>30</sup> gawan nahélék kinay Mámilitas ya impangako mo, <sup>31</sup> ya inlén mo para ha kaganawan bansa. <sup>32</sup> Kaalimbawaan nay hawang ya mamahawang hên dann lan alwan Israelita hên palako kamo. Gawan hata anak, ay dayéwén hilay Israelita.”

<sup>33</sup> Nag-épapah hi Maria haka hi Jose ha hinabi ni Simeon ya tungkol ha bingot. <sup>34</sup> Inhalangin na hila ni Simeon bayo na hinabi kan Maria ya indo ni Jesus, ya wana, “Hata anak ay mag-in ikaparusa o ikaligta hên mal-at ya Israelita. Hiyay palatandaan ya ubat kan Apo Namalyari ya halanghangén lan kal-atan. <sup>35</sup> Kabay mipamwang ya laman ihip hên kal-atan. Haka kamo, Maria, lumaténg ya kamo ya hadyay kalungkutan, ya nanad nilatog hên êtak ya nakém mo.”

<sup>36</sup> Amêhén, atsi ya êt ha pagsimbaan ya mihay mámipamwang hên an-ipaihip kana‡ ni Apo Namalyari ya nag langan Ana, ya anak ni Fanuel, ya kaapo-apoan ni Aser. Hi Ana ay toay na. Pitoy taon hilan nilamo hên ahawa na <sup>37</sup> bayo ya nabawo. Amêhén walumpo boy apat ya taon nay na. Panay yan atsi ha Templo hên ampagsimba kan Apo Namalyari hên allo-yabi. Ha panalangin na ay a na angkadambi ya pangan na. <sup>38</sup> Sakton habayto, ay napakarani ya kanla hên ampahalamatan na hi Apo Namalyari. Impamwang na êt ya tungkol kanan hata bingot kanlan balang ampangênggan hên pamibuhan kanlan Israelita.

### *Ya pag-orong la ha balayan Nazaret*

<sup>39</sup> Amêhén, hên nahonol lay nay balang utoh hên tungkol ha mitaindo ha pamanhumonol ha Kautuhan ni Apo Namalyari, ay nag-orong hilan Maria ha balayan Nazaret, ya balayan la, ha probinsyan Galilea. <sup>40</sup> Amêhén, hi Jesus ay hinumlay, nagkaihip, haka nag-in matalino gawan atsi kana ya ingalo ni Apo Namalyari.

### *Hi Jesus ay ampikno hên kalamo lan ampamitoro ha Templo*

<sup>41</sup> Balang taon main pista hilay Israelita ha Jerusalem, ta êmén la maihipan ya pamilitas ni Apo Namalyari kanlan ninuno la ha bansan Egipto. Nakau-galian lan Maria haka hi Jose hên makipista. <sup>42</sup> Hên nag labinloway taon hi Jesus, ay nakipista hilay na êt, haka gintan la hi Jesus. <sup>43</sup> Hên nayari ya pista, ha pamag-orong la ay napaibalag ya ha Jerusalem hi Jesus ya anak la. Noa, a la muwang hên toa na. <sup>44</sup> Éndat la no kalamo la ya ha kal-atan ya namapayabi hên ampita hên ampag-orong ha bali la. Habaytoy yabi, ay tinapol la ya ha kamag-anak la haka kabalay la. <sup>45</sup> Amêhén, hên a la

---

‡ <sup>2:36</sup> propeta.

ya matapol ay nag-orong hilay na êt ha Jerusalem ta tapolên la ya bayro. <sup>46</sup> Hêñ ikatloy nan allo hêñ panapol la kana, ay natapol la ya ha Templo hêñ kalamo lan mánoro. Ampanggilam ya kanla, haka ya ampangotang kanla. <sup>47</sup> Hilay nakagilam habi na ay nipag-êpapah ha kagalingan ihip na haka ha kagalingan pamakibat na ha kotang la. <sup>48</sup> Nag-êpapah hilan Maria haka hi Jose hêñ nahêlêk la ya. “Anak ko,” wani Maria kana, “awta dinyag moy hatsi kannaén? Pinayagah mo kay hêñ nanapol kamo.” <sup>49</sup> Amêhêñ, wani Jesus kanla, ya wana, “Pata antapolên yo ko, Indo? Awta a yo muwang ya kailangan hêñ atsi ko di ha balin Tatang ko?” <sup>50</sup> Noa, a la naintindihan ya hinabi na kanla.

<sup>51</sup> Amêhêñ, nakihonol yay na kanla hêñ nuli ha balayan Nazaret ta dinyag na ya kaganawan labay lan toa na. In-ubuh nan intanêñ ni Maria ya nalyari ha ihip na. <sup>52</sup> Hi Jesus ay nagkaihip haka hinumlay. Hinumigla kana hi Apo Namalyari haka hilay tawo.

### 3

#### *Ya panoro ni Juan Bautista*

(Mateo 3:1-12; Marcos 1:1-8; Juan 1:19-28)

<sup>1</sup> Hêñ nakalabah ya ungnoy taon, ay ikalabinlimay taon hêñ pamamaala nan pinakapoon ha bansom Roma, ya hi Emperador Tiberio. Ya gobernador ha Judea, ay hi Poncio Pilato. Ya gobernador ha Galilea, ay hi Herodes Antipas, haka ya kapotoh pohêl na, ya hi Felipe ay gobernador ha Iturea haka Traconite. Hi Lisanias etaman ay gobernador ha Abilinia. <sup>2</sup> Ya pinakapoon pari lan Israelita, ay hi Anas haka hi Caifas. Hêñ habayton panaon, ay ampaidi ya ha legal ya kabalah-balahan hi Juan, ya anak ni Zacarias, haka bayron nilumatêng kana ya utoh ni Apo Namalyari, <sup>3</sup> kabay nammita yay na hêñ nanoro ha mitatalipay hêñ Ilog Jordan. Impamwang na kanlan dinumanî kana, ya dapat lan paghêhêan ya pamanyag lan kasalanan, bayo dapat pabawtismo hila, haka patawarêñ hila bayto ni Apo Namalyari. <sup>4</sup> Ha dinyag ni Juan, ay natupad ya hinabi ni Propeta Isaias ya mihay mámipamwang hêñ an-ipaihip kana ni Apo Namalyari hêñ hato. Ya habaytoy hinabi na ay nakahulat, ya êmêñ di,

“Main ampan-angaw ha legal ya kabalah-balahan, ya wana kanlan kal-atan  
ya naka-tsipon,

‘Il-an yoy nakêm yo ha pamanlumatêng hêñ Panginoon,  
Ya nanad ha pamil-an hêñ dann ha pamanlumatêng hêñ mihay matag-ay ya  
manungkuluan.

Itoynung yoy danan na.

<sup>5</sup> Taphonan yoy kaganawan nalêhêk, haka patagêñ yoy kaganawan tawgtug  
haka bung-oy.

Itoynung yoy nabalingkêwêd ya dann, haka yo patagêñ ya nikakikilhung ya  
dann.

<sup>6</sup> Ya balang miha ay makahêlêk hêñ pamilitas ya daygêñ ni Apo Namalyari.’”\*

<sup>7</sup> Mal-at ya dinumani kan Juan ta êmêñ hila pabawtismo. Wana kanla, “Nanad kaw utan ya makamatsi. Hinoy namipamwang kamoyu hêñ tu-makah ha parusa ya lumatêng? <sup>8</sup> Daygêñ yo ya pamaptêg hêñ naghêhê kaw ha pamanyag yon kasalanan. Paan kaw mangihip hêñ mailigtas kaw ha parusa ni Apo Namalyari, gawan hi apo Abraham ay ninuno yo. Agyan hata bato, ay madyag ni Apo Namalyari hêñ kaapo-apoan ni apo Abraham.

\* <sup>3:6</sup> Isaias 40:3-5.

<sup>9</sup> Ya pamanatol ni Apo Namalyari ay nanad ha payakol ya naitag-ay hēn mihay ampamotoh hēn kayo. Balang kayo ya a ampanagēy hēn mangangēd, ay potohēn ta iulam ha apoy. Haka hikaw ay maialimbawa ha kayo ya a ampanagēy hēn mangangēd.”

<sup>10</sup> Amêhēn, hinabi lan kal-atan, ya wanla, “No êmbayro, ay hino ya dapat naêñ daygêñ?” <sup>11</sup> Hinabi ni Juan, ya wana, “No main kaw loway takop, ay idin yoy miha kanan ayn. Êmbayro êt ya daygêñ yo ha kaganawan maékan.” <sup>12</sup> Agyan hilay máningil buwih ay dinumani kan Juan ta êmén hila pabawtismo. Naghabi hila kan Juan, ya wanla, “Hino ya dapat naêñ daygêñ?” <sup>13</sup> Amêhēn, hinabi na kanla, ya wana, “Paan kaw mangwa hēn sobra ha an-ipahingil kamoyu hēn gobyerno.” <sup>14</sup> Main hundaloh bayro, ya nangotang, “Ay-êmén kay, hinoy dapat naêñ daygêñ?” Hinabi ni Juan kanla, “Paan kaw mangwa hēn alwan kamoyu ha pamilit o ha pamara hēn alwan pêtêg. Dapat mahigla kaw ha suweldo yo.”

<sup>15</sup> An-êngganan lan tawo ya marani yay nan lumatêng ya Mesias, ya Cristo, ya impangakon Mámiligas ya pinili ni Apo Namalyari hēn mamaala ya impangako. Kabay an-ihip-ihipêñ la no hi Juan ya habaytoy impangako, o no alwa. <sup>16</sup> Kabay hinabi ni Juan kanla, “Ya Mesias, ya Cristo, ya Mámiligas, ay makapangyarihan kangko. Agyan mangokal hēn hêl pag-apin bitsih na, ay ayn akon karapatan, ta matag-ay ya tungkulna. Hikoy ampamawtismo kamoyu ha lanêm. Noa, hiyay mamawtismo kamoyu ha Espiritu ni Apo Namalyari haka ha apoy. <sup>17</sup> Hiyay mamipapawa hēn mapanyag kangêran kanlan mapanyag karawakan hēn nanad ha mihay ampamalohboh. Ta ya trigo ya binalohbohan ay ihmpan, noa, ya apa haka tatap ay ulamêñ ha apoy ya a angkaparê.”

<sup>18</sup> Mal-at pon ya in-aral ni Juan kanlan kal-atan, ha pamipamwang na kanla ya Mangangêd ya Habi. <sup>19</sup> Noa, hi Herodes Antipas, ya gobernador ha probinsyan Galilea, ay hinabyanan ni Juan hēn mahakit, gawan bat nan pinag-ahawa hi Herodias, ta hi Herodias, ay ahawa ni Felipe, ya ali ni Herodes Antipas, haka gawan mal-at êt ya nangarawak ya pandaygêñ ni Herodes Antipas. <sup>20</sup> Napahanan êt ya nangarawak ya dyag na hēn impahukul na hi Juan.

*Ya pamawtismo kan Apo Jesus  
(Mateo 3:13-17; Marcos 1:9-11)*

<sup>21</sup> Hēn a ya pon impahukul hi Juan, hēn naubuh na hilan binawtismoan ya labay hēn pabawtismo, ay nagpabawtismo hi Apo Jesus etaman. Kaban ampanalangin hi Apo Jesus, hēn ubat nagpabawtismo, ay nagloat ya langit, <sup>22</sup> bayo inumaypa kana ya Espiritu ni Apo Namalyari hēn nanad ha mihay pati-pati. Main habi ya ubat ha langit, ya wana, “Hika ya panlugurên kon Anak ya ampamahigla kangko.”

*Ya ninuno ni Apo Jesus  
(Mateo 1:1-17)*

<sup>23</sup> Mag tatlumpo ya taon hi Apo Jesus hēn nag-umpisa yan nanoro. Ya muwang lan tawo ay hiya ay anak ni Jose. Hi Jose ay anak ni Eli. <sup>24</sup> Hi Eli ay anak ni Matat, hi Matat ay anak ni Levi, hi Levi ay anak ni Melqui, hi Melqui ay anak ni Janai, hi Janai ay anak ni Jose, <sup>25</sup> Hi Jose ay anak ni Matatias, hi Matatias ay anak ni Amos, hi Amos ay anak ni Nahum, hi Nahum ay anak ni Esli, hi Esli ay anak ni Nagai, <sup>26</sup> Hi Nagai ay anak ni Maat, hi Maat ay anak ni Matatias, hi Matatias ay anak ni Semei, hi Semei ay anak ni Josec, hi Josec ay anak ni Joda, <sup>27</sup> Hi Joda ay anak ni Joanan, hi Joanan ay anak ni Resa, hi

Resa ay anak ni Zorobabel, hi Zorobabel ay anak ni Salatiel, hi Salatiel ay anak ni Neri,<sup>28</sup> Hi Neri ay anak ni Melqui, hi Melqui ay anak ni Adi, hi Adi ay anak ni Cosam, hi Cosam ay anak ni Elmadam, hi Elmadam ay anak ni Er,<sup>29</sup> Hi Er ay anak ni Josue, hi Josue ay anak ni Eliezer, hi Eliezer ay anak ni Joram, hi Joram ay anak ni Matat, hi Matat ay anak ni Levi,<sup>30</sup> Hi Levi ay anak ni Simeon, hi Simeon ay anak ni Juda, hi Juda ay anak ni Jose, hi Jose ay anak ni Jonan, hi Jonan ay anak ni Eliaquim,<sup>31</sup> Hi Eliaquim ay anak ni Melea, hi Melea ay anak ni Mennan, hi Mennan ay anak ni Matata, hi Matata ay anak ni Natan, hi Natan ay anak ni David,<sup>32</sup> Hi David ay anak ni Jesse, hi Jesse ay anak ni Obed, hi Obed ay anak ni Booz, hi Booz ay anak ni Salmon, hi Salmon ay anak ni Naason,<sup>33</sup> Hi Naason ay anak ni Aminadab, hi Aminadab ay anak ni Admin, hi Admin ay anak ni Arni, hi Arni ay anak ni Esrom, hi Esrom ay anak ni Farez, hi Farez ay anak ni Juda,<sup>34</sup> Hi Juda ay anak ni Jacob, hi Jacob ay anak ni Isaac, hi Isaac ay anak ni Abraham, hi Abraham ay anak ni Terah, hi Terah ay anak ni Nahor,<sup>35</sup> Hi Nahor ay anak ni Serug, hi Serug ay anak ni Reu, hi Reu ay anak ni Peleg, hi Peleg ay anak ni Eber, hi Eber ay anak ni Sala,<sup>36</sup> Hi Sala ay anak ni Cainan, hi Cainan ay anak ni Arfaxad, hi Arfaxad ay anak ni Shem, hi Shem ay anak ni Noe, hi Noe ay anak ni Lamec,<sup>37</sup> Hi Lamec ay anak ni Matusalem, hi Matusalem ay anak ni Enoc, hi Enoc ay anak ni Jared, hi Jared ay anak ni Mahalaleel, hi Mahalaleel ay anak ni Kenen,<sup>38</sup> Hi Kenen ay anak ni Enos, hi Enos ay anak ni Set, hi Set ay anak ni Adan, hi Adan ay anak ni Apo Namalyari.

## 4

*A ya napatuksó hi Apo Jesus hén antuksoén ya ni Satanas, ya diyablo  
(Mateo 4:1-11; Marcos 1:12-13)*

<sup>1</sup> Hén ubat yan nagpabawtismo hi Apo Jesus ha Ilog Jordan, ay hiyay pinaihipan hén Espiritu ni Apo Namalyari, ya hinumapat kana, hén maglaéh ya pon ha legal ya kabalah-balahan. <sup>2</sup> Atsi ya bayro hén apatapo ya allo, hén antuksoén ni Satanas. Habaytoy apatapo ya allo, ay a ya nangan. Kabay hén nalabah ya habayto, ay angkablay yay nan lonoh.

<sup>3</sup> Hinabi ni Satanas kan Apo Jesus, ya wana, “No hika ya Anak ni Apo Namalyari, ay daygén mon puto ya hata bato.” <sup>4</sup> Améhén, hinabi ni Apo Jesus kana, ya wana, “Ha habi ni Apo Namalyari ay nakahulat ya êmén di, ‘Ya tawo ay ahé angkabiyay ha kaén bêngat.’ ”

<sup>5</sup> Pangayarin habayto, ay gintan ya ni Satanas hi Apo Jesus ha bapan tagay ya legal, ta saguli nan impahlék ni Satanas kana ya balang bansa ha boon luta. <sup>6</sup> Biha hinabi na kan Apo Jesus, ya wana, “Idin ko kamo ya tungkulun haka pibandian hén habaytoy bansa. Naidin kangko ya habayto kabay maidin ko ha hinon labay kon dyanan. <sup>7</sup> No simbaén mo ko, ay iubuh kinan idin kamo ya habayto.” <sup>8</sup> Noa, hinabi ni Apo Jesus, ya wana, “Hatsi ya nakahulat ha habi ni Apo Namalyari: ‘Simbaén moy Panginoon mo, hi Apo Namalyari, ta hiyan bêngat ya huyuén mo.’ ”

<sup>9</sup> Pangayari, ay gintan ya ni Satanas hi Apo Jesus ha balayan Jerusalem ha têngél hén Templo, haka na hinabi ni Satanas, ya wana, “No pêtég hén hika ya Anak ni Apo Namalyari ay magnabo kan paubat di,<sup>10</sup> ta êmén di ya nakahulat ha habi ni Apo Namalyari, ‘Iutoh ni Apo Namalyari hilay anghel na hén mangillag kamo,’ <sup>11</sup> haka ‘Halorén la ka êmén a mahakitan ya bitsih mo ha bato.’ ” <sup>12</sup> Noa, hinabi ni Apo Jesus, ya wana, “Nakahulat êt ha Kahulatan ya impahulat ni Apo Namalyari, ‘Paan mon subukén ya Panginoon mo, hi Apo

Namalyari.’ ”<sup>13</sup> Amêhén, hên nayari nay na ni Satanas ya balang pamanukso na, ay nag-alíh yay na pon.

*Ya unan panoro ni Apo Jesus ha probinsyan Galilea  
(Mateo 4:12-17; Marcos 1:14-15)*

<sup>14</sup> Hi Apo Jesus ay nag-orong ha probinsyan Galilea ha kapangyarihan hên Espiritu ni Apo Namalyari. Ya tungkol kana ay nibahwag ha mamalibot hên habaytoy legal. <sup>15</sup> Nanoro ya ha balang sinagoga haka hiyay dinayêw hên balang miha.

*A ya pinaniwal-an hi Apo Jesus ha balayan Nazaret, ya pinanhumlayan na  
(Mateo 13:53-58; Marcos 6:1-6)*

<sup>16</sup> Amêhén, nag-orong ya hi Apo Jesus ha balayan Nazaret, ya pinanhumlayan na. Hinumwêna ya ha sinagoga la hên nanad panay nan pandaygên no allon pamagsimba. Bayo, nirêng yan namahan habi ni Apo Namalyari. <sup>17</sup> Ya naka-tsili-tsili ya papel ya pinanulatan hên hinabi ni Propeta Isaias ya mihay mâmipamwang hên an-ipaihip kana ni Apo Namalyari, ay inggawang kana. Binuhal nay naka-tsili-tsili bayo na binaha ya nakahulat, ya wana,

<sup>18</sup> “Atsi kangko ya Espiritu ni Apo Namalyari gawan hikoy pinili na hên mamitoro hên Mangangêd ya Habi na kanlan mangairap.

In-utoh na ko ta êmén ko ipamwang kanlan nakahukul ya ibuhan hila, haka kanlan buwag ya makahêlêk hila, haka kanlan ampairapan ya, a hilay nan pairapan,

<sup>19</sup> haka êmén ipamwang ya nilumatêng ya pamiligtas ni Apo Namalyari.”\*

<sup>20</sup> Amêhén, hên nai-tsili-tsili nay na êt ya hatoy hulat, ay in-orong na kanan ampanawop bayro ha sinagoga bayo ya nikno hên nanoro kanla. Namakahêlêk kana ya kaganawan ya atsi bayro ha sinagoga. <sup>21</sup> Bayo hinabi na kanla, ya wana, “Amêhén kaban ampanggilam kaw kangko ay natupad ya hatoy binaha ko ubat ha Kahulatan ya impahulat ni Apo Namalyari.”

<sup>22</sup> Dinayêw ya hên balang miha ta nag-êpapah hila ha mangangêd ya habi na. Noa, ampihababi hila ya wanla, “Daptay anak ni Jose ya kabalayan tamo ya habaytsi!”

<sup>23</sup> Kabay wani Apo Jesus kanla, “Siguradon ungkatêng yo kangko ya habaytsi ya kahabian, ‘Doktor, tambalan moy sarili mo. Ya nabalitaan naén ya kapapaêpapah ya dinyag mo ha balayan Capernaum, ay daygên mo di etaman ha sarili mon legal.’ ”<sup>24</sup> Bayo wanay na êt ni Apo Jesus, “Pakagilamêng yo, ya mihay propeta ni Apo Namalyari, ay a ampansinêng ha sarili nan balayan. <sup>25</sup> Hêna panaon ni Propeta Elias, ay ayn maêkan gawan ayn uran hên tatloy taon haka anêm ya buwan. Hêna hato, ay mal-at ya babayi ya bawo di ha bansom Israel, <sup>26</sup> noa, hi Propeta Elias ay a ya in-utoh ni Apo Namalyari hên manawop kanla. Hiyay in-utoh kanan mihay babayin bawo ha Sarepta ya sakop hên Sidon. <sup>27</sup> Hêna panaon ni Propeta Eliseo, ay kal-atan ya nag hakit hêna ketong di ha bansom Israel, noa ya inalihan nan bêngat hakit, ay hi Naaman ya taga bansom Siria.”

<sup>28</sup> Hêna nagilam lay hinabi ni Apo Jesus, ay naubuh hilan nagtulaw ya atsi bayro ha sinagoga. <sup>29</sup> Namakonkaynaman ay nirêng hila, ta impaplag la ya ha balayan, haka impalako la ya ha palaypay hêna bêngaw ha bung-oy ya pinaypairêngan balayan la, ta itoron la ya dayi. <sup>30</sup> Noa, nammita ya hêna nagdann ha pibonakan la.

\* <sup>4:19</sup> Isaias 61:1-2.

*Namipaplag hi Apo Jesus hēn narawak ya a angkahēlēk ya hinumapat ha mihay lalaki  
(Marcos 1:21-28)*

<sup>31</sup> Ubat bayro, ay nilumohan ya hi Apo Jesus ha balayan Capernaum ha probinsyan Galilea. Ha allon pamagsimba, ay nanoro ya ha sinagoga la. <sup>32</sup> Naubuh hilan nag-épapah ha panoro na gawan ya panoro na ay nanad panoro hēn main tungkulang. <sup>33</sup> Main lalaki bayro ha sinagoga ya hinapatan hēn narawak ya a angkahēlēk. Nan-angaw ya hatoy hinumapat kanan lalaki, ya wana, <sup>34</sup> “Jesus ya taga-Nazaret, hinoy pakiéménan mo kannaēn? Labay mo kay hēn parusaan? Muwang ko no hino ka. Hika ya banal, ya ayn hinon kasalanan, ya in-utoh ni Apo Namalyari.” <sup>35</sup> Hēn nagilam ni Apo Jesus ya hinabi nan hinumapat kanan hatoy lalaki, ay hinabyanan na ya, haka na ya impaplag, ya wana, “Paan kan maglabak! Mag-alíh ka ha hinapatan mo!” Intumba ya lalaki hēn hinumapat kana ha pibonakan la. Bayo nag-alíh ya, hēn a na ya pinakahakitan ya lalaki. <sup>36</sup> Nag-épapah hilay atsi bayro, ta nihahabi hila, ya wanla, “Hino kaya ya magkahabian hēn hatsi? Nag tungkulang haka kapangyarihan ya pami-utoh nan paypaplag hēn nangarawak ya hinumapat ha tawo, bayo ampag-alíh hila.” <sup>37</sup> Habaytoy dinyag ni Apo Jesus ay nibahwag ha boon legal hēn habayto.

*Namaalíh hi Apo Jesus hēn hakit hēn kal-atan ha bali lan Simon  
(Mateo 8:14-17; Marcos 1:29-34)*

<sup>38</sup> Améhēn, nag-alíh yay na hi Apo Jesus bayro ha sinagoga ta nagpakha ya ha bali lan Simon. Hēn habayto ay main matag-ay ya omot ya ampo nay babayi ni Simon. Kabay pinikihabi la kan Apo Jesus ya hawpan na ya. <sup>39</sup> Dinanian ni Apo Jesus ya bakēt. Impaalíh nay omot na kabay tambēng yan nirēng ta namakan ya kanlan Apo Jesus.

<sup>40</sup> Améhēn, hēn ampinaboy nay allo, ay gintan la kan Apo Jesus ya niphaghakit. Hino-hino kay na hēn ya hakit la. Impalunto nay gamēt na kanlan balang miha kanla ta namaalíh yan hakit la. <sup>41</sup> Haka ya nangarawak ya a angkahēlēk ya hinumapat ha kal-atan ay ampag-alíh kanla. Ampan-angaw hilay habaytoy nangarawak ya espiritu, ya wanla, “Hika ya Anak ni Apo Namalyari.” Noa, binawal hila ni Apo Jesus hēn maghabi gawan muwang la, ya hiyay Mesias, ya Cristo, ya pinili ni Apo Namalyari hēn mag-in habaytoy Mámilitgas ya impangako na.

*Nanoro hi Apo Jesus kanlan Israelita  
(Marcos 1:35-39)*

<sup>42</sup> Hēn maranon, ay nammita ya hi Apo Jesus ha mihay legal ya marayo ha tawo ta êmēn ya manalangin. Kabay tinapol la yan kal-atan. Hēn natapol la ya, ay pinikihabian la ya hēn a ya pon dayi mita. <sup>43</sup> Noa, hinabi kanla ni Apo Jesus, ya wana, “Ya Mangēd ya Habi tungkol ha pamanlokop ni Apo Namalyari, ay kailangan kon itoro ha kaatag ya legal. Kabay in-utoh na ko di ha luta.” <sup>44</sup> Bayo inhundo nay panoro na ha mal-at ya sinagoga lan Israelita.

## 5

*Ya pamanagyat ni Apo Jesus ha unan nag-in tagahonol na  
(Mateo 4:18-22; Marcos 1:16-20)*

<sup>1</sup> Minghan hēn atsi ya hi Apo Jesus hēn ampanoro ha laylay hēn Dagat-dagatan hēn Genesaret, ay pinilolopungan la ya hēn kal-atan ya labay manggilam hēn habi ni Apo Namalyari. <sup>2</sup> Améhēn, nakahēlēk yan loway bangka ya narani ha laylay, ya ayn tawo gawan hilay magdadakēp kēnan lanēm, ay atsi ha lanēm hēn ampanguyah hēn lambat la. <sup>3</sup> Hinumakay ya hi

Apo Jesus ha bangka ni Simon, haka ya nakihabi kan Simon ya ipabita ya bangka hēn pērad ha laylay. Bayro yan nikno hēn nanoro kanlan kal-atan.

<sup>4</sup> Hēn nayari yay nan nanoro ay hinabi na kan Simon, ya wana, “Ipalako yo ya hata bangka ha malalē bayo yo iaypa ya lambat ta êmēn kaw makakwa.”

<sup>5</sup> Kabay wani Simon kana, “Mánoro, mamapayabi kay hēn nagpagal hēn an-iaypa ya lambat, noa, ayn kay hēn nakwa. Êmbayro man, gawan ha hinabi mo, ay iaypa koy lambat.” <sup>6</sup> Hēn nadyag la ya habayto, ay pērad tanan nagihī ya habaytoy lambat gawan kal-atan ya nakwa la. <sup>7</sup> Kabay siningyalan lay kalamo la ha mihay bangka, ta pahawop hila kanla. Dinumani hila bayo la pinno ya loway bangka angga ha mamērad hila tanan nilêmēh. <sup>8</sup> Hēn nakit ni Simon Pedro ya habayto ya nalyari, ay nandoko yan nakadêngdêng ha arapan ni Apo Jesus ta wana, “Panginoon, pakarayo ka kangko ta makasalanan ako.” <sup>9</sup> Hinabi nay habayto gawan nag-êpapah ya haka hilay kalamo na gawan mal-at ya nakwa la. <sup>10</sup> Nag-êpapah etaman ya maának ni Zebedeo ya hi Santiago haka hi Juan, ya kala-kalamo ni Simon. Amêhēn, hinabi ni Apo Jesus kan Simon, ya wana, “Paan kan malimo. Paubat amêhēn, ay daygēn katan mámpakarani hēn tawo kangko, ta êmēn hila maniwala.” <sup>11</sup> Hēn ginuloy lay nay bangka la ha laylay lanêm, ay in-ubuh lan imbalag ya habayto, ta nakihonol hila kan Apo Jesus.

*Namaalíh hi Apo Jesus hēn hakit ketong ha mihay lalaki  
(Mateo 8:1-4; Marcos 1:40-45)*

<sup>12</sup> Minghan hēn atsi ya hi Apo Jesus ha mihay balayan, ay dinumani kana ya mihay lalaki ya nag hakit ketong. Nandoko ya ha arapan na, ta wanān nakiingalo, “Panginoon, no kalabayan mo, ay paalihēn moy hakit ko, êmēn luminis ya lawini ko.” <sup>13</sup> Impalunto ni Apo Jesus ya gamêt na ha nag hakit hēn ketong, bayo wana, “Labay kon paalihēn ya hakit mo. Luminis ka!” Tambēng naalih ya hakit na. <sup>14</sup> Bayo in-utoh na ya ni Apo Jesus hēn main pamamawal, ya wana, “Paan mo pon ipamwang ya hatsi ha hinoman. Pakha ka ha pari ta ipahlēk mo kana ya ayn kay nan ketong. Mantan kan maiparaya ha pamanhumonol mo ha utoh ni apo Moises,\* êmēn paptēgan kanlan kaatag ya malinis kay na.” <sup>15</sup> Noa, lalon nibahwag ya tungkol kan Apo Jesus, kabay kal-atan ay nangamat kana hēn manggilam panoro na. Haka impaalih la êt ya hakit la kana. <sup>16</sup> Noa, hi Apo Jesus ay panay hēn nagdayo ha kal-atan hēn nanalangin.

*Ya mihay a ampakabita, ya in-arap kan Apo Jesus  
(Mateo 9:1-8; Marcos 2:1-12)*

<sup>17</sup> Amêhēn, mihay allo, hēn ampanoro ya hi Apo Jesus, ay main bayron Pariseo haka mánoron Kautuhan ni apo Moises. Main kanla ya taga-balayan Jerusalem, haka main ubat ha balayan hēn probinsyan Galilea haka probinsyan Judea. Atsi kan Apo Jesus ya kapangyarihan ni Apo Namalyari hēn mamaalih hēn hakit. <sup>18</sup> Main nilumatêng ya ungnoy lalaki ya ampantan hēn mihay lumpo ya atsi ha langkayan. Iarap la ya dayi kan Apo Jesus. <sup>19</sup> Noa, gawan ha kal-atan, ay ayn hilan madanan. Kabay nunik hila ha bubungan ta nilubtan lay atêp ha dapit ugto ni Apo Jesus. In-antotoh lay lumpo ha pibonakan lan kal-atan ha arapan ni Apo Jesus. <sup>20</sup> Hēn nahélêk ni Apo Jesus ya paniwala la kana, ay hinabi na kanan lumpo, “Pakhawēn moy nakêm mo, ta pinatawad ya kasalanan mo.”

<sup>21</sup> Amêhēn, ampangihip hilay Pariseo haka mánoron Kautuhan ni apo Moises hēn êmēn di, “Hinoy hatsi ya an-ipantag nay sarili na kan Apo

\* **5:14** Levítico 14:2-33.

Namalyari hēn ampamatawad hēn kasalanan? Yarin a nan ammusmusēn hi Apo Namalyari ya tawo yan bēngat! Mimiha na ni Apo Namalyari ya makapatawad hēn kasalanan.”

<sup>22</sup> Muwang ni Apo Jesus ya laman ihip la. Kabay wana kanla, “Pata ampangihip kaw hēn êmbayro? <sup>23</sup> Hino awud ya maparah hēn habiēn kanan mihay a ampakabita, no wangko, ‘Napatawad kay na ha kasalanan mo,’ o no wangko, ‘Hali, mirêng ka ta mita kay na.’ <sup>24</sup> Noa, êmén yo mamwangan ya hiko, ya Taga-Langit, ya In-anak Tawo, ay main tungkulon di ha luta hēn mamatawad kasalanan, ay habiēn ko kanan lumpo, ‘Mirêng ka. Hapwatêñ moy langkayan mo ta muli kay na.’” <sup>25</sup> Tambêng yan nirêng ha arapan la ya habaytoy lumpo. Hinapwat nay langkayan na, ta nuli ya hēn ampuriēn na hi Apo Namalyari.

<sup>26</sup> Naubuh hilan nag-êpapah ya atsi bayro. Pinuri la hi Apo Namalyari hēn main lamoy êpapah, ya wanla, “Amêhêñ allo ay nakahêlêk kitamo hēn kapapaêpapah.”

*Hi Levi ya ambaêgêñ êt Mateo, ya máningil buwih, ay hinagyat ni Apo Jesus (Mateo 9:9-13; Marcos 2:13-17)*

<sup>27</sup> Pangayari hēn habayto, ay nammita yay na hi Apo Jesus, haka nakahêlêk yan mihay máningil buwih ya nag langan Levi, ya ampikno ha paningilan na. Hinabi ni Apo Jesus kana, ya wana, “Kihonol ka kangko.” <sup>28</sup> Nirêng ya etaman hi Levi, haka in-ubuh nan imbalag ya obra na, ta nakhonol ya kan Apo Jesus.

<sup>29</sup> Amêhêñ, pinayhanda ni Levi hilan Apo Jesus hēn kal-atan maêkan. Kal-atan máningil buwih ya kapareho ni Levi, haka kaatag êt, ay kalamo la hēn nangan. <sup>30</sup> Noa, hilay Pariseo haka hilay kalamo lay mánoron Kau-tuhan ni apo Moises ay nagmulongan kanlan tagahonol ni Apo Jesus, ya wanla, “Pata ampakiaêm kaw hēn kalamo lan máningil buwih haka kaatag êt ya makasalanan?” <sup>31</sup> Hēn nagilam nay hinabi la, ay nangalimbawa hi Apo Jesus, ya wana, “Hilay main hakit, ay ampangailangan doktor, alwan hilay ayn hakit. <sup>32</sup> Êmbayro êt, atsi ko di ha luta ta êmén ko mahagyat hilay ampangamin makasalanan hila, hēn maghêhê hēn manalibokot ha pamanyag lan kasalanan. Noa, hilay ampaghabin ayn hilan kasalanan, ay a ko hawpan.”

*Pinakibatan ni Apo Jesus ya kotang tungkol ha pagtêêh hēn a mangan ta êmén a maabala ya panalangin*

*(Mateo 9:14-15; Marcos 2:18-20)*

<sup>33</sup> Main ungro bayro ya naghabi kan Apo Jesus, ya wanla, “Hilay tagahonol ni Juan haka hilay tagahonol lan Pariseo ay panay hēn ampagtêêh hēn a mangan ta êmén a maabala ya panalangin la. Pata alwan êmbayro ya andaygêñ lan tagahonol mo?” <sup>34</sup> Kabay in-alimbawa ni Apo Jesus ya sarili na ha lalaki ya an-ikasal, ya wana, “Êndat yon mabawal yon mangan ya bisita ha kasálan no kalamo lay lalaki ya an-ikasal? A yo hila mabawal. <sup>35</sup> Lumatêng ya allo, ya idayo lay lalaki ya an-ikasal, ay bayro hilay nan a mangan.”

*Ya toro ni Apo Jesus ay a mailamo ha toro lan ninuno lan Israelita*

*(Mateo 9:16-17; Marcos 2:21-22)*

<sup>36</sup> Amêhêñ, intoro ni Apo Jesus ya a mailamo ya toro na, ha toro lan ninuno la, ya wana, “Ayn mangguntsing hēn bayoy baro ta itagpi ha gihi hēn manan takop. No alimbawa ta daygêñ nay habayto, ay mahira ya bayoy baro, haka habaytoy bayoy intagpi, ay a mipareho ha manan takop. <sup>37</sup> Ayn mamitungtug hēn bayon alak, ha ubatan hēn manan alak, gawan lumtoh ya

pamyanan, haka mibullog ya alak.<sup>†</sup> <sup>38</sup> Ya bayoy alak, ay dapat itugtug ha bayoy pamyanan. <sup>39</sup> Ayn labay minêm hên bayoy alak no nakainêm yay na hên mana ta habiêñ na, ya naayang ya mana.”

## 6

### *Ya toro ni Apo Jesus tungkol ha allon pamagsimba* (Mateo 12:1-8; Marcos 2:23-28)

<sup>1</sup> Mihay allon pamagsimba, hên nipadann hilan Apo Jesus ha nag trigo ya narani ha dann, ay nantê hilay tagahonol na hên pêrad. Niyêhê la ya hata trigo ta nilêêm la ha pammita la. <sup>2</sup> Noa, nag Pariseo bayro ya naghabi kan Apo Jesus, ya wanla, “Pata nantê kaw ha allon pamagsimba, bawal man ya habayto ha Kautuhan tamo?” <sup>3</sup> Wana etaman ni Apo Jesus, “Kayno a yo pon nabaha ya dinyag ni Arin David hên hiya haka hilay kalamo na ay angkablay hên lonoh. <sup>4</sup> Hinumwêñ ya ha bali ni Apo Namalyari, ta nangwa yan puto ya imparaêp kan Apo Namalyari ya pangkaêñ lan bat hên pari. Bawal man ha Kautuhan ni apo Moises hên mangan hên habayto, ay nangan ya, bayo nam-i ya êt kanlan kalamo na.” <sup>5</sup> Inhundo ni Apo Jesus ya pamaghabi na kanlan Pariseo, ya wana, “Hiko ya Taga-Langit, ya In-anak Tawo, ay nag tungkulan hên maghabi no hinoy malyarin daygêñ ha allon pamagsimba.”

### *Ya lalaki ya natsi ya mihay gamêt* (Mateo 12:9-14; Marcos 3:1-6)

<sup>6</sup> Ha mihay na êt ya allon pamagsimba la, hên hinumwêñ ya ha sinagoga ta manoro, ay nag lalaki bayro ya natsi ya panabtab gamêt. <sup>7</sup> Hilay Pariseo haka mánoron Kautuhan ni apo Moises, ay ampangimaton kan Apo Jesus, no mamaalíh yan hakit ha allon pamagsimba, ta êmêñ la yan bad-an hên ampanyag yan bawal ha allon pamagsimba. <sup>8</sup> Agyan muwang na ya laman ihip la, ay wani Apo Jesus kanan lalaki ya natsi ya gamêt, “Mirêng ka di ha arapan lan kal-atan.” Dinyag nay kalabayan ni Apo Jesus. <sup>9</sup> Bayo kinotang ni Apo Jesus, hilay Pariseo haka mánoron Kautuhan ni apo Moises, ya wana, “Hinoy nakahulat ha Kautuhan ni apo Moises ya tungkol ha dapat daygêñ ha allon pamagsimba? Manyag hên kangêran o manyag karawakan? Mamilitas o mamatsi?” Noa, ayn miha man ya naghabi. <sup>10</sup> Hinlêk na hilangan ni Apo Jesus. Bayo wana kanan lalaki ya natsi ya gamêt, “Ipaktang moy gamêt mo.” Hên impaktang na, ay naalíh ya hakit ha gamêt na. <sup>11</sup> Noa, hadyay huluk lan Pariseo, kabay pinipupulungan lay na hi Apo Jesus.

### *Namili hi Apo Jesus hên labinloway apostol na ya in-utoh na hên manoro* (Mateo 10:1-4; Marcos 3:13-19)

<sup>12</sup> Hên habayto, ay nilumakat ya hi Apo Jesus ha mihay tawgtug, ta êmêñ ya manalangin. Namawatah yan nanalangin kan Apo Namalyari. <sup>13</sup> Hên alloy na, ay binaêg na hilay tagahonol na hên dumani kana, ta mamili ya hên labinlowa kanla ya pinata-ngalanan nan apostol. <sup>14</sup> Hila ay hi Simon, ya pinata-ngalanan nan Pedro, haka hi Andres ya kapotoh pohêl ni Pedro. Pinili na êt hi Santiago, hi Juan, hi Felipe, hi Bartolome, <sup>15</sup> hi Mateo, hi Tomas, haka hi Santiago ya anak ni Alfeo. Pinili na êt hi Simon ya Makabayen. <sup>16</sup> Pinili na êt hi Judas ya anak ni Santiago haka hi Judas Iscariote ya nay-upit kan Apo Jesus.

### *Nanoro ya hi Apo Jesus haka ya namaalíh hên hakit* (Mateo 4:23-25)

<sup>†</sup> **5:37** Ya pamyanan la hên alak ay dyag ha balat kambing, kabay minghan lan bêngat magamit gawan angkumita.

<sup>17</sup> Amêhén, nilumohan hilan Apo Jesus ha napatal ya legal. Kalamo la bayro ya kal-atan kanlan antoroan na haka kal-atan ya ubat ha probinsyan Judea, balayan Jerusalem, haka ha dani hén Tiro haka Sidon. <sup>18</sup> Habaytoy kal-atan ay labay manggilam toro na, haka magpaalih hén hakit la. Impaalih na etaman hilay narawak ya a angkahélék, ya ampamairap kanlan kaatag. <sup>19</sup> Gap-an la ya dayi hén kal-atan hi Apo Jesus, gawan atsi kana ya kapang-yarihan ni Apo Namalyari hén mamaalih hén kaganawan hakit la.

### *Hilay mapatékbék ya ihip*

(Mateo 5:1-12)

<sup>20</sup> Hinlék ni Apo Jesus ya tagahonol na, bayo hinabi na, ya wana, “Iningalwan kaw ya mangairap, gawan hikaw ay milamo ha pamanlokop ni Apo Namalyari. <sup>21</sup> Iningalwan kaw ya angkablay amêhén, ta mabhoy kaw. Iningalwan kaw ya ampanangih amêhén, gawan mangkaili kaw. <sup>22</sup> Iningalwan kaw no gawan bêngat ha paniwala yo kangko ya Taga-Langit, ya In-anak Tawo, ay kahémékan la kaw, ipaplag la kaw, musmusén la kaw, haka hiraén la kaw. <sup>23</sup> No malyari ya habayto, ay dapat humigla kaw, haka kaw mag-ukdo gawan kahiglaan yo, ta mahlay ya primyo ya matanggap yo ha langit. Ta êmbayro êt ya pamairap lan ninuno la kanlan mámipamwang hén an-ipaihip kanla ni Apo Namalyari.

<sup>24</sup> “Noa, kaingalo kaw ya mabandi ta nilumatêng kamoyu ya katsighaw yo! Ayn kaw na hén maéngganan! <sup>25</sup> Kaingalo kaw ya nabhoy amêhén ta hikaw ay mablay hén lonoh. Kaingalo kaw ya ampangkaili amêhén ta hikaw ay manyêngén. <sup>26</sup> Kaingalo kaw no andayêwén kaw hén kaganawan ta êmbayro êt ya dinyag lan ninuno la kanlan nagbabaran mámipamwang hén an-ipaihip kanla ni Apo Namalyari hén hato.”

### *Ya toro ni Apo Jesus ya tungkol ha pamanlugud ha kapatsi*

(Mateo 5:38-48; 7:12a)

<sup>27</sup> Inhundo ni Apo Jesus ya panoro na, ya wana, “Panhabiên ko kamoyun atsi di hén ampanggilam, ya dapat yon lugurén ya kapatsi yo. Daygén yoy kangérán kanlan anhumémék kamoyu. <sup>28</sup> Ihalangin yo hilay ampanuboy kamoyu, haka hilay ampamairap kamoyu. <sup>29</sup> No main manampaling kapakan pingi yo ay ipatampaling yo êt kanla ya kapaka. No main mangwan sambra yo, ay idin yo kanla etaman ya kamiseta yo. <sup>30</sup> Mam-i kaw kanlan kaganawan ampakikwa kamoyu, haka no main mangwan pibandian yo, ay paulayan yo hila. <sup>31</sup> Ya kangérán ya labay yo hén daygén la kamoyu hén kaatag, ay êmbayro êt ya daygén yo kanla.

<sup>32</sup> “No anlugarén yon bêngat hilay ampanlugud kamoyu, ay a na kaw dayêwén ni Apo Namalyari. Ta hila man ya makasalanay ay ampanlugud kanlan ampanlugud kanla. <sup>33</sup> No ampanyag kaw hén kangérán kanlan bêngat hén ampanyag kangérán kamoyu, ay a na kaw dayêwén ni Apo Namalyari. Hila man ya makasalanay ay ampanyag kangérán kanlan ampanyag kangérán kanla. <sup>34</sup> No mamaram kaw bêngat kanlan ampakapiorong hén indam la kamoyu, ay a na kaw dayêwén ni Apo Namalyari. Hila man ya makasalanay ay ampamaram kanlan kapareho la, ya ampakapiorong hén indam kanla. <sup>35</sup> Noa, dapat yon lugurén ya kapatsi yo. Manyag kaw hén kangérán. Mamaram kaw kanlan a makabayad hén indam la kamoyu. No daygén yoy habayto ay dyanan na kaw ni Apo Namalyari, ya pinakamakapangyarihan, hén mahlay ya primyo, haka hikaw ay mamwangan maának na gawan hiya man ay an-ingalwan na hilay narawak ya ayn utang nakém.

**36** Dapat kaw mag-in maingaloên hên nanad kan Apo Namalyari ya Tatang tamo ya maingaloên.”

*Paan miyahatol  
(Mateo 7:1-5)*

**37** “Paan kaw miyahatol ta êmên a kaw hatolan ni Apo Namalyari. Paan yon parusaan ya kaatag, ta êmên a na kaw parusaan ni Apo Namalyari. Mamatawad kaw ta patawarêن kaw êt ni Apo Namalyari. **38** Mam-i kaw ha kaatag ta dyanan na kaw ni Apo Namalyari hên mangêd ya takal ya imbinhêk, intêtê, haka nakatalibohboh. Ta no ay-êmên ya pamaytakal yo ha kaatag, ay êmbayro êt ya takal ya idin kamoyu ni Apo Namalyari.”

**39** Hêñ nahabi nay na ya habayto ni Apo Jesus ay intoro nay na êt ya habaytsi ya kahabian kanla, ya wana, “Ya mihay buwag ay a makaakay hên kapareho nan buwag ta pareho hilan minabo ha malalê ya lubot. **40** Ayn mag-aral ya magaling ha ampanoro kana. Noa, hilay natoroan hên mangêd ay mag-in nanad ha ampanoro kanla.

**41** “Panhêlkên yoy alwan nabyat ya kasalanan ya nanad poling ha mata hên kaatag, noa, a yo ampansinêñ ya nabyat ya kasalanan yo ya nanad batang ya atsi ha sarili yon mata. **42** Ay-êmên yon mahabi ha kapareho yo, ‘Patêl, paulayan mo kon alihêñ ya poling ha mata mo,’ no hikaw êt, ay a yo angkahêlêk ya nanad batang ya atsi ha mata yo. Ampagbabara kaw! Unaêñ yon alihêñ ya nanad batang ya atsi ha mata yo, bayo makahêlêk kaw hên mangêd, ta êmên yo maalíh ya nanad poling ha mata hên kaatag.”

*In-alimbawa ni Apo Jesus ya dyag lan ampagbabara hên ampanoro hilan kaptêgan ha kayo ya ampanagêy hên nangarawak*

*(Mateo 7:16-20; 12:33-35)*

**43** “Hilay mangêd ya kayo, ay a ampanagêy hên nangarawak. Ayn êt kayo ya narawak ya ampanagêy hên mangangêd. **44** Ta hilay kayo ay angkabalayan ha tagêy la. A ya managêy hên igos ya korêrêng-êy. A etaman managêy hên ubas ya tanyuong. **45** Hilay mangêd, ay mapanyag hên kangêran, gawan mangêd ya nakêm la. Hilay narawak, ay mapanyag hên karawakan, gawan narawak ya nakêm la. Ta ya laman nakêm ay an-umawah ha bêbêy.”

*Ya loway lalaki ya namairêng bali*

*(Mateo 7:24-27)*

**46** “Pambaêgêñ yo ko hên ‘Panginoon, Panginoon,’ noa, a yo andaygêñ ya panhabîen ko. **47** Ipahlêk ko kamoyu no nanad hino hilay andumanî kangko hên manggilam habi ko, haka anhumonol ha nalêngê la. **48** Hila ay nanad ha mihay lalaki ya nanyag bali. Nangali yan malalê angga ha nidaoh ha dapah, ta bayro nan impairêng ya bali na. Hêñ nanlanab, ay nadanan yan maawêh ya lanêm, noa, a ya nayêgê ya bali na gawan mangêd ya pangadyag na. **49** Noa, ya ampakgilam hên habi ko, bayo a manyag hên nagilam na, ay nanad yan lalaki ya nanyag bali ya alwan napah-êy gawan a na impakakali. Kabay hêñ nadanan yan maawêh ya lanab, ay tambêng yan nigêyma. Nangaagwat ya hatoy boon bali.”

*Namaalíh hi Apo Jesus hên hakit hên ipoh hên kapitan hên hundaloh ya taga-Roma*

*(Mateo 8:5-13)*

<sup>1</sup> Hêñ nayari nay na ni Apo Jesus ya panoro na, ay nammita yay na ha balayan Capernaum. <sup>2</sup> Atsi bayro ya mihay kapitan hêñ hundaloh ya taga-Roma. Main ipoh ya hata kapitan ya anlugarûn na. Main hakit ya hata ipoh haka angkaboytoy inanawa na. <sup>3</sup> Hêñ namwangan hêñ hata kapitan ya tungkol kan Apo Jesus, ay impaalap na ya kanlan toa lan Israelita ya nag tungkulan hêñ pakihabian la hi Apo Jesus hêñ mamaalih hakit hêñ ipoh na. <sup>4</sup> Hêñ nilumatêng hilay na kan Apo Jesus ay pinakihabian la yan mangêd hêñ daygêñ na dayi ya kalabayan hêñ kapitan, ta agyan alwa yan Israelita, ay mangêd yan tawo. <sup>5</sup> Hinabi la, “Anlugurûn na kitamo ya Israelita, ta hiyay namipairêng sinagoga tamo.”

<sup>6</sup> Kabay nakihonol ya hi Apo Jesus kanla. Amêhêñ, hêñ narani hilan Apo Jesus, ha bali hêñ kapitan, ay in-utoh nay na êt hêñ hata kapitan ya ungnoy kaluguran na hêñ manupa kanlan Apo Jesus. Hinabi la, ya wanla, “Panginoon, paan kay na kano hêñ paabala hêñ humwêñ ha bali na ta angkarêng-êy ya kamo. <sup>7</sup> Kabay a ya kano hêñ umarap kamo, noa, iutoh mo tana kano, ay maalih ya hakit hêñ ipoh na. <sup>8</sup> Hiya man kano, ay atsi ha aypa hêñ kapangyarihan hêñ kaatag, bayo nag hundaloh ha aypan kapangyarihan na. Ya kaganawan utoh na ay daygêñ la. No habiêñ na kanan miha, ‘Mita ka,’ ay mita yay na. No habiêñ na kanan kaatag, ‘Paidani ka di,’ ay dumani ya. No habiêñ na kanan ipoh na, ‘Daygêñ moy hatsi,’ ay daygêñ na.” <sup>9</sup> Hêñ nagilam nay habayto ni Apo Jesus ay nag-êpapah ya. Inarap nay kal-atan ya ampanhumonol kana ta hinabi na, “Pakagilamêñ yo, ayn akon nahêlêk ya miha man ya Israelita, ya êmbayro ya nakataniêh ya paniwala.” <sup>10</sup> Hêñ nag-orong hilay nay in-utoh hêñ kapitan, ay ayn nanan hakit ya ipoh.

### *Biniyay ni Apo Jesus ya lalaki ya anak hêñ mihay babayi ya bawo*

<sup>11</sup> A nabuyot, ay nammita hi Apo Jesus ha balayan ya ambaêgêñ Nain. Kalamo na hilay tagahonol na, haka kal-atan ya kaatag. <sup>12</sup> Hêñ marani yay na bayro ha pahowêñ ha balayan, ay nakatupa hila hêñ kal-atan ya ampammitan mamilbêng, ya kalamo nan indo nan natsi. Ya natsi ay mihay lalaki, ya kamiha-mihaan ya anak hêñ habaytoy babayi ya bawo. <sup>13</sup> Hêñ nahêlêk ni Apo Jesus ya habaytoy indo hêñ natsi ay naingalwan na ya, kabay hinabi na, ya wana, “Paan kan manangih.” <sup>14</sup> Amêhêñ, dinumani ya hi Apo Jesus ha bangkay hêñ anak nan babayi ta tinalan nay langkayan. Kabay tinunggêñ hilay mamalatay hêñ natsi. Hinabi ni Apo Jesus kanan natsi, ya wana, “Miyawhay, mimata ka.” <sup>15</sup> Nikno ya hata miyawhay bayo naghabi ya. Amêhêñ, hinabi ni Apo Jesus kanan indo na, ya wana, “Hatsi ya anak mo, ya nabiyay oman.” <sup>16</sup> Naubuh hilan nipag-êpapah. Pinuri la hi Apo Namalyari, ya wanla, “Main makapangyarihan ya propeta ya nilumtaw kantamo. Hiniraw ni Apo Namalyari hikitamoy Israelita.” <sup>17</sup> Habaytoy tungkol kan Apo Jesus ay nibahwag ha ayri man ya legal ha probinsyan Judea haka ha mamalibot hêñ Judea.

### *Ya kotang ni Juan Bautista, ya atsi ha hukulan (Mateo 11:2-19)*

<sup>18</sup> Impamwang kan Juan Bautista ya balang habaytoy dinyag ni Apo Jesus hêñ tagahonol ni Juan. <sup>19</sup> In-utoh ni Juan ya lowa kanlan tagahonol na, kan Apo Jesus hêñ mangotâng kana, no hiya ya impangakon Mâmiligtas ya pinili ni Apo Namalyari hêñ mamaala, o no mangênggan hila pon hêñ kaatag. <sup>20</sup> Hêñ nilumatêng hila kan Apo Jesus, ay hinabi la, “In-utoh kay ni Juan Bautista, ta labay nan mamwangan no hika ya impangakon Mâmiligtas ya pinili ni Apo Namalyari hêñ mamaala o no mangênggan kay pon hêñ

kaatag.” <sup>21</sup> Kanan habayto ay mal-at ya inalihan ni Apo Jesus hēn hinon hakit, haka nangarawak ya a angkahēlēk. Mal-at êt ya buwag ya pinamukat na. <sup>22</sup> Amêhēn, hinabi na kanla, ya wana, “Mag-orong kaw kan Juan ta ipamwang yo kana ya nahēlēk yo haka nagilam yo, ya ampakahēlēk hilay nay buwag, ampakabita hilay nay lumpo, angkaalih ya hakit lan nag ketong, ampakagilam hilay nay tēkkēn, ampangoman mabiyay hilay natsi, haka ya Mangēd ya Habi ni Apo Namalyari ay an-ipamwang kanlan mairap. <sup>23</sup> Iningalwan hilay a ampag-alangan ha paniwala la kangko.”

<sup>24</sup> Hēn nakabitay nay in-utoh ni Juan, ay namipamwang hi Apo Jesus hēn tungkol kan Juan kanlan kal-atan, ya wana, “Hinoy nilako yo ha legal ya kabalahan-balahan? Èndat yo no ya ihip ni Juan ay nanad tsimbo ya mantēwēg ya angkadanan angin? <sup>25</sup> Hino awud ya nilako yo? Yarin nilako yo ya mihay nakatakop hēn mangahampat! Alwa. Hilay nakatakop hēn mangahampat, haka ampatsighaw, ay mahēlēk ha balin ari. <sup>26</sup> Hino awud ya nilako yo? Ya mihay propeta? Awo. Pakagilamēn yo! Hiyay mihay propeta ya ayn kapantag. <sup>27</sup> Gawan tungkol kan Juan Bautista ya hata nakahulat di ha habi ni Apo Namalyari, ya wana, ‘Mangiutoh ako hēn muna kamo, ya mangil-an hēn danan mo.’\* <sup>28</sup> Anhabiēn ko kamoyu, ya ha kaganawan tawo, ayn matagay kan Juan Bautista. Èmbayro man, ya pinakamaaypa ya nakapakilamo ha pamanlokop ni Apo Namalyari, ay matag-ay kan Juan.”

<sup>29</sup> Ginilam lan kal-atan kalamo lan máningil buwih ya hinabi na, haka hinumonol hilangan ha makatoynungan ya Kautuhan ni Apo Namalyari gawan nagpabawtismo hila kan Juan. <sup>30</sup> Noa, in-ara lan Pariseo haka hilay mánoron Kautuhan ni apo Moises ya kalabayan ni Apo Namalyari ha biyay la, gawan a hila nagpabawtismo kan Juan.

<sup>31</sup> Hinabi nay na êt ni Apo Jesus, ya wana, “Hino awud ya pangiparisan ko kanlan tawo amêhēn? Nanad hino hila kaya? <sup>32</sup> Nanad hilan anak ya ampipammikno ha pangalindagan hēn ampibabaēg, ya wanla, ‘Nanigtsig kay, noa, a kaw tsimmalēk. Nanyēngēn kay, noa, a kaw nakiyēngēn.’ <sup>33</sup> Ta nilumatēng hi Juan Bautista hēn panay hēn ampagtēh hēn a ampangan ta êmēn a maabala ya panalangin na, haka a ya ampinēm hēn alak, noa gawan habayto ay anhabiēn yo, ya hinapatan yan narawak ya a angkahēlēk. <sup>34</sup> Hiko etaman, ya Taga-Langit, ya In-anak Tawo, ay nilumatēng di hēn ampakiaēm haka ampinēm hēn kalamo yo, noa gawan habayto, anhabiēn yo ya hiko kano ay mahiba, mamminēm hēn alak haka kaluguran lan máningil buwih haka kaatag ya mapanyag kasalanan. <sup>35</sup> Èmbayro man, ay mapaptēgan ya pêtēg ya toro naêñ ni Juan Bautista, gawan habaytoy mahēlēk ha pamimiyay lan anhumonol ha toro naêñ.”

### *Nangan hi Apo Jesus ha bali ni Simon ya miha kanlan Pariseo*

<sup>36</sup> Amêhēn, main mihay Pariseo ya nag langan Simon ya nanagyat kan Apo Jesus hēn mangan. Kabay hinumwēn ya ha bali na ta nangan. <sup>37</sup> Ha balayan ya habayto, ay nag babayi ya muwang lan kal-atan ya makasalanan ya. Hēn namwangan nan babayi ya ampangan ya hi Apo Jesus ha bali nan Pariseo, ay pinantan na yan makamal ya pabango ya atsi ha pamyanan ya dyag ha alabastro. <sup>38</sup> Dinumani ya ha bokot ni Apo Jesus, ha dapit bitsih na hēn ampanangih. Nabahá ya bitsih ni Apo Jesus hēn luwa na kabay pinunihan nan habot na, haka na inaro ya bitsih ni Apo Jesus bayo tinugtungan na hēn hatoy pabango. <sup>39</sup> Hēn nahēlēk nan habaytoy Pariseo ya nanagyat kan Apo Jesus ya dinyag nan babayi ay nangihip yan êmēn di, “No pêtēg yan propeta

\* <sup>7:27</sup> Malakias 3:1.

ni Apo Namalyari, ay muwang na dayi ya makasalanan ya hata ampanggapa kana haka bawalên na ya dayi.”

<sup>40</sup> Muwang ni Apo Jesus ya laman ihip nan hata Pariseo, kabay wana, “Simon, main akon habiêñ kamo.”

Amêhêñ, wani Simon, ya wana, “Hinoy habayto?”

<sup>41</sup> Hinabi ni Apo Jesus, ya wana, “Main loway tawo ya nangútang kanan mihay mámautang pera. Ya miha ay nangútang hêñ 500 bayo ya miha ay nangútang hêñ 50. <sup>42</sup> Hêñ a hila makabayad, ay naingalwan na hila, kabay a na hilay na pinabayad hêñ utang la. Nanad hilay nan pinatawad. Amêhêñ, hino kanlan lowa ya mantêñ manlugud kanan mámautang pera?”

<sup>43</sup> Amêhêñ, hinabi ni Simon, “Kayno habaytoy nangútang hêñ mal-at.”

Hinabi ni Apo Jesus, “Awo, hukad ya hinabi mo.” <sup>44</sup> Bayo, pinalingayan nay babayi haka na hinabi kan Simon, ya wana, “Angkahêlêk moy andaygêñ hêñ hata babayi? Hêñ hinumwêñ ako ha bali mo ay a mo ko dinyanan lanêñ hêñ panguyah hêñ bitsih ko. Noa, hata babayi, ay luwa na ya pinanguyah nan bitsih ko bayo pinunihan na hêñ habot na. <sup>45</sup> A mo ko inaro, noa, hiya, ay a na tinêgnan hêñ inaro ya bitsih ko paubat hêñ hinumwêñ ako. <sup>46</sup> A mo dinyanan laro ya ulo ko, noa, hata babayi, ay bitsih koy tinugtugan nan pabango. <sup>47</sup> Kabay anhabiêñ ko kamo ya hadyay lugud na ay pamaptêñ ya napatawad ya kal-atan kasalanan na. Hinoman ya pinatawad bêngat hêñ pêrad ay manlugud bêngat hêñ pêrad.” <sup>48</sup> Amêhêñ, wani Apo Jesus kanan babayi, “Pinatawad ya kasalanan mo.” <sup>49</sup> Hilay kaatag ya kalamo lan ampangan bayro ay naghabi ha sarili la, ya wanla, “Hinoy hatsi ya ampamatawad kasalanan?” <sup>50</sup> Noa, hinabi ni Apo Jesus kanan babayi, ya wana, “Inligtas ka ha parusa hêñ kasalanan mo gawan paniwala mo kangko. Mag-orong kay na, hêñ mapatêkbêk ya nakêm.”

## 8

### *Hilay babayi ya nakihonol kan Apo Jesus*

<sup>1</sup> Pangayari, ay nanoro yay na hi Apo Jesus ha mal-at ya balayan haka baryo. Impamwang nay Mangangêd ya Habi ya tungkol ha pamanlokop ni Apo Namalyari. Kalamo na hilay labinloway tagahonol na. <sup>2</sup> Kalamo na êt ya ungnoy babayi ya inalihan na hêñ hakit haka ya nangarawak ya a angkahêlêk ya hinumapat kanla. Ya miha kanlan hatoy babayi ay hi Maria, ya ambaêgêñ Magdalena, ya inalihan hêñ pitoy narawak ya a angkahêlêk. <sup>3</sup> Ya miha pon kanla ay hi Juana ya ahawa ni Cusa, ya mihay manungkulon ha sakop ni Herodes. Kalamo la êt hi Susana haka mal-at êt ya kaatag. Ginamit lan habaytoy babayi ya sarili lan bandi ya inhaliw lan kaêñ lan Apo Jesus.

### *Ya alimbawa ya tungkol ha bini ya inhabwag (Mateo 13:1-9; Marcos 4:1-9)*

<sup>4</sup> Hêñ napi-tsi-tsipon ya kal-atan ya ubat ha ay-irin balayan, ay intoro na kanla ni Apo Jesus ya hata alimbawa, ya wana,

<sup>5</sup> “Main mihay lalaki ya namihabwag hêñ bini. Ha pamihabwag nan bini ay main bini ya natata ha dann. Habaytoy natorakan bayo tinuktuk hêñ manok.

<sup>6</sup> Ya kaatag ay natata ha mabato ha mabobo ya luta. Tinumubo ya, noa, nayanto, gawan namala ya luta bayro. <sup>7</sup> Ya kaatag ay natata ha kadiwian. Tinumubo ya bini, noa, tinumêytêy, gawan diwi. <sup>8</sup> Ya kaatag ay natata ha mataba ya luta. Tinumubo ya habaytoy bini haka naubuh hêñ nanagêy hêñ manimagatoh ya lahí.” Hêñ nahabi nay na ya habayto ni Apo Jesus ay hinabi nay na êt hêñ in-ikhaw, ya wana, “Pakaihipêñ yoy nagilam yo!”

*No pata paalimbawa ya panoro ni Apo Jesus  
(Mateo 13:10-17; Marcos 4:10-12)*

<sup>9</sup> Hêñ labay lan mamwangan hêñ labinloway tagahonol ni Apo Jesus no hinoy labay habiên hêñ alimbawa ya tungkol ha bini, <sup>10</sup> ay hinabi ni Apo Jesus, “Hikaw bat ya makamwang hêñ inlihim ya tungkol ha pamanlokop ni Apo Namalyari, noa, kanlan kaatag ay anhabiên ko ha alimbawan bêngat, ta êmêñ ‘Manlêk hila man, ay a la mamwangan ya anhêlkêñ la. Manggilam hila man, ay a la maintindihan ya angkagilaman la.’ ”\*

*Impamwang ni Apo Jesus ya labay habiên hêñ habaytoy alimbawa ya tungkol ha bini ya inhabwag*

*(Mateo 13:18-23; Marcos 4:13-20)*

<sup>11</sup> “Êmêñ ya di ya labay habiên hêñ hatoy alimbawa. Ya bini ay habi ni Apo Namalyari. <sup>12</sup> Ya nakêm tawo ay in-alimbawa ha natataan bini. Ya bini ya natata ha dann ay habi ni Apo Namalyari ya nagilam lan tawo, noa, nilumatêng hi Satanas ta inalih na ya habaytoy habi ha nakêm la, ta êmêñ hila a maniwala kan Apo Namalyari, haka a miligtas ha parusa. <sup>13</sup> Ya bini ya natata ha kabatoan, ay habi ni Apo Namalyari ya tinanggap la hêñ main kahiglaan, noa, a nimana ha nakêm la. Naniwala hila pon, noa, hêñ nilumatêng ya pamanubuk, ay a hilay na naniwala. <sup>14</sup> Ya bini ya natata ha kadiwian ay habi ni Apo Namalyari ya ginilam la pon, noa, tampol nialih ha nakêm la, gawan ha kayagahan, pibandian, haka katsighaw hêñ biyay la. Kabay a nabayo ya biyay la, hêñ nanad ha a nanagêy ya bini. <sup>15</sup> Ya bini ya natata ha mataba ya luta ay habi ni Apo Namalyari ya ginilam la, bayo nimana ha nakêm la, gawan mangêd ya nakêm la. Ha pamagtêêh la, ay nabayoy biyay la.”

*Ya atâng ay dapat idin ha taganán pamyanan  
(Marcos 4:21-25)*

<sup>16</sup> “Ayn mamagkêt hêñ atâng bayo halokoban o idin ha hilong pangkatuluyan. Noa, idin na ha mantêg pamyanan atâng, ta êmêñ mahawangan ya danan lan anhumwêñ. <sup>17</sup> Ayn intago ya a miawah. Ayn êt inlihim ya a mamwangan haka mihungbung.

<sup>18</sup> “Pakaihipêñ yoy angkagilam yo, ta no honolêñ yoy toro ko, ay mapahanan ya pamangintindi yo, noa, no a yon honolêñ, ay alihêñ êt kamoyu ya pêpêrad ya naintindihan yo.”

*Hilay ampanggilam habi ni Apo Jesus, ay anlugurêñ na hêñ nanad ha pamanlugud na ha indo na, haka hilay patêl na*

*(Mateo 12:46-50; Marcos 3:31-35)*

<sup>19</sup> Amêhêñ, nilumatêng ya indo ni Apo Jesus haka hilay patêl na, noa, a hila midani kana gawan ha kal-atan. <sup>20</sup> Main naghabi kana, ya wana, “Atsi di ha ilwangan ya indo mo haka hilay patêl mo. Labay la kan makahabi.” <sup>21</sup> Noa, wani ni Apo Jesus kanla, “Hilay ampanggilam habi ni Apo Namalyari haka ampanyag kalabayan na, ay anlugurêñ ko hêñ nanad ha pamanlugud ko ha indo ko, haka hilay patêl ko.”

*Pinatunggêñ ni Apo Jesus ya hadyay angin  
(Mateo 8:23-27; Marcos 4:35-41)*

<sup>22</sup> Mihay allo, hinumakay ha bangka hi Apo Jesus hêñ kalamo na hilay tagahonol na. Hinabi na kanla, “Magbangka kitamo hêñ lumipay.” Kabay nag-umpisa hilay nan lumipay. <sup>23</sup> Ha pamanlumipay la, ay nabêlêw ya hi Apo Jesus ha bangka. Amêhêñ, nagkamain hêñ hadyay angin, haka ya bangka

\* **8:10** Isaias 6:9.

la ay angkapnoy nan lanêm, kabay atsi hila ha kapapotog. <sup>24</sup> Pinukaw la ya, ya wanla, “Panginoon! Panginoon! Ampilêmêh kitamina!” Nimata ya, ta binawal nay angin haka hadyay tandulon. Tinunggên ya angin haka tandulon, hên nagpatêkbék. <sup>25</sup> Hinabi na kanla, ya wana, “Ayn kaw awud hên tsiwala kangko!” Nalimwan hila. Nag-êpapah hilan nihahabi, ya wanla, “Hino kaya ya hatsi ya ampakabawal hên angin haka lanêm, bayo anhumonol hila kana?”

*Namaalih hi Apo Jesus hên nangarawak ya a angkahêlêk, ya hinumapat kanan mihay lalaki ya Gergeseno*  
*(Mateo 8:28-34; Marcos 5:1-20)*

<sup>26</sup> Amêhén, nilumatêng hilan Apo Jesus ha legal lan Gereseno† ha lipay lanêm ha êtêb hên probinsyan Galilea. <sup>27</sup> Pagtaoy ni Apo Jesus ha bangka ay tinupa ya hên mihay lalaki ya taga bayro ha balayan ya habayto ya hinapatan hên nangarawak ya a angkahêlêk. Nabuyot yay nan, a ampagtakop. A yay na ampaidi ha bali, ta ampaidi ya tana ha pay-ilbêngan. <sup>28</sup> Hên nahêlêk na hi Apo Jesus, ay nan-angaw ya, bayo nandoko ya, hên nakadêngdêng ha arapan na, ta makhaw nan hinabi, ya wana, “Jesus, Anak ni Apo Namalyari, awta ampakiêménan mo ko? Ampakihabi ko kamo ya a mo ko dayin parusaan.” <sup>29</sup> Hinabi nay habayto gawan ampaalihêni Apo Jesus ya nangarawak ya nipanhumapat kanan lalaki. Hata lalaki ay panay anhapat hên nangarawak ya a angkahêlêk. Agyan ambantayan la ya hên kabaryo na, haka an-itaykala la ya gamêt haka bitsih na, ay pamboytoen nan bat ya habayto, bayo anipalako la ya ha marayo ha tawo hên hatoy nipanhumapat kana. <sup>30</sup> Amêhén, nangotang hi Apo Jesus, ya wana, “Hinoy langan mo?” Wanlan hinumapat kana etaman, “Libo-Libo.” Hinabi lay habayto, gawan mal-at ya nangarawak ya a angkahêlêk ya nipanhumapat kanan lalaki. <sup>31</sup> Habaytoy hinumapat ay nakiingalo kan Apo Jesus, ya paan hila dayin iutoh ha legal ya kparusaan, ya ayn anggaan ya kalaléan.

<sup>32</sup> Main kal-atan baboy bayro ya ampipambuk ha bung-oy ya narani ha lanêm. Nakiingalo hilay hinumapat hên paulayan hila dayi hên humapat kanlan baboy. Pinaulayan na hila etaman ni Apo Jesus. <sup>33</sup> Kabay inumalih hila kanan lalaki ta nipanhumapat hila kanlan baboy. Habaytoy baboy ya hinapatan la, ay nipamwayun palohan ha natalindah ya laylay lanêm hên nilêmêh ha dagat-dagatan.

<sup>34</sup> Hên nahêlêk lan manayhay hên baboy ya nalyari, ay nipamwayu hila ta impamwang lay habayto ha kaganawan baryo haka ha balayan la. <sup>35</sup> Hên nagilam lay balita la, ay nilako lan hinlêk ya nalyari. Hên nilumatêng hila kan Apo Jesus ay nahêlêk lay lalaki, ya inalihan nangarawak ya a angkahêlêk. Nakatakop yay na haka ampi kno ya ha dani ni Apo Jesus hên mapatêkbék ya ihip. Nipangkalimo hila ha kapangyarihan ni Apo Jesus. <sup>36</sup> Impamwang lan nakahêlêk ya dinyag ni Apo Jesus, no ay-êmén yan namaalih hên nangarawak ya a angkahêlêk ya hinumapat kanan lalaki. <sup>37</sup> Bayo nakiingalo hilay Gergeseno ya atsi bayro, kan Apo Jesus, ya mag-alih ya ha legal la. Dinyag lay habayto gawan hadyay limo la. Kabay hinumakay hilan Apo Jesus ha bangka hên paorong. <sup>38</sup> Hên nakitan nan lalaki ya inalihan nangarawak ya a angkahêlêk, ya paalih hilan Apo Jesus, ay nakiingalo ya hên gêtan ya dayi, noa, impaorong na ya ni Apo Jesus, ya wana, <sup>39</sup> “Muli kay na ha bali mo, ta ipamwang mo ya kangêran ya dinyag kamo ni Apo Namalyari.” Nammita yay nay lalaki ta impamwang na ha boon balayan ya habayto ya tungkol ha dinyag ni Apo Jesus.

† 8:26 Geraseno o Gadareno ha kaatag ya Kahulatan Griego.

*Biniyay ya anak ya babayi ni Jairo haka pinaalih ya hakit hēn mihay babayi ya labinloway taon nanan ampaghakit*

(*Mateo 9:18-26; Marcos 5:21-43*)

<sup>40</sup> Amêhēn, ha pag-orong lan Apo Jesus hēn nagbangkan ubat ha lipay, ay hinumigla hilay kal-atan ya ampangênggan kana. <sup>41</sup> Main dinumani hēn nandoko hēn nakadêngdêng ha bitsih ni Apo Jesus ya mihay ampamaala ha sinagoga bayro, ya nag langan Jairo. Nakiingalo ya kan Apo Jesus, ya kihonol ya dayi kana ha bali na, <sup>42</sup> gawan ampamérad-pérad yay nan matsi, ya kamiha-mihaan nan anak ya babayi, ya main manga labinloway taon.

Kaban ampita hilan Apo Jesus ha bali ni Jairo, ay ampi-pipiitan la yan kal-atan ya nakihonol kanla. <sup>43</sup> Kalamo lan hata kal-atan, ya mihay babayi, ya labinloway taon nanan andayaên. [Naiubuh nay na ya pibandian na ha hino-hino kay na hēn ya doktor, noa, ayn nakaalih hakit na.] <sup>44</sup> Kaban ampammita hila, ay dinumani ya hatoy babayi ta ginap-an nay laylayan takop ni Apo Jesus ha dapit bokotan, haka tambêng tinunggêن ya ampantoloy daya na.

<sup>45</sup> Tampol yan nangotang hi Apo Jesus, “Hinoy nakagapa hēn takop ko?” Hēn ayn mangamin, ay hinabi ni Pedro, “Panginoon, ampilolopungan la ka, haka la kan ampi-pipiitan hēn kal-atan!” <sup>46</sup> Noa, hinabi ni Apo Jesus, ya wana, “Main nakagapa hēn takop ko, ta natanam ko ya main inalihan hakit gawan ha kapangyarihan ko.” <sup>47</sup> Hēn namwangan nan babayi ya napansin ni Apo Jesus ya dinyag na, ay ampamêgpêg yan inumarap kana, hēn nandoko hēn nakadêngdêng. Ha arapan lan kal-atan, ay impamwang na no pata ginap-an na ya takop ni Apo Jesus, haka no ay-êmêne tambêng hēn tinunggêن ya ampantoloy daya na. <sup>48</sup> Amêhēn, wani Apo Jesus kanan babayi, “Inalih ya hakit mo gawan ha paniwala mo kangko. Muli kay na hēn mapatêkbék ya ihip.”

<sup>49</sup> Kaban ampaghabi ya pon hi Apo Jesus, ay main nilumatêng ya ubat ha bali ni Jairo, ya naghabi, “Natsi ya anak mo. A minan abalaên hi Apo Jesus hēn maniraw ha bali.” <sup>50</sup> Noa, hēn nagilam ni Apo Jesus ya habayto, ay wana kan Jairo, “Paan kan maglunkot. Maniwala ka tana kangko, ta ma-alih ya hakit hēn anak mo.” <sup>51</sup> Panlumatêng la ha bali lan Jairo, ya pinahowên nan bêngat ni Apo Jesus ay hi Pedro, hi Juan, hi Santiago haka hilay toa hēn hata anak. <sup>52</sup> Naubuh hilan ampipanangih haka ampipanyêngêن ya atsi bayro, kabay hinabi na kanla, “Paan kaw manangih ta a ya natsi. Nabêlêw yan bêngat.” <sup>53</sup> Kinailyan la ya hi Apo Jesus, ta muwang la ya pêtêg yay nan natsi. <sup>54</sup> Noa, tinalan ni Apo Jesus ya gamêt nan anak ta hinabi na, “Anak ko, mimata ka.” <sup>55</sup> Nabiyay yan oman haka tambêng yan nimata. Hinabi na êt ni Apo Jesus ya pakânêl la ya. <sup>56</sup> Nag-êpapah ya toa nan anak, noa, binawal na hila hēn paan ipamwang ha kaatag ya biniyay nay anak.

## 9

*Inutuhan na hilan manoro ni Apo Jesus ya labinloway tagahonol na ya binaêg lan apostol etaman*

(*Mateo 10:5-15; Marcos 6:7-13*)

<sup>1</sup> Mihay allo, ay tsinipon ni Apo Jesus ya labinloway tagahonol na, ta dinyanan na hila hēn kapangyarihan haka tungkulun hēn mamaalih hēn hakit haka kaganawan nangarawak ya a angkahêlêk. <sup>2</sup> Bayo in-utoh na hila hēn mamitoro hēn tungkol ha pamanlokop ni Apo Namalyari haka mamaalih hēn hakit. <sup>3</sup> Bayo hila nammita, ay hinabi na kanla, “Paan kaw mantan hēn hinoman ya nanad ha têkêñ, balutan, puto, pera, haka takop. <sup>4</sup> Magdahêl kaw ha balin managyat kamoyu, haka bayro kaw tana angga ha a pon nayari

ya pamitoro yo ha legal ya habayto. <sup>5</sup> No a la kaw tanggapén ha mihay legal, ay bayo kaw mag-alíh bayro, ay ikampag yoy tuwapok ha bitsih yo, ta êmén la mamwangan ya atsi tana kanla no lumaténg kanla ya parusa ni Apo Namalyari.” <sup>6</sup> Amêhén, nammita hilay na hên mamitoro hên Mangangêd ya Habi haka hên mamaalíh hên hakit ha ayri man ya legal.

*Niyumagah hi Herodes Antipas  
(Mateo 14:1-12; Marcos 6:14-29)*

<sup>7</sup> Hên nagilam ni Gobernador Herodes Antipas ya ampamaala ha Galilea ya tungkol ha kapapaépapah ya andaygén lan Apo Jesus, ay nanyagah yay na, gawan main ampaghabin hi Apo Jesus ay Juan Bautista ya impapatsi na, ya nangoman nabiyay. <sup>8</sup> Main kaatag ya ampaghabin nagpahlék ya hi propeta Elias.\* Ampaghabi êt hên kaatag, ya nangoman nabiyay ya miha kanlan kaatag ya mámipamwang hên an-ipaihip kanla ni Apo Namalyari hên haton lagi. <sup>9</sup> Amêhén, hinabi ni Gobernador Herodes Antipas, ya wana, “Impapotoh kinay ulo ni Juan Bautista, noa, hinoy hata lalaki ya angkababalit-an kon habaytsi ya angkalyari?” Kabay labay na ya dayin mahélék hi Apo Jesus.

*Liman libo ya pinakan ni Apo Jesus  
(Mateo 14:13-21; Marcos 6:30-44; Juan 6:1-14)*

<sup>10</sup> Hên nag-orong hilay nay labinloway apostol, ay hinabi la kan Apo Jesus ya dinyag la. Gintan na hila, hên kakapag lan bêngat, ha balayan Betsaida. <sup>11</sup> Hên namwangan lan kal-atan, ya atsi hila bayro, ay nangamat hila. Dinambi na hila etaman ni Apo Jesus. Intoro na kanla ya tungkol ha pamanlokop ni Apo Namalyari bayo namaalíh yan hakit la.

<sup>12</sup> Hên maranin matata ya allo ay dinumani kana ya labinlowa hên naghabi kana, ya wanla, “Dayi ipalako mo hilay kal-atan ha balang baryo, ya alwan marayo di ta êmén hila makatsikap hên maékan la haka mapagdahêlan la gawan ayn bali di.” <sup>13</sup> Noa, hinabi na kanla, ya wana, “Hikaw tanay mam-i kanla hên maékan la.” Hinabi la, ya wanla, “Main kitamon bêngat hên limay puto haka loway kênán lanêm. Labay mo hên manaliw kay hên kaén hên hatsi ya kal-atan?” <sup>14</sup> Hinabi lay habayto, gawan main manga liman libo ya lalaki bayro. Noa, hinabi ni Apo Jesus kanlan labinloway tagahonol na, ya wana, “Paiknoén yo hilan pusto-pusto ya mani-limampo ha balang pusto.” <sup>15</sup> Dinyag la ya kalabayan ni Apo Jesus. Pinaikno la ya kal-atan. <sup>16</sup> Kingwa ni Apo Jesus ya limay puto haka loway kênán lanêm. Naningla ya, ta pinahalamatan nay hatsi kan Apo Namalyari. Pino-potoh nay habayto, ta impatayak na kanlan tagahonol na. <sup>17</sup> Ya kaganawan tawo ay nakaékan angga ha nangabhoy hila. Hên tsinipon la ya tagan, ay nakapno hila êt hên labinloway lubon.

*Hinabi ni Pedro ya hi Apo Jesus, ay hiyay Cristo, ya impangakon Mámiligtas  
(Mateo 16:13-28; Marcos 8:27-9:1)*

<sup>18</sup> Mihay allo hên ampanalangin yan miha na hi Apo Jesus, ay dinumani kana ya tagahonol na. Kinotang na hila, ya wana, “Hino ko kano?” <sup>19</sup> Kabay hinabi la, “Wanlan kaatag ya hika ay hi Juan Bautista. Noa, wanlan kaatag êt ya hika ay hi Propeta Elias. Hilay kaatag êt ay ampaghabin nabiyay hên oman ya miha kanlan unan mámipamwang hên an-ipaihip kanla ni Apo Namalyari.” <sup>20</sup> Wana êt kanla ni Apo Jesus, “Kamoyu etaman, hino ko ha ihip yo?” Wani Pedro etaman, “Hika ya Mesias, ya Cristo, ya impangakon Mámiligtas ya pinili ni Apo Namalyari hên mamaala.”

\* <sup>9:8</sup> Ya mihay mámipamwang hên an-ipaihip kana ni Apo Namalyari.

<sup>21</sup> Noa, binawal na hila hên ipamwang ya hatoy hinabi ni Pedro ha hinoman. <sup>22</sup> Wana êt ni Apo Jesus, “Hiko ya Taga-Langit, ya In-anak Tawo, ay kailangan magtêêh hên hadyay pamagdusa. Hikoy araêñ lan mánoron Kautuhan ni apo Moises. Araêñ la kon toa ya nag tungkulan ha bansa, haka araêñ la ko êt hên ampamaala kanlan pari. Ipapatsi la ko, noa, ha ikatlon allo ay biyayêñ akon oman.”

<sup>23</sup> Bayo pinarani nay kal-atan hên kalamoy tagahonol na, ta wana kanla, “Hilay labay hên humonol kangko, ay dapat lan liwaan ya sarili lan kalabayan. Allo-allo ay dapat nakal-an hilan magtêêh hên kairapan, o matsu man, ya maialimbawa ha pamakay hên nabyat ya koros. <sup>24</sup> Hilay a mabay hên humonol kangko, gawan a la labay hên mangoman ya pamimiyay la, ay maalihan êt hên biyay. Noa, hilay matsu gawan ha paniwala la kangko, ay dyanan biyay ya ayn angga. <sup>25</sup> Agyan mikamihan kanan mihay tawo ya pibandian di ha luta, ay a na mapakinabangnan ya habayto, no hiya etaman ay mipalako ha kaparusaan ya ayn angga! <sup>26</sup> Ya balang maykarêng-êy ha toro ko, haka kangko, ya Taga-Langit, ya In-anak Tawo, ay ikarêng-êy ko hila êt ha pag-orong ko di. Ha pag-orong ko di, ay atsi kangko ya kapahilêw ya kahampatan ko, ya kapahilêw ya kahampatan ni Apo Namalyari, ya Tatang ko, haka ya kapahilêw ya kahampatan lan anghel na. <sup>27</sup> Pakagilamêñ yoy habaytsi, ya main ungno di kamoyu ya a matsu angga ha mahêlêk la, ya nilumatêng ya pamanlokop ni Apo Namalyari.”

*Hi Apo Jesus, hi apo Moises, haka hi apo Elias  
(Mateo 17:1-8; Marcos 9:2-8)*

<sup>28</sup> Hêñ nalabah ya manga waloy allo paubat hên hinabi nay habayto ni Apo Jesus, ay nilumakat ya ha tawtgug ta manalangin. Pinaglamo na hi Pedro, hi Juan haka hi Santiago. <sup>29</sup> Kaban ampanalangin ya, ay naoman ya itsura na. Ya takop na ay nag-in bapan putsi ya kapahilêw. <sup>30</sup> Namakonkaynaman ay main loway lalaki ya nagpahêlêk ya ampaghabi kan Apo Jesus. Hila ay hi apo Moises haka hi apo Elias ya lowa kanlan manan mâmipamwang ya an-ipaihip kanla ni Apo Namalyari. <sup>31</sup> Bat nilumtaw ya hata lowa hêñ main kapangyarihan haka ya kapahilêw ya kahampatan ni Apo Namalyari, ta pinihabian lay kamatsan kan Apo Jesus ya malyari ha balayan Jerusalem. <sup>32</sup> Hi Pedro haka hilay loway lamo na ay nabêlêw, noa, nipaalmugat hila ta nahêlêk la ya kapahilêw ya kahampatan ni Apo Jesus haka ya loway lalaki ya kalamo na. <sup>33</sup> Pammita lan lalaki, ay hinabi ni Pedro, ya wana, “Panginoon, mangêd ya atsi kitamo di. Manyag kay hêñ tatloy hawong. Miha kamo, miha kan apo Moises, haka miha kan apo Elias.” Hinabi nay habayto ni Pedro gawan nakatsigag ya. <sup>34</sup> Ampaghabi ya pon hi Pedro hêñ inupungan hila hêñ ginêm. Kabay nalimwan hilan Pedro. <sup>35</sup> Haka main hilan nagilam ya habi ya ubat ha ginêm, ya wanana habi, “Hatsi ya anlugurêñ kon Anak. Gilamêñ yoy habi na!” <sup>36</sup> Hêñ tinunggêñ ya habi, ay mimiha na tana ni Apo Jesus ya nahêlêk la. A la pon hinabi ha hinoman ya habaytoy nahêlêk la.

*Namipaplag hi Apo Jesus hêñ hinumapat hêñ ampamatugaw ha mihay anak ya lalaki*

*(Mateo 17:14-18; Marcos 9:14-27)*

<sup>37</sup> Hêñ humonoy allo, hêñ nakalohan hilay na ha tawtgug, ay tinupa hilan Apo Jesus hêñ kal-atan. <sup>38</sup> Namakonkaynaman ay namaêg ya mihay lalaki, ya wana, “Mâñoro, ingalwan mo dayi ya anak koy lalaki gawan hiyay kamiha-mihaan kon anak. <sup>39</sup> Bêngat yan andawhongêñ hêñ anhumapat kana, bayo ampiangaw-angaw ya. An-ibuwad-buwad na yan hata anhumapat kana

angga ha ampaggalak ya bêbêy na. Ampakahakitan na ya haka a na labay itêgén ya pamahakit na kana. <sup>40</sup> Impapakahabi kina ha tagahonol mo ya paalihén la ya, noa, a la ya agyu hén paalihén.” <sup>41</sup> Amêhén, wani Apo Jesus, “Hikaw ya angkabiyay amêhén ay ayn paniwala haka hadyay karawakan yo. Aydin angga kataw hén pakilamoan haka pakitagalán?” Bayo wana kanan lalaki, “Gêtan mo di ya anak mo.” <sup>42</sup> Kaban andumani ya anak ay impatumba yan hatoy hinumapat kana haka imbuwad-buwad na ya. Noa, hi Apo Jesus ay namawal kanan hinumapat haka namipaplag kana, bayo inorong nay anak ha toa na. <sup>43</sup> Naubuh hilan nag-épapah ha kapangyarihan ni Apo Namalyari.

*Inoman nan hinabi ni Apo Jesus ya patsén ya  
(Mateo 17:22-23; Marcos 9:30-32)*

Kaban ampag-épapah hila ha balang dyag ni Apo Jesus, ay hinabi na kanlan tagahonol na, ya wana, <sup>44</sup> “Pakagilamén yo. Hiko, ya Taga-Langit, ya In-anak Tawo, ay i-upit ha kapatsi ko.” <sup>45</sup> Noa, a la naintindihan hén tagahonol na ya habaytoy hinabi na, gawan habaytoy a impamwang kanla ni Apo Namalyari. Haka malimo hila etaman hén mangotáng.

*No hino ya matag-ay ya tungkulán  
(Mateo 18:1-5; Marcos 9:33-37)*

<sup>46</sup> Mihay allo ay pinihuhubakan lan tagahonol ni Apo Jesus no hino kanla ya matag-ay ya tungkulán. <sup>47</sup> Muwang ni Apo Jesus ya laman ihip la, kabay pinairéng nay mihay anak ya nanawa ha dani na. <sup>48</sup> Haka wana kanla, “Hinoman ya ampaniwala kangko, ya ampananggap kanlan maaypa ya nakém nanad hata anak, hén gawan habaytoy paniwala la kangko, ay hila ya matag-ay ya tungkulán. Ta ha pananggap la kanla, ay nanad hiko ya antanggapén la. Hila etaman ya ampananggap kangko, ay antanggapén la hi Apo Namalyari ya namiutoh kangko.”

*Hilay a ampanalanghang kantamo, ay ampanawop kantamo  
(Marcos 9:38-40)*

<sup>49</sup> Wani Juan kan Apo Jesus, “Nahélék naén ya mihay lalaki ya ampamaalíh hén nangarawak ya a angkahélék ha langan mo. Binawal naén ya gawan alwa tamo yan kalamo.” <sup>50</sup> Noa, wani Apo Jesus kana, “Paan yo yan bawalén, ta hilay a ampanalanghang kamoyu ay ampanawop kamoyu.”

*A la tinanggap hi Apo Jesus ha mihay baryo ha Samaria*

<sup>51</sup> Hén marani ya allon pamag-orong ni Apo Jesus ha langit, ay tinalagá na hén maniraw ha balayan Jerusalem. <sup>52</sup> Main yan in-utoh ya nuna kana ha mihay baryo ha Samaria hén namil-an pagdahélan lan Apo Jesus. <sup>53</sup> Noa, a la ya tanggapén bayro gawan magsimba ya ha Jerusalem, haka hilay Samaritano haka hilay ampagsimba ha Jerusalem ay a angkapiintindi. <sup>54</sup> Hén namwangan lan tagahonol na, hi Santiago haka hi Juan, ya nalyari, ay hinabi la, ya wanla, “Panginoon, labay mo hén mamaaypa kay hén apoy ya ubat ha langit êmén hila mangamamatsi?” <sup>55</sup> Noa, pinalingayan na hila, haka hinabyanan na hila. <sup>56</sup> Amêhén, nammita hila ha kaatag ya baryo.

*Hilay labay hén kihonol kan Apo Jesus  
(Mateo 8:19-22)*

<sup>57</sup> Ha pammita la, ay main lalaki ya naghabi kana, “Mánoro, kihonol ako kamo ayri man ya lakwén mo.” <sup>58</sup> Hinabi etaman kana ni Apo Jesus, “Hila man ya ahon lalé ay main lêyang ya ampaidyanan, haka hilay manok lalé ay main halay, noa, hiko ya Taga-Langit, ya In-anak Tawo, ay ayn dyanan di ha

luta.” <sup>59</sup> Bayo, hinabi na kanan kaatag, ya wana, “Kihonol ka kangko.” Noa, hinabi nan hatsi, ya wana, “Panginoon, paulayan mo ko pon hên mamilbêng toa ko.” <sup>60</sup> Noa, hinabi ni Apo Jesus kana, ya wana, “Paulayan mo hilay ayn biyay ya ayn anggaan hên mamilbêng kapareho lan natsi. Noa, hika ay dapat hên mamipamwang hên tungkol ha pamanlokop ni Apo Namalyari.” <sup>61</sup> Main kaatag ya naghabi, ya wana, “Panginoon, kihonol ako kamo, noa, paulayan mo ko pon hên magpamwang ha bali.” <sup>62</sup> Hinabi ni Apo Jesus kana, ya wana, “Alwan hépat ha mihay manyarol hên panay hên mamalingay. Embayro êt, alwan hépat hên makilamo ha pamanlokop ni Apo Namalyari ya hilay a nakapéptêng ya ihip ha pamanhumonol kana.”

## 10

*Namiutoh ya hi Apo Jesus hên pitumpo boy lowaya kaatagyta tagahonol na, ta êmén hila manoro hên habi ni Apo Namalyari*

<sup>1</sup> Pangayari hên habayto, ay namili ya hi Apo Jesus hên pitumpo boy lowa ya kaatag ya tagahonol na. Impauna na hila hên lowa-lowwa ha balang balayan haka ha balang baryo ya lakwên na, ta êmén hila manoro hên habi ni Apo Namalyari. <sup>2</sup> Bayo hila nammita, ay hinabi na kanla, “Hilay kal-atan ya labay hên manggilam hên tungkol kan Apo Namalyari, ay nanad hilan pali ya nawto ya maranin gapahêñ, gawan nakal-an hilay na hên maniwala. Malat ya gapahêñ, noa, u-ungnon bêngat hilay manggapah. Kabay ihalangin yo kan Apo Namalyari, ya nag pali, ya mamiutoh ya hên kaatag êt, ya kapareho yon manggapah, ta êmén hila etaman manoro hên tungkol kana. <sup>3</sup> Hali, mita kaw na. Noa, kaillag kaw, ta hikaw ay nanad anak tupa, ya an-iutoh ko kanlan nanad ahon lalê, ya mapamatsin tupa. <sup>4</sup> Paan kaw mantan hên pera, balutan, o paghagili hên pag-apin bitsih yo. A kaw magpabuyot hên maghabî ha katupa yo ha dann. <sup>5</sup> Bayo kaw hên humwên ha mihay bali, ay habiêñ yo pon, ‘Lumatêng dayi kamoyu ya ingalo ya pan-idin ni Apo Namalyari.’ <sup>6</sup> No ya nakêm lan hatoy nag bali ya anlakwên yo ay nakal-an hên mananggap ingalo ni Apo Namalyari, ay makatanggap hilan habayto. No a hila nakal-an hên mananggap ingalo na, ay a hila makatanggap hên habayto. <sup>7</sup> Bayro kaw tanan maglaêñ ha dinahêlan yoy bali. A kaw paálih-álih hên katuluyan yo. Kaêñ yo, haka inêmén yo, ya hinon iarap la kamoyu, ta hilay mag-obra ay dapat dyanan hên suweldo. <sup>8</sup> Ha balang balayan ya lakwên yo, no tanggapêñ la kaw, ay kaêñ yo ya iarap la kamoyu. <sup>9</sup> Paalihêñ yoy kaganawan hakit lan nipaghakit, bayo habiêñ yo kanlan atsi bayro ya êmén di, ‘Dinumani kamoyu ya pamanlokop ni Apo Namalyari.’ <sup>10</sup> Noa, paglatêng yo ha mihay balayan, ta a la kaw tanggapêñ, ay paan kaw magdahêl bayro. Bayo kaw mita, ay habiêñ yo kanla ya êmén di, <sup>11</sup> ‘Agyan tuwapok hên balayan yo, ya nipagpak ha bitsih naêñ, ay ikampag naêñ bayo kay mita, ta êmén yo mamwangan ya atsi tana kamoyu no lumatêng kamoyu ya parusa ni Apo Namalyari. Pakaihipêñ yo ya dinumani kamoyu ya pamanlokop na, noa, a kaw nagpalokop.’” <sup>12</sup> Hinabi nay na êt ni Apo Jesus kanlan tagahonol na, ya wana, “Pakagilamêñ yo, mabyat ya parusa kanlan taga-balayan Sodoma ya inulam ni Apo Namalyari hên hato, gawan hadyay kasalanan la. Noa, ha allon pamipapawa ni Apo Namalyari hên nagpalokop kana ha a nagpalokop kana, ay mas mabyat ya parusa kanlan hata balayan ya a nananggap kamoyu kanan parusa kanlan taga-balayan Sodoma.”

*Ya babalá kanlan a nipaghêhê  
(Mateo 11:20-24)*

<sup>13</sup> Inhundo ni Apo Jesus ya paghabi na, ya wana, “Kaingalo kaw ya taga-balayan Corazin haka taga-balayan Betsaida gawan a yo paghêhêan hên talibatokan ya pamanyag yon kasalanan, agyan mal-at ya kapapaêpapah ya dinyag ko bahêen. Mabyat ya kasalanan lan taga-balayan Tiro haka taga-balayan Sidon. Noa, no nadyag dayi kanla ya kapapaêpapah ya dinyag ko bahêen ha Corazin boy Betsaida, ay tampol la dayi bayton impahlêk ha dyag la ya pinaghêhêan haka tinalibatokan la ya pamanyag lan kasalanan, hên taga-Tiro haka Sidon. <sup>14</sup> Lumatêng lano ya allon pamipapawa ni Apo Namalyari hên nagpalokop kana, ha a nagpalokop kana, ay mas mabyat ya pamarusa kamoyun taga-Corazin haka Betsaida kanan pamarusa kanlan taga-Tiro haka Sidon. <sup>15</sup> Hikaw êt, ya taga-balayan Capernaum, êndat yo no mipalako kaw ha langit hên mananggap papuri, noa, ihamwag kaw ha impiyerno.” <sup>16</sup> Hinabi na êt ni Apo Jesus kanlan tagahonol na, ya wana, “Hilay ampanggilam kamoyu, ay ampanggilam kangko. Hilay ampangara kamoyu, ay hiko ya an-araêñ la. Hilay ampangara kangko, ay an-araêñ la hi Apo Namalyari ya namiutoh kangko.” Hêñ nayari yay nan naghabi hi Apo Jesus, ay nammitta hilay nay pitumpo boy lowa.

### *Ya pag-orong hêñ pitumpo boy lowa ya in-utoh ni Apo Jesus*

<sup>17</sup> Pag-orong lan pitumpo boy lowa, ay hadyay higla la. “Panginoon,” wanla, “hila man ya nangarawak ya a angkahêlêk ay nag-alih gawan ha kapangyarihan mo hêñ impaplag naêñ hila.” <sup>18</sup> Hinabi ni Apo Jesus kanla, “Nahêlêk ko hi Satanas ya innabo ubat ha langit, ya nanad ha kagalingan hên kimat. <sup>19</sup> Dinyanan kataw hêñ kapangyarihan hêñ torakan ya kapatsi tamo, ya hilan Satanas. Hila ay nanad utan haka mahlay ya konipit ya makamatsi, noa, a kaw mahakitan, torakan yo hila man. <sup>20</sup> Embayro man, ay paan kaw humigla, gawan hikaw ay namaalih hêñ nangarawak ya a angkahêlêk. Noa, dapat humigla kaw, gawan nakahulat ha langit ya langan yo, ya labay habiêñ ya nagbiyay kaw na hêñ ayn angga kalamo ni Apo Namalyari.”

### *Pinuri ni Apo Jesus hi Apo Namalyari*

*(Mateo 11:25-27; 13:16-17)*

<sup>21</sup> Hêñ habayto, ay pinahigla hi Apo Jesus hêñ Espiritu ni Apo Namalyari. Nanalangin ya hêñ êmêñ di, “Tatang ko ha langit, ampahalamatan kata, ya ampamaala ha langit haka luta, gawan impamwang mo ya tungkol kangko kanlan maaypa ya nakêm, ya a mo impamwang kanlan matag-ay ya pinagaralan, ya matag-ay ya nakêm. Awo, Tatang, ta habaytoy kalabayan mo.”

<sup>22</sup> Bayo wani ni Apo Jesus kanlan kal-atan, “In-ubuh nan impamwang kangko hêñ Tatang ko, hi Apo Namalyari ya tungkol kana. Ayn taganá makakilala kangko, ya Anak na, no alwan hiyan bêngat ya Tatang ko. Ayn êt taganá hêñ makakilala kanan Tatang ko, no alwan hikon bêngat, ya Anak na, haka hilay piliêñ ko hêñ makakilala kana.”

<sup>23</sup> Amêhêñ, hinabi ni Apo Jesus kanlan tagahonol nan bêngat, ya wana, “Iningalwan kaw, gawan angkakit yo ya dyag ko. <sup>24</sup> Hêñ hato, ay mal-at ya mâmipamwang hêñ an-ipaihip kanla ni Apo Namalyari, haka main ari ya labay dayi hêñ makahêlêk hêñ angkakit yo. Labay la dayin magilaman ya angkagilaman yo. Noa, a la nahêlêk ya angkakit yo. A la êt nagilam ya angkagilaman yo.”

### *Ya alimbawa ya tungkol ha lalaki ya taga-probinsyan Samaria ya nakain-galo*

<sup>25</sup> Minghan, main mánoron Kautuhan ni apo Moises ya nirêng, ta tuksoêñ na dayi hi Apo Jesus, ya wana, “Mánoro, hino ya daygêñ ko ta êmêñ ako

madyanan hēn biyay ya ayn angga?” <sup>26</sup> Kabay nangotang hi Apo Jesus kana, “Hinoy nakahulat ha Kautuhan ni Apo Namalyari? Hinoy angkabáha mo bayro?” <sup>27</sup> Amêhēn, hinabi nan lalaki, ya wana, “Dapat lugurēn tamo hi Apo Namalyari, ya Panginoon hēn boon nakêm, boon ihip, haka boon hēkaw. Dapat tamo etaman hēn lugurēn ya kapareho tamo hēn nanad pamanlugud tamo ha lawini tamo.” <sup>28</sup> “Pêtêg ya hinabi mo,” wani Apo Jesus. “No daygēn mo ya habain, ay madyanan kan biyay ya ayn angga.”

<sup>29</sup> Nangotang yay na êt kan Apo Jesus ya hata mánoron Kautuhan, gawan a na labay hēn mipakarêng-êy ya, ya wana, “Hinoy kapareho ko?”

<sup>30</sup> Kabay hinabi ni Apo Jesus, “Minghan main lalaki ya anlumohan ubat ha balayan Jerusalem palako ha balayan Jerico. Tinambangan la ya hēn nangarawak ya lalaki. Kingwa lay takop na. Pinakatumbuk la ya êt. Bayo imbalag la ya hēn pérad tanan natsi. <sup>31</sup> Amêhēn, ay main pari tamon taga-probinsyan Judea, ya nagdann bayro. Hēn nakit nay hatoy pérad tanan matsu, ay nagtugigih ya. <sup>32</sup> Embayro êt ya dinyag hēn mihay Levita, ya kapareho tamon taga-probinsyan Judea ya nagdann bayro, ay nagtugigih ya êt. <sup>33</sup> Noa, main mihay taga-probinsyan Samaria, ya nagdann bayro. Nahēn nahêlêk nay lalaki ya tinambangan, ay naingalwan na ya. <sup>34</sup> Nilako nay tinambangan, ta tinambalan nan alak haka laro ya manihugat-hugat na, bayo kinêlkêlan nay habayto. Inhakay na ya ha anhakyan na, hēn palako ha mihay bali ya pagdahêlan ya pan-upaan. Hinayhay na ya bayro. <sup>35</sup> Nahēn nagwatah, ay nam-i yan pera kanan hata nag bali, ta wana, ‘Hayhayêñ mo ya. No kulang ya hata anibalag ko, ay bayaran ko tana ya kulang ha pag-orong ko di.’” <sup>36</sup> Amêhēn, hinabi ni Apo Jesus ha mánoron Kautuhan ni apo Moises, ya wana, “Kanlan hatoy tatlo ya nagdann bayro ha lalaki ya tinambangan, ay hinoy main pamikipatêl ha kapareho na?” <sup>37</sup> “Hatoy nakaingalo kana,” wanana mánoron Kautuhan ni apo Moises. Kabay wani Apo Jesus, “Mita kay na, ta êmbayro êt ya daygēn mo.”

### *Hiniraw ni Apo Jesus hilay mitataali, ya hi Marta haka hi Maria*

<sup>38</sup> Inhundo ni Apo Jesus haka hilay tagahonol na ya pammita la. Nilumatêng hila ha balayan ya main babayi ya nag langan Marta ya nanagyat kanlan Apo Jesus ha bali na, ta mangan. <sup>39</sup> Main yan ali hi Marta hēn mihay babayi ya nag langan Maria, ya nikno ha danin bitsih ni Apo Jesus hēn ampanggilam toro na. <sup>40</sup> Noa, nampotog ya hi Marta ta mal-at ya an-iluto na hēn mimiha na. Kabay hinabi na kan Apo Jesus, ya wana, “Panginoon, a mo angkadambi ya pinaulayan na kon ali ko hēn manluto hēn mimiha ko? Iutoh mo ya dayi hēn hawpan na ko.” <sup>41</sup> “Marta, anak ko, mampotog ka ha kal-atan dyag. <sup>42</sup> Mihan bêngat ya kailangan. Pinili ni Maria ya mangêd, ta panggilamêñ nay panoro ko. Ayn mamawal kana.”

## 11

### *Ya panoro ni Apo Jesus ya tungkol ha Panalangin (Mateo 6:9-13; 7:7-11)*

<sup>1</sup> Minghan nanalangin ya hi Apo Jesus ha mihay logal. Pangayari na, ay hinabi kana hēn mihay tagahonol na, ya wana, “Panginoon, toroan mo kay dayi hēn manalangin hēn nanad panoro ni Juan Bautista ha tagahonol na.”

<sup>2</sup> Hinabi ni Apo Jesus, “No manalangin kaw, ay êmén di ya habiêñ yo:  
‘Tatang, puriêñ ka dayi hēn balang miha.

Dayi lumatêng ya pamanlokop mo.

<sup>3</sup> Dyanan mo kay dayi hēn kaén ya kailangan naén amêhêñ.

**4** Patawarêñ mo kay dayi ha kasalanan naêñ ta ampatawarêñ naêñ etaman ya kaganawan ya nakadyag kasalanan kannaêñ.  
Paan mo kay paulayan hên matukso.’”

**5** Hinabi nay na êt ni Apo Jesus kanlan tagahonol na, ya wana, “Waringan, ya miha kamoyu ay lumatêng ha balin kaluguran na hên bonak yabi, ta habiêñ na ya êmêñ di, ‘Kalalaki, dyanan mo ko pon hên maêkan. **6** Nilumatêng ya kaatag ya kaluguran ko ya nagdann di, ya ubat ha marayo, noa, ayn akon maipakan kana.’ **7** Êmbayro man, ay hinabi nan kaluguran na ha lalêñ bali na, ya wana, ‘A mo kon abalaêñ. Nakakabat ya ilwangan, ta angkabêlêw kay, anggan maának ko. A ko kaimata hên mam-in kailangan mo.’

**8** “Anhabiêñ ko kamoyu ya no a ya dayi mimata gawan ha pamilulugud la, ay mimata ya gawan pamalêkpêk hên hata kaluguran na, bayo idin nay kailangan hên kaluguran na. **9** Kabay wangko kamoyu, pakapakikwaan yoy kailangan yo kan Apo Namalyari, ta dyanan na kaw. Pakatapolêñ yo ya kailangan yo kana, ta hawpan na kaw. Pakabaêgén yo ya, ta gilamêñ na kaw hên nanad ha kabat ya loatêñ. **10** Daygêñ yoy habayto, ta hilay ampakikwa ay dyanan. Hilay ampanapol hên kailangan la kana ay makatapol. Hilay ampamaêg ay gilamêñ hên nanad ha kabat ya loatêñ. **11** Ayn miha man kamoyu ya mam-in nabiyay ya utan ya makamatsi ha anak yo, no kikwa yan kênan lanêñ. **12** Ayn etaman mam-in mahlay ya konipit ha anak na, no kikwa yan pogâ. **13** Makasalanan kaw man, ay kamwang kaw hên mam-in ikakangêd ha maának yo. Hi Apo Namalyari pon kaya, ya Tatang tamo ha langit, ya ayn kasalanan, ay yarin a ya mamahapat hên Espiritu na kanlan balang kikwan habayto kana!”

*Ya kapangyarihan ni Apo Jesus ay ubat kan Apo Namalyari, alwan ubat kan Satanas*

*(Mateo 12:22-30; Marcos 3:20-27)*

**14** Minghan impaplag ni Apo Jesus ya mihay narawak ya a angkahêlêk ya hinumapati, hên namaomêl ha mihay lalaki. Hên inumalih yay na, ay ampakahabi yay nay omêl. Nag-êpapah hilay kal-atan ya atsi bayro. **15** Noa, panhabiêñ lan kaatag, ya pamaalih ni Apo Jesus hên nangarawak ya a angkahêlêk, ay ha kapangyarihan ni Satanas,\* ya poon lan nangarawak ya a angkahêlêk. **16** Hilay kaatag etaman, ay labay la yan subukêñ, kabay hinabi la kana ya mamipahlêk yan palatandaan, ya ubat ha langit, ta êmêñ la mamwangan no pêtêg hên atsi kana ya kapangyarihan ni Apo Namalyari. **17** Muwang ni Apo Jesus ya laman ihip la, ya êndat la no ubat kan Satanas ya kapangyarihan na. Kabay hinabi na, “No alimbawa ta mipapatsi ya angkalokopan hên mihay bansa, ay mahira ya habayto. Êmbayro êt ya mal-yari ha mipapamília ya mipapatsi. **18** No mipapatsi hilay angkalokopan ni Satanas, ay mahira bayto ya pamanlokop na. Panhabiêñ yo ya ampamaalih akon nangarawak ya a angkahêlêk ha kapangyarihan ni Satanas. **19** No êmbayro awud, ay anto baytoy ubatan kapangyarihan hên kalamo yo, ya ampamaalih hên nangarawak ya a angkahêlêk? Hila êt ya ampamaptêg hên mali kaw. **20** Ha kapangyarihan ni Apo Namalyari ya pamaalih ko hên nangarawak ya a angkahêlêk. Ya labay habiêñ hên habayto, ay atsi kamoyu ya pamanlokop ni Apo Namalyari.

**21** “No main mihay makhaw, ya mal-at ya almas, ya ampamantay ha bali na, ay a makwa ya hinon atsi kana. **22** Noa, no main lumatêng ya makhaw

\* **11:15** Beelzebul ha habin Griego.

êt kana, ay hambutêna ya, ta kowêna ya almas ya an-asaan na, haka ya kaganawan ya atsi kana, ta iatag-atag na.

<sup>23</sup> “Hilay ayn pon ha lokop ko, ay kapatsi ko. Haka hilay a ampanawop hên manipon hên tawo ta êmén hila makilamo kangko, ay ampamidayo hên tawo kangko.

*Ya pamag-orong nan narawak ya a angkahêlêk  
(Mateo 12:43-45)*

<sup>24</sup> “No umalih ha mihay tawo ya narawak ya a angkahêlêk, ya hinumapat kana, ay tawak-tawakêna nay namala ya luta, ta manapol yan mapagpatékbékan na. Noa, ayn yan matapol. Kabay wana ha nakêm na, ‘Mag-orong ko ha tawo ya ubatan ko.’ <sup>25</sup> Pag-orong na, ay malatêng nay ubatan na, ya ayn êt napahili kana, malinis, haka nakakumpini, ya nakal-an hên togélan. <sup>26</sup> Kabay managyat yan pitoy kapareho nan a angkahêlêk, ya narawak êt kana, ta paglamo na bayro. Haka humwêna hila, kabay lalo yay nan kaingalo ya hatoy tawoy inorongan na.”

*Ya mantêg iningalwan*

<sup>27</sup> Kaban ampaghabi ya pon hi Apo Jesus, ay main mihay babayi bayro ha kal-atan, ya naghabi hên makhaw kan Apo Jesus, “Iningalwan ya namianak haka namahoho kamo.” <sup>28</sup> Noa, hinabi ni Apo Jesus kana ya êmén di, “Lalo hên an-ingalwan ya ampanggilam haka anhumonol ha habi ni Apo Namalyari.”

*Ya toro ni Apo Jesus tungkol kanlan ampanapol hên palatandaan ya ubat ha langit*

*(Mateo 12:38-42)*

<sup>29</sup> Kaban ampi-tsi-tsipon hilay kal-atan ha dani ni Apo Jesus, ay inhundo nay pamaghabi na, ya wana, “Bapan dawak hilay tawo amêhên. Ampanapol hilan kapapaêpapah ya palatandaan ya ubat ha langit. Noa, ayn ipahlêk kanla, no alwan nanad ha naipahlêk hên hato, ya kapapaêpapah ya nalyari kan Propeta Jonas.† <sup>30</sup> No ay-êmén yan nag-in palatandaan kanlan tagabalyan Ninive, hi Propeta Jonas, ay êmén êt bayro hiko, ya Taga-Langit, ya In-anak Tawo, ay mag-in palatandaan kanlan tawo amêhên. <sup>31</sup> Ha Allon Pamanukom ni Apo Namalyari, ay mirêng ya Reyna hên Sheba hên hato hên habyanan na kaw. Mipakarêng-êy kaw, ta agyan hadyay dayo na, ay nilako na hi Arin Solomon, ta labay nan gilamén ya toro na. Amêhên, ay main di ya matag-ay ya tungkulon kan Arin Solomon, noa, a kaw ampanggilam. <sup>32</sup> Ha Allon Pamanukom ni Apo Namalyari, ay mirêng hilay taga-Ninive, ya nipaghêhên pamanyag lan kasalanan, hên haton nagilam lay toro ni Propeta Jonas, ta habyanan la kaw, gawan main di ya matag-ay ya tungkulon kan Propeta Jonas, yan a kaw naghêhên nanalibokot ha pamanyag yon kasalanan.”

*Nangalimbawa hi Apo Jesus hên tungkol ha hawang  
(Mateo 5:15; 6:22-23)*

<sup>33</sup> Hinabi nay na êt ni Apo Jesus, ya wana, “Ayn mamagkêt hên atâng, bayo ihinêp o itagpén. Noa, ya atâng ay idin ha mantêg hên pamyanan atâng, ta êmén mahawangan ya danan lan anhumwên. <sup>34</sup> Ya mata yo ay nanad pagatâng yo. No nahawang ya mata yo, ay mahawangan êt ya nakêm yo. Noa, no napukakê ya angkahêlêk yo, ay nanad nariglêm êt ya nakêm yo. <sup>35</sup> Kabay kaillag kaw, ta kayno ya êndat yon hawang, ya atsi kamoyu, ay kariglêman

† **11:29** No ay-êmén hi Propeta Jonas ha tatloy allo haka tatloy yabi, ha bitokan kahlayan pating.

awud. <sup>36</sup> No nahawangan ni Apo Namalyari ya nakêm yo, ta ayn man pérad ya kariglêman bahên, ay hadyay hawang ya biyay yo, ya nanad angkahawangan hêñ hadyay hawang ya atâng.”

*Hilay Pariseo haka hilay mánoron Kautuhan ni apo Moises ay hinabyanan ni Apo Jesus*

*(Mateo 23:1-36; Marcos 12:38-40)*

<sup>37</sup> Hêñ nayari yay nan nanoro hi Apo Jesus, ay main Pariseo ya nanagyat kana hêñ mangan. Kabay nakilako ya, haka inarap nay kaêñ. <sup>38</sup> Nag-épapah ya habaytoy Pariseo hêñ napansin na, ya a ya pon nag-uyah gamêt na hi Apo Jesus, bayo ya nangan.† <sup>39</sup> Kabay wani Apo Jesus kana, “Hikaw ya Pariseo, ay maialimbawa ha mihay ampanguyah bat hêñ bulin baso haka bokot pinggan, ya a ampanguyah hêñ mantêg dêmék. Ta ampanguyah kaw hêñ gamêt yo, noa, ampaulayan yoy nakêm yo, ya hadyay kahibaan haka karawakan. <sup>40</sup> Mulala kaw lawêh! Ya nanyag hêñ lawini, ay hiya êt ya nanyag hêñ nakêm. <sup>41</sup> Noa, idin yo dayi kanlan ayn maêkan ya laman hêñ pinggan yo, ta habaytoy mamalinis hêñ kabooan hêñ atsi kamoyu.

<sup>42</sup> “Kaingalo kaw ya Pariseo! Mangêd ya an-idin yo kan Apo Namalyari ya ikamapo hêñ bulong ya pan-ihabug yo ha habaw yo, noa, angkapaulayan yoy maalagá, ya katoynungan haka ya pamanlugud yo kan Apo Namalyari. Dapat yon idin kana ya ikamapo, noa, paan yon paulayan ya katoynungan haka ya pamanlugud yo kana.

<sup>43</sup> “Kaingalo kaw ya Pariseo! Ta labay yoy pinakamangêd ya iknoan ha sinagoga,§ haka labay yon galangêñ la kaw ha balayan. <sup>44</sup> Kaingalo kaw ya Pariseo! Maialimbawa kaw ha pinangilbêngan ya bawal hêñ torakan ya ayn palatandaan, ya angkatorakan tawo gawan a la muwang. Ha hêlêk lan tawo ay mangêd kaw, yan antoroan yo hila hêñ manyag kasalanan hêñ a la muwang.”

<sup>45</sup> Amêhêñ, hinabi nan mihay mánoron Kautuhan ni apo Moises kana, ya wana, “Mánoro, ha hinabi mo, ay angkahugatan kay etaman.” <sup>46</sup> Kabay hinabi ni Apo Jesus, “Kaingalo kaw etaman, ya mánoron Kautuhan ni apo Moises, ta hadyay bêyat ya an-ipadyag yo kanlan kaatag, noa, pérad man, ay a kaw ampanawop kanla. <sup>47</sup> Kaingalo kaw, ta ampamadyag kaw hêñ pantson lan propeta ni Apo Namalyari ya pinatsi lan ninuno yo. <sup>48</sup> Ya panyag yon habayto, ay pamaptêg ya an-umuyon kaw ha dinyag lan ninuno yo. Pinatsi lay propeta ni Apo Namalyari, bayo ampamadyag kaw pon êt hêñ pantson lan pinatsi la. <sup>49</sup> Gawan êmbayro, ay hinabi nan kamwangan ni Apo Namalyari, ‘Tutoh ko kanla hilay mâmipamwang hêñ an-ipaihip ko kanla haka hilay apostol. Ya kaatag ay patsêñ la. Ya kaatag êt ay pairapan la.’ <sup>50</sup> Kabay tanggapêñ lan tawo amêhêñ ya parusa, gawan ha pangamatsi lan habaytoy mâmipamwang, paubat hêñ dinyag nay hata luta angga amêhêñ. <sup>51</sup> Mal-at ya pinatsi paubat hêñ pinatsi hi Abel, angga ha pinatsi hi Zacarias, ya pinatsi ha pilatan hêñ pamiulaman hêñ an-iátang kan Apo Namalyari haka ya Templo. Anhabiêñ ko kamoyu, parusaan ya tawo amêhêñ, gawan ha pangamatsi lan habayto.

<sup>52</sup> “Kaingalo kaw ya mánoron Kautuhan ni apo Moises! Inalíh yoy susi hêñ kabat ha balin nag kamwangan tungkol ha kalabayan ni Apo Namalyari. A kaw anhumwêñ, bayo ambawalêñ yo êt hilay labay humwêñ.”

† **11:38** Gawan kanlan Israelita, ay bawal mangan no a pon nag-uyah hêñ pahonol ha paniwala la. § **11:43** Ya pinakamahlay ya pagsimbaan lan Israelita ay ha Jerusalem, noa, main nanaway pagsimbaan ya nag langan sinagoga ha balang balayan ya nag mapoy Israelita ya nag ahawa.

<sup>53</sup> Hêñ nayari yan naghabi, ay nimitay na hi Apo Jesus bayro ha bali. Paubat hêñ habayto, ay minusmus la ya hêñ Pariseo haka mánoron Kautuhan ni apo Moises. Mal-at ya an-ikotang la kana ta <sup>54</sup> inimatonan la ya, ta êmêñ la yan madakêp ha pamaghabi na.

## 12

### *Kaillag kaw kanlan magbabara* (Mateo 10:26-27)

<sup>1</sup> Hêñ hato, libo-liboy ni-tsi-tsipon angga ha nangapitotorak hilan bitsih. Naghabi ya pon hi Apo Jesus kanlan tagahonol na, ya wana, “Kaillag kaw ha pampaalsa lan Pariseo, ya pagbabara lan anhumonol hila kan Apo Namalyari. <sup>2</sup> Ayn intago ya a mamwangan haka mihungbung. <sup>3</sup> Ya hinabi yo ha nariglêm, ay magilaman ha nahawang. Ya inanah yo ha bali yo, ay miangaw.”

### *No hino ya dapat kalimwan* (Mateo 10:28-31)

<sup>4</sup> “Anhabîen ko kamoyun kaluguran ko, paan yon kalimwan ya labay mamatsin lawini yo, ta lawini yon bêngat ya mapatsi la. A la man magêtan ha impiyerno ya kaêlwa yo. <sup>5</sup> Anhabîen ko kamoyu no hino ya dapat yon kalimwan. Kalimwan yo hi Apo Namalyari, ta panga-ubat nan mangwan biyay, ay main ya êt hêñ kapangyarihan hêñ mamitapon kaêlwa yo ha apoy ya taganán a maparê ha impiyerno. Awo. Habiên ko kamoyu, hiya ya kalimwan yo, alwan kaatag.

<sup>6</sup> “Noa, hadyay lugud ni Apo Namalyari, ta agyan hilay nanaway manok lalê, ay a na ampaulayan. <sup>7</sup> Agyan habot ulo yo, ay muwang nay bilang. Kabay paan kaw malimo. A na kaw paulayan, ta maalagá kaw kanlan mal-at ya manok lalê.”

### *Dapat tamon ipamwang ya paniwala tamo kan Apo Jesus* (Mateo 10:32-33; 12:32; 10:19-20)

<sup>8</sup> Hinabi nay na êt ni Apo Jesus, “Hilay alwan marêng-êy hêñ mamaptêg ha arapan hêñ kal-atan ya hila ay ampaniwala kangko, ya Taga-Langit, ya In-anak Tawo, ay a ko etaman ikarêng-êy ha arapan lan anghel ni Apo Namalyari. <sup>9</sup> Noa, hilay ampaghabi ha arapan hêñ kal-atan, ya a hila ampaniwala kangko, ay habiên ko etaman lano ha arapan lan anghel ni Apo Namalyari, ya a ko hila muwang.

<sup>10</sup> “Hilay maghabi hêñ pamanira kangko, ya Taga-Langit, ya In-anak Tawo, ay mapatawed. Noa, hilay maghabi hêñ pamaniran Espiritu ni Apo Namalyari, ay a mapatawed.

<sup>11</sup> “Idikil la kaw ha sinagoga haka la kaw gêtan kanlan kaatag ya manungkulon, ta kotangêñ la kaw, noa, paan kaw manyagah no hinoy pakibat yo, <sup>12</sup> ta habayto êt ay mamitoro kamoyu ya Espiritu ni Apo Namalyari no hinoy habiên yo.”

### *Ya ayn minúwang ya mabandi*

<sup>13</sup> Amêhêñ, ya miha kanlan kal-atan, ay naghabi kan Apo Jesus, ya wana, “Mánoro, iutoh mo ha kaka ko ya atagan na ko ha mana naêñ ha tatang naêñ.” <sup>14</sup> Wani Apo Jesus kana, “Pata kotangêñ mo kangkoy habain? Alwan tungkulon ko hêñ manlingon ha pamiatag hêñ mana yo.” <sup>15</sup> Bayo wana kanlan kal-atan, “Illagan yoy nakêm yo ha kaganawan karidyaan, ta ya biyay ay a angkakwa ha mal-at ya pibandian.” <sup>16</sup> Amêhêñ, in-alimbawa ni Apo Jesus hêñ êmêñ di, ya wana, “Ya mihay mabandi ay nakagapah hêñ hadyay

lakê ha luta na. <sup>17</sup> Amêhén, nangihip ya hata mabandi no hino ya daygén na, ta kulang ya pamyanan na hén nagapah na. <sup>18</sup> Naihipan na ya agwatén nay pamyanan na hén nagapah na, ta manyag yan bayo, ya mahlay, ya pamyanan nan kaganawan pibandian na. <sup>19</sup> Ta atsi ha ihip na, no manyag yan habayto, ay mahabi na ha nakém na ya pamamatuloy na tana, mangan, miném, haka magpakahigla, ta a yay na maalihan hén hinon maékan ha malat ya taon. <sup>20</sup> Noa, wani Apo Namalyari kana, ‘Mulala ka! Amêhén yabi, ay maalihan kan biyay. Kabay a mina mapakinabangnan ya imbuton mo ya para kamon bengat.’ ” <sup>21</sup> Hén nayari ni Apo Jesus ya habaytoy alimbawa na, ay wana, “Êmbayroy malyari kanlan ampaybunton hén pibandian, noa, ampagkulang hila ha arapan ni Apo Namalyari.”

*Ya paniwala kan Apo Namalyari*

(Mateo 6:25-34)

<sup>22</sup> Bayo hinabi ni Apo Jesus kanlan tagahonol na, ya wana, “Paan kaw manyagah, no hinoy maékan yo, ta êmén kaw mabiyay. Paan kaw êt manyagah no hinoy maitakop yo. <sup>23</sup> Gawan ya biyay ay maalagá ha kaén, haka ya lawini ay maalagá ha takop. <sup>24</sup> Hêlkén yoy manok lalê. A hila ampananêm o ampanggapah man, haka ayn hilan pamyanan hén nagapah la. Êmbayro man, ay ampakanên hila ni Apo Namalyari. Taganán maalagá kaw kanlan manok lalê, kabay a na kaw paulayan! <sup>25</sup> Manyagah kaw man, ay a yo mapakarang ya biyay yo! <sup>26</sup> No pérad man, ay a yo mapakarang ya biyay yo ha kayagahan yo, ay pata manyagah kaw hén tungkol ha hinoman! <sup>27</sup> Awta manyagah kaw no hinoy itakop yo! Ihipén yo tanay pamantumubo hén bulaklak. A hila ampag-obra o ampanayi man hén takop la. Agyan hi Arin Solomon, ha kal-atan bandi na, ay a ya nakapagtakop hén nanad kahampatan hén mihay bulaklak. <sup>28</sup> No ya lamon, ya angkabiyay pon amêhén, bayo ulamén pangawatah, ay ampaahampatén ni Apo Namalyari, yarin a na kaw dyanan takop! Kulang awud ya paniwala yo kana. <sup>29</sup> Kabay paan kaw manyagah ha panapol yon maékan haka mainém yo. <sup>30</sup> Ta hilay a ampagpalokop kan Apo Namalyari, ay panay hén ampanyagah no hinoy maékan haka mainém la. Noa, hikaw ay paan yo hilan totoén, ta muwang ni Apo Namalyari ya Tatang tamo ya kailangan yoy habayto. <sup>31</sup> Kabay unaén yoy pagpalokop yo kan Apo Namalyari, ta idin na ya kaganawan kailangan yo.”

*Ya toro ni Apo Jesus ya tungkol ha pibandian ha langit*

(Mateo 6:19-21)

<sup>32</sup> Amêhén, hinabi nay na êt ni Apo Jesus kanlan tagahonol na, ya wana, “Paan kaw malimo agyan pêpérad kaw, ta mahigla hi Apo Namalyari, ya Tatang yo hén ilamo na kaw ha pamanlokop na. <sup>33</sup> Ihaliw yoy pibandian yo, ta mam-i kaw kanlan ampangailangan. Ya mangéd ay manipon kaw hén pibandian ha langit, ta ha êmbayro, ay nanad kaw hén main pamyanan pera ya a mahira, haka a maalihan laman. Ta habaytoy pibandian ay a maplak, haka a êt mahira hén anag. <sup>34</sup> Dapat yon daygén ya habayto, ta no anto ya pibandian yo, ay atsi êt bayro ya nakém yo.”

*Ya mihay mangéd ya ipoh ay panay nakal-an*

<sup>35</sup> Hinabi nay na êt ni Apo Jesus, ya wana, “Dapat panay kaw hén nakal-an, hén nanad ha mihay mangéd ya ipoh ya panay nag dêkêt ya solo, ta êmén kaw <sup>36</sup> mag-in nanad kanlan panay nakal-an hén tampol manloat danan hén amo la uston mamaég ya, parmanlumaténg nan ubat ha kasálan. <sup>37</sup> Hadyay higla lan ipoh, no malaténg hilan amo la hén nakal-an. Paiknoén hilan amo

la, ta hiyay mamiapag kaên la. <sup>38</sup> Hadyay higla lan ipoh no malatêng na hilan nakal-an, pammuli na hên bonak yabi o maranon man. <sup>39</sup> Pakaihipên yoy hatsi, no muwang na dayi hên nag bali no hinon oras hên lumatêng ya manakaw, ay a na ya paulayan hên mahowên ya bali na. <sup>40</sup> Hikaw man, ay kailangan nakal-an kaw, ta hiko ya Taga-Langit, ya In-anak Tawo, ay biglan lumatêng.”

*Ya mihay ipoh ay dapat mapaypaniwal-an  
(Mateo 24:45-51)*

<sup>41</sup> Amêhên, wani Pedro, “Panginoon, hinabi moy hatoy alimbawa para bêngat kannaên hên labinloway tagahonol mo o para ha kal-atan?” <sup>42</sup> Kabay wani Apo Jesus, “Ya ipoh ya mapaypaniwal-an haka magaling, ay hiya ya dyanan tungkulan no main yan lakwên ya amo na. Hiya ya manalan bali na, haka mamiarasyon hên iluto lan kapareho nan ipoh, hên allo-allo. <sup>43</sup> Hadyay higla hên ipoh, no malatêng na yan amo na hên ampanyag kalabayan na ha pag-orong na. <sup>44</sup> Pakagilamên yo, dyanan na yan tungkulan hên amo na hên manalan hên hinon pibandian na. <sup>45</sup> Noa, no ihipên nan hatoy ipoh ya mabuyot pon lumatêng ya amo na, bayo umpisaan nan pakatumbukên ya kapareho nan ipoh, ya lalaki haka babayi, ta mangan ya tana haka maglahing êt, <sup>46</sup> ay no biglan lumatêng ya amo nan hatoy ipoh, ay parusaan nay ipoh na hên hadyay bêyat, bayo ilamo na ya kanlan a ampaniwala, bayro ha parusa ya ayn angga.

<sup>47</sup> “Ya ipoh ya ampakamwang kalabayan hên amo na, noa, a ya nakal-an hên honolên ya habayto, ay parusaan ya hên mabyat ya parusa. <sup>48</sup> Noa, ya ipoh ya a ampakamwang no hinoy pan-ibawal hên amo na, ya nakadyag hên bawal ya dapat pamarusaan kana, ay parusaan hên alwan mabyat. Hilay dinyanan ni Apo Namalyari hên mal-at, ay mal-at etaman ya tapolên kanla. Hilay pinatsiwal-an hên mal-at, ay panapolan êt hên mal-at.”

*Main pamigagampi gawan main maniwala kan Apo Jesus haka main a maniwala  
(Mateo 10:34-36)*

<sup>49</sup> Wanay na êt ni Apo Jesus, “Atsi ko di ha luta hên ampantan hên nanad apoy ya pamanatol ni Apo Namalyari. Dayi napagkêtan ana ya habayto. <sup>50</sup> Noa, hadyay bêyat ya kailangan kon danan pon. Habayto ya ampamagulon ihip ko angga ha a ya pon matupad. <sup>51</sup> Paan yon ihipên ya nantan akon pamikiúmang ha miha ta miha, ta hikoy pangubatan hên pamigagampi, gawan main maniwala kangko, haka main a maniwala. <sup>52</sup> Paubat amêhên, no alimbawa ta main limay katawo ha mihay pamilya, ay alwan parehoy ihip la, ta ya tatlo ay mihay ihip kanlan lowa. <sup>53</sup> Ta hilay ampaniwala haka hilay a ampaniwala, ay alwan parehoy ihip. Ya tatang ay mihay ihip ha anak nay lalaki. Ya indo ay mihay ihip ha anak nay babayi. Ya ampo ya babayi ay mihay ihip ha manuyang nay babayi.”

*Dapat maintindihan ya labay habiên hên angkalyari amêhên panaon  
(Mateo 16:2-3)*

<sup>54</sup> Wanay na êt ni Apo Jesus kanlan kal-atan, “No mahêlêk yo ya naborêg ha dapit kanaboan allo, ay habiên yo, ‘Manguran ya.’ Ay manguran ya bay. <sup>55</sup> No angkapansin yoy angin ya ubat ha kabalah-balahan, ay habiên yo, ‘Mag-in hadyay omot amêhên.’ Ay mag-in hadyay omot bay. <sup>56</sup> Ampagbabara kaw! Muwang yo no hinoy labay habiên hên angkakit yo ha langit. Yarin a yo muwang ya labay habiên hên angkalyari amêhên panaon!”

*Dapat makiúmang ha kapatsi yo  
(Mateo 5:25-26)*

<sup>57</sup> Wana êt ni Apo Jesus, “Pata a kaw manimbángan no hinoy hépat? <sup>58</sup> No main mamidikil kamoyu, ta gêtan la kaw ha mónlíngon kaso, ay mangêd ya makikatoynungan kaw pon kanla ha dann, ta êmén a la kaw na gêtan ha mónlíngon kaso. Ta kayno idin na kaw ha magbantay hén hukulan, ta ikulung kaw. <sup>59</sup> Kabay bayro kaw tana ha hukulan angga ha a yo mabayaran ya kaganawan ya ipabayad la kamoyu.”

## 13

*Dapat paghêhêan ya kasalanan*

<sup>1</sup> Hén habayto, kaban ampaghabi ya pon hi Apo Jesus, ay nilumatêng ya ungnoy namihumbung kana, ya wanla, “Impapatsi ni Gobernador Pilato ya ungnoy taga-probinsyan Galilea kaban ampangátang hila hén ampakikwan patawad kan Apo Namalyari.” <sup>2</sup> Hinabi ni Apo Jesus kanla, ya wana, “Êndat yo no mabyat ya kasalanan lan hata taga-Galilea kanlan kasalanan lan kaatag ya taga-Galilea, gawan êmbayro ya nalyari kanla? <sup>3</sup> Alwa! Noa, anhabiên ko kamoyu, no a yo paghêhêan hén talibatokan ya pamanyag yon kasalanan, ay matsi kaw ngan etaman. <sup>4</sup> Ihipên yo hilay labinwalo ya natsi hén natumba ya tawer ha Siloe. Êndat yo no mabyat ya kasalanan la kanlan kasalanan lan kaatag ya ampaidi ha balayan Jerusalem? <sup>5</sup> Alwa! Noa, anhabiên ko kamoyu, no a yo paghêhêan hén talibatokan ya pamanyag yon kasalanan, ay matsi kaw ngan etaman.”

*Ya alimbawa tungkol ha poon kayo ya nag langan igos*

<sup>6</sup> Amêhén, nam-i yan alimbawa hi Apo Jesus, ya wana, “Main mihay lalaki ya nag poon kayoy igos ha pananéman nan ubas. Minghan nanapol yan tagêy hén hatoy igos, noa, ayn. <sup>7</sup> Kabay hinabi na ha ampanayhay hén tanaman na, ya wana, ‘Tatloy nay taon hén ampanapol akon tagêy hén hata igos, noa, ayn. Potohén mina, ta bêngat ya tanan angkahayang ya luta.’ <sup>8</sup> Noa, hinabi nan ampanayhay hén tanaman, ya wana, ‘Apo, paulayan mo ya pon hata taon, ta gambolén koy poon na, ta dyanan ko yan abono. <sup>9</sup> No managêy ya ha taon, ay mangêd. No a ya êt managêy, ay ipapotoh mina bayto kangko.’”

*Namaalih hi Apo Jesus hén hakit hén mihay babayi ya nakuba*

<sup>10</sup> Mihay allon pamagsimba, ay ampanoro ya hi Apo Jesus ha miha kanlan sinagoga. <sup>11</sup> Main babayi bayro ya hinapatan hén namakuba kana, hén labinwaloy taon ana. A nay nan maitoynung ya bokot na. <sup>12</sup> Hén nahêlêk na ya ni Apo Jesus, ay wana ha babayi, “Ayn kay nan hakit!” <sup>13</sup> Impalunto nay gamêt na ha nakuba, kabay tambêng yan tinumoynung ya bokot na, bayo pinuri na hi Apo Namalyari. <sup>14</sup> Noa, nanuluk ya main tungkulon ha sinagoga, gawan allon pamagsimba, hén namaalih hi Apo Jesus hén hakit nan nakuba. Kabay wana kanlan kal-atan, “Main anêm ya allo ya nakal-an ha pamagobra. Kabay dapat ipaalih yoy hakit yo ha miha kanlan habaytoy anêm ya allo, alwa ha allon pamagsimba.” <sup>15</sup> Kabay wani Apo Jesus kanla, “Hikaw ya ampaggabara! No main kaw hén baka o asno ya nakah-êl, ay yarin a yo yan okalên ta êmén ya kainêm, ha allo man hén pamagsimba! <sup>16</sup> Hata babayi, ya mihay kaapo-apoan ni apo Abraham, ay atsi ha aypañ kapangyarihan ni Satanas hén main nanan labinwaloy taon, kabay kailangan yan okalên, agyan allo hén pamagsimba.” <sup>17</sup> Hén nahabi nay habayto, ay nipakarêng-êy hilay anhumalanghang kana. Noa, hilay kaatag bayro ay nipaghigla ha mangangêd ya kapapaêpapah ya dinyag na.

*Ya pamanlokop ni Apo Namalyari ay in-alimbawa ni Apo Jesus ha paman-tumubo hên mihay nanaway but-o*

(*Mateo 13:31-32; Marcos 4:30-32*)

<sup>18</sup> Amêhêñ, inhundo ni Apo Jesus ya panoro na, ya wana, “Nanad hino kaya ya pamanlokop ni Apo Namalyari? Hino kaya ya pangialimbawaan ko hên pamanlokop na? <sup>19</sup> Ya pamanlokop ni Apo Namalyari ay maialimbawa ha pamantumubo hên mihay nanaway but-o ya intanêm. Iibon man ya but-o, ay hinumlay yan nag-in kayo, kabay nipanyag halay ya manok-lalê ha hanga na.”

*In-alimbawa ni Apo Jesus ya pamanlokop ni Apo Namalyari ha pampaalsa*  
(*Mateo 13:33*)

<sup>20</sup> Hinabi nay na êt ni Apo Jesus, ya wana, “Hinoy pangialimbawaan ko hên pamanlokop ni Apo Namalyari? <sup>21</sup> Ya pamanlokop ni Apo Namalyari ay maialimbawa ha pampaalsa ya pinakigawgaw hên mihay babayi ha kal-atan hên arina, haka nilum-at ya habaytoy kal-atan.”

*Ya toro ni Apo Jesus ya tungkol ha makpit ya ilwangan*  
(*Mateo 7:13-14, 21-23*)

<sup>22</sup> Kaban inhundo ni Apo Jesus ya pammita na ha balayan Jerusalem, ay nanoro ya ha kaganawan balayan haka kaganawan baryo ya angkadanana na. <sup>23</sup> Minghan main naghabi kana, ya wana, “Apo, pêpérat bêngat ya madyanan biyay ya ayn angga?” <sup>24</sup> Hinabi ni Apo Jesus, ya wana, “Pakangêrén yon humwêñ ha makpit ya ilwangan. Anhabien ko kamoyu, mal-at ya mapilit hên humwêñ, noa, a hila makahowêñ.

<sup>25</sup> “No ingkabat nan nag bali ya ilwangan, ta mirêng kaw hên mamaêg hên mamaêg, ya habiêñ yo, ‘Panginoon pahowêñen mo kay!’ ay habiêñ na kamoyu, ‘A ko muwang no hino kaw.’ <sup>26</sup> Bayo habiêñ yo, ‘Ay-êmêñ mon mahabi ya habayto, ha napagkaaêm naêñ ka, ta nanoro ka di ha legal naêñ.’

<sup>27</sup> Amêhêñ, habiêñ nay na êt hên nag bali, ya wana, ‘A ko muwang no hino kaw. Pakarayo kaw kangko, hikaw ya nipanyag karawakan.’ <sup>28</sup> Hadyay tangih yo bayto, haka mipang-ngê-ngêt kaw ha hadyay ilab boy ha hadyay huluk ya matanam yo, ta mahêlêk yo hilay unan natsi, hi apo Abraham, hi apo Isaac, hi apo Jacob haka hilay mâmipamwang hên an-ipaihip kanla ni Apo Namalyari ya atsi ha pamanlokop na, noa, hikaw etaman, ay itaboy.

<sup>29</sup> Habaytoy allo, ay mal-at ya alwan Israelita ya ubat ha ayri man ya legal di ha luta, ya kiaêm ha kaluto ha pamanlokop ni Apo Namalyari ha langit. <sup>30</sup> Pakagilamêñ yo. Main kaatag ya êndat yon a hila makahowêñ ha pamanlokop ni Apo Namalyari, yan itad hilan hêpat hên humwêñ. Main kaatag êt ya êndat yon itad hilan hêpat hên humwêñ, yan a hila makahowêñ.”

*Ya pamanlugud ni Apo Jesus kanlan taga-balayan Jerusalem*  
(*Mateo 23:37-39*)

<sup>31</sup> Hêñ habayto, ay main nilumatêng ya ungnoy Pariseo. Hinabi la kan Apo Jesus, ya wanla, “Pakarayo ka di, ta labay na kan patsêñ ni Gobernador Herodes Antipas.” <sup>32</sup> Amêhêñ, wani Apo Jesus kanla, “Habiêñ yo kan Gobernador Herodes Antipas, ya habaytoy manloko, ya ampamaalih akon hakit haka nangarawak ya a angkahêlêk amêhêñ haka nobukah. Haka ha ikatlon allo ay yariêñ ko ya dyag ko. <sup>33</sup> Ihundo koy pammita ko ha balayan Jerusalem amêhêñ, nobukah haka makalwa, ta alwan mangêd para ha mihay propeta ni Apo Namalyari hêñ matsi ha kaatag ya legal no alwan ha Jerusalem.”

<sup>34</sup> Hinabi nay na êt ni Apo Jesus, ya wana, “Kaingalo kaw ya taga-Jerusalem, ta pinagbabato yoy propeta ni Apo Namalyari angga ha hilay

natsi. Kata-ungno kataw nan labay lokopên hên nanad ha pamanlokop hên mihay toan manok ha hiwhiw na. Noa, a kaw mabay hên palokop kangko. <sup>35</sup> Kabay booy nakêm kataw nan paulayan. A yo ko pon mahêlêk, angga ha a yo habiên ya habaytsi, ‘Iningalwan ya in-utoh ni Apo Namalyari.’ ”

## 14

### *Namaalíh hi Apo Jesus hên hakit hên mihay lalaki*

<sup>1</sup> Mihay allon pamagsimba lan Israelita, ay hinagyat hi Apo Jesus hên mangan ha bali hên mihay manungkuluan lan Pariseo. Inimatonan la hi Apo Jesus. <sup>2</sup> Kaban an-imatonan la ya, dinumani kan Apo Jesus ya mihay lalaki ya ginumayá ya lawini gawan hakit. <sup>3</sup> Kabay hinabi ni Apo Jesus kanlan Pariseo haka kanlan mánoron Kautuhan ni apo Moises, ya wana, “Ay-êmén ya nakahulat ha Kautuhan ni Apo Namalyari? Bawal kano hên mamaalíh hên hakit ha allon pamagsimba o ahê?” <sup>4</sup> Noa, a hila nagtonoy. Ya dinyag ni Apo Jesus ay namaalíh ya hên hakit nan lalaki, bayo impabita na ya. <sup>5</sup> Amêhén, hinabi ni Apo Jesus kanla, “No alimbawa ta anak yo, o baka yoy manabo ha malalê ya pangahoyan, yarin a yo tambêng ialih ya habayto, allo man hên pamagsimba?” <sup>6</sup> Noa, ayn naghabi.

### *Ya mangêd ya ugali ha kaluto*

<sup>7</sup> Napansin ni Apo Jesus ya hilay kaatag ya hinagyat bayro ha kaluto hên hatoy Pariseo, ay nikno ha iknoan hên manungkuluan agyan alwa hilan manungkuluan. Kabay tinoroan na hila, ya wana, <sup>8</sup> “No alimbawa ta main managyat kamo ha kaluto hên kasal, ay paan kan mikno ha iknoan hên manungkuluan, ta kayno main lumatêng ya manungkuluan, <sup>9</sup> bayo habiên na kamo hên hatoy nanagyat kamo, ‘Kalalaki ko, idin mo pon kanan manungkuluan ya habain ya iknoan.’ Kabay mipakarêng-êy kay na, ta mikno ka tana ha pinakamarayo ya iknoan. <sup>10</sup> No in-agkat ka ha kaluto, ya mangêd, ay mikno ka tana ha pinakamarayo ya iknoan, ta kayno habiên nan nanagyat kamo, ‘Kalalaki ko, dumani ka di ha mangêd ya iknoan.’ Ha êmbayro ay, mahêlêk lan kaatag ya atsi ha kaluto no ay-êmén kan dinayêw. <sup>11</sup> Hilay mapagmatagay, ay iaypa, haka hilay maaypay nakêm ay itag-ay.”

<sup>12</sup> Amêhén, hinabi ni Apo Jesus ha nanagyat kana, “No magkaluto ka, paan mon bêngat hên hagyatêng hilay kaluguran mo, kamag-anak mo haka hilay karani mo hên bali ya mabandi. Ta lano, ay hagyatêng la ka êt, kabay matumbahan la kay na. <sup>13</sup> No magkaluto ka, ay hagyatêng mo hilay mangairap, hilay lumpo, hilay pilay, haka hilay buwag. <sup>14</sup> A hila man makahagyat kamo, ay humigla ka, ta tumbahan na kan hagyatêng lano ni Apo Namalyari ha mangoman mabiyay hilay banal.”

### *Ya alimbawa ya tungkol ha mahlay ya kaluto*

(Mateo 22:1-10)

<sup>15</sup> Hên nagilam hên miha kanlan ampangan bayro ha bali nan Pariseo ya hinabi ni Apo Jesus, ay wana kana, “Bapan higla lan tawo ya kilamo ha kaluto ha pamanlokop ni Apo Namalyari.” <sup>16</sup> Amêhén, wani Apo Jesus, “Main mihay lalaki ya nagkaluto, ta mal-at ya hinagyat na. <sup>17</sup> Hên nakalutoy na, ay in-utoh na hilay ipoh na hên baêgêng hilay hinagyat na, ta habiên na ya êmén di, ‘Kaw na di, ta nakal-an ya kaêng tamo.’ <sup>18</sup> Noa, balang miha kanla ay naghabi, ‘Pasinsya kaw na, ta a ko makalako ha kaluto.’ Ya una ay naghabi ha ipoh, ya wana, ‘A ko makalako ha kaluto, gawan nakahaliw akon tamnan ko, ya kailangan kon hirawên.’ <sup>19</sup> Hinabi hên miha, ‘Nakahaliw akon limay paris hên baka. Dapat ko hilan subukêng hên panyarol. Pasinsya kaw na.’

<sup>20</sup> Hinabin mihay na êt, ya wana, ‘Babayo kay kasal, kabay a ko makalako ha kaluto.’ <sup>21</sup> Nuli ya habaytoy ipoh, ta in-ubuh nan hinabi ya habayto ha amo na. Hadyay huluk hên amo hên habaytoy ipoh. Hinabi na ha ipoh, ya wana, ‘Galingêñ mo ha dann hên balayan, ta hagyatêñ mo hilay mairap, hilay lumpo, hilay pilay, haka hilay buwag.’ Kabay nammita yay nay ipoh. <sup>22</sup> Hêñ nag-orong ya ipoh, ay wana, ‘Hinonol koy utoh mo, Apo. Noa, makwal pon ya panganan.’ <sup>23</sup> Kabay hinabi nan amo ha ipoh na, ya wana, ‘Pakahagyatêñ mo hilay ayn bali, ya nag hawong ha danin dann ha laylay balayan, ta êmêñ mapno ya bali ko. <sup>24</sup> Anhabiêñ ko kamoyu ya ayn miha man kanlan una kon hinagyat ya makataway hên kaluto ko.’”

*Hilay tagahonol ni Apo Jesus ay kailangan lan ibalag ya kaganawan maalagá kanla*

(Mateo 10:37-38)

<sup>25</sup> Minghan, hên mal-at ya nakilako kan Apo Jesus, ay inarap na hila, ta hinabi na kanla, <sup>26</sup> “Hilay labay hên magpalokop kangko, ta mag-in tagahonol ko, ay kailangan lugurêñ la ko hên igit êt ha toa la, ahawa la, anak la, kaka la, ali la, haka sarili la. <sup>27</sup> Haka hilay alwan nakal-an hên magtêêh hên pamairap, o matsi man, ha pamanhumonol la kangko hên nanad ha pamwat hên nabyat ya koros, ay alwan hêpat hên mag-in tagahonol ko. <sup>28</sup> Dapat yon pakaihipêñ pon ya kairapan hên mag-in tagahonol ko. Habaytoy nanad ha mihay labay hên manyag hên matag-ay ya bali, ya pakaihipêñ na pon mangêd, no hukad ya kaganawan kailangan na, ta êmêñ mayari ya bali. <sup>29</sup> Ta, no a nan pakaihipêñ hên mangêd, ta bat nay nan umpisaan daygêñ, bayo, no a na mayari, ay kailyan la yan balang makahêlêk hên bali na, ta katarêk-tarêk ya nayari. <sup>30</sup> Wanla, ‘Hêlkêñ yo! Hatsi ay nag-umpisan manyag bali, noa, a na impayari.’ <sup>31</sup> Embayro êt ya mihay ari ya main mapon liboy hundaloh, ya labay hên lumaban ha kaatag ya ari ya nag lowampon libo ya hundaloh, ay pakaihipêñ na pon hên mangêd no kaya na. <sup>32</sup> Ta no a na kaya, kaban marayo ya pon ya kapatsi na, ay main yan iutoh ya makihabi pon ha kapatsi na ya makikatoyungan ya tana. <sup>33</sup> Embayro êt kamoyu no labay yo hên mag-in tagahonol ko, ay pakaihipêñ yo pon no kaya yon ibalag ya kaganawan maalagá kamoyu, bayo kaw magpalokop kangko. Ta no a yo kaya, ay a kaw malyarin mag-in tagahonol ko.”

*Ya ahin ya naalihan alat*

(Mateo 5:13; Marcos 9:50)

<sup>34</sup> “Mangêd ya ahin. Noa, no naalihan yay nan alat, ay ahinan maiorong ya alat na. <sup>35</sup> A ya magamit hên pamataba man hên luta. Kabay itapon la tana. Hikaw ya ampanggilam kangko, pakaihipêñ yoy toro ko!”

## 15

*Hilay a pon nagpalokop kan Apo Namalyari, ay nanad hilan tupaya nitama*

(Mateo 18:12-14)

<sup>1</sup> Amêhêñ, hilay máningil buwih haka kaatag êt ya mapanyag nangarawak, ay dinumani kan Apo Jesus ta manggilam hên anhabiêñ na. <sup>2</sup> Anhumulapo hilay Pariseo haka hilay mánoron Kautuhan ni apo Moises, ya wanla, “Têh! Habaytsi ay ampananggap hên makasalan, bayo ampakiaêm ya êt kanla!”

<sup>3</sup> Kabay dinyanan hila ni Apo Jesus hên hata alimbawa,

<sup>4</sup> “No alimbawa ta main miha kamoyu ya nag magatoh ya tupu, ta nitama ya miha, ay hinoy daygêñ na? Siguradon ibalag na pon ya siyamapo boy siyam bayro ha pagpastolan la, ta tapolêñ nay habaytoy miha ya nitama

hên angga ha matapol nay habayto. <sup>5</sup> Pamakatapol nan habaytoy tupa, ay bapan higla nay na. Kabay bakayên na yan paorong. <sup>6</sup> Panlumatêng na ha bali na, ay hagyatêng nay kaluguran na haka karani nan bali, ta wana kanla, ‘Magpakahigla kitamo, ta natapol koy tupa ko ya nitama.’ <sup>7</sup> Embayro êt ha langit, ay siguradon magpakahigla hila ha mihay makasalanan ya maghêhê hên manalibokot ha pamanyag karawakan, kisa ha siyamapo boy siyam ya êndat lan mangêd hila haka a lay nan kailangan hên kikwan patawad.”

### *Ya pera ya nakatak*

<sup>8</sup> Inhundo ni Apo Jesus ya pamaghabi na, ya wana, “O alimbawa ta main babayi ya nag mapoy pera ya pilak, bayo nakatak ya miha, hinoy daygên na? Pagkêtan nay pag-atâng, palisan nay bali, ta pakatapolên nan mangêd angga ha matapol na ya nakatak. <sup>9</sup> Pamakatapol na hên habaytoy pera, ay hagyatêng na hilay karani nan bali, haka kaluguran na ta magpakahigla hila. <sup>10</sup> Embayro êt ya kahiglaan lan anghel ni Apo Namalyari, gawan main mihay makasalanan ya maghêhê hên manalibokot ha pamanyag karawakan.”

### *Ya makotaw ya miyawhay ya nanad nitama*

<sup>11</sup> Inhundo ni Apo Jesus ya pamaghabi na, ya wana, “Main mihay lalaki ya nag anak hên loway miyawhay. <sup>12</sup> Amêhêñ, hinabi nan poto ha tatang na, ya wana, ‘Tatang, idin mina kangko amêhêñ ya atag ko ha pibandian mo, ya mana naêñ lowan mitaali.’ Kabay inatag nan tatang la ya pibandian na kanlan lowa. <sup>13</sup> A nabuyot, ay inhaliw nan poto ya atag nay bandi, ta nammita yan palako ha kaatag ya bansa ya marayo. Bayro nan inhayang ya atag nay bandi na ha pamanyag karawakan. <sup>14</sup> Ha kabuyutan, ay naubuh nay nan nagastos ya atag na. Hên habayto ay nagkamain lonoh bayro. Kabay pérâd tana, ay natsi yay na dayi. <sup>15</sup> Ya dinyag na ay nakiamo yay na pon ha mihay taga-bayro ya namiutoh kana hên mamakan hên baboy na. <sup>16</sup> Labay na dayin makiékan ha pangkaêñ lan baboy, noa, a la ya dinyanan. <sup>17</sup> Hên napakaihip-ihip nan mangêd ya dinyag na, ay hinabi na ha nakêm na, ya wana, ‘Hilay ipoh hên tatang ko ay angkahawa ha pangan, kaban hikong kit, ay pérâd tanan matsi ha hadyay lonoh ko di. <sup>18</sup> Mag-orong ako ha tatang ko, ta habiêñ ko kana, ‘Tatang, nakadyag akon kasalanan kan Apo Namalyari haka kamo. <sup>19</sup> Alwa mo kinan baêgêñ anak mo. Daygên mo ko tanan mihay ipoh mo.’ <sup>20</sup> Kabay nammita yay nan pauli ha tatang na.

“Marayo ya êt ha bali la, ay napatsilyapan yay nan tatang na. Naingalwan na yan tatang na kabay nuwayu ya hên nanupa ha anak na, ta tinakêh haka inaro na ya. <sup>21</sup> ‘Tatang,’ wanana anak, ‘nakadyag akon kasalanan kan Apo Namalyari haka kamo. Alwa mo kinan baêgêñ anak mo.’ <sup>22</sup> Noa, binaêñ nan tatang na ya ipoh na, ta wana, ‘Galingêñ yo. Kowêñ yoy pinakamahampat ya takop, ta ipatakop yo kana. Pahing-hingan yo ya haka dyanan yo yan pag-apin bitsih. <sup>23</sup> Patsêñ yoy pinakamatabay biseron baka, ta magpakahigla kitamo! <sup>24</sup> Magpakahigla kitamo, gawan hata anak ko ya nanad natsi, ay angkabiyay awud! Hiyay nanad nitama, noa, nilumatêng ya awud!’ Kabay nagpakahigla hila.

<sup>25</sup> “Hên habayto, ay atsi ya ha panamnan la ha marayo ya kaka na, ya punganay. Hên narani yay na ha bali la, ay nagilam nay tsig-tsigan haka hayawan. <sup>26</sup> Kabay binaêñ nay mihay ipoh la, ta wana, ‘Hinoy angkalyari di?’ <sup>27</sup> Kabay wanana ipoh, ‘Apo, nilumatêng ya ali mo. Impapatsi hên tatang mo ya pinakamatabay biseron baka, gawan nilumatêng ya hên nabiyay.’ <sup>28</sup> Amêhêñ, hinumuluk ya punganay. A na labay humwêñ ha bali. Kabay inumawah ya tatang na, ta inamung-mung na ya, ta êmêñ ya humwêñ. <sup>29</sup> Noa,

wana ha tatang na, ya wana, ‘Mal-at ya taon kinan ampanawop kamo hēn nanad ipoh. Ya kaganawan an-iutoh mo kangko, ay hinonol ko. Noa, miha man ya biseron kambing, ay ayn kan indin kangko ya maipapatsi naēn dayi hēn kaluguran ko, ta êmēn kay magpakahigla.<sup>30</sup> Hata poto mo, ay nanayang bandi mo ha pamabayi na, bayo pinamatsi mo ya êt hēn pinakamatabay biseron baka!’<sup>31</sup> Kabay wanana tatang na, ‘Anak ko, alwan êmbayro. Panay katan kalamo. Ya kaganawan pibandian ko ay pibandian mo.<sup>32</sup> Noa, hata ali mo ya nanad natsi, ay angkabiyay awud! Hiyay nanad nitama, noa, nilumatêng ya awud! Kabay kailangan kitamon magpakahigla.’”

## 16

### *Ya narawak ya pinatsiwal-an hēn pibandian*

<sup>1</sup> Hinabi nay na êt ni Apo Jesus kanlan tagahonol na, ya wana, “Main mihay mabandi ya main pinatsiwal-an hēn pibandian na. Noa, main naghabi ha mabandi ya panhayangēn ya pibandian na hēn pinatsiwal-an na.<sup>2</sup> Kabay impabaēg nan mabandi ya habaytoy pinatsiwal-an na, ta wana kana, ‘Hinoy hatsi ya angkalēngē ko tungkol kamo? Ipahlēk mo kangko ya hulat mo ha nagastos mo ha pibandian ko, ta paubat amêhēn alway nan hika ya patsiwal-an ko.’<sup>3</sup> Kabay hinabi nan hata pinatsiwal-an ha nakēm na, ya wana, ‘Alihan akon ámo ko ha tungkulon ko. Hino kaya ya daygēn ko? A ko agyu ya mabyat ya obra, nanad pag-obra ha luta. Marêng-êy ako etaman hēn magpalimos.<sup>4</sup> Awo bay, muwang kina ya daygēn ko, ta êmēn la ko hagyatēn ha bali la, agyan alihēn na ko ha tungkulon ko.’

<sup>5</sup> “Miha-miha nan binaēg hilay main utang ha amo na. Hinabi na ha una, ya wana, ‘Ungnoy utang mo ha amo ko?’<sup>6</sup> Kabay wanana nag utang, ‘Dinalan ya hukat hēn langis.’ Amêhēn, hinabi nan pinatsiwal-an ha nag utang, ya wana, ‘Iawah moy listahan utang mo. Tambēng kan mikno, ta hagilyan mon limampo.’<sup>7</sup> Bayo hinabi nan pinatsiwal-an ha kaatag ya main utang, ya wana, ‘Ungnoy utang mo?’ Kabay wanana nag utang, ‘Dinalan ya kaban hēn trigo.’ Amêhēn, hinabi nay na êt hēn hatoy pinatsiwal-an, ya wana, ‘Iawah moy listahan utang mo, ta hagilyan mon walumpo.’<sup>8</sup> Hēn napansin nan amo ya dinyag nan pinatsiwal-an nan pibandian na, ay dinayêw na ya. Dinayêw na ya, alwan gawan pamanloko na kana, noa, gawan magaling yan mangihip. Pêtêg bay magaling hilan mangihip hēn ikakangêd la ha sarili la, hilay a ampagpalokop kan Apo Namalyari, kisa kanlan nagpalokop kana.”

<sup>9</sup> Wana êt ni Apo Jesus ha tagahonol na, “Anhabién ko kamoyu, gamitêng yoy pibandian yo ha pamanawop hēn kalamo yo di ha luta, ta êmēn lano ha langit, ha ayn nanan pera, ay mahigla la kaw tanggapēn lan kalamo yo ya atsi bayro gawan ha hawop yo kanla.<sup>10</sup> Ya mapaypaniwal-an ha pêrad, ay mapaypaniwal-an ha mal-at. Ya a mapaypaniwal-an ha pêrad, ay a etaman mapaypaniwal-an ha mal-at.<sup>11</sup> No alwa kaw hēn mapaypaniwal-an ha pibandian di ha luta, ay ayn etaman mamipatsiwala kamoyu hēn mantêg pibandian ha langit.<sup>12</sup> No alwa kaw hēn mapaypaniwal-an ha pibandian hēn kaatag, ay ayn bayton mam-i kamoyu, hēn mag-in taganán kamoyu.

<sup>13</sup> “Ayn hinoman ya makapaghuyo ha loway amo hēn booy nakēm. Ta lugurén nay miha, haka kahêmékan nay miha, o huyuén nan mantêg ya miha, ta hatoy miha, ay pahawaan na. Êmbayro êt, ay a yo kayan huyuén hi Apo Namalyari no ubuhêng yoy hêkaw yo ha pibandian.”

*Hino-hino kay na hēn ya toro ni Apo Jesus  
(Mateo 11:12-13; 5:31-32; Marcos 10:11-12)*

<sup>14</sup> Hêñ nagilam lan Pariseo ya hinabi ni Apo Jesus, ay kinailyan la ya gawan kamata hilan pera. <sup>15</sup> Kabay hinabi na kanla, ya wana, “Ampagbabara kaw ha arapan hêñ kapareho yo, noa, muwang ni Apo Namalyari ya nakêm yo. Ya bapan hampat ha ihip hêñ tawo, ay kapahuluk kan Apo Namalyari.

<sup>16</sup> “Ya impamwang lan mâmipamwang hêñ an-ipaihip kanla ni Apo Namalyari, haka ya impamwang lan Kautuhan ya impahulat na kan apo Moises, ay tungkol ha pamanlokop ni Apo Namalyari. Haka hi Juan Bautista ya nag-umpisa hêñ nanupad hêñ habaytoy impamwang la. Paubat ha pamanlumatêng na, ay an-iaral ya Mangêd ya Habi tungkol ha pamanlokop ni Apo Namalyari haka mal-at ya ampamilit hêñ palokop kana. <sup>17</sup> Noa, nataluh hêñ alihêñ ya luta haka ya angkahêlêk ha langit kanan daygên ayn pukat ya miha man ya naipêk ya gulis kanlan habaytoy Kautuhan ni Apo Namalyari, ya hinulat ni apo Moises.”

<sup>18</sup> Hinabi na êt ni Apo Jesus, ya wana, “Ya lalaki ya mamihiyay hêñ ahawa na, bayo mag-ahawan kaatag, ay nakadyag kasalanan gawan namabayi ya. Êmbayro êt ya lalaki ya nangahawa hêñ babayi ya inhiyay, ay nakadyag ya êt kasalanan hêñ namabayi.”

### *Ya mabandi haka hi Lazaro*

<sup>19</sup> Hinabi nay na êt ni Apo Jesus, ya wana, “Main mihay mabandi ya ampagtakop hêñ makamal ya takop. Allo-allo, ay angkahawa ya ha hinon labay nan kaêñ. <sup>20</sup> Main etaman mihay mairap bayro ya nag langan Lazaro ya napnoan hêñ nuka, ya pan-ibul-ih lan kit ha arapan bali nan hatoy mabandi. <sup>21</sup> Atsi ya bayro, ta labay na dayin makaêkan agyan momo hêñ mabandi. Kaingalo yan kit, ta main êt bayron aho ya ampiapanapoh hêñ nuka na. <sup>22</sup> Hêñ natsi hi Lazaro, hiyay gintan hêñ anghel ni Apo Namalyari ha langit, ha dani ni apo Abraham. Natsi ya êt ya hatoy mabandi, bayo in-ilbêng.

<sup>23</sup> “Hiyay gintan ha Hades. Kaban ampagdusa ya bayro ay naningla ya. Bayro ha marayo, ay nahêlêk na hi apo Abraham haka hi Lazaro. <sup>24</sup> Kabay nan-angaw ya, ya wana, ‘Apo Abraham, ingalwan mo ko dayi. Iutoh mo hi Lazaro ya ibahá nay tampoh hêñ panoro na ha lanêm, ta pakêbêlêñ nay dila ko, ta angkairapan ako di, gawan hadyay omot hêñ hata apoy.’ <sup>25</sup> Noa, wani apo Abraham, ‘Anak ko, muwang mo hêñ angkabiyay ka pon, ay hinumawa ka ha kaganawan mangangêd, kaban nagtêêh yan kairapan hi Lazaro. Amêhêñ, ay mahigla ya bayri hi Lazaro, kaban hika ay ampagirap. <sup>26</sup> Miha êt, ay main bapan lalêñ bêngaw ha pilatan tamo. Kabay a kay makalako kamoyu, haka a kaw makalako di.’

<sup>27</sup> “Hinabi nay na êt hêñ mabandi, ‘No êmbayro awud, ay iutoh mo dayi hi Lazaro ha balin tatang ko. <sup>28</sup> Ta habiêñ na dayi kanlan limay kapotoh pohêl ko ya kaillag hila, ta êmêñ hila a miabot di ha legal hêñ hadyay pamagdusa.’ <sup>29</sup> Noa, wani apo Abraham, ‘Atsi kanlan kapotoh pohêl mo ya inhulat ni apo Moises haka ya inhulat lan kaatag ya mâmipamwang hêñ an-ipaihip kanla ni Apo Namalyari ya paniwal-an la dayi.’ <sup>30</sup> Wanan mabandi, ‘Kulang ya habayto apo Abraham. Noa, no main mangoman mabiyay ya natsi, ya mangaral kanla, ay paghêhêan la bayto ya kasalanan la.’ <sup>31</sup> Noa, wani apo Abraham, ‘No a la paniwal-an ya inhulat ni apo Moises, haka ya inhulat lan kaatag ya mâmipamwang hêñ an-ipaihip kanla ni Apo Namalyari, ay a hila êt mapaniwala ha pamwang hêñ mihay natsi, ya nabiyay oman.’ ”

## 17

*Ya pangubatan hêñ pamanyag kasalanan  
(Mateo 18:6-7, 21-22; Marcos 9:42)*

<sup>1</sup> Amêhén, wani Apo Jesus kanlan tagahonol na, ya wana, “Taganán lumatêng kantamo ya tukso hên manyag kasalanan, noa, kaingalo ya ampan-gubatan hên tukso. <sup>2</sup> Hinoman ya pangubatan hên pamanyag kasalanan hên mihay maaypa ya nakêm hên nanad kanlan habaytsi ya ampaniwala kangko, ay mangêd pon kana, ya bayo ya mag-in pangubatan hên habayto, ay patsên ya hên êl-an yan mahlay ya bato ha lêey na, ta ilêmêh ya ha malalê ya lanêm.

<sup>3</sup> Kabay kaillag kaw.

“No ya kapareho mo ay nakadyag hên kasalanan kamo, ay kailangan habyanan mo ya, ta êmén ya maghêhê ha pamanyag nan kasalanan. No maghêhê ya, ay patawarên mo ya. <sup>4</sup> Kata-ungno ya man hên mikasalanan kamo, ha mihay allo, ta panay yan maghêhê, ay dapat mo yan patawarên.”

### *Ya paniwala kan Apo Namalyari*

<sup>5</sup> Amêhén, hinabi lan apostol kana, ya wanla, “Panginoon, pahanan moy paniwala naén kan Apo Namalyari.” <sup>6</sup> Hinabi ni Apo Jesus, ya wana, “Nanawa man ya paniwala yo kan Apo Namalyari, ya nanad bat but-on mustasa, ay mahabi yo kanan hata kayo, ‘Ulutên moy sarili mo, ta mag-álih ka ha dagat!’ ay humonol ya kamoyu.”

### *Ya tungkulan hên ipoh*

<sup>7</sup> Inhundo ni Apo Jesus ya pamaghabi na, ya wana, “Waringan, no main kaw hên ipoh ya nilumatêng ya ubat ha panyarolan o kaya ha pagpastolan, yarin mahabi yo kana ya, ‘Ka di, ta mangan!’ <sup>8</sup> Alwa. Ya habiên yo kana ay ‘Pangil-an mo kon kaén. Bayo maghagili kan takop, ta mamiatag ka kangko, ta kaban ampangan ako, ay gawangan mo kon hinon kailangan ko. Pangayari ko, ay hikay nay mangan.’ <sup>9</sup> A yo ya man pahalamatan no daygên nay kaganawan in-utoh yo kana. <sup>10</sup> Embayro êt ya dapat yon daygên pamakadyag yon kaganawan impadyag ni Apo Namalyari kamoyu. Paan kaw nan manapol hên pamandayêw. Habiên yo tana ya, ‘Hikay ay ipoh bêngat. Kabay andaygên naén bêngat ya tungkulan naén.’”

### *Namaalih hi Apo Jesus hên hakit hên mapoy nag ketong*

<sup>11</sup> Ha pammita lan Apo Jesus palako ha balayan Jerusalem, ay nagdann hila ha pilatan hên probinsyan Samaria haka probinsyan Galilea. <sup>12</sup> Hên pahowêñ hilay na ha mihay baryo, ay nakatupa hila hên mapoy nag hakit hên ketong ya tinunggêñ ha marayo-dayo, <sup>13</sup> ta in-angaw la, ya wanla, “Panginoon Jesus, ingalwan mo kay.” <sup>14</sup> Hên nahêlêk na hila, ay wana kanla, “Pahlék kaw kanlan pari ta êmén la ipamwang ya ayn kaw nan hakit.” Kaban ampammita hila, ay ampialih ya hakit la. <sup>15</sup> Hên napansin la, ya naalih ya hakit la, ay nag-orong ya miha kan Apo Jesus, haka na in-ikhaw ya pamapguri na kan Apo Namalyari. <sup>16</sup> Nandoko ya ha arapan ni Apo Jesus, ta nagpahalamat. Habayto ay mihay taga-probinsyan Samaria. <sup>17</sup> Bayo hinabi ni Apo Jesus, ya wana, “Mapo ya inalihan hakit. Ato hilay nay siyam? <sup>18</sup> Pata ayn nag-orong kanla hên nagpuri kan Apo Namalyari? Hatsin bêngat ya alwan Israelita ya nag-orong.” <sup>19</sup> Amêhén, hinabi ni Apo Jesus kana, “Mita kay na, ta naalih ya hakit mo gawan ha paniwala mo.”

### *Yatoro tungkol ha pamanlumatêng hên pamanlokop ni Apo Namalyari haka ya pag-orong ni Apo Jesus*

(Mateo 24:23-28, 37-41)

<sup>20</sup> Minghan, ay labay lan Pariseo hên mamwangan kan Apo Jesus no makanon lumatêng ya pamanlokop ni Apo Namalyari. Kabay wani Apo Jesus kanla, “Ya umpisa hên pamanlokop ni Apo Namalyari ay a mahêlêk hên mata.

**21** Ayn makapaghabi hên, ‘Hêlkên yo! Nag-umpisay na di!’ o ‘Nag-umpisay na do!’ Ta ha kaptêgan, ya pamanlokop ni Apo Namalyari ay atsi ha nakêm lan ampaniwala kana.”

**22** Bayo wana kanlan tagahonol na, “Lumatêng ya allo, ay labay-labay yon mahêlêk ya pamanlumatêng ko, ya Taga-Langit, ya In-anak Tawo. Noa, a yo ko mahêlêk. **23** Main maghabi kamoyu, ‘Nag-orong yay na ya Mesias, ya Cristo, ya Mámiligtas ta atsi ya di!’ Wanla êt hên kaatag, ‘Atsi ya bayro!’ Noa, paan kaw maniwala kanla, hên kihonol kanla hên manapol kangko. **24** Ta no ay-êmén magkulibid ya kimat, ya mag-ahnag ha marayo, haka mahêlêk hên balang miha, ay êmbayro êt ya pag-orong ko, hên Taga-Langit, ya In-anak Tawo. **25** Noa, kailangan têêhêñ ko pon ya mal-at ya kairapan, ta araêñ la ko hên tawo amêhêñ. **26** No ay-êmén ya karawakan pamimiyay la hên haton nabiyyay hi apo Noe, ya nagpalokop kan Apo Namalyari, ay êmbayro êt mag-in narawak ya pamimiyay no marani yanay pag-orong ko, ya Taga-Langit, ya In-anak Tawo. **27** Hêñ haton nabiyyay hi apo Noe, ay a la ginilam ya paypamwang na. Inhundo lan angkabiyay hên hato ya pangan, pamamminêm, haka pamiaahawa la angga ha hinumwêñ hilan apo Noe ha dinyag nay barko. Kabay naubuh hilan natsi ha lubug. **28** Êmbayro êt hên hato, hên nabiyyay pon hi apo Lot. Inhundo lan taga-balayan Sodoma ya pangan la, pamamminêm la, kapanapolan la, pananêm la, haka pamadyag hên bali la. **29** Noa, ha allon pamag-alíh lan Lot bayro ha Sodoma, ay naubuh hilan natsi, gawan pinauranan na hila ni Apo Namalyari hên apoy haka sulpid.\*

**30** Êmbayro êt ya malyari ha pag-orong ko, ya Taga-Langit, ya In-anak Tawo.

**31** “Habaytoy allo, no main atsi ha bubungan bali la, ay paan hilay nan tumaoj hên mangwan pibandian la ha lalêñ bali la. Paan hilay nan muli ya atsi ha panamnan. **32** Ihipêñ yo ya nalyari ha ahawa ni apo Lot, hêñ haton natsi ya, gawan namalingay ya hêñ ampag-alíh hila ha balayan Sodoma.

**33** Hilay a mabay hêñ mangoman ya pamimiyay la, ay maalihan hêñ biyay. Noa, hilay nakal-an hêñ manalibokot ha pamimiyay la, gawan ha paniwala la kangko, ay dyanan hêñ biyay ya ayn angga. **34** Pakagilamêñ yo, ha yabin pag-orong ko, no alimbawa ta main loway nabêlêw ha mihay papag, ay gêtan ha langit ya ampaniwala, noa, ibalag ta parusaan ya a ampaniwala.

**35** No alimbawa ta main loway babayi ya ampanggiling, ya ampaniwala ay gêtan ha langit, noa, ya a ampaniwala ay ibalag ta parusaan. **36** Ha pag-orong ko, no alimbawa ta main loway lalaki ya ampilamo hêñ ampag-obra ha panamnan, ya ampaniwala ay gêtan ha langit, noa, ya a ampaniwala ay ibalag ta parusaan.” **37** Amêhêñ, nangotang hilay tagahonol ni Apo Jesus, ya wanla, “Panginoon, anton matupad ya habayto?” Kabay wani Apo Jesus kanla, “No anto ya bangkay, ay bayro êt mi-tsi-tsipon ya uwak.”†

## 18

*Ya alimbawa ya tungkol ha babayi ya ayn têgêñ ha pangabala na ha mihay mánlingon kaso*

**1** Amêhêñ, nangalimbawa yay na êt hi Apo Jesus, ta toroan na hilay tagahonol na ya kailangan panay hilan manalangin hêñ a hila humawa ha pamanalangin. **2** Hinabi ni Apo Jesus, ya wana, “Ha mihay balayan, ay main mánlingon kaso ya a angkalimo kan Apo Namalyari, haka ayn yan

\* **17:29** Genesis 19:1-29. † **17:37** Anhabiên lan kaatag, ya labay habiên hêñ hata kahabian, ay tambêng mamwangan lano. Wanla êt hêñ kaatag, ya labay habiên hêñ hatsi, ay hilay a pon nagpalokop kan Apo Namalyari, ay nanad hilan natsi haka mananggap hilan parusa la.

anggalangén ya tawo. <sup>3</sup> Bayro ha balayan, ay main babayi ya bawo, ya ayn tēgēn hēn mangabala kanan hata mánlingon kaso, ta panhabiēn na, ‘Hawpan mo kon lumaban ha kapatsi ko.’ <sup>4</sup> Ha pangabala na kana, ay a na ya pon dinambi, noa, hēn a nay na matêh, ay wana ha nakêm na, ‘A ko angkalimo kan Apo Namalyari, haka ayn akon anggalangén ya tawo, <sup>5</sup> noa, hawpan ko yay na, gawan ayn tēgēn ya pangabala na kangko, ta pérad tana, a kina matêh ya pangabala na kangko.’ ” <sup>6</sup> Amêhēn, wani Apo Jesus kanla, “Pakaihipén yoy hinabi hēn hatoy mánlingon kaso ya agyan narawak ya ugali na, ay nanawop ya kanan babayi ya bawo. <sup>7</sup> Hi Apo Namalyari pon kaya, ya makatoynungan, yarin a ya tambēng manawop kanlan pinili na hēn mag-in kana, ya ampamaēg kana hēn allo-yabi. <sup>8</sup> Panhabiēn ko kamoyu, tambēng na hilan lingonén ha ikakangéd la. Noa, pamag-orong ko, ya Taga-Langit, ya In-anak Tawo, ay makalatêng ako kaya hēn tawo ya main paniwala hēn êmbayro, ya ayn tēgēn hēn manalangin?”

*Ya alimbawa ya tungkol ha panalangin hēn loway lalaki*

<sup>9</sup> Nam-i yay na êt hi Apo Jesus hēn hata alimbawa kanlan kaatag, ya êndat la no mahonol hila kan Apo Namalyari, bayo ammusmusén lay kapareho la. <sup>10</sup> Wana kanla, “Main loway lalaki ya hinumwēn hēn manalangin ha Templo. Ya miha ay Pariseo, haka ya miha ay máningil buwih. <sup>11</sup> Nirêng ya Pariseo ha marayo-dayo, ta in-ikhaw nay panalangin na, ya wana, ‘Apo Namalyari, ampaghahalamat ako kamo, ta alwa kon nanad kanlan kaatag ya mapanakaw, mapanloko, haka mamabayi. Alwa ko êt nanad kanan hata máningil buwih. <sup>12</sup> Loway allo ha balang parominggo, ay ampagtêh ko hēn a ko ampangan, ta êmén a maabala ya panalangin ko kamo. Ampam-i ko êt kamon ikamapo hēn kaganawan angkatsikap ko.’ <sup>13</sup> Noa, ya hatoy máningil buwih, ay ampanalangin ha marayo. A ya makatsingla, haka pandug-dugéñ na êt ya pagaw na gawan hadyay dêng-êy na, ta wana, ‘Apo Namalyari, ingalwan mo ko, ya mihay makasalanan.’ <sup>14</sup> Panhabiēn ko kamoyu ya hatoy máningil buwih, ay nuli hēn pinatawad ha kasalanan, noa, hatoy Pariseo, ay a pinatawad. Hilay mapagmatag-ay, ay iaypa, noa, hilay maaypa ya nakêm ay itag-ay.”

*Inhalangin ni Apo Jesus ya nanganaway anak  
(Mateo 19:13-15; Marcos 10:13-16)*

<sup>15</sup> Nanganaway anak man, ay anggétan kan Apo Jesus, ta ihalangin na hila hēn ipalunto nay gamêt na ha ulo la. Hēn nahélêk lan tagahonol ni Apo Jesus ya hata manianak-anak, ay binawal lay ampantan kanla. <sup>16</sup> Noa, binaêg ni Apo Jesus hilay manianak-anak, bayo wana kanlan tagahonol na, “Paulayan yo hilay anak hēn paidani kangko. Paan yo hilan bawalén. Ta hilay maaypa ya nakêm ya nanad kanla, ay hila ya ilamo ha pamanlokop ni Apo Namalyari. <sup>17</sup> Pakagilamén yoy hatsi. Hilay a manoto ha paniwala hēn nanaway anak ha pagpalokop la kan Apo Namalyari, ay a makapakilamo ha pamanlokop na.”

*Ya mihay nag tungkulan, ya mabandi ya Israelita, ya nangotang no hino ya dapat nan daygén ta êmén ya madyanan biyay ya ayn angga  
(Mateo 19:16-30; Marcos 10:17-31)*

<sup>18</sup> Main mihay Israelita, ya nagtungkulan, ya nangotang kan Apo Jesus, ya wana, “Mangéd ya Mánoro, hino ya dapat kon daygén, ta êmén ako madyanan hēn biyay ya ayn angga?” <sup>19</sup> Wani Apo Jesus kana, “Pata binaêg mo kon mangéd? Hi Apo Namalyarin bêngat ya mangéd. <sup>20</sup> Muwang moy Kautuhan ni Apo Namalyari, ‘Paan mamabayi. Paan makilalaki. Paan mamatsin kaparehon tawo. Paan manakaw. Paan manistigos ha alwan kaptêgan.

Galangén moy toa mo.” <sup>21</sup> Bayo wanán lalaki, “Mánoro, panhonolén ko ya kaganawan ya habayto paubat hén anak ako pon.” <sup>22</sup> Hén nagilam ni Apo Jesus ya hinabi na, ay wana, “Miha pon ya kailangan mon daygén. Iubuh mon ihaliw ya pibandian mo, bayo idin moy habaytoy naablian kanlan mangairap, ta madyanan kan mantégi pibandian ha langit. Pangayari mon madyag ya habayto, ay mag-orong ka di, ta humonol ka kangko.” <sup>23</sup> Noa, hén nagilam nay hinabi ni Apo Jesus, ay naglungkot ya, ta miha yay mabandi.

<sup>24</sup> Nadambi ni Apo Jesus ya naglungkot ya lalaki, kabay wana, “Taganán alwan nataluh hén makapakilamo ha pamanlokop ni Apo Namalyari ya hilay mabandi! <sup>25</sup> Pêtêg ya. Nataluh hén magdann ha lubot karayém ya mihay kamelyo kanan makapakilamo ha pamanlokop ni Apo Namalyari ya mihay mabandi.” <sup>26</sup> Hilay nakgilam hén habayto, ay nangotang, “Hino awud ya miligtas, hén makapakilamo ha pamanlokop ni Apo Namalyari?” <sup>27</sup> Wani Apo Jesus, “Ya a madyag hén tawo, ay madyag ni Apo Namalyari.”

<sup>28</sup> Amêhén, wani Pedro, “Ay-êmén kay, ya tagahonol mo? Imbalag naén ya bali naén, ta êmén kay humonol kamo.” <sup>29</sup> Hinabi etaman ni Apo Jesus, “Pakagilamén yo! Hilay nangibalag bali la, o ahawa la, o kapotoh pohél la, o toa la, o anak la, gawan ha pagpalokop la ha pamanlokop ni Apo Namalyari, <sup>30</sup> ay madyanan hén mal-at kanan imbalag la, kaban atsi hila pon di ha luta. Bayo lano madyanan hila êt hén biyay ya ayn angga.”

*Ikatlon pangungkat ni Apo Jesus, ya patsén ya  
(Mateo 20:17-19; Marcos 10:32-34)*

<sup>31</sup> Impapawa ni Apo Jesus ya labinloway tagahonol na, ta wana kanlan bêngat, “Pakagilamén yo! Anlumakat kitamo ha Jerusalem, ta maubuh hén matupad ya hinulat lan mámipamwang hén an-ipaihip kanla ni Apo Namalyari ya tungkol kangko, ya Taga-Langit, ya In-anak Tawo. <sup>32</sup> Ta idin la ko kanlan alwan Israelita. Musmusén la ko, dul-an la ko, <sup>33</sup> pagpapatokén la ko, bayo la ko patsén. Noa, ha ikatlon allo, ay mabiyay kon oman!” Habaytoy hinabi ni Apo Jesus. <sup>34</sup> Noa, a naintindihan hén labinloway tagahonol na, ya nagilam la, gawan habayto ay a pon impamwang kanla, kabay a la nakway labay nan habiên.

*Namamukat hi Apo Jesus hén mihay buwag  
(Mateo 20:29-34; Marcos 10:46-52)*

<sup>35</sup> Amêhén, hén andumani hilan Apo Jesus ha balayan Jerico, ay main bayron buwag ya ampikno ha danin dann ya ampakikwan pera. <sup>36</sup> Hén nagilam nay kal-atan ya ampipagdann ha dani na, ay labay nan mamwangan no hinoy angkalyari. <sup>37</sup> Main naghabi kana ya hi Apo Jesus ya taga-balayan Nazaret ay ampagdann bayro. <sup>38</sup> Kabay nan-angaw ya, ya wana, “Apo Jesus, ya kaapo-apoan ni Arin David, ingalwan mo ko dayi!” <sup>39</sup> Binawal yan maglabak hén hatoy ampita ha unaan lan Apo Jesus, noa, impakakhaw nan in-angaw, “Kaapo-apoan ni Arin David, ingalwan mo ko dayi!” <sup>40</sup> Hén nagilam ni Apo Jesus ya angaw na, tinunggén ya ta main yan in-utoh, ta akayén lay buwag hén idani kana. Hén narani yanay buwag, ay wani Apo Jesus kana, <sup>41</sup> “Hinoy labay mon daygén ko kamo?” Amêhén, wanán buwag, “Panginoon, labay kon makahêlék ako.” <sup>42</sup> Kabay hinabi ni Apo Jesus, “Makahêlék ka, gawan ha paniwala mo kangko.” <sup>43</sup> Tambéng yan nakahêlék, kabay nakihonol yay na kan Apo Jesus kaban ampurién na hi Apo Namalyari. Hén nahêlék lan atsi bayro ya nalyari, ay pinuri la etaman hi Apo Namalyari.

## 19

### *Nabayo ya ugali ni Zaqueo*

<sup>1</sup> Nilumatêng hilan Apo Jesus ha balayan Jerico, ta bayro hilan nipa'dann ha balayan. <sup>2</sup> Main lalaki bayro ya nag langan Zaqueo. Hi Zaqueo ay ampamaala kanlan mangwan buwih, kabay mabandi ya. <sup>3</sup> Labay na dayin mahêlêk hi Apo Jesus, ta êmén na ya mapuliah, noa, a na ya mahêlêk, gawan kal-atan, ta pandak yan kit. <sup>4</sup> Kabay ya dinyag na, ay nuwayu ya ha unaan lan Apo Jesus, ta nunik ya ha kayon sikomoro, ta êmén na ya mahêlêk. <sup>5</sup> Nahêñ niabot hilan Apo Jesus ha nag kayo, ay tsiningla na ya, ta wana, “Zaqueo, galingêñ mon tumaoy, ta maniraw ako ha bali mo amêhêñ.” <sup>6</sup> Kabay ginaling nan tinumaoy, ta mahigla yan nanagyat kanlan Apo Jesus ha bali na. <sup>7</sup> Hilay kal-atan ya atsi bayro ay nanitol, ya wanla, “Awta bay maniraw hi Apo Jesus ha balin makasalan!” <sup>8</sup> Kaban ampikno hila ha bali lan Zaqueo ay nirêng ya hi Zaqueo, ta wana kan Apo Jesus, “Panginoon, ya kagitna hên pibandian ko ay idin ko kanlan ampangailangan. Ha balang miha ya pinirayit ko, ay iorong ko hên kaapat ya napirayit ko kanla.” <sup>9</sup> Nahêñ nagilam ni Apo Jesus ya hinabi na, ay wana, “Amêhêñ ay nailigtas ya hata pamilya, ta hi Zaqueo ay ampaniwala kan Apo Namalyari hên nanad ha paniwala hên ninuno yo hi apo Abraham. <sup>10</sup> Gawan hiko ya Taga-Langit, ya In-anak Tawo, ay atsi ko di ha luta ta êmén ko hila tapolén haka iligtas ha kaparusaan ya hilay nitama.”

*Hilay ampaghuyo ha Panginoon ay dapat gamitêny a impatsiwala kanla ha ikakangêd*

*(Mateo 25:14-30)*

<sup>11</sup> Kaban anggilamêñ lay habi ni Apo Jesus, ay in-istorya na ya hata alimbawa, gawan marani yay nan lumatêng ha balayan Jerusalem. Haka gawan êndat la no tampol mipairêng bayro ya pamanlokop ni Apo Namalyari, haka bayron mikno hi Apo Jesus hên mamaala kanla ha bansom Israel. <sup>12</sup> Kabay impamwang ni Apo Jesus kanla no ay-êmén ya dapat mag-in pamimiyay la, kaban an-êngganan lay pag-orong na, ta wana, “Main mihay nag tungkulon, ya mita ha marayoy bansa, ta tanggapêñ nay karapatan nan mag-ari, bayo mag-orong yay na ta êmén ya mamaala ha kabansa na. <sup>13</sup> Bayo ya nammita ay binaêg nay mapo kanlan ipoh na, ta binalagan na hila hên tsi-tsi mihan pera ya ginto, ta wana kanla, ‘Pakal-atêñ yoy hata pera, ta êmén ya lum-at kaban ayn ako pon di.’ <sup>14</sup> Amêhêñ, gawan angkahêmêkan la yan kabansa na, ay ha pammita na, ay main hilan in-utoh ha nag tungkulon bayro ha marayoy bansa, ta wanla, ‘A naêñ labay ya habaytsi hên mag-in ari naêñ.’

<sup>15</sup> “Êmbayro man, hiya ay nag-in ari, bayo nag-orong yay na. Nahêñ nilumatêng ya ha bali na, ay impabaêg nay ipoh na, ta êmén na mamwangan no ungnoy tubo la ha imbalag nay pera kanla. <sup>16</sup> Dinumani kana ya una, ta hinabi na, ya wana, ‘Apo, ya pera moy ginto ay tinumubo hên mapoy peran ginto.’

<sup>17</sup> “‘Magaling,’ wanen ari, ‘Hika ay mihay mangêd ya ipoh. Gawan mapaypaniwalan ka ha pêrad, ay manalan ka hên mapo ya balayan.’

<sup>18</sup> “Nilumatêng ya ikalwan ipoh, ta wana, ‘Apo, ya pera moy ginto ay tinumubo yan limay pera ya ginto.’

<sup>19</sup> “Kabay hinabi nan ari kana, ya wana, ‘Hika ay manalan hên limay balayan.’

<sup>20</sup> “Amêhêñ, nilumatêng yay na êt ya mihay ipoh, ta wana, ‘Apo, atsi di ya pera moy ginto, ya impunggoh ko ha panyo ko, bayo ko ya inhinêp. <sup>21</sup> Dinyag

koy habayto ta malimo ko kamo. Muwang ko ya hadyay iga pit mo. Ampangwa ka hēn alwa mon pinaghayngētan, bayo ampamutsi kan alwa mon intanēm.’

<sup>22</sup> “Kabay hinabi nan ari kana, ya wana, ‘Hika ay mihay narawak ya ipoh. Gawan ha habi mo, ay hatolan ka hēn parusaan. Muwang mo awud ya maigpit ako. Ampangwa kon alwa kon pinaghayngētan, bayo ampamutsi ko hēn alwa kon intanēm. <sup>23</sup> No êmbayro awud, awta a mo indin ya pera ko ha bangko, ta êmēn mo dayin maiorong kangko ya habayto hēn kalamoy tubo ha bangko?’ <sup>24</sup> Bayo wana kanlan atsi bayro, ‘Kowēn yoy peray ginto, ya atsi kana, ta idin yo ha main mapo.’ <sup>25</sup> Noa, hinabi la kana, ‘Apo, main yay nan mapo!’ <sup>26</sup> Kabay hinabi nan ari, ‘Anhabiēn ko kamoyu, hilay tapat ha pamanggamit hēn indin kanla, ay dyanan ko pon êt. Noa, hilay alwan tapat ha pamanggamit hēn indin kanla, ay alihēn êt kanla ya pērad ya atsi kanla. <sup>27</sup> Amêhēn, gētan yo di kangko hilay kapatsi ko, ya a nabay hēn hiko ay mag-in ari la, ta patsēn yo hila ha arapan ko.’ ”

*Mal-at ya ampagpuri kan Apo Jesus hēn ampandaraho yay na ha balayan Jerusalem*

(Mateo 21:1-11; Marcos 11:1-11; Juan 12:12-19)

<sup>28</sup> Ubat nan hinabi ya habayto ni Apo Jesus, ay inhundo lay pammita la ha Jerusalem. Hi Apo Jesus ay ampammita ha arapan lan kalamo na. <sup>29</sup> Nahēn andumani hilay na ha baryon Betfage, haka baryon Betania ha Tawtgug Olibo, ay impauna ni Apo Jesus ya lowa kanlan tagahonol na, ta wana kanla, <sup>30</sup> “Muna kaw ha humonoy baryo. Panhumwēn yo bayro, ay mahēlēk yoy mihay biseron asno, ya nakah-ēl, ya a pon nahakyān. Okalēn yoy habayto, ta gētan yo di. <sup>31</sup> No main mangotāng kamoyu no awta an-okalēn yoy habayto, ay habiēn yo, ‘Kailangan yan Panginoon.’ ”

<sup>32</sup> Kabay nammita hilay nay loway in-utoh na. Haka natapol la etaman ya biseron asno ya nanad hinabi ni Apo Jesus kanla. <sup>33</sup> Kaban an-okalēn la ya, ay hinabi lan nag asno, ya wanla, “Pata an-okalēn yoy habain ya bisero?”

<sup>34</sup> Hinabi lan in-utoh ni Apo Jesus, ya wanla, “Kailangan yan Panginoon.” Kabay pinaulayan hila etaman.

<sup>35</sup> In-akay lay bisero kan Apo Jesus, haka la inamakan pangkēbēl la, bayo himmakay hi Apo Jesus. <sup>36</sup> Inhundo lan Apo Jesus ya pammita lan palakon Jerusalem. Ha pandanan lan Apo Jesus, ay nami-amak hilay atsi bayro hēn pangkēbēl la, gawan ha panggalang la kana. <sup>37</sup> Nahēn andumani hilay na ha palohan ha Tawtgug Olibo, ay nagkanta hila hēn bapan higla, hilay kal-atan ya antoroan na ya anhumonol kana, ta ampuriēn la hi Apo Namalyari, gawan ha nahēlēk lay kapapaēpapah ya dinyag ni Apo Jesus. <sup>38</sup> Ya pamagpuri la ay êmēn di, “Puriēn ya ampamaala ya in-utoh ni Apo Namalyari! Nakapakiúmang kitamo kan Apo Namalyari! Puriēn hi Apo Namalyari!”

<sup>39</sup> Amêhēn, bayro ha kal-atan ya anhumonol kan Apo Jesus, ay main ungnoy Pariseo ya naghabi kana, ya wanla, “Mánoro, bawalēn moy tagahonol mo hēn magpuri kamo.” <sup>40</sup> Kabay wani Apo Jesus, “Anhabiēn ko kamoyu, no a la kon puriēn hēn habaytsi ya tagahonol ko, ay hilay bato tana ya magpuri kangko.”

*Hi Apo Jesus ay nanangih gawan ha kakdēyan nakēm lan taga-Jerusalem*

<sup>41</sup> Nahēn narani hilan Apo Jesus ha balayan Jerusalem, hēn nahēlēk nay balayan, ay tsinangihan nay taga-Jerusalem, <sup>42</sup> ta wana, “No muwang yo dayi amêhēn no hino ya mam-in kapatēkbēkan nakēm yo, ay alwa kaw dayin kapaingalo! Noa, a yo muwang. <sup>43</sup> Lumatēng lano ya allo ay libotēn la

kaw hēn kapatsi yo êmēn a kaw makaalih. Bayo hipitēn la kaw angga ha mamalibot. <sup>44</sup> Hiraên lay balayan yo angga ha mag-in patag ya ubatan bali yo. Patsēn lay hinoman ya atsi bayro, gawan a yo dinambi hi Apo Namalyari hēn nilumatēng ya hēn mamiligtas kamoyu.”

*Namitaboy hi Apo Jesus hēn ampipagtinda ha Templo  
(Mateo 21:12-17; Marcos 11:15-19; Juan 2:13-22)*

<sup>45</sup> Amêhēn, ay hinumwēn ya hi Apo Jesus ha Templo, ta intaboy na hilay ampipagtinda hēn ayop ya gamitēn ha átang. <sup>46</sup> Hinabi na kanla, ya wana, “Nakahulat ha habi ni Apo Namalyari, ya wanana hulat, ‘Ya bali ko ay ambaêgēn balin panalanganin.’\* Noa, dinyag yo yan logal ya panlokoan yon kapareho yo!”†

<sup>47</sup> Allo-allo ay nanoro ya hi Apo Jesus ha Templo. Noa, labay la yan patsēn lan mánoron Kautuhan ni apo Moises. Labay la yan patsēn hēn toa ya nag tungkulon ha bansa. Haka labay la ya êt hēn patsēn lan ampamaala kanlan pari. <sup>48</sup> Noa, a la ya mapatsi, ta mal-at ya labay-labay hēn manggilam habi na.

## 20

*No antoy ubatan hēn tungkulon ni Apo Jesus  
(Mateo 21:23-27; Marcos 11:27-33)*

<sup>1</sup> Mihay allo hēn atsi ya hi Apo Jesus ha Templo hēn ampamitoro hēn Mangangêd ya Habi, ay dinumani kana hilay mánoron Kautuhan ni apo Moises, ya hilay toa ya nag tungkulon ha bansa, haka hilay ampamaala kanlan pari. <sup>2</sup> Hinabi la kana, “Habiên mo kannaên no hinoy tungkulon mo hēn manyag hēn pandaygēn mo. Habiên mo êt no hinoy nam-i kamo hēn habain ya tungkulon.” <sup>3</sup> Kabay wani Apo Jesus, “Main ako pon hēn kotangēn kamoyu. <sup>4</sup> Hinoy nam-i hēn tungkulon kan Juan Bautista hēn mamawtismo? Hi Apo Namalyari o tawo?” <sup>5</sup> Kabay pinihahabian la, ya wanla, “Hinoy habiên tamo? No habiên tamo ya ‘Ubat kan Apo Namalyari ya tungkulon ni Juan Bautista,’ ay habiên na bayto, ‘Pata a yo yan pinaniwal-an?’ <sup>6</sup> Noa, no habiên tamo ya ‘Ubat ha tawo,’ ay batoêñ la kitamo, hēn kal-atan di, ta ha ihip la, hi Juan ay mihay propeta ni Apo Namalyari.” <sup>7</sup> Kabay hinabi la kan Apo Jesus, ya wanla, “A naêñ muwang no antoy ubatan tungkulon ni Juan Bautista.” <sup>8</sup> Bayo wani Apo Jesus, “No êmbayro awud, ay a ko etaman habiên kamoyu no antoy ubatan tungkulon ko.”

*In-alimbawa ni Apo Jesus ya sarili na ha anakya anlugurêny a pinatsi, haka ha bato ya intapon*

*(Mateo 21:33-46; Marcos 12:1-12)*

<sup>9</sup> Amêhēn, nangalimbawa yay na êt hi Apo Jesus, ya wana kanlan ampanggilam, “Minghan main lalaki ya nag luta ya tinamnan nan ubas. Impatsiwala na ha kaatag ya ubasan na, ta maglaêh ya ha kaatag ya bansa. <sup>10</sup> Hēn pamutsi hēn habaytoy ubas, ay in-utoh nay mihay ipoh na, hēn kowêñ ya atag na kanlan paypaniwal-an ubasan na. Noa, tinumbuk lay ipoh na, bayo impaorong la ya, hēn ayn anggêtan. <sup>11</sup> Kabay in-utoh nay na êt ya kaatag ya ipoh na, noa, tinumbuk la ya êt, impakarêng-êy la ya, bayo impaorong la ya hēn ayn anggêtan. <sup>12</sup> Nahêñ in-utoh nay na êt ya ikatlon ipoh na, ay hinugat-hugat la ya êt, bayo impaplag la ya. <sup>13</sup> Kabay, pan-ihip-ihipêñ nan nag ubasan no hino ya daygêñ na. Naihipan nan iutoh ya anlugurêñ nan anak nay lalaki, ta wana, ‘Siguradon igalang lay anak ko.’ <sup>14</sup> Noa, hēn nahêlêk

\* **19:46** Isaias 56:7. † **19:46** Jeremias 7:11.

lan paypaniwal-an ubasan ya anak nan nag ubasan, ay nihahabi hila, ya wanla, ‘Hatsi ya paypamanaan na hēn ubasan. Patsēn tamo ya, ta êmēn mapagbandi tamo ya hata ubasan na.’ <sup>15</sup> Kabay pinaalih la ya ha ubasan ta pinatsi la ya.”

Amêhēn, kinotang ni Apo Jesus hilay ampanggilam, “Hino kaya ya daygēn hēn nag ubasan kanlan paypaniwal-an na? <sup>16</sup> Siguradon lakwēn nay paypaniwal-an na, ta patsēn na hila, bayo ipatsiwala nay na ha kaatag ya ubasan na.”

Hēn nagilam lay habayto, ay wanla, “Paan dayin malyari ya habayto!” <sup>17</sup> Noa, pinakahélék ni Apo Jesus hilay ampamaala ha Templo, ta wana kanla, “Hino awud ya labay habiēn hēn habaytsi ya nakahulat ha Kahulatan ya impahulat ni Apo Namalyari?

‘Ya bato ya intapon lan manyag bali,  
ay nag-in pinakamaalagáy bato  
ta êmēn mag-in napah-êy ya bali.’\*

<sup>18</sup> Hilay matata kanan hata bato ay mangatutukihan but-o, haka hilay matatan hēn hata bato ay mangatatapong.”

### *Ya pamayad hēn buwih*

(Mateo 22:15-22; Marcos 12:13-17)

<sup>19</sup> Naintindihan lan mánoron Kautuhan ni apo Moises haka hilay ampamaala kanlan pari, ya hilay in-alimbawa di ha manyag bali, haka ha nangarawak ya paypaniwal-an ubasan, kabay labay la yan tambēng hēn dakpēn, noa, malimo hila ha kal-atan. <sup>20</sup> Kabay inimatongan la ya haka hila namiutoh hēn ungro ya waringan mangēd hila, ya mangotáng kan Apo Jesus. Noa, labay la yan madakép ha pamaghabí na, ta êmēn la ya magétan ha kapangyarihan hēn gobernador. <sup>21</sup> Amêhēn, hinabi lan hata magbabara kan Apo Jesus, “Mánoro, muwang naén ya kaptégan ya panhabiēn mo haka panoro mo. An-itoro moy kalabayan ni Apo Namalyari, ha hinoman ya ampanggilam gawan alwa kan mapamili, ta pantag ya panlēk mo ha balang miha. <sup>22</sup> Kabay main kay hēn labay mamwangan kamo. Ayon ha Kautuhan tamon Israelita, ay malyarin mam-in buwih kanan Emperador o ahē?” <sup>23</sup> Noa, muwang ni Apo Jesus ya pagbabara la, kabay hinabi na kanla, ya wana, <sup>24</sup> “Ipahlék yo kangko ya mihay sintimos hēn pilak. Hinoy nag lupa hēn angkakit yo bahēn? Hinoy nag langan ya nakahulat bahēn?” Hinabi la etaman, “Kanan Emperador.” <sup>25</sup> Kabay wani Apo Jesus, “No êmbayro awud, ay idin yo kanan Emperador ya kana, haka idin yo kan Apo Namalyari ya kan Apo Namalyari.” <sup>26</sup> Kabay a la ya madakép hi Apo Jesus ha habi na ha arapan lan kal-atan. Ayn hilay nan mahabi ta nag-êpapah hila ha habi na.

### *Ya kotang ya tungkol ha pangabiyay oman*

(Mateo 22:23-33; Marcos 12:18-27)

<sup>27</sup> Amêhēn, ay main ungro ha mihay pangkat lan Israelita ya ambaégēn Saduseo ya dinumani kan Apo Jesus. Hilay Saduseo ay a ampaniwala ha pangabiyay oman. Haka hinabi la kan Apo Jesus, ya wanla, <sup>28</sup> “Mánoro, nanulat ya hi apo Moises ha Kautuhan hēn para kantamo, ya wanán hulat, ‘No main mitaahawa, ta natsi ya lalaki hēn a hila nagkaanak, ay dapat ya kahonol nan natsi, ay ipaahawa kanan bawo. No magkaanak hila, ay habaytoy anak, ay itad anak nan natsi.’ <sup>29</sup> Minghan, ay main pitoy mikakahonol ya lalaki. Nakapag-ahawa ya punganay, noa, natsi ya hēn a ya nagkaanak. <sup>30</sup> Bayo pinag-ahawa nan humonol ha punganay ya hata bawo,

\* <sup>20:17</sup> Awit 118:22-23.

noa, natsi ya etaman ya humonol ha punganay hên a nagkaanak. <sup>31</sup> Êmbayro êt ya nalyari ha ikatlon kahonol. Balang miha kanlan pitoy mikakahonol ay nakapag-ahawa hên hata babayi, noa, naubuh hilan natsi hên a nagkaanak. <sup>32</sup> Bayo natsi ya êt ya hata bawo. <sup>33</sup> Amêhêñ, ha allon mangoman mabiyay, hinoy nay taganán mag-in ahawa nan hata babayi, ta balang miha kanlan habaytoy pitoy mikakahonol ay nag-in ahawa na?”

<sup>34</sup> Kabay wani Apo Jesus kanlan Saduseo, “Ya pamag-ahawa ay din bêngat amêhêñ ha luta. <sup>35</sup> Hilay babayi haka lalaki ya an-itad ni Apo Namalyari hên anak na, ya biyayêñ nan oman, ay a hilay nan mag-ahawa ha ikalwan biyay. <sup>36</sup> Manoto hilay na kanlan anghel ha langit, ya a ampag-ahawa, haka a hilay na matsu. Hila ay anak ni Apo Namalyari ta biniyay na hilan oman. <sup>37</sup> Agyan ya hulat ni apo Moises ay ampamaptêg ya biyayêñ oman ya nangamatsu, ta bayro ha hulat na ya tungkol ha maaypa ya kayoy andungkêt, mabáha tamo ya hinabi ni apo Moises hên tungkol kan Apo Namalyari ya hiyay ‘Diyos ni Abraham, Isaac, haka ni Jacob.’<sup>†</sup> <sup>38</sup> Hiyay alwan Diyos lan natsi, noa, hiyay Diyos lan angkabiyay, ta balang miha ya natsi, ay angkabiyay ha hêlêñ na.” <sup>39</sup> Main ungno kanlan mánoron Kautuhan ni apo Moises ya naghabi, ya wanla, “Mangêd ya hinabi mo, Mánoro.” <sup>40</sup> Hinabi lay habayto, ta marêng-êy hilay na hên mangotáng pon kan Apo Jesus.

*Hi Cristo, ya Mesias, ay alwan bêngat kaapo-apoan ni Arin David, noa, hiyay Panginoon ni Arin David etaman*  
(Mateo 22:41-46; Marcos 12:35-37)

<sup>41</sup> Amêhêñ, hinabi ni Apo Jesus kanla, ya wana, “Ay-êmêñ lan mahabi ya Mesias, ya Cristo, ya impangakon Mámiligtas ya pinili ni Apo Namalyari hên mamaala ay kaapo-apoan bat ni Arin David? <sup>42</sup> Mismon hi Arin David, ya ninuno tamo, ay namihulat ha Kahulatan ha Awit hên tungkol ha Mesias, ya Cristo, ya wana,

‘Hinabi ni Apo Namalyari ha Panginoon ko,  
“Mikno ka ha dapit panabtab ko hên mamaala hên kalamo ko,  
<sup>43</sup> angga ha mahambut ko hilay kapatsi mo,  
ta idin ko hila ha aypañ kapangyarihan mo.”’ ‡  
<sup>44</sup> Wana êt ni Apo Jesus, “Hêñ hato, ay hi Arin David ya namaêg hên ‘Panginoon ko,’ ha Mesias, ya Cristo, ya impangakon Mámiligtas ya pinili ni Apo Namalyari hên mamaala. Kabay muwang tamo, ya hiyay Panginoon haka kaapo-apoan ni Arin David.”

*Kaillag ha toro lan mánoron Kautuhan ni apo Moises*  
(Mateo 23:1-36; Marcos 12:38-40)

<sup>45</sup> Kaban ampanggilam hilay kal-atan, ay hinabi ni Apo Jesus kanlan tagahonol na, ya wana, <sup>46</sup> “Kaillag kaw ha toro lan mánoron Kautuhan ni apo Moises. Labay-labay la hêñ mibita-bitâ hêñ nakatakop hêñ makarang, ta êmêñ ipamwang ya matag-ay ya tungkul la. Labay la êt hêñ galangêñ, haka dayêwén hila hêñ kal-atan ha balayan. Ya kaatag pon ya andaygêñ la ta êmêñ ipamwang ya matag-ay ya tungkul la, ay ampilién lay pinakamangêd ya iknoan ha sinagoga haka ha kaluto. <sup>47</sup> Anlokoén la êt ya bawo ya babayi, ta êmêñ la makwa ya pibandian la, bayo magma-mangêd hilan ikarang ya panalangin la ha arapan hêñ kal-atan. Kabay hadyay pamarusa kanla lano!”

† **20:37** Exodus 3:6. ‡ **20:43** Awit 110:1.

## 21

*Ya alay hēn mihay bawo ya babayi  
(Marcos 12:41-44)*

<sup>1</sup> Kaban atsi ya pon ha Templo hi Apo Jesus, ay napansin na hilay mabandi, ya ampam-in alay la ha pamyanan alay. <sup>2</sup> Nadambi na etaman ya mihay bawo ya babayi, ya mairap, ya nam-in lo-loway sintimos ha pamyanan alay. <sup>3</sup> Kabay wani Apo Jesus kanlan tagahonol na, “Pakagilamēn yo, hata bawo ay nam-i hēn mal-at kanan indin lan kal-atan mabandi. <sup>4</sup> Ta hilay kaatag ay nam-i hēn a la pon kailangan, noa, hata bawo ay in-ubuh nan indin ya panaliw nan maêkan na.”

*Inungkat ni Apo Jesus ya pamanira hēn Templo  
(Mateo 24:1-2; Marcos 13:1-2)*

<sup>5</sup> Hilay ungno kanlan tagahonol ni Apo Jesus ay ampihabian lay kahampatan hēn Templo. No ay-êmēn kahampat ya bato ya pinaglolog haka ya kahampatan hēn hino-hino kay na hēn ya impapadpak ha lolog. <sup>6</sup> Amêhēn, hinabi ni Apo Jesus, ya wana, “Lumatēng lanoy allo, ay manga-aagwat ngan ya hata bato ya pinaglolog ya angkahēlēk yo.”

*Ya hadyay pamairap ya lumatēng  
(Mateo 24:3-14; Marcos 13:3-13)*

<sup>7</sup> Amêhēn, nangotang hilay tagahonol na kana, “Mánoro, makanon malyari ya habayto, haka ay-êmēn naêñ mamwangan no maranin malyari ya habayto?”

<sup>8</sup> Kabay wani Apo Jesus, “Kaillag kaw, ta êmēn a kaw maloko, ta mal-at ya maghabin êmēn di, ‘Hiko ya Cristo ya impangako ni Apo Namalyari. Nilumatēng ya panaon hēn anggaan hēn luta.’ Yabay ya habiêñ la, noa, paan kaw maniwala kanla. <sup>9</sup> Paan kaw malimo ha magilaman yoy tungkol ha manigulo-gulo haka pa-tsian, ta habayto ay kailangan lumatēng pon, noa, a pon tambēng lumatēng ya anggaan hēn luta.” <sup>10</sup> Amêhēn, inhundo nay na êt ni Apo Jesus ya pamaghabi na, ya wana, “Milalaban hilay bansa haka hilay angkalokopan hēn mihay bansa ay milalaban ha kabansa la. <sup>11</sup> Lumatēng ya mangakhaw ya layon. Lumatēng êt ya hadyay lonoh haka salot ya ubatan hēn hino-hino kay na hēn ya hakit ya ikamatsi lan tawo ha mal-at ya logal. Lumatēng êt ya kapalimo haka kapapaêpapah ya mangalyari ha angkahēlēk ha langit.

<sup>12</sup> “Noa, bayo malyari ya habayto, ay dakpēn la kaw, haka pairapan la kaw, ta gêtan la kaw kanlan toa ya nag tungkulon ha hinon sinagoga, kotangêñ la kaw, bayo ikulung la kaw. Gawan ha paniwala yo kangko, ay gêtan kaw kanlan ari haka gobernador. <sup>13</sup> Ha êmbayro ay maipamwang yo kanla ya Mangêd ya Habi tungkol kangko. <sup>14</sup> Uston iarap la kaw kanlan manungkulon, ay pataniêhēn yoy nakêm yo. A kaw manyagah no hinoy habiêñ yo hēn pamakibat ha kotang la, <sup>15</sup> ta ipaihip ko kamoyu ya mangêd yon habiêñ, ya a la kayan labanan o hambutêñ hēn kapatsi yo. <sup>16</sup> Miha êt, hila man ya toa yo, kapotoh pohêl yo, kaatag êt ya kamag-anak yo, haka hilay kaluguran yo ay may-upit kamoyu, kabay ya kaatag kamoyu ay patsên. <sup>17</sup> Kahêmêkan kaw hēn kal-atan gawan paniwala yo kangko. <sup>18</sup> Noa, a na kaw paulayan ni Apo Namalyari, ta miha man ya habot ulo yo, ay a miabot ha impiyerno. <sup>19</sup> Têêhêñ yoy habayto, ta êmēn kaw madyanan hēn biyay ya ayn angga.”

*Inungkat ni Apo Jesus ya pamanira ha balayan Jerusalem  
(Mateo 24:15-21; Marcos 13:14-19)*

**20** “Uston mahêlêk yoy balayan Jerusalem ya napalibutan hên hundaloh, ay mamwangan yoy na bayto ya marani yana ya pamanira kana. **21** Ha allon habayto ay kailangan muwayun magtago ha babo, ya hilay taga-probinsyan Judea. Hilay atsi ha balayan Jerusalem ay kailangan hên mag-alih. Hilay atsi ha pananêman la, ay paan mag-orong ha balayan. **22** Gawan habaytoy panaon hên pamarusa, ta êmén matupad ya nakahulat, ya impamwang lan mâmipamwang hên an-ipaihip kanla ni Apo Namalyari hên hato. **23** Kanan habayto, ay kaingalo hilay nabuktot haka hilay ampamahoho, ta mabyat ya kairapan ya maranasan la di ha luta, ta ya tobag ni Apo Namalyari ay lumatêng kanlan Israelita. **24** Main hên matsi ha gulo, bayo ya kaatag ay gêtan ta ikulung ha marayo ya bansa. Ya balayan Jerusalem ay pakahiraên lan alwan Israelita, ya a ampagpalokop kan Apo Namalyari, angga ha mayari ya panaon ya indin kanla.”

*Ya pamanlumatêng oman ni Apo Jesus ya Taga-Langit, ya In-anak Tawo  
(Mateo 24:29-31; Marcos 13:24-27)*

**25** Wana êt ni Apo Jesus, “Pangayarin habaytoy hadyay kairapan, ay mahêlêk yoy kapapaêpapah ha allo, ha buwan, haka ha bêtewên. Alwan bêngat habayto, noa, man-awk êt ya tandulon ha dagat kabay manyagah hilay tawo ha balang bansa. **26** Hilay tawo ay mangabunsol, gawan hadyay limo la kaban an-ihipêñ lay angkalyari ha boon luta, ta mayêgyêg hilay bêtewên haka maubuh hên mangayêgyêg ya angkahêlêk ha langit. **27** Kanan habayto, ay mahêlêk la ko ha lêmm, ya Taga-Langit, ya In-anak Tawo, ya anlumatêng, hên main kapangyarihan, haka ya kapahilêw ya kahampatan ni Apo Namalyari.” **28** Wanay na êt ni Apo Jesus kanlan tagahonol na, ya wana, “No mag-umpisan malyari ya habayto ya kapapaêpapah, ay pataniêhêñ yoy nakêm yo, ta marani yanay pangakbus kamoyu.”

*Ya toro ya makwa ha poon kayon igos  
(Mateo 24:32-35; Marcos 13:28-31)*

**29** Bayo wani Apo Jesus hên nangalimbawa, “Hêlkêñ yoy poon kayon igos, haka kaatag êt ya poon kayo. **30** No mamayo yan bulong, ay muwang yoy na ya marani yanay kaingitan. **31** Êmbayro êt, no mahêlêk yoy nan maubuh hên malyari ya habayto ya kapapalimo, ay mamwangan yoy marani yanay pamanlokop ni Apo Namalyari. **32** Pakagilamêñ yo. Maubuh hên matupad ya habayto kaban main pon di ha luta hên kapareho yon Israelita. **33** Ya angkahêlêk ha langit, haka ya luta ay main anggaan, noa, ya habi ko ay ayn anggaan.”

*Dapat panay hên nakal-an*

**34** Hinabi nay na êt ni Apo Jesus, ya wana, “Kaillag kaw ta êmén a kaw mipahobohob ha kahibaan, pamaglahing, haka kayagahan ha kailangan yo ha biyay di ha luta. Ta êmén a kataw malatngan ya a nakal-an ha allon pamanlumatêng kon oman. **35** Gawan ha biglan lumatêng ya habaytoy allo, ay maubuh hên mabigla hilay tawo ha boon luta. **36** Kabay kailangan panay kaw nakal-an ha balang oras. Dapat panay kaw manalangin ya dyanan na kaw hên hêkaw, ta êmén a kaw mahambut hên hinoman ya angkalyari di, ta êmén kaw makapakiarap kangko, ya Taga-Langit, ya In-anak Tawo.”

**37** Allo-allo ay ampanoro ya hi Apo Jesus ha Templo ya atsi ha balayan Jerusalem. Balang yabi ay anlumakat ya ha Tawtgug Olibo ta bayro yan ampagdahêl. **38** Kabay maranon hên allo-allo, ay ampammitta ya kal-atan, hên manggilam toro na ha Templo.

## 22

*Ya pamamulong kan Apo Jesus  
(Mateo 26:1-5; Marcos 14:1-2; Juan 11:45-53)*

<sup>1</sup> Amêhêñ, ay marani yanay pista lan Israelita ya ambaêgêñ lan Pistan Puerto ya ayn Pampaalsa haka ya Pistan Pangaligas ha Egipto.\* <sup>2</sup> Hilay mánoron Kautuhan ni apo Moises, haka hilay ampamaala kanlan pari, ay ampamulong kan Apo Jesus, no ay-êmén la yan maipapatsi hén ayn makamwang, gawan malimo hila ha kal-atan, ya ampanggilam toro na.

*In-upit ni Judas Iscariote hi Apo Jesus  
(Mateo 26:14-16; Marcos 14:10-11)*

<sup>3</sup> Amêhêñ, hi Satanas ay hinumapat kan Judas, ya ambaêgêñ lan Iscariote, ya miha kanlan labinloway tagahonol ni Apo Jesus. <sup>4</sup> Kabay nammita yay na hi Judas hén makihabi kanlan ampamaala kanlan pari haka kanlan ampamaala kanlan bantay ha Templo, no ay-êmén na mai-upit hi Apo Jesus.

<sup>5</sup> Hinumigla hila etaman ya i-upit ni Judas hi Apo Jesus kanla, haka nangako hila ya dyanan la yan pera. <sup>6</sup> Nabay ya etaman hi Judas, kabay paubat hén habayto, ay ampanghiip yay na no ay-êmén na yan maidin ha gamêt la, hén a mamwangan hén kal-atan.

*Hi Apo Jesus ay namipal-an hén pangkaén la ha Pistan Pangaligas ha Egipto  
(Mateo 26:17-25; Marcos 14:12-21; Juan 13:21-30)*

<sup>7</sup> Amêhêñ, nilumatêng ya unan allo hén Pistan Puerto ya ayn Pampaalsa. Habaytoy allon pamatsi lan Israelita hén anak tupa, ya kênaêñ la no manaboy nay allo hén habayton yabi hén Pistan Pangaligas ha Egipto.† <sup>8</sup> Namipal-an hi Apo Jesus kan Pedro haka kan Juan hén pangkaén ha Pistan Pangaligas, ta wana, “Mita kaw na, ta il-an yoy pangkaén tamo amêhêñ yabi ha pista.” <sup>9</sup> Kabay nangotang hilan Pedro, “Atoy labay moy legal ya pangil-anan naén hén kaén tamo?” <sup>10</sup> Wani Apo Jesus, “Panlumatêng yo ha balayan Jerusalem, ay matupa yoy mihay lalaki ya ampantan banga ya nag lanêm. Pakihonolan yo ya ha bali ya howênêñ na, <sup>11</sup> ta habiêñ yo ha nag bali, ya êmén di, ‘Labay nan Mánoro ya itoro mo kannaêñ, no antoy kuwarto ya panganan nan kaén ha Pistan Pangaligas, hén kalamo na kay ya tagahonol na.’ <sup>12</sup> Kabay ipahlék na kamoyu ya mihay mahlay ya kuwarto ya nakal-an ha tag-ay. Bayro yon il-an ya kaén tamo ha pista.” <sup>13</sup> Nammita hilay nay loway tagahonol, haka natupad ya balang hinabi ni Apo Jesus kanla. Kabay in-il-an lay nay kaén ha pista.

*Nangan hi Apo Jesus haka hilay labinloway apostol na hén pangkaén ha Pistan Pangaligas*

*(Mateo 26:26-30; Marcos 14:22-26; 1 Corinto 11:23-25)*

<sup>14</sup> Hén oras hén mangan hén pangkaén ha Pistan Pangaligas, ay inarap lan Apo Jesus ya kaén la. <sup>15</sup> Amêhêñ, wana kanlan labinloway apostol na, “Bayo ko magdanas hén pamagdusa, ay boon nakêm kon labay hén mapagkaém kataw pon hén mangan hén habaytsi ya pangkaén ha Pistan Pangaligas. <sup>16</sup> Anhabiêñ ko kamoyu, ya a kina oman mangan pangkaén ha Pistan Pangaligas angga ha a pon matupad ya labay habiêñ hén habaytsi ha pamanlokop ni Apo Namalyari.” <sup>17</sup> Amêhêñ, dinampot nay pamminêman ya nag alak ta impahalamat nay hatsi kan Apo Namalyari, bayo hinabi na kanla, ya wana, “Piatagan yoy hatsi laamêhêñ. <sup>18</sup> Ta anhabiêñ ko kamoyu, ya a ko pon minêm oman hén alak, angga ha a pon lumatêng ya pamanlokop

\* **22:1** Paskwa. Hêlkêñ ha panlêkan labay habiêñ hén habi di ha bokotan hén hata Bibliya. † **22:7** Paskwa.

ni Apo Namalyari.” <sup>19</sup> Amêhén, nandampot yan puto ta impahalamat nay habayto kan Apo Namalyari, haka na pino-potoh, bayo inggawang na kanla, ta wana, “Habaytsi ya lawini ko, ya an-idin ko ha ikakangé yo. Dapat panay yon daygén ya habaytsi, ta êmén yo ko maihipan.” <sup>20</sup> Êmbayro êt, hèn nayari hilan nangumapon, ay nandampot yan pamminêman ya nag alak, ta wana, “Habaytsi ya daya ko, ya mamoganggang ha pamatawad hèn kasalanan hèn kal-atan. Yabay ya nanad pinakapirma hèn bayoy kahundoan ni Apo Namalyari kanlan pinili na hèn mag-in kana.

<sup>21</sup> “Noa, ya mihay kaaém tamo di, ay mangi-upit kangko. <sup>22</sup> Hiko ya Taga-Langit, ya In-anak Tawo ay taganán matsi, ta habaytoy tinalagá ni Apo Namalyari. Noa, taganán kaingalo ya mangi-upit kangko.” <sup>23</sup> Amêhén, ampikokotang hilay labinlowa no hino kanla ya manyag hèn êmbayro.

*Ya pamihubak lan tagahonol ni Apo Jesus no hino kanla ya main matag-ay ya tungkulan*

<sup>24</sup> Ampihuhubakan lan tagahonol ni Apo Jesus no hino kanla ya main matag-ay ya tungkulan. <sup>25</sup> Kabay hinabi ni Apo Jesus kanla, ya wana, “Hilay ari haka hilay kaatag ya ampamaala, ay ampamiyatay kanlan atsi ha lokop la hèn manyag kalabayan la, yan labay la êt hèn mabaég hila hèn maingaloén. <sup>26</sup> Noa, dapat alwan êmbayro kamoyu, ta ya pinakamatag-ay, ay dapat mag-in pinakamaaypa. Haka ya ampamaala, ay kailangan maghuyo. <sup>27</sup> Hino ya matag-ay ya tungkulan? Ya ampikno ha lamisaan, o ya ampamigawang hèn hinon kailangan nan ampikno? Taganán habaytoy ampikno ya nag tungkulan! Noa, hiko ay atsi di hèn nanad ha mihay ampaghuyo.

<sup>28</sup> “Hikaw ay panay kon nakalamo, ha kairapan man ya dinanan ko, ya nanad pamanubuk kangko. <sup>29</sup> Kabay, no ay-êmén nan indin kangko ya tungkulan hèn mamaala, ni Apo Namalyari, ya Tatang ko, ay êmbayro êt ay dyanan kataw hèn tungkulan hèn mamaala. <sup>30</sup> Lano ay mapagkalamo kataw hèn mangan ha lamisaan ya atsi ha pamanlokop ko. Mikno kaw ha iknoan hèn ari ta mamaala kaw kanlan Israelita, ya hilay kaapo-apoan lan labinloway anak ya lalaki ni apo Israel.”

*Impamwang ni Apo Jesus ya habiên ni Simon Pedro ya a na ya muwang  
(Mateo 26:31-35; Marcos 14:27-31; Juan 13:36-38)*

<sup>31</sup> “Simon, manggilam ka,” wani Apo Jesus, “Nakihabi hi Satanas kan Apo Namalyari ya subukén na kaw ya labinloway tagahonol, haka paulayan na ya ni Apo Namalyari. <sup>32</sup> Noa, inhalangin kata Simon, ya a dayin maalih ya paniwala mo kangko. Haka ha pag-orong hèn nakêm mo ay dapat mon pataniêhén ya nakêm hèn kapareho mon ampaniwala.” <sup>33</sup> Kabay hinabi ni Simon Pedro, ya wana, “Panginoon, nakal-an akon magpakulung haka matsi hèn kalamo mo.” <sup>34</sup> “Pedro,” wani Apo Jesus, “pakagilamén mo, bayo mangkatsi ya manok amêhén yabi, ay katatlo mon habiên ya a mo ko muwang.”

*Ya aral ni Apo Jesus kanlan tagahonol na*

<sup>35</sup> Amêhén, hinabi ni Apo Jesus kanlan tagahonol na, ya wana, “Yarin nagkulang kaw hèn in-utoh kataw hèn ayn pera, ayn balutan, haka ayn pag-apin bitsih yo!” “A kay, Apo,” wanla etaman. <sup>36</sup> “Noa, amêhén, ya balang miha ya main, ay kailangan mantan pera haka balutan la. Haka hilay ayn panlaban ay kailangan manaliw hilan panlaban la, ihaliw la man ya takop la, ta êmén hila main hèn panaliw. <sup>37</sup> Ta kailangan matupad ya nakahulat ya tungkol kangko bayro ha Kahulatan ya impahulat ni Apo Namalyari kan

Propeta Isaias, ya wana, ‘Intad la yan mapanyag karawakan.’<sup>‡</sup> Haka ya inhulat ya tungkol kangko ay angkatupad amêhên.” <sup>38</sup> Kabay hinabi lan tagahonol na, “Panginoon, hêlkên moy hatsi. Main kitamo hên loway êtak ya panlaban.” Wana etaman ni Apo Jesus, “Hukad ya.”

*Nanalangin hi Apo Jesus ha Tawtgug Olibo  
(Mateo 26:36-46; Marcos 14:32-42)*

<sup>39</sup> Nahêñ ubat hilan nangan pangkaén ha Pistan Pangaligtas, ay nammita hilan Apo Jesus ha Tawtgug Olibo, ya panlakwên la no yabi. <sup>40</sup> Hêñ nilumatêng hilay na bayro, ay hinabi ni Apo Jesus kanlan tagahonol na, ya wana, “Manalangin kaw kan Apo Namalyari, ta êmén a kaw mahambut hêñ tukso.” <sup>41</sup> Napaidayo ya kanla hêñ marayo-dayo ta nandoko yan nanalangin, ya wana, <sup>42</sup> “Tatang ko ha langit, no labay mo, ay a mo ko dayin paulayan hêñ magdanas ako hêñ hatsi ya mabyat ya kairapan ya lumatêng kangko. Êmbayro man, alwan kalabayan ko, noa, ya kalabayan mo ya honolêñ ko.” <sup>43</sup> Kaban ampanalangin ya ay nagpahlék kana ya mihay anghel, ya ubat ha langit, ya namahêkaw kana. <sup>44</sup> Gawan ha kabyatan laman ihip na, ay lalo nan imboo ya nakêm na ha panalangin, kabay ya hayngêt na, ay nanad daya ya ampantolo ha luta.

<sup>45</sup> Hêñ nirêng ya, hêñ ubat nanalangin, ay nag-orong yay na ha andyanan lan tagahonol na. Nalatngan na hila hêñ angkabêlêw gawan hadyay lungkot la. <sup>46</sup> Pinukaw na hila, ta wana kanla, “Pata angkabêlêw kaw? Mimata kaw, haka kaw manalangin ta êmén kaw a mahambut<sup>§</sup> hêñ tukso.”

*Ya pamandakêp kan Apo Jesus  
(Mateo 26:47-56; Marcos 14:43-50; Juan 18:3-11)*

<sup>47</sup> Kaban ampaghabi ya pon hi Apo Jesus, ay main nilumatêng ya kal-atan, ya ampangamat kan Judas Iscariote ya miha kanlan labinloway tagahonol na. Dinumani ya kan Apo Jesus ta aroén na ya dayi. <sup>48</sup> Noa, wani Apo Jesus kan Judas, “Aro awud ya pinay-upit mo kangko, ya Taga-Langit, ya In-anak Tawo.” <sup>49</sup> Hêñ nahêlék lan tagahonol, ya kalamo ni Apo Jesus, ya angkalyari, ay wanla, “Panginoon, labay mon gamitên naén ya hata panlaban naén?” <sup>50</sup> Amêhên, bat yan nanigpah ya miha kanlan tagahonol na hêñ têkk hêñ mihay ipoh hêñ pinakapoon pari. <sup>51</sup> Noa, wani Apo Jesus, “Paan!” Tinalan nay têkk, ta in-orong na ya ha mana, ya hatoy têkk.

<sup>52</sup> Amêhên, wani Apo Jesus kanlan ampagbantay ha Templo, kanlan toa ya nag tungkulon ha bansa, haka kanlan ampamaala kanlan pari, ya ampipandakêp kana, “Andakpêñ yo ko hêñ nanad pandakêp ha mapanyag karawakan. <sup>53</sup> Allo-allo atsi ko bahêñ kamoyu ha Templo, unin a yo ko dinakêp. Noa, amêhên ya panaon yo, haka panaon ya indin kan Satanas, ta êmén na madyag ya karawakan ya labay nan daygên.”

*Katatlo nan hinabi ni Pedro ya a na balay hi Apo Jesus  
(Mateo 26:57-58, 69-75; Marcos 14:53-54, 66-72; Juan 18:12-18, 25-27)*

<sup>54</sup> Dinakêp la hi Apo Jesus ta gintan la ya ha bali nan pinakapoon pari. Hi Pedro ay nangamat kanla ha marayo-dayo. <sup>55</sup> Hêñ nilumatêng hilay na ha balin pinakapoon pari ay namagkêt hilan apoy, kabay nakilamo hi Pedro kanlan ampanêngêy bayro. <sup>56</sup> Hêñ napansin yan mihay ipoh ya babayi, ha hawang hêñ apoy, ay pinuliah na ya, ta wana, “Habain ya lalaki ay kalamo ni Jesus.” <sup>57</sup> Noa, hinabi ni Pedro, ya wana, “Alwa. A ko ya man muwang.” <sup>58</sup> A nabuyot ay napansin yay na êt hi Pedro, hêñ mihay lalaki, ya naghabi, “Miha ka êt kanla!” Noa, hinabi na etaman ni Pedro, “Alwan hiko.” <sup>59</sup> Hêñ

<sup>‡</sup> 22:37 Isaias 53:12. <sup>§</sup> 22:46 matalo.

nakalabah ya miha êt ya oras, ay main ana êt mihay lalaki ya ampamilit, ya wana, "Siguradon hata lalaki ay kalamo ni Jesus gawan taga-Galilea ya êt." <sup>60</sup> Noa, hinabi ni Pedro, ya wana, "A ko muwang ya panhabiên mo!" Kaban ampaghabi ya pon, ay nangkatsi ya mihay manok. <sup>61</sup> Namalingay hi Apo Jesus ta pinakahêlêk na hi Pedro. Kabay naihipan ni Pedro ya hinabi ni Apo Jesus kana ya, "Bayo mangkatsi ya manok amêhêñ yabi, ay katatlo mon habiên, ya a mo ko muwang." <sup>62</sup> Kabay inumawah ya hêñ haday tangih na.

*Kinailyan la hi Apo Jesus haka la ya tinumbuk  
(Mateo 26:67-68; Marcos 14:65)*

<sup>63</sup> Hi Apo Jesus etaman ay kinailyan haka tinumbuk hêñ ampipagbantay kana. <sup>64</sup> Tinagpênan lay mata na hêñ panyo haka la ya kinotang, "Hinoy nanumbuk kamo? Habiên mo!" <sup>65</sup> Mal-at êt ya kaatag ya hinabi la, ya pammusmus kana.

*Hi Apo Jesus ay in-arap ha Sanedrin  
(Mateo 26:59-66; Marcos 14:55-64; Juan 18:19-24)*

<sup>66</sup> Pangamaranon, ay ni-tsi-tsipon hilay kalamo hêñ Sanedrin, ya angkaboo hêñ toa ya nag tungkulon ha bansa, boy hilay ampanoro hêñ Kautuhan ni apo Moises, haka hilay ampamaala kanlan pari. In-arap kanla hi Apo Jesus ta lingonêñ lay kaso na, ya wanla, <sup>67</sup> "Habiên mo kannaêñ no hika ya Mesias, ya Cristo, ya pinili ni Apo Namalyari hêñ mag-in habaytoy Mámiligtas ya impangako na." Noa, wana kanla, "Agyan habiên ko kamoyu, ay a yo ko paniwal-an. <sup>68</sup> Haka no kotangêñ kataw, ay a kaw man makibat. <sup>69</sup> Noa, ubat amêhêñ, hiko, ya Taga-Langit ya In-anak Tawo, ay mikno ha dapit panabtab ni Apo Namalyari ya Makapangyarihan." <sup>70</sup> Kabay wanla, "No êmbayro awud, ay anhabiên mo ya hika ay Anak ni Apo Namalyari." Bayo wani Apo Jesus, "Awo, hikaw nay ampaghabin hikoy habayto." <sup>71</sup> Kabay wanla, "A tamina kailangan hêñ kaatag êt ya tistigos, ta nagilaman tamina ya hinabi na."

## 23

*Hi Apo Jesus ay in-arap kan Gobernador Pilato  
(Mateo 27:1-2; 11:14; Marcos 15:1-5; Juan 18:28-38)*

<sup>1</sup> Amêhêñ, naubuh hilan nirêng ya kalamo hêñ Sanedrin, ta gintan la ya hi Apo Jesus hêñ in-arap kan Gobernador Pilato, ya gobernador hêñ probinsyan Judea. <sup>2</sup> Binad-an la ya, ya wanla kan Gobernador Pilato, "Narakêp naêñ ya habaytsi. Alwan mangêd ya panhabiên na ha kal-atan, ya a hila kano kailangan hêñ mamayad hêñ buwih ha pinakapoon ha bansen Roma, haka hiya kano ya Mesias, ya Cristo, ya mihay ari." <sup>3</sup> Amêhêñ, kinotang ni Gobernador Pilato hi Apo Jesus, ya wana, "Awta? Hika ya ari hêñ Israelita?" Hinabi etaman ni Apo Jesus, "Hinabi mina, Gobernador." <sup>4</sup> Kabay wani Gobernador Pilato kanlan poon pari haka kanlan kaatag, "Ayn akon angkahêlêk ya ikadikil hêñ hata lalaki." <sup>5</sup> Noa, lalo lan impalêkpêk, ya wanla, "Gawan ha panoro na di ha probinsyan Judea, ay nahulhulan hilay nay tawo hêñ manobag ha gobyernon Roma. Nag-umpisa yan nanoro ha probinsyan Galilea, bayo amêhêñ atsi yay na di."

*Hi Apo Jesus ay in-arap kan Gobernador Herodes Antipas*

<sup>6</sup> Hêñ nagilaman ni Gobernador Pilato ya habaytsi, ay kinotang na no taga-probinsyan Galilea hi Apo Jesus. <sup>7</sup> Hêñ namwangan ni Gobernador Pilato ya hi Apo Jesus ay taga-probinsyan Galilea awud, ya sakop ni Gobernador Herodes Antipas, ay in-utoh na hêñ gêtan la ya hi Apo Jesus kana, ta atsi

ya etaman bayro ha Jerusalem hên habayto. <sup>8</sup> Hadyay higla ni Gobernador Herodes Antipas hên nahêlêk na hi Apo Jesus, gawan mal-at ya nagilam na, ya tungkol kana, haka nabuyot nay nan labay mahêlêk ya kapapaêpapah ya dyag na. <sup>9</sup> Kabay pinagkokotang ni Gobernador Herodes Antipas hi Apo Jesus. Noa, a ya naghabi hi Apo Jesus. <sup>10</sup> Hadyay huluk lan poon pari haka hadyay huluk lan mánoron Kautuhan ni apo Moises ha pamara la kan Apo Jesus. <sup>11</sup> Hi Apo Jesus ay pinagmumusmus haka kinailyan ni Gobernador Herodes Antipas haka hilay hundaloh na. Ha pammusmus la kana ay pinatakopan la ya hên mahampat ya nanad takop hên ari, bayo impaorong la ya kan Gobernador Pilato. <sup>12</sup> Hêñ hato, ay mikapatsi hi Gobernador Pilato haka hi Gobernador Herodes Antipas, noa, habayton allo êt ay napilugud hilay nay lowa.

*Hi Apo Jesus ay hinatolan hên matsu ha koros  
(Mateo 27:15-26; Marcos 15:6-15; Juan 18:39-19:16)*

<sup>13</sup> Pinatsipon ni Gobernador Pilato hilay ampamaala kanlan pari, hilay kaatag ya ampamaala, haka hilay kal-atan Israelita. <sup>14</sup> Ta wana kanla, “Gintan yo ya hatsi ya lalaki kangko gawan alwa kanon mangêd ya panoro na kanlan kal-atan. Pinakakotang ko ya, noa, ayn akon nahêlêk kana ya kasalanan ya an-ibara yo kana. <sup>15</sup> Hi Gobernador Herodes Antipas man, ay ayn yan nahêlêk kanay kasalanan, kabay impaorong na ya kantamo di. Ayn yan dinyag ya pamatsan kana. <sup>16</sup> Kabay ipalatiko ko ya tana, bayo ibuhan ko ya.” <sup>17</sup> (Balang Pistan Pangaligtas ha Egipto,\* ay kailangan ni Gobernador Pilato hên ibuhan ya miha kanlan nakahukul.)

<sup>18</sup> Noa, ya kal-atan ay nan-angaw, ya wanla, “Patsêñ hi Jesus! Hi Barrabas tana ya labay naêñ hên ibuhan mo!” <sup>19</sup> (Nakahukul hi Barrabas gawan nakilamo ya kanlan kal-atan ya nanyag hên halanghang ha gobyernon Roma ha balayan Jerusalem, haka gawan namatsi yan tawo.)

<sup>20</sup> Labay na dayi ni Gobernador Pilaton mibuhan hi Apo Jesus, kabay naghabi yan oman ya ibuhan dayi hi Apo Jesus. <sup>21</sup> Noa, in-angawla, ya wanla, “Ipako ya ha koros! Ipako ya ha koros!”

<sup>22</sup> Katatlo nan hinabi ni Gobernador Pilato, ya wana, “Awta? Hinoy kasalanan na? Ayn akon nahêlêk kana ya pamatsan kana. Ipalatiko ko ya tana, bayo ibuhan ko ya.”

<sup>23</sup> Noa, impapakaangaw lan poon pari haka lan kaatag, ya ipako ya ha koros. Kabay ayn yay nan madyag hi Gobernador Pilato. <sup>24</sup> Pinaulayan na hilay na ha kalabayan la. <sup>25</sup> Hinonol nay kalabayan lan kal-atan, ta imbuhan na hi Barrabas, ya nakahukul gawan nanalanghang ya ha gobyerno, haka gawan namatsi yan tawo. Indin na ya hi Apo Jesus ha gamêt la, ta êmén la madyag ya kalabayan la.

*Hi Apo Jesus ay impako ha koros  
(Mateo 27:32-44; Marcos 15:21-32; Juan 19:17-27)*

<sup>26</sup> Amêhêñ, gintan la hi Apo Jesus hên hundaloh ta ipako la ya ha koros. Ha pammita la ay nakatupa hila hên mihay lalaki ya nag langan Simon ya taga-Cirene, ya anhumwêñ ha balayan. Dinakêp la ya ta impabalangaw lay koros kana hên ampakihonol kan Apo Jesus.

<sup>27</sup> Hadyay kal-atan ya hinumonol kana. Kalamo la ya kaatag ya babayi ya hadyay tangih, ta antangihan la ya. <sup>28</sup> Namalingay hi Apo Jesus, ta wana kanla, “Hikaw ya babayi ya taga-Jerusalem, paan yo ko tangihan, noa, tangihan yoy sarili yo haka maának yo, <sup>29</sup> ta lumatêng lano ya allo ya habiêñ

\* 23:17 Paskwa. Hêlkêñ ha panlêkan labay habiêñ hên habi di ha bokotan hêñ hata Bibliya.

la, ya iningalwan hilay a nakaanak haka a namahoho. <sup>30</sup> Habaytoy panaon ay habiên la kanlan tawtgug, ya wanla, ‘Gêymaan yo kay.’ Wanla êt kanlan bung-oy, ‘Taphonan yo kay.’ <sup>31</sup> Ta no êmên di ya daygên la ha kayoy nailê, ay hino bayto ya daygên la ha kayoy nayango?†”

<sup>32</sup> Main êt loway lalaki, ya parehon mapanyag karawakan ya gintan hêñ patsêñ kalamo ni Apo Jesus. <sup>33</sup> Hêñ nilumatêng hila ha legal ya ambaégêñ lan Golgota o Bungo, ay bayro la hilan impako hêñ hundaloh, ha tatloy koros. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki na. <sup>34</sup> Amêhêñ, nanalangin ya hi Apo Jesus, “Tatang ko ha langit, patawarêñ mo hila ta a la muwang ya pandaygên la.” Hilay hundaloh etaman, ay nangwan takop ni Apo Jesus ta inatag-atag lan pinagpalabonutan. <sup>35</sup> Mal-at ya atsi bayro hêñ ampanlêk kaban ammusmusêñ la ya hêñ ampamaala ha Templo, ya wanla, “Inligtas nay kaatag. No hiya ya Mesias, ya Cristo, ya impangakon Mâmiligtas ya pinili ni Apo Namalyari hêñ mamaala, pata a na mailigtas ya sarili na!” <sup>36</sup> Hilay hundaloh ay nammusmus kana etaman. Painêmêñ la ya dayin nangihoy alak, <sup>37</sup> ta wanla kana, “No hika ya Ari lan Israelita, iligtas moy sarili mo!” <sup>38</sup> Atsi ha koros, ha ugton ulo na, ya nakahulat (ha habin Griego, Latin, haka Hebreo), ya wanana hulat, “Hatsi ya Ari lan Israelita.”

<sup>39</sup> Minusmus ya êt hêñ miha kanlan loway mapanyag karawakan ya nakapako ha koros hêñ karani na, ya wana, “No hika ya Mesias, ya Cristo, ya impangakon Mâmiligtas ya pinili ni Apo Namalyari hêñ mamaala, ay iligtas moy sarili mo, haka hikay.” <sup>40</sup> Noa, tinobag na yan kapareho nan mapanyag karawakan, ya wana, “Ayn kan limo kan Apo Namalyari? Pare-pareho kitamon amparusaan hêñ patsêñ. <sup>41</sup> Hêpat kanta ya habayto ta nakadyag kitan kasalanan, noa, hiya etaman, ay ayn yan kasalanan.” <sup>42</sup> Bayo hinabi na kan Apo Jesus, ya wana, “Apo, a mo kon liwaan, ustion ampamaala kay na.” <sup>43</sup> Kabay, hinabi ni Apo Jesus kana, ya wana, “An-ipangako ko kamo, ya amêhêñ êt, ay mapagkalamo mo ko ha langit, ha Paraiso.”

### *Ya pangamatsi ni Apo Jesus*

(Mateo 27:45-56; Marcos 15:33-41; Juan 19:28-30)

<sup>44</sup> Hêñ marani yanay ugtoy allo, ay dinumiglêm ya boon luta angga ha alas tres hêñ maapon. <sup>45</sup> Sakton dinumiglêm, ay biglan nawawkwak hêñ napibonak ya makogpaw ya takop ya pinagpêñlan bayro ha lalê hêñ Templo ha Jerusalem. <sup>46</sup> Amêhêñ, nan-angaw hi Apo Jesus hêñ hadyay hêkaw, ya wana, “Tatang ko ha langit, ipaulay kina kamo ya kaêlwa ko.” Hêñ nayari nan hinabi ya habayto ay natsi yay na. <sup>47</sup> Hêñ nahêlêk nan ampamaala kanlan hundaloh, ya pangamatsi ni Apo Jesus, ay pinuri na hi Apo Namalyari, ya wana, “Pêtêg bay awud! Ayn yan kasalanan ya habaytsi!” <sup>48</sup> Hêñ nahêlêk lan kal-atan ya ni-tsi-tsipon, ya nalyari, ay nuli hila hêñ andugdugêñ lay pagaw la, gawan hadyay lungkot la. <sup>49</sup> Noa, hilay kabalay ni Apo Jesus, kalamo hilay babayi ya nakhonol kana hêñ nanaglap kana, hêñ paubat ha probinsyan Galilea, ay nakairêng ha marayo-dayo kana, ta andungawan lay angkalyari.

### *Ya pamilbêng kan Apo Jesus*

(Mateo 27:57-61; Marcos 15:42-47; Juan 19:38-42)

<sup>50</sup> Main bayro hêñ mihay lalaki, ya hi Jose, ya taga-balayan Arimatea ha probinsyan Judea. Hiyay mapanyag kangêran haka anhumonol ya ha Kautuhan ni apo Moises. Hiyay mihay kalamo hêñ Sanedrin. <sup>51</sup> Noa, a ya

† **23:31** Mal-at ya maghabin ya labay habiên hatsi ay no êmên di ya daygên la kan Apo Jesus ya ayn kasalanan ay mabyat êt ya daygên la kanlan Israelita ya main kasalanan.

nakiuyon ha dinyag la kan Apo Jesus. Pan-êngganan nay pamanlokop ni Apo Namalyari. <sup>52</sup> Dinumani ya kan Gobernador Pilato, ta pinakikwaan nay bangkay ni Apo Jesus, ta iilbêng na ya. Nabay ya etaman hi Gobernador Pilato. <sup>53</sup> Kabay kingwa ni Jose ya bangkay ni Apo Jesus, hên in-aypa, haka na kinêlkêlan hên makarang ya takop, ya naputsi. Bayo inhowên na ya ha pay-ilbêngan ha lêyang ya bato, ya a êt pinay-ilbêngan. <sup>54</sup> Hên habayto ay allon pamaglêan ha allon pamagsimba lan Israelita.

<sup>55</sup> Hilay babayi ya nakihonol kan Apo Jesus ya ubat ha probinsyan Galilea, ay nakilako kan Jose. Nahêlêk lay pinay-ilbêngan kan Apo Jesus haka no ay-êmén inhowên bayro ya bangkay na. <sup>56</sup> Bayo nag-orong hilay na ha balayan, ta namil-an hilan pabango, ya idin la ha bangkay ni Apo Jesus.

A la tambêng nagêtan kanay habaytoy pabango, ta nagpainawa hila ha allon Sabado ha pamanhumonol ha Kautuhan.

## 24

### *Hi Apo Jesus ay nabiyyay oman (Mateo 28:1-10; Marcos 16:1-8; Juan 20:1-10)*

<sup>1</sup> Dali allo êt hên allon Dominggo, ay nammita hilay nay babayi ha pinay-ilbêngan ta idin lay hatoy pabango ya in-il-an la ha bangkay ni Apo Jesus.

<sup>2</sup> Nalatangan lay natulid anay hadyay hêlay bato, ya intakap ha lêyang ya pinay-ilbêngan kan Apo Jesus. <sup>3</sup> Kabay hinumwêñ hila, noa, a la matapol ya bangkay ni Apo Jesus. <sup>4</sup> Kaban ampikokotang hila no hinoy nalyari ha bangkay ni Apo Jesus, ay bigla lan nahêlêk ya loway lalaki, ya nakatakop hên ampangislap, ya nakairêng ha dani la. <sup>5</sup> Gawan hadyay limo la, ay nandoko hilan napaidêngdêng. Hinabi kanla hên loway lalaki, “Awta pantapolên yoy nabiyyay ha pay-ilbêngan hên natsi? <sup>6</sup> Ayn yay na di, ta nabiyyay yan oman. Ihipêñ yoy hinabi na kamoyu bayro ha probinsyan Galilea, ya <sup>7</sup>hiya, ya Taga-Langit, ya In-anak Tawo ay idin ha gamêt lan makasalanan. Ipako la ya ha koros. Bayo panga-ubat hên tatloy allo ay mabiyay yan oman.”

<sup>8</sup> Amêhêñ, naihipan lan babayi ya habaytoy hinabi na. <sup>9</sup> Kabay nag-orong hilay na ha balayan, ta inhumbung la ha labinmiha haka kanlan kalamo la ya nalyari. <sup>10</sup> Ya namihumbung hên habayto kanlan apostol ay hilan Maria Magdalena, hi Juana, hi Maria ya indo ni Santiago, haka hilay kaatag ya babayi ya kalamo la. <sup>11</sup> Noa, êndat lan apostol, no alwan pêtêg ya panhabien lan babayi, gawan nanad hilan namurit ya ampiaghabi. Kabay a la hila pinaniwal-an. <sup>12</sup> Embayro man, hi Pedro ay nuwayun nako bayro ha pinay-ilbêngan kan Apo Jesus. Hêñ nilumatêng ya bayro ay ayn yan nahêlêk, no alwan hatoy naputsi ya takop ya pinangêlkêl kan Apo Jesus. Bayo nuli ya hêñ ampag-êpapah ha nalyari.

### *Nagpahlêk hi Apo Jesus kanlan loway tagahonol na ha dann (Marcos 16:12-13)*

<sup>13</sup> Habaytoy allo ay main lowa kanlan tagahonol ni Apo Jesus ya atsi ha dann hêñ palako ha mihay baryo ya nag langan Emaus, ya main labinmihay kilometro ya dayo ha balayan Jerusalem. <sup>14</sup> Ampihabian lay balang nalyari.

<sup>15</sup> Kaban ampihabi hila ha pammita la, ay dinumani kanla hi Apo Jesus hêñ napaipantag kanlan loway ampammita. <sup>16</sup> Nahêlêk la ya, noa, a pinaulayan ni Apo Namalyari hêñ mabalayan la hi Apo Jesus. <sup>17</sup> Kinotang na hila, ya wana, “Hinoy ampihabian yo?”

Tinunggên hila. Angkahêlêk ha mata la ya malungkot hila. <sup>18</sup> Ya miha kanla, ya hi Cleopas, ay naghabi, ya wana, “Mimiha mo siguro kanlan kalan lan naniraw ha Jerusalem ya a nakagilam hên nalyari bayro hên ungnoy allon bêngat ya nalabah.”

<sup>19</sup> Kabay kinotang ni Apo Jesus, “Hinoy nalyari?”

Wanla etaman, “Ya nalyari kan Apo Jesus ya taga-Nazaret. Hiya ay mihay propeta ni Apo Namalyari. Ya kapapaépapah ya dinyag ni Apo Jesus, haka ya hinabi na ay ampamaptêg ya ubat kan Apo Namalyari ya kapangyarihan na. Muwang lan tawo ya habayto. <sup>20</sup> Hiyay impapatsi lan ampamaala kanlan pari haka lan kaatag ya main tungkulon, kabay hiya ay impako ha koros.

<sup>21</sup> Éndat naêñ no hiyay mangakbus hên bansan Israel. Noa, main nanan tatloy allo hên pinatsi la ya. <sup>22</sup> Nag-épapah kay ha ungnoy babayi, ya kalamo naêñ, ya atsi bayro nangun maranon ha pinay-ilbêngan la kana, <sup>23</sup> hên inhumbung la kannaén ya ayn ana bayro ya bangkay na. Wanla êt ya nakahêlêk hila hên anghel ni Apo Namalyari ya nipaghabi kanla ya biniyay oman hi Apo Jesus. <sup>24</sup> Ya kaatag kanlan kalamo naêñ ay nagtagloh etaman bayro ha pinay-ilbêngan kana. Nahêlêk la êt ya nanad ha hinabi lan babayi, noa, a la ya êt nahêlêk hi Apo Jesus.”

<sup>25</sup> Amêhêñ, hinabi ni Apo Jesus kanla, ya wana, “Kakakdêyan hên ulo yo! Pata a yo ampaniwal-an ya habi lan má mipamwang hên an-ipaihip kanla ni Apo Namalyari? <sup>26</sup> Ta hila ya namipapêt hên tungkol ha Mesias, ya Cristo, ya impangakon Mámiligtas ya pinili ni Apo Namalyari hên mamaala ya taganán kailangan yan magdanas hên hadyay irap bayo ya mag-orong ha langit hên mamaala hên kalamo ni Apo Namalyari.” <sup>27</sup> Impamulah ni Apo Jesus kanla ya kaganawan ya tungkol kana ya nakahulat ha Kahulatan ya impahulat ni Apo Namalyari, ubat ha inhulat ni apo Moises, haka ha inhulat lan kaganawan ya kaatag ya má mipamwang hên an-ipaihip kanla ni Apo Namalyari.

<sup>28</sup> Hên andumani hilay na ha baryon Emaus, ya lakwên la, ay nanad magpaitagloh ya hi Apo Jesus. <sup>29</sup> Noa, hinagyat la yan magdahêl pon hên kalamo la, ya wanla, “Pamibalyan mipatêl makê! Magdahêl ka pon di, ta êmêñ makalamo naêñ ka pon.” Kabay nakilako ya kanla. <sup>30</sup> Hên atsi hilay na ha arapan kaêñ, ay nangwa ya hi Apo Jesus hên puto ta pinahalamatan nay habayto kan Apo Namalyari. Hên nayari nan pinahalamatan ay pinotoh nay habayto, bayo indin nay na kanla. <sup>31</sup> Hên dinyag nay habayto, ay nabalayan la ya. Hiya awud hi Apo Jesus. Noa, bat yan naplak ha arapan la. <sup>32</sup> Nihabi hilay nay lowa, ya wanla, “Kabay awud nanad apoy ya atsi ha nakêñ ta nangun ha dann, hên an-ipamulah nay Kahulatan ya impahulat ni Apo Namalyari.”

<sup>33</sup> Tambêng hilay nan nag-orong ha balayan Jerusalem, kabay nalatngan la bayro hilay labinmihay tagahonol ni Apo Jesus kalamo lan kaatag, <sup>34</sup> ya ampaghabí kanlan lowa, ya wanla, “Nabiyay yan oman hi Apo Jesus. Nagpahlêk ya kan Simon Pedro!” <sup>35</sup> Amêhêñ, impamwang lan hata lowa ya nalyari ha dann, haka no ay-êmêñ la yan nabalayan hi Apo Jesus hên pinotoh nay puto.

*Nagpahlêk hi Apo Jesus kanlan tagahonol na ha Jerusalem  
(Mateo 28:16-20; Marcos 16:14-18; Juan 20:19-23; Dyag 1:6-8)*

<sup>36</sup> Kaban ampaghabí hila pon ya lowa, ay biglan nagpahlêk kanla hi Apo Jesus, ta hinabi na kanla, ya wana, “Patêkbékêñ ni Apo Namalyari ya nakêñ yo.” <sup>37</sup> Noa, nakatsigag hila haka hadyay limo la, ta êndat la no ampakahêlêk hilan kamana. <sup>38</sup> Kabay hinabi na kanla, ya wana, “Pata hadyay limo yo?

Pata ampag-alangan kaw? <sup>39</sup> Hêlkên yoy gamêt ko haka bitsih ko. Hikoy hatsi. Gap-an yo, haka pakapoliahên yoy lawini ko. Alwa kon kamana, ta ya mihay kamana ay ayn but-o haka ayn laman.” <sup>40</sup> Hêñ nahabi nay na ya habayto, ay impahlêk nay gamêt haka bitsih na kanla. <sup>41</sup> Hadyay kahiglaan la hêñ nabalayan la ya, noa, ampag-êpapahan la pon no taganán hiya, kabay wana kanla, “Main kaw hêñ maékan di?” <sup>42</sup> Kabay dinyanan la ya hêñ mihay yunit kênan lanêm ya in-iyaw. <sup>43</sup> Kinna nay habayto ha arapan la.

<sup>44</sup> Bayo hinabi na kanla, “Habaytsi ya labay kon habiêñ kamoyu hêñ panay kataw napagkalamo, ya kailangan maubuh hêñ matupad ya nakahulat ya tungkol kangko ha libro hêñ Awit, haka ha inhulat ni apo Moises, haka ha inhulat lan kaatag ya mámipamwang hêñ an-ipaihip kanla ni Apo Namalyari.” <sup>45</sup> Impamulah na kanla ya Kahulatan ya impahulat ni Apo Namalyari, <sup>46</sup> ta wana kanla, “Habaytsi ya nakahulat, ‘Ya Mesias, ya Cristo, ya impangakon Mámilitgas ya pinili ni Apo Namalyari hêñ mamaala ay kailangan matsu. Bayo panga-ubat hêñ tatloy allo ay mabiyay yan oman.’” <sup>47</sup> Nakahulat êt ya êmêñ di, ‘Ha kapangyarihan na ay kailangan iaral ya tungkol ha pamaghêhê haka ha pamatawad hêñ kasalanan ha balang bansa paubat ha balayan Jerusalem.’ <sup>48</sup> Hikaw ya mamaptêg kangko, ya mamipamwang ha balang nalyari hêñ nanad ha impamwang la hêñ hato. <sup>49</sup> Impangako ni Apo Namalyari, ya Tatang ko, ya ipahapat na kamoyu ya Espiritu na, haka lano ipagtan ko ya kamoyu. Noa, mangênggan kaw pon di ha balayan angga ha lumatêng ya kamoyu hêñ main kapangyarihan.”

*Hi Apo Jesus ay gintan ha langit  
(Marcos 16:19-20; Dyag 1:9-11)*

<sup>50</sup> Amêhêñ, pinagkalamo ni Apo Jesus hilay tagahonol na hêñ palakon baryon Betania. Hêñ narani hila bayro, ay intag-ay nay gamêt na ta inhalangin na hila ya ingalwan hila ni Apo Namalyari. <sup>51</sup> Kaban an-ihalangin na hila, ay hiyay gintan ha langit. <sup>52</sup> Pinuri la ya, bayo nag-orong hila ha balayan Jerusalem hêñ hadyay higla. <sup>53</sup> Paubat hêñ habayto, ay panay hilan atsi ha Templo hêñ ampuriêñ hi Apo Namalyari.

## Ya Mangêd ya Habi tungkol kan Apo Jesu-Cristo ya inhulat ni apostol Juan

### *Paunan habi*

Ya Mangêd ya Habi tungkol kan Apo Jesu-Cristo ya inhulat ni apostol Juan, ay inhulat ta êmén ya balang makamwang hên laman hên habaytsi ya hulat, ay maniwala kan Apo Jesu-Cristo, ya impangakon Mámiligtas, ya Anak ni Apo Namalyari. Ha êmbayro ay magkamain hilan biyay ya ayn angga (Juan 20:31).

Ya pamaêg ni apostol Juan kan Apo Jesu-Cristo di ha unan hulat na ay ‘ya Habi.’ Impamwang ni apostol Juan ya Hi Apo Jesu-Cristo ay habaytoy ‘Habi’ ya kalamo ni Apo Namalyari paubat hên una. Impamwang na êt di ha hulat na, ya pito kanlan kapapaêpapah ya dinyag ni Apo Jesu-Cristo ya ampamaptêg ya hiyay habaytoy impangakon Mámiligtas, ya Anak ni Apo Namalyari.

Nakahulat ha kapitolo 13 angga ha 17 ya tungkol ha mangêd ya pamakilamo ni Apo Jesu-Cristo ha tagahonol na hên haton yabi bayo ya dinakêp. Ya yabin habayto ay dispersas hên pagkapako na ha koros, kabay pinataniêh nay nakêm lan tagahonol na, ta êmén hila nakal-an ha balang malyari. Ha kapitolo 18 angga ha kapitolo 21 ay impamwang no ay-êmén yan dinakêp, haka ya tungkol ha pagkapako na ha koros. Impamwang êt bayro ya pangabiyay nan oman, haka ya pagpahlêk na ha tagahonol na, nayari yan nabiay oman.

Bayri êt ha inhulat ni apostol Juan, ay impamwang ya an-idigalo ni Apo Jesu-Cristo, ay biyay ya ayn angga kanlan ampaniwala ya hiyay dann, kaptêgan, haka biyay (Juan 14:6).

Kabooan hên pinakalaman

Umpisan hulat 1:1-18

Hi Juan Bautista haka ya tagahonol ni Apo Jesu-Cristo 1:19-51

Ya pamanoro ni Apo Jesu-Cristo 2:1-12:50

Hi Apo Jesu-Cristo ha balayan Jerusalem 13:1-19:42

Hi Apo Jesu-Cristo ay nabiay oman 20:1-31

Minghan ya êt nagpahlêk ha probinsyan Galilea 21:1-25

### *Ya Habi ya ayn kaatag no alwan hi Apo Jesu-Cristo*

<sup>1</sup> Hên haton kauna-unaan hên a pon dinyag ya hata langit, haka luta ay main nanan Habi. Habaytoy Habi ay atsi bayro hên kalamo ni Apo Namalyari, haka hiyay Apo Namalyari. <sup>2</sup> Hiyay kalamo ni Apo Namalyari paubat hên una. <sup>3</sup> Hiyay nanyag hên kaganawan ya atsi bayri. Ayn hinon nadyag no alwan gawan kana. <sup>4</sup> Hiyay ubatan hên biyay haka hiyay maialimbawa ha atâng ya ampamahawang ha ihip hên balang miha. <sup>5</sup> Habaytoy hawang ay anhumawang ha luta ya nanad dinumiglêm gawan ha kasalanan. A ya napahambut ha kariglêman.

<sup>6</sup> Amêhêñ, main lalaki ya in-utoh ni Apo Namalyari, ya nag langan Juan.\*

<sup>7</sup> In-utoh na ya hên mamipamwang hên tungkol ha hawang, ta êmén ya balang miha ay maniwala kanan habayto ya ampamahawang hên kaihipan.

<sup>8</sup> Alwan hi Juan ya hawang, noa, hiyay in-utoh hên mamipamwang hên

---

\* <sup>1:6</sup> Hi Juan ya namabawismo kanlan nangamin kasalanan la. Ambanhagan la yan Juan Bautista. Alwan hiya ya nanulat hên hata inhulat bayri.

tungkol ha hawang. <sup>9</sup> Ya pêtêg ya hawang, ay habaytoy nilumatêng di ha luta ya ampamahawang ha kaihipan hên balang miha.

<sup>10</sup> Hiyay nanyag hên hata luta hên hato pon, haka hiyay nilumatêng di ha luta. Noa, a la ya awud nabalayan. <sup>11</sup> Agyan hilay Israelita ya kamaganak na, ay a nananggap kana hên nilumatêng ya kanla. <sup>12</sup> Noa, hilangan ya nananggap kana, haka naniwala kana, ay dinyanan nan tungkulon hên mag-in anak ni Apo Namalyari. <sup>13</sup> Ya pangianak kanlan anak ni Apo Namalyari, ay alwan nanad pangianak tawo, haka alwan gawan ha kalabayan lan miahawa hên magkamain anak, noa, gawan ha kapangyarihan ni Apo Namalyari.

#### *Ya Habi ya ayn kaatag no alwan hi Apo Jesu-Cristo, ay nag-in tawo*

<sup>14</sup> Ya Habi ay nag-in tawo, haka napaidi di ha luta. Ya hinabi na ay panay pêtêg haka hiya ay panay maingaloén. Nahêlêk naén ya panga-Diyos na. Yabay ya panga-Diyos hên kamiha-mihaan Anak ni Apo Namalyari, ya Tatang na.

<sup>15</sup> Nangaral hi Juan Bautista hên tungkol kanan hata Habi ya nag-in tawo. Habaytsi ya pamipamwang na, hên intoro na hi Apo Jesus, ya wana, “Yabay ya hinabi ko kamoyu ya ‘main lumatêng ya makapangyarihan kangko, gawan atsi yay na, hên a ko pon in-anak.’”

<sup>16</sup> Kaganawan tamo ay ampakinabang ha kahampatan nakêm ni Apo Jesu-Cristo, ya hadyay maingaloén. <sup>17</sup> Ya Kautuhan ni Apo Namalyari, ay impamwang ni apo Moises kanlan Israelita, noa, ya kaptêgan, haka ya ingalo ni Apo Namalyari, ay impamwang ni Apo Jesu-Cristo. <sup>18</sup> Paubat hên haton lagi, ay ayn êt nakahêlêk kan Apo Namalyari, no alwan bêngat hi Apo Jesu-Cristo ya kamiha-mihaan nan Anak. Hiyay Apo Namalyari, haka hiyay panay nan kalamo. Hiya ya namipamwang kan Apo Namalyari, ya Tatang na.

#### *Ya panoro ni Juan Bautista*

(Mateo 3:1-12; Marcos 1:1-8; Lucas 3:1-18)

<sup>19</sup> Amêhêñ, hilay Israelita, ya ampamaala ha balayan Jerusalem, ay namiutoh hên ungro kanlan pari la, haka ungro kanlan Levita ya ampanawop kanlan pari, ta êmêñ hila mangotâng kan Juan Bautista no hino ya. <sup>20</sup> Hinabi ni Juan ya kaptêgan, ya wana, “Alwan hikoy Mesias, ya Cristo, ya pinili ni Apo Namalyari hên mag-in habaytoy Mámilitas ya impangako na.” <sup>21</sup> “No êmbayro, hino ka awud?” wanla. “Kayno hika hi Propeta Elias!” “Alwa.” wani Juan. “Kayno hika ya Propeta ni Apo Namalyari, ya an-êngganan naén!” “Alwa.” wanana oman ni Juan. <sup>22</sup> Wanlay na êt, “Habiên mo awud no hino ka, ta êmêñ naén maipamwang kanlan namiutoh kannaén. Hinoy mahabi mo ya tungkol ha sarili mo?” <sup>23</sup> Amêhêñ, hinabi ni Juan, “Hiko ya inungkat ni Propeta Isaias, ya wana,

‘Main ampan-angaw ha legal ya kabalah-balahan, ya wana kanlan kalan ya naka-tsipon, “Il-an yoy nakêm yo ha pamanlumatêng hên Panginoon,

Ya nanad ha pamil-an hên dann ha pamanlumatêng hên mihay matag-ay ya manungkulon.’†

Habaytoy hinabi ni Propeta Isaias ya tungkol kangko.”

<sup>24</sup> Hilay nangotang, ay in-utoh lan Pariseo.‡ <sup>25</sup> Nangotang hilay na êt kan Juan, ya wanla, “Awta ampamawtismo ka? Alwan hika awud ya Mesias, ya

† **1:23** Isaias 40:3. ‡ **1:24** Hilay Pariseo ay mihay pangkat lan Israelita. Ampag-aralan lay Kautuhan ni apo Moises haka êndat la no anhonolén la ya balang utoh bayro.

Cristo, ya impangakon Mámilitas ya pinili ni Apo Namalyari hên mamaala. Alwa ka etaman hi Propeta Elias. Haka alwan hika ya Propeta ni Apo Namalyari ya an-êngganan naén.” <sup>26</sup> Kabay hinabi ni Juan, ya wana, “Lanêm ya ampangibawtismoan ko, noa, main di hên kalamo yo, ya a yo kilala. <sup>27</sup> Agyan nuna kon nilumatêng kana, ay mangokal man hên héêl pag-apin bitsih na, ay ayn akon karapatan ta matag-ay ya tungkulan na.” <sup>28</sup> Habayto ay nalyari ha baryon Betania, ha lipay hên Ilog Jordan. Yabay ya ilog ya pinamawtismoan ni Juan.

*Hi Apo Jesus ay Biseron Tupa ni Apo Namalyari ta idin nay lawini na ha ikakangêd tamo*

<sup>29</sup> Hên humonoy allo, ay nahêlêk ni Juan hi Apo Jesus ya andumaní kana. Kabay wana kanlan kalamo na, “Hêlkên yo! Atsi di ya Biseron Tupa § ni Apo Namalyari. Hiya ya ayn kasalanan, ya mamilih kasalanan lan tawo di ha luta. <sup>30</sup> Yabay ya hinabi ko kamoyu ya ‘main lumatêng ya makapangyarihan kangko, gawan atsi yay na, hên a ko pon in-anak.’ <sup>31</sup> Agyan hiko, ay a ko ya muwang no hino yan taganá hên hato. Êmbayro man, ay atsi ko di, hên ampamawtismo ta êmén ya ipamwang ha Israelita.”

<sup>32</sup> Habaytsi ya pamipamwang ni Juan Bautista, “Nahêlêk ko ya Espiritu ni Apo Namalyari ya inumaypan ubat ha langit, hên nanad ha mihay pati-pati, haka nagmana ya kana. <sup>33</sup> Hiko man, hên una, ay a ko muwang no hino yan taganá. Noa, hi Apo Namalyari, ya namiutoh kangko hên mamawtismo ha lanêm, ya naghabi kangko, hên êmén di, ‘Mahêlêk mo ya Espiritu ko ya umaypa haka magmana ha mihay lalaki. Hiyay mamawtismo ha pamahapat hên Espiritu ko.’ <sup>34</sup> Nahêlêk ko ngan ya nalyari, kabay an-ipamwang ko ya hiya ya Anak ni Apo Namalyari.”

*Hilay unan tagahonol ni Apo Jesus*

<sup>35</sup> Ha humonol ya allo, ay atsi yay na êt ha lanêm hi Juan Bautista haka ya lowa kanlan tagahonol na. <sup>36</sup> Hêñ naikit na ya ampita bayro hi Apo Jesus, ay wana, “Hêlkên yo! Hiyay Biseron Tupa ni Apo Namalyari. Hiya ya halanggo tamo.” <sup>37</sup> Nagilam lan loway tagahonol ni Juan ya hinabi na, kabay hinumonol hila kan Apo Jesus. <sup>38</sup> Hêñ namalingay hi Apo Jesus ay nahêlêk na hilay anhumonol kana haka na hila kinotang, ya wana, “Main kaw hên labay?” Kabay hinabi la, “Rabi, antoy ampaidyanan mo?” (Ya labay habiên hên Rabi ay Mánoro.) <sup>39</sup> Wani Apo Jesus kanla, “Kihonol kaw kangko, ta hêlkên yo.” Mag-aalas quattro hên maapon hên habayto. Nakihonol hila kana ta hinlêk lay ampaidyanan na. Nagdahêl hila tana kana.

<sup>40</sup> Ya miha kanlan lowa, ya nakagilam hên habi ni Juan Bautista, haka nakihonol kan Apo Jesus, ay hi Andres, ya kapotoh pohêl ni Simon Pedro.

<sup>41</sup> Habayto hi Andres, ay una nan tinapol hi Simon, ya kapotoh pohêl na, ta wana kana, “Natapol naén ya Mesias, ya pinili ni Apo Namalyari hên mag-in Mámilitas!” (Ya labay habiên hên Mesias ha habin Griego ay Cristo.)

<sup>42</sup> Pinakilamo ni Andres hi Simon kan Apo Jesus. Hinlêk ni Apo Jesus hi Pedro, bayo wana, “Hika hi Simon, ya anak ni Juan. Banhagan la kan Cefas.” (Ya labay habiên hên Cefas ay bato. Habayto ay Pedro ha habin Griego.)

*Ya hinabi ni Apo Jesus kan Felipe haka Natanael*

<sup>43</sup> Ha humonoy allo, ay naihipan ni Apo Jesus hên maniraw ha probinsyan Galilea. Natapol na hi Felipe, haka wana kana, “Kihonol ka kangko.” <sup>44</sup> Hi Felipe ay taga-Betsaida ya balayan lan Andres haka Pedro. <sup>45</sup> Tinapol ni

§ <sup>1:29</sup> Genesis 22:8 An-iátang lan Israelita hên biseron tupa, ta êmén mapatawad ya kasalanan la.

Felipe hi Natanael, bayo wana kana, “Natapol naêñ ya Mesias, ya Cristo, ya impangakon Mámiligtas ya pinili ni Apo Namalyari hên mamaala, ya inungkat ni apo Moises ha Kahulatan ya impahulat kana ni Apo Namalyari. Hiya ya inungkat etaman ha inhulat lan kaatag ya mámipamwang ni Apo Namalyari. Hiya hi Jesus, ya taga-Nazaret, ya anak ni Jose.” <sup>46</sup> Amêhêñ, wani Natanael kan Felipe, “Yarin main mangêd ya ubat ha balayan Nazaret, ya pêpêrad ya tawo?” Kabay wani Felipe kana, “Kihonol ka kangko ta hêlkêñ mo.”

<sup>47</sup> Hêñ nahêlêk ni Apo Jesus ya andumani kana hi Natanael, ay wana, “Hêlkêñ yo! Atsi di ya mihay pêtêg ya Israelita ya a ampanloko.” <sup>48</sup> Kabay wani Natanael, “Ay-êmêñ mon namwangan ya laman nakêm ko?” Amêhêñ, wani Apo Jesus, “Bayo ka binaêg ni Felipe ay nahêlêk kata ha hilong hêñ poon igos.” <sup>49</sup> Kabay wani Natanael, “Mánoro,\* hika ya Anak ni Apo Namalyari! Hika ya Poon hêñ bansom Israel.” <sup>50</sup> Wani Apo Jesus kan Natanael, “Ampaniwala ka kangko gawan nahêlêk kata ha hilong hêñ poon igos. Igit pon di ya kapapaêpapah ya mahêlêk mo.” <sup>51</sup> Wani Apo Jesus kanla, “Pakagilamêñ yo, lumatêng ya allo, ay mahêlêk yoy nakaloat ya langit, haka hilay anghel ni Apo Namalyari ya lumakat haka lumohan bayro, hêñ palako kangko, ya Taga-Langit, ya In-anak Tawo.”

## 2

### *Ya kasálan ha balayan Cana*

<sup>1</sup> Hêñ nalabah ya loway allo, main kasálan ha balayan Cana ha probinsyan Galilea. Atsi bayro ya indo ni Apo Jesus. <sup>2</sup> Hi Apo Jesus, haka hilay tagahonol na, ay hinagyat ha kasálan etaman. <sup>3</sup> Hêñ naubuh ya alak ha kasálan, ay hinabi nan indo ni Apo Jesus kana, ya wana, “Naubuh ya alak la. Manawop ka dayi.” <sup>4</sup> Kabay hinabi ni Apo Jesus ha indo na, “Paulayan mo ko, Indo. Alwa ko pon oras, hêñ manyag hêñ kapapaêpapah.” <sup>5</sup> Embayro man, ay hinabi nan indo ni Apo Jesus kanlan ampanawop ha kasálan, “Daygêñ yo ya hinon habiêñ na kamoyu.”

<sup>6</sup> Amêhêñ, main bayro hêñ anêñ ya panyanan lanêñ ya nadyag ha bato, ya panggamitêñ lan Israelita no honolêñ lay paniwala la hêñ tungkol ha pamaglinis hêñ lawini la. Hata panyanan ay ampaglamana hêñ lowampo angga ha tatlumpo ya galon ya balang miha. <sup>7</sup> Wani Apo Jesus kanlan ampamiapag ha kasálan, “Pun-êñ yon lanêñ ya hata anêñ ya panyanan.” Kabay pinno lan lanêñ, hêñ angga ha bêbêy. <sup>8</sup> Bayo wana kanla, “Manakhob kaw ta gêtan yo kanan ampamaala kanlan ampanawop ha kasálan.” Kabay nanakhob hila, haka la gintan kanan ampamaala. <sup>9</sup> Tinawayan nan ampamaala ya lanêñ, ya nadyag ni Apo Jesus hêñ alak, noa, a na muwang no antoy ubatan hêñ habaytoy alak, ta hilay nangahoy bêngat, ya nag muwang hêñ habayto. Kabay binaêg nay lalaki ya an-ikasal. <sup>10</sup> Ta hinabi na kanan lalaki, “Hilay kaatag ay ampamiawah pon hêñ naayang ya alak. Bayo, no mal-at ya nainêñ lan makikasal, ay mamiawah hila bayto hêñ ayn makayn ayang. Noa, hika, ay babayo mon in-awah ya naayang.”

<sup>11</sup> Habayto ya nalyari ha balayan Cana, ha probinsyan Galilea, ay unan kapapaêpapah ya dinyag ni Apo Jesus. Hêñ dinyag nay habayto, ay impamwang nay panga-Diyos na. Haka naniwala hilay tagahonol na, ya hiyay Cristo.

<sup>12</sup> Nahêñ nayari ya kasálan, ay nilumohan hilan Apo Jesus ha balayan Capernaum. Nakihonol kana ya indo na, hilay ali na, haka hilay tagahonol na. Nagdahêl hila bayro hêñ ungnoy yabi.

---

\* <sup>1:49</sup> Rabi ha habi lan Israelita.

*Namitaboy hi Apo Jesus hên ampipagtinda ha Templo  
(Mateo 21:12-17; Marcos 11:15-19; Lucas 19:45-48)*

<sup>13</sup> Kaban atsi hilan Apo Jesus ha balayan Capernaum, ay marani yanay Pistan Pangaligtas ha Egipto.\* Kabay nilumakat hi Apo Jesus haka hilay tagahonol na ha balayan Jerusalem ta makipista. <sup>14</sup> Hêñ nilumatêng hilay na ha ilwangan hêñ Templo ay nahêlêk na hilay mâmihaliw hêñ baka, tupa, haka pati-pati ya iátang kan Apo Namalyari. Atsi êt bayro hilay mâmihagili hêñ pera. <sup>15</sup> Nanuluk ya hi Apo Jesus. Nanyag yan pangumpah kanla, ta intaboy-taboy na hilangan, anggan tupa, haka baka ha plasa hêñ Templo. Intapon nay pera lan mâmihagilin pera haka na in-iitwag ya lamisaan la. <sup>16</sup> Hinabi na kanlan mâmihaliw hêñ pati-pati, ya wana, “Alihêñ yo ya pati-pati di. Paan yon daygêñ palengke ya bali ni Apo Namalyari, ya Tatang ko.” <sup>17</sup> Naihipan lan tagahonol na, ya nakahulat† ha habi ni Apo Namalyari, ya tungkol kanan Mesias, ya Cristo, ya wanana hulat, “Ikamatsi ko ya hadyay pamanlugud ko ha bali mo.”

<sup>18</sup> Kabay hinabi lan taga-Israël ya ampamaala ha Templo kan Apo Jesus, ya wanla, “Hinoy maipahlêk mo kannaêñ, ya kapapaêpapah, ta êmêñ naêñ mamwangan, ya main kan tungkulon hêñ manyag hêñ dinyag mo?”

<sup>19</sup> Amêhêñ, wani Apo Jesus, “Hiraêñ yoy hata Templo, ta ipairêng kon oman ha tatloy allo.” <sup>20</sup> Kabay wanlan Israelita, “Apatapo boy anêñ ya taon ya panyag hêñ hata Templo. Yarin maipairêng mo ya ha tatloy allon bêngat.”

<sup>21</sup> Noa, ya Templo ya inungkat ni Apo Jesus, ay yabay ya lawini na. <sup>22</sup> Kabay hêñ nabiyyay yan oman hi Apo Jesus ha ikatlon allo hêñ ubat yan natsi, ay naihipan lan tagahonol na, ya hinabi nay habayto. Pinaniwal-an lay Kahulatan ya impahulat ni Apo Namalyari, haka ya hinabi ni Apo Jesus ya tungkol ha pangabiyay nan oman.

*Muwang ni Apo Jesus ya laman hêñ kaihipan*

<sup>23</sup> Kaban atsi ya hi Apo Jesus ha balayan Jerusalem, ha Pistan Pangaligtas, ay mal-at ya naniwala, ya hiyay Cristo, ya pan-êngganan la. Naniwala hila, gawan ha kapapaêpapah ya dinyag na. <sup>24</sup> Embayro man, ay ayn yan tsiwala kanla hi Apo Jesus, ta muwang nay laman ihip hêñ balang miha. <sup>25</sup> Ahina kailangan ipamwang kana, ya tungkol ha ugali hêñ hinoman, gawan mana nay nan muwang ya laman ihip hêñ balang miha.

### 3

*Hi Apo Jesus haka hi Nicodemo*

<sup>1</sup> Bayro ha balayan Jerusalem, ay main mihay Pariseo, ya nag langan Nicodemo. Hiyay miha kanlan ampamaala ha Israelita. <sup>2</sup> Mihay yabi, ay dinumani ya kan Apo Jesus, ta wana kana, “Mánoro, muwang naêñ ya in-utoh ka ni Apo Namalyari, hêñ manoro kannaêñ, ta a mo madyag ya andaygêñ moy kapapaêpapah, no ayn ya kamo hi Apo Namalyari, hêñ ampanawop kamo.”

<sup>3</sup> Kabay wani Apo Jesus kana, “Pakagilamêñ mo, hilay a in-anak oman, ay a makapakilamo ha pamanlokop ni Apo Namalyari.”

<sup>4</sup> “Apo, ay-êmêñ hilan ma-ianak oman no toa hilay na? Makahowêñ hilan oman ha bitokan indo la?”

<sup>5</sup> Kabay wani Apo Jesus kana, “Pakagilamêñ mo. Ayn makapakilamo ha pamanlokop ni Apo Namalyari, no a ya pon na-ianak ha lanêñ, haka ha Espiritu ni Apo Namalyari ta êmêñ mabayo ya nakêñ na. <sup>6</sup> Hilay tawo ay

\* **2:13** Paskwa. Hêlkêñ ha panlêkan labay habiêñ hêñ habi di ha bokotan hêñ hata Bibliya. † **2:17** Awit 69:9.

ampamianak hên tawo ya main biyay bayri ha luta. Hilay in-anak ha Espiritu ni Apo Namalyari, ay main bayoy biyay ha hawop nan Espiritu na. <sup>7</sup> Paan kan mag-épapah ha hinabi ko kamo, ya ‘Hikaw ay kailangan ianak oman.’ <sup>8</sup> Ya Espiritu ni Apo Namalyari ay nanad hên angin, ya a maiutoh. Angkagilam ya tonoy hên angin. Noa, a mamwangan no antoy ubatan na, haka no antoy lakwên na. Embayro êt, ay a mahêlêk no ay-êmênan bayoênan Espiritu ni Apo Namalyari ya nakêm, noa, habaytoy mahêlêk ha biyay.”

<sup>9</sup> Amêhêñ, wani Nicodemo, “Apo, ay-êmêñ mangyari ya habain ya hinabi mo?”

<sup>10</sup> Kabay hinabi ni Apo Jesus kana, “Miha ka ya mánoro di ha Israel. Yarin a mo angkaintindihan ya hatsi. <sup>11</sup> Pakagilamén mo. Panhabiêñ naêñ ya muwang naêñ, haka an-ipamwang naêñ ya nahêlêk naêñ. Noa, a yo ampaniwal-an ya anhabiêñ naêñ. <sup>12</sup> No, a yo paniwal-an ya impamwang ko kamoyu, ya tungkol di ha luta, ay-êmêñ yon paniwal-an ya ipamwang ko kamoyu ya tungkol ha langit! <sup>13</sup> Ta hikon bêngat, ya Taga-Langit, ya In-anak Tawo, ya nag-aypa ubat ha langit, ay mag-orong ha langit.

<sup>14</sup> “Haka no ay-êmêñ nan intag-ay ni apo Moises ya utan, ya nadyag ha tangso,\* ha kabalah-balahan, ay êmbayro êt, ay kailangan itag-ay ako ha koros, hiko, ya Taga-Langit, ya In-anak Tawo. <sup>15</sup> Kailangan ya habayto, ta êmêñ hilay ampaniwala ya hikoy Cristo, ay madyanan biyay ya ayn angga.” Habaytoy hinabi ni Apo Jesus.

<sup>16</sup> Gawan ha hadyay pamanlugud ni Apo Namalyari ha balang miha, ay in-utoh na ya kamiha-mihaan nan Anak ha luta, ta êmêñ hilay ampaniwala kana, ay a migtan ha impiyerno, noa, madyanan biyay ya ayn angga. <sup>17</sup> Ta a na in-utoh ni Apo Namalyari ya Anak na, ta êmêñ sintinsyahan hên parusaan hilay tawo. Noa, in-utoh na ya ta êmêñ na hila iligtas ha parusa.

<sup>18</sup> A hila parusaan hilay ampaniwala ha Anak. Noa, hilay a ampaniwala kana, ay sinintinsyahan nanan parusaan, gawan a hila naniwala ha kamiha-mihaan Anak ni Apo Namalyari. <sup>19</sup> Sinintinsyahan hilan parusaan, gawan agyan nantan ya Anak na hên kamwangan ya tungkol kan Apo Namalyari ya nanad hawang ha balang miha ha luta, ay labay la pon ya kariglêman, gawan nangarawak ya dyag la. <sup>20</sup> Ta hilay ampanyag karawakan, ay angkahêmêkan lay hawang, haka a hila andumani ha hawang, ta êmêñ a mahawangan ya nangarawak ya dyag la. <sup>21</sup> Noa, hilay ampanyag kangêran, ay andumani ha hawang, ta êmêñ mahêlêk ya habaytoy andaygêñ la, ay kalabayan ni Apo Namalyari.

### *Hi Apo Jesus haka hi Juan Bautista*

<sup>22</sup> Amêhêñ, nilumohan hi Apo Jesus haka hilay tagahonol na ha dani hên lanêm. Nagdahêl ya bayro ha probinsyan Judea hên kalamo lan tagahonol na, haka namawtismo ya kanlan labay pabawtismo. <sup>23</sup> Hi Juan Bautista ay namawtismo etaman ha legal ya nag langan Enon ha danin Salim, gawan mal-at ya lanêm bayro, haka mal-at ya ampagpabawtismo kana. <sup>24</sup> A ya pon bayton impahukul hi Juan.

<sup>25</sup> Mihay allo, ay main mihay Israelita, ya nakihubakan kanlan tagahonol ni Juan, ya tungkol ha pamaglinis lan Israelita, hên pamanhumonol ha paniwala la. <sup>26</sup> Amêhêñ, dinumani kan Juan ya tagahonol na, ta wanla, “Mánoro, habaytoy kalamo mo ha lipay hên lanêm, ya impamwang mo ya hiyay Cristo, ay atsi bayri hên ampamawtismo kanlan mabay pabawtismo. Haka mal-at ya andumani kana.” <sup>27</sup> Kabay wani Juan, “Ya katungkulon na ay ubat kan Apo Namalyari, ta ayn hinoman ya main êmbayro ya katungkulon

\* <sup>3:14</sup> Bilang 21:9.

no a indin kana ni Apo Namalyari. <sup>28</sup> Hikaw man, ay muwang yoy na, ya hinabi ko, ya alwan hikoy Mesias, ya Cristo, ya impangakon Mámiligtas ya pinili ni Apo Namalyari hén mamaala. Ta hikoy in-utoh ni Apo Namalyari hén mamipamwang, hén lumaténg yay na. <sup>29</sup> Nanad ha kaluguran hén mihay lalaki ya an-ikasal, ya ampamil-an kaganawan ha kasálan. Hadyay higla na ha magilam nay habi nan lalaki ya an-ikasal. Êmbayro êt kangko. In-il-an koy pamanlumaténg nan Mesias, ya Cristo, haka hadyay higla ko ta nilumaténg yay na. <sup>30</sup> Dapat mitag-ay ya, haka kailangan miaypa ya tungkulán ko.”

### *Hi Apo Jesus, ya taga-langit*

<sup>31</sup> Hi Apo Jesus, ya taga-langit, ay ayn kapantag. Noa, ya taga-luta, ay atsi di ha luta ya nakém na, haka ya anhabién na ay tungkol di ha luta. Hi Apo Jesus ay daég nay balang miha. <sup>32</sup> Haka an-ipamwang na ya nahélék na, haka ya nagilam na, êmbayro man, ay pêpérâd ya ampaniwala ha anhabién na. <sup>33</sup> Noa, hilay ampaniwala ha anhabién na, ay ampamapténg ya pêténg ya habi ni Apo Namalyari. <sup>34</sup> Ta hiyay in-utoh ni Apo Namalyari, hi Apo Jesus bay, ay ampamipamwang hén habi na. Haka ayn kulang ya pam-i ni Apo Namalyari hén Espiritu na kana. <sup>35</sup> Anlugurén ni Apo Namalyari, ya Tatang tamo, ya Anak na, hi Apo Jesus. Haka impatalan na kana ya kaganawan ya atsi kana. <sup>36</sup> Hilay ampaniwala kan Apo Jesus, ya Anak ni Apo Namalyari, ay main biyay ya ayn angga. Noa, hilay a mabay hén humonol kana, ay a madyanan habaytoy biyay, ta ya huluk ni Apo Namalyari ay atsi kanla, haka parusaan hila hén ayn angga.

## 4

### *Hi Apo Jesus haka ya mihay babayi ya taga-probinsyan Samaria*

<sup>1</sup> Amêhén, namwangan lan Pariseo\* ya mal-at pon ya andumani kan Apo Jesus hén pabawtismo haka patoro kana, kanan hilay andumani kan Juan. Namwangan ni Apo Jesus ya muwang lan Pariseo ya habayto. <sup>2</sup> Êmbayro man, ay alwan hi Apo Jesus ya ampamawtismo, noa, ya tagahonol na ya ampamawtismo. <sup>3</sup> Gawan namwangan ni Apo Jesus ya muwang lan Pariseo ya habayto, ay nag-alíh ya, haka hilay tagahonol na ha probinsyan Judea, ta nag-orong hila ha probinsyan Galilea. <sup>4</sup> Bayo hila miabot ha probinsyan Galilea, ay madanan la pon ya probinsyan Samaria.

<sup>5</sup> Nilumaténg hila ha mihay balayan hén Samaria ya pinata-ngalanan Sicar, ya narani ha luta ya indin ni apo Jacob, ya miha kanlan ninuno lan Israelita, ha anak na, hi Jose hén haton lagi. <sup>6</sup> Atsi bayro ya libon ya kinali ni apo Jacob. Nikno ya hi Apo Jesus ha dani nan habaytoy libon, gawan pagal na ha pammita. Maranin ugto hén habayto.

<sup>7-8</sup> Kabay nagtagloh hilay tagahonol na ha balayan hén nanaliw hén kaén. Kaban ampikno ya bayro hi Apo Jesus, ay main nilumaténg ya mihay babayi, ya taga-Samaria ta mangahoy. Amêhén, wani Apo Jesus kana, “Kiinêm ako raw.”

<sup>9</sup> Amêhén, wanán babayi kana, ya wana, “Awo, noa, hika ay mihay ampagsimba ha Templo ha balayan Jerusalem, awta ampakikwa kan laném kangko, ya mihay taga-Samaria?” Hinabi nay habayto ta bawal kanlan Israelita ya ampagsimba ha Templo ha Jerusalem, hén manggamit hén gamit lan taga-Samaria.

\* **4:1** Hilay Pariseo ay mihay pangkat lan Israelita. Êndat la no anhonolén la ya balang utoh ya ubat kan Apo Namalyari.

<sup>10</sup> Kabay wani Apo Jesus kana, “No muwang mo dayi ya pan-idin ni Apo Namalyari, haka no hino ko, ya ampakikwan lanêm kamo, ay nakikwa ka dayi kangko, ta dinyanan kata dayi hêñ lanêm, ya ampam-in biyay.”

<sup>11</sup> Kabay wanen babayi, “Apo, ayn kan panakhub, haka malalê ya hata libon. Antoy pangwanan mon habaytoy lanêm ya ampam-in biyay? <sup>12</sup> Yarin daëg mo hi Jacob ya unan toa tamo, ya nangali hêñ hata libon, haka ninêm di hêñ kalamo nay maának na haka ayop na!”

<sup>13</sup> Amêhêñ, wani Apo Jesus, “Hilay ampinêm hêñ hata lanêm ay maangan oman. <sup>14</sup> Noa, hilay ampinêm hêñ lanêm ya an-idin ko, ay ahinan maangan oman, ta ya lanêm ya an-idin ko, ay mag-in nanad sibol ha nakêm la, ya mam-in biyay ya ayn angga.”

<sup>15</sup> Amêhêñ, wanen babayi kana, “Apo, dyanan mo kon habaytoy lanêm, ta êmén a kina maangan oman, haka a kina kailangan mangahoy di.”

<sup>16</sup> Amêhêñ, wani Apo Jesus kana, “Lakwên moy ahawa mo, ta gêtan mo ya di.”

<sup>17</sup> Noa, wanen babayi, “Ayn akon ahawa, Apo.”

Nahêñ nahabi nay habayto, wani Apo Jesus, “Awo, pêtêg ya hinabi mo, ya ayn kan ahawa. <sup>18</sup> Ta limay nay nag-in ahawa mo, haka ya lalaki, ya ampaglamo mo amêhêñ, ay alwa mon ahawa.”

<sup>19</sup> Bayo, wanen babayi kana, “Apo, angkaintindihan kina ya hika, ay mihay propeta ni Apo Namalyari. <sup>20</sup> Hilay unan toa tamo, ay nagsimba di ha tawtgug hêñ Samaria. Noa, panhabiên yo, ya kailangan magsimba ha Templo ha Jerusalem.”

<sup>21</sup> Kabay wani Apo Jesus kana, “Maniwala ka ha anhabiên ko, ya lumatêng ya allo, ay alwan bayri, o ha Templo ha Jerusalem ya pagsimbaan kan Apo Namalyari, ya Tatang tamo. <sup>22</sup> Hikaw ya taga-Samaria, ay a yo kilala ya ansimbaên yo. Noa, hikay, ay kilala naêñ ya ansimbaên naêñ, ta ya kamwangan, ya tungkol ha kaligtasan, ay ampangubat kannâñ, ya ampagsimba ha Jerusalem. <sup>23</sup> Amêhêñ ya panaon ya hilay pêtêg hêñ ampagsimba kan Apo Namalyari, ya Tatang tamo, ay magsimba kana hêñ booy nakêm ha hawop hêñ Espiritu na. Ta êmbayroy pamagsimba ya antapolên na. <sup>24</sup> Hiyay Espiritu. Kabay hilay ampagsimba kana ay kailangan hêñ magsimba kanan pêtêg ha hawop hêñ Espiritu na.”

<sup>25</sup> Amêhêñ, wanen babayi, “Muwang ko ya lumatêng ya Mesias, ya ambaëgêñ lan Cristo. Panlumatêng na di, ay ipamulah na kantamo ya balang hino.” <sup>26</sup> Kabay wani Apo Jesus, “Hiko, ya kahabi mo ay habaytoy Cristo.”

<sup>27</sup> Kaban ampaghabi ya, ay anlumatêng hilay tagahonol na. Nag-êpapah hila, ta main yan kahabi ya babayi. Noa, ayn nangotang kana no hinoy labay na kanan babayi o no awta ampakihabi ya kana.

<sup>28</sup> Imbalag nan babayi ya banga na, haka ya nag-orong ha balayan, ta hinabi na kanlan kal-atan, ya wana, <sup>29</sup> “Kihonol kaw kangko ta hêlkêñ yoy mihay lalaki, ya namihabi kangko ngan hêñ dinyag ko. Kayno hiyay Mesias.”

<sup>30</sup> Kabay nakihonol hila kana ta hêlkêñ la hi Apo Jesus.

<sup>31</sup> Kaban ayn ya bayro ya babayi, ay anhagyatêñ yan tagahonol na hi Apo Jesus, ya mangan ya dayi. <sup>32</sup> Noa, wana kanla, “Main akon maêkan ya a yo muwang.” <sup>33</sup> Kabay nihahabi hilay tagahonol na, “Kayno main nam-in kaêñ kana.” <sup>34</sup> Hinabi ni Apo Jesus kanla, ya wana, “Ya pamanyag kalabayan hêñ nangiutoh kangko, haka yariêñ ya impadyag na kangko, ay yabay ya nanad kaêñ ko.”

<sup>35</sup> “Anhabiên yo ya, ‘Apat a buwan pon bayo panggapah.’ Noa, anhabiên ko kamoyu, ya pakahêlkêñ yo hilay mabay hêñ manggilam habi ko. Nanad

hilan pali ya nawto ya magapah. <sup>36</sup> Hilay ampanggapah ay ampananggap hēn upa la. Hilay ampakahagyat hēn tawo hēn maniwala kangko, ay nanad kanlan ampanggapah, ta ampanipon hilan tagēy ya para ha biyay ya ayn angga, ta êmēn hilay nanghad, haka hilay nanggapah ay maghigla. <sup>37</sup> Bayrin angka-pêtēg ya kahabian, ya wana, ‘Mihay ampanghad haka mihay na êt ya ampanggapah.’ <sup>38</sup> In-utoh kataw hēn gapahēn ya a yo pinaghayngētan. Kaatag ya namipamwang hēn habi ko, haka hikaw ya nakinabang.” Habaytoy hinabi ni Apo Jesus kanlan tagahonol na.

<sup>39</sup> Mal-at kanlan taga-Samaria ha balayan Sicar ya naniwala, ya hi Apo Jesus, ay hiyay Cristo, gawan ha habi nan babayi, ya wana, “In-ubuh nan hinabi kangko ya dinyag ko.” <sup>40</sup> Kabay hēn nilumatēng hilay taga-Samaria kanlan Apo Jesus, ay hinagyat la hilan Apo Jesus hēn magdahēl kanla. Nagdahēl hila kanla hēn loway yabi.

<sup>41</sup> Nanoro hi Apo Jesus haka mal-at êt ya kaatag kanlan taga-Samaria ay naniwala ya hiyay Cristo, gawan ha toro na. <sup>42</sup> Hinabi la kanan babayi, “Ampaniwala kay alwan bêngat gawan ha hinabi mo, noa, gawan nagilam naêñ ya hinabi na, haka muwang naêñ taganá ya hiyay Cristo, ya impangakon Mámilitgas ya in-utoh ni Apo Namalyari ha tawo ha luta.”

### *Namaalih hi Apo Jesus hēn hakit hēn anak hēn mihay main tungkulan*

<sup>43</sup> Nahēn nalabah ya loway yabi, ay nammita hilan Apo Jesus hēn palakon probinsyan Galilea. <sup>44</sup> Wani Apo Jesus hēn hato pon, ya mihay propeta ni Apo Namalyari, ay a an-igalang ha sarili nan logal. <sup>45</sup> Noa, hēn nilumatēng hila bayro, ay mahigla hilan tinanggap hēn taga-probinsyan Galilea, gawan nahêlêk la ya dyag ni Apo Jesus, hēn nakipista ya ha Pistan Pangaligtas ha Egipto† ha balayan Jerusalem.

<sup>46</sup> Amêhêñ, nag-orong hilan Apo Jesus ha balayan Cana, ha probinsyan Galilea, ya pinanyagan nan alak ya lanêm. Main bayro hēn mihay main tungkulan ha balayan Capernaum, ya main anak ya lalaki ya ampaghakit.

<sup>47</sup> Hēn nagilam na, ya nilumatēng hi Apo Jesus ha probinsyan Galilea hēn ubat ha probinsyan Judea, ay nilako na ya, ta nakihabi ya kan Apo Jesus, ya kihonol ya kana, ta êmēn na paalihêñ ya hakit hēn anak na, ya angkaboytoy inanawa. <sup>48</sup> Kabay wani Apo Jesus, “Angga ha a yo angkahêlêk ya dyag ni Apo Namalyari ya kapapaêpapah, ay a kaw awud maniwala!” <sup>49</sup> Noa, hinabi nan main tungkulan, “Apo, kihonol ka kangko ta êmēn ya a matsi ya anak ko.”

<sup>50</sup> Amêhêñ, hinabi ni Apo Jesus kana, ya wana, “Muli kay na, ta mabiyay ya anak mo, agyan a ko kilako.” Naniwala ya main tungkulan ha hinabi ni Apo Jesus kana, kabay nammita yay na. <sup>51</sup> Ha pamag-orong na ay tinupa ya hēn ipoh na, haka la hinabi ya ayn nanan hakit ya anak na. <sup>52</sup> Nahêñ kinotang na hila no hinon oras yan namahig-pahig ya anak na, ay hinabi la, “Naalih ya omot na naapon hēn a la una hēn maapon.” <sup>53</sup> Muwang nan main tungkulan ya habayton oras êt, hēn hinabi ni Apo Jesus kana, ya, mabiyay ya anak na. Kabay hiya, haka hilay kalamo na ha bali, ay naniwala, ya hi Apo Jesus, ay hiyay Cristo.

<sup>54</sup> Habayto ya ikalwan kapapaêpapah ya dinyag ni Apo Jesus ha probinsyan Galilea. Dinyag nay habayto hēn ubat ya ha probinsyan Judea.

## 5

### *Namaalih hi Apo Jesus hēn hakit ha allon pamagsimba*

† **4:45** Paskwa. Hêlkêñ ha panlêkan labay habiêñ hēn habi di ha bokotan hēn hata Bibliya.

<sup>1</sup> Amêhén, main miha pon ya pista lan Israelita ha Jerusalem. Kabay nakipista ya hi Apo Jesus. <sup>2</sup> Bayro ha Jerusalem ha Templo, ay main pagpalyuan, ya pinata-ngalanan Betesda\* ha habin Hebreo. Habayto ay ha danin ilwangan ya ambaégén lan Pamihowénan tupa. Hatoy pagpalyuan ay main limay bubungan ya paghalilungan ha dani na. <sup>3</sup> Do ha hilong hén habaytoy bubungan, ay main bapan laké ya ampaghakit. Main buwag, pilay, haka a ampakagalaw ya lawini, ya ampangénggan hén panggalaw hén hatoy laném, <sup>4</sup> ta ampaniwala hila ya paminghan-minghan, ay main lumaténg ya mihay anghel ni Apo Namalyari, ya ampangiho-kiho hén laném. No hinoy mu-munan makapaghugno ha laném, ya ubat hén kiniho-kiho hén anghel, ay angkaalihan hén kaganawan hakit. <sup>5</sup> Main mihay lalaki bayro, ya tatlumpo boy waloy taon nanan ampaghakit. <sup>6</sup> Nahén nahélék na ya ni Apo Jesus, haka muwang na ya nabuyot yay nan ampaghakit, ay kinotang na ya no labay na hén maalíh ya hakit na. <sup>7</sup> Wanan ampaghakit, “Apo, labay ko, noa, ayn mami-aypa kangko ha laném no ubat hén nagalaw. Kabay panay kaatag ya miuna kangko ha laném.” <sup>8</sup> Wani Apo Jesus kana, “Miréng ka. Hapwatén moy amak mo, ta mita kay na.” <sup>9</sup> Tambéng yan niréng ta naalíh ya hakit na. Haka na hinonol ya hinabi ni Apo Jesus.

Allon pamagsimba lan Israelita hén habayto. <sup>10</sup> Kabay wanlan poon lan Israelita kanan inalihan hakit, “Allon pamagsimba amêhén. Bawal ha Kautuhan tamо hén mantan hén hinoman amêhén.” <sup>11</sup> Noa, wana kanla, “Ya lalaki ya namaalíh hén hakit ko, ay naghabi kangko, ya hapwatén koy amak ko, ta mita kina.” <sup>12</sup> Kabay wanla kana, “Hinoy naghabin habain kamo?” <sup>13</sup> Noa, a na muwang, no hino ya, ya namaalíh hén hakit na, ta ayn yay na bayro hi Apo Jesus, haka kal-atan tawo bayro.

<sup>14</sup> Nahén nalyari ya habayto, ay natapol ni Apo Jesus ya hatoy lalaki, ya inalihan nan hakit ha Templo, haka wana kana, “Hélkén mo, ayn kay nan hakit. Paan kay nan manyaq kasalanan, ta kayno main narawak pon ya malyari kamo.” <sup>15</sup> Nammita ya hatoy lalaki, ta hinabi na kanlan poon lan Israelita, ya hi Apo Jesus, ya namaalíh hén hakit na. <sup>16</sup> Gawan ha pamaalíh nan hakit ha allon pamagsimba la, ay nag-umpisa hilay nan namairap kan Apo Jesus.

<sup>17</sup> Noa, hinabi ni Apo Jesus kanla, “Ya Tatang ko, hi Apo Namalyari, ay ayn têgén ha pamangingalo. Êmén ako êt bayro kana.” <sup>18</sup> Gawan habaytoy hinabi na, ay lalo la yan labay hén patsén, alwan bêngat ha main yan dinyag, ya bawal ha allon pamagsimba, noa, gawan ha hinabi na êt, ya hi Apo Namalyari ay Tatang na. Ha pangahabi nan habayto, ay impantag nay sarili na kan Apo Namalyari.

### *Ya tungkulan ni Apo Jesus, ya Anak ni Apo Namalyari*

<sup>19</sup> Amêhén, wani Apo Jesus, “Pakagilamén yo, hiko, ya Anak ni Apo Namalyari, ay ayn akon madyag ha sarili kon kalabayan. Pandaygén kon bêngat ya angkahélék ko kan Apo Namalyari, ya Tatang ko, ta ya pandaygén na, ay pandaygén ko êt. <sup>20</sup> Panlugurén ako ni Apo Namalyari, ya Tatang ko, haka ubuhén nan an-ipahlék kangko ya dyag na. Haka igit pon di ay ipahlék na kangko ya daygén ko, ta êmén kaw mag-êpapah. <sup>21</sup> Hi Apo Namalyari, ya Tatang ko ya ampamabiyay kanlan natsi, haka ampam-i kanla hén biyay ya ayn angga. Êmbayro êt, ay ampam-i kon biyay ya ayn angga kanlan labay kon dyanan. <sup>22</sup> Hi Apo Namalyari, ya Tatang ko, ay a manatol ha hinoman, ta indin nay na kangko ya habaytoy tungkulan, <sup>23</sup> ta êmén la kon igalang, ya

\* <sup>5:2</sup> Ha kaatag ya Kahulatan: Betsata o Bethzata.

Anak na, hên balang miha, hên nanad ha pamigalang la kan Apo Namalyari. No a la ko anggalangên, ay a la êt anggalangên hi Apo Namalyari, ya Tatang ko, ya namiutoh kangko.

<sup>24</sup> “Pakagilamên yo! Hilay ampanggilam habi ko, haka ampaniwala kanan namiutoh kangko, ay main biyay ya ayn angga. Haka a hila hatolan hên parusaan ha impiyerno, ta gêtan hilay na ha biyay ya ayn angga.

<sup>25</sup> Pakagilamên yo! Main tawo ya ayn paniwala kan Apo Namalyari. Nanad hilan natsi. Noa, paubat amêhén, ay magilam la ya habi ko, ya Anak ni Apo Namalyari. Haka hilay manonol ha habi ko, ay mabiyay hên ayn angga. <sup>26</sup> Gawan no ay-êmên ya Tatang ko, hi Apo Namalyari, ay main kapangyarihan hên mam-in biyay, ay êmbayro êt ay dinyanan na ko, ya Anak na, hên kapangyarihan hên mam-in biyay. <sup>27</sup> Haka hiko, ya Taga-Langit, ya In-anak Tawo, ay dinyanan na kon tungkulan hên hatolan hên parusaan hilay a ampaniwala kana. <sup>28</sup> Paan kaw mag-êpapah ha anhabiên ko, ta lumatêng ya allo, ay magilaman lan natsi ya baêg ko ha pinay-ilbêngan kanla. <sup>29</sup> Pamakagilam lan baêg ko, ay mipan-umawah hila. Hilay nanyag kangêran, ay dyanan biyay ya ayn angga. Haka hilay nanyag karawakan, ay hatolan hên parusaan hên ayn angga.

### *Hilay ampamaptêg hên para kan Apo Jesus*

<sup>30</sup> “Ayn akon madyag ha sarili ko, ta anhonolên koy kalabayan ni Apo Namalyari, ya namiutoh kangko. Makatoynungan ya pamanatol ko, gawan a ko anhonolên ya sarili kon kalabayan, ta anhonolên koy kalabayan na ya an-ipamwang na kangko.

<sup>31</sup> “No kakapag ko ya ampaghabi hên para ha sarili ko, ay mahabi yo ya alwan pêtêg ya habayto. <sup>32</sup> Noa, main kaatag pon ya ampamipamwang hên tungkol kangko etaman. Yabay ya hi Apo Namalyari, ya Tatang ko, haka muwang ko ya panhabiên na ay pêtêg. <sup>33</sup> Namiutoh kaw hên ungnoy tawo kan Juan Bautista, haka ya hinabi ni Juan hên tungkol kangko ay pêtêg. <sup>34</sup> An-ipaihip ko ya habayto kamoyu, alwan gawan ha kailangan koy pamaptêg hên tawo, noa, gawan labay ko hên maniwala kaw, ya hikoy Cristo, ta êmên kaw miligtas ha parusa, ya hépat kamoyu. <sup>35</sup> Hi Juan Bautista, ay nanad hên pag-atáng ya impagkêt ni Apo Namalyari, ta êmên mam-in hawang. Haka hikaw ay hinumigla pon ha hawang na. <sup>36</sup> Pêtêg ya impamwang ni Juan, ya tungkol kangko, noa, maalagá pon bayro ya pandaygên ko, ya an-ipadyag na kangko ni Apo Namalyari, ya Tatang ko. Habaytoy pamaptêg ya in-utoh na ko. <sup>37</sup> Haka hi Apo Namalyari, ya Tatang ko, ya namiutoh kangko, ay namipamwang, ya hikoy Cristo. Minghan man, ay a yo nagilam ya pamaghabi na, ni nahêlêk ya lupa na. <sup>38</sup> Haka a yo intanêm ya hinabi na ha nakêm yo, gawan a kaw ampaniwala kangko, ya in-utoh na. <sup>39</sup> Ampakapag-aralan yoy Kahulatan ya impahulat ni Apo Namalyari, ta êndat yo no daygên yoy habayto, ay madyanan kaw hên biyay ya ayn angga. Ha Kahulatan ay impamwang ya tungkol kangko. <sup>40</sup> Noa, a kaw ampaidani kangko, ta êmên kaw madyanan biyay ya ayn angga.

<sup>41</sup> “A ko ampanapol hên pamagpuri hên tawo, <sup>42</sup> gawan muwang ko ya a yo anlugarûn hi Apo Namalyari. <sup>43</sup> In-utoh na ko di ni Apo Namalyari, ya Tatang ko, noa, a yo ko paniwal-an. No main lumatêng di ya ampamitag-ay hên sarili na, ay ampaniwal-an yo ya. <sup>44</sup> A kaw ampaniwala kan Apo Namalyari gawan antapolên yoy pamandayêw hên kapareho yo, haka a kaw ampanapol hên pamandayêw ni Apo Namalyari, ya kamiha-mihaan Diyos. <sup>45</sup> Paan yon ihipêñ ya hikoy mamidikil kamoyu ha arapan ni Apo Namalyari, ya Tatang ko. Hi apo Moises, ya mamidikil kamoyu ta êndat yo ya anhonolên yoy intoro

na. <sup>46</sup> No pêtêg dayi ya paniwala yo ha hinulat ni apo Moises, ay paniwalan yo ko etaman, ta nanulat ya hên tungkol kangko. <sup>47</sup> Noa, gawan a kaw ampaniwala ha hinulat ni apo Moises ya tungkol kangko, ay a kaw etaman maniwala ha habi ko!"

## 6

*Liman libo ya tawo ya pinakan ni Apo Jesus  
(Mateo 14:13-21; Marcos 6:30-44; Lucas 9:10-17)*

<sup>1</sup> Amêhêñ, namatah hilan Apo Jesus ha lipay hên Dagat-dagatan hên Galilea, ya ambaêgêñ lan kaatag ya Dagat-dagatan hên Tiberias. <sup>2</sup> Kal-atan ya ampakihonol kanla, gawan kapapaêpapah ya dinyag na ha pamaalih hên hakit lan ampaghakit. <sup>3</sup> Nilumakat hilan Apo Jesus ha babo, ta nikno ya bayro hên kalamo na hilay tagahonol na. <sup>4</sup> Hêñ habayto ay marani ya Pista hên Kaligtasan. <sup>5</sup> Nahêñ manlêk hi Apo Jesus ay nahêlêk nay kal-atan ya andumanî kanla. Hinabi na kan Felipe, "Antoy mapanaliwan tamon maipakan kanlan hata kal-atan?" <sup>6</sup> Hinabi nay habayto ta hêlkêñ na no ay-êmêñ ya paniwala ni Felipe. Muwang nay na ni Apo Jesus ya daygêñ na. <sup>7</sup> Hinabi ni Felipe kana, "Apo, kulang pon ya suweldo hên mihay katawo ha anêm ya buwan\* hên panaliw hên maêkan lan hata kal-atan, agyan manipêrad bat ya kaêñ la." <sup>8</sup> Miha kanlan tagahonol ni Apo Jesus ya hi Andres, ya kapotoh pohêl ni Simon Pedro ya naghabi, <sup>9</sup> "Main mihay anak ya lalaki di, ya main limay puto, haka loway kênan lanêm. Noa, kulang ya habayto ha kal-atan." <sup>10</sup> Amêhêñ, wani Apo Jesus, "Paiknoêñ yo hila." Makwal ya pagpastolan bayro, kabay nikno hilay liman libo ya lalaki haka hilay kalamo la. <sup>11</sup> Kingwa ni Apo Jesus ya hatoy limay puto, haka panga-ubat nan impahalamat ya habayto kan Apo Namalyari, ay indin na kanlan ampikno ta pinitatayakan la. Êmbayro êt ya dinyag na ha kênan lanêm. Nangan hila hên angga ha mabay hila. <sup>12</sup> Nahêñ nabhoy hila ay impa-tsipon ni Apo Jesus kanlan tagahonol na ya natagan, ta êmêñ ayn mahayang. <sup>13</sup> Kabay tsinipon lay na ya tagan. Nakapno hila êt hên labinloway lubon hên tagan hêñ hatoy limay puto.

<sup>14</sup> Gawan nahêlêk lan kal-atan ya habaytoy kapapaêpapah, ya dinyag ni Apo Jesus, ay hinabi la, "Hiyan taganá ya Cristo, ya Propeta ya an-êngganan tamo, ya in-utoh di ha luta." <sup>15</sup> Nahêñ namwangan ni Apo Jesus, ya labay la hêñ dumani kana, ta palêkpêkêñ la ya hêñ daygêñ ari la, ay nagpabokol yan nilumakat ha bung-oy hêñ nanalangin.†

*Nammita hi Apo Jesus ha babo hêñ lanêm  
(Mateo 14:22-33; Marcos 6:45-52)*

<sup>16</sup> Nahêñ yabi yana, nilumohan hilay tagahonol na ha dagat-dagatan. <sup>17</sup> Hinumakay hila ha mihay bangka ta lumpipay, ha balayan Capernaum. Nariglêñ ana, noa, ayn ya êt hi Apo Jesus. <sup>18</sup> Hinumkaw ya angin, kabay matandulon ha dagat-dagatan. <sup>19</sup> Nahêñ nidayo hilay na hêñ lima, o anêm ya kilometro ha laylay hêñ lanêm, ay nahêlêk la hi Apo Jesus, ya ampammita ha lanêm, hêñ andumani ha bangka. Nalimwan hila, ta êndat la no hiya ay mihay kamana.‡ <sup>20</sup> Noa, wana kanla, "Paan kaw malimo! Hikoy habaytsi!" <sup>21</sup> Kabay mahigla la yan hinagyat hêñ pinahakay ha bangka, haka tambêng hilan nakalatêng ha dani hêñ Capernaum.

*Tinapol lan kal-atan hi Apo Jesus*

\* **6:7** 200 denaryo ha habin Griego. † **6:15** Mateo 14:23, Marcos 6:46. ‡ **6:19** Marcos 6:49.

<sup>22</sup> Ha humonoy allo, bayro ha ubatan lan Apo Jesus, ay an-êngganan la yan kal-atan. Éndat la no a ya pon nag-alíh bayro, ta nahélék la, ya a ya hinumakay ha bangka hén kalamo na hilay tagahonol na, ta kakapag la ya hinumakay bayro, haka ayn kaatag ya bangka bayro. <sup>23</sup> Amêhén, main ungnoy bangka ya ubat ha Tiberias ya nilumaténg bayro ha narani ha pinanganan lan puto hén ubat nan pinahalamatan ni Panginoon Jesus. <sup>24</sup> Nahén namwangan lan tawo ya ayn ana bayro hi Apo Jesus, haka ayn etaman bayro hilay tagahonol na, ay hinumakay hila bayro ha nilumaténg ya bangka, ta tapolén la hi Apo Jesus ha Capernaum.

### *Hi Apo Jesus, ya pamangan, ya ampam-in biyay*

<sup>25</sup> Nahén natapol la ya ha lipay laném ay hinabi la kana, “Mánoro, nakano kan nilumaténg di?” <sup>26</sup> Kabay wani Apo Jesus, “Pakagilamén yo, antapolén yo ko, gawan nabhoy kaw ha puto ya pinalaké ko, alwan gawan naintindihan yoy kapapaépapah ya dinyag ko. <sup>27</sup> Alwan kakapag pamangan ya angkaronot, ya dapat yon pagpagalan. Noa, dapat pagpagalan yo etaman ya pamangan ya makab-in biyay, ya ayn angga hén kalamo ni Apo Namalyari. Hiko ya Taga-Langit, ya In-anak Tawo, ya mam-i kamoyu hén pamangan ya makab-in biyay, ta hikoy dinyanan kapangyarihan ni Apo Namalyari, ya Tatang ko.”

<sup>28</sup> Amêhén, kinotang la kan Apo Jesus, “Apo, hinoy kailangan naén daygén, ta êmén kay makadyag hén kalabayan ni Apo Namalyari?” <sup>29</sup> Kabay wani Apo Jesus, “Habaytsi ya labay ni Apo Namalyari ya daygén yo: paniwal-an yo ya hikoy Cristo ya in-utoh na.” <sup>30</sup> Kabay wanla kana, “Apo, no êmbayro, ay hinoy kapapaépapah ya daygén mo, ta êmén kay maniwala ya hika ya Cristo? Hinoy daygén mo? <sup>31</sup> Ya ninuno tamo ay nangan hén manna ha kabalah-balahan hén êmén ha nakahulat ha habi ni Apo Namalyari, ‘Dinyanan na hilan kaén ya ubat ha langit.’ ”<sup>§</sup> <sup>32</sup> Amêhén, wani Apo Jesus kanla, “Pakagilamén yo. Alwan hi apo Moises, noa, hi Apo Namalyari ya nam-i kanlan ninuno yo hén manna ya kaén\* ya ubat ha langit. Haka amêhén hi Apo Namalyari, ya Tatang ko, ay ampam-i kamoyu hén pêtég ya kaén, ya ubat ha langit. <sup>33</sup> Ta ya pêtég ya kaén, ya pan-idin ni Apo Namalyari, ay yabay ya ubat ha langit, ya ampam-in biyay ya ayn angga ha tawo.” <sup>34</sup> Amêhén, hinabi la kana, “Panginoon, lawah mo kay dayi hén dyanan hén habaytoy kaén.” <sup>35</sup> Wani Apo Jesus kanla, “Hikoy kaén ya ampam-in biyay ya ayn angga. Hilay andumani kangko, ay a lonohén, haka hilay ampaniwala kangko, ay ahina hén maangan oman.

<sup>36</sup> “Noa, hinabi kina kamoyu ya nahélék yo ko man, ay a kaw maniwala kangko. <sup>37</sup> Tinalagá ni Apo Namalyari, ya Tatang ko no hino hilay makapakilamo kangko. Dumani hila kangko haka tanggapén ko hila. <sup>38</sup> Ta ubat ako ha langit, ta êmén ko daygén ya kalabayan ni Apo Namalyari ya namiutoh kangko, alwan para daygén ya kalabayan ko. <sup>39</sup> Ya kalabayan nan namiutoh kangko, ay ha Allon Pamanukom, ay biyayén kon oman hilay tinalagá na hén makapakilamo kangko. <sup>40</sup> Ta ya kalabayan ni Apo Namalyari, ya Tatang ko, ay hilay ampakamwang kangko, haka ampaniwala kangko, ya Anak na, ay dyanan biyay ya ayn angga. Haka hiko ya mamabiyay kanla ha Allon Pamanukom.”

<sup>41</sup> Hén ampaghabi ya êt hi Apo Jesus, ay main Israelita ya nagmulongan, gawan hinabi na ya hiyay kaén ya ubat ha langit. <sup>42</sup> Amêhén, nagmulongan hila, ya wanla, “Hiya hi Jesus ya anak ni Jose. Kilala tamoy indo na haka tatang na. Ay-êmén nan mahabi ya ubat ya ha langit?” <sup>43</sup> Kabay wani Apo Jesus, “Paan kaw magmulongan hén êmbayro. <sup>44</sup> Ayn makarani kangko

§ <sup>6:31</sup> Ha habin Griego: puto. Habaytoy mabaha ha Exodo 16:4-5. \* <sup>6:32</sup> ha Griego: puto.

no a hila ipakarani kangko ni Apo Namalyari, ya Tatang ko, ya namiutoh kangko. Haka hikon taganá ya mamabiyay kanla ha Allon Pamanukom.

<sup>45</sup> Nakahulat ha mihay hulat lan mámipamwang ni Apo Namalyari hén hato, ‘Toroan hilangan ni Apo Namalyari.’<sup>†</sup> Kabay kaganawan ya ampanggilam habi ni Apo Namalyari haka ampakamwang bayro, ay dumani kangko. <sup>46</sup> Habaytoy a labay habiên ya main nanan nakahélêk kan Apo Namalyari, ya Tatang ko, ta ayn nakahélêk kana no alwan kakapag ko ya ubat kana.

<sup>47</sup> “Pakagilamén yo. Hilay ampaniwala kangko, ay main biyay ya ayn angga. <sup>48</sup> Hikoy nanad kaén<sup>‡</sup> ya ampam-in biyay ya ayn angga. <sup>49</sup> Hi Apo Namalyari ay nam-in kaén ya ambaégn lan manna kanlan ninuno yo hén haton atsi hila ha kabalah-balahan, êmbayro man ay natsi hila. <sup>50</sup> Noa, hilay mangan hén pêtêg ya kaén ya ubat ha langit, ya inungkat ko, ay ahinan matsi. <sup>51</sup> Haka hiko ya maialimbawa ha pêtêg ya kaén<sup>§</sup> ya ubat ha langit, ya ampam-in biyay ya ayn angga. Hilay mangan habaytsi ya kaén ay madyanan biyay ya ayn angga. Ya kaén ya idin ko ay lawini ko, ta êmén kaganawan ay madyanan biyay ya ayn angga.”

<sup>52</sup> Gawan habaytoy hinabi ni Apo Jesus, ay nihuhabakan hilay kaatag Israelita, ya wanla, “Ay-émén nan maidin kantamoy lawini na, ta êmén tamon kaén ya habayto?”

<sup>53</sup> Kabay wani Apo Jesus, “Pakagilamén yo. No a kaw mangan lawini ko, hén Taga-Langit, ya In-anak Tawo, haka no a kaw miném daya ko, ay ayn kaw hén biyay ya ayn angga. <sup>54</sup> Hilay ampangan hén lawini ko, haka ampiném hén daya ko, ay main biyay ya ayn angga, haka biyayén ko hila ha Allon Pamanukom. <sup>55</sup> Ya lawini ko ay mantég kaén haka ya daya ko ay mantég pan-inémén. <sup>56</sup> Hilay ampangan hén lawini ko haka ampiném hén daya ko ay main pakikimiha kangko, haka hikoy main pakikimiha kanla. <sup>57</sup> In-utoh ako ni Apo Namalyari, ya Tatang ko, ya angkabiyay. Haka angkabiyay ako gawan ha kapangyarihan na. Émén êt bayro mabiyay hilay mangan lawini ko gawan ha kapangyarihan ko. <sup>58</sup> Hikoy maialimbawa ha pêtêg ya kaén ya ubat ha langit, haka hilay mangan hén habaytsi, ay mabiyay hén ayn angga. Habaytsi ya kaén ay alwan nanad ha kaén ya indin ha ninuno yo. Nangan hila noa, natsi hila morin.” <sup>59</sup> Hén hinabi ni Apo Jesus ya habayto, ay atsi ya ha sinagoga ha Capernaum hén ampanoro.

<sup>60</sup> Mal-at kanlan antoroan ni Apo Jesus, ya nanggilam hén habaytoy hinabi na, ay naghabin, “Nabyat ya habaytoy hinabi na. Kayno ayn maniwala kana.”

<sup>61</sup> Muwang ni Apo Jesus ya nagmulongan hilay kaatag ya antoroan na, kabay hinabi na, “Gawan habaytoy hinabi ko, ay labay yo kon lakwanan? <sup>62</sup> Hino awud ya daygén yo no mahélêk yo ko, ya Taga-Langit, ya In-anak Tawo, hén paitag-ay ha langit, ha ubatan ko? <sup>63</sup> Ya Espiritu ni Apo Namalyari ya mam-in biyay ya ayn angga. Alwan tawo ya ampam-in habayto. Ya hinabi ko ay ubat ha Espiritu ni Apo Namalyari, haka habaytoy ampam-in biyay ya ayn angga. <sup>64</sup> Noa, main kaatag kamoyu ya a ampaniwala ha hinabi ko.” Ta ubat hén una, ay muwang nay na ni Apo Jesus no hino hila ya a maniwala kana, haka no hino ya mangi-upit kana. <sup>65</sup> Wana êt, “Gawan muwang ko ya main kamoyu ya a ampaniwala kangko, ay hinabi ko ya ayn makapaidani kangko no alwan kalabayan ni Apo Namalyari, ya Tatang ko.”

<sup>66</sup> Paubat hén habayto ay nilakwanan la hi Apo Jesus hén mal-at kanlan antoroan na, haka a hilay na ampakihonol kana. <sup>67</sup> Améhén, hinabi ni Apo

† **6:45** Isaias 54:13. ‡ **6:48** Ha Griego: puto. § **6:51** Ha Griego: puto.

Jesus kanlan labinloway tagahonol na, “Labay yo ko etaman hên lakwanan?”<sup>68</sup> Kabay wani Simon Pedro, “Panginoon, hino ya lakwên naêñ? Kakapag mo ya main habi ya ampam-in biyay ya ayn angga!”<sup>69</sup> Ampaniwala kay kamo, haka muwang naêñ taganá ya hika ya Cristo, ya ayn hinon kasalanan, ya in-utoh ni Apo Namalyari.”<sup>70</sup> Amêhêñ, hinabi ni Apo Jesus kanla, “Awo, gawan hikoy namili kamoyu, ya labinloway tagahonol ko. Êmbayro man, ya miha kamoyu ay mahuloran ni Satanas.”<sup>71</sup> Ya inungkat na, ay yabay ya miha kanlan labinloway tagahonol na, ya hi Judas, ya anak ni Simon, ya taga-Iscariote ta hiyay mangi-upit kana.

## 7

*Hi Apo Jesus haka hilay patêl na*

<sup>1</sup> Amêhêñ, ay nanoro ya tana hên kalamo na hilay tagahonol na ha probinsyan Galilea. A nay na pon labay hên manoro ha probinsyan Judea, gawan labay la yan patsén bayro hên poon lan Israelita.<sup>2</sup> Marani yanay Pista hên Tolda, yabay ya mihay pista lan Israelita ta êmén la maihipan ya pamangillag ni Apo Namalyari ha ninuno la, haton atsi hila ha kabalah-balahan.<sup>3</sup> Kabay hinabi hên ali na kana, ya wanla, “Awta a ka mag-alih din maniraw ha probinsyan Judea, ta êmén hilay anhumonol kamo bayro, ay makahêlêk hên kapapaêpapah, ya andaygêñ mo.”<sup>4</sup> Ta no labay mo hên mamwangan la ya tungkol kamo, ay ipamwang minay andaygêñ mo. No ampanyag ka hên kapapaêpapah, ay ipamwang mina dayi.”<sup>5</sup> Hinabi lay habayto ta hila man, ay a ampaniwala kana.<sup>6</sup> Hinabi ni Apo Jesus kanla, “Laamêhêñ akon mita, ta alwa ko pon oras. Noa, hikaw, ay malyari kaw nan mita ha hinoman ya oras ya labay yo.”<sup>7</sup> Alwan hikaw ya angkahêmêkan lan tawo, noa, hikoy angkahêmêkan la, gawan an-ipamwang ko ya nangarawak ya dyag la.<sup>8</sup> Hikaw tana ya makipista, ta a kina pon makipista gawan alwa pon oras hên hikoy mita.”<sup>9</sup> Pangahabi nan habayto ay napaibalag ya ha Galilea.

*Nakipista hi Apo Jesus ha Pistan Tolda*

<sup>10</sup> Hêñ nammitay nay ali na, ay nammita ya etaman hên ayn nakamwang.<sup>11</sup> Bayro ha balayan Jerusalem ay antapolêñ la yan poon lan Israelita ha pista, ta wanla, “Anto ya?”<sup>12</sup> Ampihahabian lan tawo no hino ya. Main naghabi, “Mangêd yan tawo.” Wanla etaman hên kaatag, “Anlokoêñ nay tawo.”<sup>13</sup> Noa, gawan ha limo la kanlan ampamaala, ay ayn naghabi hên tungkol kana ha arapan lan kal-atan.

<sup>14</sup> Hêñ ika-apat ya allo hên pista, ay hinumwêñ hi Apo Jesus ha Templo, ta nanoro ya bayro.<sup>15</sup> Nakaêpapah hilay poon lan Israelita, ta wanla, “Antoy pinangwanan nan hata tawo, hên kamwangan na, ya a ya man nag-arat?”

<sup>16</sup> Kabay wani Apo Jesus, “Ya pan-itoro ko ay alwan ubat kangko, noa, ubat kan Apo Namalyari ya namiutoh kangko.”<sup>17</sup> Hilay mabay hên manyag kalabayan na, ay mamwangan, no ya an-itoro ko ay ubat kana, o no pan-habiêñ kon bat ya laman ihip ko.<sup>18</sup> Hilay ampamitoro hên ubat ha sarili lan kaihipan, ay ampanapol hên pamandayêw hên kapareho la. Noa, hilay mabay hên padayêw ya namiutoh kanla ay mapaypaniwal-an haka taganán alwan malaram.<sup>19</sup> Hi apo Moises ya nam-i kamoyu hên Kautuhan ni Apo Namalyari. Noa, a yo anhonolêñ ya habayto, ta labay yo kon patsêñ.”

<sup>20</sup> Nahêñ nahabi nay habayto, ay wanla, “Nahapatan kan narawak ya a angkahêlêk. Ayn mabay hên mamatsi kamo!”

<sup>21</sup> Wani Apo Jesus, “Mimihay dinyag ko ha allon pamagsimba haka naubuh kaw hēn nag-épapah. <sup>22</sup> Dinyanan na kaw ni apo Moises hēn utoh ya tuliēn yoy anak yo ha ikawalon allo hēn ubat in-anak, haka an-ipatuli yo hila, allo man hēn pamagsimba. Habayto ay manan ugali lan ninuno yo bayo dinyag ya Kautuhan ni apo Moises ya ubat kan Apo Namalyari.\* <sup>23</sup> No an-ipatuli yoy anak yo ha allon pamagsimba, ta êmén mahonol ya Kautuhan ni apo Moises, awta anhulukēn yo ko gawan namaalih akon hakit hēn boon lawini hēn mihay lalaki ha allon pamagsimba! <sup>24</sup> Paan kaw bat mam-in hatol ha angkahēlēk yon bēngat, noa, imbistigaēn yo pon bayo kaw manatol.”

### *Ampihahabian la no hi Apo Jesus ya Mesias, ya Cristo*

<sup>25</sup> Amêhēn, main kanlan taga-Jerusalem ya naghabi, “Yabay ya labay lan patsēn hēn poon tamo. <sup>26</sup> Atsi ya di hēn ampaghabi ha arapan hēn kal-atan haka a la ya bawalēn. Kayno muwang lan poon, ya pêtēg ya, hēn hiyay Mesias, ya Cristo, ya impangakon Mámiligtas ya pinili ni Apo Namalyari hēn mamaala. <sup>27</sup> Noa, muwang tamo no ay-iri yan mangubat, haka no lumatēng ya pêtēg ya Mesias, ya Cristo, ay ayn kanon makamwang no ay-iri yan mangubat.”

<sup>28</sup> Kabay in-ikhaw ni Apo Jesus ya pamaghabi na ha panoro na ha Templo. “Awo, muwang yo no hino ko, haka no ay-iri kon nangubat. Noa, main namiutoh kangko, haka a yo ya muwang ya habayto. Hiyay pêtēg. <sup>29</sup> Kilala ko ya, ta hiyay namiutoh kangko, haka ubat ako kana.”

<sup>30</sup> Kabay labay la yan dakpēn, noa, ayn makarakēp kana, ta alwa na pon oras. <sup>31</sup> Noa, mal-at ya naniwala ya hiyay Mesias, ya Cristo, ta wanla, “No alwa yan Mesias, ya Cristo ya habaytsi, no lumatēng ya pêtēg ya Mesias, ya Cristo, ay makadyag ya kaya hēn mal-at pon ya kapapaépapah?”

### *Dakpēn la ya dayi hēn tanod hi Apo Jesus*

<sup>32</sup> Nagilam lan Pariseo ya pagmulong lan tawo ya tungkol kan Apo Jesus. Kabay namiutoh hila, haka hilay ampamaala kanlan pari hēn tanod hēn Templo, hēn dakpēn ya. <sup>33</sup> Amêhēn, wani Apo Jesus, “Pêrad tanay panahon hēn makalamo yo ko, ta ahina mabuyot ay mag-orong kina ha namiutoh kangko. <sup>34</sup> Tapolēn yo ko bayto. Noa, a yo ko matapol gawan a kaw makalako ha lakwēn ko.” <sup>35</sup> Kabay wanlan poon lan Israelita ha miha ta miha, “Ato awud ya lakwēn na ta a tamo ya matapol? Mako ya kaya kanlan Israelita, ya atsi bayro ha bansan Griego, ta toroan na hila, haka hilay kabansa la?” <sup>36</sup> “Hino awud ya labay habiēn hēn hata hinabi na, ‘Tapolēn yo ko man, ay a yo ko mahēlēk,’ haka ‘Ya lakwēn ko, ay a yo malako?’”

### *Hilay ampaniwala kan Apo Jesus ay dyanan hēn bayoy biyay nan Espiritu ni Apo Namalyari*

<sup>37</sup> Ha ikawalon allo, ya pinakamaalagáy allo hēn pista, ay nirêng hi Apo Jesus, ta nan-angaw ya, “No angkaangan kaw, ay dumani kaw kangko, ta minêm kaw. <sup>38</sup> Nakahulat ha Kahulatan ya impahulat ni Apo Namalyari, ‘No maniwala kaw kangko, ay magkamain kaw hēn biyay ya nanad sibol ha nakêm yo ya a angkaubuhan lanêm.’” <sup>39</sup> Ya inungkat ni Apo Jesus, ay Espiritu ni Apo Namalyari, ya idin ha balang ampaniwala kana. A ya pon na-idin ya hatoy Espiritu ni Apo Namalyari, gawan a ya pon natsi, haka nabiyay oman hi Apo Jesus.

### *No hinoy laman ihip lan tawo tungkol kan Apo Jesus*

---

\* <sup>7:22</sup> Levitico 12:3.

<sup>40</sup> Main kanlan kal-atan bayro ya nakagilam hēn hinabi ni Apo Jesus, ya naghabin, "Yabay yan taganá ya Propeta ni Apo Namalyari, ya an-ēngganan tamo." <sup>41</sup> Hilay kaatag, ay naghabin hiyay Mesias, ya Cristo. Noa, wanlan kaatag pon, "Aya maubat ha Galilea ya Mesias. <sup>42</sup> Nakahulat ha Kahulatan ya impahulat ni Apo Namalyari ya hiyay Mesias, ay maubat ha kaapo-apoan ni Arin David, haka ha Betlehem yan ianak ha balayan ni Arin David." <sup>43</sup> Alwan mimihay ihip lan kal-atan ya tungkol kan Apo Jesus. <sup>44</sup> Labay lan kaatag, hēn dakpēn ya, noa, a la ya dinakēp.

*Hilay poon lan Israelita ay a naniwala, ya hi Apo Jesus, ay hiyay Mesias, ya Cristo*

<sup>45</sup> Nahēn nag-orong hilay tanod hēn Templo kanlan ampamaala kanlan pari haka kanlan Pariseo, ay kinotang lan Pariseo kanlan tanod, "Awta a yo ya gintan di?" <sup>46</sup> Wanlan guardya etaman, "A naēn ya dinakēp, ta ayn kay êt nagilam ya magaling maghabi hēn nanad kana." <sup>47</sup> Amēhēn, hinabi lan Pariseo, "Kayno naamuyot na kaw etaman. <sup>48</sup> Ayn kannaēn ya Pariseo o manungkulam ya ampaniwala kana. <sup>49</sup> Kakapag lan kal-atan, ya ayn muwang hēn tungkol ha Kautuhan tamon Israelita, ay ampaniwala kana. Parusaan hila ni Apo Namalyari." <sup>50</sup> Ya miha kanlan Pariseo bayro ay hi Nicodemo, ya dinumani kan Apo Jesus hēn hato. Wana kanan kalamona, <sup>51</sup> "Bawal kanlan Kautuhan tamon hēn parusaan ya mihay tawo, no a ya pon naimbistiga." <sup>52</sup> Kabay wanla kan Nicodemo, "Taga-Galilea ka etaman? Bahaēn moy Kahulatan ya impahulat ni Apo Namalyari, haka mo mamwangan ya ayn propeta ni Apo Namalyari ya maubat ha Galilea." <sup>53</sup> Bayo nuli hilangan.

## 8

*Ya babayi ya narakēp ha pamakilalaki*

<sup>1</sup> Hi Apo Jesus etaman, ay nilumakat ha Tawgtug Olibo. <sup>2</sup> Hēn pangamaranon, ay nilumatēng yay na êt ha Templo hēn manoro. Mal-at ya dinumani kana hēn labay manggilam habi na, kabay nikno yan nanoro kanla. <sup>3</sup> Kaban ampikno ya bayro, ay main nilumatēng ya kaatag kanlan mānoron Kautuhan ni apo Moises, haka ya kaatag kanlan Pariseo. Main hilan gintan ya mihay babayi ya narakēp ha pamakilalaki. Pinairēng la ya ha arapan lan kal-atan. <sup>4</sup> Bayo wanla kan Apo Jesus, "Mānoro, hata babayi ay narakēp ha pamakilalaki. <sup>5</sup> Nakahulat ha Kautuhan ni apo Moises ya kailangan batoēn ya hilay babayi ya êmēn di angga ha matsi hila. Noa, hinoy mahabi mo ya tungkol kana?" <sup>6</sup> Hinabi lay habayto ta subukēn la ya no magkamali hi Apo Jesus ha pakibat na, ta êmēn hila magkamain hēn ibara kana.

Ya dinyag ni Apo Jesus ay, napaiyoko ya, ta pinanulat nay panoron gamēt na ha luta.

<sup>7</sup> Gawan ha pamihundo lan mangotáng kana, ay nirēng ya, ta wana, "No main kamoyu ya a nakadyag hēn hinon bawal ha Kautuhan, ay hiyay munan mamato kana." <sup>8</sup> Nahēn nahabi nay habayto, ay inhundo nay panulat na ha luta.

<sup>9</sup> Hēn pamakgilam lan hinabi na, ay tsiha-tsiha hilan nammita ya hilay nantan habaytoy babayi kan Apo Jesus. Nunan nammita hilay matoa kanla. Nablag tana hi Apo Jesus haka hatoy babayi, ya nakairēng ha arapan na. <sup>10</sup> Amēhēn, nirēng hi Apo Jesus ta hinabi na kanan babayi, "Anto hilay nay nantan kamo di? Ayn namarusa kamo?"

<sup>11</sup> Kabay wanen babayi, "Ayn Apo."

Amêhén, wani Apo Jesus, “Hiko man, ay a kata parusaan. Mita kay na, haka itêgén minay pamanyag mon kasalanan.”

### *Hi Apo Jesus, ya hawang*

<sup>12</sup> Amêhén, naghabi yay na êt ha kal-atan hi Apo Jesus. Wana kanla, “Hikoy hawang lan tawo. Hilay humonol kangko, ay madyanan hawang, ya ampam-in biyay, ya ayn angga hên kalamo ni Apo Namalyari. Maalíh ya kariglêman nakêm la.”

<sup>13</sup> Kabay wanlan Pariseo kana, “Mimiha mo, ya ampaghabin habain, kabay a ya malyarin paniwal-an ya habi mo.”

<sup>14</sup> Wani Apo Jesus kanla, “Ampamaptêg ako man hên tungkol ha sarili ko, ay malyari yon paniwal-an ya anhabién ko, ta muwang koy ubatan ko, haka muwang ko ya lakwén ko. Noa, a yo muwang ya ubatan ko, haka a yo muwang ya lakwén ko. <sup>15</sup> Ya pamanatol yo ay ubat ha kaihipan yo di ha luta, noa, a ko anhatolan ya hinoman. <sup>16</sup> No manatol ako man, ay makatoynungan ya pamanatol ko, ta alwan kakapag ko ya ampanatol, ta kalamo ko hi Apo Namalyari, ya Tatang ko, ya namiutoh kangko. <sup>17</sup> Ha Kautuhan yo, ay nakahulat ya no pareho ya pamaptêg hên loway katawo, ay dapat paniwal-an ya pamaptêg la. <sup>18</sup> Lowa kay ya ampamaptêg hên tungkol kangko. Hikoy ampaghabi hên tungkol kangko, haka hi Apo Namalyari, ya Tatang ko, ya namiutoh kangko, ay ampamaptêg êt, kabay mapaniwal-an yoy anhabién naén.”

<sup>19</sup> Kabay hinabi la kana, “Antoy tatang mo?”

Wani Apo Jesus, “A yo ko kilala, haka a yo kilala ya Tatang ko. No kilala yo ko dayi, ay makilala yo etaman ya Tatang ko, hi Apo Namalyari.”

<sup>20</sup> Hinabi ni Apo Jesus ya habayto hên ampanoro ya ha dani hên pamyanan hên pera ya an-ialay ha Templo. Ayn nandakêp kana, ta alwa na pon oras.

### *Hilay a ampaniwala kan Apo Jesus ay a makahowén ha langit*

<sup>21</sup> Amêhén, hinabi nay na êt kanla, “A mabuyot ay mita kina. Kanan habayto ay pakatapolén yo ko, noa, matsi kaw hên a kaw napatawad. A kaw makalako ha lakwén ko.” <sup>22</sup> Amêhén, hinabi lan poon lan Israelita, “Kayno magpakamatsi ya. Ta wana, ‘A kaw makalako ha lakwén ko.’” <sup>23</sup> Amêhén, wana kanla, “Hikaw ay taga-bayri, ha luta. Hikoy taga-langit. <sup>24</sup> Kabay hinabi kina kamoyu, ya matsi kaw hên a kaw pon mapatawad. Ta a kaw mapatawad, no hikaw ay a maniwala ya ‘Hikoy Hiko taganá.’” <sup>25</sup> Amêhén, hinabi la kana, “Hino ka?” Kabay wani Apo Jesus kanla, “Hiko ya hatoy hinabi kina kamoyu paubat hên una. <sup>26</sup> Mal-at ya mahabi ko, ya maipintas kamoyu. Noa, pêtêg ya habi ni Apo Namalyari ya namiutoh kangko, haka ipamwang kon bêngat ya nagilam ko kana.”

<sup>27</sup> A la naintindihan ya ampaghabi ya hên tungkol kan Apo Namalyari, ya Tatang na. <sup>28</sup> Kabay wani Apo Jesus, “Lano no naipako yo kina ha koros, ay mamwangan yoy na ya hiko, ya Taga-Langit, ya In-anak Tawo, ay hikoy Mesias, ya Cristo ya nanad ha hinabi kina. Kanan habayto, ay mamwangan yo etaman, ya kaganawan dyag ko, haka habi ko, ay impadyag kangko ni Apo Namalyari, ya Tatang ko. <sup>29</sup> Kalamo ko di hi Apo Namalyari, ya namiutoh kangko. A na ko anlakwanan, ta panay kon andaygén ya kalabayan na.”

<sup>30</sup> Mal-at kanlay nakagilam hên habayto ay naniwalan hiyay Mesias, ya Cristo.

### *Hilay nagpa-ipoh ha kasalanan*

<sup>31</sup> Amêhén, hinabi ni Apo Jesus kanlan Israelita, ya naniwala kana, “No ihundo yoy pamanhumonol yo ha an-itoro ko, ay hikaw ya pêtêg kon

tagahonol, <sup>32</sup> ta mamwangan yoy kaptégan, haka ya kaptégan ay mamialíh kamoyu ha panga-ipoh.”

<sup>33</sup> Kabay hinabi la, “Hikay ya kaapo-apoan ni apo Abraham. Haka a kay êt nagpa-ipoh. Awta hinabi mo ya mag-alíh kay ha panga-ipoh?” <sup>34</sup> Hinabi ni Apo Jesus kanla, “Pakagilamén yo. Hilay ampanyag kasalanan, ay ampagpa-ipoh ha kasalanan. <sup>35</sup> Ya ipoh, ay ampakilamo bat ha pamilyan amo na, noa, ya anak nan amo ay kalamo bayro hèn ayn angga. <sup>36</sup> No hiko, ya Anak ni Apo Namalyari, ya mamibuhan kamoyu ha pangaipoh yo, ay taganán mibuhan kaw ha pangaipoh. <sup>37</sup> Muwang koy kaapo-apoan kaw ni apo Abraham. Noa, kaapo-apoan kaw man ni apo Abraham, ay labay yo kon patsên, gawan a yo labay pahowênen ya habi ko ha nakêm yo. <sup>38</sup> Ya panhabien ko, ay yabay ya namwangan ko kan Apo Namalyari, ya Tatang ko. Haka hikaw man, ay ampanyag hèn namwangan yo ha tatang yo.”

### *Hi Satanas ya tatang la*

<sup>39</sup> Hinabi la kana, “Hi apo Abraham ya tatang naén.” Amêhén, hinabi ni Apo Jesus kanla, “No hikaw ay taganán anak ni apo Abraham, ay ampanyag kaw dayi hèn dinyag na. <sup>40</sup> Noa, labay yo kon patsên, ya hiko ya ampaghabin kaptégan, ya nagilam ko kan Apo Namalyari. Ayn yan dinyag hèn êmbayro hi apo Abraham ta hiyay nanggilam kan Apo Namalyari. <sup>41</sup> Ya pandaygén yo ay nanad ha dinyag hèn tatang yo.” Kabay wanla kana, “Alwa kay anak hèn kaatag. Mimihay Tatang naén haka yabay ya hi Apo Namalyari.”

<sup>42</sup> Bayo wani Apo Jesus, “No pêtêg ya hi Apo Namalyari ya Tatang yo, ay lugurén yo ko dayi, ta hikoy ubat kana, haka atsi kina di. A ko nilumatêng di hèn gawan bat ha sarili kon ihip, noa, gawan in-utoh na ko. <sup>43</sup> A yo angkaintindihan ya anhabiên ko, gawan a yo labay gilamén ya panhabien ko. <sup>44</sup> Hi Satanas ya tatang yo. Ta no hinoy labay na, ay yabay ya andaygén yo. Hiyay mapamatsin tawo ubat hèn haton una. A na labay ya kaptégan, kabay pérad man, ay ayn taganán kaptégan kana. No maghabi ya, ay panay kalaraman ta taganán mapaglaram ya, haka hiyay ampangubatan hèn kaganawan kalaraman. <sup>45</sup> Noa, gawan anhabiên koy kaptégan, ay a yo ko ampaniwal-an. <sup>46</sup> Yarin main kamoyu ya makahabin nakadyag akon kasalanan? No pêtêg ya panhabien ko, ay awta a yo ko paniwal-an? <sup>47</sup> Hilay ubat kan Apo Namalyari, ay ampanggilam habi na. Alwa kaw ubat kan Apo Namalyari, kabay a yo panggilamén ya habi na.”

### *Hi Apo Jesus haka hi apo Abraham*

<sup>48</sup> Amêhén, hinabi lan Israelita kan Apo Jesus, “Pêtêg awud ya hinabi naén ya miha ka ya Samaritano ya nahapatan hèn narawak ya a angkahélék.”

<sup>49</sup> “A ko nahapatan hèn narawak ya a angkahélék ta muwang ko hèn mam-in galang kan Apo Namalyari, ya Tatang ko. Noa, hikaw, ay a yo ko anggalangén.

<sup>50</sup> A ko etaman ampanapol hèn galang yo. Noa, labay ni Apo Namalyari ya hikoy puriên, haka hiyay manatol. <sup>51</sup> Pakagilamén yo! Hilay manggilam habi ko, ay a matsi makanoman.”

<sup>52</sup> Nahêñ nahabi nay habayto ay wanlan Israelita kana, “Muwang naén amêhén ya nahapatan ka hèn narawak ya a angkahélék. Natsi ya hi apo Abraham angga hilay mámipamwang ni Apo Namalyari. Noa, panhabien mo, ya hilay ampanggilam habi mo ay dyanan biyay ya ayn angga.

<sup>53</sup> Makapangyarihan ka kaya kan apo Abraham ya natsi, haka kanlan mámipamwang ni Apo Namalyari ya natsi? Awta! Èndat mo no hino ka?”

<sup>54</sup> Wani Apo Jesus, “No dayêwén koy sarili ko, ay ayn alagá ya habayto. Ya ampandayêw kangko ay Tatang ko, hi Apo Namalyari. Yabay ya panhabien

yo ya ansimbaen yo. <sup>55</sup> A yo yan kilala. Noa, kilala ko ya. No habien ko ya a ko ya kilala, ay hikoy malaram hen nanad kamoyu. Noa, kilala ko ya, haka anhonolén koy habi na. <sup>56</sup> Hinumigla ya ninuno yo, hi apo Abraham, hen namwangan na ya tungkol ha pamanlumaténg ko di. Hinumigla ya ta muwang na hikoy lumaténg.”

<sup>57</sup> Wanlan Israelita kana etaman, “Ayn ka pon hen limampoy taon. Nabuyot yay nan natsi hi apo Abraham. Ay-émén mo yan nahélék?”

<sup>58</sup> Hinabi ni Apo Jesus, ya wana, “Pakagilamén yo! Bayo ya in-anak hi apo Abraham, ay Hikoy Hikina.” <sup>59</sup> Gawan hinabi nay habayto, ay namulot hilan bato, ta batoén la ya dayi. Noa, nipahalimbéng\* ya ha pibonakan lan tawo bayro, haka inumawah ya ha Templo hen a la ya namwangan.

## 9

### *Namamukat hi Apo Jesus hen mihay buwag*

<sup>1</sup> Ha pammita na ay nakahélék hi Apo Jesus hen mihay lalaki ya buwag paubat hen in-anak ya. <sup>2</sup> Kabay hinabi lan tagahonol na kana, ya wanla, “Máñoro, hinoy nanyag kasalanan, hata lalaki, o hilay toa na? Awta buwag yay na ubat hen in-anak ya?”

<sup>3</sup> Hinabi ni Apo Jesus, “Ya pangabuwag na, ay alwan gawan kasalanan na, haka alwan gawan kasalanan hen toa na. Hiyay in-anak hen buwag ta émén ipahlék kana ya kapangyarihan ni Apo Namalyari. <sup>4</sup> Dapat tamon daygén ya an-ipadyag ni Apo Namalyari, ya namiutoh kangko kaban main pon panaon, ta ustom lumaténg ya nanad yabi, ay ayn kitaminan madyag. <sup>5</sup> Kaban atsi ko pon di ha luta, hikoy hawang lan tawo, ta émén mahawangan ya kaihipan.”

<sup>6</sup> Nahén nahabi nay habayto, ay nandula ya ha luta. Bayo kingwa nay hata luta ta impunih na ha mata hen buwag. <sup>7</sup> Bayo wana kana, “Mita kay na, ta magkulaméh ka do ha laném ya pinata-ngalanan Siloe.” Ya labay habien hen Siloe ay in-utoh. Nahén nadyag hen buwag ya in-utoh ni Apo Jesus kana, ay nuli ya hen ampakahélék.

<sup>8</sup> Hilay karani nan bali, haka hilay kaatag hen kababay na ay naghabi, “Habaytsi awud ya ampikno hen ampakikwan pera.” <sup>9</sup> Wanlan kaatag, “Yabay ya.” Noa, wanlan kaatag êt, “Kalupa na yan bat hen buwag.” Améhen, wanlan lalaki, “Hiko ya.” <sup>10</sup> Kabay wanla kana, “Ay-émén nimukat ya mata mo?” <sup>11</sup> Hinabi na, “Ya lalaki, ya nag langan Jesus, ay nanyag hen pita ta impunih na ha mata ko. Bayo wana kangko, ya magkulaméh ako do ha laném ha Siloe. Dinyag koy hinabi na, kabay ampakahélék kina.” <sup>12</sup> Améhen, wanla kana, “Anto yay na?” Hinabi na, “A ko muwang.”

### *Kinotang lan Pariseo ya lalaki, ya manan buwag ya ampakahélék*

<sup>13</sup> Gintan lay hatoy lalaki, ya manan buwag ya ampakahélék, kanlan Pariseo. <sup>14</sup> Allon pamagsimba lan Israelita hen nanyag yan pita hi Apo Jesus, haka na pinamukat ya hata lalaki. <sup>15</sup> Améhen, kinotang la yan Pariseo, no pata ampakahélék yay na. Kabay wana kanla, “Namipunih yan pita ha mata ko, bayo hen nagkulaméh ako, ay ampakahélék kina.”

<sup>16</sup> Wanlan kaatag ya Pariseo, “Hi Jesus, ay alwan ubat kan Apo Namalyari, ta a na anhonolén ya Kautuhan, ya paan mag-obra ha allon pamagsimba.” Noa, wanlan kaatag, “No makasalanan ya, ay a ya makadyag hen émbayro ya makapaépapah.” Alwan mimihay ihip la.

<sup>17</sup> Kabay wanla kanan pinamukat, “Hika bay, ya pinamukat na. Hinoy mahabi mo ya tungkol kana?”

\* <sup>8:59</sup> Wanlan kaatag ya labay habien hen Griego di ay ‘nagtago ya.’

Amêhén, wanán pinamukat, “Hiyay mihay propeta ni Apo Namalyari.” <sup>18</sup> A hila naniwala ya mana yan buwag, ya pinamukat. Kabay impabaéг lay toa na. <sup>19</sup> Hinabi la kanla, “Anak yoy hatsi ya buwag hén paubat hiyay in-anak? Ay-émén ta ampakahélék yay na amêhén?”

<sup>20</sup> Hinabi la, “Hiya ya anak naén, haka buwag yay na hén in-anak ya. <sup>21</sup> Noa, a naén muwang, no ay-émén nimukat ya mata na. A naén etaman muwang, no hinoy namamukat kana. Kotangén yo ya, ta toa yay na. Habién na no hinoy nalyari kana.”

<sup>22</sup> Embayro ya hinabi lan toa na, gawan malimo hila ha Pariseo. Ta pinihabian lan poon lan Israelita, ya bawalén magsimba ha sinagoga ya hilay ampaghabi, ya hi Apo Jesus, ay hiya ya Mesias, ya Cristo, ya impangakon Mámiligas ya pinili ni Apo Namalyari hén mamaala. <sup>23</sup> Gawan namwangan lay pinihahabian hén poon la, ay hinabi lan toa na, “Hiya tana ya kotangén yo ta toa yay na.”

<sup>24</sup> Kabay impabaéг lan oman ya pinamukat haka la hinabi kana, “Purién mo hi Apo Namalyari ta habién moy kaptégan. Muwang naén ya makasalanan ya hi Jesus.”

<sup>25</sup> Amêhén, wanán pinamukat, “A ko muwang no makasalanan ya. Noa, muwang ko ya mana kon buwag, haka amêhén ampakahélék kina.”

<sup>26</sup> Amêhén, hinabi la, “Hinoy dinyag na kamo? Ay-émén nan pinamukat ya mata mo?”

<sup>27</sup> Kabay wanán pinamukat, “Hinabi kina kamoyu, noa, a kaw nanggilam. Awta labay yon magilaman oman? Labay yo hén mag-in tagahonol na etaman?”

<sup>28</sup> Minusmus la ya, ya wanla, “Hika ya tagahonol na. Noa, hikay ay tagahonol ni apo Moises. <sup>29</sup> Muwang naén ya naghabi hi Apo Namalyari kan apo Moises. Noa, a naén muwang no ay-iri ya taga hi Jesus.”

<sup>30</sup> Wanán pinamukat, “Têh! Pinamukat nay mata ko haka a yo muwang no taga ay-iri ya! <sup>31</sup> Muwang tamo ya hi Apo Namalyari ay a na panggilamén hilay makasalanan, noa, gilamén nay balang ampagsimba kana haka ampanyag kalabayan na. <sup>32</sup> Paubat hén dinyag ya hata luta, ay ayn pon namamukat ha mihay tawo ya buwag paubat hén hiyay in-anak. <sup>33</sup> No hiyay alwan ubat kan Apo Namalyari, ay a na madyag ya kapapaépapah.”

<sup>34</sup> Amêhén, hinabi la, “Makasalanan kan in-anak, haka labay mo kay hén toroan?” Nahén nahabi lay habayto, ay intaboy la ya ha sinagoga.

### *Hilay a ampaniwala kan Apo Jesus ay nanad buwag*

<sup>35</sup> Namwangan ni Apo Jesus ya nalyari ha pinamukat na. Hén natapol na ya, ay wana kana, “Ampaniwala ka kanan Taga-Langit, ya In-anak Tawo?”

<sup>36</sup> Wanán pinamukat, “Hino ya, Apo? Labay ko yan paniwal-an”

<sup>37</sup> Wani Apo Jesus, “Angkahélék mina, ta hiko ya ampaghabi kamo ay habaytoy Taga-Langit, ya In-anak Tawo.”

<sup>38</sup> Wanán pinamukat, “Panginoon, ampaniwala ko kamo!” Nandoko ya haka na sinimba hi Apo Jesus.

<sup>39</sup> Hinabi ni Apo Jesus, “Atsi ko ri ha luta ta hatolan koy tawo. Hilay ampangamin ya buwag ya nakém la, ay makahélék hén kaptégan. Hilay êndat lan ampakahélék hila, ay mabuwag ya nakém la.” <sup>40</sup> Main Pariseo ha dani ni Apo Jesus ya nakagilam hén habaytoy hinabi na. Kabay wanla, “Yarin buwag ya nakém naén etaman!” <sup>41</sup> Hinabi ni Apo Jesus kanla, “No ampangamin kaw dayi ya buwag ya nakém yo, ay ayn kaw hén kasalanan. Noa, gawan anhabién yo ya alwan buwag ya nakém yo, ay a maalíh ya kasalanan yo.”

## 10

### *Ya alimbawa ya tungkol ha mihay mangêd ya pastol*

<sup>1</sup> Wani Apo Jesus kanlan kal-atan, “Pakagilamên yo! Hilay anhumwên ha koral hên tupa, hên a magdann ha mantêg ilwangan, ay manakaw. <sup>2</sup> Ya ampagdann ha mantêg ilwangan, ay mantêg pastol lan tupa. <sup>3</sup> Hilay tanod hên koral hên tupa ay ampanloat hên kabat, ta êmên ya makadann. Muwang lan tupa ya baêg hên maypastol kanla, ta baêgén nay langan la, haka humonol hila kana. <sup>4</sup> No naubuh hên na-iawah ya tupa na, ay ampuna ya kanla, haka humonol hila kana, ta muwang lay pamaghabi na. <sup>5</sup> A la honolên ya pamaghabi hên kaatag ta muwayu hila, ta a la mapuliah ya pamaghabi hên kaatag.” <sup>6</sup> In-alimbawa ni Apo Jesus ya sarili na bayro, noa, a la naintindihan ya labay nan habiêñ.

### *Hi Apo Jesus, ya mangêd ya pastol*

<sup>7</sup> Kabay hinabi nan oman kanla, “Pakagilamên yo! Hikoy ilwangan hên koral lan tupa. <sup>8</sup> Main nuna kangko ya nanoro hên alwan pêtêg. Hila ay maialimbawa ha mabay manakaw hên tupa. Noa, hilay tupa, ay a nanggilam ha pamaghabi la. <sup>9</sup> Hikoy nanad ilwangan. Hilay ampaniwala kangko, haka magdann kangko, ay miligtas. Malyari hilay nan humwên haka umawah, haka la matapol ya kaganawan kailangan la. <sup>10</sup> Hilay manakaw ay labay lan bat hên manakaw, mamatsi, haka manira. Noa, hiko, ay atsi ko di ha luta ta êmên mam-in biyay ya ayn pamagkulang.

<sup>11</sup> “Hikoy mangêd ya pastol. Ya mangêd ya pastol ay nakal-an hên matsi ha ikakangêd hên tupa na. <sup>12</sup> Hilay an-upaan ya pastol, ay alwan nanad hên mangêd ya pastol, ya ampanlugud ha tupa na. No mahêlêk lay kapalimoy aho, ay lakwanan lay tupa, ta muwayu hila. Kabay patsên nan ahon lalê ya kaatag tupa, haka mipaplag hilay kaatag. <sup>13</sup> Muwayu hilay pastol, gawan an-upaan hilan bêngat. Alwa hila hên nanad ha mangêd ya pastol. A lan anlugarûn ya habaytoy tupa, gawan alwan hila ya nag tupa. <sup>14</sup> Hikoy nanad hên mangêd ya pastol. Muwang koy nakêm lan ampaniwala kangko, haka muwang lay nakêm ko. <sup>15</sup> Êmbayro êt, ay muwang na ko ni Apo Namalyari ya Tatang ko, haka êmbayro êt, ay muwang ko ya. Nakal-an ako hên matsi ha ikakangêd lan ampaniwala kangko. <sup>16</sup> Main akon kaatag tupa, ya ayn di ha koral. Gêtan ko hila etaman ta gilamên lay pamaghabi ko. Pilalamoën ko hila ta êmên mag-in mimiha hila, haka kakapag ko ya pastol la.

<sup>17</sup> “Anlugarûn ako ni Apo Namalyari, ya Tatang ko, gawan nakal-an akon matsi ta êmên ako mabiyay oman. <sup>18</sup> Ayn malyarin mamatsi kangko, no a ko ya paulayan. Nakal-an akon matsi, haka atsi kangkoy kapangyarihan hên mabiyay oman, ta hatsi ya in-utoh kangko ni Apo Namalyari, ya Tatang ko.”

<sup>19</sup> Gawan hata habi ni Apo Jesus, ay alwan mimihay ihip lan Israelita. <sup>20</sup> Mal-at kanla ya naghabi, ya wanla, “Hinapatan yan narawak ya a angkahêlêk, haka angkamurit yay na! Awta panggilamên yoy habi na?” <sup>21</sup> Noa, hinabi lan kaatag, “A ya makahabi hên êmbayro ya mihay hinapatan hên narawak ya a angkahêlêk. A hila makapamukat hên buwag, ya hilay narawak ya a angkahêlêk.”

### *Hilay poon hên Israelita, ay a ampaniwala kan Apo Jesus*

<sup>22</sup> Ha balayan Jerusalem hên habayto ay pista hên pamanêmtêm lan Israelita, ha pamanlinis lan ninuno la ha Templo, ya dinêmêkan lan kapatsi la. Panaon hên kêbel hên habayto, <sup>23</sup> haka hi Apo Jesus ay ampibita-bitâ

ha pinata-ngalanan Portiko\* ni Arin Solomon ha Templo. <sup>24</sup> Amêhén, main hên poon lan Israelita, ya nagpalibot kan Apo Jesus, ta dakpên la ya dayi ha pamaghabi na. Hinabi la kana, “Mabuyot naén nanan labay mamwangan no hino kan taganá. Habién mina dayi ta êmén naén maintindihan no hika ya Mesias, ya Cristo, ya pinili ni Apo Namalyari hên mag-in habaytoy Mámiligtas ya impangako na.”

<sup>25</sup> Kabay hinabi ni Apo Jesus, “Hinabi kina kamoyu noa, a yo ko paniwal-an. Ya kapapaêpapah ya dyag ko, ya pandaygên ko ha kapangyarihan ni Apo Namalyari, ya Tatang ko, ay ampamaptêg, no hino ko. <sup>26</sup> Noa, a kaw ampaniwala gawan a kaw kalamo ha ampastolan ko. <sup>27</sup> Hilay ampastolan ko, ay nanad tupa ya ampanggilam hên pamaghabi ko. Muwang koy nakêm la, haka anhumonol hila kangko. <sup>28</sup> Dyanan ko hilan biyay ya ayn angga. Antalanén koy biyay la, kabay a hila mipalako ha impiyerno haka a hila mayu kangko. <sup>29</sup> Hi Apo Namalyari, ya Tatang ko, ya namipatalan hên biyay la kangko, ay makapangyarihan ha kaganawan kapatsi la. Ayn maka-ayu hên an-illagan na. <sup>30</sup> Hiko, haka hi Apo Namalyari, ya Tatang ko, ay mimiha.”

<sup>31</sup> Gawan hinabi nay habayto, ay nangwa hilan bato, ta batoén la ya dayi. <sup>32</sup> Noa, wani Apo Jesus, “Mal-at ya mangêd ya dinyag ko, ya impadyag na kangko ni Apo Namalyari, ya Tatang ko. Hino ha dinyag ko, ya namaihip kamoyu hên batoén ako?” <sup>33</sup> Kabay wanlan Israelita bayro, “Alwan gawan ha mangêd ya dinyag mo, ya pamatoan naén kamo. Noa, labay naén kan batoén, gawan ha an-ipantag moy sarili mo kan Apo Namalyari. Yarin a mon ammusmusén hi Apo Namalyari ya tawo kan bêngat!” <sup>34</sup> Kabay wani Apo Jesus, “Habaytsi ya nakahulat ha Kahulatan ya impahulat ni Apo Namalyari ya tungkol kanlan mánlingon kaso, ‘Hinabi ko, ya hikaw ay diyos.’† <sup>35</sup> Bayro ha impahulat ni Apo Namalyari, ya pêtêg, ay diyos ya pamaêg na kanlan pinatsiwal-an na hên habi na. <sup>36</sup> Anhabién yo ya ammusmusén ko hi Apo Namalyari, ya Tatang ko, gawan ha hinabi ko, ya hikoy Anak na! Noa, ayn kaw hên karapatan hên maghabin êmbayro, ta hikoy pinili na, haka in-utoh di ha luta. <sup>37</sup> No a ko ampanyag, hên an-ipadyag na kangko ni Apo Namalyari, ya Tatang ko, ay a yo kailangan hên maniwala kangko. <sup>38</sup> Noa, no pandaygên koy an-ipadyag na kangko, awta a yo paniwal-an ya habi ko! Paniwal-an yo tana dayi ya dyag ko, ta êmén yo maintindihan ya atsi kangkoy Tatang ko, hi Apo Namalyari, haka hikoy atsi kana.”

<sup>39</sup> Gawan habaytoy hinabi na, ay labay lay na êt dayi hên dakpên yan oman. Noa, ayn makadakép kana. <sup>40</sup> Nammita yay na êt hi Apo Jesus, ta lumipay ya ha lanêm ya ampatangalanan lan Ilog Jordan ya pinamawtismoan ni Juan Bautista hên una. Naglaêh ya bayro hi Apo Jesus. <sup>41</sup> Mal-at ya dinumani kana, ta wanla, “A ya nanyag hên kapapaêpapah hi Juan, noa, pêtêg ya balang hinabi na, ya tungkol kanan habaytsi.” <sup>42</sup> Mal-at bayro ya naniwala kan Apo Jesus, ya hiyay Mesias, ya Cristo, ya in-utoh ni Apo Namalyari.

## 11

### *Hêñ natsi hi Lazaro, ya kapotoh pohêl lan Marta haka Maria*

<sup>1</sup> Main mihay lalaki ya nag langan Lazaro ya ampaidi ha baryon Betania ha probinsyan Judea, ha dani hên balayan Jerusalem. Kalamo na ya kapotoh pohêl na hilan Marta haka hi Maria.\* Amêhén, nagkahakit hi Lazaro. <sup>2</sup> (Hi Maria ya namitugtug hên pabango ha bitsih ni Apo Jesus, haka na punihan hên habot na.) Gawan nagkahakit hi Lazaro, <sup>3</sup> ay impahabi lan Marta haka

\* **10:23** Hêlkên ha panlêkan labay habién hên habi. † **10:34** Exodus 22:8-28, Awit 82:6. \* **11:1** Lucas 10:38-42, Juan 12:1-3.

Maria kan Apo Jesus, ya wanla, “Panginoon, ampaghakit ya anluguran mon kalalaki.”

<sup>4</sup> Noa, hēn nagilam ni Apo Jesus ya impahabi la, ay wana, “A na ikamatsi ya hakit na. Nalyari ya hatsi, ta êmēn maipamwang ya kapangyarihan ni Apo Namalyari, haka ya kapangyarihan ko, ya Anak na.”

<sup>5</sup> Anlugurēn ni Apo Jesus hilay mitataali ya hi Marta, Maria haka Lazaro. <sup>6</sup> Kabay lowa tanay allo na bayro ha Illog Jordan paubat hēn impamwang kana, ya nagkahakit hi Lazaro. <sup>7</sup> Amêhēn, hinabi na kanlan tagahonol na, “Mag-orong kitamina ha probinsyan Judea.”

<sup>8</sup> Kabay wanla kana, “Mánoro, a pon nabuyot, ay labay la kan batoēn, hēn patsēn, hēn hilay poon tamon Israelita bayro. Awta labay mon mag-orong bayro?”

<sup>9</sup> Kabay wani Apo Jesus kanla, “Main labinloway oras, hēn hawang, ha balang allo. Hilay ampammita no mahawang, ay a mibatol, gawan angkahélēk lay ampam-in hawang kanlan tawo. <sup>10</sup> Noa, hilay ampammita ha yabi, ay mibatol gawan ayn hawang kanla.” <sup>11</sup> Nahēn nahabi nay habayto, ay wana kanla, “Ya kaluguran tamo hi Lazaro, ay nabélēw. Noa, lakwēn ko ya, ta pukawēn ko ya.”

<sup>12</sup> Kabay hinabi lan tagahonol na kana, “Panginoon, no nipakatuloy ya, ay mapanat ya hakit na.” <sup>13</sup> Ya labay nan habiēn ni Apo Jesus, ay natsi yay na hi Lazaro. Noa, a la naintindihan ya labay nan habiēn, ta êndat la no bêlēw yan taganá hi Lazaro. <sup>14</sup> Kabay indiretsa nay nan hinabi ni Apo Jesus, “Natsi ya hi Lazaro. <sup>15</sup> Ha ikakangēd yo, ay mahigla ko, ya ayn ako bayro hēn namaalih hēn hakit na, ta êmēn mapahanan ya paniwala yo, ya hikoy Mesias, ya Cristo. Mita kitamina na, ta lakwēn tamo ya.” <sup>16</sup> Amêhēn, wani Tomas, ya banhagan lan Kambal, “Hali, kihonol kitamo kana, ta êmēn kitamo matsi hēn kalamo na.”

### *Hi Apo Jesus, ya mamabiyay oman kanlan natsi*

<sup>17</sup> Hēn nilumatēng hilan Apo Jesus ha baryon Betania, ay ika-apatan allo hēn in-ilbēng ya bangkay ni Lazaro. <sup>18</sup> Tatloy kilometron bēngat ya dayo hēn balayan Jerusalem ha baryon Betania. <sup>19</sup> Kabay mal-at ya Israelita ya taga-Judea ya nilumatēng ta nakidamay kanlan Marta haka Maria gawan natsi ya kapotoh pohēl la.

<sup>20</sup> Hēn nagilam ni Marta, ya anlumatēng hilan Apo Jesus, ay immawah ya, ta nanupa kanla. Noa, hi Maria, ay a inumawah ha bali. <sup>21</sup> Wani Marta kan Apo Jesus, “Panginoon, no atsi ka dayi, ay a ya bayton natsi ya kapotoh pohēl ko. <sup>22</sup> Êmbayro man, ay muwang ko, ya hinoman ya pakikwaan yo kan Apo Namalyari, ay daygēn na.” <sup>23</sup> Wani Apo Jesus kana, “Mabiyay yan oman hi Lazaro.” <sup>24</sup> Wani Marta kan Apo Jesus, “Awo, Panginoon. Muwang ko ya mabiyay yan oman ha Allon Pamanukom ya lumatēng ha anggaan hēn luta.” <sup>25</sup> Amêhēn, wani Apo Jesus, “Hikoy ampam-in biyay haka hikoy mamabiyay oman kanlan natsi. Hilay ampaniwala kangko, ay mabiyay oman, natsi hila man di ha luta. <sup>26</sup> Hilay ampaniwala kangko, ay dyanan hēn biyay ya ayn angga. Ampaniwala mo ya habayto, ya hinabi ko?” <sup>27</sup> “Awo, Panginoon,” wani Marta. “Ampaniwala ko ya hika ya Anak ni Apo Namalyari. Hika ya Mesias, ya Cristo, ya pan-êngganan naêñ di ha luta.”

### *Nanangih hi Apo Jesus*

<sup>28</sup> Nahēn nahabi nay na ya habayto ni Marta, ay nuli ya ta binaêg na hi Maria, hēn in-inanah na kana ya nilumatēng ya Mánoro, haka impabaêg na ya. <sup>29</sup> Ya dinyag ni Maria hēn nagilam nay habayto, ay tambēng yan

nirêng ta nagtagloh ya kana. <sup>30</sup> A ya pon nilumatêng ha balayan hi Apo Jesus, ta atsi ya pon ha legal ya pinakatupaan kana ni Marta. <sup>31</sup> Nahên nahêlêk lan taga-Judea, ya kalamo ni Maria ha bali hên ampakidamay kana, ya bigla yan nammita hi Maria, ay kinamat la ya, ta êndat la no lakwên na ya pinay-ilbêngan hên bangkay ni Lazaro, hên manangih. <sup>32</sup> Hêñ nilumatêng hi Maria ha ampaidyanan ni Apo Jesus, ay nandoko ya ha arapan na, ta wana, “Panginoon, no atsi ka dayi bayri, ay a ya bayton natsi ya kapotoh pohêl ko.” <sup>33</sup> Gawan ampanangih hi Maria haka hilay Israelita, ya nangamat kana, ay namalagêhbêg ya nakêm ni Apo Jesus. <sup>34</sup> Hinabi na, “Atoy pinay-ilbêngan yon bangkay na?” Kabay wanla, “Panginoon, kihonol ka kannaêñ ta hêlkêñ mo ya.” <sup>35</sup> Nanangih hi Apo Jesus. <sup>36</sup> Kabay wanlan kaatag Israelita, “Nilugud nan taganá hi Lazaro.” <sup>37</sup> Noa, warlan kaatag, “Hiya ya namamukat hêñ buwag. Awta pinaulayan na hi Lazaro hêñ matsi?”

### *Hi Lazaro ay biniyay oman ni Apo Jesus*

<sup>38</sup> Nahên nilumatêng hila ha lêyang, ya pinay-ilbêngan lan bangkay ni Lazaro, ay namalagêhbêg ya nakêm ni Apo Jesus. Main nakapênlan ya bato ha bêbêy lêyang. <sup>39</sup> Kabay wani Apo Jesus, “Alihêñ yoy bato.” Noa, wani Marta, “Panginoon, apat ya allo yay nan natsi. Nabatay nay bangkay na.” <sup>40</sup> Wani Apo Jesus kan Marta, “Hinabi kina kamo ya no maniwala ka kangko, ay mahêlêk moy kapangyarihan ni Apo Namalyari.” <sup>41</sup> Kabay inalíh la ya habaytoy bato ha pinay-ilbêngan la kan Lazaro. Naningla hi Apo Jesus ta wana, “Tatang ko ha langit, ampahalamatan kata, gawan ginilam moy halangin ko. <sup>42</sup> Mana kinan muwang, ya panay mon anggilamêñ ya kaganawan dawat ko. Noa, hinabi koy habayto, ta êmêñ hila maniwala ya atsi bayri, ya hika ya namiutoh kangko.” <sup>43</sup> Nahên nahabi na ya habayto, ay nan-angaw ya, “Lazaro, umawah ka!” <sup>44</sup> Inumawah ya. Ya gamêt haka bitsih na ay nakabêlbêl, hêñ nanad ha ugali la ha natsi. Main panyo ya nakabêlbêl ha ulo na. Amêhêñ, wani Apo Jesus kanla, “Alihêñ yoy nakabêlbêl kana ta êmêñ ya mibuhan.”

### *Ya pamamulong kan Apo Jesus*

(Mateo 26:1-5; Marcos 14:1-2; Lucas 22:1-2)

<sup>45</sup> Mal-at kanlan Israelita ya taga-Judea, ya nangamat kan Maria, ay nakahêlêk hêñ biniyay oman hi Lazaro. Kabay naniwala hila kan Apo Jesus ya hiyay Mesias, ya Cristo ya impangakon Mámiligtas ya pinili ni Apo Namalyari hêñ mamaala. <sup>46</sup> Noa, ya kaatag ay nammita, ta hinabi la kanlan Pariseo ya dinyag ni Apo Jesus. <sup>47</sup> Kabay namatsipon hilay Pariseo haka hilay ampamaala kanlan pari hêñ kalamo la ha Sanedrin. Pinihabian la no hinoy daygêñ la, gawan hi Apo Jesus ay ampanyag hêñ mal-at ya kapapaêpapah. <sup>48</sup> Hinabi la, “No paulayan tamo ya hêñ manyag hêñ êmbayro, ay mal-at ya maniwala ya hiyay Mesias, ya Cristo. Bayo lumatêng hilay hundaloh hêñ Roma ta hiraêñ la ya Templo ni Apo Namalyari, haka bansa tamo.”

<sup>49</sup> Noa, ya miha kanla, ya hi Caifas, ya pinakapoon pari, ay naghabi, ya wana, “Ayn kaw hêñ muwang! <sup>50</sup> A yo angkaintindihan ya ikakangêd tamo no mimihâ tana ya matsi, kanan matsi kitamon kaganawan ha boon bansom Israel.” <sup>51</sup> Ya habaytoy hinabi ni Caifas, ay alwan ubat ha sarili na, ta habaytoy impapapêt kana ni Apo Namalyari, gawan hiyay pinakapoon pari hêñ habaytoy taon. Impapêt na ya hi Apo Jesus ay matsi ha ikakangêd lan Israelita, <sup>52</sup> haka alwan bêngat ha ikakangêd lan Israelita, noa, ta êmêñ matsipon etaman ya maának ni Apo Namalyari ya nitatayak ha kaganawan

bansa. <sup>53</sup> Paubat hēn habayton allo, ay pan-ihipēn la, no ay-êmēn lan mapatsi hi Apo Jesus. <sup>54</sup> Kabay a yay na pon nunta ha lōgal lan Israelita ya mal-at ya tawo. Naglaêh ya tana hēn kalamo na hilay tagahonol na ha balayan Efraim, ya atsi ha dani hēn lōgal ya kabalah-balahan.

<sup>55</sup> Amêhēn, hēn marani yay na êt ya Pistan Pangaligtas ha Egipto,† ay mal-at ya nilumatêng ha balayan Jerusalem, ta honolēn lay ugali lan pamaglinis hēn sarili la, bayo hila makipista. <sup>56</sup> Hēn a la matapol hi Apo Jesus ha Templo, ay niyahabi hilay tawo ha miha ta miha no makipista ya hi Apo Jesus, o no a ya, <sup>57</sup> ta namiutoh hilay ampamaala kanlan pari haka hilay Pariseo, ya no main makahêlêk kan Apo Jesus, ay dapat ipamwang la kanla ta êmēn la ya madakêp.

## 12

### *Hēn tinugtugan hēn pabango hi Apo Jesus (Mateo 26:6-13; Marcos 14:3-9)*

<sup>1</sup> Amêhēn, anêm ya allo bayo mag-umpisa ya Pistan Pangaligtas ha Egipto,\* ay nilumatêng hilan Apo Jesus ha baryon Betania ya balayan ni Lazaro, ya biniyay oman ni Apo Jesus. <sup>2</sup> Pinanluto hilan Apo Jesus hēn maêkan. Namiapag hi Marta. Hi Lazaro etaman, ay miha kanlan ampangan hēn kalamo lan Apo Jesus. <sup>3</sup> Hēn ampangan hila, ay nangwa hi Maria hēn bote hēn makamal ya pabango† ta intugtug na ha bitsih ni Apo Jesus. Bayo, pinunihan nan habot na. Hata pabango ay naraêp ha boon bali. <sup>4</sup> Hi Judas Iscariote, ya tagahonol ni Apo Jesus ya may-upit kana, ay naghabi, ya wana, <sup>5</sup> “Pata a ya inhaliw ya habaytoy pabango, ya ampag-alaga‡ hēn suweldo hēn mihay katawo ha mihay taon, ta indin dayi ha mangairap ya habaytoy pera?” <sup>6</sup> Hinabi nay habayto, alwan gawan ingalo na ha mairap, noa, gawan hiyay ampanalan hēn pera lan Apo Jesus, haka antakawên nay hatsi ha pansarili na. <sup>7</sup> Wani Apo Jesus kan Judas, “Pata an-abalaêñ mo ya! Paulayan mo hi Maria, ta hata dinyag na, ay nanad nan in-il-an ya lawini ko ha pamilbêng kangko no matsi kina. <sup>8</sup> Hilay mairap ay panay yon kalamo, kabay ha hinon oras, ay mahawpan yo hila, noa, hiko ay a yo panay hēn mapagkalamo.”

### *Patsêñ la dayi hi Lazaro*

<sup>9</sup> Hēn namwangan hēn kal-atan kanlan Israelita ya taga-Judea, ya atsi ya ha Betania hi Apo Jesus, ay nilako la ya. Labay la êt hêlkêñ hi Lazaro, ya biniyay oman ni Apo Jesus. <sup>10</sup> Labay lan ampamaala kanlan pari, ya anggan hi Lazaro ya ipapatsi la, <sup>11</sup> gawan mal-at ya Israelita ya nanalibokot kanla, haka ampaniwala hilay na kan Apo Jesus, gawan ha biniyay nan oman hi Lazaro.

### *Mal-at ya ampagpuri kan Apo Jesus hēn ampandaraho yay na ha balayan Jerusalem*

#### *(Mateo 21:1-11; Marcos 11:1-11; Lucas 19:28-40)*

<sup>12</sup> Ha humonoy allo, ay namwangan hēn kal-atan ya nakipista, ya anlumatêng hi Apo Jesus ha Jerusalem. <sup>13</sup> Nangwa hilan bulong, ya nanad bulong ongot haka nanupa hila kana. Nipan-angaw hila ha panupa la kana, “Hosanna! Iningalwan ya habaytsi ya in-utoh ni Apo Namalyari! Purién hi Apo Jesus ya ampamaala ha Israell!” <sup>14</sup> Anlumatêng hi Apo Jesus

† **11:55** Paskwa. Hêlkêñ ha panlêkan labay habiêñ hēn habi di ha bokotan hēn hata Bibliya. \* **12:1** Paskwa. Hêlkêñ ha panlêkan labay habiêñ hēn habi di ha bokotan hēn hata Bibliya. † **12:3** nardo ha habin Griego. ‡ **12:5** 300 denaryo ha habin Griego.

hên nakahakay ha bisero hên asno nanad ha nakahulat ha habi ni Apo Namalyari:

<sup>15</sup> “Paan kaw malimo, hikaw ya taga-Jerusalem,§ ta anlumatêng ya ampa-maalâ kamoyu, ya nagpakaaypan nakêm hên himmakay ha bisero hên asno!”

<sup>16</sup> Hên habayto ay a la pon muwang hên tagahonol ni Apo Jesus ya labay habiên hên habayto. Noa, hên nabiyay yan oman, ay naihipan la ya hatoy nakahulat, ay tungkol kana, haka nalyari kana.

<sup>17</sup> Amêhêñ, hilay kal-atan ya nakahêlêk hên biniyay nan oman ni Apo Jesus hi Lazaro, ay naghabi kanlan kaatag, ya pêtêg ya habayto ya dinyag ni Apo Jesus. <sup>18</sup> Mal-at ya nanupa kan Apo Jesus gawan ha nagilam la, ya biniyay nan oman hi Lazaro. <sup>19</sup> Kabay wanlan Pariseo ha miha ta miha, “Ayn kitaminan madyag ta naubuh-ubuh hilay nan anhumonol kana.”

### *Main ungnoy Griego ya nanapol kan Apo Jesus*

<sup>20</sup> Nakipista êt hên magsimba kan Apo Namalyari ya ungnoy Griego. <sup>21</sup> Dinumani hila kan Felipe, ya taga-Betsaida ha probinsyan Galilea. Hinabi la kan Felipe, “Apo, labay naêñ mahêlêk hi Apo Jesus.” <sup>22</sup> Hinabi ni Felipe ya kalabayan la kan Andres. Bayo hinabi lan lowa ya kalabayan lan Griego kan Apo Jesus. <sup>23</sup> Hinabi ni Apo Jesus, “Nilumatêng ya oras ya ipahlêk ya panga-Diyos ko, hên Taga-Langit, ya In-anak Tawo. <sup>24</sup> Pakagilamên yo, hikoy maialimbawa ha mihay lahí hên bini hên trigo. No a ya iilbêng ha luta hên nanad natsi, ay mimiha na tana. Noa, uston atsi yay na ha luta, ay tumubo ya haka managêyan mal-at. <sup>25</sup> Hilay ampanlugud hên biyay la hên igit ha pamanlugud la kan Apo Namalyari, ay maalihan habayto. Noa, hilay ampanlugud kan Apo Namalyari hên igit ha biyay la di ha luta, ay main biyay ya ayn angga. <sup>26</sup> Hilay mabay hên maghuyo kangko, ay kailangan hên humonol kangko, ta ya hinon lakwên ko, ay lakwên la etaman. Hilay maghuyo kangko ay itag-ay ni Apo Namalyari, ya Tatang ko.”

### *Impamwang ni Apo Jesus ya tungkol ha kamatsan na*

<sup>27</sup> Hinabi na êt ni Apo Jesus, “Angkabyatan ako. Noa, a ko habiên, ‘Tatang, iligtas mo ko ha kairapan ya atsi ha arapan ko.’ A ko mahabi ya habayto, gawan nilumatêng ako di ha luta, ta êmên ko maranasan ya hata kairapan.” <sup>28</sup> Wana êt ni Apo Jesus, “Tatang, ipahlêk moy panga-Diyos mo, ta êmên la ka puriên.” Amêhêñ, wanan habi ya ubat ha langit, “Impahlêk kina ya panga-Diyos ko, haka ipahlêk kon oman.”

<sup>29</sup> Naubuh hilan nakagilam hên hatoy habi. Wanlan kaatag ya nangilat. Wanlan kaatag pon ya main anghel ya naghabi kan Apo Jesus. <sup>30</sup> Wani Apo Jesus, “Habaytoy habi ya nagilam yo ay impagilam ha ikakangêd yo, alwan ha ikakangêd ko.

<sup>31</sup> “Gawan nilumatêng ya pamanatol ni Apo Namalyari ha tawo ha luta. Alihêñ ya tungkulon ni Satanas, ya poon lan a ampagpalokop kan Apo Namalyari. <sup>32</sup> Haka hiko, uston itag-ay ako ha koros, haka mag-orong ha langit, ay ingalwan ko hilay tawo ha balang bansa ta êmên hila makarani kangko.” <sup>33</sup> Hinabi nay habayto ta êmên na ipamwang no ay-êmên yan matsi. <sup>34</sup> Hinabi lan naka-tsipon, ya wanla, “Namwangan naêñ ha Kahulatan ni Apo Namalyari, ya Mesias, ya Cristo, ya impangakon Mámiligas ay mabiyay hên ayn angga. No hika ay habaytoy Taga-Langit, ya In-anak Tawo, ay-êmên mon mahabi ya hika ay matsi ha koros? Hino ya Taga-Langit, ya In-anak Tawo?” <sup>35</sup> Wani Apo Jesus kanla, “Hiko ya maialimbawa ha hawang, ay a magbuyot

§ <sup>12:15</sup> anak ya babayi hên Sion ha habin Griego, Zacarias 9:9.

di kamoyu. Dapat manonol kaw ha intoro ko kamoyu kaban atsi ko pon di. Habayto ay nanad kaw hēn ampitan allo, ta êmēn a kaw mayabyan. No mita kaw hēn dēmm ay mitama kaw. <sup>36</sup> Kaban atsi ko pon di, ay maniwala kaw kangko ta êmēn kaw mag-in tawo ya nahawangan ya kaihipan.”

*Hilay Israelita, ay a naniwala ya hi Apo Jesus, ay hiyay Cristo*

Pamakahabi nan habayto, ay nammitta ya haka a yay na nagpahlēk kanla. <sup>37</sup> Agyan kal-atan ya kapapaépapah ya dinyag na ha arapan la, ay mal-at pon êt kanla ya a naniwala ya hiyay Cristo. <sup>38</sup> Nalyari ya habayto ta êmēn matupad ya impamwang ni Propeta Isaias, ya wana:

“Panginoon, ayn naniwala ha impamwang naén. Ayn naniwala agyan impahēlēk minay kapangyarihan mo kanla.”\*

<sup>39</sup> A hila malyarin maniwala, ta nanad êt ha hinabi ni Propeta Isaias, ya wana:

<sup>40</sup> “Binuwag ni Apo Namalyari ya ihip la, ta êmēn la a maintindihan, haka pinakdēy na êt ya nakēm la. Dinyag nay habayto ta êmēn hila a maghēhē hēn dumani kana, haka ta êmēn a na hila iumang kana.”†

<sup>41</sup> Hinabi nay habayto ni Propeta Isaias gawan impahalumata kana ya panga-Diyos ni Apo Jesus. Haka naghabi yan tungkol kana.

<sup>42</sup> Embayro man, ay mal-at kanlan ampamaala kanlan Israelita ya naniwala ya hi Apo Jesus, ay hiyay Cristo. Noa, gawan malimo hila kanlan Pariseo, ay a la impamwang kanlan kaatag, ta kayno bawalan hila hēn makilamo ha kapareho lan Israelita ha sinagoga. <sup>43</sup> Nalabayan la awud ya pamandayēw hēn tawo kanan pamandayēw ni Apo Namalyari.

*Ya impamwang ni Apo Jesus ay impahabi kana ni Apo Namalyari*

<sup>44</sup> Amēhēn, nanoro yay na êt hi Apo Jesus ha kal-atan. In-ikhaw nay pamaghabina, ya wana, “Hilay ampaniwala kangko, ay ampaniwala etaman kan Apo Namalyari ya namiutoh kangko. <sup>45</sup> Hilay nakahēlēk kangko ay nakahēlēk kan Apo Namalyari, ya namiutoh kangko. <sup>46</sup> Nilumatēng ako di ha luta hēn nanad ha hawang, ta êmēn hilay maniwala kangko ay ahina paidi ha kariglēman. <sup>47</sup> Hatolan hilay a naniwala ha nagilam lay habi ko, noa, alwan hiko ya manatol kanla, ta a ko nilumatēng di hēn parusaan ya hinoman. Noa, nilumatēng ako di ta êmēn iligtas hila. <sup>48</sup> Hilay ampangara kangko, haka a ampaniwala ha habi ko ay maparusaan. Ya habi ya impamwang ko ay mamarusa kanla ha anggaan hēn luta. <sup>49</sup> Ta a ko naghabi ha sarili kon tungkulon, noa, ya Tatang ko hi Apo Namalyari ya namiutoh kangko ay namihabi kangko no hinoy habiēn ko. <sup>50</sup> Muwang ko ya utoh na, ay mam-in biyay hēn ayn angga hēn kalamo na, ha ampaniwala kana. Kabay ya impahabi na kangko ay anhabiēn ko.”

## 13

*Inuyahan ni Apo Jesus ya bitsih lan tagahonol na*

<sup>1</sup> Nilumatēng ya yabi hēn bayo mag Pistan Pangaligtas. Muwang ni Apo Jesus ya nilumatēng ya panaon hēn pamag-alih na di ha luta, ta êmēn ya mag-orong kan Apo Namalyari, ya Tatang na. Anlugurēn na hilay tagahonol na, ya atsi di ha luta. Haka an-ipahlēk na, no ay-êmēn ya pamanlugud na kanla hēn angga ha anggaan.

<sup>2</sup> Kaban ampangan hi Apo Jesus hēn kalamo lan tagahonol na, ay naipaihip ni Satanas kan Judas, ya anak ni Simon, ya taga-Iscariote, ya ipulong na hi Apo Jesus. <sup>3</sup> Muwang nay na ni Apo Jesus ya in-ubuh hēn indin kana ni Apo

\* **12:38** Isaias 53:1. † **12:40** Isaias 6:10.

Namalyari, ya Tatang na, ya kaganawan kapangyarihan. Muwang na êt, ya ubat ya kan Apo Namalyari, haka mag-orong yay na kana. <sup>4</sup> Kabay haton ampangan hila ay nirêng ya hi Apo Jesus, ta nag-alih ya hên pangkêbel na, bayo pintêh na ya awak na hên makarang ya tuwalya. <sup>5</sup> Nanad andaygên lan ipoh, ay nangwa yan lanêm, ta indin na ha palanggana, haka na inuyahan ya bitsih lan tagahonol na. Bayo pinunihan na hên tuwalya ya nakaptêh ha awak na.

<sup>6</sup> Hêñ dinumani ya kan Pedro, ay wani Pedro, “Awkêh! Pata hika pon, Panginoon, ya manguyah hên bitsih ko?”

<sup>7</sup> Hinabi ni Apo Jesus, “A mo maintindihan amêhêñ, ya andaygên ko, noa, maintindihan mina lano.”

<sup>8</sup> Hinabi kana ni Pedro, “Panginoon, taganán a ko ipauyah ya bitsih ko kamo.” Amêhêñ, wani Apo Jesus, “No a kata uyahan, ay ayn kan pamakilamo kangko.”

<sup>9</sup> Kabay hinabi ni Pedro, “Panginoon, no êmbayro awud, ay alwan bêngat hên bitsih ko ya ipauyah ko kamo, noa, gamêt ko, haka ulo ko etaman.”

<sup>10</sup> Hinabi ni Apo Jesus, “No nagpalyuy nay mihay tawo, ay a nay nan kailangan hên magpalyu hên oman ta malinis yay na. Bitsih na tana ya uyahan na. Noa, main miha kamoyu ya alwan malinis.” <sup>11</sup> (Hinabi nay êmbayro ni Apo Jesus, ta muwang na no hino ya mangi-upit kana.)

<sup>12</sup> Hêñ nauyahan ni Apo Jesus ya bitsih la, ay inhulod nay na êt ya pangkêbel na. Nag-orong yay na ha panganan, ta kinotang na hila, no naintindihan la ya dinyag na kanla, ya wana, <sup>13</sup> “Aambaêgên yo ko hên Mánoro, haka Panginoon. Pêtêg ya anhabiên yo ta hikoy habayto. <sup>14</sup> No hiko, ya Panginoon yo, haka Mánoro yo, ya nanguyah hên bitsih yo, hikaw etaman êt ya kailangan manguyah hên bitsih hên miha ta miha. <sup>15</sup> Dinyanan kataw hên alimbawa ta êmén yo ko tuwarêñ. <sup>16</sup> Pakagilamên yo! Ya tungkulon hên mihay ipoh ay alwan matag-ay ha tungkulon hên amo na. Haka hatoy in-utoh, ay alwan matag-ay ya tungkulon ha nay-utoh kana. <sup>17</sup> No angkaintindihan yo, ya hata anhabiên ko kamoyu, ta daygên yo, ay ingalwan kaw ni Apo Namalyari.

<sup>18</sup> “Alwan kaganawan yo ya ingalwan, ta muwang koy nakêm hên pinili ko. Noa, kailangan matupad ya habi ha Kahulatan ni Apo Namalyari, ya wana, ‘Hikoy in-upit hên kaaêm ko.’\* <sup>19</sup> Anhabiên ko ya hatsi kamoyu, bayo ya malyari, ta êmén no malyari yay na, ay maniwala kaw ya ‘Hikoy Hiko taganá.’ <sup>20</sup> Pakagilamên yo. Hilay ampananggap ha in-utoh ko, ay hiko êt ya antanggapen la. Haka hilay ampananggap kangko, ay ampananggap ha namiutoh kangko.”

### *Inungkat ni Apo Jesus ya pami-upit kana*

(Mateo 26:20-25; Marcos 14:17-21; Lucas 22:21-23)

<sup>21</sup> Pangahabi nan habayto, ay namalagêhbêg ya nakêm na. Bayo wana kanla, “Pakagilamên yo! Miha kamoyu ya mangi-upit kangko.” <sup>22</sup> Amêhêñ, nihêhêlêk hila ya tagahonol na, ta a la muwang no hinoy an-ungkatêñ na.

<sup>23</sup> Ya tagahonol na, ya banhagan lan anlugarêñ ni Apo Jesus, ay atsi ha dani na. <sup>24</sup> Kabay siningyalan ya ni Simon Pedro, ya ikotang na, no hinoy an-ungkatêñ na ya may-upit kana. <sup>25</sup> Kabay dinumani ya kan Apo Jesus, hên indani nay ulo na ha pagaw na, ta wana, “Panginoon, hinoy may-upit kamo?”

<sup>26</sup> Hinabi ni Apo Jesus, “Ya dyanan ko hên puto ya ubat kon intsil-tsíl, ay hiya ya may-upit kangko.” Kabay nangwa yan puto, haka ubat nan intsil-tsíl, ay indin na kan Judas ya anak ni Simon Iscariote. <sup>27</sup> Hêñ kingwa ni Judas ya puto, ay hinuloran ya ni Satanas. Hinabi ni Apo Jesus kan Judas, “Daygên

\* **13:18** Awit 41:9.

mina ya labay mon daygén.” <sup>28</sup> Noa, miha man kanla ha kaaêm na, ay ayn nakamwang no awta nahabi nay habayto. <sup>29</sup> Gawan hi Judas, ya magkatalan hén pera la, êndat la no pinahaliw yan bêngat ni Apo Jesus hén kailangan la ha pista, o no in-utoh na ya hén mam-i hén pera ha mangairap. <sup>30</sup> Hén naêkan nay na ni Judas ya puto, ay nammita yay na. Nariglêm hén habayto.

### *Ya bayon utoh*

<sup>31</sup> Hén nammita yay na hi Judas, wani Apo Jesus, “Ya malyari laamêhén, kangkon Taga-Langit, ya In-anak Tawo, ay mamipahlék hén panga-Diyos ko, haka mam-in pamagpuri kan Apo Namalyari. <sup>32</sup> Haka no mapuri yay na hi Apo Namalyari gawan kangko, ay tampol nan ipahlék ya panga-Diyos ko. <sup>33</sup> Maanak ko, naipék tanay panaon hén makalamo yo ko. Tapolén yo ko, noa, anhabién ko kamoyu, hén nanad ha hinabi kina kanlan poon lan Israelita, ya a kaw makapakilako ha anlakwén ko. <sup>34</sup> Habaytsi ay mihay bayoy utoh ya anidin ko kamoyu. Milulugud kaw! No ay-êmén kataw hén anlugurén ay, êmén êt bayro ya pamilulugud yo. <sup>35</sup> No ampilulugud kaw, ay mamwangan hén kal-atan, ya hikaw ay tagahonol ko.”

### *Impamwang ni Apo Jesus ya habiên ni Simon Pedro ya a na ya muwang (Mateo 26:31-35; Marcos 14:27-31; Lucas 22:31-34)*

<sup>36</sup> Amêhén, wani Simon Pedro kan Apo Jesus, “Apo, antoy lakwén mo?” Kabay wani Apo Jesus, “Ha anlakwén ko, a ka pon makapakilako amêhén, noa, humonol ka tana lano.” <sup>37</sup> Wanay na êt ni Pedro, “Panginoon, pata a ko pon makapakihonol kamo amêhén? Nakal-an akon matsu ha ikangéed mo.” <sup>38</sup> Wani Apo Jesus, “Yarin nakal-an ka hén matsu ha ikangéed ko! Pakagilamén mo. Bayo mangkatsi ya manok, ay katatlo mon habiên, ya a mo ko muwang.”

## 14

### *Hi Apo Jesus ya dann ya palako ha Tatang na ha langit*

<sup>1</sup> Wanay na êt ni Apo Jesus, “Paan kaw mampotog. Ihundo yoy paniwala yo kan Apo Namalyari haka maniwala kaw etaman kangko. <sup>2</sup> Ha langit ha ampaidyanan hén Tatang ko, ay mal-at ya paidyanan. No alwan pêtêg ya habayto, ay yarin habiên koy êmbayro? Muna kina bayro, ta il-an koy paidyanan yo. <sup>3</sup> No atsi kina bayro, haka no nail-an kina ya paidyanan yo, ay mag-orong kina, ta gêtan kataw bayro ha ampaidyanan ko. <sup>4</sup> Muwang yoy na bayto, ya dann ya palako do ha anlakwén ko.” <sup>5</sup> Amêhén, hinabi kana ni Tomas, “Panginoon, a naén muwang ya lakwén mo, ay-êmén naén mamwangan ya dann?” <sup>6</sup> Kabay hinabi ni Apo Jesus, “Hiko ya dann ya palako kan Apo Namalyari, ya Tatang ha langit. Hiko ya ampamipamwang hén kaptégan ya tungkol kana, haka hiko ya ampam-in biyay ya ayn angga. Ayn midani kana, no a ya magdann kangko. <sup>7</sup> No muwang yo no hino kon taganá, ay kilala yo etaman ya Tatang ko. Paubat amêhén, ay kilala yo yay na, haka nanad nahélék yo yay na.”

<sup>8</sup> Amêhén, hinabi kana ni Felipe, “Panginoon, ipahlék mo kannaén ya Tatang mo. Bayo ayn kay kaatag ya tapolén.” <sup>9</sup> Kabay wani Apo Jesus, “Felipe, nabuyot yo kinan kalamo. Angga amêhén, ay a mo ko pon kilala? No nahélék yo ko, ay nahélék yoy nay Tatang ko. Pata hinabi mo ya ipahlék ko kamo ya Tatang ko? <sup>10</sup> Yarin a ka ampaniwala, ya mimiha kay ni Tatang? Hiko ay atsi kana, haka hiya ay atsi kangko. Ya anhabién ko, ay angkaubat kana alwan ha sarili ko. Êmbayro etaman ya kaganawan dyag ko, ay angkaubat kana. <sup>11</sup> Maniwala kaw ha hinabi ko ya atsi ko ha Tatang ko, haka ya Tatang ko ay atsi kangko. No a kaw maniwala ha anhabién ko, maniwala kaw tana,

gawan ha kapapaêpapah ya andaygên ko. <sup>12</sup> Anhabiên ko kamoyu, ya hinon ampanlugud kangko, ay makadyag etaman hên andaygên ko, haka mal-at pon di, ta mag-orong kina ha Tatang ko. <sup>13</sup> Ya hinon pakikwaan yo kan Tatang, gawan ha pakikimiha yo kangko, ay daygên ko ta êmên mapuri hi Tatang, gawan kangko, ya Anak. <sup>14</sup> Ya hinon pakikwaan yo kangko gawan ha pakikimiha yo kangko, ay daygên ko.”

*Impangako ni Apo Jesus ya dyanan hila hên Espiritu ni Apo Namalyari*

<sup>15</sup> “No anlugarûn yo ko, tuparêñ yoy an-iutoh ko kamoyu. <sup>16</sup> Haka maki-dawat ako kan Apo Namalyari, ya Tatang ko, ya dyanan na kaw hên miha pon ya Kahawop yo, ya makalamo yo hên ayn angga. <sup>17</sup> Yabay ya Espiritu ni Apo Namalyari ya an-ipamwang hên kaptégan. Hiya ay a matanggap lan a ampagpalokop kan Apo Namalyari, gawan a la ya angkahêlêk, haka a la ya angkabalayan. Noa, balay yo ya, ta atsi ya kamoyu, haka lumatêng ya allo, ay humapat ya kamoyu.

<sup>18</sup> “A kataw ibalag hên nanad ha olila ta mag-orong ako kamoyu. <sup>19</sup> A mabuyot ay, a la kina mahêlêk lan a ampagpalokop kan Apo Namalyari. Noa, hikaw, ay mahêlêk yo ko. Gawan mabiyay kon oman, ay mabiyay kaw etaman. <sup>20</sup> Kanan habayto, ay mamwangan yo ya hiko, ay main pakikimiha ha Tatang ko, haka hikaw etaman ay main pakikimiha kangko, haka hiko ay main pakikimiha kamoyu.

<sup>21</sup> “Hilay ampanggilam haka ampanupad hên utoh ko, ay ampanlugud kangko. Hilay ampanlugud kangko, ay lugurûn hên Tatang ko. Lugurûn ko hila êt, haka ipamwang ko kanla, ya tungkol kangko.” <sup>22</sup> Kabay hinabi ni Judas (alwan Judas Iscariote), “Panginoon, awta kannaêñ kan bêngat magpabalay? Awta a mo ipamwang ya tungkol kamo kanlan kaganawan tawo ha luta?” <sup>23</sup> Naghabi hi Apo Jesus, “Hilay ampanlugud kangko, ay manyag hên anhabiên ko. Lugurûn hila hên Tatang ko, haka humapat kay kanla. <sup>24</sup> Hilay a ampanlugud kangko, ay a hila etaman manyag hên anhabiên ko. Ya anhabiên ko kamoyu, ay angkaubat kan Apo Namalyari, ya Tatang ko, ya nay-utoh kangko.”

<sup>25</sup> “Habaytoy hinabi kina kamoyu kaban kalamo yo ko pon. <sup>26</sup> Noa, lano, ay mamiutoh hi Apo Namalyari, ya Tatang ko, hên Espiritu na, ya mag-in Kahawop yo. Hiyay mamihundo hên panoro ko kamoyu hên kaganawan, haka hiya ya maypaihip kamoyu hên kaganawan intoro ko kamoyu.”

<sup>27</sup> “Paan kaw manyagah. Paan kaw malimo. Ta patêkbêkêñ koy ihip yo. Ya kapatêkbêkan ya an-idin ko kamoyu, ay pêtêg ya kapatêkbêkan. Habayto ay alwan nanad ha kapatêkbêkan ya an-ungkatêñ lan tawo di ha luta. <sup>28</sup> Nagilam yoy hinabi ko kamoyu ya hikoy mag-alíh. Haka mag-orong ako kamoyu. No anlugarûn yo ko dayi, ay ikahigla yo dayi ya pag-orong ko kan Apo Namalyari, ya Tatang ko, ta daêg na ko gawan ya tungkulon na ay mata-gay ha tungkulon ko. <sup>29</sup> Anhabiên kina kamoyu ya hatsi bayo malyari, ta êmên no malyari ya, ay maniwala kaw, ya pêtêg ya hinabi ko. <sup>30</sup> A kina pakakarangêñ ya pamaghabi ko kamoyu, ta anlumatêng hi Satanas, ya poon lan a ampagpalokop kan Apo Namalyari. Ayn yan kapangyarihan kangko. <sup>31</sup> Êmbayro man, ta êmên mamwangan hên balang miha, ya anlugarûn ko ya Tatang ko, hi Apo Namalyari, ay andaygên ko ya hatoy an-iutoh na kangko. Hali awud, mita kitamina.”

## 15

*In-alimbawa ni Apo Jesus ya sarili na ha mihay poon ubas*

<sup>1</sup> Kaban ampammita hila, ay wani Apo Jesus kanlan tagahonol na, “Hiko ya mantêg hên poon ubas, haka ya Tatang ko, hi Apo Namalyari, ya ampanayhay hên ubasan. <sup>2</sup> Ampotohêna hilay hanga ko ya ayn tagêy, haka anlinisan na hilay hanga ya main tagêy, ta êmén lalo hilan managêy. <sup>3</sup> Nilinisan kaw na gawan ha paniwala yo ha hinabi ko kamoyu. <sup>4</sup> Ihundo yoy pakikimiha yo kangko, haka hiko man, ay ihundo koy pakikimiha ko kamoyu. A ya managêy ya hanga hên ubas, no a ya nakatumpang ha poon. Êmbayro êt kamoyu, no a yo ihundo ya pakikimiha yo kangko.”

<sup>5</sup> Bayo inoman nan inungkat ya alimbawa na, ya wana, “Hiko ya poon hên ubas haka hikaw ya hanga. Hilay ampamihundo hên pakikimiha la kangko, ta êmén ako etaman magkamain pakikimiha kanla, ay hilay nanad ha hanga ya managêy hên bapan lakê, gawan ayn kaw madyag, no hikaw ay nakapapawa kangko. <sup>6</sup> Hilay a ampamihundo hên pakikimiha la kangko, ay nanad hilan hanga ya itapon. No mayango ya êmbayroy hanga, ay tsiponêh hila tana, ta ulamên. <sup>7</sup> Noa, no ihundo yo ya pakikimiha yo kangko, haka no maglaêh ha nakêm yo ya habi ko, ay pakikwaan yo ya hinoman ya labay yo kan Apo Namalyari, ta idin na kamoyu. <sup>8</sup> Angkapuri ya Tatang ko no hikaw ay ampanagêy hên bapan lakê, haka angkapaptêgan hên hikaw ay tagahonol ko. <sup>9</sup> No ay-êmén ya pamanlugud na kangko hên Tatang ko, ay êmbayro êt ya pamanlugud ko kamoyu. Ihundo yoy pakikimiha yo kangko, ta ha êmbayro ay panay yon mapakinabangnan ya pamanlugud ko. <sup>10</sup> No anhonolên yoy utoh ko, ay mapakinabangnan yoy pamanlugud ko kamoyu. Nanad kangko, anhonolên ko êt ya kaganawan utoh ni Apo Namalyari, ya Tatang ko, haka panay kon pakinabangnan ya pamanlugud na.”

<sup>11</sup> “Hinabi koy habayto kamoyu, ta êmén kaw milamo ha hadyay kahiglaan ko. <sup>12</sup> Habaytsi ya utoh ko kamoyu ya milulugud kaw hên nanad hên pamanlugud ko kamoyu. <sup>13</sup> Ayn pamanlugud ya igit ha pamanlugud hên mihay lalaki, ya ihalanggo nay biyay na kanlan kaluguran na. <sup>14</sup> Hikaw ay kaluguran ko, no anhonolên yoy an-iutoh ko. <sup>15</sup> A kataw nan baêgên tagahuyo, ta a na muwang hên tagahuyo, ya andaygên hên amo na. Noa, binaêg kataw hên kaluguran ko, ta hinabi kina kamoyu ya kaganawan ya nagilam ko kan Apo Namalyari, ya Tatang ko. <sup>16</sup> Alwan hikaw ya namili kangko, ta hiko ya namili kamoyu. In-utoh kataw hên maypamwang hên habi ni Apo Namalyari, ya Tatang ko, ta êmén mal-at ya maniwala, haka hilay nanad ayn anggay tagêy hên paniwala yo. Ta no daygên yoy habayto, ay idin na kamoyu ya hinon pakikwaan yo, gawan ha pakikimiha yo kangko. <sup>17</sup> Habaytsi ya an-ioman kon iutoh kamoyu, ya milulugud kaw.”\*

### *Angkahêmêkan hilay anhumonol kan Apo Jesus*

<sup>18</sup> Wanay na êt ni Apo Jesus, “No angkahêmêkan la kaw lan a ampagpalokop kan Apo Namalyari, ay ihipênyo ya bayo la kaw kinahêmêkan, hiko pon ya kinahêmêkan la. <sup>19</sup> No alimbawa ta tuwarênyoy ugali la, ay lugurêna kaw. Noa, a yo hila antuwarêna, ta pinili kataw na hên mag-in tagahonol ko. Kabay angkahêmêkan la kaw. <sup>20</sup> Paka-ihipênyo ya hinabi ko kamoyu, ya tungkulan hên mihay ipoh ay alwan matag-ay ha tungkulan hên amo na.<sup>†</sup> Pinairapan la ko, haka pairapan la kaw. No hinonol lay hinabi ko, ay honolên lay panhabiên yo. <sup>21</sup> Daygên lay hatsi kamoyu gawan ha pakikimiha yo kangko ta a la kilala hi Apo Namalyari, ya nay-utoh kangko. <sup>22</sup> No a ko dayi nilumatêng di ha luta hên nanoro kanla, ay mahabi la ya a la muwang ya kasalanaw awud ya andaygên la. Noa, amêhêna, a lay na mahabi ya a la muwang ya

\* <sup>15:17</sup> Juan 15:12. † <sup>15:20</sup> 13:16.

kasalanan ya andaygén la, ta tinoroan ko hilay na. <sup>23</sup> Hilay anhumêmék kangko, ay anhumêmék etaman kan Apo Namalyari, ya Tatang ko. <sup>24</sup> Nanyag akon kapapaépapah ha arapan la, ya a pon nadyag hén hinoman, kabay a lay na mahabi ya alwan kasalanan, ya hila ay a ampaniwala kangko. Nahélék la man ya kaganawan dinyag ko, ay angkahémékan la ko, haka angkahémékan la hi Apo Namalyari, ya Tatang ko. <sup>25</sup> Noa, êmén din taganá, gawan natupad ya impahulat ni Apo Namalyari ha Kahulatan na, ya wana, ‘Bat la kon kinahémékan.’”‡

<sup>26</sup> Hinabi na êt ni Apo Jesus, ya wana, “Lumatêng ya allo, ay iutoh ko kamoyu ya Kahawop yo, ya Espiritu hén kaptégan, ya ubat kan Apo Namalyari, ya Tatang ko. Hiya ya mamaptég hén tungkol kangko. <sup>27</sup> Hikaw êt ya mamaptég ha kaganawan dinyag ko, ta paubat hén una, ay kalamo kataw na.”

## 16

<sup>1</sup> Hinabi nay na êt ni Apo Jesus, ya wana, “Mana kinan hinabi ya habayto kamoyu, ta êmén yo ihundo ya paniwala yo kangko. <sup>2</sup> Paalihén la kaw ha sinagoga yo. Lumatêng ya panaon ay main mamatsi kamoyu, ta êndat la no ampaghuyu hila kan Apo Namalyari no patsén la kaw. <sup>3</sup> Daygén lay habayto ta a la nabalayan hi Apo Namalyari, ya Tatang ko, haka a la ko nabalayan. <sup>4</sup> Mana kinan anhabién ya habayto kamoyu, ta no lumatêng ya allo, ya daygén lay habayto kamoyu, maihipan yo ya nagilam yo kangko.”

### *Ya Espiritu ni Apo Namalyari ya maypalinaw hén in-toro ni Apo Jesu-Cristo*

Hinabi nay na êt ni Apo Jesus, ya wana, “A ko pon hinabi ya habaytsi kamoyu, ta kalamo yo ko pon. <sup>5</sup> Noa, habiên kina, ta mag-orong kina kan Apo Namalyari, ya Tatang ko, ya nay-utoh kangko. Ayn man kamoyu hén ampangotang kangko no antoy lakwén ko. <sup>6</sup> Noa, hadyay lungkot yo tana gawan hinabi kina kamoyu ya habayto. <sup>7</sup> Embayro man, ay dapat yon mamwangan ya kaptégan. Ya pamag-alíh ko, ay ha ikakangéd yo, ta a ya lumatêng di kamoyu ya Espiritu ni Apo Namalyari, ya Kahawop yo, no a ko mag-alíh. No atsi kina bayro kan Apo Namalyari ay iutoh ko yay na kamoyu. <sup>8</sup> Ha pamanlumatêng na, ay ipaihip na kanlan a ampagpalokop kan Apo Namalyari, ya alwan usto ya an-ihipén la tungkol ha kasalanan, haka tungkol ha katoynungan, haka tungkol ha pamanatol ni Apo Namalyari. <sup>9</sup> Mamwangan la ya makasalanan hila, gawan a hila naniwala ya hikoy Anak na. <sup>10</sup> Mamwangan la ya hikoy makatoynungan, ta mag-orong kina kana, ya Tatang ko. Bayo a yo kinan mahélék. <sup>11</sup> Mamwangan la ya lingonén hilan parusaan, gawan hinatolan yay na hén parusaan hi Satanas, ya poon lan a ampagpalokop kan Apo Namalyari.”

<sup>12</sup> “Mal-at pon dayi ya habiên ko kamoyu. Noa, a pon agyu hén ihip yo améhén. <sup>13</sup> Panlumatêng hén Espiritu ni Apo Namalyari, ya ubatan hén kaganawan kaptégan, ipamwang na kamoyu ya boon kaptégan, ta a ya mag-habi ha sarili nan ihip, noa, ya habiên nan bengat, ay hatoy nagilam na kan Apo Namalyari. Haka ipamwang na êt kamoyu ya a pon nalyari. <sup>14</sup> Ipahlék na ya panga-Diyos ko, haka ipamwang na kamoyu ya laman ihip ko. <sup>15</sup> Ya laman ihip ni Apo Namalyari, ya Tatang ko, ay habayto êt ya laman ihip ko, kabay hinabi ko ya laman ihip ko, ya ipamwang na kamoyu.”

### *Ya kalungkutan ay hagilyan hén kahiglaan*

<sup>16</sup> Hinabi nay na êt ni Apo Jesus kanlan tagahonol na, ya wana, “A mabuyot, ay a yo kina mahélék. Bayo, a mabuyot, mahélék yo kon oman.”

‡ **15:25** Awit 35:19 haka Awit 69:4.

<sup>17</sup> Nihahabi hilay nay tagahonol na, ya wanla, “Hino raw ya labay nan habiēn? Pata hinabi nay a mabuyot, ay a tamo yay nan mahēlēk, bayo a mabuyot, ay mahēlēk tamo yay na êt. Haka wana êt ya, lakwēn na hi Apo Namalyari, ya Tatang na. <sup>18</sup> Hinoy labay habiēn, hēn hinabi na ya a mabuyot? A tamo muwang no hino ya labay nan habiēn.”

<sup>19</sup> Namwangan ni Apo Jesus ya labay lan kotangēn, kabay hinabi nay na kanla, ya wana, “Ampangotang kaw ha hinabi ko ya a mabuyot ay a yo kinan mahēlēk, bayo a mabuyot ay mahēlēk yo kina êt. <sup>20</sup> Pakagilamēn yo. Manangih kaw haka manyēngēn kaw. Noa, hilay a ampagpalokop kan Apo Namalyari ay humigla. Hikaw ay maglungkot pon, noa, ya kalungkutan yo ay hagilyan hēn kahiglaan.

<sup>21</sup> “Habayto ay nanad ha mihay babayi, no angkatanam nay na ya manganak ya, ay ampaglungkot ya pon, ta nilumatēng ya oras hēn kairapan na. Noa, no na-ianak nay na, ay a nay nan maihipan ya kairapan, gawan kahiglaan na ha anak na. <sup>22</sup> Émēn kaw êt bayro. Ampaglungkot kaw amēhēn, bayo no mahēlēk yo kon oman, ay humigla kaw hēn taganá. Ya kahiglaan yo ay a maayu hēn hinoman.”

<sup>23</sup> “A yoy nan kailangan hēn mangotáng hēn hinoman kangko ha alloy habayto. Pakagilamēn yo, ya hinoman ya pakikwaan yo kan Apo Namalyari, ya Tatang ko, ay idin na gawan ha pakikimiha yo kangko. <sup>24</sup> Angga amēhēn, ay ayn kaw pon pinakikwaan kana gawan ha pakikimiha yo kangko. Noa, amēhēn, ay panay kaw dayi hēn kikwa, ta dyanan na kaw, ta émēn kaw magkamain hēn hadyay kahiglaan.”

### *Hinambut ni Apo Jesus ya nangarawak*

<sup>25</sup> Inhundo ni Apo Jesus ya pamaghabi na, ya wana, “Habaytoy hinabi ko kamoyu hēn paalimbawa. Noa, lumatēng ya panaon, ay a kinan maghabi kamoyu hēn paalimbawa, ta ipakapuliah kinan habiēn kamoyu ya tungkol kan Apo Namalyari, ya Tatang ko. <sup>26</sup> Ha alloy habayto, ay makikwa kaw kana, gawan ha pakikimiha yo kangko. A ko anhabiēn kamoyu ya pakikwa kataw hēn hinoman kana, <sup>27</sup> gawan hiyan taganá ya ampanlugud kamoyu. Anlugurēn na kaw gawan anlugurēn yo ko haka ampaniwala kaw ya hiko ay ubat kana. <sup>28</sup> Hiya ya ubatan ko hēn nilumatēng ako di ha luta. Haka magorong kina kana.” <sup>29</sup> Hēn nagilam lay habayto hēn hilay tagahonol na, ay wanla, “Awo, Panginoon. Amēhēn, angkaintindihan naēn ya anhabiēn mo, ta impakapuliah mina. Alway nan paalimbawa ya anhabiēn mo. <sup>30</sup> Amēhēn, ay muwang naēn ya muwang moy balang hino. Muwang moy kotang ya atsi ha ihip hēn balang tawo. Kabay ampaniwala kay, ya hika ay ubat kan Apo Namalyari.” <sup>31</sup> Wani Apo Jesus, “Awo, ampaniwala kaw na amēhēn. <sup>32</sup> Noa, ihipēn yoy habaytsi. Marani yanay oras ya mapitatayak kaw. Ibalag yo ko, ta muli kaw ha bali yo. Émbayro man, kalamo ko hi Apo Namalyari, ya Tatang ko. <sup>33</sup> Hinabi kina kamoyu ya habayto, ta êmēn kaw magkamain kapatékbēkan hēn ihip gawan ha pakikimiha yo kangko. Émbayro man, ay main kaw pon hēn kairapan di ha luta. Noa, pakataniêhēn yoy nakēm yo, ta hinambut kinay nangarawak di ha luta.”

## 17

### *Nanalangin hi Apo Jesus*

<sup>1</sup> Hēn nahabi nay na ni Apo Jesus, ya habayto, ay naningla ya ha langit ta wana, “Tatang, nilumatēng ya oras. Ipahlēk minay panga-Diyos ko, ya Anak mo, ta êmēn ko ipahlēk ya panga-Diyos mo etaman. <sup>2</sup> Ta indin mo kangko

ya tungkulan hēn mamaala ha balang miha, ta êmēn hila dyanan biyay ya ayn angga ya impatsiwala mo kangko. <sup>3</sup> Habaytsi ya biyay ya ayn angga, ya makilala la ka, ya kamiha-mihaan Diyos, haka mamwangan la ko, hi Apo Jesu-Cristo ya in-utoh mo. <sup>4</sup> Impahlék koy panga-Diyos mo di ha luta ta nayari kina ya impadyag mo kangko. <sup>5</sup> Amêhēn, Tatang, ha arapan mo, ay ipahlék mo dayi ya panga-Diyos ko, ya atsi kangko hēn kalamo kata haton bayo êt dinyag ya hata luta.

<sup>6</sup> “Impabalay kata kanlan impatsiwala mo kangko, ya hilay pinili mo ha kal-atan tawo ha luta. Kamo hila, bayo impatsiwala mo hila kangko. Hinonol la etaman ya in-utoh mo kanla. <sup>7</sup> Amêhēn muwang lay na ya hika ya ubatan hēn kaganawan ya dinyag haka hinabi ko. <sup>8</sup> Gawan ginilam la ya intoro kina kanla, ya namwangan ko kamo, haka taganán muwang la, ya hiko ay ubat kamo, haka ampaniwala hila, ya hika ya namiutoh kangko.

<sup>9</sup> “Hila ya an-ihalangin ko. A ko an-ihalangin hilay a ampagpalokop kamo. Noa, an-ihalangin ko hilay impatsiwala mo kangko, ta kamo hila. <sup>10</sup> Ya hinoman ya atsi kangko, ay kamo, haka ya hinoman ya atsi kamo, ay kangko. Angkahélék ya panga-Diyos ko gawan ha paniwala la kangko. <sup>11</sup> Mag-alih kina di ha luta, ta mag-orong kina kamo. Noa, atsi hila pon di ha luta. Tatang koy banal, illagan mo hilay impatsiwala mo kangko ha kapangyarihan mo, ta êmēn mag-in mimihay nakêm la, hēn nanad nakêm mo haka nakêm ko, ya mimiha. <sup>12</sup> Kaban kalamo la ko, di ha luta, ay inillagan ko hila gawan ha kapangyarihan mo, haka ayn kanla ya nidayo kangko, no alwan bêngat hatoy miha ya manan tinalagá ya midayo ya, haka milako ha kaparusaan, ta êmēn matupad ya nakahulat ha Kahulatan mo.\* <sup>13</sup> Marani ya pamag-orong ko kamo. Kabay ipagilam ko kanla ya hatsi, ya an-ihalangin ko kamo, kaban atsi ko pon di ha luta, ta êmēn hila magkamain hēn hadyay kahiglaan, hēn nanad ha kahiglaan ko. <sup>14</sup> Naidin kina kanla ya habi mo, bayo kinahémékan hila hēn a ampaniwala, ya hiko ay ubat kamo. Kinahémékan hila, gawan ayn hilan pamakilamo kanlan a ampaniwala kangko, hēn nanad kangko ya ayn pamakilamo kanlan a ampagpalokop kan Apo Namalyari. <sup>15</sup> A ko an-ihalangin ya alihén mo hila di ha luta, noa, an-ihalangin ko ya illagan mo hila kan Satanas. <sup>16</sup> Ayn hilan pamakilamo kanlan a ampaniwala kangko, hēn nanad kangko ya ayn pamakilamo kanlan a ampagpalokop kan Apo Namalyari. <sup>17</sup> Ha pamanggilam lan habi mo ya kaptégan ay ipapawa mo hila hēn manyag kalabayan mo. <sup>18</sup> No ay-êmēn ya pay-utoh mo kangko kanlan a ampaniwala kamo, êmēn êt bayro ya pay-utoh ko kanla, ta êmēn hila manoro kanlan a ampaniwala kamo. <sup>19</sup> An-itagalá koy sarili ko hēn manyag kalabayan mo, ta êmēn hila etaman ay mitalagá hēn manyag kalabayan mo.

<sup>20</sup> “Alwan bêngat hilay habaytsi ya tagahonol ko ya an-ihalangin ko kamo, noa, hato êt ya maniwala kangko gawan ha an-itoro la. <sup>21</sup> Tatang, an-ihalangin ko hilangan ta êmēn mag-in mimihay nakêm la, hēn nanad ha nakêm mo haka nakêm ko ya mimiha. Atsi hila dayi kantamo hēn nanad atsi ka kangko, haka nanad atsi ko kamo, ta êmēn hilay tawo ha luta ay maniwala ya hika ya nay-utoh kangko. <sup>22</sup> No ay-êmēn mo kon dinyanan karangalan, ay êmbayro êt ya dinyanan ko hilan karangalan, ta êmēn mag-in mimihay nakêm la, hēn nanad ha nakêm mo haka nakêm ko ya mimiha. <sup>23</sup> Hiko ay atsi kanla, haka hika ay atsi kangko, ta êmēn mag-in ayn pamakulang ya pagmimihia la. Haka, ta êmēn mamwangan lan a ampaniwala kamo, ya hika ya nay-utoh kangko. Haka, ta êmēn la mamwangan ya anlugurên mo hila, ya nanad ha pamanlugud mo kangko.

\* **17:12** Awit 41:9.

<sup>24</sup> “Tatang ko, labay kon makalamo ko hilay impatsiwala mo kangko ha langit, ta êmén la mahêlêk ya kapahilêw ya kahampatan hên panga-Diyos ko, ya indin mo kangko gawan ha pamanlugud mo kangko paubat hên a pon dinyag ya hata luta. <sup>25</sup> O Tatang ko, ya makatoynungan, a la ka kilala lan a ampagpalokop kamo. Noa, hiko, ay kilala kata, haka habaytsi hilay tagahonol ko, ay muwang la, ya hika ya nay-utoh kangko. <sup>26</sup> Impakilala kata kanla haka ihundo katan ipakilala kanla, ta êmén hila milulugud, hên nanad ha pamanlugud mo kangko ta êmén hikoy magpайдi kanla.”

## 18

### *Ya pamandakêp kan Apo Jesus*

(Mateo 26:47; Marcos 14:43-50; Lucas 22:47-53)

<sup>1</sup> Hêñ naihalangin ni Apo Jesus ya habayto, ay nammita yay na hêñ kalamo nay tagahonol na hêñ palako ha lipay hêñ hapa ya nag langan Cedron. Bayro ha lipay, ya nilako lan Apo Jesus, ay mal-at ya intanêm ya poon olibo.

<sup>2</sup> Amêhêñ, hi Judas Iscariote, ya may-upit kan Apo Jesus, ay muwang na ya habaytoy logal, ya panay lan anlakwêñ lan Apo Jesus. <sup>3</sup> Bayro na hilan nilako ni Judas hêñ kalamo nay ungno kanlan ampagbantay ha Templo haka mihay pangkat hêñ hundaloh, ya impalako bayro hêñ ampamaala kanlan pari haka hilay Pariseo. Ampantan hila hêñ pag-atâng haka almas. <sup>4</sup> Gawan muwang na ngan ni Apo Jesus ya malyari kana ay tinupa na hila haka na hinabi kanla, ya wana, “Hinoy antapolêñ yo?”

<sup>5</sup> Kabay wanla, “Antapolêñ naêñ hi Jesus, ya taga-Nazaret.” Bayo hinabi ni Apo Jesus, “Hikoy habayto.” Kalamo lan hundaloh hi Judas, ya nay-upit kan Apo Jesus. <sup>6</sup> Pamakahabi ni Apo Jesus ya hiyay habaytoy antapolêñ la, ay nipaorong hila haka hila nipatumba ha luta.

<sup>7</sup> Kabay nangoman yan nangotang hi Apo Jesus, ya wana, “Hino ya antapolêñ yo?”

Hinabi la, ya wanla, “Hi Jesus ya taga-Nazaret.”

<sup>8</sup> Amêhêñ, wani Apo Jesus, “Hinabi kina kamoyu, ya hiko yan makê. No hiko ya antapolêñ yo, ay paulayan yo hilay tagahonol ko.” <sup>9</sup> Hinabi nay habayto ta êmén matupad ya hinabi na, ya ayn miha man kanlan impatsiwala kana, ya midayo kana hêñ mipalako ha kaparusaan.

<sup>10</sup> Biglan inanoh ni Simon Pedro ya êetak na, ta tsinigpah nay têkk\* ni Malco, ya mihay ipoh hêñ pinakapoon pari. <sup>11</sup> Wani Apo Jesus kan Pedro, “Igoma moy êetak mo, ta kailangan kon têehêñ ya kairapan, ta habaytsi ay kalabayan ni Apo Namalyari, ya Tatang ko.”

### *Hi Apo Jesus ay in-arap kan Anas ya manan pinakapoon pari*

<sup>12</sup> Dinakêp hi Apo Jesus, ta ginapoh ya gamêt na, hêñ hilay hundaloh hêñ kalamo lay kapitan la haka hilay Israelita ya tanod hêñ Templo. <sup>13</sup> Hiyay gintan pon kan Anas, ya ampo ni Caifas. Habaytsi hi Caifas ay pinakapoon pari hêñ panaon hêñ habayto. <sup>14</sup> Hi Caifas ya naghabi kanlan kapareho nan poon lan Israelita ha Templo, ya mangêd ay miha tana ya matsi para ha kalan†.

### *Hinabi ni Pedro ya a na balay hi Apo Jesus*

(Mateo 26:57-58, 69-75; Marcos 14:53-54, 66-72; Lucas 22:55-57)

<sup>15</sup> Hi Simon Pedro, haka miha pon ya tagahonol ni Apo Jesus ay hinumonol kanlan Apo Jesus. Gawan kilala yan pinakapoon pari ya hatoy miha, ay nakahowêñ ya ha bakod hêñ lote hêñ pinakapoon pari hêñ kalamo lan Apo

\* **18:10** Tsinigpah ya panabtab ya têkk ni Malco. † **18:14** Juan 11:49-52.

Jesus. <sup>16</sup> Nabalag hi Pedro ha danin kabat hēn bakod. Immawah ya hatoy mihay tagahonol, ya kabalay hēn pinakapoon pari, ta kinahabi nay babayi ya ampagbantay ha kabat hēn bakod, haka na pinahowēn hi Pedro. <sup>17</sup> Kinotang nan hatoy babayi kan Pedro, ya wana, “Miha ka ha tagahonol nan habaytoy dinakēp?” Kabay wani Pedro, “Alwa.” <sup>18</sup> Gawan nakēbēl hēn habayto, namagkēt hēn uling hilay ipoh, haka hilay tanod, bayo nanēngēy hila. Hi Pedro ay kalamo lan nakairēng hēn ampanēngēy.

*Hi Apo Jesus ay kinotang ni Anas  
(Mateo 26:59-66; Marcos 14:55-64; Lucas 22:66-71)*

<sup>19</sup> Hi Apo Jesus ay kinotang ni Anas, ya pasado ya pinakapoon pari, hēn tungkol ha tagahonol na, haka tungkol ha panoro na. <sup>20</sup> Hinabi ni Apo Jesus, ya wana, “Hikoy nanoro ha arapan lan kal-atan. Hikoy panay hēn nanoro ha sinagoga haka ha Templo ya pagtsiponan hēn Israelita. Ayn akon hinabi hēn patago. <sup>21</sup> Pata hiko ya kotangēn mo? Ya kotangēn mo dayi ay hatoy nanggilam hēn habi ko, ta muwang la no hinoy hinabi ko kanla.” <sup>22</sup> Hēn pangahabi ni Apo Jesus hēn habayto, ay tsinampaling ya hēn hatoy mihay bantay ya atsi bayro, ya wana, “Pata êmbayro ya hinabi mo ha pinakapoon pari?” <sup>23</sup> Wana etaman ni Apo Jesus, “No naghabi kon alwan mangēd, paptēgan mo. No mangēd ya hinabi ko, awta tsinampaling mo ko?” <sup>24</sup> Amêhēn, hi Apo Jesus ay impagtan ni Anas kan Caifas, ya pinakapoon pari hēn habayto. Nakagapoh pon ya gamēt na.

*Hinabi nay nan oman ni Pedro ya a na muwang hi Apo Jesus  
(Mateo 26:71-75; Marcos 14:69-72; Lucas 22:58-62)*

<sup>25</sup> Kaban atsi ya pon bayro hi Simon Pedro hēn ampanēngēy, ay kinotang la yan oman, ya wanla, “Alwan hika ya mihay tagahonol hēn tawoy hato?” Impuglaoh ni Pedro, ya wana, “Alwa.” <sup>26</sup> Atsi bayro ya mihay kamag-anak hēn ipoh ya tsinigpahan ni Pedro hēn tēkk. Miha ya etaman kanlan ipoh hēn pinakapoon pari. Kinotang na kan Pedro, ya wana, “Alwan hika ya nahēlēk ko hēn kalamo ni Jesus do ha mal-at ya poon olibo?” Hinabi ni Pedro, ya wana, “Alwa.” <sup>27</sup> Nahēn minghan nay na êt impuglaoh ni Pedro, ya a na muwang hi Apo Jesus, ay nangkatsi ya mihay manok.

*Hi Apo Jesus ay in-arap kan Gobernador Pilato  
(Mateo 27:1-2, 11-14; Marcos 15:1-5; Lucas 23:1-5)*

<sup>28</sup> Hēn nayari lay nan kinotang hi Apo Jesus ha bali ni Caifas, ay gintan la yay na ha bali ni Gobernador Pilato, ya taga-Roma. Dali allo hēn habayto. Hilay Israelita ay a hinumwēn‡ ha bali na ta marani yanay Pistan Pangaligtas ha Egipto§ haka labay lan mangan ha pista. <sup>29</sup> Kabay immawah ya hi Gobernador Pilato ta kinotang na hila, no hinoy an-ibara la kan Apo Jesus.

<sup>30</sup> Hinabi lan Israelita, ya wanla, “No ayn ya dayin dinyag ya alwan mangēd, ay a naén ya gintan di kamo.”

<sup>31</sup> Hinabi ni Gobernador Pilato kanla, ya wana, “Hikaw tana ya manatol kana hēn pamanhumonol ha Kautuhan yo.”

Noa hinabi lan Israelita, ya wanla, “Ayn kay karapatan hēn hatolan hēn patsēn ya hinoman.” <sup>32</sup> Nalyari ya habayto ta êmēn matupad ya hinabi ni Apo Jesus no ay-êmēn yan matsu.

<sup>33</sup> Hi Gobernador Pilato, ay nag-orong ha bali na, haka na impabaēg hi Apo Jesus, ta kinotang na ya, “Hika ya ari hēn Israelita?”

‡ **18:28** Bawal kanlan Israelita hēn humwēn ha bali hēn alwan Israelita. Haka bawal kanlan Israelita hēn makipista no hinumwēn hila ha balin alwan Israelita ta itad hilan narêmēk. § **18:28** Paskwa. Hêlkēn ha panlēkan labay habiēn hēn habi di ha bokotan hēn hata Bibliya.

<sup>34</sup> Hinabi ni Apo Jesus, ya wana, “Habain ay ubat ha sarili mon kaihipan, o main naghabin habain kamo?”

<sup>35</sup> Hinabi ni Gobernador Pilato, ya wana, “Yarin Israelita ko? Hilay kapareho mon Israelita, haka hilay ampamaala kanlan pari yo, ya nantan kamo di. Hino awud ya dinyag mo?”

<sup>36</sup> Hinabi ni Apo Jesus kana, “Ya pamanlokop ko ay alwan di ha luta. No di ha luta ya pamanlokop ko, ay impaglaban la ko dayi hên tagahuyo ko, ta êmén a la kon dakpêñ lan Israelita. Noa, alwan di ha luta ya pamanlokop ko.”

<sup>37</sup> Amêhêñ, nangotang hi Gobernador Pilato, ya wana, “No êmbayro, ay ari ka?”

Bayo hinabi ni Apo Jesus, ya wana, “Hika ya naghabi hên hikoy mihay ari. In-anak ako di ha luta ta êmén mamipamwang hên kaptégan. Hilay mabay hên mamwangan ya kaptégan, ay ampanggilam hên anhabien ko.”

<sup>38</sup> Kabay wani Gobernador Pilato, “Hino awud ya kaptégan?”

*Hi Apo Jesus ay hinatolan hên matsi ha koros  
(Mateo 27:15-31; Marcos 15:6-20; Lucas 23:13-25)*

Pangahabi na ay nangoman yan immawah hi Gobernador Pilato, ta hinabi na kanlan Israelita, ya wana, “Ayn akon angkahêlêk ya ikadikil kana. <sup>39</sup> Main kaw hên kaugalian, ha balang Pistan Pangaligtas, ya kailangan kon ibuhan ya mihay nakahukul. Labay yon ibuhan ko hi Jesus, ya Ari yon Israelita?”

<sup>40</sup> Noa, naubuh hilan nan-angaw, ya wanla, “Alwan habain. Hi Barrabas tana ya ibuhan.” (Hi Barrabas ay mihay nanalanghang ha gobyerno.)

## 19

<sup>1</sup> Gawan ha kalabayan lan ampamaala ha Templo, ay impalatiko ni Gobernador Pilato hi Apo Jesus. <sup>2</sup> Ha pammusmus lan hundaloh kana, ay nangwa hilan nanad tanyuong ya pinanyag la yan korona, ya impakopya la ha ulo na. Haka la ya pinatakopian hên mahampat ya takop, ya kulay ubi, ya nanad ha takop lan ari. <sup>3</sup> Bayo miha-miha hilan dinumani kana, ta wanla kana, “Kumara dayi ya biyay hên Ari lan Israelita!” Haka la ya pinagtatampaling.

<sup>4</sup> Immawah oman hi Gobernador Pilato, ta hinabi na kanla, iarap ko ya kamoyu ta êmén yo mamwangan ya ayn akon nahêlêk ya kasalanan na. <sup>5</sup> In-awah la hi Apo Jesus ya pinakopyaan lan korona ya dyag ha diwi, haka pinatakopian hên kulay ubi. Bayo hinabi kanla ni Gobernador Pilato, ya wana, “Hêlkên yoy habaytsi.” <sup>6</sup> Hêñ nahêlêk lay na hi Apo Jesus hên poon pari, haka hên hilay bantay ha Templo, ay in-angaw la, ya wanla, “Ipako ya ha koros! Ipako ya ha koros!” Noa, hinabi kanla ni Gobernador Pilato, ya wana, “Hikaw tana ya maypako kana ta ayn akon nahêlêk ya dinyag nay kasalanan.” <sup>7</sup> Naghabi hilay Israelita, ya wanla, “Main kay hên anhonolén ya utoh ya hépat yan patsén, ta hinabi na, ya hiya kanoy Anak ni Apo Namalyari.”

<sup>8</sup> Nahêñ nagilam ni Gobernador Pilato ya hata hinabi la, lalo yay nan nalinwan. <sup>9</sup> Nangoman yan hinumwêñ ha lalêñ bali na ta kinotang na hi Apo Jesus, ya wana, “Taga-ayri ka?” Noa, a ya naghabi hi Apo Jesus. <sup>10</sup> Kinotang na yay na êt, ya wana, “Pata a mo labay maghabi kangko? A mo muwang ya main akon kapangyarihan hên ipabuhan kata, o ipapako ka ha koros?”

<sup>11</sup> Bayo naghabi hi Apo Jesus, ya wana, “Madyag moy habain, ta dinyanan na kan tungkulon ni Apo Namalyari. Kabay mabyat ya kasalanan lan nantan kangko di kanan kasalanan mo.” <sup>12</sup> Nahêñ nagilam ni Gobernador Pilato ya hinabi ni Apo Jesus, ay labay na ya dayi hên ibuhan, noa, nan-angaw hilay Israelita, ya wanla, “No ibuhan moy habain, alwa kan kaluguran nan

Emperador, ya poon mo ha Roma. Ta no hinoman ya ampaghabin hiya ay mihay ari, ay kapatsi nan Emperador.” <sup>13</sup> Hêñ nagilam ni Gobernador Pilato ya pangahabin êmbayro, ay in-awah na hi Apo Jesus, haka ya nikno ha iknoan hêñ panlingonan hêñ kas, ha legal ya nag langan Gabata ha habin Hebreo, ya main intabladoy bato.

<sup>14</sup> Allo hêñ habayto hêñ pamaglêan ha Pistan Pangaligtas. Maranin ugto hêñ hinabi ni Gobernador Pilato kanlan Israelita, ya wana, “Hatsi yay na ya ari yo.” <sup>15</sup> Nan-angaw hila, ya wanla, “Patsêñ ya! Patsêñ ya! Ipako ya ha koros!” Amêhêñ, wani Gobernador Pilato, ya wana, “Labay yo yan ipako ha koros, ya ari yo?” Amêhêñ, naghabi hilay ampamaala kanlan pari ya wanla, “Ayn kay hêñ kaatag ya ari no alwan ya Emperador.” <sup>16</sup> Kabay indin ni Gobernador Pilato hi Apo Jesus kanla ta êmêñ la ya ipapako ha koros.

### *Hi Apo Jesus ay impako ha koros*

(Mateo 27:32-44; Marcos 15:21-32; Lucas 23:26-43)

Kingwa la hi Apo Jesus, <sup>17</sup> ta impabalangaw kana ya mihay koros hêñ palako ha legal ya ambaêgêñ hêñ Bungo (Golgota ha habin Hebreo, ya habi lan Israelita). <sup>18</sup> Panlumatêng la bayro, ay impako la hi Apo Jesus ha koros ha pibonakan hêñ loway nakapako êt ha koros la. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki ni Apo Jesus. <sup>19</sup> Nanulat hi Gobernador Pilato. Ya wanana hulat, “Hi Jesus, ya taga-Nazaret, ya Ari lan Israelita.” Bayo la indin ya hata hulat ha koros, ha ugton ulo ni Apo Jesus. <sup>20</sup> Inhulat nay habayto ha habin Hebreo, Latin, haka Griego. Mal-at kanlan Israelita ya namahan habayto, ta narani ya ha balayan, ya pinaypakoan kan Apo Jesus. <sup>21</sup> Kabay hinabi lan ampamaala kanlan pari lan Israelita kan Gobernador Pilato, ya wanla, “Paan mon ihulat ‘ya Ari hêñ Israelita,’ noa, ya ihulat mo dayi ay, ‘Hinabin hatsi, ya hiya ya Ari lan Israelita.’” <sup>22</sup> Hinabi ni Gobernador Pilato, ya wana, “Ya naihulat ko, ay naihulat kina.”

<sup>23</sup> Hêñ naipako lay na hêñ hundaloh hi Apo Jesus, ay kingwa la ya takop na, bayo piniaatagan lan apat. Haka la êt kingwa ya hatoy pangkêbêl na ya ayn tayi. <sup>24</sup> Pinihahabian lan hundaloh, ya wanla, “Paan tamon pigi-gihian ya hatsi, ta mahayang tamo. Mahampat, ay magpalabonutan kitamo no hinoy makapiuli.” Nalyari ya habayto, ta êmêñ matupad ya nakahulat ha Kahulatan ni Apo Namalyari, ya wana, “Pini-aatagan la ya takop ko, bayo hatoy pangkêbêl ko ay pinagpalabonutan la.”\*

Ta êmbayro ya dinyag lan hundaloh.

<sup>25</sup> Ha danin koros ha pinaypakoan kan Apo Jesus, ay nakairêng ya indo na, bayo mihay babayi ya kapotoh pohêl hêñ indo na, haka hi Maria Magdalena haka hi Maria, ya ahawa ni Cleopas. <sup>26</sup> Hêñ nahêlêk ni Apo Jesus ya indo na, haka hatoy banhagan lan anlugurêñ nan tagahonol na, ya atsi ha dani na, ay hinabi na, ya wana, “Indo, atsi ya anak mo.” <sup>27</sup> Hinabi na êt ha tagahonol na, ya wana, “Atsi di ya indo mo.” Kabay paubat hêñ habayto, ay pinagkalamo na ya indo ni Apo Jesus ha bali na.

### *Ya pangamatsi ni Apo Jesus*

(Mateo 27:45-56; Marcos 15:33-41; Lucas 44-49)

<sup>28</sup> Muwang ni Apo Jesus ya nayari ya kaganawan ya impadyag kana ni Apo Namalyari. Haka ta êmêñ matupad ya atsi ha Kahulatan na, ay hinabi na, “Angkaangan ako.” <sup>29</sup> Atsi bayro ha nanad kolo, ya main nangihyo ya alak. In-iptêh la ya nanad bolak ha makarang ya hanga hêñ isopo. Bayo indêrê la

\* **19:24** Awit 22:18.

ha nangihoy alak, ya atsi ha nanad kolo, ta intag-ay la ha bêbêy ni Apo Jesus ta êmén na halêphêpê. <sup>30</sup> Hên hinalêphêp nay na ni Apo Jesus ya nangihoy alak, ay hinabi na, ya wana, “Nayari yana.” Nagkulaéy ya ulo na hên natsi yay na.

### *Nilatog hên hundaloh ya lawini ni Apo Jesus*

<sup>31</sup> Allon pamaglêan la ha pamagsimba haka pista la hên habayto. Nilako la hên Israelita hi Gobernador Pilato, ta a la labay ilaêh ha koros ya natsi no allon pamagsimba. Haka maalagá kanla ya habaytoy allon pamagsimba ta napitagon pista ya êt, kabay pinakihabi la kan Gobernador Pilato, ya ipapaklı ya but-on ahêl hên nakapako ha koros ta alihêن bayro ya bangkay la. <sup>32</sup> Kabay nilako lay na êt hên hundaloh hên pinakli ya but-on ahêl lan loway nakapako hên kalamo ni Apo Jesus. <sup>33</sup> Hên lumatêng hila kan Apo Jesus, ay nahêlêk la, ya mana yay nan natsi. Kabay a lay na pinakli ya but-on ahêl na. <sup>34</sup> Noa, nilatog hên mihay hundaloh ya lawini ni Apo Jesus ha aypan tagyang, bayo biglan namoganggang ya daya haka lanêm. <sup>35</sup> Habaytoy nalyari, ay pêtêg, ta ya nakahêlêk hên nalyari, ay mapaypaniwal-an. Kabay an-ipamwang na ya kaganawan ya nahêlêk na, ta êmén hikaw man, ay maniwala. <sup>36</sup> Nalyari ya habayto, ta êmén matupad ya Kahulatan ni Apo Namalyari, ya ayn mapakli ya miha man ha but-o na.† <sup>37</sup> Haka main êt kaatag ya nakahulat ha Kahulatan ni Apo Namalyari, ya wanana Kahulatan, “Pakahêlkên lay hatoy nilatog la.”‡

### *Ya pamilbêng kan Apo Jesus*

(Mateo 27:57-61; Marcos 15:42-47; Lucas 23:50-56)

<sup>38</sup> Hên nayari ya habayto, ay pinakihabi ni Jose ya taga-balayan Arimatea, kan Gobernador Pilato, ya paulayan yan may-ilbêng bangkay ni Apo Jesus. Hatsi hi Jose, ay mihay ampaniwala kan Apo Jesus, noa, a na impamwang ya paniwala na, gawan malimo ya kanlan poon lan Israelita. Pinaulayan ya etaman ni Gobernador Pilato. Kabay kingwa ni Jose ya bangkay ni Apo Jesus. <sup>39</sup> Kalamo ni Jose hi Nicodemo, ya dinumani kan Apo Jesus hên haton mihay yabi. Nantan yan tatlumpo ya kilo hên pabango, ya piniagêm hên mira haka aloe. <sup>40</sup> Kingwa lay bangkay ni Apo Jesus, ta dinyanan lan pabango kaban kinêlkelan la ya hên takop, ya naputsi gawan ha kaugalian lan Israelita no main iilbêng. <sup>41</sup> Ha dani hên pinaypakoan kan Apo Jesus, ay main pananêman. Bayro ha pananêman, ay main pay-ilbêngan ya nanad lêyang ya bayon dyag, ya a êt pinay-ilbêngan. <sup>42</sup> Indin lay bangkay ni Apo Jesus bayro, gawan narani, haka gawan kailangan yan iilbêng, bayo matatay allo, gawan habaytoy bisperas hên pista, haka bisperas allon pamagsimba la.

## 20

### *Hi Apo Jesus ay nabiyyay oman*

(Mateo 28:1; Marcos 16:1-8; Lucas 24:1-12)

<sup>1</sup> Naririglêm pon hên allon Dominggo, ay nilumatêng hilan Maria Magdalena ha pinay-ilbêngan kan Apo Jesus. Nahêlêk la ya natulid ya hadyay hêlay bato, ya intakap ha bêbêy hên pinay-ilbêngan. <sup>2</sup> Gawan ha nahêlêk la, ay nuwayu hilan nagtaglooh kan Simon Pedro, haka kanan tagahonol, ya banhagan lan anlugurên ni Apo Jesus. Hinabi la kanla, “Kingwa la ya bangkay hên Panginoon ha pinay-ilbêngan kana. Haka a naêñ muwang no ay-iri la yan gintan.” <sup>3</sup> Kabay hi Pedro, haka hatoy tagahonol ya banhagan lan anlugurên ni Apo Jesus, ay nagtaglooh bayro ha pinay-ilbêngan. <sup>4</sup> Niagnan hilan nuwayu, noa, hi Pedro ay naunaan yan hatoy mihay tagahonol ha

† 19:36 Awit 34:20; Bilang 9:12; Exodo 12:43-46. ‡ 19:37 Zacarias 12:10.

pinay-ilbêngan. <sup>5</sup> Napaiyoko ya, ta hinilip na ya lalên lêyang. Nahêlêk na ya hatoy pinamunggoh ha bangkay ni Apo Jesus, noa, a ya pon hinumwên. <sup>6</sup> Hêñ nilumatêng ya hi Pedro, ay tinumagloh yan hinumwên ha lalên lêyang. Nahêlêk na etaman, ya atsi ya awud bayro ya pinamunggoh ha bangkay ni Apo Jesus. <sup>7</sup> Main êt bayro, hêñ nakapapawa, ya nanad mahlay ya panyo, ya pinangêlkêl ha ulo hêñ bangkay ni Apo Jesus. <sup>8</sup> Amêhêñ, hinumwên yay na etaman ya hatoy tagahonol ya nunan nilumatêng bayro. Nahêlêk na êt ya habayto, kabay naniwala yay na, ya nabiyay yan oman hi Apo Jesus. <sup>9</sup> Agyan impahulat ni Apo Namalyari ha Kahulatan na, ya kailangan mangoman mabiyay hi Apo Jesus, ay a la êt naintindihan ya habayto. <sup>10</sup> Amêhêñ, nuli hilay nay loway tagahonol ni Apo Jesus ha bali la.

*Nagpahlêk hi Apo Jesus kan Maria Magdalena  
(Mateo 28:9-10; Marcos 16:9-11)*

<sup>11</sup> Nakabita hilay nay loway tagahonol ni Apo Jesus hêñ nilumatêng bayro hi Maria Magdalena ha pinay-ilbêngan kan Apo Jesus. Nakairêng ya bayro ha bêbêy hêñ lêyang hêñ ampanangih. Kaban ampanangih ya, ay hinilip nay lalên lêyang. <sup>12</sup> Nahêlêk na bayro ya loway anghel ya nakatakop hêñ naputsi ya nakaikno ha ubatan hêñ bangkay ni Apo Jesus, miha ha dapit ulo haka miha ha dapit bitsih. <sup>13</sup> Kinotang la hi Maria, “Pata ampanangih ka?”

Hinabi na, ya wana, “Kingwa la ya bangkay hêñ Panginoon ko, haka a ko muwang no ay-iri la yan gintan.”

<sup>14</sup> Hêñ namalingay hi Maria hêñ nahabi nay habayto, ay nahêlêk na hi Apo Jesus ya nakairêng bayro, noa, a na ya nabalayan. <sup>15</sup> Kinotang ya ni Apo Jesus, ya wana, “Pata ampanangih ka? Hinoy antapolêñ mo?” Êndat ni Maria hêñ hiya ya manayhay hêñ tanaman bayro. Kabay kinotang na, ya wana, “Apo, no hika ya nangwa kana, itoro mo kangko no ay-iri mo yan gintan ta kowêñ ko ya.” <sup>16</sup> Amêhêñ, wani Apo Jesus kana, “Maria.” Inumarap hi Maria kan Apo Jesus, ta wana, “Raboni.” (Ya labay habiêñ hêñ “Raboni” ay “Mánoro” ha habin Hebreo ya habi lan Israelita.) <sup>17</sup> Hinabi ni Apo Jesus kana, ya wana, “Paan mo kon talanêñ ta a ko êt nakaorong kanan Tatang. Lakwêñ mo hilay patêl ko ta habiêñ mo kanla ya mag-orong kina kanan Tatang ko, ya Tatang yo etaman, kan Apo Namalyari, ya Diyos ko haka Diyos yo.” <sup>18</sup> Kabay nagtagloh yay na hi Maria Magdalena kanlan tagahonol na, ta wana, “Nabiyay yan oman ya Panginoon! Nahêlêk ko ya!” Bayo hinabi na êt ya impahabi na kana ni Apo Jesus.

*Nagpahlêk ya hi Apo Jesus kanlan tagahonol na  
(Mateo 28:16-20; Marcos 16:14-18; Lucas 24:36-49)*

<sup>19</sup> Hêñ yabi yana hêñ habayton allon Dominggo, ay naka-tsipon hilay tagahonol na. Impakakabat lay bali ta angkalimo hila ha poon lan Israelita. Namakonkaynaman ay nirêng ya hi Apo Jesus ha bonak la. Hinabi na, “Patêkbêkêñ ni Apo Namalyari ya nakêm yo.” <sup>20</sup> Pangahabi nan habayto, ay impahlêk na kanla ya hugat ha gamêt na, haka ha aypañ tagyang na. Nabalayan la yay na bayto, kabay hadyay kahiglaan lan tagahonol na. <sup>21</sup> Hinabi nay na êt ni Apo Jesus kanla, “Magkamain kaw hêñ kapatêkbêkan nakêm. No ay-êmêñ na kon in-utoh ni Apo Namalyari, ya Tatang ko, ay êmêñ êt bayro hêñ an-iutoh kataw.” <sup>22</sup> Pangayari nan naghabi ay pinahlêpan na hila haka na hinabi, “Tanggapêñ yoy Espiritu ni Apo Namalyari. <sup>23</sup> Hiyay mamitoro kamoyu, ta no habiêñ yo ya main tawo ya pinatawad ha kasalanan la, ay taganán pinatawad hila ni Apo Namalyari. Haka no habiêñ yo ya a hila

pinatawad ha kasalanan la, ay a hila taganán pinatawad ni Apo Namalyari ha kasalanan la.”

### *Hi Tomas ay a naniwala ha hinabi kana ya nangoman nabiyyay hi Apo Jesus*

<sup>24</sup> Hi Tomas, ya miha kanlan labinlowa, ya ambanhagan Kambal, ay ayn bayro hēn nagpahlēk hi Apo Jesus kanlan tagahonol na. <sup>25</sup> Kabay hinabi kana hēn kaatag ya tagahonol, ya wanla, “Nabiyyay yan oman ya Panginoon. Nahēlēk naēn ya.” Noa, hinabi ni Tomas, ya wana, “A ko maniwala ya nabiyyay yan oman, angga ha a ko pon mahēlēk ya ubatan hēn pako ha gamēt na, haka no a ko pon magap-an ya hugat ha aypaan tagyang na.”

<sup>26</sup> Hēn mayari ya waloy allo, nangoman hilan ni-tsī-tsipon ha bali, ya hilay tagahonol na. Kalamo la hi Tomas. Naubuh hēn nakakabat ya ilwangan, noa, nakahowēn ya hi Apo Jesus, biha nirēng ya ha bonak la. Hinabi nay na êt, ya wana, “Magkamain kaw hēn kapatēkbēkan nakēm.” <sup>27</sup> Bayo hinabi na kan Tomas, “Pakahēlkēn mo, haka gap-an moy hugat ha gamēt ko haka ha aypaan tagyang ko. Paan kan mag-alangan. Maniwala kay na.” <sup>28</sup> Hinabi ni Tomas, ya wana, “Panginoon ko, hika awud hi Apo Namalyari.” <sup>29</sup> Amēhēn, hinabi kana ni Apo Jesus, ya wana, “Ampaniwala kay na, gawan ha nahēlēk mo kina? Lalo hilan an-ingalwan ya ampaniwala kangko, agyan a la ko angkahēlēk.”

### *No awta hinulat ya hata libro*

<sup>30</sup> Bapan lakē pon ya kapapaēpapah ya dinyag ni Apo Jesus ya nahēlēk lan tagahonol na. Noa, a naihulat bayri ha libro. <sup>31</sup> Ya naihulat di ay inhulat, ta êmēn kaw maniwala ya hi Apo Jesus ay Anak ni Apo Namalyari, ya Mesias, ya Cristo, ya Māmiligtas ya pinili nan mamaala. Ta no maniwala kaw, ay madyanan kaw hēn biyay ya ayn angga, gawan ha pakikimiha yo kan Apo Jesus.

## 21

### *Nagpahēlēk ya hi Apo Jesus ha pito kanlan tagahonol na*

<sup>1</sup> Hēn nayari ya habayto, ay nagpahlēk yay na êt hi Apo Jesus kanlan tagahonol na. Èmēn di ya pangapalyari ha Dagat-dagatan hēn Tiberias. <sup>2</sup> Mikakalamo hilan Simon Pedro, hi Tomas ya banhagan lan Kambal, hi Natanael ya taga-Cana, ha probinsyan Galilea, ya loway anak ni Zebedeo, haka ya lowa pon êt ya tagahonol ni Apo Jesus. <sup>3</sup> Hinabi kanla ni Simon Pedro, ya wana, “Manlapēt ako.” Hinabi lan kaatag, ya wanla, “Kilako kay kamo.” Amēhēn, ay nammita hilay na hēn hinumakay ha bangka, noa, ayn hilan nakwa hēn yabin habayto.

<sup>4</sup> Hēn dali allo, ay nakairēng hi Apo Jesus ha laylay lanēm, noa, a la ya nabalayan hēn tagahonol na. <sup>5</sup> Kinotang na hila, “Maanak ko, main kaw hēn nakwa?” Kabay wanla, “Ayn kay nakwa.” <sup>6</sup> Wanay na êt ni Apo Jesus kanla, ya wana, “Itata yo ha dapit panabtab hēn bangka ya lambat yo ta êmēn kaw makakwa.” Kabay intata la ya lambat la, haka hēn habayto êt, ay a lay na maguloy-guloy ya lambat la ha kal-atan hēn nakwa la. <sup>7</sup> Amēhēn, hinabi na kan Pedro hēn hatoy mihay tagahonol, ya banhagan lan anlugurēn ni Apo Jesus, ya wana, “Hi Panginoon ya awud ya habayto!” Hēn nagilam ni Simon Pedro ya hinabi kana, ay nagbaro ya, ta a ya nakabaro. Hēn nakabaro yay na, ay naglukho yay na ha lanēm ta nanawonghong ya hēn lakwēn kumustaēn hi Apo Jesus. <sup>8</sup> Ya kaatag ya tagahonol, ay nagbangkan palako ha laylay hēn ampigu-guluyan ya lambat ya napno hēn kēnan lanēm. A hila marayo ha laylay lanēm ta siyamapo ya metros tana.

<sup>9</sup> Hêñ nakalatêng hilay na ha laylay lanêm ay nakahêlêk hila hêñ apoy, ya main in-iyaw ya kênan lanêm haka puto. <sup>10</sup> Amêhêñ, wani Apo Jesus kanla, “Mantan kaw di hêñ kêna ya nakwa yo.” <sup>11</sup> Hi Simon Pedro ay hinumakay ha bangka ta hinawpan na hilay kalamo na hêñ mangguloy hêñ lambat, ya napno hêñ mangahlay ya kêna ya main bilang hêñ magatoh boy limampo boy tatlo. A ya nagihi ya lambat agyan êmbayroy kal-atan kêna. <sup>12</sup> Wani Apo Jesus kanla, “Kaw di, ta mangan kitamo.” Miha man kanla, ay ayn naghêkaw nakêm hêñ mangotâng kana no hino ya, ta muwang la ya hiya ya Panginoon. <sup>13</sup> Amêhêñ, kingwa ni Apo Jesus ya puto, haka kênan lanêm ta indin na kanla. <sup>14</sup> Habaytoy katatlo nan pagpahlêk ni Apo Jesus kanlan tagahonol na paubat hêñ nabiay yan oman.

### *Ya hinabi ni Apo Jesus kan Pedro*

<sup>15</sup> Hêñ nayari hilan nangan, ay kinotang ni Apo Jesus hi Simon Pedro, ya wana, “Simon, anak ni Juan, anlugarûn mo kon igit kanlan habaytsi ya kaatag ya tagahonol ko?” Kabay wani Pedro, “Awo, Panginoon. Muwang mo ya anlugarûn kata.” Amêhêñ, wani Apo Jesus, “Hayhayêñ mo hilay bayon ampaniwala kangko, ya maialimbawa ha biseron tupa.” <sup>16</sup> Amêhêñ, katalwa nay na êt kinotang ni Apo Jesus hi Pedro, “Simon, anak ni Juan, anlugarûn mo ko?” Bayo wani Pedro, “Awo, Panginoon. Muwang mo ya anlugarûn kata.” Amêhêñ, wani Apo Jesus, “Hayhayêñ mo hilay ampaniwala kangko, ya maialimbawa ha tupa.” <sup>17</sup> Ikatlo yan kinotang ni Apo Jesus, ya wana, “Simon, anak ni Juan, anlugarûn mo ko?” Amêhêñ, hinumakit ya nakêm ni Pedro ha katatlo yan kinotang. Hinabi na, ya wana, “Panginoon, muwang moy balang hino. Muwang mo ya anlugarûn kata.” Amêhêñ, hinabi kana ni Apo Jesus, ya wana, “Hayhayêñ mo hilay ampaniwala kangko, ya maialimbawa ha tupa. <sup>18</sup> Anhabiên ko kamo ya kaptêgan. Hêñ alwa ka pon mantêg toa, ay ampabaroan moy sarili mo, haka anlakwên moy labay mon lakwên. Noa, pantumoa mon pêtêg, ay ipaktang moy gamêt mo ta kaatag ya mamikêlêkêl kamo, haka la ka gêtan do ha a mo labay lakwên.” <sup>19</sup> Hinabi kana ni Apo Jesus ya habayto, ta êmén mamwangan no ay-êmén yan matsi hi Pedro, ta êmén madyanan pamagpuri hi Apo Namalyari. Amêhêñ, hinabi ni Apo Jesus kana, ya wana, “Ihundo moy pamakihonol mo kangko.”

### *Hi Juan ya mihay tagahonolya banhagan lan anlugarûn ni Apo Jesus*

<sup>20</sup> Namalingay hi Pedro, haka na nahêlêk ya anhumonol kanla hi Juan, ya hatoy tagahonol ya banhagan lan anlugarûn ni Apo Jesus. Hatoy namidanin ulo ha pagaw ni Apo Jesus hêñ nangotang, “Panginoon, hinoy may-upit kamo?” hêñ nangan hilay na hêñ haton yabi hêñ dinakêp la hi Apo Jesus. <sup>21</sup> Hêñ nahêlêk ya ni Pedro, kinotang na kan Apo Jesus, ya wana, “Panginoon, hino etaman ya malyari di ha tawoy hatsi? Ay-êmén yan matsi?” <sup>22</sup> Hinabi ni Apo Jesus ya wana, “No labay kon mabiyay yan angga ha pag-orong ko, ay ayn kay nan pakiêmên bayro. Ya daygêñ mo, ay humonol ka kangko.” <sup>23</sup> Gawan ha hinabi nay habayto, ay nibahwag kanlan ampaniwala kan Apo Jesus ya balita ya a ya matsi ya tagahonol ya hatsi. Noa, a na hinabi ni Apo Jesus, ya a ya matsi. Ta, ya hinabi na ay, “No labay kon mabiyay yan angga ha pag-orong ko, ay ayn kay nan pakiêmên bayro.” <sup>24</sup> Habaytsi ya tagahonol ya banhagan lan anlugarûn ni Apo Jesus, hiya ya ampamaptêg ha balang nakahulat di. Hiya êt ya nanulat hêñ kaganawan hêñ habaytsi, haka muwang naêñ ya pamaptêg na ay kaptêgan.

### *Ya tawlin inhulat ni Juan, ya tagahonol, ya ambanhagan lan anlugarûn ni Apo Jesus*

**25** Mal-at pon ya dinyag ni Apo Jesus. No ihulat ya kaganawan ya habayto, ay kayno a mihukad di ha luta ya kal-atan kahulatan ya maihulat.

## Ya Dyag lan Apostol

### *Paunan habi*

Di ha hulat ya nag langan ‘Ya Dyag lan Apostol,’ ay inhundo ni Lucas ya unan hulat na ya nag langan ‘Ya Mangêd ya Habi tungkol kan Apo Jesu-Cristo ya inhulat ni Lucas.’ Ya una nan an-ipamwang bayri, ay no ay-êmên impakatoro hên unan tagahonol ni Apo Jesu-Cristo ya Mangangêd ya Habi tungkol kana “ha balayan Jerusalem, ha probinsyan Judea, ha probinsyan Samaria, haka ha ayri man ya legal di ha boon luta.” (1:8) Hatsi ya pangapalyari kanlan angkapi-tsi-tsipon ya Cristiano ay nag-umpisa ha bansom Israel. Hi Lucas ay nag-in kalamo ni apostol Pablo ha kaatag ya pamanlumagay na hên manoro. Kabay muwang nan taganá ya nalyari.

Dinyanan nan alagá bayri ha hinulat ni Lucas, ya dyag hên Espiritu ni Apo Namalyari ya nilumatêng hên main kalamoy kapangyarihan para kanlan ampaniwala ha Jerusalem hên haton allo hên Pentecostes. Ya nakahulat bayri, ay an-ipahlêk êt ya kapangyarihan hên Mangêd ya Habi ha biyay lan ampaniwala kan Apo Jesu-Cristo. Mabáha êt di ya tungkol ha pamilalamo lan ampaniwala.

Hilay tawo ha bansom Israel, ya kaapo-apoan ni apo Israel (Jacob), ay ambaégén Israelita o Judio. Hila ay ampaniwala kan Apo Namalyari haka ha Manan Tsipan, noa, ya kal-atan kanla ay a ampaniwala ya hi Apo Jesu-Cristo ay hiyay an-êngganan lay Mesias, ya Cristo, ya pinili ni Apo Namalyari hên mag-in Mámilitgas ya impangako ni Apo Namalyari ha Manan Tsipan. Hilay apostol ay Israelita êt, noa, taganán muwang la ya hi Apo Jesu-Cristo ay habaytoy pinili ni Apo Namalyari hên mag-in Mámilitgas ya impangako. Ha pangipalinaw lan apostol, ya nabiyay yan oman hi Apo Jesu-Cristo, haka ha pangipalinaw la ya hiyay nakatupad hên tungkol ha Mámilitgas ya nakahulat ha Manan Tsipan, ay main etaman kanlan kapareho lan Israelita ya naniwala ya hiyay habaytoy pinili ni Apo Namalyari hên mag-in Mámilitgas ya impangako ni Apo Namalyari.

Main êt alwan kaapo-apoan ni apo Israel (Jacob), ya ambaégén alwan Israelita, o alwan Judio, o Gentil, ya naniwala kan Apo Jesu-Cristo ya hiyay Anak ni Apo Namalyari. Hila ay ayn muwang hên tungkol ha Manan Tsipan. Èndat lan Israelita ya naniwala kan Apo Jesu-Cristo, ya a madyanan biyay ya ayn angga hilay alwan Israelita ya naniwala, no a la honolên ya ugali ya intoro ni apo Moises ha Manan Tsipan. Kabay impamwang ni Apo Namalyari kanlan apostol, ya alwan pamanhumonol ha ugali ya intoro ni apo Moises ya makapiligtas, noa, ya paniwalan bat, ya hi Apo Jesu-Cristo ay Anak ni Apo Namalyari ya makapiligtas (10:1-11:18; 15:1-34).

Hêñ habayton panaon lan apostol, ay angkalokopan ya bansom Israel hêñ bansom Italia. Ya pinakapoon hêñ bansom Italia ay atsi ha balayan Roma, ya kapitolyo hêñ Italia. Ya pamaéñ kana ay Emperador. Hiyay namiutoh hêñ hundaloh ha balang bansa ya angkalokopan na. Hiya êt ya namili kanlan ari haka gobernador ya ampanalan kanlan habaytoy bansa.

Kabooan hêñ pinakalaman

Pamaglêan lan apostol hêñ mamaptêg 1:1-26

a. Ya tawlin utoh haka pangako ni Apo Jesu-Cristo 1:1-14

b. Ya kahagili ni Judas 1:15-26

Ya pamaptêg lan apostol ha Jerusalem 2:1-8:3

Ya pamaptêg lan apostol ha Judea haka Samaria 8:4-12:25

**Ya pamanoro ni apostol Pablo 13:1-28:31**

- a. Ya unan pamanlumagay ni apostol Pablo hēn manoro 13:1-14:28
- b. Ya pamit-si-tsipon ha Jerusalem 15:1-35
- c. Ya ikalwan pamanlumagay ni apostol Pablo hēn manoro 15:36-18:22
- d. Ya pangatlon pamanlumagay ni apostol Pablo hēn manoro 18:23-21:16
- e. Hi apostol Pablo, ya nakahukul ha Jerusalem, Cesarea haka Roma 21:17-28:31

<sup>1</sup> Panlugurēn kon Teofilo, ha unan hulat, ay nanulat ako hēn tungkol ha dinyag ni Apo Jesus, haka ya balang in-arat na paubat hēn haton una yan nanoro <sup>2</sup> angga ha allon hiyay ampitag-ay hēn palako ha langit. Bayo ya tinumag-ay, ay ha kapangyarihan hēn Espiritu ni Apo Namalyari, ay hinabi na pon kanla ya dapat lan daygēn, ya hilay pinili nan apostol. <sup>3</sup> Ha apatapo ya allo paubat hēn natsi ya ha koros haka nabiyay oman, ay panay yan nagpahlēk kanlan apostol, haka mal-at ya dinyag nay pamaptēg hēn hiyay taganán nabiyay oman. Haka intoro na ya tungkol ha pamanlokop ni Apo Namalyari.

<sup>4</sup> Minghan hēn naka-tsipon hila, hinabi ni Apo Jesus kanla, “Paan kaw pon mag-alih di ha balayan Jerusalem. Èngganan yo pon ya impangako hēn Tatang ko, ya idigalo na kamoyu ya nahabi kina. <sup>5</sup> Gawan a mabuyot, ay bawtismoan na kaw ha Espiritu na, ya ipahapat na kamoyu. Habaytsi ay alwan nanad ha pamawtismo ni Juan Bautista ha lanêm, ya a namihapat hēn Espiritu ni Apo Namalyari.”

***Ya pamag-orong ni Apo Jesus ha langit***

<sup>6</sup> Hēn nilalamo hilay apostol hēn kalamo ni Apo Jesus, ay kinotang la ya, ya wanla, “Panginoon, amêhēn ana ya pamamaala hēn bansan Israel hēn nanad ha panaon hēn ninuno tamo?” <sup>7</sup> Hinabi ni Apo Jesus kanla, ya wana, “A yo malyarin mamwangan no makanon malyari ya habayto. Ya Tatang ko ya ampanalan hēn panaon haka kaganawan ya malyari. <sup>8</sup> Noa, dyanan kaw hēn kapangyarihan ha panhumapat kamoyu hēn Espiritu ni Apo Namalyari bayo mamipamwang kaw na hēn tungkol kangko bayri ha balayan Jerusalem, ha probinsyan Judea, ha probinsyan Samaria, haka ha ayri man ya logal di ha boon luta.” <sup>9</sup> Hēn nahabi nay na ya habayto ni Panginoon Jesus, kaban anhēlkēn la ya, ay antumag-ay yay na hēn palako ha langit haka natagpēnan yan ginêm. <sup>10</sup> Kaban ampakahēlkēn lay langit, ay biglan nagpahlēk kanla ya loway anghel ya nakabaron naputsi ya nirêng ha dani lan apostol. <sup>11</sup> Hinabi lan lowa, “Hikaw ya taga-probinsyan Galilea, awta ampakahēlkēn yoy langit! No ay-êmén yan nitag-ay hi Apo Jesus ha langit hēn kalamoy lêmm, ay êmbayro êt ya pamag-orong na hēn main kalamoy lêmm.”

***Ya kahagili ni Judas Iscariote***

<sup>12</sup> Nag-orong hilay nay apostol hēn ubat ha Tawgtug Olibo palako ha balayan Jerusalem, ya dayo bat hēn mihay kilometro. <sup>13</sup> Hēn nilatêng hilay na ha balayan, ay nunik hilay na ha pagdahêlan lay kuwarto. Hila ya habaytsi ay hilan Pedro, Juan, Santiago, Andres, Felipe, Tomas, Bartolome, Mateo, Santiago, ya anak ni Alfeo, hi Simon ya ambanhagan lan Makabayan, haka hi Judas ya anak ni Santiago. <sup>14</sup> Mimihay nakêm la haka panay hilan ampagtsipon hēn manalangin hēn kalamoy ungnoy babayi, hi Maria ya indo ni Apo Jesus, haka hilay lalaki, ya patêl ni Apo Jesus.

<sup>15</sup> Hēn nalabah ya ungnoy allo, ay nagtsipon ya magatoh haka lowampo ya patêl ha Panginoon. Kalamo la hi apostol Pedro ya nirêng ha arapan

la, ta wana, <sup>16</sup> “Hikaw ya patêl ko ha Panginoon, kailangan hên matupad ya impahulat nan Espiritu ni Apo Namalyari kan Arin David hên hato, ya tungkol kan Judas Iscariote, ya naypadakêp kan Apo Jesus. <sup>17</sup> Hi Judas Iscariote, ay kalamo naêñ pinili ni Apo Jesus hên maghuyo kana.” <sup>18</sup> (Ya imbayad kan Judas ha karawakan dinyag na, ay pinanaliw nan luta. Bayro ha luta na ay nanabo ya. Nilumtoh ya bitoka na haka inumawah ya laman na. <sup>19</sup> Namwangan lan kaganawan taga-Jerusalem ya nalyari, kabay ha habi la ay binaêg lay habaytoy luta hên Akeldama, ya labay habiêñ ay Luta hên Daya.)

<sup>20</sup> Hinabi nay na êt ni apostol Pedro, ya wana, “Êmêñ di ya nakahulat ha libron Awit,  
‘Paulayan ya legal na. Alway nan paidyanan ya habayto.’  
Nakahulat etaman ya wana,  
‘Main dayin managili hên manupad ha tungkulan hên mamaala ya indin kana.’

<sup>21</sup> “Kabay dapat kitamon mamili hên mihay kahagili ni Judas. Kailangan miha ya kanlan panay tamon nakalamo hên kalamo tamo hi Panginoon Jesus, <sup>22</sup> paubat hên binawtismoan ya ni Juan Bautista angga ha hiyay nitag-ay ha langit. Ya piliêñ tamo, ay dapat mag-in kalamo tamo hên mamipamwang hên tungkol ha pangabiyay oman ni Panginoon Jesus.”

<sup>23</sup> Kabay pinili la hi Matias haka hi Jose Justus ya ambaêgêñ Barsabas ya pamilian lan miha. <sup>24</sup> Nanalangin hila bayto hên wanla, “Panginoon, muwang moy kaihipan hên hinoman. Ipamwang mo kannaêñ no hino kanlan hata lowa ya pinili mo <sup>25</sup> hên manupad ha tungkulan hên pangaapostol ya tinalibatokan ni Judas Iscariote, ya nammita ha legal ya hêpat kana.” <sup>26</sup> Hêñ nayari hilan nanalangin, ay pinagpalabutan lay langan hên hata lowa, haka nabonut ya langan ni Matias, ya nipahan ha labinmihay apostol.

## 2

### *Ya panhumapat hên Espiritu ni Apo Namalyari kanlan ampaniwala kan Apo Jesus*

<sup>1</sup> Hêñ nilumatêng ya pista lan Israelita ya ambaêgêñ lan Pentecostes, ay naubuh hilan nipagtsipon ha mihay bali ya hilay apostol, haka hilay kaatag ya ampaniwala kan Apo Jesus. <sup>2</sup> Namakonkaynaman ay main hilan nagilaman ya ubat ha langit ya nanad alaboop ya main kalamoy makhaw ya angin ha boon bali ya dinyanan la. <sup>3</sup> Nakahêlêk hila hêñ nanad dila ya dêkêt ya nipagtayak ha balang miha. <sup>4</sup> Naubuh hilan hinapatan hêñ Espiritu ni Apo Namalyari, haka ha kapangyarihan na ay nag-umpisa hilay nan naghabi ha hino-hino kay na hêñ ya habi ya a la muwang.

<sup>5</sup> Hêñ habayto, ay main Israelita ya ampaidi ha Jerusalem, ya mapanhemonol ha Kautuhan ni Apo Namalyari, ya ubat ha hino kay na hêñ ya bansa, kabay hino-hino kay na hêñ ya habi la. <sup>6</sup> Hêñ nagilam lay nanad hêñ alaboop ya main kalamoy angin, ay napaidani hila, haka pinilolopungan lay habaytoy ampaniwala kan Apo Jesus. Nag-êpapah hila no pata ampakapaghabi hilay nay ampaniwala kan Apo Jesus hêñ habi la. <sup>7</sup> Gawan ha pamag-êpapah la ay hinabi la, ya wanla, “Pata ampakapaghabin êmêñ di hilay hata taga-probinsyan Galilea! <sup>8</sup> Ay êmêñ hilan ampakapaghabin hino-hino kay na hêñ habi tamo? <sup>9</sup> Main di kantamon taga-Partia, main taga-Media, main taga-Elam, main êt hêñ ampaidi ha Mesopotamia, ha Judea, ha Capadocia, ha Ponto, haka ha Asia. <sup>10</sup> Main pon êt kantamo hêñ taga-Frigia haka Panfilia, Egipto, angga ha legal hêñ Libia ha dani hêñ Cirene. Ya kaatag kantamo ay

taga-Roma, <sup>11</sup> main Israelita, haka main alwan Israelita ya anhumonol ha paniwala tamon Israelita. Ya kaatag kantamo ay taga-Creta haka Arabia. Yan angkagilaman tamina ya tungkol ha kapapaêpapah ya dinyag ni Apo Namalyari gawan ampakahabi hilay nan habi tamo, ya ampaniwala kan Apo Jesus.” <sup>12</sup> Gawan ha hadyay pamag-êpapah la, ay a la makwan maihip ya nalyari. Kabay ampikokotang hila ya wanla, “Hino ya labay habiên hên habaytsi?”

<sup>13</sup> Noa, ya kaatag kanla ay naghabin main lamoy pamandaêh, ya wanla, “Lahing hilan bat ya habain!”

### *Ya pamipamwang ni apostol Pedro*

<sup>14</sup> Nirêng hilay labinloway apostol, haka in-ikhaw ni apostol Pedro ya pamaghabi na ya wana, “Kapareho kon Israelita, haka hikaw ya kaatag pon ya atsi bayri ha balayan Jerusalem. Pakgilamén yon mangêd ya habiên ko kamoyu. <sup>15</sup> Èndat yon lahing kay. Alwa kay lahing, ta alas nuwebe pon hên maranon. <sup>16</sup> Ha nalyari kannaén, ay natupad ya hinabi ni Propeta Joel, ya wana,

<sup>17</sup> ‘Habaytsi ya anhabiên ni Apo Namalyari. Ya daygén ko ha tawlin\* allo, ta êmén yo mamwangan ya dapat yon daygén, ay êmén ya di.

Ipahapat koy Espiritu ko kanlan balang miha.

Ipamwang lan maának yo ya ipaihip ko kanla.

Hilay miyawhay yo ay makahêlêk hên halumata, ya ipahlêk ko kanla haka hilay toay lalaki ya ampamaala ay manaynêp hên ipataynêp ko kanla.

<sup>18</sup> Kanlan ampaghuyo kangko, ya lalaki haka babayi, ay ipahapat ko ya Espiritu ko, haka ipamwang la ya ipaihip ko kanla.

<sup>19</sup> Haka manyag akon kapapaêpapah ha luta haka ha angkahêlêk ha langit. Magkamain daya, apoy, haka makugpa ya ahuk.

<sup>20</sup> Dumiglêm ya allo bayto, haka umurit ya buwan hên nanad daya.

Lumatêng bayto ya allo, ya ayn kapantag ha kapapaêpapah ya kapangyarihan, yabay ya allon pamag-orong hên Panginoon.

<sup>21</sup> Haka hinoman ya ampakiingalo ha Panginoon ay miligtas ha parusa hên kasalanan la.<sup>†</sup>

Habaytoy impamwang ni Propeta Joel.”

<sup>22</sup> Inhundo nay pamaghabi na ni apostol Pedro, ya wana, “Kabay hikaw ya kapareho kon Israelita, pakgilamén yoy habaytsi! Hi Apo Jesus ya taga-Nazaret ay in-utoh ni Apo Namalyari. Pinaptégan ni Apo Namalyari ya tungkulon ya indin na kan Apo Jesus ha kapapaêpapah ya dyag, ya main kapangyarihan ya impadyag ni Apo Namalyari kana. Muwang yo etaman ya habayto, ta nalyari ya habayto di kamoyu. <sup>23</sup> Yabay ya hi Apo Jesus ya mana nay nan tinalagá ni Apo Namalyari hên idin na ha gamêt yo, haka muwang ni Apo Namalyari ya daygén yo kana. Impapako haka impapatsi yo ya ha koros ha nangarawak ya tawo. <sup>24</sup> Noa, hi Apo Jesus ay imbuhan ha kapangyarihan hên kamatsan ta hiyay biniyay oman ni Apo Namalyari, ta ya kamatsan ay ayn kapangyarihan kana. <sup>25</sup> Ta ya habi ni Apo Jesus ay impamwang ni Arin David hên hato, ya wana,

‘Nahêlêk ko ya Panginoon ya panay atsi ha arapan ko, ta hiyay panay hên ampanawop kangko, kabay a ko malimo.

<sup>26</sup> Kabay angkahiglay boon nakêm ko.

\* <sup>2:17</sup> Paubat hên nilumatêng hi Apo Jesu-Cristo di ha luta angga ha pamag-orong na di ha luta.

† <sup>2:21</sup> Joel 2:28.

Mahiglay pamagpuri ko kamo.

Main akon kasiguradoan ha impangako mo,

<sup>27</sup> gawan a mo paulayan ya kaélwa ko ha legal lan natsi.

A mon paulayan hén gumata ha pay-ilbêngan ya bangkay hén mapaypaniwal-an mo ya ayn kapantag ha kangérān.

<sup>28</sup> Intoro mo kangko ya dann ya palako ha biyay ya ayn angga.

Hika ya taganán mamahigla kangko no makit katay nan arap-arapan.<sup>†</sup>

Habaytoy inhulat ni Arin David.” wani apostol Pedro.

<sup>29</sup> Bayo wana, “Kapareho kon Israelita, pakaihipén yoy habaytsi. Hi Arin David, ya ninuno tamo ay natsi, haka ya pinay-ilbêngan kana ay atsi kantamo, ya angkahélék angga améhén. <sup>30</sup> Hiyay mihay propeta ni Apo Namalyari, haka muwang nay impangako ni Apo Namalyari kana, ya miha kanlan kaapo-apoan na ay mag-in ari hén nanad kana. <sup>31</sup> Ya pangabiyay oman hén Mesias, ya Cristo, ya impangakon Mámiligtas ya pinili ni Apo Namalyari hén mamaala, ay impamwang ni Arin David hén hinabi nan êmén di, ya wana, ‘A ya pinaulayan hén mag-buyot ha legal lan natsi. A pinaulayan hén gumata ya lawini na.’

<sup>32</sup> Habaytoy pinili ni Apo Namalyari hén mag-in Mámiligtas, ay ayn kaatag no alwan hi Apo Jesus, ya biniyyay oman ni Apo Namalyari. Haka muwang naén ya habayto, ta naubuh naén yan nahélék hén nabiyay yan oman, haka habaytoy an-ipamwang naén. <sup>33</sup> Hiyay intag-ay ha langit ni Apo Namalyari, ya Tatang na, haka hiyay dinyanan tungkul. Ha tungkul na, ay nami-hapat yan Espiritu ni Apo Namalyari kannáen. Yabay ya impangako na, ya angkahélék haka angkagilaman yo améhén. <sup>34</sup> Ta main yan hinulat hi Arin David ya tungkol ha Panginoon na, ya intag-ay ha langit, alwan tungkol ha sarili na. Hatsi ya hinulat na, ya wana,

‘Hinabi ni Apo Namalyari ha Panginoon ko, ya wana,

“Mikno ka ha dapit panabtab ko hén mamaala hén kalamo ko,

<sup>35</sup> angga ha hambutén ko hilay kapatsi mo, ta idin ko hila ha aypan kapang-yarihan mo.” ”<sup>§</sup>

<sup>36</sup> Inhundo ni apostol Pedro ya pamaghabi na, ya wana, “Kabay hikaw haka ya balang kapareho kon Israelita, ay dapat mamwangan ya hi Apo Jesus ya impapatsi yo ha koros, ay yabay ya dinyag ni Apo Namalyari hén Panginoon, haka Mesias, ya Cristo, ya impangakon Mámiligtas ya pinili ni Apo Namalyari hén mamaala!”

<sup>37</sup> Hén nagilam la ya hinabi kanla ni apostol Pedro, ay angkahémékan lay sarili la. Kabay kinotang la hi apostol Pedro haka hilay kaatag ya apostol, ya wanla, “Hikaw ya kapareho naén Israelita, hino awud ya dapat naén daygén?”

<sup>38</sup> Hinabi kanla ni apostol Pedro, ya wana, “Ya balang miha kamoyu, ay dapat hén maghêhê. Dapat talibatokan yoy pamanyag hén kasalanan, haka pabawtismo kaw ha langan ni Apo Jesu-Cristo, ta êmén mapatawed ya kasalanan yo, haka ta êmén na ipahapat kamoyu ni Apo Namalyari ya Espiritu na. <sup>39</sup> Ta ya Espiritu ni Apo Namalyari ay impangako kamoyu etaman, haka kanlan maának tamo, haka kanlan kaapo-apoan tamo, haka kanlan atsi ha mangarayo ya legal. Awo bay, namipangako hi Apo Namalyari, ya Panginoon tamo, hén ipahapat ya Espiritu na kanlan pinili na, hén mag-in kana.” <sup>40</sup> Mal-at pon ya pamaptêg kanla ni apostol Pedro, haka inaralan na hila, ta êmén hila miakay ha kaptêgan, ya wana, “Makiingalo kaw kan Apo Namalyari, ya iligtas kaw ha parusa ya ayn angga ya lumatêng kanlan

<sup>†</sup> 2:28 Awit 16:8-11.    <sup>§</sup> 2:35 Awit 110:1.

ampanyag karawakan!” <sup>41</sup> Mal-at ya naniwala ha impamwang ni apostol Pedro kabay binawtismoan la hila. Ha alloy habayto ay tatlon liboy nipahan kanlan ampaniwala kan Apo Jesus. <sup>42</sup> Inhundo lay pamanggilam la ha intoro lan apostol. Nakiagêm hila ha pami-tsi-tsipon lan apostol hên manalangin, haka magkomunyon hên main mangêd ya pamilalamo.

### *Ya pamilalamo lan ampaniwala kan Apo Jesus*

<sup>43</sup> Gawan ha kapangyarihan ni Apo Namalyari, ay namaalih hilay apostol hên hakit hên kal-atan, haka nanyag hila hên kaatag pon ya kapapaêpapah ha ikakangêd lan atsi bayro, kabay naubuh hilan nipag-êpapah, hên main kalamoy pamanggalang kan Apo Namalyari. <sup>44</sup> Hilay ampaniwala kan Apo Jesus, ay ampagmimihan nakêm haka ya pibandian la ay amphiaagêmên la. <sup>45</sup> An-ihaliw lay pibandian la, ta ya pera ya naabli la ay an-idin do ha ampangailangan hên balang miha. <sup>46</sup> Allo-allo hilan ampagtsipon ha Templo. Ampiaaêm hila haka ampagkomunyon hila ha bali la hên mahiglay nakêm. <sup>47</sup> Panay lan ampuriêh hi Apo Namalyari. Haka hila ay an-igalang hên hinoman ya atsi bayro. Allo-allo ay an-ipahan kanla hên Panginoon ya hilay ampiligtas ha parusa ya ayn angga.

## 3

### *Pinabita ni apostol Pedro ya a ampakabita*

<sup>1</sup> Minghan hên alas tres hên maapon, ya oras hên panalangin lan Israelita ay nilumohan hi apostol Pedro haka hi apostol Juan ha Templo. <sup>2</sup> Bayro ha Templo, ay main ambaêgên Mahampat ya Ilwangan. Allo-allo ay anggêtan la bayro ya mihay lalaki, ya mamalimos, ya a ampakabita hên paubat hên in-anak ya, ta ampakikwa yan pera kanlan anhumwên bayro. <sup>3</sup> Hêñ nahêlêk na hilay loway apostol ya anhumwên ha Templo, ay nakikwa yan pera kanla. <sup>4</sup> Pinakahêlêk la ya, bayo wani apostol Pedro kana, “Hêlkên mo kay!” <sup>5</sup> Kabay pinakahêlêk na hila ta êndat nan dyanan la yan pera. <sup>6</sup> Noa, wani apostol Pedro kana, “Taganán ayn akon pera,\* noa, hawpan kata. Ha kapangyarihan ni Apo Jesu-Cristo, ya taga-Nazaret, ay an-iutoh katan mirêng haka mita!” <sup>7</sup> Tinalan ni apostol Pedro ya gamêt na ta hinawpan na yan nirêng ya habaytoy lalaki ya a ampakabita. Namakon, ay tambêng hinumkaw ya bitsih haka boklong na. <sup>8</sup> Naglukho yay nan nirêng, haka nakilako yay na kanlan apostol Pedro hên hinumwên ha Templo hên ampakabita hên paglukho-lukho hên ampagpuri kan Apo Namalyari. <sup>9</sup> Nadambi la ya, hên kal-atan ya atsi bayro. <sup>10</sup> Nabalyan la ya, ya hiya awud ya hatoy lalaki ya a ampakabita ya ampakikwa hên pera ha Mahampat ya Ilwangan, haka nipag-êpapah hila ha nalyari kana.

### *Ya impamwang ni apostol Pedro bayro ha Portiko ni Arin Solomon ha Templo*

<sup>11</sup> Pangayarin habayto, hên atsi hilay loway apostol ha ambaêgên lan Portikot ni Arin Solomon ya atsi bayro êt ha Templo, ay hatoy lalaki ya ampakabitay na ay nayêngyêng hên a mabay paibul-ih kanla. Naubuh etaman hên nuwayun dinumanî kanlay kal-atan ampipag-êpapah ha nalyari. <sup>12</sup> Hêñ pamakahêlêk ni apostol Pedro kanlan kal-atan, ay wana kanla, “Hikaw ya patêl ko, ya kapareho kon Israelita, awta ampag-êpapah kaw ha nalyari? Pata ampakahêlêk yo kay? Kayno êndat yon napabita naêñ ya ha sarili naêñ kapangyarihan o gawan mangêd ya ugali naêñ! <sup>13</sup> Taganán alwan

\* <sup>3:6</sup> Ha habin Griego: pilak o ginto. † <sup>3:11</sup> Hêlkên ha panlêkan labay habiêñ hêñ habi.

hikay, noa, hi Apo Namalyari ya namabita kanan hata lalaki. Hiya ya ansimbaen lan ninuno tamo, ya hilan apo Abraham, apo Isaac haka hi apo Jacob, haka hiya ya namabita kanan hata lalaki, ta êmén mamwangan ya panga-Diyos ni Apo Jesus. Hi Apo Jesus ya nanyag kalabayan na di ha luta, ay atsi ha langit amêhén hén ampamaala. Yabay ya a yo pinaniwal-an, ya indin yo kanlan manungkulon, haka ya inara yo, agyan ibuhan ya dayi ni Gobernador Pilato. <sup>14</sup> Hiya ya Banal haka Makatoynungan, noa, a yo yan pinaniwal-an, yan hatoy mapamatsi, ay impabuhan yo kan Gobernador Pilato! <sup>15</sup> Impapatsi yo, ya ampam-in biyay ya ayn anggaan, noa, biniyay yan oman ni Apo Namalyari, haka hikay ya ampamapténg ya biniyay yan oman gawan nahélék naén ya. <sup>16</sup> Ya kapangyarihan ni Apo Jesus haka ya paniwala kana, ay namabita kanan hata lalaki ya angkahélék yo, ya muwang yo. Hiyay makhaw di ha arapan yo gawan ha paniwala kan Apo Jesus.

<sup>17</sup> “Patêl ko, muwang koy impapatsi yo ya, gawan a yo muwang ya hiyay Mesias, ya Cristo. Hila man ya ampamaala, ay a la muwang ya hiyay habayto.

<sup>18</sup> Ha dinyag yo ay natupad ya impamwang lan mámpamwang hén an-ipaihip kanla ni Apo Namalyari, ya dapat magdusa haka matsi ya Mesias, ya Cristo, ya impangakon Mámilitas ya pinili ni Apo Namalyari hén mamaala. <sup>19</sup> Kabay dapat kaw hén maghêhê, haka dapat kaw hén mag-orong kan Apo Namalyari ta êmén kaw mapatawad ha kasalanan yo. <sup>20</sup> No daygén yoy habayto, ay papaynawaen hén pakhawén ni Apo Namalyari ya nakém yo haka iutoh na kamoyu hi Apo Jesus, ya Mesias, ya Cristo, ya impangakon Mámilitas ya pinili na hén mamaala kamoyu. <sup>21</sup> Hiyay dapat paidi pon ha langit angga ha matupad ya kaganawan ya impapapét ni Apo Namalyari kanlan banal ya mámpamwang hén an-ipaihip na kanla hén hato. <sup>22</sup> Ta êmén ya di ya hinabi ni apo Moises hén hato, ‘Lumaténg ya allo ay main propeta, ya nanad kangko, ya iutoh kamoyu ni Apo Namalyari, ya Panginoon. Hiyay mihay kapareho tamon Israelita. Dapat yon honolén ya hinon habiên na kamoyu. <sup>23</sup> Ya balang a humonol kanan habaytoy mámpamwang hén an-ipaihip kana ni Apo Namalyari, ay ipapawa kanlan ampaniwala kan Apo Namalyari ta patsén na hila.’ ”‡

<sup>24</sup> Inhundo ni apostol Pedro ya pamaghabi na, ya wana, “Hilay propeta ni Apo Namalyari paubat kan apo Samuel ay pare-parehon namipamwang hén angkalyari amêhén. <sup>25</sup> Hikitamo ya kaapo-apoaan lan propeta ni Apo Namalyari, ya pinaypangakoan na hén habaytsi ya Mesias, ya Cristo. Haka hikitamo êt ya kalamo ha kahundoan ni Apo Namalyari ha ninuno tamo. Nanad ha hinabi na kan apo Abraham, ya wana, ‘Ingalwan ko hilay kal-atan ha balang bansa ha boon luta gawan ha mihay kaapo-apoaan mo. Habaytoy hinabi ni Apo Namalyari.’ ”§ <sup>26</sup> Inhundo nay na êt ni apostol Pedro ya pamaghabi na, ya wana, “Kabay unan in-utoh ni Apo Namalyari kantamon Israelita, hi Apo Jesus, ya nanyag kalabayan na di ha luta. Hiyay Mesias, ya Cristo, ya impangakon Mámilitas ya pinili ni Apo Namalyari hén mamaala, ya nangingalo kantamo hén namipatalibatok ha kasalanan tamo.”

## 4

### *In-arap hi apostol Pedro haka hi apostol Juan ha Sanedrin*

<sup>1</sup> Hén ampaghabi pon hi apostol Pedro haka hi apostol Juan ha kal-atan ya atsi bayro ha Portiko\* ni Arin Solomon ha Templo, ay main nilumaténg ya ungnoy pari ya ampamaala ha Templo, kalamo lay kapitan lan ampamantay

‡ **3:23** Deuteronomio 18:19. § **3:25** Genesis 22:18. \* **4:1** Hêlkén ha panlékan labay habiên hén habi.

ha Templo, haka ungnoy Saduseo, ya a ampaniwala ya biyayêñ oman ya hilay natsi. <sup>2</sup> Hadyay huluk la kanlan loway apostol gawan an-itoro la kanlan tawo ya biniyay oman hi Apo Jesus, haka habaytsi ay ampamaptêg ya mabiyay oman hilay natsi. <sup>3</sup> Kabay dinakêp la hilay loway apostol, noa, gawan yabi yana, ay inhukul la hila pon hên angga ha humonoy allo. <sup>4</sup> Embayro man, ay mal-at kanla ya nakagilam ha pamipamwang lan apostol, ya naniwala kan Apo Jesus. Kabay nag-in liman libo (5,000) hilay nay lalaki ya ampaniwala.

<sup>5</sup> Hêñ humonoy allo, ay ni-tsi-tsipon ha Jerusalem hilay máñoron Kautuhan ni apo Moises, hilay toa ya nag tungkulan ha bansa, haka hilay kaatag pon ya ampamaala ha Israelita. <sup>6</sup> Atsi êt bayro hi Anas, ya pinakapoon pari, haka hi Caifas, hi Juan, hi Alejandro, haka hilay kaatag ya lalaki ya kamag-anak ni Anas. <sup>7</sup> In-arap hi apostol Pedro haka hi apostol Juan ya ubat ha hukulan ta kinotang la hila ya wanla, “Hinoy nam-i kamoyu hêñ kapangyarihan ta napabita yoy hata lalaki ya a ampakabita?”

<sup>8</sup> Ha kapangyarihan hêñ Espiritu ni Apo Namalyari, ay naghabi hi apostol Pedro, ya wana, “Anggalangêñ kon mangatoa ya main tungkulan ha bansa, haka hikaw ya kaatag pon di ya main tungkulan, <sup>9</sup> no angkotangêñ yo kay hêñ tungkol ha kangéran ya dinyag naêñ ha mihay lalaki ya ampaghakit, haka no ay-êmêñ yan nakabita, <sup>10</sup> ay dapat mamwangan yo haka ya balang kapareho tamon Israelita ya habaytsi. Ya hata lalaki ay ampakairêng amêhêñ di ha arapan yo hêñ ayn nanan hakit, gawan ha kapangyarihan ni Apo Jesu-Cristo ya taga-Nazaret, ya impapatsi yo ha koros, ya biniyay oman ni Apo Namalyari. <sup>11</sup> Hiyay in-alimbawa ha impahulat ni Apo Namalyari ya tungkol kanan Mesias, ya Cristo, ya wanana hulat,

‘Ya bato ya intapon yon mámpairêng hêñ bali, ay nag-in pinakamaalagáy bato ta êmêñ mag-in napah-êý ya bali.’†

<sup>12</sup> Ayn kaatag ha boon luta ya makapiligtas kantamo ha parusa ya ayn anggaan no alwan hi Apo Jesu-Cristo, ya in-utoh ni Apo Namalyari.”

<sup>13</sup> Nipag-êpapah hilay ampamaala ha Templo ha kakhawan nakêm lan loway apostol, hêñ namwangan la ya naaypan bat ya pinag-aralan la. Namwangan lay na, ya hila awud ya kala-kalamo ni Apo Jesus. <sup>14</sup> Noa, ayn hilay nan mahabi ta angkahêlêk lay nay lalaki, ya ampakabitay na, ya nakairêng hêñ kalamo lan apostol. <sup>15</sup> Kabay pinaawah la hila pon hilan apostol Pedro ha pami-tsi-tsipon lan Sanedrin, bayo pinihabian la no hinoy daygêñ la. <sup>16</sup> “Hino” wanla, “ya daygêñ tamo kanlan habaytsi? A tamina maipuglaoh ya habaytsi ya dinyag lay kapapaêpapah, ta hilay atsi di ha boon Jerusalem ay ampakamwang hêñ dinyag la. <sup>17</sup> Ta êmêñ a lalon mibahwag ya habaytsi, ay bawalêñ tamo hilan maghabi hêñ tungkol kan Jesus ha hinoman.”

<sup>18</sup> Kabay impabaêg hilan oman haka binawal hila, ya paan hila mamitoro o maghabi man hêñ tungkol kan Apo Jesus. <sup>19</sup> Noa, hinabi lan apostol, “Hikaw ya manimbâgan no hinoy mangêd ha arapan ni Apo Namalyari, no humonol kay kamoyu, o no humonol kay kan Apo Namalyari. <sup>20</sup> Ta a naêñ maipatgêñ ya pamipamwang hêñ nahêlêk haka nagilam naêñ kan Apo Jesus.” <sup>21</sup> Amêhêñ, lalo la hilan binawal biha hila imbuhan. A la maihipan no ay-êmêñ la hilan maparusaan, ta kal-atan ya taga-Jerusalem ay ampagpuri kan Apo Namalyari, gawan ha napabita lan apostol ya habaytoy lalaki, <sup>22</sup> ya maigit apatapoy taon hêñ habayto.

*Nanalangin hilay ampaniwala kan Apo Jesus ya dyanan hilan hêkaw nakêm*

† <sup>4:11</sup> Awit 118:22.

<sup>23</sup> Hêñ naibuhan hilay loway apostol, ay nagtagloñ hilay na ha kalamo lan ampaniwala kan Apo Jesus, haka la impamwang ya hinabi kanla hêñ poon pari haka hilay toa ya main tungkulon ha bansa. <sup>24</sup> Hêñ nagilam lay habayto, ay nipagpuri hila kan Apo Namalyari, ya wanla, “Panginoon, hika ya nanyag hêñ langit, luta, dagat, haka ya kaganawan ya atsi kanla! <sup>25</sup> Ya Espiritu mo ay namipahabi kan Arin David, ya ninuno naêñ, ya naghuyo kamo, ya wana, ‘Pata hadyay omot ulo lan alwan Israelita kan Apo Namalyari?

Awta ampangihip hilan ayn kapukatan ya kapareho kon Israelita?

<sup>26</sup> Hilay ari ya ampamaala bayri ha luta, haka hilay kaatag ya ampamaala, ay ampi-tsi-tsipon hêñ manalanghang kan Apo Namalyari haka ha tinalagá nan mag-in Mesias, ya impangakon Mámilitgas ya pinili ni Apo Namalyari hêñ mamaala.”†

<sup>27</sup> Muwang naêñ ya habaytoy impahabi mo kan Arin David hêñ hato, ay natupad. Ta di ha Jerusalem, ay nagkamiha hilan Herodes Antipas, hi Poncio Pilato, hilay alwan Israelita, haka hilay kapareho naêñ Israelita, hêñ patsêñ hi Apo Jesus, ya ayn hinon kasalanan, ya nanyag kalabayan mo di ha luta, ya tinalagá mon mag-in Mesias, ya Cristo. <sup>28</sup> Gawan makapangyarihan ka, ay dinyag lan bêngat ya mana minan tinalagá. <sup>29</sup> Haka amêhêñ, Panginoon, pansinêñ mo dayi ya habla la kannaêñ, haka pakhawêñ moy nakêm naêñ, ha paghuyo naêñ kamo ha pamipamwang hêñ habi mo. <sup>30</sup> Dayi ipahlêk moy kapangyarihan mo ta êmêñ kay makapaalíh hêñ hakit haka makadyag hêñ kaatag pon ya kapapaêpapah, gawan kan Apo Jesus, ya ayn hinon kasalanan, ya nanyag kalabayan mo di ha luta.” <sup>31</sup> Pangayari lan nanalangin, ay nayêgyêg ya pinagtsiponan la. Ha kapangyarihan hêñ Espiritu ni Apo Namalyari, ay hinumkaw ya nakêm lan namipamwang hêñ habi na.

### *Ayn nay-imot hêñ bandi na ha miha ta miha*

<sup>32</sup> Hilay ampaniwala kan Apo Jesus ay nagkamiha hêñ kaihipan boy nakêm, haka ayn kanla ya nay-imot hêñ bandi la ha miha ta miha. <sup>33</sup> Ha makhaw ya kapangyarihan hêñ Espiritu ni Apo Namalyari ay impamwang lan apostol ya biniyyay oman hi Panginoon Jesus. Haka ya ayn kapantag ya ingalo na, ay atsi ha balang ampaniwala. <sup>34-35</sup> Ayn kanlan nagkulang ha hinon kailangan, ta hilay main luta o bali, ay namihiwi hêñ habayto, haka la indin kanlan apostol ya naablian la, bayo indin lan apostol kanlan ampangailangan.

<sup>36</sup> Embayro êt ya dinyag ni Jose ya taga-Chipre, ya mihay Levita ya kaapo-apoan ni apo Levi§ Ya pamaêg lan apostol kana ay Bernabe, ya labay habiêñ mamahiglan nakêm. <sup>37</sup> Main yan luta hi Bernabe ya inhaliw na, haka na indin kanlan apostol ya naablian na.

## 5

### *Hi Ananias haka hi Safira*

<sup>1</sup> Main miahawa ya nag langan Ananias haka Safira ya namihiwi hêñ luta la etaman. <sup>2</sup> Noa, pinagkamihaan lan miahawa ya a lan iubuh hêñ idin kanlan apostol, ya hatoy naablian la ha luta la. Kabay kaatag bat hêñ naablian la ya gintan ni Ananias kanlan apostol. <sup>3</sup> Noa, wani apostol Pedro kana, “Ananias, pata nagpatukso ka kan Satanas, hêñ naglaram ka ha Espiritu ni Apo Namalyari hêñ nagbabaran indin moy boon naablian yo?

<sup>4</sup> Yarin alwan kamoyu ya habaytoy luta hêñ a yo pon inhaliw! Yarin alwa êt kamoyu ya naablian yo! Pata pinagkamihaan yon maglaram hêñ indin yoy kabooan naablian? A ka naglaram ha tawo, noa, naglaram ka kan Apo

† **4:26** Awit 2:1. § **4:36** Ya mihay anak ni apo Israel.

Namalyari!” <sup>5</sup> Pamakgilam ni Ananias hēn habayto, ay natsi ya. Hadyay nay pag-êpapah lan nakgilam ha nalyari kana. <sup>6</sup> Main miyawhay bayro ya namipungguh hēn bangkay na ta gintan hēn in-ilbēng.

<sup>7</sup> Pamakalabah hēn tatloy oras, ay nilumatēng ya ahawa ni Ananias, ya hi Safira, ya ayn kamuwang-muwang ha nalyari ha ahawa na. <sup>8</sup> Hinabi ni apostol Pedro kana, ya wana, “Habiēn mo kangko no hahatsin bat ya naablian yon miahawa ha luta yo.”

“Awo, habain bat.”

<sup>9</sup> Kabay wani apostol Pedro kana, “Pata pinagkamihaan yon subukēn ya Espiritu nan Panginoon? Anlumatēng hilay nay-ilbēng hēn bangkay hēn ahawa mo, haka hilay na êt ya manapwat hēn bangkay mo hēn mamilbēng.”

<sup>10</sup> Tampol yan natsi hi Safira. Panhumwēn lan miyawhay, ay nahēlēk lay nay bangkay na. Kabay in-ilbēng lay na êt ya bangkay na ha dani hēn pinay-ilbēngan lan ahawa na. <sup>11</sup> Hadyay limo lan patēl ha Panginoon ya angkapi-tsi-tsipon haka hadyay limo lan balang miha ya nakgilam hēn nalyari kan Ananias haka kan Safira.

### *Mal-at ya inalihan hakit gawan ha kapangyarihan ni Apo Namalyari ya atsi kanlan apostol*

<sup>12</sup> Hēn habayto ay mal-at ya inalihan hakit, haka mal-at ya kaatag ya kapapaêpapah ya dinyag lan apostol ha kapangyarihan ni Apo Namalyari ha arapan lan kal-atan. Angkapi-tsi-tsipon hilay ampaniwala kan Apo Jesu-Cristo ha Templo, ha legal ya ambaêgēn Portiko\* ni Arin Solomon. <sup>13</sup> Hilay a ampaniwala kana, ay a ampaidani kanla ta malimo hila hēn makilamo kanla. Embayro man, ay anggalangēn lay ampaniwala kan Apo Jesu-Cristo. <sup>14</sup> Noa, lalo hēn anlum-at hilay kal-atan lalaki haka babayi ya ampaniwala kan Panginoon. <sup>15</sup> Gawan ha mal-at ya kapapaêpapah ya andaygēn lan apostol, ay anhapwatan lan ayn hakit, ya ampipaghakit, ha pangkatuluyan la, hēn gētan ha danin dann, ta êmēn ha pamagdann ni apostol Pedro, ay maêtéban hila man hēn anino na ya kaatag kanla, ay maalih ya hakit la. <sup>16</sup> Main êt kal-atan ya nilumatēng ya naubat ha balayan ya nakapalibot ha Jerusalem. Anggētan la hilay main hakit haka hilay ampairapan hēn nangarawak ya a angkahēlēk. Impaalih ya hakit lan main hakit, haka ya nangarawak ya a angkahēlēk ya ampamairap kanlan kaatag.

### *Ya pamairap kanlan apostol*

<sup>17</sup> Hadyay kahēm hēn pinakapoon pari, haka hēn kalamo nay panay Saduseo, ha angkadyag lan apostol. <sup>18</sup> Kabay dinakēp la hilay apostol ta inhukul. <sup>19</sup> Noa, hēn yabin habayto, ay niloat hēn miyah anghel hēn Panginoon ya kabat hēn hatoy hukulan, haka na hila pinaawah ya apostol, ta wana kanla, <sup>20</sup> “Mamipamwang kaw kanlan atsi bayro ha Templo hēn tungkol ha bayon biyay ya an-idin ni Apo Namalyari.” <sup>21</sup> Hinonol lan apostol ya hinabi na, kabay hēn dali alloy na, ay hinumwēn hilay na ha Templo ta nanoro.

Noa, a la muwang hēn pinakapoon pari haka hilay kalamo na, ya nakaawah hilay nay apostol ha hukulan. Hēn nilumatēng hila ha pagtsiponan la, ay impaalap la ya boon Sanedrin haka ya kaganawan toa ya main tungkulan ha bansa. Biha namiutoh hilan bantay ya kowēn hilay apostol ha hukulan. <sup>22</sup> Noa, pamanlumatēng lan bantay ha hukulan, ay ayn hilay na bayro, kabay tampol hilan nag-orong ta inhumbung kanlan naka-tsipon ya wanla, <sup>23</sup> “Hēn nilatēng kay ha hukulan, ay nakakabat ya, haka hilay bantay

\* <sup>5:12</sup> Hēlkēn ha panlēkan labay habiēn hēn habi.

ay atsi bayro ha kabat. Noa, hēn niloat naēn ya habaytoy kabat, ay ayn hilay na bayro ya apostol!” <sup>24</sup> Hēn nagilam lan poon lan ampamantay ha Templo, haka hilay poon pari ya habayto, ay a la makwan maihip no hino pon ya malyari. <sup>25</sup> Namakonkaynaman ay main nilumatēng ya namihumbung, ya hatoy impahukul la, ay atsi ha Templo hēn ampanoro. <sup>26</sup> Kabay inalap la hilay apostol, hēn kapitan lan bantay ha Templo hēn kalamo na hilay bantay. Gintan lay apostol hēn a la hila pinahakitan, ta malimo hilay bantay ya batoēn hila hēn antoroan lan apostol.

<sup>27</sup> Paglatēng la bayro ha pagtsiponan lan Sanedrin, ay in-arap hilay apostol, ta kinotang na hila hēn pinakapoon pari. <sup>28</sup> Wana kanla, “Impapakabawal naēn kamoyu ya paan yoy nan itoro ya tungkol kan Jesus. Yan lalo yon intoro ya tungkol kana ha boon Jerusalem, haka ampalwahēn yo pon êt hēn hikay ya main kasalanan ha pangamatsi na!”

<sup>29</sup> Noa, hinabi lan apostol Pedro, ya wanla, “Hi Apo Namalyarin bēngat ya dapat naēn honolēn, alwan tawo. <sup>30</sup> Hi Apo Namalyari, ya ansimbaēn hēn ninuno tamo, ay namabiyay oman kan Apo Jesus ya impapatsi yo ha koros. <sup>31</sup> Hi Apo Namalyari etaman ya namitag-ay kana hēn mag-in Poon haka Māmiligtas tamon Israelita, ta êmēn kitamo mapatawad ha kasalanan ya am-paghēhēan haka antalibatokan tamo. <sup>32</sup> Ampaptēgan naēn, haka ampaptēgan nan Espiritu ni Apo Namalyari, ya an-ipahapat na kanlan anhumonol kana, ya habaytsi ya nalyari kan Apo Jesus.”

<sup>33</sup> Pamakagilam lan ampamaala hēn habayto, ay hadyay tulaw la, haka labay la hilay nan patsēn ya apostol. <sup>34</sup> Noa, nirēng ya mihay Pariseo, ya kalamo hēn Sanedrin ya nag langan Gamaliel, ya mihay mánoron Kautuhan ni apo Moises, ya anggalangēn hēn kal-atan. In-utoh na, ya iawah hila pon ya apostol ha pamit-si-tsipon la. <sup>35</sup> Bayo wana kanlan naka-tsipon, “Kapareho kon Israelita, pakaihipēn yo pon mangēd ya daygēn yo kanlan habaytsi. <sup>36</sup> Hēn hato ay main êt êmēn di ya nalyari. Hi Teudas ya nagbabara hēn mihay makhaw ya ampamaala, ay nakahagyat hēn apat a gatoh ya lalaki ya nakilamo kana. Noa, a nadyag ya labay nan daygēn, ta hēn napatsi ya, ay nangapi-hihiyay hila tanay habaytoy kalamo na. <sup>37</sup> Pangayarin habayto, ay êmbayro êt ya nalyari kan Judas, ya mihay taga-probinsyan Galilea, hēn haton panaon hēn pamamayad hēn buwih. Nakahagyat ya êt hēn kal-atan lalaki. Hēn napatsi ya, ay nangapi-hihiyay etaman hilay nahagyat na. <sup>38</sup> Kabay ampakihabi ko kamoyu amēhēn, ya paan yo hilan pakiemēnan hilay habaytsi. Paulayan hila tana, ta no habaytsi ya andaygēn la, ay ubat bēngat kanla, ay ayn hilan madyag. <sup>39</sup> Noa, no ubat kan Apo Namalyari ya andaygēn la, ay a yo hila mapatunggēn. Ta kayno lumtaw kaw hēn anhumalanghang kana!” Habayto ya imbilin ni apo Gamaliel kanla.

Kabay hinonol lan naka-tsipon ya aral na. <sup>40</sup> Pinahowēn la hilan oman ya apostol. Impalatiko hila haka binawal la hilan manoro hēn tungkol kan Apo Jesus. Pangayari, ay imbuhan la hila. <sup>41</sup> Nag-alih hilay apostol ha arapan Sanedrin. Hadyay kahiglaan la gawan intad hila ni Apo Namalyari hēn hépat hēn mipakarēng-êy gawan ha pamanhumonol la kan Apo Jesus. <sup>42</sup> Allo-allo ay inhundo lay pamanoro haka pamipamwang ha Templo angga ha binali-bali, ya tungkol kan Apo Jesu-Cristo ya hiyay Mesias, ya Cristo, ya impangakon Māmiligtas ya pinili ni Apo Namalyari hēn mamaala, ya an-êngganan la.

<sup>1</sup> Hêñ panaon hêñ habayto, kaban anlum-at hilay ampaniwala kan Apo Jesus, ay main kanla ya ampaghabin Griego, ya ampagrekamo kanlan kapareho lan Israelita ya ampaniwala kan Apo Jesus, ya ampaghabin Hebreo. Panhabiêñ la ya angkapaulayan hilay babayin Griego ya ayn nanan ahawa, ha pamি-arasyon ha pan-allo-allo lan pamangailangan. <sup>2</sup> Kabay impa-tsipon lan labinloway apostol ya kaganawan lan ampaniwala kan Apo Jesu-Cristo ta wanla, “Alwan mangêñ hêñ mamaala kay ha rasyon ta mapaulayan naêñ ya pamipamwang hêñ Habi ni Apo Namalyari. <sup>3</sup> Kabay patêl, mamili kaw na ha kalamo yo hêñ pitoy lalaki, ya muwang yoy nay mangêñ ya ugali, ya main kagalingan, haka panay ampamiyay ha kapangyarihan hêñ Espiritu ni Apo Namalyari. Idin naêñ kanla ya tungkulan hêñ mami-arasyon. <sup>4</sup> Hikay etaman, ay maiubuh naêñ bayto ya ihip naêñ ha panalangin haka ha pamipamwang hêñ Habi ni Apo Namalyari.”

<sup>5</sup> Nalabayan lan naka-tsipon ya hinabi lan apostol, kabay namili hilay na. Ya miha ya pinili la ay hi Esteban. Nananiêñ ya paniwala na haka atsi kana ya kapangyarihan nan Espiritu ni Apo Namalyari. Pinili la etaman hilan Felipe, Procoro, Nicanor, Timon, Parmenas, haka hi Nicolas. Hi Nicolas ya taga-Antioquia, ay mihay alwan Israelita, noa, anhumonol yay na ha paniwala lan Israelita, haka ampaniwala ya etaman ya hi Apo Jesus ay habaytoy impangakon Mámiligtas. <sup>6</sup> In-arap lay hatoy pitoy pinili la kanlan apostol. Impalunto lan apostol ya gamêt la kanla ta inhalangin la hila.

<sup>7</sup> Kabay lalon nipamwang ya habi ni Apo Namalyari, hêñ angga ha panlulum-at hilay ampaniwala kan Apo Jesus ha Jerusalem. Mal-at etaman ya pari ya naniwala.

### *Ya pandakêp kan Esteban*

<sup>8</sup> Atsi kan Esteban ya kapangyarihan haka ya ayn kapantag ya ingalo ni Apo Namalyari. Namaalih yan hakit lan kal-atan haka nanyag ya êt hêñ kaatag ya kapapaêpapah ha ikakangêñ lan atsi bayro. <sup>9</sup> Noa, pinaki-hubakan la yan ungnoy kalamo la ha ambaêgêñ Sinagoga lan Ipoh ya Imbuhan. Habaytsi ya sinagoga ay angkaboo hêñ Israelita ya taga-Cirene, taga-Alejandria, taga-probinsyan Cilicia, haka taga-Asia. <sup>10</sup> Noa, a la ya mahambut ha pamakibat, gawan ha kagalingan pamaghabi na ya ubat ha Espiritu ni Apo Namalyari. <sup>11</sup> Kabay hêñ ayn makamwang, ay inamuyot lay ungnoy lalaki ya maghabin kalaraman. Habaytsi ya impahabi la kanla, “Nagilam naêñ ya hinabi ni Esteban ya pamanira ha Kautuhan ni apo Moises haka kan Apo Namalyari!” <sup>12</sup> Ya hinabi la ay nakapahuluk kanlan toa ya main tungkulan ha bansa, kanlan mónoron Kautuhan ni apo Moises, haka kanlan kal-atan ya atsi bayro. Kabay dinakêp la hi Esteban, haka la ya in-arap ha Sanedrin. <sup>13</sup> Namiarap hila etaman hêñ naghabin kalaraman ya halanghang kan Esteban ya wanla, “Hata lalaki, ay ayn têgêñ ha pamaghabi hêñ halanghang ha Templo ni Apo Namalyari haka ha Kautuhan ni apo Moises. <sup>14</sup> Nagilam naêñ êt ya hinabi na ya agwatêñ kano ni Jesus ya taga-Nazaret, ya habaytsi ya Templo, haka omanêñ na kano ya ugali ya impahonol kantamo ni apo Moises!” <sup>15</sup> Hilay kaganawan kalamo hêñ Sanedrin ay namakahêlêk kan Esteban, haka la nahêlêk ya lupa na, ya nanad lupa hêñ mihay anghel ni Apo Namalyari.

### *Ya hinabi ni Esteban ha arapan Sanedrin*

<sup>1</sup> Kinotang nan pinakapoon pari hi Esteban, no pêtêg ya habaytoy imbara kana.

<sup>2</sup> Hinabi ni Esteban, ya wana, “Hikaw ya patêl ko haka matoa ko, pak-agilamén yo ya anhabien ko. Hên haton a ya pon ampaidi ha balayan hên Haran, hên idi ya pon ha Mesopotamia, hi apo Abraham, ya ninuno tamo, ay nagpahlék kana, hi Apo Namalyari ya ayn kapantag ha kapangyarihan, kangéran haka kahampatan. <sup>3</sup> Wana kan apo Abraham, ‘Mag-alih ka bayri ha luta mo. Ibalag moy kamag-anak mo ta lakwén moy logal ya itoro ko kamo.’

<sup>4</sup> “Kabay immalih hi apo Abraham bayro ha luta na ha bansen Caldeo ta napaidi ya ha Haran. Hên pangamatsi hên tatang na, ay in-alih na ya ni Apo Namalyari bayri ha lutan Canaan ya andyanan tamo améhén. <sup>5</sup> Embayro man, ay a na ya pon dinyanan hên nanawa man ya hukat hên luta bayri. Noa, impangako kana ni Apo Namalyari, ya habaytsi ya lutan Canaan, ay idin kana, haka ha mag-in kaapo-apoan na. Hên nangako hi Apo Namalyari hên habayto, ay ayn ya pon anak hi apo Abraham. <sup>6</sup> Embayri ya hinabi ni Apo Namalyari kana, ‘Hilay mag-in kaapo-apoan mo ay paidi ha kaatag ya bansa. Daygén hilan ipoh bayro, haka hila pairapan ha apat a gatoh ya taon. <sup>7</sup> Noa, parusaan ko hilay mamaipoh kanla. Panga-ubat kanan habayto, ay mag-alih hila bayro, ya mag-in kaapo-apoan mo, ta bayri la kon simbaén.’ Embayroy hinabi ni Apo Namalyari kan apo Abraham. <sup>8</sup> Haka in-utoh na ya êt hên dapat tulién ya mag-in kaapo-apoan na ya palatandaan hên kahundoan na kanla. Kabay hên in-anak hi apo Isaac, hên nakalabah ya waloy allo ay tinuli na yay na ni apo Abraham. Embayro êt ya dinyag ni apo Isaac kan apo Jacob, ya anak na. Hi apo Jacob, ya ambaégén hên apo Israel etaman, ay êmbayro êt ya dinyag na ha labinloway anak na, ya ninuno tamo.

<sup>9</sup> “Noa, hi apo Jose, ya miha kanlan labinloway anak ni apo Jacob, ay kinahéman lan kaka na. Kabay inhaliw la ya hên mag-in ipoh ha bansen Egipto. Noa, a na yan pinaulayan ni Apo Namalyari, <sup>10</sup> ta pinataniêh na ya ha kaganawan kairapan ya dinanan na. Dinyanan na yan kamwan-gan hên makilamo, haka kagalingan hên umarap kanan Faraon, ya ari, ya pinakapoon hên bansen Egipto. Kabay dinyanan na yan Faraon hên tungkulun hên mag-in gobernador ha boon bansen Egipto haka mamaala ha kaganawan ya atsi ha bali ni Faraon.

<sup>11</sup> “Hên gobernador\* yay na hi Jose hên pitoy taon, ay ayn nanan tumubo ha kaganawan tanaman gawan a nanguran ha pitoy taon ha bansen Egipto haka ha bansen Canaan. Kabay nadanasan lay hadyay kairapan. Ayn hilay nan mapangwaan hên maékan ya hilay ninuno tamo ha Canaan. <sup>12</sup> Hên namwangan ni apo Jacob† ya main awud hên mahaliw ya trigo ha bansen Egipto, ay in-utoh na hilay anak na hên manaliw. Habaytoy unan pammako la bayro, ay a la ya nabalyan hi apo Jose. <sup>13</sup> Ha ikalwan oman hên pammako la bayro, ay nagpabalay hi apo Jose kanla. Kabay namwangan hên Faraon ya tungkol ha mipapatêl haka ya toa ni apo Jose. <sup>14</sup> Kabay impauli ni apo Jose ya tatang na, hi apo Jacob, haka hilay kaganawan kamag-anak na, ya pitumpo boy limay katawo. <sup>15</sup> Haka nanugél hi apo Jacob ha bansen Egipto hên angga ha natsi ya. Hilay maának na ya ninuno tamo ay natsi bayro etaman. <sup>16</sup> Ya bangkay la ay in-uli di ha luta tamo ta in-ilbêng ha Siquem ha pay-ilbêngan, ya hinaliw ni apo Abraham hên hato ha maának ni Hamor.

<sup>17</sup> “Hên marani yay na ya panaon hên panupad ni Apo Namalyari ha pangako na kan apo Abraham ya idin kanlan mag-in kaapo-apoan na ya lutan Canaan, ay kal-atan lay nan ninuno tamo ha Egipto. <sup>18</sup> Ya bayon ari

---

\* <sup>7:11</sup> Indin ni Apo Namalyari kan apo Jose ya kagalingan hên mamahinép hên kal-atan trigo ha pitoy taon hên katsighaw ha Egipto. † <sup>7:12</sup> Genesis 42-50.

ha Egipto hên habaytoy panaon ay a na muwang<sup>†</sup> ya tungkol kan apo Jose. <sup>19</sup> Inutakan haka pinairapan nay ninuno tamo ha pamatoluk na, ya itapon lay bingot ta êmén hila matsi. <sup>20</sup> Hên panaon hên habayto ay in-anak hi apo Moises, ya mihay anak ya bapan mahampat. Hinayhay la ya pon, hên toa na, ha bali la, hên tatloy buwan, <sup>21</sup> bayo hên in-awah la ya, ay main babayi bayro ya nangwa kana. Hiyay anak hên habaytoy ari. Intad na ya hi apo Moises hên mantêg nan anak. <sup>22</sup> Tinoroan la hi apo Moises ha kamwangan lan taga-Egipto ya manga-talino kabay hiyay nag-in magaling ha pamaghabi haka magaling ha kaganawan dyag.

<sup>23</sup> “Hên apatapoy taon nay na ni apo Moises, ay naihipan nan hirawên hilay kapareho nan Israelita, ta hêlkên na no hinoy nay angkalyari kanla. <sup>24</sup> Hên atsi yay na bayro, ay nahêlêk na ya mihay kapareho na ya ampairapan hên mihay Egipcio. Hinawpan<sup>§</sup> nay kapareho na, haka ha pamihigantsi na hên kapareho na, ay pinatsi nay hatoy Egipcio. <sup>25</sup> Éndat na no angkaintindihan lan kapareho na ya hiyay pinili ni Apo Namalyari hên mamibuhan kanla ha pangaipoh la. Noa, a la naintindihan. <sup>26</sup> Hên humonoy allo, ay nahêlêk nay loway kapareho na ya ampiuhubakan. Labay na dayi ya makiúmang hila, kabay wana, ‘Patêl, awta ampiuhubak kaw ya parehon Israelita?’ <sup>27</sup> Noa, intolak hi apo Moises hên hatoy namahakit ha kapareho na, ta wana, ‘Yarin main kan tungkulon hên mamaala haka manlingon kannaên! <sup>28</sup> Labay mo kon patsêن hên nanad ha pamatsi mo naapon kanan Egipcio!’ <sup>29</sup> Hên pamakagilam ni apo Moises hên habi na, ay nuwayu yan nagtago hên nanugêl ha logical ya ambaégên Madian. Bayro yan nakapag-ahawa haka nakapag-anak hên loway lalaki.

<sup>30</sup> “Pangalabah hên apatapo ya taon, ay nagpahlêk kan apo Moises ya mihay anghel ni Apo Namalyari ha dani hên Tawtgug Sinai ha kabalabalan, ha mihay naaypa ya poon kayo ya andungkêt. <sup>31</sup> Nag-êpapah hi apo Moises ha nahêlêk na. Kaban ampaidani ya ta puliahêna ya, ay nagilam nay habi hên Panginoon, ya wana, <sup>32</sup> ‘Hiko hi Apo Namalyari ya ansimbaên lan ninuno mo, ya hilan Abraham, Isaac haka Jacob.’ Namêgpêg hi apo Moises gawan limo na, haka malimo yan manlêk. <sup>33</sup> Hinabi nay na êt hên Panginoon kana, ya wana, ‘Alihêñ moy panlatop hên bitsih mo ta luta ko ya habaytsi. <sup>34</sup> Angkahêlêk ko ya hadyay pamairap kanlan pinili ko, ya atsi bayro ha Egipto. Angkagilaman koy pamakiingalo la kangko. Kabay atsi ko bayri hên ibuhan hila. Mako ka di, ta paorongên kata ha Egipto.’” Habayto ya hinabi ni Apo Namalyari.

<sup>35</sup> Inhundo ni Esteban ya pamaghabi na, ya wana, “Hi apo Moises ay a tinanggap hên kapareho na hên hinabi la, ya wanla kana, ‘Yarin main kan tungkulon hên mamaala haka manlingon kaso naêñ!’ Yan hiya êt ya in-utoh ni Apo Namalyari hên mamaala haka mamibuhan kanla ha hawop hên anghel, ya nagpahlêk kana ha naaypa ya poon kayoy andungkêt. <sup>36</sup> Hiya êt ya namaala kanlan kapareho na, ha pag-alîh la ha Egipto ha pamanyag hên kal-atan ya kapapaêpapah bayro ha Egipto, ha Dagat ya nag langan Naorit haka ha apatapo ya taon la ha kabalabalan. <sup>37</sup> Hiya êt hi apo Moises ya nag-habi ha kapareho na, ya wana, ‘Hi Apo Namalyari ya mamili hên mihay kapareho tamon Israelita hên mag-in propeta na, hên nanad kangko.’ <sup>38</sup> Hiya êt, hi apo Moises, ya kalamo hên ninuno tamo hên nagtsipon hila ha kabalabalan, ya kinahabi hên anghel ha Tawtgug Sinai, ha kabalabalan, hên

---

<sup>†</sup> 7:18 Gawan nakalabah ya apat a gatoh ya taon hên gintan la hi apo Jose ha Egipto. <sup>§</sup> 7:24 Exodus 2:12.

indin kana ya habi ni Apo Namalyari ya ampam-in biyay ya in-intsilga na kantamon kaapo-apoan na.

<sup>39</sup> “Noa, a la ya hinonol hēn ninuno tamo. A la ya tinanggap, ta labay lay na êt hēn mag-orong ha Egipto. <sup>40</sup> Hēn nabuyotan hi apo Moises bayro ha Tawgtug Sinai, ay kinahabi la ya kaka na, hi Aaron, ya panyag na hilan diyos-diyosan ya mamaala kanla gawan a la muwang no hinoy nalyari kan apo Moises ya nantan kanla hēn ubat ha Egipto. <sup>41</sup> Kabay nanyag hilan rebulto hēn alwan pêtêg ya diyos ya kalupan biseron baka. Pangayari ay nipamatsi hilan ayop ta in-arap la bayro ha rebulto. Nagkaluto hila haka nagpakahigla hila bayro hēn nagsimba ha arapan hēn habaytoy rebulto ya bat lan dinyag. <sup>42</sup> Gawan bayro, ay tinalibatokan hila ni Apo Namalyari haka na hila pinaulayan hēn magsimba ha allo, buwan haka bêtêwêñ. Bayron natupad\* ya impahulat ni Apo Namalyari ha mihay māmipamwang hēn an-ipaihip kana ni Apo Namalyari, ya wanana hulat, ‘Hikaw ya Israelita, alwan hiko ya pinamatsi yo hēn ayop ha apatapo ya taon hēn atsi kaw ha kabalah-balahan!

<sup>43</sup> Ya ampigêgêtan yo ay tolda nan alwan pêtêg hēn diyos ya nag langan Moloc, haka ya bêbêtêwêñan nan diyos-diyosan Renfan.

Yabay ya indukit yo ha kayo haka ansimbaén yo.

Kabay paalihêñ kataw di ta ipalako kataw ha kapatsi yo ha marayo pon ha balayan Babilonia.’”

<sup>44</sup> Inhundo ni Esteban ya pamaghabí na, ya wana, “Kala-kalamo lan ninuno tamo ha kabalah-balahan ya Toldan Tsipan ni Apo Namalyari, ya pagsimbaan la kana. Habaytoy palatandaan kanlan ninuno tamo ya a na hila paulayan. Ha panyag lan habaytoy Toldan Tsipan, ay tinoto lay impahlék ni Apo Namalyari kan apo Moises. <sup>45</sup> Hēn natsi hi apo Moises, ta hi apo Josue ya namaala kanlan ninuno tamo, ay gintan lay Toldan Tsipan ni Apo Namalyari di ha Canaan, hēn nanugêl hila di, hēn panga-ubat lan impaalih ni Apo Namalyari ya manan ampiawai bayri. Atsi ya pon di ya habaytoy Toldan Tsipan ni Apo Namalyari, ya pagsimbaan la kana, hēn panaon ni Arin David. <sup>46</sup> Hi Arin David ay iningalwan ni Apo Namalyari haka kinotang na kan Apo Namalyari no malyari yan mangipairêng† hēn paidyanan na, ya mapagsimbaan kana, hēn ninuno tamon kaapo-apoan ni apo Jacob. <sup>47</sup> Yan ya anak ni Arin David, hi Arin Solomon ya nakapipairêng hēn habayto.

<sup>48</sup> “Noa, hi Apo Namalyari, ya ayn kapantag, ay a ya ampaidi ha bali ya dyag hēn tawo, ta êmén di ya hinulat ni Propeta Isaias, ya wanana hulat,

<sup>49</sup> ‘Wanan Panginoon, “Ampamaala ko ha langit haka ha luta.

Kabay panyag yo ko man hēn bali, ay a ya maipareho ha ampaidyanan ko,

<sup>50</sup> gawan ha hiko ya nanyag hēn kaganawan.”’”‡

<sup>51</sup> Inhundo ni Esteban ya pamaghabí na, ya wana, “Kakakdêyan ulo yo! Angga amêhêñ ay nanad kaw kanlan a ampanonol kan Apo Namalyari, ta a yo labay gilamêñ ya habi na. Nanad kaw hēn ninuno yo, ya a hinumonol ha kalabayan hēn Espiritu ni Apo Namalyari. <sup>52</sup> Hilay māmipamwang hēn an-ipaihip kanla ni Apo Namalyari, ay naubuh hēn pinairapan lan ninuno yo! Pinatsi lay in-utoh na ya namipapêt ha pamanlumatêng di hēn Mesias, ya Cristo, ya impulong yo bayo impapatsi yo. <sup>53</sup> Hikaw pon êt ya nananggap hēn Kautuhan ni Apo Namalyari ya indin lan anghel kanlan ninuno tamo, bayo a yo ya hinonol.”

### *Pinagbabato la hi Esteban angga ha hiyay natsi*

\* <sup>7:42</sup> Amos 5:25-27. † <sup>7:46</sup> Awit 132:2-5. ‡ <sup>7:50</sup> Isaias 66:1-2.

<sup>54</sup> Pamakagilam lan ampamaala ha hinabi ni Esteban, ay haday tulaw la. <sup>55</sup> Noa, atsi kan Esteban ya kapangyarihan nan Espiritu ni Apo Namalyari. Naningla ya ha langit haka nahélék nay kapahiléw ya kahampatan ni Apo Namalyari ya ayn kapantag. Nahélék na êt hi Apo Jesus ya nakairêng ha dapit panabtab ni Apo Namalyari. <sup>56</sup> Kabay wana, “Awkêh! Hêlkên yo! Nakaloat ya langit haka nakairêng ya ha dapit panabtab ni Apo Namalyari ya Taga-Langit, ya In-anak Tawo!”

<sup>57</sup> Tinagpênan lay têkk la ta êndat la no andêmêhêna hi Apo Namalyari. Nipan-angaw hila gawan huluk la, haka piniaagnan la yan dinawhong hi Esteban. <sup>58</sup> Pinigogoluyan la yan paawah ha balayan Jerusalem ta pinagbabato la ya. Hilay tistigos ya naghabin kalaraman ya halanghang kan Esteban, ay namibalag hén takop lay pangkêbel ha bitsih hén mihay lalaki ya nag langan Saulo. <sup>59</sup> Kaban ampibabatoan la ya, ay ampanalangin ya, hi Esteban, ya wana, “Panginoon Jesus, ipaulay kina kamo ya kaélwa ko.” <sup>60</sup> Nandoko ya bayo ya nan-angaw hén haday hékaw, ya wana, “Panginoon, patawarên mo hila di ha dinyag la kangko.” Natsi yay na bayto.

## 8

<sup>1</sup> Hinumigla hi Saulo ha pamatsi la kan Esteban.

### *Ampairapan ni Saulo hilay ampaniwala kan Apo Jesus*

Paubat ha allon habayton pinatsi hi Esteban, ay pinairapan hilay patêl ha Panginoon ya angkapi-tsi-tsipon ha Jerusalem. Kabay nanga-pitatayak hila ha probinsyan Judea haka ha probinsyan Samaria. Hilay labinloway apostol tana ya nabalag ha Jerusalem. <sup>2</sup> Ya bangkay ni Esteban etaman, ay in-ilbêng hén kayêngênan lan mangangéd, ya mapanhemonol ha Kautuhan ni Apo Namalyari.

<sup>3</sup> Noa, hi Saulo ay ampakikwanan na hilan pairapan haka ubuhén na hila dayi hén patsén hilay patêl ha Panginoon ya angkapi-tsi-tsipon, ta anhowênhowênen na hila ha binali-bali, ta hinoman ya mahélék na kanlan anhumonol kan Apo Jesus, mag-in lalaki o babayi, ay andakpêna hilan angguluyén hén gêtan ha hukulan.

### *Ya Mangéd ya Habi tungkol kan Apo Jesu-Cristo ay intoro ha probinsyan Samaria*

<sup>4</sup> Hilay ampaniwala kan Apo Jesus etaman, ay nanga-pitatayak, haka ay idi hila man hén milatêng, ay an-ipamwang lay Mangéd ya Habi tungkol kan Apo Jesu-Cristo. <sup>5</sup> Hi apostol Felipe ay nilumohan ha mihay mahlay ya balayan ya angkasakopan hén Samaria ta impamwang na kanlan atsi bayro ya tungkol kanan Mesias, ya Cristo, ya impangakon Mámilitas ya pinili ni Apo Namalyari hén mamaala. <sup>6</sup> Hén nagilam la ya panoro ni apostol Felipe, haka angkahélék lay kapapaépapah ya andaygén na, ay ginilam lan mangéd ya an-itoro na. <sup>7</sup> Mal-at ya nangarawak ya a angkahélék ya hinumapat ha kaatag, ya nipan-angaw hén inumalih hila hén ampaalihén na hila ni apostol Felipe. Kal-atan ya a maigalaw ya lawini, haka kal-atan ya pilay, ya nangabatsikwad ya bitsih, ay ampakabitay na. <sup>8</sup> Kabay haday higla lan ampaidi bayro ha balayan hén Samaria.

<sup>9</sup> Noa, main mihay lalaki ya nag langan Simon, ya ampaidi bayro, ya ampaghalumangka paubat hén hato pon. Kabay hilay taga-Samaria ay ampag-épapah kana. An-ipaglambung na ya hiyay mihay makhaw ya ampamaala.

<sup>10</sup> Anggilamén la yan kaganawan taga-Samaria, hilay mangabandi haka hilay mangairap. Ya panabêt la kan Simon, ay hiyay Kapangyarihan hén mihay dijos, ya ambaégén lan Makhaw. <sup>11</sup> Ampaniwal-an la ya gawan

nabuyot yay nan ampaghalmangka haka nabuyot hilay nan ampag-êpapah ha andaygên na. <sup>12</sup> Noa, hên naniwala hila ha impamwang kanla ni apostol Felipe ya tungkol ha pamanlokop ni Apo Namalyari, haka ya Mangêd ya Habi tungkol kan Apo Jesu-Cristo, ya Mesias, ay nagpabawtismo hilay lalaki haka babayi ha langan ni Apo Jesu-Cristo. <sup>13</sup> Hi Simon ay naniwala etaman, haka panga-ubat na hên binawtismoan, ay nakilako ya kan apostol Felipe haka ampag-êpapah ya ha kapapaêpapah ya andaygên ni apostol Felipe.

<sup>14</sup> Hên nagilam lan apostol ha Jerusalem, ya ampaniwala hilay nay taga-Samaria ha habi ni Apo Namalyari ya intoro ni apostol Felipe, ay in-utoh la hi apostol Pedro haka hi apostol Juan bayro. <sup>15</sup> Paglatêng lan apostol Pedro ay impanalangin la hila bayro ya naniwala kan Apo Jesus ta êmên humapat kanla ya Espiritu ni Apo Namalyari. <sup>16</sup> Dinyag lay habayto gawan ya Espiritu ni Apo Namalyari ay a pon hinumapat kanlan taga-Samaria, ta binawtismoan hilan bat ha langan ni Panginoon Jesus. <sup>17</sup> Impalunto lan apostol Pedro ya gamêt la kanlan nipaniwala kan Apo Jesus, biha hinumapat kanla ya Espiritu ni Apo Namalyari.

<sup>18</sup> Hên nahêlêk ni Simon ya kapapaêpapah ya dyag hên Espiritu ni Apo Namalyari ya hinumapat ha pinayluntoan lan gamêt lan apostol, ay in-amlog na kanlan apostol ya pera, <sup>19</sup> ya wana, “Dyanan yo ko etaman hên kapangyarihan, ta êmên hinoman ya paluntoan kon gamêt ay mahapatan hên Espiritu ni Apo Namalyari.”

<sup>20</sup> Noa, hinabi kana ni apostol Pedro, ya wana, “Hika haka ya pera mo ay mipalako ha impiyerno gawan êndat mon mahaliw moy an-idigalo ni Apo Namalyari. <sup>21</sup> A na ka dinyanan tungkulon ni Apo Namalyari hên kilamo ha panoro naêñ gawan alwan usto ya nakêm mo ha arapan na. <sup>22</sup> Paghêhêan haka talibatokan minay pamanyag karawakan, haka ka makiingalon man-alangin ha Panginoon ya dayi ay patawarên ka ha karawakan ya an-ihipêñ mo. <sup>23</sup> Ta angkahêlêk ko ya gawan hadyay kahêm mo ay anhumahakit ya nakêm mo, haka a ka makaalih ha pangaipoh mo ha pamanyag kasalanan.”

<sup>24</sup> Hinabi ni Simon kanlan apostol Pedro, ya wana, “Ampakihabi ko awud kamoyu ya ihalangin yo ko ha Panginoon, ta êmên ko a maranasan ya hatoy hinabi yo kangko!”

<sup>25</sup> Pangayari lan nanoro hên Mangangêd ya Habi ya nagilam la kan Panginoon Jesus, haka namaptêg ha nahêlêk la hên hiyay kalamo la, ay nag-orong hila ha Jerusalem hi apostol Pedro haka hi apostol Juan. Ha pag-orong la ay an-ipamwang lay Mangêd ya Habi tungkol kan Apo Jesu-Cristo ha kal-atan baryo ha probinsyan Samaria.

### *Hi apostol Felipe haka ya mihay taga-Etiopia*

<sup>26</sup> Hi Felipe etaman, ay main mihay anghel hên Panginoon ya naghabi kana, ya wana, “Tampol kan magtagloh ha dapit timog ha dann ha kabalah-balahan ya angkaubat ha Jerusalem ha palako ha balayan Gaza.” <sup>27</sup> Tampol yan nammita hi Felipe. Kaban atsi ya ha dann, ay nahêlêk nay mihay pinagtsiwal-an hên poon lan bansan Etiopia, ya reyna o Candace. Habaytoy pinagtsiwal-an, ay ampamaala ha kaganawan pibandian nan habaytoy reyna. Angkaubat ya ha Jerusalem ta nagsimba ya kan Apo Namalyari.

<sup>28</sup> Pauli yay na hên habayto hên nakahakay ha kalesa. Ambahaêñ nay habi ni Apo Namalyari ya inhulat ni Propeta Isaias, ya mihay mámpamwang hên an-ipaihip kana ni Apo Namalyari. <sup>29</sup> Hinabi nan Espiritu ni Apo Namalyari kan apostol Felipe, ya wana, “Pakarani ka ha anhakyan nan habain haka makipantag ka kana.” <sup>30</sup> Nuwayun nagpaketan hi apostol Felipe haka ya nanggilam hên inhulat ni Propeta Isaias, ya ambahaêñ hên

hatoy pinatsiwal-an. Kinotang na ya, “Angkaintindihan moy habain ya ambahaen mo?”

<sup>31</sup> Wanen pinatsiwal-an, “Ay-êmén kon maintindihan ya habaytsi no ayn mamipamulah kangko?” Hinagyat na hi apostol Felipe hén mikno ha dani na. <sup>32</sup> Habaytoy Kahulatan ya ambahaen na ay impahulat\* ni Apo Namalyari kanan mihay mámpamwang na ya hi Propeta Isaias. Êmén ya di:

“Hiyay nanad tupa ya anggétan ha paypatsan,  
nanad ya êt hén biseron tupa ya ayn labak kaban an-orogan.

Pinaulayan na hila.

<sup>33</sup> Hiyay minusmus haka impakarêng-êy. Intad la yan ayn karapatan.

Ayn yan kaapo-apoa,  
ta pinaipék lay biyay na di ha luta.”

<sup>34</sup> Hinabi nan pinatsiwal-an kan apostol Felipe, ya wana, “Ipalinaw mo raw kangko no hinoy an-ungkatén nan mámpamwang ni Apo Namalyari, ha binasa ko, ya sarili na, o kaatag?” <sup>35</sup> Impalinaw ni apostol Felipe, ya tungkol kan Apo Jesus ya habayto. Ya hiyay Mámiligtas ya an-êngganan la, ya nilumatêng. Biha impalinaw na êt kana ya kaatag pon ya tungkol ha Mangêd ya Habi. <sup>36</sup> Ha pamammita la ay nilatêng hila ha mihay logal ya nag laném. Kabay wanen pinatsiwal-an, “Main laném di. Malyari mikinan bawtismoan?” <sup>37</sup> (Hinabi kana ni apostol Felipe, ya wana, “Malyari, no ampaniwala kan boon nakêm.” Naghabi ya etaman, “Ampaniwala ko ya hi Apo Jesu-Cristo ay anak ni Apo Namalyari.”)

<sup>38</sup> Pinatégen nan pinatsiwal-an ya kalesa, ta nunaoy hila hén nilumohan ha laném, ta binawtismoan na ya ni apostol Felipe. <sup>39</sup> Pag-alíh la ha laném, ay kingwa hi apostol Felipe hén Espiritu ni Apo Namalyari. Paubat hén habayto ay a yay na nahélék hén hatoy pinatsiwal-an. Êmbayro man, ay inhundoy nay pamammita na hén hadyay higla. <sup>40</sup> Hi apostol Felipe etaman, ay namwangan na ya hiyay gintan hén Espiritu ni Apo Namalyari ha balayan Azoto. Paubat bayro ay impamwang nay Mangêd ya Habi tungkol kan Apo Jesu-Cristo ha balang balayan ya angkadan na, angga ha niabot ya ha balayan Cesarea.

## 9

### *Hén naniwala hi Saulo kan Apo Jesu-Cristo (Dyag 22:6-16; 26:12-18; Galacia 1:11-17)*

<sup>1</sup> Kanan habayto, ay pan-ihundo ni Saulo ya pamalimo haka pamatsi na kanlan ampaniwala ha Panginoon. Dinumaní ya ha pinakapoon pari, <sup>2</sup> ta nakikwa yan kahulatan ya main yan tungkulán hén humwén ha hinoman ya sinagoga ha balayan Damasco, ta êmén na hila dakpén hén gapohén, hén gétan ha Jerusalem ya hilay ampaniwala ha toro ni Panginoon Jesu-Cristo, mag-in lalaki o babayi.

<sup>3</sup> Ha pammita na, hén narani yay na ha Damasco, ay namakonkaynaman, ay main kapahiléw ya ubat ha langit ya nakapalibot kana. <sup>4</sup> Nihubhub ya ha luta, biha main yan nagilam ya naghabi kana, ya wana, “Saulo, Saulo! Awta ampairapan mo ko?”

<sup>5</sup> Kabay nangotang etaman hi Saulo, “Hino ka, Panginoon?”  
“Hiko hi Jesus, ya ampairapan mo.” wanen habi. <sup>6</sup> “Mirêng ka haka pakha ka ha balayan Damasco, ta habiên la kamo bayro ya dapat mon daygén.”

<sup>7</sup> Nakatsigag hilay kalamo ni Saulo. Nagilam lay habi noa, ayn hilan mahélék. <sup>8</sup> Nirêng hi Saulo, haka immukat nay mata na, noa, a yay nan

\* <sup>8:32</sup> Isaias 53:7-8.

makahêlêk. Kabay inakay la ya tana hên palako ha Damasco. <sup>9</sup> Tatloy allo yan a ampakahêlêk. A ya êt nangan haka ninêm.

<sup>10</sup> Bayro ha Damasco ay main mihay ampaniwala kan Apo Jesus ya nag langan Ananias. Kinahabi yan Panginoon ha pahalumata, ya wana, “Ananias!”

Kabay naghabi hi Ananias, ya wana, “Hino awud ya habayto Panginoon?”

<sup>11</sup> Wanen Panginoon kan Ananias, “Magtagloh ka ha bali ni Judas, bayro ha dann ya ambaêgêlan Matoynung, ta ikotang mo ya mihay lalaki ya taga-Tarso. Ya langan na ay Saulo, hiyay ampanalangin amêhê. <sup>12</sup> Ha mihay pahalumata, ay nahêlêk na ka hên anhumwên ha ampaidyanan na bayo impalunto moy gamêt mo kana ta êmên ya makahêlêk.”

<sup>13</sup> Noa, hinabi ni Ananias, ya wana, “Panginoon, mal-at ya namihumbung kangko hên tungkol kanan habain, haka tungkol ha pamarusa na kanlan ampaniwala kamo ha Jerusalem. <sup>14</sup> Haka atsi ya di ha Damasco hên main tungkulon ya naubat kanlan ampamaala kanlan pari hên dakpêna hilay ampagsimba kamo.” Habaytoy hinabi ni Ananias.

<sup>15</sup> Noa, wanen Panginoon kana, “Êmbayro man, ay lakwên mo ya, ta hiya ya pinili ko hên mamipamwang hên tungkol kangko, kanlan alwan Israelita haka kanlan poon la, haka kamoyun Israelita. <sup>16</sup> Hikoy mamipamwang kana hên kal-atan ya kairapan ya dapat nan têêhêta ta êmên maipamwang ya tungkol kangko.”

<sup>17</sup> Kabay nammita yay na hi Ananias ta hinumwên ya ha andyanan ni Saulo. Impalunto nay gamêt na kana ta wana kan Saulo, “Patêl, in-utoh na ko ni Panginoon Jesus, ya nagpahlêk kamo ha dann hên palako ka bayri. In-utoh na ko bayri ta êmên ka makahêlêk oman, haka ka mahapatan hên Epiritu ni Apo Namalyari hên main kapangyarihan.” <sup>18</sup> Namakonkaynaman ay main natata ya nanad hikhik hên kênan lanêm ya naubat ha mata ni Saulo, haka yay na nakahêlêk. Nirêng yay na, ta tampol yay nan nagpabawtismo. <sup>19</sup> Pangayari, ay nangan yay na haka nag-orong ya hêkaw na.

### *Ya paypamwang ni Saulo ha Damasco*

Nanugêl ya bayro ha Damasco hi Saulo hên ungnoy allo kanlan ampaniwala kan Apo Jesus. <sup>20</sup> Tampol nan impamwang ha mal-at ya sinagoga, ya hi Apo Jesus, ay Anak ni Apo Namalyari.

<sup>21</sup> Ampag-êpapah hilay kal-atan ya ampakagilam hên panoro na. Hinabi la, “Hiyay namairap kanlan nipaniwala kan Apo Jesus ha Jerusalem. Haka atsi ya di ha Damasco hên main tungkulon ya naubat kanlan ampamaala kanlan pari ha Jerusalem hên gapohêna hilay ampagsimba kan Apo Jesus hên gêtan hila ha arapan la ha Jerusalem.”

<sup>22</sup> Noa, lalon hinumkaw ya nakêm ni Saulo haka hiyay nag-in magaling ha pamaptêg na hên tungkol kan Apo Jesus, ya hiyay Cristo, ya impangakon Mâmiligtas, ya pinili ni Apo Namalyari hên mamaala, ya an-êngganan la. Kabay hilay Israelita bayro ha Damasco, ya anhumalanghang kan Saulo, ay ayn mahabi kana.

<sup>23</sup> Hêñ nakalabah ya ungnoy allo, ay pinulong la yan poon lan Israelita.

<sup>24</sup> Allo-yabi, ay nakal-an hilan manambang kana ha paawah ha balayan, ta labay la yan patsê. Noa, namwangan ni Saulo ya habayto. <sup>25</sup> Kabay mihay yabi ay pinaikno la hi Saulo ha mahlay ya lubon hên hilay nahagyat nan maniwala kan Apo Jesus, ta in-antotoh la ya ha paka hên matag-ay ya bakod hên Damasco, ta êmên ya makatakah ha namulong kana.

### *Ya pamag-orong ni Saulo ha Jerusalem*

<sup>26</sup> Paglatêng ni Saulo ha Jerusalem, ay labay na dayi hên makilamo kanlan ampaniwala kan Apo Jesus. Noa, nalimwan hila kana, ta a hila maniwala ya ampaniwala yay na etaman kan Apo Jesus, hi Saulo. <sup>27</sup> Noa, nilamoan na ya ni Bernabe kanlan apostol. Ta impamulah na kanla no ay-êmên nan nahêlêk ni Saulo ya Panginoon, hên atsi ya ha dann. Hinabi na êt ni Bernabe kanla ya kakhawan nakêm ni Saulo hên namipamwang hên tungkol kan Apo Jesus ha Damasco. <sup>28</sup> Paubat hên habayto, ay kala-kalamo la yay na hi Saulo hên ampanoro ha Jerusalem. Kakhawan nakêm na hên ampanoro hên tungkol kan Panginoon Jesus. <sup>29</sup> Main êt bayro hên Israelita ya ampaghabin Griego. Hi Saulo ay nakihabi kanla, haka nakihubakan ya kanla, kabay labay la yan patsên. <sup>30</sup> Hên namwangan lan ampaniwala kan Apo Jesus ya labay la yan patsên, ay in-atêl la ya hi Saulo ha balayan Cesarea, haka la ya pinabita ha balayan hên Tarso.

<sup>31</sup> Gawan êmbayroy nalyari, ay tinunggên pon ya gulo ha boon probinsyan Judea, probinsyan Galilea, haka ha probinsyan Samaria, kabay main pon kapatékbékan hilay patêl ha Panginoon ya angkapi-tsi-tsipon. Angkapahanan hila, haka antumaniêh ya paniwala la gawan ha hawop hên Espiritu ni Apo Namalyari, haka gawan ha ampamiyay hila hên main galang ha Panginoon.

### *Hi apostol Pedro ha balayan Lida haka ha balayan Jope*

<sup>32</sup> Hi apostol Pedro etaman, ha pamanlumagay na hên maniraw kanlan ampaniwala kan Panginoon Jesu-Cristo, ay hiniraw na hilay ampaniwala ha balayan Lida. <sup>33</sup> Bayro nan nahêlêk ya mihay lalaki ya nag langan Eneas, ya nakakatuloy hên waloy taon gawan nalumpo ya. <sup>34</sup> Wani apostol Pedro kana, “Eneas, inalih ni Panginoon Jesu-Cristo ya hakit mo. Mirêng ka ta ikumpini minay angkatuluyan mo.” Tampol yan nirêng etaman. <sup>35</sup> Kaganawan lan atsi bayro ha balayan Lida haka hilay taga patal Saron, ay nakahêlêk kan Eneas ya ampakabitay na, kabay naniwala hila ha Panginoon.

<sup>36</sup> Ha balayan Jope ay main mihay babayi ya hi Tabita ya ampaniwala kan Apo Jesus. Ya langan na ha habin Griego ay Dorcas, ya labay habiên oyha. An-iubuh nay panaon na ha pamanyag hên kangêran, ta anhawpan nay mangairap. <sup>37</sup> Kanan habayto ay nagkahakit ya haka natsi. Pinunahan lay bangkay na ta in-unik lay na ha mihay kuwarto ha tag-ay. <sup>38</sup> Napidani ya balayan Jope haka ya balayan Lida, kabay hên nabalit-an lan ampaniwala kan Apo Jesus ha Jope, ya atsi ya ha Lida hi apostol Pedro, ay namiutoh hilan loway lalaki ya makihabi ya tampol yan maniraw ha Jope.

<sup>39</sup> Nakilako ya etaman kanla. Panlumatêng la bayro ay gintan la ya ha kuwarto ya nag bangkay. Hilay babayi ya bawo, ay naubuh hên ampanangih gawan natsi ya hi Dorcas, ay napaidani kan apostol Pedro ta impakit la kana ya takop la, ya tinayı na hên haton angkabiyyay ya pon. <sup>40</sup> In-ubuh na hilan pinaawah ni apostol Pedro ta nandoko yan nanalangin. Pangayari ay inarap nay bangkay ni Tabita, ta wana, “Tabita, mimata ka!” Tampol nan immukat ya mata na ni Tabita. Hên nahêlêk na hi apostol Pedro, ay nikno yay na. <sup>41</sup> Tinalan ni apostol Pedro ya gamêt na, ta hinawpan na yan mirêng. Bayo binaêg na hilay ampaniwala kan Apo Jesus, kalamo hilay bawo ta in-arap na ya kanla hi Dorcas, ya biniyay oman. <sup>42</sup> Habaytsi ya nalyari ay namwangan ha boon Jope, kabay mal-at ya naniwala ha Panginoon. <sup>43</sup> Hi apostol Pedro ay nabuyot hên nanugêl ha Jope ha bali ni Simon, ya máy-il-an hên balat ayop ta daygêñ hên hino-hino kay na hên ya dyag.

<sup>1</sup> Ha balayan Cesarea ay main lalaki ya nag langan Cornelio. Hiya ay kapitan hên hundaloh ya taga-Roma. Ya baêg kanlan pangkat na, ay hundalon Italia. <sup>2</sup> Maka-Diyos hi Cornelio. Hiya haka hilay kaganawan kalamo na ha bali na ay ampagsimba kan Apo Namalyari. Panay yan ampanalangin, haka ampanawop kanlan Israelita ya mangairap. <sup>3</sup> Mihay maapon hên mag-aalas tres, ay nakahalumata yan mihay anghel ni Apo Namalyari ya hinumwên ha bali na, ya wana, “Cornelio!”

<sup>4</sup> Hadyay limo nan ampamakapopoh hên naghabi, ya wana, “Hino ya habayto, Panginoon?”

Wanan anghel, “Ginilam ni Apo Namalyari ya panalangin mo kana, haka nahêlêk nay pamanawop mo ha mangairap. <sup>5</sup> Mamiutoh ka amêhêh hên ungnoy lalaki ha balayan Jope, ta alapêñ la ya mihay lalaki ya nag langan Simon Pedro. <sup>6</sup> Atsi ya bayro ha bali ni Simon, ya mihay máy-il-an hên balat ayop, ta daygêñ hên hino-hino kay na hên ya dyag. Ya bali na ay atsi ha laylay hên dagat.” <sup>7</sup> Pamakaalíh hên anghel, ay binaêg ni Cornelio ya lowa kanlan ampaghuyo kana, haka mihay hundaloh na ya kapareho nan maka-Diyos. <sup>8</sup> Impamwang na kanla ya nalyari, bayo in-utoh na hila ha balayan Jope.

<sup>9</sup> Hêñ humonoy allo, hêñ mag-uugtoy na, ay atsi hilay na ha dann ya pa-howêñ ha Jope. Hi apostol Pedro etaman, ay nunik ha napatal ya bubungan bali ta manalangin. <sup>10</sup> Kaban ampanluto hilay kalamo na, ay matsu yay nan lonoh, haka nakahalumata ya. <sup>11</sup> Nahêlêk nay langit ya nagloat, biha main yan nahêlêk ya nanad mahlay ya uwêh ya an-i-antotoh ha luta ya nakabitsin ha apat ya duyo. <sup>12</sup> Atsi bayro ya hinon bawal lan kênaêñ hêñ hilay Israelita. Main hino-hino kay na hêñ ya mahlay ya ayop, boy ya nanad ha utan, haka ya kaatag ya manok lalê ya imbawal kanla. <sup>13</sup> Nagilam nay habi ya wana, “Mirêng ka, Pedro. Mamatsi kan kênaêñ mo!”

<sup>14</sup> Noa, wani apostol Pedro, ya wana, “Panginoon, a ko madyag ya habain. A ko êt nangan hêñ imbawal kannaêñ Israelita.”

<sup>15</sup> Nagilam nay na êt oman ya naghabi kana, ya wana, “Alwa minan itad hêñ bawal, ya maêkan, ya a nay nan an-ibawal ni Apo Namalyari.” <sup>16</sup> Katatlon nagilam haka nahêlêk ni apostol Pedro ya habayto. Pangayari, ay nagtag-ay ha langit ya habaytoy nanad uwêh ya nakaantotoh.

<sup>17</sup> Hêñ ampapakaihipêñ ni apostol Pedro ya nahalumata na, ay lumatêng hilay in-utoh ni Cornelio ta namwangan lay nay bali ni Simon, ya máy-il-an hêñ balat ayop. <sup>18</sup> Namaêg hila, ya wanla, “Main ampanugêl di ya nag langan Simon Pedro?”

<sup>19</sup> Ampapakaihipêñ na pon ni apostol Pedro ya labay habiêñ hêñ nahalumata na hêñ hinabi kana hêñ Espiritu ni Apo Namalyari, ya wana, “Main tatloy lalaki di ya ampanapol kamo. <sup>20</sup> Kabay magtaoy kay na ta paan kan mag-alangan hêñ kilako kanla ta hiko ya namiutoh kanla.” <sup>21</sup> Kabay nagtaoy hi Pedro ta hinabi na kanlan ampanapol kana, ya wana, “Hiko ya antapolêñ yo. Hinoy maihawop ko kamoyu?”

<sup>22</sup> “In-utoh kay di ni Kapitan Cornelio. Hiyay ampagsimba boy mahonol kan Apo Namalyari, haka hiyay anggalangêñ lan Israelita. Kinahabi yan mihay anghel ni Apo Namalyari ya ipaalap na ka, ta êmêñ na magilaman ya pamipamwang mo.” <sup>23</sup> Pinahowêñ na hila ni Pedro ha lalêñ bali. Hinagyat na hila hêñ matuloy bayro hêñ yabin habayto.

Hêñ humonoy allo, ay nakilako yay na kanla. Nakilako hila etaman kanla ya ungnoy ampaniwala kan Apo Jesus ya taga-Jope. <sup>24</sup> Hêñ humonoy allo, ay nilumatêng hilan Pedro ha balayan Cesarea. Ampangênggan ana hi Cornelio, hilay kamag-anak ni Cornelio, haka hilay mantêg kabalay ni

Cornelio, ya hinagyat na. <sup>25</sup> Hêñ anhumwêñ dayi hi apostol Pedro ay tinupa ya ni Cornelio, hêñ nanlokob ha arapan ni apostol Pedro ta simbaêñ na ya dayi. <sup>26</sup> Noa, hinabi ni apostol Pedro kana, ya wana, “Mirêng ka. Paan mo kon simbaêñ ta tawo kon bêngat.” <sup>27</sup> Hêñ an-ihundo lay pamihabi la hêñ pahowêñ ha bali, ay nahêlêk ni apostol Pedro ya kal-atan tawo ya naka-tsipon bayro. <sup>28</sup> Wana kanla, “Muwang yoy na ya bawal ha Kautuhan naêñ Israelita hêñ makilamo o maniraw ha alwan Israelita. Noa, impamwang na kangko ni Apo Namalyari ya hinoman ay paan kon itad hêñ narêmêk. <sup>29</sup> Kabay hêñ impalako yo ko, ay a ko nag-alangan hêñ nakilako. Haka labay kon mamwangan no awta impaalap yo ko.”

<sup>30</sup> Kabay hinabi ni Cornelio, ya wana, “Main nanan apat ya allo, ha êmêñ di êt ya oras hêñ mag-aalas tres hêñ maapon, hêñ ampanalangin ako bayri ha bali ko, ay namakonkaynaman, ay main nirêng ha arapan ko ya mihay lalaki ya nakatakop hêñ ampakahilêw. <sup>31</sup> Hinabi na kangko, ya wana, ‘Cornelio! Ginilam ni Apo Namalyari ya panalangin mo kana, haka nahêlêk nay panawop mo kanlan mangairap. <sup>32</sup> Mamiutoh kan ungnoy lalaki ha balayan Jope ta alapêñ la ya mihay lalaki ya nag langan Simon Pedro. Atsi ya bayro ha bali ni Simon, ya mihay máy-il-an hêñ balat ayop ta daygêñ hêñ hino-hino kay na hêñ ya dyag. Ya bali na ay atsi ha laylay hêñ dagat.’ <sup>33</sup> Kabay tampol katan impaalap. Halamat etaman ta nakilako ka bayri. Naka-tsipon kay di ha hêlêk ni Apo Namalyari, ta êmêñ naêñ pakgilamêñ ya impahabi hêñ Panginoon kamo.”

### *Ya paypamwang ni apostol Pedro*

<sup>34</sup> Nanoro yay na hi apostol Pedro, ya wana, “Muwang kinan taganán pêtêg ya pamanlêk ni Apo Namalyari ha tawo ay pantag. <sup>35</sup> Anlugurêñ nay hinoman ya main limo kana haka ampanyag hêñ kalabayan na, kaapo-apoan man ni apo Israel o alwa. <sup>36</sup> Muwang yoy na ya Mangêd ya Habi, ya impamwang nay na kannaêñ Israelita ya tungkol ha pamakiúmang tamo kana gawan kan Apo Jesu-Cristo, ya Panginoon hêñ balang miha. <sup>37</sup> Muwang yo etaman ya nalyari ha boon probinsyan Judea, paubat ha probinsyan Galilea hêñ namipamwang hi Juan Bautista hêñ tungkol ha pamawtismo. <sup>38</sup> Muwang yo etaman ya tungkol kan Apo Jesus ya taga-Nazaret. Impahapat ni Apo Namalyari kana ya Espiritu na haka kapangyarihan na. Nammita ya ha ay-iri man ya logal, hêñ ampanyag hêñ panay kangêran. Gawan atsi kana hi Apo Namalyari ay ampaalihêñ na etaman hi Satanas, ya ampamairap kanlan kaatag.

<sup>39</sup> “Hikay ya apostol ni Panginoon Jesu-Cristo, ay ampamaptêg ha kaganawan kapapaêpapah ya dinyag na, ha logal naêñ ha Jerusalem, haka ha kaatag êt ya balayan ha Israel. Êmbayro man, ay impapatsi la yan impako ha koros. <sup>40</sup> Noa, hêñ nalabah ya tatloy allo, ay biniyay yan oman ni Apo Namalyari, haka ya nagpahlêk kannaêñ. <sup>41</sup> Hikay ay nakaaêm na hêñ biniyay yan oman ni Apo Namalyari. A ya nagpahlêk ha kal-atan, noa, kannaêñ bat hêñ pinili ni Apo Namalyari hêñ mamaptêg ya nabiyay yan oman hi Apo Jesus. <sup>42</sup> Hikay ya in-utoh na hêñ maypamwang hêñ Mangangêd ya Habi tungkol kana, haka hêñ mamaptêg ya hiyay pinili ni Apo Namalyari hêñ manatol kanlan natsi haka kanlan angkabiyay, ha lumatêng ya allo. <sup>43</sup> Hiyay impamwang lan mámpamwang hêñ an-ipaihip kanla ni Apo Namalyari, hêñ haton lagi. Impapêt la, ya mapatawad ya kasalanan lan maniwala kana gawan ha kapangyarihan na.”

*Hilay alwan Israelita ay ampananggap hêñ Espiritu ni Apo Namalyari*

<sup>44</sup> Kaban ampaghabi ya pon hi apostol Pedro, ay hinumapat ya Espiritu ni Apo Namalyari kanlan Cornelio ya ampanggilam hēn toro na. <sup>45</sup> Nipag-épapah hilay Israelita ya taga-Jope, ya ampaniwalay na kan Apo Jesus, ya kalamo ni apostol Pedro, no awta hinumapat ya Espiritu ni Apo Namalyari kanlan Cornelio, ya alwan Israelita. <sup>46</sup> Muwang lay habayto, ta nagilam la hilan Cornelio hēn ampaghabi hēn hino-hino kay na hēn ya habi, ya a la muwang, ha pamagpuri la kan Apo Namalyari. Kabay hinabi ni apostol Pedro, ya wana, <sup>47</sup> “Hinumapat kanlay Espiritu ni Apo Namalyari hēn nanad ha nalyari kannaēn hēn Israelita. Yarin a hila mabawtismoan agyan alwa hilan Israelita!” <sup>48</sup> Biha in-utoh ni apostol Pedro ya bawtismoan hilan Cornelio ha langan ni Panginoon Jesu-Cristo. Pangayari ay pinakihabi lan Cornelio kan apostol Pedro ya paidi ya pon bayro hēn ungnoy allo.

## 11

### *Ya pamipamwang ni apostol Pedro kanlan patêl ha Panginoon ya angkapi-tsi-tsipon ha Jerusalem*

<sup>1</sup> Namwangan lan apostol haka hilay kaatag ya ampaniwalala kan Panginoon Jesu-Cristo ha probinsyan Judea, ya hilay alwan Israelita, ay ampaniwalay na ha habi ni Apo Namalyari. <sup>2</sup> Hēn nag-orong hi apostol Pedro ha Jerusalem, hinabyanan la yan kapareho nan Israelita. An-ipalêkpêk la ya dapat patuli hilay ampaniwalala kan Panginoon Jesu-Cristo, no labay la hēn madyanan hilan biyay ya ayn angga. <sup>3</sup> Hinabi la kan apostol Pedro, ya wanla, “Hinumwēn ka ha bali lan alwan Israelita, haka nakiaēm ka êt kanla!” <sup>4</sup> Kabay impamwang na kanla ya nalyari paubat hēn nakahalumata yan hatoy nanad uwēh kaban ampanalangin ya.

<sup>5</sup> Wana kanla, “Hēn atsi ko ha Jope hēn ampanalangin, ay nakahalumata ko. Nakahēlēk akon nanad mahlay ya uwēh ya nakabitsin ha apat ya duyo ya an-i-antotoh ha dani ko, ya ubat ha langit. <sup>6</sup> Pinakapopoh ko yan mangēd ya habayto bayo nahēlēk ko bayro ya kaganawan ayop ya bawal tamon kēnaēn hēn hikitamoy Israelita. Main bayro hēn mahlay ya ayop haka ya nanad ha utan haka ya kaatag ya manok lalē ya bawal kantamo. <sup>7</sup> Nagilam koy habi, ya wana, ‘Mirēng ka, Pedro. Mamatsi kan kēnaēn mo!’ <sup>8</sup> Noa, wangko, ‘Panginoon, a ko madyag ya habain. A ko êt nangan hēn bawal kannaēn Israelita.’ <sup>9</sup> Nagilam kina êt oman ya habi ya ubat ha langit, ya wana, ‘Alwa minan itad hēn bawal, ya maēkan ya a nay nan an-ibawal ni Apo Namalyari.’ <sup>10</sup> Katatlon oman nalyari ya habayto. Pangayari, ay ginuloy ya habaytoy nanad uwēh hēn patag-ay ha langit.

<sup>11</sup> “Kanan habayto, ay main nilumatēng ha bali ya andyanan ko, ya tatloy lalaki ya in-utoh ni Cornelio, ya mihay alwan Israelita, ya ampaidi ha Cesarea. <sup>12</sup> Hinabi nan Espiritu ni Apo Namalyari ya paan akon mampotog hēn kilako kanla, agyan alwa hilan Israelita. Main etaman anēm ya patêl ha Panginoon ya taga-Jope, ya nakilamo kangkon palakon Cesarea, haka hikay ay hinumwēn ha bali lan Cornelio. <sup>13</sup> Hinabi ni Cornelio kannaēn ya nakahēlēk yan anghel ha bali na, ya wana kana, ‘Mamiutoh kan mangalap hēn mihay lalaki ya nag langan Simon Pedro ha balayan Jope. <sup>14</sup> Habiēn na kamoyu no ay-ēmēn mailigtas ha parusa ya ayn anggaan ya kaganawan ya atsi ha bali mo.’

<sup>15</sup> “Hēn nag-umpisa kon naghabi kanla, ay hinumapat kanla ya Espiritu ni Apo Namalyari, hēn nanad êt ha panhumapat na kantamo hēn haton una. <sup>16</sup> Napanémtēman ko bayto ya hinabi ni Panginoon Jesu-Cristo, ya wana, ‘Lanēm ya ginamit ni Juan hēn namawtismo ya. Noa, hikaw ay bawtismoan

ha Espiritu ni Apo Namalyari ya ipahapat na kamoyu.’ <sup>17</sup> No impahapat ni Apo Namalyari ya Espiritu na kanla, hên nanad ha impahapat na kantamo, hên babayo kitamo hên naniwala kan Panginoon Jesu-Cristo, ay ayn akon tungkulan hên manalanghang kan Apo Namalyari!” Habayto ya hinabi ni apostol Pedro.

<sup>18</sup> Hêñ nagilam lay hinabi na, ay intêgêñ lay pamamintas la kana, ta nagpuri hilay na kan Apo Namalyari, ya wanla, “No êmbayro awud, ay dinyanan ni Apo Namalyari ya alwan Israelita, hên panaon, hên maghêhê ha kasalanan la, ta êmêñ hila madyanan hên biyay ya ayn angga hên kalamo na.”

### *Hilay patêl ha Panginoon ya angkapi-tsi-tsipon ha Antioquia*

<sup>19</sup> Paubat hêñ haton pinatsi hi Esteban, ay hilay ampaniwala kan Panginoon Jesus ay nanga-pitatayak gawan ha hadyay pamairap kanla. Main nipalako ha probinsyan Fenicia, ha Chipre, haka ha balayan Antioquia. Ayiri hila man hêñ nilatêng, ay impamwang lay Mangêd ya Habi tungkol kan Panginoon Jesus. Noa, intoro lan bat ya habayto, kanlan Israelita. <sup>20</sup> Noa, kalamo la hilay kaatag ya ampaniwala kan Panginoon Jesus, ya taga-Chipre haka ya taga-balayan Cirene, ya namipamwang hêñ Mangêd ya Habi tungkol kan Panginoon Jesus kanlan Griego\* hêñ nilumatêng hila ha Antioquia. <sup>21</sup> Atsi kanlan nanoro ya kapangyarihan hêñ Panginoon, kabay mal-at ya naniwala kana.

<sup>22</sup> Namwangan lan patêl ha Panginoon ya angkapi-tsi-tsipon ha Jerusalem, ya angkalyari ha Antioquia. Kabay in-utoh la hi Bernabe hêñ maniraw ha Antioquia. <sup>23</sup> Hêñ nilatêng bayro hi Bernabe, ay nahêlêk nay iningalwan ni Apo Namalyari ya hilay taga-Antioquia. Hiyay bapan higla. Inaralan na hila ya ihundo lay paniwala la kan Panginoon Jesus hinoman ya malyari. <sup>24</sup> Gawan mangêd ya hi Bernabe, haka ampamiyay ya ha kapangyarihan hêñ Espiritu ni Apo Namalyari, haka makhaw ya paniwala na, ay mal-at êt ya naniwala ha Panginoon.

<sup>25</sup> Pamakayari, ay nagtaglohi Bernabe ha balayan Tarso, ta tapolêñ na hi Saulo. <sup>26</sup> Hêñ natapol na ya, ay pinagkalamo na ya ha Antioquia. Nanugêl hila bayro hêñ mihay taon hêñ kala-kalamo la hilay patêl ha Panginoon ya angkapi-tsi-tsipon. Nanoro hila ha kal-atan. Bayro ha balayan Antioquia, ay kauna-unaan hilan binaêg hêñ Cristiano, ya hilay ampaniwala kan Panginoon Jesus.

<sup>27</sup> Kanan habayto, ay main ungnoy mámpamwang hêñ an-ipaihip kanla ni Apo Namalyari, ya nilumatêng ha balayan hêñ Antioquia ya naubat ha Jerusalem. <sup>28</sup> Ha kapangyarihan hêñ Espiritu ni Apo Namalyari ay nirêng ya miha kanla ya nag langan Agabo, ta impamwang nay magkamain hadyay lonoh ha boon luta. (Natupad ya hatsi hêñ haton ampamaala ya pon hi Emperador Claudio.) <sup>29</sup> Tinalagá lan ampaniwala kan Apo Jesus hêñ mamagtan hêñ agyu lan maihawop kanlan patêl ha Panginoon ya ampaidi ha probinsyan Judea. <sup>30</sup> Êmbayro ya dinyag la, haka la impagtan ya habayto kanlan Bernabe boy Saulo ta indin la etaman kanlan toa ya ampamaala ha patêl ha Panginoon ya angkapi-tsi-tsipon ha Jerusalem.

## 12

### *Nag-umpisay na êt ya hadyay pamairap*

---

\* **11:20** Ya alwan Israelita.

<sup>1</sup> Kanan habayto, ay ampairapan ni Arin Herodes\* ya kaatag kanlan patêl ha Panginoon ya angkapi-tsi-tsipon. <sup>2</sup> Impapotoh nay ulo ni apostol Santiago ya kapotoh pohêl ni apostol Juan. <sup>3</sup> Hêñ nahêlêk ni Arin Herodes, ya hinumigla hilay Israelita ha pamamatsi kan apostol Santiago, ay impadakêp na etaman hi apostol Pedro. (Nalyari ya habayto hêñ Pistan Puto ya ayn Pampaalsa.) <sup>4</sup> Pamakadakêp la kan apostol Pedro, ay impahukul la ya, haka impabantay kanlan hundaloh hêñ apat ya pangkat, ya main mani apat ya hundaloh. Naihipan ni Arin Herodes, ya iarap na yan lingonêñ hi apostol Pedro kanlan kal-atan, pangayarin pista. <sup>5</sup> Kaban atsi ya ha hukulan hi apostol Pedro, ay an-ipaka-panalangin la ya, hêñ hilay patêl ha Panginoon ya angkapi-tsi-tsipon.

### *Imbuhan hi apostol Pedro hêñ anghel ni Apo Namalyari*

<sup>6</sup> Hêñ yabin bayo na yan iarap dayi ni Arin Herodes, ha kal-atan, hi apostol Pedro, ay nabêlêw hi apostol Pedro hêñ nakataykala hêñ loway taykala, ha pibonakan hêñ loway hundaloh. Main êt hêñ hundaloh ya ampagbantay ha kabat hêñ hukulan. <sup>7</sup> Namakonkaynaman, ay main mihay anghel hêñ Panginoon ya namukaw kan apostol Pedro. Hinumawang ya andyanan lan apostol Pedro. Hinabi nan anghel kana, ya wana, “Parahêñ minan mimata!” Tambêng naokal ya taykala ya atsi ha gamêt ni apostol Pedro. <sup>8</sup> Bayo wan anghel, “Ihulod minay takop mo, magtagkêh ka, haka ihulod minay apin bitsih mo, ta kilako ka kangko.” Kabay hinonol nay hinabi kana. <sup>9</sup> Nakihonol ya kanan anghel hêñ paawah ha hukulan, êndat ni apostol Pedro no alwan pêtêg ya angkalyari kana, ta êndat na no halumata nay habayto. <sup>10</sup> Nalibahan lay nay unan pangkat hêñ bantay haka ikalwan pangkat. Hêñ atsi hilay na ha kabat hêñ hukulan ya paawah ha balayan, ay nagloat yan sarili na ya habaytoy kabat. Hêñ nakaawah hilay na, ha pamagdann la ha mihay dann ay biglan napanat ya hatoy anghel.

<sup>11</sup> Namwangan na bayto ni apostol Pedro, ya pêtêg awud ya nalyari kana, kabay wana, “Muwang kinan pêtêg ya in-utoh ni Apo Namalyari ya anghel na ta inligtas ako ha pamatsi na kangko ni Arin Herodes ya pan-êngganan lan kapareho kon Israelita ya malyari kangko.” <sup>12</sup> Hêñ mapakaihip nay na, ya nakabuhan yay na, ay nagtagloh ya ha bali ni Maria, ya indo ni apostol Juan Marcos. Mal-at ya naka-tsipon bayro hêñ ampanalangin. <sup>13</sup> Hêñ nilumatêng ya bayro, ay namaêg ya. Mihay ipoh ya dalaga ya nag langan Rode ya napaidani ha kabat. <sup>14</sup> Nabalyan nay baêg ni apostol Pedro, kabay ha hadyay higla na, ay naliwaan nan loatêñ ya kabat, ta tampol yan nuwayu hêñ impamwang ha kalamo na ya atsi ya ha kabat hi apostol Pedro.

<sup>15</sup> “Angkamurit kay na lawêh!” wanla kana. Noa, impilit na ya atsi ya bayro hi apostol Pedro ha kabat. Gawan a hila naniwala ya nakabuhan hi apostol Pedro, ay wanla, “Kayno anghel ni Apo Namalyari ya habayto, ya ampangillag kana!” <sup>16</sup> Hi apostol Pedro etaman, ay pangakantsig ha kabat angga ha niloat lay na. Hêñ mahêlêk la yay na, ay nipag-êpapah hilay na. <sup>17</sup> Siningyalan na hila, ya paan hilan maglabak. Hêñ nakahowêñ yay na, ay impamwang na kanla no ay-êmêñ yan in-awah hêñ Panginoon ha hukulan. Hinabi na êt kanla ya ipamwang la ya habaytsi kan Santiago haka kanlan kaatag ya patêl ha Panginoon. Bayo nag-alîh ya bayro ta nammita ya ha kaatag ya logal.

<sup>18</sup> Hêñ pangamaranon, ay hadyay gulo lan hundaloh ya ampagbantay ha hukulan ha pangapanat ni apostol Pedro. A la muwang no hinoy nalyari

\* <sup>12:1</sup> Herodes Agripa I. Hêlkêñ ha panlêkan labay habiêñ hêñ habi di ha bokotan hêñ hata Bibliya.

kana. <sup>19</sup> Impatapol ya ni Arin Herodes hi apostol Pedro. Hêñ a lay na matapol, ay impakotang na hilay bantay, bayo impapatsi na hila.

Hêñ pangayarin habayto ha probinsyan Judea, ay nammita yay na hi Arin Herodes ha balayan Cesarea ta nanugêl ya bayro.

### *Ya pangamatsi ni Arin Herodes*

<sup>20</sup> Gawan manay na ya huluk ni Arin Herodes ha taga-balayan Tiro haka ha taga-balayan Sidon, ay tinalagá lan habayto hêñ sabay-sabay hêñ makihabi kana hêñ makikahundoan hila kana. Nahagyat la hi Blasto ya ampamaala bayro ha bali ni Arin Herodes hêñ hawpan hilan makikatoynungan, gawan angkaubat ha angkasakopan ni Arin Herodes ya an-ikabiyay la.

<sup>21</sup> Hêñ niabot ya allon pamiaarap la, ay naghulod hi Arin Herodes hêñ takop pan-ari, haka ya nikno ha iknoan nan mamaala ta naghabi yan nabuyot kanla. <sup>22</sup> Nipan-angaw hilay kal-atan, ya wanla, “Habaytsi ya am-paghabi ay mihay diyos, alwan tawo!” <sup>23</sup> Hêñ habayto êt ay dinyanan ya hêñ hakit hêñ mihay anghel hêñ Panginoon gawan tinanggap nay pamagsimba, ya hépat bêngat kan Apo Namalyari. Hiya ay inowêl angga ha hiya ay natsi.

<sup>24</sup> Hêñ habayto ay panlulum-at hilay ampanggilam hêñ habi ni apo Namalyari.

<sup>25</sup> Hêñ nayari nay na ni Bernabe haka ni Saulo ya dyag la ha Jerusalem, ay gintan la hi Juan Marcos hêñ paorong ha Antioquia hêñ kalamo la.

## 13

### *In-utoh hi Bernabe haka hi Saulo hêñ Espiritu ni Apo Namalyari*

<sup>1</sup> Main kanlan patêl ha Panginoon ya angkapi-tsi-tsipon, ha balayan Antioquia ha probinsyan Siria, ya mâmipamwang hêñ an-ipaihip kanla ni Apo Namalyari, haka main mâmitoro kanlan ampaniwala kan Panginoon Jesus no hinoy dapat mag-in pamimiyay la. Ya langan la ay hi Bernabe, hi Simeon, ya ambaêgêlan Negro, hi Lucio ya taga-Cirene, hi Saulo, haka hi Manaen, ya kapatubo ni Gobernador Herodes Antipas\* ha probinsyan Galilea. <sup>2</sup> Mihay allo hêñ nagtêeh hila hêñ a nangan ta êmén la maiboo ya nakêm la ha pamagsimba la ha Panginoon, ay hinabi kanla hêñ Espiritu ni Apo Namalyari ya ipapawa la hi Bernabe haka hi Saulo kanlan kaatag ta main yan ipadyag kanla. <sup>3</sup> Kabay panga-ubat la hêñ nagtêeh hêñ a nangan, ta êmén a maabala ya panalangin la, ay impalunto lay nay gamêt la kan Bernabe haka kan Saulo ta inhalangin la hila bayo impabita hilay na.

### *Ya panoro ha polun Chipre ni Bernabe haka ni Saulo, ya ambaêgê etaman apostol Pablo*

<sup>4</sup> Kabay nilumohan hi Bernabe haka hi Saulo ha balayan Seleucia gawan ha utoh nan Espiritu ni Apo Namalyari. Paubat bayro ay hinumakay hila ha barko hêñ palako ha polun Chipre. <sup>5</sup> Pamiabot la bayro ha balayan hêñ Salamina, ha polun Chipre, ay impamwang lay nay habi ni Apo Namalyari ha mal-at ya sinagoga ya pagsimbaan lan Israelita. Kalamo la hi Juan Marcos ya kahawop la.

<sup>6</sup> Tinébêh lay balayan hêñ habaytoy pulo angga ha nakalatêng hila ha balayan hêñ Pafos. Bayro lan natupa ya mihay naghalamangka ya nag langan Bar-Jesus. Hiyay mihay Israelita ya ampagbabaran hiyay mihay mâmipamwang hêñ an-ipaihip kana ni Apo Namalyari. <sup>7</sup> Hi Bar-Jesus ay

\* **13:1** Lucas 3:1.

kalamo nan gobernador ha Chipre, ya hi Sergio Paulo, ya matalino. Impabaêg hilan Bernabe ni Gobernador Sergio Paulo ta labay nan manggilam habi ni Apo Namalyari. <sup>8</sup> Noa, hinalanghang hila ni Bar-Jesus ya naghalamangka, ya nag langan Elimas ha habin Griego, gawan a na labay hén maniwala kan Panginoon Jesus, ya hi Gobernador Sergio Paulo. <sup>9</sup> Ha kapangyarihan nan Espiritu ni Apo Namalyari ya atsi kan Saulo, ya ambaêgén etaman apostol Pablo, ay pinakahélék na, hi Elimas, <sup>10</sup> ya wana, “Elicas, anak ka ni Satanas! Kapatsi ka hén kaganawan maka-Diyos. Panay kalokwan haka karawakan ya andaygén mo. An-itumbalik moy kaptégan ya ubat kan Apo Namalyari. <sup>11</sup> Amêhén parusaan na ka. Mabuwag ka haka a minan mahélék ya hawang hén allo hén angga ha allo ya intakda na.”

Namakonkaynaman ay nagdigrêm ya hélék ni Elimas hén mabuwag ya, kabay ampakapakikwanan nan mangapkap hén mangakay kana. <sup>12</sup> Hén nahélék nan gobernador ya nalyari kan Elimas, ay naniwala ya kan Panginoon Jesus gawan nag-épapah ya ha kapangyarihan hén intoro la, ya tungkol ha Panginoon.

*Ya panoro ni Bernabe haka ni apostol Pablo ha balayan Antioquia ya atsi ha danin Pisidia*

<sup>13</sup> Ha Pafos, hinumakay hilan apostol Pablo ha barko ya palako ha balayan Perga ha probinsyan Panfilia. Panlumatêng la bayro ay nilakwanan hila ni Juan Marcos ta nag-orong ya ha balayan Jerusalem. <sup>14</sup> Hilan apostol Pablo ay nagtagloh ha balayan Antioquia ya karani hén Pisidia. Ha allon pamagsimba lan Israelita, ay nakiikno hilan nakisimba ha mihay sinagoga. <sup>15</sup> Main namaha ha Kautuhan ni Apo Namalyari ya impahulat na kan apo Moises, haka ha inhulat lan kaatag ya mánipamwang hén an-ipaihip na kanla. Pangubat hén pamaha, ay hinagyat hilan apostol Pablo hén hilay ampamaala, hén manoro kanla no main hilan iaral kanla. <sup>16</sup> Kabay nirêng ya hi apostol Pablo ta siningyalan na hilay naka-tsipon ya manggilam hila, biha wana,

“Kapareho kon Israelita, haka hikaw ya alwan Israelita ya main limo kan Apo Namalyari, ay manggilam kaw ha habiên ko. <sup>17</sup> Hi Apo Namalyari, ya ansimbaêñ tamon Israelita, ya namili hén ninuno tamo, bayo pinalaké na hila haton lagi hén ampaidi hila pon ha bansan Egipto, ya alwa lan bansa. Ha kapangyarihan na, ya ayn kapantag, ay imbuhan na hila ha pangaipoh la haka hinawpan na hilan mag-alíh ha Egipto. <sup>18</sup> Pinagtéêhan nay pamanalanghang la kana kaban hinayhay na hila ha kabalah-balahan hén apatapoy taon. <sup>19</sup> Hén nilumatêng hila ha Canaan, ay hinambut lay pitoy lahin katutubo bayro ha kapangyarihan na, ta indin nay habaytoy luta kanla, hén hilay ninuno tamon kaapo-apoan ni apo Israel. <sup>20</sup> Apat a gatoh boy limampoy taon (450) ya nakalabah paubat hén nilumatêng ya ninuno tamo ha Egipto angga ha nilumatêng ya kaapo-apoan la ha Canaan. Ha Canaan, ay dinyanan na hila ni Apo Namalyari hén honol-honol ya mánlingon kaso ya namaala kanla hén angga ha pamamaala ni Samuel† ya mihay mánipamwang hén an-ipaihip kana ni Apo Namalyari. <sup>21</sup> Hén toa yay na hi Samuel, ay nakikwa hilan ari ya mamaala kanla, kabay namili hi Apo Namalyari hén mihay lalaki, ya kaapo-apoan ni Benjamin, ya hi Saulo, ya anak ni Cis, ya mag-in ari la. Hi Arin Saulo ay namaala hén apatapoy taon. <sup>22</sup> Hén inalíh ni Apo Namalyari hi Arin Saulo ha pamamaala na, ay hi David ya impahili na. Habaytsi ya pamaptégn Apo Namalyari hén tungkol kan David, ‘An-ikahigla ko hi David ya anak ni Jesse. Ubuhén nan daygén ya kalabayán ko.’”

† **13:20** Hukom 2:16, 1 Samuel 3:20.

<sup>23</sup> Inhundo ni apostol Pablo ya pamipamwang na, ya wana, “Yabay ya hi Arin David ya ninuno ni Apo Jesus. Hi Apo Jesus etaman, ay hiyay Mámilitas, ya impangako ni Apo Namalyari kanlan ninuno tamon Israelita. <sup>24</sup> Hén a ya pon mag-umpisa hi Apo Jesus ha dyag na, ay main lalaki ya nag langan Juan, ya in-utoh ni Apo Namalyari, ya namipamwang hén dapat maghêhê haka pabawtismo ya kaganawan kapareho tamon Israelita. <sup>25</sup> Hén marani nay nan mayari ni Juan ya impadyag kana ni Apo Namalyari, ay hinabi na kanlan kal-atan, ‘Èndat yo no hikoy Cristo ya lumatêng ya an-êngganan yo! Alwan hiko. Noa, marani yay nan lumatêng. Mangokal man hén hêêl apin bitsih na, ay ayn akon karapatan ta hiyay makapangyarihan kangko.’”

<sup>26</sup> Inhundo ni apostol Pablo ya pamipamwang na, ya wana, “Kapareho kon kaapo-apoan ni apo Abraham, haka hikaw ya alwan Israelita ya main limo kan Apo Namalyari, kantamo impamwang no ay-êmên na kitamo iligtas ha parusa ya ayn anggaan. <sup>27</sup> Gawan a la naintindihan lan ampaidi ha Jerusalem haka hilay ampamaala kanla, ya hi Apo Jesus, ay habaytoy impangakon Mámilitas, ya ambahaén la hén balang allon pamagsimba, ha Kahulatan lan mámipamwang hén an-ipaihip kanla ni Apo Namalyari, ay hila pon êt ya nanupad hén Kahulatan, hén hinabi la ya dapat yan patsên. <sup>28</sup> Agyan ayn hilan hépat ya dahilan hén hiyay patsên, ay pinakipilitan la ya pon êt kan Gobernador Pilato ya hiyay ipapatsi. <sup>29</sup> Hén nadyag lay na ya habayto, haka naubuh hén natupad ya nakahulat ya tungkol kana, ay main namiaypan bangkay na ha koros ta in-ilbêng. <sup>30</sup> Noa, hiyay biniyay oman ni Apo Namalyari. <sup>31</sup> Mal-at ya allo yan nagpahlék ha mana nan kalamo hén nilumagay ya hén paubat ha Galilea angga ha Jerusalem. Angga amêhén, ay hila ya ampamaptêg kanlan kapareho tamon Israelita ya hiyay nabiyyay oman. <sup>32</sup> Kabay atsi kay di hén an-ipamwang kamoyu ya Mangéd ya Habi ya impangako ni Apo Namalyari ha ninuno tamo. <sup>33</sup> Habayto ay tinupad nay na kantamon kaapo-apoan ni apo Israel, hén biniyay nan oman hi Apo Jesus. Habaytoy nakahulat êt ha ikalwan Awit, ya wana,

‘Hika ya anak ko, haka amêhén impamwang ko ya hikoy Tatang mo.’‡

<sup>34</sup> Haka habaytsi ya hinabi ni Apo Namalyari ya tungkol ha pangabiyay oman ni Apo Jesus, ya a yay nan matsin oman,

‘Hiko ya mangingalo kamoyu, hén taganán tuparêñ ya impangako ko kan Arin David.’§

<sup>35</sup> Hi Apo Jesus ya nanupad hén habaytoy impangako, ta habaytsi ya nakahulat ya hinabi ni Arin David kan Apo Namalyari, ya wana,

‘A mon paulayan hén gumata ha pay-ilbêngan ya lawini hén mapaypaniwal-an mo ya ayn kapantag ha kangêran.’\*

<sup>36</sup> Noa, hén natupad nay na ni Arin David ya impadyag kana ni Apo Namalyari, ay natsi ya, haka in-ilbêng ya hén kalamo hén ninuno na. Ginumata ya bangkay na ha pay-ilbêngan. <sup>37</sup> Yan a ginumata ya bangkay ni Apo Jesus ya biniyay oman ni Apo Namalyari. <sup>38</sup> Hikaw ya kapareho kon Israelita, an-ipamwang naêñ kamoyu, ya dapat yon mamwangan, ya gawan ha dinyag ni Apo Jesus, ay mapatawed ni Apo Namalyari ya kasalanan tamo. <sup>39</sup> Gawan kan Apo Jesus ay patawaran ya kasalanan lan kaganawan ya ampaniwala kana. Noa, ayn mapatawed gawan ha pamanhumonol ha Kautuhan ni apo Moises. <sup>40</sup> Kabay kaillag kaw ta êmén a malyari kamoyu ya hinabi lan mámipamwang hén an-ipaihip kanla ni Apo Namalyari hén hato, ya wanla,

<sup>41</sup> ‘Gilamêñ† yon, hikaw ya mapammusmus!

‡ **13:33** Awit 2:7. § **13:34** Isaias 55:3. \* **13:35** Awit 16:10. † **13:41** Habacuc 1:5

Mipag-êpapah kaw ha daygên ko, noa, matsu kaw pon êt!  
 Ta ya andaygên ko amêhêh,  
 ay a yo paniwal-an, main man mamipamwang hên habaytsi kamoyu!" "

<sup>42</sup> Hêñ nayari yay nan namipamwang hi apostol Pablo, hêñ paawah hilay na ni Bernabe ha sinagoga, ay pinakihabian hila hêñ mag-orong hila ha humonoy allon pamagsimba, ta êmén ihundo ya pamipamwang la. <sup>43</sup> Hêñ nipan-umawah hila ha sinagoga, ay mal-at kanlan Israelita haka hilay alwan Israelita, ya anhumonol ha ugali lan Israelita, ya nangamat kanlan apostol Pablo. Kabay pinakihabian ni apostol Pablo haka ni Bernabe ya kapareho la ya dapat lan ihundo ya paniwala la ha ingalo ni Apo Namalyari ha pamimiyay la.

<sup>44</sup> Hêñ humonoy allon pamagsimba la, ay pêrad tanan naubuh hêñ nag-sipon ya atsi bayro ha balayan, ta êmén hila manggilam hêñ habi ni Apo Namalyari. <sup>45</sup> Nahêm hilay Israelita ya ampamaala ha sinagoga hêñ nahêlêk lay kal-atan ya naka-tsipon. Kabay hinalanghang lay anhabiên ni apostol Pablo haka la ya minusmus. <sup>46</sup> Noa, a hila nalinwan ya apostol ta makhaw a nakêm lan naghabi, ya wanla, "Taganán kailangan pon ipamwang kamoyun kapareho naêñ Israelita ya habi ni Apo Namalyari. Noa, gawan an-itaah yo ya habaytsi, ay andaygên yoy sarili yon alwan hépat hêñ dyanan hêñ biyay ya ayn angga. Kabay mita kay, ta manoro kay kanlan alwan Israelita. <sup>47</sup> Ta habaytsi ya in-utoh kannaêñ hêñ Panginoon, ya wana, 'Pinili kata ta êmén mamahawang hêñ kaihipan lan alwan Israelita, Ta êmén gawan kamo, ay miligtas hilay atsi ha boon luta ha parusa ya ayn anggaan.' "‡

Habayto tana ya hinabi ni apostol Pablo haka ni Bernabe.

<sup>48</sup> Hêñ nagilam lan alwan Israelita, ya habaytsi, ay nipaghigla hilan nag-puri ha Panginoon gawan ha habi na. Haka hilay pinili ni Apo Namalyari hêñ dyanan biyay ya ayn angga hêñ kalamo na, ay naniwala. <sup>49</sup> Kabay nibahwag ya tungkol kan Panginoon Jesus ha boon logal ya habayto.

<sup>50</sup> Noa, main bayron ungnoy mabandi ya babayi ya alwan Israelita, ya maka-Diyos. Hila, haka hilay main tungkulon bayro ha balayan Antioquia, ay ginulo lan ampamaala ha sinagoga, ya a naniwala kan Panginoon Jesus hêñ ipaplag hilan apostol Pablo bayro ha balayan Antioquia. Kabay im-paplag la hi apostol Pablo haka hi Bernabe. <sup>51</sup> Ingkampag lan apostol Pablo ya tuwapok ya atsi ha bitsih la ta impahlêk la kanlan Israelita, ya a naniwala kan Panginoon Jesus bayro ha Antioquia, ya lumatêng kanla ya huluk ni Apo Namalyari. Pangayarin habayto, ay nammita hilay na ha balayan Iconio. <sup>52</sup> Hila etaman ya taga-Antioquia ya ampaniwala kan Panginoon Jesus, ay ampamiyay hila ha kapangyarihan nan Espiritu ni Apo Namalyari, haka boon nakêm hilan nagpalokop kana, haka boon nakêm hilan pinahigla.

## 14

### *Ha balayan Iconio*

<sup>1</sup> Ha Iconio, nilako ni apostol Pablo haka ni Bernabe, ya sinagoga lan kapareho lan Israelita hêñ nanad êt ha balang balayan ya nilako la. Gawan atsi kanla ya Espiritu ni Apo Namalyari ha paypamwang la, ay mal-at ya Israelita haka Griego\* ya naniwala kan Panginoon Jesus. <sup>2</sup> Noa, hilay Israelita ya a mabay hêñ maniwala kana, ay namagulon nakêm lan alwan Israelita, ta êmén hila lumaban kanlan apostol Pablo. <sup>3</sup> Kabay êmbayro man, ay naglaêh

‡ **13:47** Isaias 42:6, 49:6. \* **14:1** Ya alwan Israelita.

hilay apostol bayro hēn makhaw ya nakêm hēn namipamwang hēn tungkol ha Panginoon, ya namaptēg hēn pêtēg ya an-ipamwang la ya tungkol ha ingalo na, hēn nam-i ya kanla hēn kapangyarihan hēn mamaalih hēn hakit haka manyag hēn kaatag pon ya kapapaêpapah. <sup>4</sup> Noa, ayn pakikimiha ya taga-Iconio. Ya kaatag ay nakigampi kanlan Israelita, haka ya kaatag ay nakigampi kanlan apostol. <sup>5</sup> Main alwan Israelita, haka habaytoy Israelita ya a naniwala, kalamo lay ampamaala kanla ya ampamalak hēn pairapan hilay apostol hēn batoêñ hila angga ha hilay matsi. <sup>6</sup> Hēn namwangan lan apostol ya balak la, ay nuwayu hila ha Listra haka ha Derbe ya balayan ya atsi ha lokop hēn Licaonia angga ha mamalibot hēn habaytoy logal. <sup>7</sup> Bayro lan impamwang ya Mangêd ya Habi tungkol kan Panginoon Jesus.

### *Ha Listra*

<sup>8</sup> Ha Listra ay main mihay lalaki ya a ampakabita, paubat hēn in-anak ya. <sup>9</sup> Nakaikno yan ampanggilam ha an-ipamwang ni apostol Pablo. Ha pamakahêlêk kana ni apostol Pablo, ay napansin na, ya main yan paniwala ya makabita ya, <sup>10</sup> bayo wanen namikhaw hēn habi na, “Mirêng ka!” Naglukho yan nirêng ta namita-bitay na.

<sup>11</sup> Hēn nahêlêk lan kal-atan ya dinyag ni apostol Pablo, ay nan-angaw hila ha habin Licaonia, ya a la naintindihan lan apostol Pablo, “Nag-in tawo hilay diyos haka hiniraw la kitamo!” <sup>12</sup> Hi Bernabe ay êndat lan hi Zeus, ya mihay andiyosêñ la haka hi apostol Pablo etaman, ay êndat la hi Hermes gawan hiyay ampaypamwang hēn nanad kan Hermes ya miha pon ya andiyosêñ la. <sup>13</sup> Ha danin balayan Listra ay main pagsimbaan kan Zeus. Ya pari la bayro ay nantan hēn baka ya kinapon ya pinaunoan lan bulaklak, ha îlwangan hēn balayan, ta iátang la dayi kanlan apostol Pablo ha pamagsimba la kanla.

<sup>14</sup> Hēn namwangan lan apostol Pablo ya habayto, ay gininit lay sarili lan takop ha lawini la, ya palatandaan ya taganán a la labay ya habayto. Pinarah-parah lan nagdann ha pibonakan lan kal-atan ta nan-angaw, <sup>15</sup> “Alwa yo kay atángan! Tawo kay bêngat hēn êmên kamoyu! Atsi kay di hēn an-ipamwang kamoyu ya Mangêd ya Habi tungkol kan Panginoon Jesus, ta êmên yo talibatokan ya ansimbaêñ yo, ya alwan pêtêg diyos, ta hi Apo Namalyari ya angkabiyay ya simbaêñ yoy naman. Hiyay nanyag hēn langit, luta, dagat haka ya kaganawan ya atsi bayro. <sup>16</sup> Hēn haton lagi ay pinaulayan nay ninuno yo, haka hilay ninuno lan alwan Israelita ha kalabayan la. <sup>17</sup> Embayro man, ay panay nan impakit ya panga-Diyos na ha pam-in uran haka ha pamabokal na ha kaganawan tanaman ha ustoy panaon, ta êmên kaw hinumigla ha katsighaw yo,” habayto tanay in-angaw lan apostol Pablo. <sup>18</sup> Agyan in-angaw la ya habayto, ay namêrad lay nan pinatsi ya habaytoy baka ya kinapon ya iátang la dayi hēn taga-Listra.

<sup>19</sup> Amêhêñ, main nilumatêng ha Listra ya Israelita ya ubat ha Antioquia ha sakop hēn Pisidia haka Iconio ya nanulhul kanlan naka-tsipon, kabay binato la hi apostol Pablo ta êmên ya matsi, haka la ya ginuloy hēn in-awah ha balayan, ta êndat la no natsi yay na. <sup>20</sup> Noa, hēn pinilolopungan la yan ampaniwala kan Panginoon Jesus, ay nirêng ya ta nag-orong ha balayan. Hēn humonoy allo, ay nammita yay na ha balayan Derbe hēn kalamo na hi Bernabe.

### *Ya pag-orong lan apostol Pablo ha balayan Antioquia ya sakop hēn probinsyan Siria*

<sup>21</sup> Hēn nilumatêng hilay na ha Derbe, ay impamwang lay Mangêd ya Habi tungkol kan Panginoon Jesus, haka mal-at ya nahagyat la hēn maniwala

kana. Pangayarin habayto ay nag-orong hilay na êt ha balayan Listra, Iconio, haka Antioquia. <sup>22</sup> Pinataniêh lay nakêm lan ampaniwala kan Panginoon Jesus ha balang balayan, haka la hila inaralan ya ihundo lay paniwala la, gawan mal-at ya kairapan ya kailangan lan danasên bayo hila makahowên ha pamanlokop ni Apo Namalyari ha langit. <sup>23</sup> Ha balang logal ya main patêl ha Panginoon ya angkapi-tsi-tsipon ay namilyililan toa ya mamaala bayro, ha pamili la, ay nagtêêh hila hêna nangan, ta êmén a maabala ya panalangin la. Inhalangin la hilay pinili la ya illagan hilan Panginoon ya ampagtsiwal-an la.

<sup>24</sup> Pangayarin habayto ay nagdann hila ha probinsyan Pisidia angga ha niabot hila ha probinsyan Panfilia. <sup>25</sup> Bayro ha balayan Perga ha Panfilia, ay namipamwang hilan Mangêd ya Habi tungkol kan Panginoon Jesus bayo hila nilumohan ha balayan Atalia. <sup>26</sup> Ubat bayro ay naghakay hila ha barko hêna paorong ha Antioquia ha probinsyan Siria. Habaytoy ubatan la hêna bayo hilan in-utoh, hêna haton inhalangin hila, ya illagan haka ingalwan hila ni Apo Namalyari ha pamipamwang hêna tungkol kan Panginoon Jesus, ya natupad lay na.

<sup>27</sup> Hêna pamiabot ni apostol Pablo haka ni Bernabe ha Antioquia, ay binaêg lay patêl ha Panginoon ya angkapi-tsi-tsipon, ta ipamwang ya balang impadyag kanla ni Apo Namalyari, haka no ay-êmén hilan naniwala kan Panginoon Jesus ya hilay alwan Israelita. <sup>28</sup> Naglaêh hilay na bayro hêna kalamo lan ampaniwala.

## 15

### *Ya pami-tsi-tsipon lan taga-Antioquia ha balayan Jerusalem*

<sup>1</sup> Kaban atsi hi apostol Pablo haka hi Bernabe ha balayan Antioquia, ay main nilumatêng ya ungnoy taga-probinsyan Judea, ya anhumonol ha ugali ya intoro ni apo Moises. Tinoroan la hilay patêl ha Panginoon hêna êmén di, “A kaw miligtas ha parusa ya ayn anggaan, no a kaw patuli hêna nanad ha ugali ya intoro ni apo Moises.” <sup>2</sup> Bayro ha hinabi la, ay taganán pinakihubakan hila lan apostol Pablo. Kabay napagkamihaan lan patêl ha Panginoon ya taga-Antioquia hêna palakwên la hila ha Jerusalem hilan apostol Pablo, haka hilay kaatag kanla, ta iarap la ya tungkol ha napihubakan la kanlan kaatag ya apostol bayro ha Jerusalem, haka kanlan toa ya ampamaala ha patêl ha Panginoon ha Jerusalem.

<sup>3</sup> Kabay hilan apostol Pablo ay in-utoh lan patêl ha Panginoon ya angkapi-tsi-tsipon ha Antioquia. Ha pammita la, ha pagdann la ha probinsyan Fenicia haka probinsyan Samaria, ay impamwang lan apostol Pablo kanlan patêl ha Panginoon ya tungkol ha paniwala lan alwan Israelita kan Panginoon Jesus. Hadyay higla lan patêl ha Panginoon bayro ha nagilam la. <sup>4</sup> Hêna nakalatêng hilay na ha balayan Jerusalem, ay boon nakêm hilan tinanggap hêna hilay patêl ha Panginoon ya angkapi-tsi-tsipon, kalamo hilay toa ya ampamaala kanla, haka hilay apostol. Impamwang lan apostol Pablo ya kal-atan ya nalyari gawan ha kapangyarihan ni Apo Namalyari. <sup>5</sup> Noa, nirêng ya ungnoy Pariseo ya ampaniwala kan Panginoon Jesus, ya wanla, “Dapat patuli hilay habaytoy alwan Israelita ya ampaniwala ha Panginoon, haka dapat êt hêna ipahonol kanlay Kautuhan ni apo Moises.”

<sup>6</sup> Kabay, ni-tsi-tsipon hilay apostol haka hilay toa ya ampamaala ha patêl ha Panginoon bayro ha Jerusalem, ta êmén la mapi-iihipan no hino ya dapat lan daygên. <sup>7</sup> Pangayari hêna bapan karang ya pamehahabi la, ay nirêng hi apostol Pedro, ta wana, “Hikaw ya patêl ko ha Panginoon, kamwangan

yo etaman, ya hikoy pinili ni Apo Namalyari kamoyu hên hato, ta êmên mamipamwang hên Mangêd ya Habi tungkol kan Panginoon Jesus, kanlan alwan Israelita, ta êmên hila maniwala etaman. <sup>8</sup> Haka hi Apo Namalyari, ya ampakamwang hên laman nakêm, ay hiya êt ya namaptêg hên tinanggap na hila hên impahapat na kanlan alwan Israelita ya Espiritu na hên nanad ha impahapat na kantamo. <sup>9</sup> Pantag ya pamanlêk ni Apo Namalyari kanla haka kantamo gawan nilinis na êt ya nakêm la gawan ha paniwala la kana. <sup>10</sup> Pata magma-makhawan kaw pon kan Apo Namalyari! Pata ipahonol yo kanlan alwan Israelita ya ampaniwala kan Panginoon Jesus ya a la mahonol. A tamo mahonol ya habayto, haka hila man ya ninuno tamo ay a la êt nahonol! <sup>11</sup> Hikitamoy ampaniwala kan Panginoon Jesus, ay naligtas ha parusa ya ayn anggaan gawan ha ingalo ni Panginoon Jesus, êmên hila êt bayro ya alwan Israelita. Naligtas hila etaman gawan ha ingalo na.”

<sup>12</sup> Hêñ nayari yay nan naghabi hi apostol Pedro, ay miha man kanlan kallatan, ay ayn hilan maihabi kana. Bayo nanggilam hilay na êt ha pamwang ni Bernabe angga ni apostol Pablo, ya tungkol ha kapangyarihan hêñ mamaalih hêñ hakit, haka kaatag pon ya kapapaêpapah ya dinyag ni Apo Namalyari ha paypamwang la, hêñ tungkol kan Panginoon Jesus kanlan alwan Israelita.

<sup>13</sup> Pangayari lan Bernabe hêñ naghabi, ay naghabi hi Santiago, ya wana, “Hikaw ya patêl ko ha Panginoon, gilamêñ yo ko. <sup>14</sup> Kaubat-ubat na pon nangun ni Simon Pedro hêñ naghabi no ay-êmên na hilan iningalwan ni Apo Namalyari ya hilay alwan Israelita hêñ namily kanla hêñ hilay mag-in kana.

<sup>15</sup> Habayto êt ay impapapêt ni Apo Namalyari hêñ hato ya nakahulat\* ya êmên di,

<sup>16</sup> ‘Lumatêng ya allo ay mag-orong ako,  
ta ipairêng kon oman ya pamanlokop ni Arin David.  
Paubat ha pangahira, ay ipairêng kon oman,  
ta êmên mag-in makhaw ya habayto.

<sup>17</sup> Ta êmên hiko, ya Panginoon, ay tapolêñ lan alwan Israelita, ya pinili ko hêñ mag-in kangko.

<sup>18</sup> Habaytoy hinabi ni Apo Namalyari, ay impamwang hêñ haton lagi.’

<sup>19</sup> “Kabay ha ihip ko, ay paan tamo hilan pairapan ya hilay alwan Israelita, ya ampaniwalay na kan Apo Namalyari. <sup>20</sup> Ya mangêd, ay hulatan tamo hila hêñ paan hilan mangan hêñ imparaêp ha alwan pêtêg ya diyos, haka paan hilan mangna hêñ hinon ayop ya a inalihan daya, haka paan hilan mamabayi haka makilalaki. <sup>21</sup> Dapat lan honolêñ ya habayto, ta êmên a mahakit ya nakêm lan kapareho tamon Israelita, ta paubat hêñ haton lagi, ay ambahaêñ ha balang sinagoga, ha balang balayan, ya Kautuhan ni apo Moises no allon pamagsimba tamo.” Habaytoy hinabi ni Santiago.

### *Ya hulat kanlan alwan Israelita ya ampaniwala kan Panginoon Jesu-Cristo*

<sup>22</sup> Kabay hilay patêl ha Panginoon ya angkapi-tsi-tsipon ha Jerusalem, kalamo hilay toa ya ampamaala kanla haka hilay apostol, ay nangapikakahundo hêñ mamilin loway lalaki ya iutoh hêñ mag-in kalamo ni apostol Pablo boy Bernabe ha pammako la ha balayan Antioquia. Ya pinili la, ay lowa kanlan ampamaala bayro, ya hi Judas ya ambanhagan lan Barsabas haka hi Silas, ya <sup>23</sup> mantan hêñ hulat ya êmên di ya laman:

“Hikay ya apostol haka hikay ya toa ya ampamaala kanlan patêl ha Panginoon bayri ha Jerusalem, ay ampangumusta kamoyun patêl naêñ ha Panginoon, ya alwan Israelita, ya atsi bahêñ ha balayan Antioquia, haka ha probinsyan Siria angga ha probinsyan Cilicia. <sup>24</sup> Namwangan naêñ ya

\* **15:15** Amos 9:11-12.

main ungnoy ubat di, ya a naêñ in-utoh, ya namuligaw hên ihip yo ha toro la kamoyu. <sup>25</sup> Kabay nagtsipon kay haka pinagkamihaan naêñ hên mamili hên loway lalaki ya iutoh naêñ bahêñ kamoyu. Makilako hila kanlan anlugarûn tamon patêl ha Panginoon, ya hi Bernabe angga hi apostol Pablo. <sup>26</sup> Indin lay biyay la ha pamaghuyo la kan Panginoon tamon Jesu-Cristo. <sup>27</sup> Iutoh naêñ hilan Judas haka hi Silas bahêñ ta êmêñ la maipalinaw hên araparapan ya habaytsi ya an-ihulat naêñ. <sup>28</sup> Impaihip kannaêñ hên Espiritu ni Apo Namalyari ya paan naêñ kaw hên pabyatan hên pahonolêñ ya a yon kailangan. Habaytsi ya humonol tana ya dapat yon dayuán. <sup>29</sup> Paan kaw mangan hên imparaép ha alwan pêtêg ya diyos, haka paan mangna hên hinon ayop ya a inalihan daya, haka paan kaw mamabayi haka makilalaki. Dayuán yoy habayto. Angga tana bayro ya mahabi naêñ kamoyu.”

<sup>30</sup> Hilay an-iutoh la ay nammitay na ha Antioquia. Panlumatêng la bayro ay tsinipon la hilay patêl ha Panginoon bayo la indin ya hatoy hulat. <sup>31</sup> Pamakabaha lan hatoy hulat ay hadyay higla la, gawan ha nagilam la bayro ha hulat. <sup>32</sup> Hi Judas haka hi Silas ay mámpamwang hên an-ipaihip kanla ni Apo Namalyari, kabay mal-at ya naiaral la kanlan patêl ha Panginoon ya namataniêñ hên paniwala la kana. <sup>33</sup> Hilay lowa ay mabuyot-buyot bayro. Hêñ mita hilay na ay impanalangin hila lan patêl ha Panginoon, ya illagan hila ha pammita la. Pangayari, ay nag-orong hilay na ha nay-utoh kanla. <sup>34</sup> [Noa, hi Silas ay napaibalag tana bayro.]† <sup>35</sup> Hi apostol Pablo haka hi Bernabe ay inhundo lay paytoro haka paypamwang hên tungkol kan Panginoon Jesu-Cristo ha Antioquia, kalamo hilay mal-at ya kaatag ya patêl ha Panginoon.

### *Nakiblag hi apostol Pablo kan Bernabe*

<sup>36</sup> Pangalabah hên ungnoy allo, ay hinabi ni apostol Pablo kan Bernabe, ya wana, “Orongêñ ta hila hên hirawêñ ya hilay patêl ha Panginoon, ya pinaypamwangan ta hêñ habi na ha balang balayan, ta hêlkêñ ta no hinoy nay angkalyari kanla.” <sup>37</sup> Labay ni Bernabe hên pakilako hi Juan ya ambanhagan hên Marcos. <sup>38</sup> Noa, a nabay hi apostol Pablo hên pakilako la ya ta hêñ haton atsi hila ha probinsyan Panfilia ay imbalag na hila ni Juan Marcos. <sup>39</sup> Gawan ha hadyay pamihubak la ay niblag hilay na ni Bernabe haka hi apostol Pablo. Pinakalamo ni Bernabe hi Marcos haka hilay na hinumakay ha barko ya palakon Chipre. <sup>40</sup> Hi Pablo etaman ay pinakalamo na hi Silas. Bayo hila nammita ay impanalangin hila lan patêl ha Panginoon ya illagan hila dayi ni Apo Namalyari. <sup>41</sup> Nammita hilan apostol Pablo ha probinsyan Siria haka Cilicia hêñ pinataniêñ ya paniwala lan patêl ha Panginoon ya angkapi-tsitsipon.

## 16

### *Pinakilako ni apostol Pablo haka ni Silas, hi Timoteo*

<sup>1</sup> Nilumatêng hilan apostol Pablo ha balayan Derbe angga ha balayan Listra. Bayro ha balayan Listra ay main mihay miyawhay ya nag langan Timoteo, ya ampaniwalañ na kan Panginoon Jesu-Cristo. Ya indo na ay Israelita, ya ampaniwala etaman kan Panginoon Jesu-Cristo. Ya tatang ni Timoteo ay Griego. <sup>2</sup> Hilay patêl ha Panginoon ya atsi bayro ha Listra angga ha balayan Iconio ay ampamaptêg ya mangêd ya ugali ni Timoteo. <sup>3</sup> Labay ni apostol Pablo hêñ pakilako na hi Timoteo, kabay impatuli na ya ta êmêñ la ya tanggapêñ hêñ hilay Israelita, gawan muwang la ya Griego

† **15:34** Ayn ya habaytsi ha kaatag ya manan Bibliya ha habin Griego.

ya tatang ni Timoteo, haka a ya êt impatuli hi Timoteo. <sup>4</sup> Ha pamagdann la ha binabalayan ay an-ipamwang la kanlan ampaniwala kan Panginoon Jesu-Cristo, ya napikakahundoan lan apostol haka hilay toa ya ampamaala kanlan patêl ha Panginoon ha Jerusalem, ya dapat lan honolên. <sup>5</sup> Kabay lalon hinumkaw ya paniwala lan patêl ha Panginoon ya angkapi-tsi-tsipon, ya hiniraw la, haka allo-allo angkapahanan hila.

### *Ya impahalumata kan apostol Pablo ha balayan Troas*

<sup>6</sup> Ha pammita la ay nagdann hila ha probinsyan Frigia haka Galacia gawan binawal hila hên Espiritu ni Apo Namalyari hên paan hilan mamipamwang ha probinsyan Asia. <sup>7</sup> Hên niabot hilay na ha pianggaan hên probinsyan Misia, ay labay la dayin manoro ha probinsyan Bitinia, noa, binawal hilay na êt hên Espiritu ni Panginoon Jesus. <sup>8</sup> Kabay nagdann hila tana ha probinsyan Misia angga ha nilumatêng hila ha balayan Troas. <sup>9</sup> Habayton yabi, ay main yan nahalumata hi apostol Pablo ya mihay lalaki ya taga-probinsyan Macedonia\* ya ampakihabi kana, ya wana, “Maglipay kaw pon di kannaén ha Macedonia ta hawpan yo kay!” <sup>10</sup> Pangayari hên halumata, ay tampol kay nanapol hên barko ya mahakyen hên palipay ha probinsyan Macedonia gawan muwang naén ya an-iutoh na kay ni Apo Namalyari hên ipamwang kanla ya Mangêd ya Habi tungkol kan Panginoon Jesus.

### *Hi Lydia ay naniwala kan Panginoon Jesus ha Filipos*

<sup>11</sup> Paubat ha balayan Troas ay nagtagloh kay ha pulo hên Samotracia. Bayo, pangamaranon ay inhundo naén ya pamaglipay ha balayan Neapolis. <sup>12</sup> Paubat bayro ay namitsih kay palako ha balayan Filipos ya pinakamahlay ya balayan ha probinsyan Macedonia ya sakop hên gobyernon Roma. Naglaêh kay pon bayro. <sup>13</sup> Hên allo-allon pamagsimba lan Israelita, ay inumawah kay ha balayan, ta nikno kay ha laylay hên ilog ta habayto kanoy pagtsiponan lan Israelita hên manalangin. Intoro naén kanlan babayi ya naka-tsipon bayro ya Mangêd ya Habi tungkol kan Panginoon Jesus. <sup>14</sup> Ya miha kanla bayro, ya nag langan Lydia, ya taga-balayan Tiatira, ay mâmihaliw hên tela ya kulay ubi. Hiyay ampagsimba etaman kan Apo Namalyari. In-ilan ni Apo Namalyari ya nakêm na hên pakapaniwal-an nay toro ni apostol Pablo. <sup>15</sup> Ha maparah ya habi ay nagpabawtismo ya hi Lydia haka hilay kalamo na ya atsi ha bali na. Pangayari ay hinagyat na kay hên magdahêl ha bali la, ya wana, “No ampaniwala kaw hên pêtêg ya paniwala ko ha Panginoon, ay magdahêl kaw pon di ha bali.” Gawan ampalêkpêkên na kay, ay a naén natanggian ya pamanagyat na kannaén.

### *Hi apostol Pablo haka hi Silas ay nahukul ha balayan Filipos*

<sup>16</sup> Mihay allo hên anlakwên naén habaytoy panalanginan, ay natupa naén ya mihay dalaga ya ipoh. Habaytsi ay anhapatan hên narawak ya a angkahêlêk ya main kapangyarihan hên manawas. Kal-atan hên pera ya angkakwa lan ámo na gawan ha pamanawas na. <sup>17</sup> Ampangamat-kamat ya kannaén ni apostol Pablo, ya wana, “Hilay habaytsi ay ampaghuyo kan Apo Namalyari. An-ipamulah la kamoyu no ay-êmén kaw hên miligtas ha parusa ya ayn anggaan.”

<sup>18</sup> Hên allo-alloy nan habiên ya habayto, ay nanuluk kana hi apostol Pablo, haka na ya inarap ta hinabyanan nay hinumapat ha dalaga, ya wana, “Ha kapangyarihan ni Panginoon Jesu-Cristo, ay mag-alíh ka kana.” Tampol hên inumalih ya hatoy hinumapat kana.

\* **16:9** Habaytsi ay atsi bayro ha lipay dagat.

<sup>19</sup> Hêñ nahêlêk lan ámo nan hatoy dalaga ya ayn hilay nan mapangwanan pera, ay dinakêp la hi apostol Pablo haka hi Silas. Ginuloy la hilan in-arap kanlan manungkuluan. <sup>20</sup> Hêñ in-arap hilan apostol Pablo kanlan habaytoy manungkuluan hêñ gobyernon Roma, bayro êt ha Filipos, ay êmén di ya pamidikil la: “Habaytsi ya loway Israelita ay ampamuligaw bayri ha balayan tamo. <sup>21</sup> Ya an-itoro la ay ugalin halanghang ha patakaran tamon taga-Roma. A tamo malyarin tanggapên o honolén ya habayto.” <sup>22</sup> Hilay atsi bayro hêñ nakalopong, ay nakilamon nandakêp kanlan apostol Pablo. Gawan êmbayro, ay pináláboh hilan habaytoy manungkuluan hêñ gobyernon Roma bayro ha Filipos hilan apostol Pablo, haka la hila impabarog. <sup>23</sup> Hêñ nayari hilan binarog, ay impahukul hila haka in-utoh lan ampamaala ha hukulan ya pakabantayan na hilan mangêd. <sup>24</sup> Kabay inhowên na hila ha kalalê-laléan hêñ hukulan, haka na hila hinipit ya bitsih la hêñ loway tabla ya tinalagá hêñ nilubtan ta êmén main dyanan hêñ bitsih.

<sup>25</sup> Hêñ bonak yabi, ay ampanalangin haka ampagkantan pamagpuri kan Apo Namalyari hi apostol Pablo haka hi Silas. Ampanggilam hilay kapareho lan nakahukul bayro. <sup>26</sup> Namakonkaynaman, ay nanlayon hêñ hadyay hêkaw. Kabay nangayêgê ya hatoy hukulan. Biglan naubuh hêñ nangaloat ya kabat, haka nangakalag ya taykala ya pinanggapoh la kanlan nangahukul. <sup>27</sup> Hêñ nipaimata ya hatoy ampamaala bayro ha hukulan haka na napansin ya nangaloat ya kabat, ay inulbut nay hundang na ta magpakamatsi ya dayi ta êndat na no nakatakah hilay nay nakahukul. <sup>28</sup> Noa, inangawan ya ni apostol Pablo, ya wana, “Paan kan magpakamatsi ta atsi kay pon di ya kalatan!”

<sup>29</sup> Namakwa yan pag-atáng ya hatoy ampamaala ha hukulan, haka naparagah yan hinumwêñ hêñ ampamêgpêg hêñ nanlokob ha arapan lan apostol Pablo angga ni Silas. <sup>30</sup> Bayo in-awah na hila ha hukulan haka ya nangotang kanla, ya wana, “Hinoy dapat kon daygêñ êmén ko miligtas ha parusa ya ayn anggaan?”

<sup>31</sup> Hinabi la etaman, ya wanla, “Maniwala ka kan Panginoon Jesus ta êmén ka miligtas ha parusa ya ayn anggaan, hika boy hilay kalamo yo ha bali.” <sup>32</sup> Ha maparah ya habi ay impamwang lan apostol Pablo ya habi hêñ Panginoon ha ampamaala bayro ha hukulan haka ha kalamo na ha bali. <sup>33</sup> Habayto êt hêñ yabi hêñ inuyahan nan bantay ya hugat lan apostol Pablo, ay hiya haka ya kalamo na ha bali ay tampol hêñ nagpabawtismo. <sup>34</sup> Pangayari ay hinagyat na hilan humwêñ ha bali na ta inapagan na hilan pamangan. Hadyay higla nan ampamaala ha hukulan haka ya kalamo na ha bali gawan ha naniwala hilay na kan Apo Namalyari.

<sup>35</sup> Pangamaranon, ay namiutoh ya habaytoy manungkuluan hêñ gobyernon Roma ya atsi ha Filipos, hêñ polis ha hukulan, ya ipaawah lay na kano, hilan apostol Pablo.

<sup>36</sup> Gawan êmbayro, ay hinabi na kan apostol Pablo, hêñ habaytoy ampamaala ha hukulan, “Namipagtan hilan habi ya manungkuluan hêñ gobyernon Roma bayri ha Filipos ya iawah kaw. Kabay mita kaw na dayi hêñ mapatêkbêk.”

<sup>37</sup> Noa, wani apostol Pablo, “Impabarog la kay ha arapan hêñ kal-atan, haka la kay impahukul hêñ a la kay pon nilingon agyan taga-Roma kay! Bayo labay la kay hêñ ipaawah hêñ ayn makamwang! A malyari ya êmbayro! Dapat hilay maglakó di hêñ mamiawah kannaêñ!”

<sup>38</sup> Inhumbung lan polis kanlan manungkuluan ya hinabi ni apostol Pablo. Nalimwan hilay habaytoy manungkuluan hêñ gobyernon Roma hêñ namangan la ya taga-Roma hila awud hilan apostol Pablo. <sup>39</sup> Kabay nagtaglo hila

ha hukulan hên nakikwan patawad kanla haka la hilay na in-awah. Pinaki-habi la kanla etaman ya mag-alih hila ha balayan Filipos. <sup>40</sup> Pamakaawah la ha hukulan hilan apostol Pablo, ay nagtagloh hila ha bali lan Lydia. Hêna napahigla lay nay nakêm lan patêl ha Panginoon, ay nammita hilay na.

## 17

### *Hi apostol Pablo, hi Silas, haka hi Timoteo ha Balayan hên Tesalonica*

<sup>1</sup> Hi apostol Pablo, hi Silas haka hi Timoteo ay nagdann ha balayan Amfipolis haka ha balayan Apolonia angga ha nilatêng hila ha balayan Tesalonica ya main sinagoga lan Israelita. <sup>2</sup> Gawan nakasanayan nay na ni apostol Pablo hên makisimba hên toroan na hilay kapareho nan Israelita, ay ha tatloy allon pamagsimba la, ay anlakwêñ na hila bayro ha sinagoga la, ta nakipagpalinawan ya kanla ubat ha Kahulatan ya impahulat ni Apo Namalyari. <sup>3</sup> Impalinaw haka pinaptêgan na ya nakahulat bayro ya tungkol ha Mesias, ya Cristo, ya impangakon Mámiligtas ya pinili ni Apo Namalyari hên mamaala, ya kailangan nan matsu haka mabiyay oman. Impamwang na kanla ya hi Panginoon Jesus ay habaytoy Mámiligtas, ya an-êngganan la, ya impangako bayro ha Kahulatan ya impahulat ni Apo Namalyari. <sup>4</sup> Main kaatag Israelita ya nanggilam ha impamwang, haka nakihonol kan apostol Pablo haka kan Silas. Main etaman bayro hên babayi ya mabandi haka kaltan Griego\* ya maka-Diyos ya naniwala kan Panginoon Jesus.

<sup>5</sup> Noa, main kaatag ya poon lan kapareho lan Israelita ya nag-inakit kanlan apostol Pablo. Tsinipon la hilay mapanyag karawakan, ya ampagbabaka-haan ha palengke, ya nangamuyot a êt hên kal-atan hên nanulhul hên boon balayan hên lakwêñ ya bali ni Jason ta êndat lan atsi hila bayro hilan apostol Pablo ta paawahêñ la hila dayi. <sup>6</sup> Hêna lay na natapol, ay ginuloy lan gintan hi Jason haka kaatag kanlan patêl ha Panginoon, hên in-arap ha manungkulon hên balayan Tesalonica hên main kalamoy angaw, ya wanla, “Hilay habaytoy lalaki ay ampamuligaw ha balang legal ya anlakwêñ la! Amêhêñ, atsi hilay na bayri kantamo! <sup>7</sup> Pinakatuloy na hila ni Jason ha bali na, haka hilangan ay anhumalanghang ha patakaran hên pinakapoon ha Roma ya ampag-ari kantamo, ta anhabien la ya main kaatag ya pinakapoon, ya langan na ay Jesus.” <sup>8</sup> Hêna pamakagilam lan habayto hên hilay kal-atan, haka hilay manungkulon hên balayan Tesalonica, ay nangabuligaw hila. <sup>9</sup> Hêna tinanggap lay nay impiyansa ni Jason haka ya impiyansa lan kaatag ya patêl ha Panginoon, ay imbuhan hilay na.

### *Hi apostol Pablo, hi Silas angga hi Timoteo ha Balayan hên Berea*

<sup>10</sup> Hêna habayton yabi êt, ay in-aporah la hi apostol Pablo, hi Silas haka hi Timoteo hên impalakoy na ha balayan Berea. Hêna nilumatêng hilay na, ay hinumwêñ hila ha sinagoga lan kapareho lan Israelita. <sup>11</sup> Hilay Israelita bayro ha Berea ay loat ya kaihipan, kanan kaihipan lan Israelita ha Tesalonica. Labay-labay lan manggilam ha panoro ni apostol Pablo. Allo-allo lan ampag-aralan ya Kahulatan ya impahulat ni Apo Namalyari, ta êmén la mamwangan no pêtêg ya an-itoro ni apostol Pablo. <sup>12</sup> Mal-at kanla ya naniwala haka main etaman bayro hên kal-atan babayi haka lalaki ya Griego ya mabandi. <sup>13</sup> Noa, hêna namwangan lan Israelita ha Tesalonica ya ampaypamwang hi apostol Pablo hên habi ni Apo Namalyari ha balayan Berea, ay nangamat hilay na êt bayro hên nanulhul kanlan taga-Berea hên manalanghang kan apostol Pablo. <sup>14</sup> In-aporah la hi apostol Pablo hên hilay

\* **17:4** Ya alwan Israelita.

patêl ha Panginoon ha Berea hên impalako ha laylay hên dagat ta êmén ya makahakay ha barko. Noa, nabalag hi Silas angga hi Timoteo bayro ha Berea. <sup>15</sup> Main ungnoy nangiatêl kan apostol Pablo hên angga ha balayan Atenas. Hêñ paorong hilay nay nangiatêl kana, ay intsipan na kanla ya tampol hilan mangamat hi Silas angga hi Timoteo, no malyari.

*Hi apostol Pablo, hi Silas angga hi Timoteo ha Balayan Atenas*

<sup>16</sup> Hêñ an-êngganan ni apostol Pablo hi Silas haka hi Timoteo ha balayan Atenas, ay namalagêhbêg ya nakêm na ha napansin nay kal-atan hêñ rebulto hêñ alwan pêtêg ya diyos ya ansimbaén lan taga-Atenas. <sup>17</sup> Kabay ya dinyag na, ay bayro ha sinagoga, ay nakipagpalinawan ya hêñ kalamo nay kapareho nan Israelita haka hilay kaatag ya maka-Diyos. Allo-allo ya etaman hêñ ampakidebate kanlan atsi bayro ha plasa. <sup>18</sup> Bayro ha plasa ay main mánoro ya Epicureo haka mánoro hêñ Estoico ya ampakidebate kana. Wanlan kaatag, “Hinoy an-ilambung nan hata ayn minuwang?”

Wanla êt hêñ kaatag, “Ampaypamwang ya lawêh hêñ tungkol ha diyos lan kaatag ya bansa!” Hinabi lay habayto gawan an-ipamwang na kanla ya Mangêd ya Habi tungkol kan Panginoon Jesus haka tungkol ha natsi ya biyayêñ hilan oman. <sup>19</sup> Ha maparah ya habi, ay gintan la hi apostol Pablo ha pagtsiponan lan manungkulan bayro ha legal ya ambaêgêñ lan Areopago, ya wanla, “Labay naêñ mamwangan no hino ya habaytsi ya bayoy toro ya an-itoro mo kannaêñ. <sup>20</sup> Babayo naêñ magilaman ya habaytsi ya anhabîen mo kabay labay naêñ mamwangan no hinoy labay habiêñ hêñ habaytsi.” <sup>21</sup> (Hilay taga-Atenas haka hilay kaatag ya ampaidi bayro ay allo-allo lan labay hêñ manggilam haka pihabian ya hinoman ya bayoy toro.)

<sup>22</sup> Kabay nirêng hi apostol Pablo ha arapan lan naka-tsipon ta hinabi na kanla, “Anggalangêñ kon taga-Atenas, angkahêlêk ko ya mahipêg kaw ha pamagsimba. <sup>23</sup> Ta ha pagtawak-tawak ko bayri ha legal yo, ay napansin koy mal-at ya ansimbaén yo. Nahêlêk ko ya mihay pamiatangan ya nag-hulat hêñ êmén di, ‘Habaytsi ay ha Diyos ya a naêñ muwang.’ Habaytoy ansimbaén yo, ya a yo man kilala, ay yabay ya an-ipamwang ko kamoyu. <sup>24</sup> Hiya hi Apo Namalyari ya nanyag hêñ luta haka ya kaganawan ya atsi bayri. Hiya ya Panginoon ha langit haka ha luta, kabay a ya ampaidi ha pagsimbaan ya dinyag tawo. <sup>25</sup> A na kitamon ampanapolan hêñ hinoman, ta hiyay ampam-in biyay haka inanawa haka hinoman ya kailangan tamo. <sup>26</sup> Paubat ha mihay ninuno, ay dinyag nay balang láhi ha boon luta, haka na hila dinyanan hêñ paidyanan la haka panaon lan mamiyay haka matsi. <sup>27</sup> Dinyag nay habayto ta êmén la ya tapolêñ haka mamwangan lan atsi ha luta. Ha kaptêgan, ay alwa yan marayo ha balang miha kantamo. <sup>28</sup> Nanad ha hinabi kamoyu hêñ mihay magaling maghabi, ya wana, ‘Hiyay ubatan hêñ biyay tamo, haka hiyay ampangillag kantamo ha pammita tamo, haka ha pamimiyay tamo.’ Nanad êt ha hinabi lan kaatag kamoyu ya main kamwangan, ya wanla, ‘Hikitamo ay maának ni Apo Namalyari etaman.’ <sup>29</sup> Gawan ha hikitamoy anak ni Apo Namalyari, ay paan tamo yan itad ha rebulto ya ginto, pilak, o bato ya dyag ha kaihipan haka galing hêñ tawo. <sup>30</sup> Hêñ hato, ay pinaulayan nay kasalanan lan ayn muwang hêñ tungkol kana, noa, amêhêñ ay an-iutoh nay balang miha hêñ maghêhê haka talibatokan ya alwan mangêd ya pamimiyay. <sup>31</sup> Ta intakda nay na ya Allon Pamanukom ha balang miha ha boon luta. Main ya etaman hêñ pinili ya manatol hêñ main katoynungan. Haka pinaptêgan na, no hino ya habaytoy manatol hêñ biniyay na yan oman.”

<sup>32</sup> Hêñ nagilam lan naka-tsipon bayro ya tungkol ha pangabiyay lan oman hêñ hilay natsi, ay nipakaili hilan nammusmus ya kaatag. Noa, wanlan

kaatag ya labay lan manggilam oman hên tungkol bayro, no minghan a êt. <sup>33</sup> Kabay nammita yay na hi apostol Pablo. <sup>34</sup> Main ungno bayro ya naniwala kan Panginoon Jesu-Cristo haka naki-lamo-lamo kan apostol Pablo. Kalamo la hi Dionisio ya miha kanlan ampamaala bayro ha Areopago, haka ya mihay babayi ya nag langan Damaris haka hilay kaatag pon.

## 18

### *Hi apostol Pablo, hi Silas angga hi Timoteo ha balayan Corinto*

<sup>1</sup> Pangayarin habayto, ay nag-alih ya hi apostol Pablo ha balayan Atenas, ta nammita ya ha balayan Corinto. <sup>2</sup> Napagkabalay na bayro ya mihay kapareho nan Israelita, ya in-anak ha patal Ponto, ya nag langan Aquila. Kalatêng-latêng nan bêngat ni Aquila ha Corinto hên ubat ha balayan Roma ha bansom Italia, kalamo nay ahawa na hi Priscila. Kabay immalih hila bayro ta naubuh hilan impaalih ni Claudio ya hilay Israelita ha balayan Roma. Ha pamaniraw ni apostol Pablo kanlan miahawa, <sup>3</sup> ay napaidi ya tana bayro kanla gawan magdya-dyag hilan tolda hên nanad êt ha andaygén na. Kabay hiya ay nag-in kalamo lay na hên manyag hên tolda. <sup>4</sup> Balang allon pamagsimba ay atsi ya ha sinagoga, ta êmén makipagpalinawan kanla. Labay na hila dayi hên mapaniwala kan Panginoon Jesus ya hilay kapareho nan Israelita haka hilay Griego.\*

<sup>5</sup> Hên nilumatêng hi Silas haka hi Timoteo ya ubat ha probinsyan Macedonia, ay allo-allo nay nan naarap ni apostol Pablo ya pangitoro hên habi ni Apo Namalyari ha sinagoga, hên ampaptégan na kanlan kapareho nan Israelita ya hi Panginoon Jesus ay ayn kaatag no alwan ya Mesias, ya Cristo, ya impangakon Mámiligtas ya pinili ni Apo Namalyari hên mamaala. <sup>6</sup> Noa, hên nilabanan la hi apostol Pablo hên kapareho nan Israelita hên main lamoy pammusmus, ay ingkampag nay tuwapok ya atsi ha takop na, ta êmén la mamwangan ya paulayan na hilay na. Wana êt kanla, “Ayn kinan kasalanan no migtan kaw man ha parusa ya ayn anggaan! Paubat amêhêñ ay toroan kinay alwan Israelita.” <sup>7</sup> Kabay nag-alih ya ha sinagoga ta nanoro ya tana ha bali nan mihay lalaki, ya ampagsimba kan Apo Namalyari, ya nag langan Ticio Justo. Ya bali na ay atsi ha danin sinagoga. <sup>8</sup> Hi Crispo, ya ampamaala ha sinagoga haka hilay kalamo na ha bali, ay naniwala ha Panginoon. Malat êt kanlan taga-balayan Corinto ya ampanggilam hên pamanoro ni apostol Pablo ya naniwala ha Panginoon haka nagpabawtismo.

<sup>9</sup> Hên mihay yabi ay nagpahalumata ya Panginoon kan apostol Pablo, ya wana, “Paan kan malimo. Ihundo moy pamanoro mo, hinoman ya malyari, <sup>10</sup> gawan mal-at bayri ha balayan ya maniwala kangko. Hikoy kalamo mo kabay ayn makaantsi kamo.” <sup>11</sup> Kabay naglaêñ ya bayro hi apostol Pablo hên mihay taon haka anêm ya buwan hên nangitoro hên habi ni apo Namalyari.

<sup>12</sup> Noa, hên nag-in gobernador ha probinsyan Acaya, hi Galio, ay nagkamiha hilay Israelita, hên dakpêñ la hi apostol Pablo, ta gintan la ya ha mánlingon kaso, <sup>13</sup> ya wanla, “Habaytsi ya ampaytoro hên mihay pamagsimba kan Apo Namalyari ya bawal ha Kautuhan ya anhonolêñ naêñ Israelita.”

<sup>14</sup> Hên maghabi ya dayi hi apostol Pablo, ay nuna yan naghabi hi Galio, “No ya ampihabian yon Israelita, ay tungkol ha mihay mabyat ya kasalanan, o narawak ya dinyag ni Pablo ya bawal ha patakaran gobyerno, ay gilamén kataw dayi. <sup>15</sup> Noa, no tungkol bat ha habi, langan, haka Kautuhan yon Israelita ya humbung yo, ay dali kaw na! Taganán a ko hatolan ya habain.”

\* **18:4** Ya alwan Israelita.

<sup>16</sup> Kabay impaawah na hilay na bayro ha panlingonan kaso. <sup>17</sup> Hi Sostenes ya miha kanlan ampamaala ha sinagoga ya nantan kan apostol Pablo, ay dinakép lan alwan Israelita, ta tinumbuk la ya ha arapan hén panlingonan kaso. Noa, a hila pinakiéménan ni Gobernador Galio.

*Ya pag-orong ni apostol Pablo ha balayan Antioquia ha probinsyan Siria*

<sup>18</sup> Naglaêh ya pon bayro ha balayan Corinto hén nabuyot-buyot hi apostol Pablo, pangayarin habayto ay nagtsipan yay na kanlan patêl ha Panginoon, biha hinumakay yay na ha hakayan pandagat ya palakon Siria hén kalamo na hilay miahawa ya hi Priscila haka hi Aquila. Hén nilumatêng hila ha Cencrea, nagpaorog hi apostol Pablo gawan ha tsipan na kan Apo Namalyari. <sup>19</sup> Hén nilatêng hila ha balayan Efeso, ay nakiblag yay na kanlan miahawa ta makipagpalinawan ya ha sinagoga kanlan kapareho nan Israelita. <sup>20</sup> Pinakihabian la ya hi apostol Pablo hén magbuyot ya pon bayro kanla, noa, hinabi na ya a ya. <sup>21</sup> Nagtsipan ya tana kanla ya no kalabayan ni Apo Namalyari, ay mag-orong ya. Pangayarin habayto, ay hinumakay yay na ha hakayan pandagat hén paalih ha balayan Efeso.

<sup>22</sup> Hén nilatêng yay na ha balayan Cesarea, ay nilumakat ya ha balayan Jerusalem ta hiniraw na hilay patêl ha Panginoon ya angkapi-tsi-tsipon bayro, biha nilumohan yay na êt ha balayan Antioquia ha probinsyan Siria. <sup>23</sup> Hén nabuyot-buyot ya bayro, ay nag-orong yay na êt ha probinsyan Galacia haka Frigia ta pinataniêh nay paniwala lan ampaniwala kan Panginoon Jesus ha balang logal bayro.

*Hi Apolos ay nilumatêng ha balayan Efeso haka ha balayan Corinto*

<sup>24</sup> Amêhên, ay main Israelita ya nag langan Apolos ya nilumatêng ha balayan Efeso. Hiyay in-anak ha Alejandria. Magaling yan makipagpalinawan haka mal-at ya kamwangan na ha Kahulatan ya impahulat ni Apo Namalyari. <sup>25</sup> Hiyay tinoroan hén toro ni Panginoon Jesus, haka mahiglay nakêm nan ampanoro hén kaptégan hén tungkol kana hén main kahipégan. Êmbayro man, ay muwang nan bêngat ya intoro ni Juan Bautista ya tungkol ha pamawtismo. <sup>26</sup> Makhaw ya nakêm nan namipamwang ha sinagoga. Hén nagilam ni Priscila angga ni Aquila ya panoro na, ay hinagyat la ya ha bali la, haka la impalinaw kana no ay-êmén nan an-iligtas ni Apo Namalyari hilay ampaniwala kan Panginoon Jesus. <sup>27</sup> Amêhên, hén labay ni Apolos hén maniraw ha probinsyan Acaya, ay nanulat hilay patêl ha Panginoon ha balayan Efeso ya tanggapên la ya dayi hi Apolos hén hilay ampaniwala kan Panginoon Jesus ha Acaya. Impagtan la kana ya habaytoy hulat. Hén nilatêng yay na bayro, ay mahlay ya naihawop na kanlan naniwala gawan ha ingalo ni Apo Namalyari. <sup>28</sup> Ta ubat ha Kahulatan ya impahulat ni Apo Namalyari ay hinabyanan na hilay Israelita ha arapan hén kal-atan, ha kagalingan nan ampaptégan, ya hi Panginoon Jesus ay hiya ya Mesias, ya Cristo, ya impangakon Mámiligtas ya pinili ni Apo Namalyari hén mamaala.

## 19

*Hi apostol Pablo ha balayan Efeso*

<sup>1</sup> Kaban atsi ya hi Apolos ha balayan Corinto, hi apostol Pablo etaman ay nagdann ha logal ya kapanawgtugan angga ha nilumohan ya ha balayan Efeso. Nalatêng na bayro ya ungnoy ampaniwala kan Panginoon Jesus.

<sup>2</sup> Kinotang na hila ni apostol Pablo no hinapatan hilay na hén Espiritu ni Apo Namalyari, hén naniwala hila kan Panginoon Jesus. A hila êt kano, ta a la êt muwang ya main Espiritu ni Apo Namalyari. <sup>3</sup> Kinotang nay na êt ni apostol

Pablo no hino awud ya naintindihan la ha pamawtismo kanla. Hinabi la ya pamawtismo kanla ay nanad ha intoro ni Juan Bautista. <sup>4</sup> Impamwang ni apostol Pablo kanla ya habaytoy pamawtismo ni Juan Bautista, ay palatandaan hēn naghēhē hila ha kasalanan la ya hilay Israelita. Impamwang etaman ni Juan ya dapat maniwala ha anlumatēng ya anhumonol kana, ya ayn kaatag no alwan hi Panginoon Jesus. <sup>5</sup> Hēn nagilam lay habayto, ay nagpabawtismo hilan oman ha palatandaan ya ampaniwala hilay na ha langan ni Panginoon Jesus. <sup>6</sup> Hēn impalunto ni apostol Pablo ya gamēt na kanla, ay hinumapat kanla ya Espiritu ni Apo Namalyari. Nipaghabi hilay na ha habi, ya a la muwang, haka la hinabi ya impaihip kana ni Apo Namalyari. <sup>7</sup> Main manga labinlowa ya nagpabawtismo hēn habayto.

<sup>8</sup> Ha tatloy buwan bayro ha sinagoga, ay makhaw ya nakēm ni apostol Pablo hēn namipamwang haka nakipagpalinawan hēn tungkol ha pamanlokop ni Apo Namalyari. <sup>9</sup> Noa, main ungro kanla ya a naniwala gawan kakdēyan ulo la. Hinabi lay nangarawak ya tungkol ha toro ni Panginoon Jesus ha arapan hēn naka-tsipon. Kabay immalih ya bayro hi apostol Pablo haka hilay ampaniwala kan Panginoon Jesus, ta inhundo lay pamipagpalinawan la ha kuwartoy panoroan ni Tirano. <sup>10</sup> Loway taon hēn pamihundo ni apostol Pablo hēn habayto, kabay naubuh hilan nakagilam hēn habi hēn Panginoon ya hilay Israelita, haka hilay Griego\* ya ampaidi ha probinsyan Asia.

### *Ya maának ni Esceva*

<sup>11</sup> Hēn habayto ay dinyanan ya ni Apo Namalyari hi apostol Pablo hēn kapangyarihan hēn manyag hēn hadyay kapapaépapah. <sup>12</sup> Kabay mag-in panyo o hinon takop ya ubat ha lawini ni apostol Pablo, ay kowēn la ta gētan kanlan main hakit, ta êmēn mag-alih ya hakit la haka ya nangarawak ya a angkahēlēk.

<sup>13</sup> Bayro êt ha balayan Efeso, ay main ungnoy Israelita ya ampanêbêh hēn mamaalih hēn nangarawak ya a angkahēlēk ya hinumapat ha tawo. Hēn nahēlēk lay andaygēn ni apostol Pablo, ay labay lan totoēn hēn habtan ya langan ni Panginoon Jesus ha pamaalih lan nangarawak ya a angkahēlēk, ya wanla, “Ha kapangyarihan ni Jesus ya an-ipamwang ni apostol Pablo, ay an-iutoh ko kamoyu ya mag-alih kaw bahēn.” <sup>14</sup> Kalamo ha ampamaalih hēn nangarawak ya a angkahēlēk ya hinumapat ha tawo, ay hilay pitoy anak nay lalaki hēn mihay pinakapoon pari hēn Israelita ya nag langan Esceva.

<sup>15</sup> Noa, hēn ampamaalih hila dayi hēn narawak ya a angkahēlēk ya hinumapat ha mihay tawo, ay hinabi nan habaytoy narawak ya a angkahēlēk kanla, “Kilala ko hi Jesus haka muwang ko ya tungkol kan Pablo. Noa, hino kaw ta pakiêmēnan yo ko!” <sup>16</sup> Tampol na hilan dinawhong haka hinambut hēn hatoy hinapatan hēn narawak ya a angkahēlēk ya hatoy pitoy anak ni Esceva, kabay nikagigibak ya takop la haka nikahuhugat ya lawini la hēn hilay timmakah bayro ha bali nan hinapatan hēn narawak ya a angkahēlēk.

<sup>17</sup> Habaytoy nalyari kanlan pitoy anak ni Esceva ay namwangan ha boon balayan Efeso, mag-in kanlan Israelita angga kanlan Griego.† Kabay naubuh hilan nipag-épapah haka la pinuri hi Panginoon Jesus. <sup>18</sup> Mal-at kanlay ampaniwala kan Panginoon Jesus, ay inamin haka inhuko lay bulá la ha arapan lan kal-atan ta pinaghēhēan lay na. <sup>19</sup> Mal-at kanlan mapanawas, ay nanipon hēn libro ya ginamit la ha pamanawas la, haka la in-ulam ha arapan lan kal-atan. Hēn binilang la ya alagá hēn inulam la, ay niabot ya ha 50,000

\* **19:10** Ya alwan Israelita. † **19:17** Ya alwan Israelita.

ya pera ya pilak. <sup>20</sup> Ha êmbayroy nalyari, ay lalo hên nibahwag ya habi ni Apo Namalyari, kabay lalon nilum-at ya naniwala ha Panginoon.

### *Nangapigugulo hila ha balayan Efeso*

<sup>21</sup> Pangayarin habayto, ay nakapéptêng ya ihip ni apostol Pablo hên mag-dann ha probinsyan Macedonia angga ha probinsyan Acaya ta maniraw ya ha balayan Jerusalem angga ha balayan Roma. <sup>22</sup> Impauna na ha Macedonia ya lowa kanlan kahawop na ya hi Timoteo haka hi Erasto. Hi apostol Pablo etaman ay nabalag pon ha balayan Efeso ha probinsyan Asia.

<sup>23</sup> Hên atsi ya pon bayro ha Efeso hi apostol Pablo ay nagkamain hên taganán mahlay ya gulo gawan ha pamitoro nan toro ni Panginoon Jesus.

<sup>24</sup> Ta gawan ha panoro ni apostol Pablo, ay ayn hilay nan pangwanan hên kal-atan pera ya mihay magpipinday hên pilak ya nag langan Demetrio haka hilay mag-obra na. Hilay ampanyag hên nanaway bali-balian ha kalupan templo la ya pamyanan lan rebulto hên diyos lan Efeso ya nag langan<sup>‡</sup> Diana.

<sup>25</sup> Tsinipon ni Demetrio ya hilay mag-obra na haka ya kaatag ya magpipinday ta wana kanla, “Hikaw ya kalamo ko, muwang yo ya pamaminday bat ya angkaubatan hên katsighaw tamo. <sup>26</sup> Angkahêlêk yo haka angkagilaman yo ya andaygên ni Pablo. Anhabiên na ya alwan pêtêg diyos ya andaygên hên gamêt, haka kal-atan hên naamuyot na hên a maniwala kan Diana, alwan bat di ha balayan Efeso, noa, ha boon probinsyan Asia. <sup>27</sup> Kabay miparawak ya kapanapolan tamo haka taganán a lay nan pansinén ya pamaminday tamo. Alwan bat habayto, noa, ya pagsimbaan kan Diana, haka hiya man, ya pinaka-diyos tamo, ay a lay nan galangên di ha Asia angga ha boon luta.”

<sup>28</sup> Hên pamakagilam lan kalamo ni Demetrio hên habayto, ay hadyay tobag la, haka nipan-angaw hila, “Makapangyarihan hi Diana ya diyos di ha Efeso!” <sup>29</sup> Kabay nagkamain hên gulo ha boon Efeso. Dinawhong hên dinakêp lan taga-Efeso hi Gayo haka hi Aristarco ya taga-Macedonia, ya kalamo ni apostol Pablo ha panlumagay. Biha ginuloy hila ha pagtsiponan la. <sup>30</sup> Labay na dayi ni apostol Pablo hên maniraw bayro ha pagtsiponan la, noa, binawal la yan ampaniwala kan Panginoon Jesus. <sup>31</sup> Ya kaatag kanlan kaluguran na ya manungkulon ha probinsyan Asia ay namiutoh hên makihabi kana ya paan ya dayi hên maniraw ha pagtsiponan. <sup>32</sup> Nagulo hilay naka-tsipon bayro. Alwan pare-pareho ya an-iangaw lan naka-tsipon, ta kal-atan la ay a la muwang no awta naka-tsipon hila. <sup>33</sup> Impaarap lan Israelita ya mihay kalamo la, ya hi Alejandro ya mamipalinaw hên alwan hilay Israelita ya pinangowangkitan hên gulo. Siningyalan na hilay naka-tsipon hên paan maglabak ta maghabi yay na. <sup>34</sup> Noa, hên nabalayan lan kal-atan ya hi Alejandro ay mihay Israelita, ay in-angaw la hên loway oras ya, “Makapangyarihan hi Diana ya diyos di ha Efeso!”

<sup>35</sup> Ha maparah ya pangahabi, ay napatunggén na hilay ampihan-angaw, hên mihay manungkulon ha balayan Efeso. Haka wana kanla, “Kapareho kon taga-Efeso, ayn miha kantamo ya a ampakamwang ya hikitamoy am-pamantay ha pagsimbaan kan Diana, ya makapangyarihan, haka hatoy rebulto na ya natatan ubat ha langit. <sup>36</sup> Ayn makapaghabin alwan pêtêg ya habaytsi ya anhabiên ko, kabay magpatêkbék kaw haka pakaihipên yo pon ya andaygên yo. <sup>37</sup> Hilay habaytsi ya gintan yo bayri, ay a hila nanakaw ha pagsimbaan tamo, haka a hila naghabin halanghang ha diyos tamo. <sup>38</sup> Kabay no main hilan idungot hilan Demetrio haka hilay kalamo nay magpipinday, ay malyari lan iarap ha mánlingon kaso ta nakal-an hilan manoyo hên

<sup>‡</sup> 19:24 Ha Griego: Artemis.

kaganawan kaso yo. <sup>39</sup> Noa, no main kaw pon êt hên kaatag ya idikil, ay malyarin pihahabian tamo ha humonoy pamagtsipon ha pamanhumonol ha patakaran tamo. <sup>40</sup> Ampotogén ako ha nalyari amêhén, ta malyari la kitamon idikil lan taga-Roma ya ampanggulo kitamo. No daygén lay habayto, ay kaingalo kitamo, ta ayn kitamon makatoynungan ha guloy habaytsi.” <sup>41</sup> Hên pangayari nan naghabi, ay pinabita na hilay na ya naka-tsipon.

## 20

### *Ya pag-orong ni apostol Pablo ha probinsyan Macedonia angga ha probinsyan Grecia*

<sup>1</sup> Hên pamakayarin gulo ha balayan Efeso, ay impabaêg ni apostol Pablo ya hilay ampaniwala kan Panginoon Jesus, ta pinakhaw nay nakêm lan tinoroan, hên ihundo lay paniwala la kana. Pangayari, ay nagtsipan yay na kanla ta mita yay na hên palakon probinsyan Macedonia. <sup>2</sup> Hiniraw na hilay ampaniwala kan Panginoon Jesus ha balayan ya atsi bayro, ta pinakhaw nay nakêm lan tinoroan, hên ihundo lay paniwala la. Pangayari ay inhundo nay pammita na hên angga ha probinsyan Grecia. <sup>3</sup> Naglaêh ya pon bayro hên tatloy buwan. Maghakay ya dayi ha barko hên palako ha probinsyan Siria, noa, hên namwangan na ya main kapareho nan Israelita ya nagmulongan kana, ay naihipan na tanan magdann ha probinsyan Macedonia ha pag-orong na. <sup>4</sup> Hilay nakilako kan apostol Pablo, ay hi Sopater ya taga-Berea, ya anak ni Pirro, hi Aristarco haka hi Segundo ya taga-Tesalonica, hi Gayo, ya taga-Derbe, hi Timoteo, ya taga-Listra, haka hi Tiquico haka hi Trofimo, ya taga-Asia. <sup>5</sup> Nuna hilay habayto kannaén ta inêngganan la kay ha balayan Troas. <sup>6</sup> Noa, hikay etaman ay nag-alih ha balayan Filipos hên pamakayari hên pista lan Israelita ya ambaêgén lan Pistan Puto ya ayn Pampaalsa. Himmakay kay ha barko hên angga ha nilatêng kay ha balayan Troas hên panlimay allo. Nanugêl kay bayro hên pitoy allo.

### *Ya tawlin pamaniraw ni apostol Pablo ha Troas*

<sup>7</sup> Ha unan allon habayton parominggo\* ay ni-tsi-tsipon kay ya Israelita ta nagkomunyon kay, ya pamanêmtêm ha pangamatsi ni Panginoon Jesus. Nangaral ya hi apostol Pablo hên angga ha bonak hên yabi, ta mita ya ha humonoy allo. <sup>8</sup> Mal-at ya dêkêt bayro ha pinagtsiponan naén ha ikatlon palapag bali. <sup>9</sup> Main mihay miyawhay, ya nag langan Eutico ya nakaikno ha mihay dorongawan, ya nakabêlêw ha kakarangan hên pamangaral ni apostol Pablo. Nanabo yan paubat ha ikatlon palapag hên habaytoy bali ya pinagtsiponan, kabay hên nilako la ya, ay natsi yay na. <sup>10</sup> Noa, hên tinumaoy hi apostol Pablo hên nangalakop kana, ay wana, “Paan kaw manyagah, ta angkabiyyay ya!” <sup>11</sup> Pangayarin habayto, ay nunik yay na êt hi apostol Pablo, bayro ha pinagtsiponan, ta pangayari naén nangan, ay inhundo nay panoro na hên angga ha maranon bayo nammita kay. <sup>12</sup> Hi Eutico, ya nangoman nabiyyay, ay in-atêl la ha bali na, hên hadyay higla la gawan nabiyyay ya.

### *Pamag-alih ni apostol Pablo ha Troas palakon Miletô*

<sup>13</sup> Pinagkablag naén hi apostol Pablo ta hinumakay kay ha barko ta napi-habian naén ya danan naén ya ha balayan Ason. Hiya etaman, ay namitsih. <sup>14</sup> Hên napipihlêk kay bayro ha balayan Ason, ay hinumakay yay na hên kalamo naén hên palako ha balayan Mitilene. <sup>15</sup> Paubat ha balayan Mitilene ay naghakay kay ha barko hên angga ha nilatêng kay ha êtêb hên Pulo hên

\* <sup>20:7</sup> Yabin Sabado hên habayto, ta kanlan Israelita, yabay ya umpisan unan allo hên mihay parominggo.

Quio. Hên humonoy allo, ay nipadann kay ha êtêb hên Pulo hên Samos, haka ha humonol êt ya allo ay nilatêng kay ha balayan Mileto. <sup>16</sup> Inihip ni apostol Pablo ya a yay na pon magdann ha balayan Efeso ta êmén ya a maabala ha probinsyan Asia, gawan labay nay nan makalatêng kay ha balayan Jerusalem bayo mag allo hên Pentecostes.

*Ya pamagtsipan ni apostol Pablo kanlan toa ya ampamaala ha pagtsiponan lan patêl ha Panginoon ha Efeso*

<sup>17</sup> Hên ungnoy nay allo naêñ lan apostol Pablo ha balayan Mileto, ay nami-pagtan ya hên habi kanlan toa ya ampamaala kanlan patêl ha Panginoon ya angkapi-tsi-tsipon ha balayan Efeso ya maniraw hila kana ha balayan Mileto.

<sup>18</sup> Paglatêng la kana ay kinahabi na hilay na, ya wana kanla, “Muwang yo ya nag-in biyay ko hên haton unan allon nilumatêng ako bayri ha probinsyan Asia. <sup>19</sup> Booy nakêm kon napakaaypa hên naghuyo ha Panginoon haka namalagêhbêg ya nakêm ko hên main pamagtêh ha kal-atan hên pamairap la kangko hên kapareho kon Israelita ha pagmulongan la kangko. <sup>20</sup> Muwang yo etaman ya a ko nag-alangan ha pamanawop kamoyu hên namipamwang haka nanoro hên tungkol kan Panginoon Jesus ha arapan man hên kal-atan haka ha binali. <sup>21</sup> Impakaaral ko etaman kanlan kapareho kon Israelita, haka kanlan Griego<sup>†</sup> ya dapat lan paghêhêan haka talibatokan ya kasalanan la, ta dapat magpalokop hilay na kan Apo Namalyari hên maniwala kan Panginoon Jesus.

<sup>22</sup> “Mita kina ha balayan Jerusalem ha utoh kangko hên Espiritu ni Apo Namalyari. A ko muwang no hinoy malyari kangko bayro. <sup>23</sup> Ya muwang kon bat, ay ha balang balayan ya lakwên ko, ay an-ipamwang na kangkon Espiritu ni Apo Namalyari, ya ihukul ako haka makaranas akon kairapan. <sup>24</sup> Noa, ayn kangko no mikarang ya biyay ko bayri ha luta o no ahê, ta ya maalagá kangko ay matupad koy an-ipadyag na kangko ni Panginoon Jesus. Yabaya pamipamwang hên Mangêd ya Habi tungkol ha ingalo ni Apo Namalyari.

<sup>25</sup> “Nakilamo ko kamoyu hên hato, kaban an-ipamwang koy tungkol ha pamanlokop ni Apo Namalyari. Noa, amêhêñ ay muwang kina ya a yo kina hên mahêlêk oman. <sup>26</sup> Kabay ampapakahabiên ko kamoyu amêhêñ, ha alloy habaytsi, ya alwan hiko ya main kasalanan no parusaan na kaw ni Apo Namalyari hên ayn anggaan. <sup>27</sup> Ta a ko nag-alangan ha paytoro kamoyu hên hinoman ya labay nan ipamwang kamoyu ni Apo Namalyari.

<sup>28</sup> Illagan yoy sarili yon pamanhumonol kan Apo Namalyari. Illagan yo etaman ya pamanhumonol lan patêl ha Panginoon ya angkapi-tsi-tsipon, ta pinili na kaw hên Espiritu ni Apo Namalyari hên mamaala kanla hên nanad ha pagpastol yo, ha tupa yo. Hila ay inlitas hên natsi ya hi Panginoon Jesus ya Anak ni Apo Namalyari. <sup>29</sup> Muwang ko, ya no ayn kina bayri, ay main mipanlumatêng ya maytoro hên alwan kaptêgan, ta labay lan alihêñ ya paniwala yo kan Panginoon Jesus. Hila ay nanad ahon lalê ya mapangyat ya mandawhong kamoyu hên ayn ingalo. <sup>30</sup> Agyan ha kalamo yo, ay main lumtaw ya maghabi hên alwan kaptêgan, ta êmén la maamuyot hilay ampaniwala kan Panginoon Jesus. <sup>31</sup> Kabay pakaillag kaw, haka panay yon panêmtêmêñ ya in-aral ko kamoyu ha boon tatloy taon, ya allo-yabi ayn têgêñ ya pamanayhay ko kamoyu, hên main lamoy pamanangih gawan anlugurêñ kataw.

<sup>32</sup> “Amêhêñ, ay an-ipatsiwala kataw kan Apo Namalyari, haka ha Mangêd ya Habi tungkol kan Panginoon Jesus ya ampamataniêñ hên nakêm yo.

<sup>†</sup> **20:21** Ya alwan Israelita.

Habaytoy Mangêd ya Habi, ay mam-in biyay ya ayn angga, ya in-il-an ni Apo Namalyari para ha balang miha ya impapawa na hên mag-in kana. <sup>33</sup> A ko kinaridyaan ya pera o takop hên hinoman. <sup>34</sup> Muwang yo etaman ya napupud ya gamêt ko ha pamag-obra ko ta êmén kay main mapangwaan hên ikabiyay naêñ mikakalamo. <sup>35</sup> Ha pamag-obra ko, ay dinyanan kataw hên alimbawa, ya ha kahipégan tamo ay madyanan tamo hilay a ampaka-obra ya taganán ampangailangan. Dapat tamon panêmtêmén ya hinabi ni Panginoon Jesus, ya wana, ‘Mas mahigla ya nakêm lan ampam-i kisa ya nakêm lan andyanan.’”

<sup>36</sup> Hêñ pamakayari nan naghabi, ay nandoko ya hêñ kalamo na hilay toa ya ampamaala kanlan taga-Efeso ya ampaniwala kan Panginoon Jesus, haka hila nanalangin. <sup>37</sup> Naubuh hilan nanangih, haka an-alakopén la ya hêñ an-aroén hi apostol Pablo. <sup>38</sup> Hadyay pamag-lungkot la hêñ pamakagilam lan hinabi na ya a la yay na mahêlêk hêñ oman. Bayo in-atêl la yay na ha barko ya hakayan na.

## 21

### *Ya pammako ni apostol Pablo ha balayan Jerusalem*

<sup>1</sup> Pamakayari naêñ hêñ nagtsipan kanla, ay naghakay kay ha barko ya nagtagloh ha Cos. Hêñ humonoy allo, ay naghundo kay hêñ nagbiyahe ha Pulo hêñ Rodas. Paubat bayro ay nagbiyahe kay ha balayan hêñ Patara.

<sup>2</sup> Paglatêng naêñ bayro, ay tampol kay nakatapol hêñ mihay barko ya palako ha Fenicia, ya angkasakopan hêñ Siria, kabay tampol kay hinumakay. <sup>3</sup> Hêñ niêtêb kay ha Pulo hêñ Chipre ya angkaipatanêh ha dapit uki ay naghundo kay etaman hêñ angga ha nilatêng kay ha probinsyan Siria. Tinunggén ya ha balayan Tiro, ya anhakyan naêñ, ta habaytoy pamitaoyan la hêñ kalga hêñ barko. <sup>4</sup> Kaban an-itaoy lay kalga, ay tinapol naêñ hilay ampaniwala kan Panginoon Jesus ya atsi bayro, ta napaidi kay pon bayro kanla hêñ pitoy allo. Gawan ha impaihip nan Espiritu ni Apo Namalyari kanlan patêl ha Panginoon, ay ambawalêñ la ya hi apostol Pablo hêñ paan yay na dayi hêñ mako ha balayan Jerusalem ta kayno main mamatsi kana. <sup>5</sup> Noa, hêñ nayari ya pag-laêh naêñ bayro ay nag-alíh kay. Hila etaman ya patêl ha Panginoon ya lalaki haka ahawa la haka maának la, ay namiawyon kannaêñ ha liglig hêñ balayan hêñ angga ha laylay hêñ dagat. Hêñ atsi kay bayro ha laylay dagat ay nipandoko kay ta nanalangin kay ha Panginoon. <sup>6</sup> Nagtsipan kay ha miha ta miha. Hinumakay kay bayto ha barko, haka nuli hilay na.

<sup>7</sup> Paubat ha balayan Tiro ay inhundo naêñ ya pamanlumagay naêñ hêñ angga ha nakalatêng kay ha balayan Tolemaida. Bayron pinakikitan naêñ hêñ namapayabi ya hilay patêl ha Panginoon. <sup>8</sup> Hêñ humonoy allo, ay naghundo kay ha pamammita hêñ palako ha balayan Cesarea. Haka naglaêh kay ha bali ni Felipe, ya mangitoro hêñ Mangêd ya Habi tungkol kan Panginoon Jesus. Hiya ya miha kanlan pitoy lalaki ya pinili\* hêñ hato ha Jerusalem. <sup>9</sup> Hi Felipe ay main apat ya anak, ya babayi ya ayn pon ahawa, ya dinyanan ni Apo Namalyari hêñ kapangyarihan hêñ mamipamwang hêñ impaihip na kanla. <sup>10</sup> Hêñ nabuyot-buyot kay bayro, ay main nilumatêng ya mihay mámipamwang ni Apo Namalyari, ya nag langan Agabo, ya nilumohan hêñ ubat ha probinsyan Judea. <sup>11</sup> Nilako na kay haka na kingwa ya tagkêh ni apostol Pablo ta ginapoh nay sarili nan bitsih haka gamêt na, bayo wana, “Habaytsi ya hinabi nan Espiritu ni Apo Namalyari, ‘Êmén di ya daygén la kanan nagtagkêh hêñ habaytsi bayro ha Jerusalem hêñ hilay Israelita haka

---

\* **21:8** Dyag 6:1-6.

idin la ya ha gamêt lan alwan Israelita.' " <sup>12</sup> Pamakagilam naên hên habayto, ay hikay haka hilay nakalamo naên, ya taga bayro, ay ampakihabi kana hên paan yay na dayi hên lumakat ha balayan Jerusalem. <sup>13</sup> Noa, wani apostol Pablo hên naghabi, "Hinoy andaygén yo, pata ampipanangih kaw! Paan yon paynaên ya nakêm ko! Nakal-an ako hên pagapoh haka matsi ha Jerusalem gawan ha pamaghuyo ko kan Panginoon Jesus."

<sup>14</sup> Hêñ a naên ya mabawalan hên mita, ay tinunggén kay hên maghabi, ta hinabi naên tana, ya kalabayan hên Panginoon ya mahonol. <sup>15</sup> Pamakayarin ungnoy allo ay nagkumpini kay ta lumakat kay ha Jerusalem. <sup>16</sup> Main ampaniwala kan Panginoon Jesus ya nakilako kannaên, ya taga-Cesarea haka la kay in-atêl ha bali ni Minason ya taga-probinsyan Chipre haka bayro kay tanan nakikatuloy kana. Hiya etaman ya unan naniwala kan Panginoon Jesus.

### *Ya paniraw ni apostol Pablo kan Santiago*

<sup>17</sup> Hêñ nilatêng kay ha Jerusalem, ay mahigla la kay hên tinanggap hên patêl ha Panginoon. <sup>18</sup> Hêñ humonoy allo, ay naniraw kay lan apostol Pablo kan Santiago. Naubuh hila bayro ya toa ya ampamaala ha patêl ha Panginoon ya angkapi-tsi-tsipon. <sup>19</sup> Pangayari na hilan kinumusta, ay miniha-miha nan impamwang kanla ya dinyag ni Apo Namalyari ha pamanoro na kanlan alwan Israelita ha ay atoman ya legal ya pinanoroan na.

<sup>20</sup> Hêñ pamakagilam lan habayto, ay pinuri la hi Apo Namalyari. Noa, hinabi la kan apostol Pablo, ya wanla, "Muwang mo patêl, bayri ha Jerusalem, ay main libo-libo ya kapareho tamon Israelita, ya naniwalay na kan Panginoon Jesus, haka ampakahonolên lay Kautuhan ya impahonol kantamo ni apo Moises. <sup>21</sup> Nabalit-an la ya antoroan mo hilay kapareho tamon Israelita ya ampaniwala na kan Panginoon Jesus, ya ampaidi ha legal lan alwan Israelita, ya paan hila kanon humonol ha Kautuhan ni apo Moises, nanad ha paan lay nan ipatuli ya anak la, haka paan hilan humonol ha kaatag ya nato-toan tamo ha toa tamo. <sup>22</sup> Hino ya daygén tamo, ta êmén la mamwangan ya alwan pêtêg ya nabalit-an la? Siguradon mamwangan la ya nakalatêng kay na bayri ha Jerusalem. <sup>23</sup> Dapat mon daygén ya anhabien naên. Main apat ya lalaki bayri ya maranin matupad ya impangako la kan Apo Namalyari. <sup>24</sup> Kilako ka kanla ha Templo ha panupad lan impangako la, haka honolên yo ya pagpalinis ha pamanhumonol ha Kautuhan tamon Israelita, biha hikay nay baala hên mamayad ha gastosên la ha paypaboko lan ulo la, haka ya iátang lay ayop. Mamwangan bayto ya kaganawan ya alwan pêtêg awud ya nabalit-an la ya tungkol kamo, ta hika man, ay anhumonol ha Kautuhan ni apo Moises. <sup>25</sup> Hila etaman ya alwan Israelita ya ampaniwala na kan Panginoon Jesus, ay hinulatan naên hilay na hên aral naên, ya paan hilan mangan hên hinoman ya imparaêp ha alwan pêtêg ya diyos, haka paan hilan mangna hên daya boy ayop ya giniêk. Hinulatan naên hila êt ya paan hilan mamabayi haka makilalaki."

<sup>26</sup> Hêñ humonoy allo, ay nakilako hi apostol Pablo kanlan apat. Biha ya hinumwêñ ha Templo, ay naglinis ya pon ayon ha ugali lan Israelita. Pangayarin habayto ay impamwang nay na ni apostol Pablo ha pari no hinon allo ya matupad ya impangako lan apat, kan Apo Namalyari, ta habaytoy allo ya pamiâtang lan ayop.

### *Dinakêp hi apostol Pablo ha Templo*

<sup>27</sup> Hêñ maranin mayari ya pampiton allon pamaglinis lan apat, ay main Israelita ya taga-probinsyan Asia ya nakahêlêk kan apostol Pablo ha lalêñ

Templo. Hila ay nanulhul kanlan kal-atan ya atsi bayro haka la ya dinakêp hi apostol Pablo. <sup>28</sup> Êmên di ya in-angaw la, “Hikaw ya kapareho naêñ hêñ Israelita, hawpan yo kay. Ta habaytsi ay ampaytoro hêñ narawak kano ya bansom Israel, haka narawak ya Kautuhan ni apo Moises haka ya Templo ni Apo Namalyari. Biha andêmêkan na êt ya hata Templo, ta ampantan ya êt hêñ Griego<sup>†</sup> di ha lalêñ hata Templo ni Apo Namalyari.” <sup>29</sup> Hinabi lay habayto ta nahêlêk lay kalamo ni apostol Pablo, ya hi Trofimo, ya taga-balayan Efeso, ya alwan Israelita, ha balayan Jerusalem, haka êndat la no pinakalamo na ya ni apostol Pablo ha Templo.

<sup>30</sup> Hêñ nagilam lan kal-atan ha Templo ya habayto, ay naubuh hilan nagulo. Pinaragh lan dinakêp hi apostol Pablo bayro ha lalêñ Templo, haka la ya pinagguguloy hêñ paawah ha Templo bayo la tampol hêñ inhara ya kabat. <sup>31</sup> Hêñ patsêñ la yay na dayi hi apostol Pablo, ay main naghumbung ha pinakapoon lan hundaloh ha bansom Roma, ya destino bayro ha Jerusalem, ya nagulo hilay kaganawan ya taga-Jerusalem. <sup>32</sup> Tampol nan impabaêg hilay kapitan, haka ya kaatag ya hundaloh na, ta nuwayu hila hêñ nagtagloh ha gulo. Hêñ nahêlêk lan Israelita ya pinakapoon lan hundaloh ha bansom Roma haka ya kalamo nay hundaloh, ay intunggêñ lay pamahakit la kan apostol Pablo. <sup>33</sup> Napaidani ya pinakapoon lan hundaloh ha bansom Roma kan apostol Pablo, ta dinakêp na ya, haka na ya impagapoh hêñ loway taykala. Biha na hila kinotang ya atsi bayro, no hino hi apostol Pablo, haka no hinoy nadyag nay karawakan.

<sup>34</sup> Alwan pare-pareho ya an-iangaw lay pakibat lan naka-tsipon bayro. Gawan ha hadyay gulo, ay a na mamwangan hêñ pinakapoon lan hundaloh ha bansom Roma no hinoy kaptégan, kabay namiutoh yan hundaloh na ya gêtan la hi apostol Pablo ha kampo la, ta êmên la ya pakakotangên. <sup>35</sup> Panlumatêng la ha eran hêñ kampo, ay napilitan ya hundaloh hêñ buwatêñ hi apostol Pablo gawan ampigagalmotan la yan kal-atan. <sup>36</sup> Ampakikamat-kamatan la hilan apostol Pablo hêñ hilay kal-atan hêñ ampamiangaw kana, “Patsêñ ya! Patsêñ ya!”

### *Ya pamiligtas ni apostol Pablo hêñ sarili na*

<sup>37</sup> Hêñ ihowêñ la yay na dayi hi apostol Pablo ha kampo, ay kinotang nay pinakapoon lan hundaloh ha bansom Roma, ha habin Griego no malyari na yan mapakihabian. Kabay wana kan apostol Pablo, “No kamwang kan maghabin Griego, <sup>38</sup> ay alwa ka awud habaytoy taga-Egipto ya nakanon bêngat hêñ nanulhul kanlan kal-atan, haka nantan hêñ apat ya libo ya nilumaban ha gobyerno ha kabalah-balahan.” <sup>39</sup> Naghabi etaman hi apostol Pablo, “Hiko ya miha ha Israelita, ya in-anak ha Tarso ha probinsyan Cilicia. Ya balayan Tarso ay muwang ha ayri man ya legal. Ampakihabi ko kamo ya paulayan mo kon makipagpalinaw kanlan naka-tsipon bayri.” <sup>40</sup> Hi apostol Pablo ay pinaulayan hêñ pinakapoon lan hundaloh ha bansom Roma, kabay nirêng yay na ha eran ta siningyalan na hilay naka-tsipon, ta êmên hila patêkbék. Hêñ a hilay na naglabak, ay naghabi yay na hi apostol Pablo ha habin Hebreo ya habi lan Israelita, ya wana,

## 22

<sup>1</sup> “Matoa ko haka patêl ko, gilamêñ yoy habiêñ ko amêhêñ ha pamiligtas ko hêñ sarili ko.”

<sup>†</sup> **21:28** Ya alwan Israelita.

<sup>2</sup> Hêñ nagilam lan Israelita ya naghabi hi apostol Pablo ha habin Hebreo, ya habi la, ay a hilay nan taganán naglabak, kabay inhundo nay na habaytoy pamaghabí na.

<sup>3</sup> “Hikoy mihay Israelita ya in-anak ha balayan Tarso ha probinsyan Cilicia. Hinumlay ko bayri ha Jerusalem. Ya nanoro kangko ay hi Gamaliel. Intoro na kangkoy Kautuhan ya anhonolén lan ninuno tamon Israelita. Booy nakém kon naghuyo kan Apo Namalyari, nanad êt kamoyu améhén. <sup>4</sup> Hêñ hato ay pampairapan ko hilay anhumonol ha toro ni Panginoon Jesus hêñ angga ha impapatsi ko ya kaatag kanla. Lalaki haka babayi, ay impadakép ko hilan ginapoh haka impahukul. <sup>5</sup> Ya pinakapoon pari haka ya kaganawan toa ya nag tungkulon ha bansa, ay malyarin mamaptégha anhabién ko, ta hila ya nam-i kangko hêñ kahulatan para kanlan kapareho tamon Israelita ha balayan Damasco, ya dakpén kon gapohén hilay ampaniwala kan Panginoon Jesus, hêñ gêtan hila bayri, ta êmén hila parusaan.

### *Impamwang ni apostol Pablo no ay-êmén yan binayo ni Jesus ya taga-Nazaret*

<sup>6</sup> “Hêñ narani kina ha balayan Damasco, hêñ mag-uugtoy na, namakonkay-naman ay nahukloban kon kapahiléw ya hawang ya ubat ha langit. <sup>7</sup> Nihubhub ko ha luta, haka nakagilam kon habi, ya wana kangko, ‘Saulo, Saulo, awta ampairapan mo ko?’ <sup>8</sup> Naghabi ko, ‘Hino ka Panginoon?’ Bayo wana kangko, ‘Hiko hi Jesus ya taga-Nazaret, ya ampairapan mo.’ <sup>9</sup> Hilay kalamo ko ay nakahélék hêñ habaytoy hawang, noa, a la nagilam ya hinabi hêñ habaytoy naghabi kangko. <sup>10</sup> Nangotang ko, ‘Hinoy dapat kon daygén Panginoon?’ Haka wanán Panginoon kangko, ‘Miréng ka, ta magtagloh ka ha balayan Damasco. Habién lay na kamo bayro ya kaganawan balak ni Apo Namalyari ya daygén mo.’ <sup>11</sup> Hêñ a ko makahélék gawan habaytoy kapahiléw ya hawang, ay hilay kalamo ko ay namiakay kangko ha Damasco.

<sup>12</sup> “Bayro ha Damasco ay main mihay lalaki ya nag langan Ananias. Anhumonol ya ha Kautuhan ya anhonolén tamon Israelita, haka anggalangén la yan kaganawan kapareho tamon Israelita ya ampaidi bayro. <sup>13</sup> Nilako na kon hiniraw, ta wana, ‘Patéñ kon Saulo, makahélék kan oman!’ Hêñ habayto êt, ay tampol ko yan nahélék. <sup>14</sup> Wana êt, ‘Hi Apo Namalyari ya sinimba hêñ ninuno tamo, ay namili kamo hêñ hato pon, ta êmén mo mamwangan ya kalabayan na, haka ta êmén mo mahélék ya Mesias, ya Cristo, haka magilaman ya pamaghabí na. <sup>15</sup> Ta hika ya mamipamwang ha balang miha, ya nahélék mo haka nagilam mo. <sup>16</sup> Kabay améhén, galingén mina! Miréng ka ta mamaégha ha Panginoon hêñ paghêhéan moy kasalanan mo. Pabawtismo ka, haka ipauyah mina kana ya kasalanan mo.’ Habaytoy hinabi ni Ananias kangko.”

### *Impamwang ni apostol Pablo ya pangiutoh kana hêñ manoro kanlan alwan Israelita*

<sup>17</sup> “Hêñ pamag-orong ko bayri ha Jerusalem, hêñ ubat ha Damasco, kaban ampanalangin ko ha Templo, ay nagkamain kon halumata. <sup>18</sup> Bayro ha halumata ko ay nahélék ko hi Panginoon Jesus, haka na hinabi kangko, ya wana, ‘Parahén mon mag-alíh di ta a la paniwal-an ya pamaptégh mo hêñ tungkol kangko.’ <sup>19</sup> Noa, hinabi ko, ‘Panginoon, kayno maniwala hila no maintindihan la ya binayo ko, ta muwang lan kal-atan ya ha balang sinagoga, ay an-ipadakép, an-ipahukul, haka an-ipapatok ko hilay ampaniwala kamo. <sup>20</sup> Hêñ ampatsén la hi Esteban, ya ampamaptégh kamo, ay atsi ko bayro hêñ kalamo la. Hiko pon êt ya nagbantay hêñ takop lay pangkébél lan namatsi kana.’ <sup>21</sup> Bayo wana kangkon Panginoon, ‘Êmbayro man, ay an-iutoh kata

ha marayo hēn maypamwang hēn tungkol kangko kanlan alwan Israelita.' Habaytoy hinabi hēn Panginoon kangko," wani apostol Pablo.

*Hi apostol Pablo haka ya pinakapoon lan hundaloh ha banson Roma*

<sup>22</sup> Hēn nahabi nay habayto ya tungkol ha alwan Israelita, ay a lay na labay manggilam habi na, ta namiangaw hilan êmēn di, "Patsēn ya! Patsēn ya! A ya dapat mabiyay!" <sup>23</sup> Ha pamiangaw la, ay pinaragah lan inalih ya takop la ya pangkēbel, haka namihabol hilan tuwapok ha tag-ay gawan ha hadyay huluk la. <sup>24</sup> Ya pinakapoon lan hundalon Roma ay namiutoh hēn ihowēn la hi apostol Pablo ha kampo, ta barogēn ya, ta êmēn na pakibatan ya kotang la kana, no hinoy dinyag na, no pata êmbayroy angaw lan kapareho nan Israelita. <sup>25</sup> Noa, hēn naigapoh la yay na ha paygapohan, ta barogēn la ya, ay wani apostol Pablo ha kapitan hēn hundaloh ya nakairēng ha dani na, ya wana, "Mangēd kaya ha patakaran hēn gobyerno ya bat barogēn ya mihay taga-Roma hēn a pon nalingon ya kaso na?"

<sup>26</sup> Pamakagilam nan habayto, ay nilako nan kapitan ya pinakapoon lan hundalon Roma ta wana kana, "Ay-êmēn, ha taga-Roma ya awud!"

<sup>27</sup> Kabay nilako hi apostol Pablo hēn pinakapoon lan hundaloh ha banson Roma ta wana, "Habiēn mo kangko no taga-Roma kan taganá?" Hinabi ni apostol Pablo ya taga-Roma yan taganá.

<sup>28</sup> Biha hinabi nan pinakapoon lan hundalon Roma, ya mal-at ya imbayad na bayo ya nag-in taga-Roma. Amêhēn hinabi nay na êt ni apostol Pablo, ya wana "Noa, hikoy taganán taga-Roma hēn paubat hēn hikoy in-anak."

<sup>29</sup> Tampol nagdayo kana ya hilay nakal-an hēn mangotáng kan apostol Pablo. Agyan hatoy pinakapoon lan hundalon Roma ay nalimwan, gawan namwangan na ya taganán taga-Roma hi apostol Pablo, ya bat nan naipagapoh ta êmēn barogēn.

*Hi apostol Pablo ay in-arap ha Sanedrin*

<sup>30</sup> Gawan labay nan pinakapoon lan hundaloh ha banson Roma hēn mamwangan no hino ya an-ibara la kan apostol Pablo hēn hilay kapareho nan Israelita, ay ha humonoy allo, ay inubuh nan impa-tsipon ya hilay ampamaala kanlan pari haka ya boon Sanedrin, bayo impaokal na hi apostol Pablo ta impaarap na ya kanla.

## 23

<sup>1</sup> Kaban ampakahēlkēn ni apostol Pablo ya hilay kalamo hēn Sanedrin, ay wana kanla, "Patēl, muwang ni Apo Namalyari ya malinis ya konsinsya ko ha pamaghuyu ko kana paubat hēn hato angga amêhēn." <sup>2</sup> Hēn pamakagilam na ni Ananias, ya pinakapoon pari ya hinabi na, ay namiutoh ya kanlan karani ni apostol Pablo ya tampalingēn la ya ha bēbēy. <sup>3</sup> Kabay wana kana ni apostol Pablo, "Tampalingēn ka ni Apo Namalyari ha ikamatsi mo, ha pagbabara mon anhumonol ka ha Kautuhan ha paypatampaling mo kangko, ta bawal ha Kautuhan ya habayto." <sup>4</sup> Naghabi hilay hatoy karani ni apostol Pablo, ya wanla kana, "Ammusmusēn moy pinakapoon pari ni Apo Namalyari!" <sup>5</sup> Wana etaman ni apostol Pablo kanla, "Patēl ko, a ko muwang ya hiya awud ya pinakapoon\* pari ni Apo Namalyari, ta nakahulat, 'Alwa yon paghabian hēn narawak ya ampamaala kamoyu.' "

<sup>6</sup> Hēn napansin ni apostol Pablo ya main bayron Saduseo† haka Pariseo‡ ay in-ikhaw nay habi na, ya wana kanla, "Patēl, hikoy Pariseo, ta anak ako

\* **23:5** Exodus 22:28. † **23:6** A hila ampaniwala ya mangoman mabiyay ya hilay natsi. ‡ **23:6** Ampaniwala hila ya mangoman mabiyay ya hilay natsi.

hên mihay Pariseo. An-imbistigaên la ko di amêhên gawan angkasigurado ko ya mangoman mabiyay ya nangamatsi.” <sup>7</sup> Hên nahabi nay habayto, ay nangapihuhabak hilay Pariseo haka hilay Saduseo. Kabay napiatag hilay naka-tsipon. <sup>8</sup> (Hilay Pariseo ay ampaniwala hên mangoman mabiyay ya nangamatsi. Ampaniwala hila êt ya main anghel haka kaélwa. Noa, hilay Saduseo ay a ampaniwala ya main habayto.) <sup>9</sup> Ya pamiaangaw la ay taganán hinumkaw! Nirêng ya ungnoy móñoron Kautuhan ni apo Moises, ya Pariseo, ta wanla, “Ayn kay hên mahêlêk ya kasalanan nan habaytsi ta kayno main mihay anghel o kaatag ya ubat ha langit ya nakihabi kana!” <sup>10</sup> Hên hadyay nay pamihuhubak la, ay nalimo ya hatoy pinakapoon lan hundalon Roma ta kayno maobot ya halap na ha pamipapaktang la kan apostol Pablo. Kabay in-utoh na ha hundaloh na ya pakikwanan lan kowên kanla, haka la ya ihowên ha kampo la.

<sup>11</sup> Habayton yabi, ay nagpahlêk ya Panginoon kan apostol Pablo, ta wana kana, “Pakhawên moy nakêm mo, ta no ay-êmên ya pamaptêg mo kangko bayri ha balayan Jerusalem, ay êmên êt bayro ya kailangan mon daygên ha balayan Roma.”

#### *Pinulong hi apostol Pablo hên kapareho nan Israelita*

<sup>12</sup> Pangamaranon ay pinulong hên ungnoy Israelita hi apostol Pablo. Nangako hila ha sarili la ya a hila mangan haka minêm angga ha a la ya mapatsi. <sup>13</sup> Maigit ha apatapo ya lalaki ya namulong kana. <sup>14</sup> Dinumani hilay na kanlan toa ya main tungkulon ha bansa, haka kanlan ampamaala kanlan pari, ta wanla, “Hikay ay nagmimihan nakêm ya a kay manaway hên kaên angga ha a naên ya mapatsi hi Pablo. <sup>15</sup> Kabay hikaw haka ya Sanedrin, ay dapat mamagtan hên habi kanan pinakapoon lan hundalon Roma, ya gêtan la yan oman di kamoyu hi Pablo ta waringan pakakotangên yo yan mangêd ya tungkol ha kaso na. Ha dann pon, ay patsên naên yay na.”

<sup>16</sup> Habaytoy pamamulong kan apostol Pablo ay namwangan hên angkên nay lalaki ha patêl nay babayi. Kabay hinumwên ya habaytoy angkên na ha kampo lan hundaloh, ta impamwang nay habayto kan apostol Pablo.

<sup>17</sup> Impabaêg ni apostol Pablo ya mihay kapitan ta wana kana, “Pakilamoan moy hata miyawhay kanan pinakapoon yon hundaloh, ta main yan ihumbung kana.” <sup>18</sup> Kabay nilamoan na ya kanan pinakapoon lan hundalon Roma, ta wana kana, “Impabaêg akon nakahukul ya nag langan Pablo, ta pinakihabi na kangko ya lamoan koy hata miyawhay kamo, ta main yan ihumbung kamo.” <sup>19</sup> In-akay hên pinakapoon lan hundaloh ya hatoy miyawhay hên gintan ha duyo ya ayn tawo hên pinakihabian, ta kinotang na ya, no hinoy ihumbung na kana. <sup>20</sup> Naghabi ya miyawhay, “Nagkamiha hilay kapareho naên hên Israelita ya pakikwaan la kamo nobukah hi apostol Pablo hên kotangên la ya waringan hên iarap ha Sanedrin, hên pakakotangên.

<sup>21</sup> Noa, paan mo hilan panggilaman, ta tambangan la yan maigit hên apatapo ya lalaki ya kapareho kon Israelita. Nagmimiha hilan nakêm ya a hila mangan haka minêm angga ha a la ya mapatsi. Nakal-an hilay na, haka an-êngganan la tana ya pakibat mo, no malabay ka, o no ahê.” <sup>22</sup> Binawal na yan pinakapoon lan hundaloh ya paan nan habiên ha hinoman ya habaytoy inhumbung kana, biha pinabita na ya.

#### *Impaatêl hi apostol Pablo kan Gobernador Felix ha balayan Cesarea*

<sup>23</sup> Impabaêg nay nan pinakapoon lan hundalon Roma ya lowa kanlan kapitan na, ta wana kanla, “Mamil-an kaw hên lowang gatoh ya hundaloh haka pitumpo ya nipagkabayo haka lowang gatoh ya nipagtandos, ta alas

nuweben yabi amêhên, ay mita kaw hên palakon Cesarea. <sup>24</sup> Mangil-an kaw êt hên kabayo ya hakayan ni Pablo, haka iatêl yo ya kan Gobernador Felix. Pakaillagan yo yan mangêd.” <sup>25</sup> Embayri ya laman hên hulat ya impagtan na kanla:

<sup>26</sup> “Panggalangên kon Gobernador Felix, hiko hi Claudio Lisias ya ampanulat kamo. Angkumustaên kata. <sup>27</sup> Habaytsi ya lalaki ay dinakêp lan kapareho nan Israelita, ta patsên la yay na dayi, noa, hên namwangan ko ya miha yay taga-Roma, ay inligtas la ya hên hundaloh ko, ta êmén la ya a mapatsi. <sup>28</sup> Ha labay kon mamwangan no hinoy pan-ibara la kana, ay impagtan ko ya kanlan Sanedrin la. <sup>29</sup> Bayro kon namwangan ya ampamibad-an la kana, ay tungkol awud ha Kautuhan la, ya a la angkapikakahundoan. Noa, alwan hépat ya habayto hên hiyay ipapatsi o ipahukul. <sup>30</sup> Amêhên, ta namwangan kina ya anhablaên la yay na hén kapareho nan Israelita, ay tampol ko yay nan an-ipaatêl bahêن kamo. In-utoh ko hila etaman ya namibara kana, ya iarap lay na kamo, ya an-ibara la kana.”

<sup>31</sup> Hinonol la etaman hên hundaloh ya in-utoh kanla. Pangayabi, ay kingwa lay na hi apostol Pablo, ta gintan la ya ha balayan Antipatris. <sup>32</sup> Pangamaranon, ay nag-orong hilay nay kaatag ya hundaloh ha kampo la, noa, inhundo lay pamammita la hén habaytoy nipagkabayo. <sup>33</sup> Hén paglatêng la ha Cesarea, ay gintan la hi apostol Pablo haka hatoy hulat ha gobernador. <sup>34</sup> Hén nabaha nay na ni Gobernador Felix, ya habaytoy hulat ay kinotang na ya hi apostol Pablo no taga-ayri ya. Haka hén namwangan na ya taga-Cilicia ya, <sup>35</sup> ay wana kana, “Lingonêñ koy kasó mo ha pamanlumatêng hén hilay nangidikil kamo.” Biha na in-utoh ya pakabantayan la ya, hi apostol Pablo, ha mahlay ya bali na, ya impairêng ni Arin Herodes hén hato.

## 24

### *In-arap la hi apostol Pablo kan Gobernador Felix*

<sup>1</sup> Pangalabah hén limay allo, ay nilumatêng ha Cesarea hi Ananias, ya pinakapoon pari hén kalamoy ungnoy toa ya main tungkulon ha bansa, haka hi Tertulo, ya mihay abogado. Indikil lay na kan Gobernador Felix ya pamara la kan apostol Pablo. <sup>2</sup> Hén in-arap hi apostol Pablo kanla, ay inumpisaan nan habiên ni Tertulo ya an-ibara la kan apostol Pablo, ya wana,

“Panggalangên kon Gobernador, mahlay ya utang nakêm naêñ kamo ha kapatékbêkan ya nabuyot naêñ angkaranasan, haka ha kaatag pon ya binayo mo bayri kannaêñ gawan ha kagalingan mo. <sup>3</sup> An-igalang naêñ ya habayto haka taganán ampahalamatan naêñ ka hén ayn angga, hén hikay ya atsi ha ay-irin logal. <sup>4</sup> Noa, ta êmén a naêñ ka maabala pon, ay ampakidawat ko kamo ya gilamêñ mo pon ya habiên naêñ kamo ha kangêran nakêm mo. <sup>5</sup> Nahêlêk naêñ ya habaytsi, ya taganán ampanggulo ya, haka ampamagulo kanlan kapareho naêñ Israelita ha balang lakwén na, hén lumaban ha gobyernon Roma. Hiyay miha kanlan ampamaala ha ambanhagan lan Nazareno, ya anhumonol ha toro ni Jesus ya taga-Nazaret. <sup>6</sup> Labay na êt hén démêkan ya Templo naêñ ha Jerusalem, hén mamihowén ya dayi hén alwan kapareho naêñ Israelita bayro, kabay dinakêp naêñ ya. [Haka parusaan naêñ ya dayi hén pamanhumonol ha Kautuhan naêñ, <sup>7</sup> noa, nilumatêng hi Claudio Lisias haka pinatoluk na ya kannaêñ hén kingwa hi Pablo. <sup>8</sup> Biha in-utoh na êt ni Claudio kannaêñ ya bayri naêñ yay nan ipalingon kamo ya kasó ni Pablo,]\* ta ha pamangotang mo kana ay mamwangan mon pêtêg ya kaganawan ya

\* <sup>24:8</sup> Ya nakahulat bayri ha pibonakan hén hata [ ] ay ayn ha kaatag ya Bibliyan Griego.

an-ibara naêñ kana.” <sup>9</sup> Hilay kaatag ya Israelita ya kalamo ni Tertulo ay nakiuyon ha hinabi na, haka la êt pinaptêgan ya kaganawan hinabi na.

### *Nangatoynungan hi apostol Pablo ha arapan ni Gobernador Felix*

<sup>10</sup> Hêñ siningyalan yay nan Gobernador Felix hi apostol Pablo ya hiyay nay maghabi, ay wani apostol Pablo,

“Panggalangêñ kon Gobernador, paubat hêñ hato, ay muwang kina ya hika ya mánlingon kasó bayri ha bansa naêñ, kabay angkahigla kon mangatoy-nungan ha arapan mo hêñ mamilitgas hêñ sarili ko. <sup>11</sup> No imbistigaêñ mo, ay mammangan mo, ya ayn pon hêñ labinloway allo, paubat hêñ nilumatêng ako ha Jerusalem hêñ magsimba kan Apo Namalyari. <sup>12</sup> Minghan man ay a la ko êt hêñ nahêlêk lan Ananias ya nakihubakan ha hinoman ha lalêñ Templo, o nanulhul man hêñ kal-atan ha ay-iri man ya sinagoga naêñ o ha kaatag man ya legal. <sup>13</sup> Ayn hilan maiarap kamoyu ya mamaptêg ha an-ibara la kangko. <sup>14</sup> Noa, an-aminêñ ko kamo, anlugurêñ kon Gobernador, ha pamagsimba ko kan Apo Namalyari, ya Diyos hêñ ninuno naêñ, ay anhumonol ko ha toro ni Panginoon Jesus ya anak na, ya an-itad lan habaytsi hêñ alwan pêtêg ya toro. Noa, naubuh kon anhonolêñ ya Kautuhan ni apo Moises, haka ya inhulat lan kaatag ya mámpamwang hêñ an-ipaihip kanla ni Apo Namalyari. <sup>15</sup> Nanad êt kanlan Ananias, ay ampaniwala ko ya biyayêñ oman ni Apo Namalyari ya nangamatsi, hilay mahonol kana haka hilay alwan mahonol kana. <sup>16</sup> Kabay ampakiwanan kon panay manyag kangêran, ta êmêñ mag-in malinis ya konsinsya ko kan Apo Namalyari haka ha tawo.

<sup>17</sup> “Pamakayari hêñ ungnoy taon hêñ ayn ako ha Jerusalem, ay nag-orong kina hêñ mamiatêl hêñ hawop kanlan kapareho kon Israelita ya ampan-gailangan, haka mamiâtang kon ayop kan Apo Namalyari. <sup>18</sup> Kaban atsi ko ha Templo hêñ ampanyag hêñ habayto, hêñ kayari-yari ko ya pamaglinis ha pamanhumonol ha Kautuhan naêñ, ay nalatngan la ko hêñ kapareho kon Israelita ya ubat ha Asia. Ha kaptêgan, ay ayn hilan nalatngan ya lakê ya tawo haka ayn ampanggulo. <sup>19</sup> Hilay kapareho kon Israelita ya ubat ha Asia, ay dapat mamihumbung bayri no main hilan an-ibara kangko. <sup>20</sup> Gawan ha ayn hila bayri ya hilay kapareho kon Israelita ya ubat ha Asia, ay dapat habiêñ lan Ananias, ya kapareho kon Israelita ya atsi bayri amêhêñ no hinoy narawak ya nahêlêk la kangko hêñ in-arap la ko ha Sanedrin. <sup>21</sup> Para kanla lawêh, ay alwan mangêd hêñ naikhaw ko ha arapan la, ya angkotangêñ la ko gawan ha paniwala ko, ya mangoman mabiyay ya nangamatsi. Kabay angkotangêñ yo ko amêhêñ di ha arapan yo.”

<sup>22</sup> Hêñ pamakgilam ni Gobernador Felix hêñ habi ni apostol Pablo, ay intêgêñ nay na pon ya pamanlingon hêñ kasó ta mal-at ya muwang nay tungkol ha toro ni Panginoon Jesus. Biha wana, “Ha pamanlumatêng ni Claudio Lisias, ya pinakapoon lan hundaloh ay ihundo koy pamanlingon hêñ kasó mo.” <sup>23</sup> Biha in-utoh nay kapitan ya ampagbantay kan apostol Pablo, ya bantayan la ya, noa, paan yan gapohêñ haka paulayan la ya, hêñ hirawêñ la ya hêñ hilay kabalay na hêñ hawpan la ya ha kailangan na.

### *Hi apostol Pablo ay in-arap kan Gobernador Felix haka ha ahawa na*

<sup>24</sup> Pamakayarin habayto, ay main yan nilako hi Gobernador Felix. Hêñ nakalabah hêñ ungnoy allo, ay nilumatêng ya hêñ kalamo nay ahawa na hi Drusila, ya mihay Israelita hêñ nanad kan apostol Pablo. Impaalap na hi apostol Pablo, ta êmêñ la magilaman ya tungkol ha paniwala kan Panginoon Jesu-Cristo. <sup>25</sup> Noa, hêñ an-ipamwang ni apostol Pablo ya tungkol ha pamimiyay ya pamanhumonol kan Apo Namalyari, haka ya tungkol ha

pamapgigil ha sarili haka ya pamanukom ni Apo Namalyari ha lumatêng ya allo, ay nalinwan ya hi Gobernador Felix, ya wana, “Mita ka pon ta no maarap ko, ay ipaalap katan oman.” <sup>26</sup> Ha pagtsiwalâ ni Gobernador Felix hên dyanan yan pera ni apostol Pablo, ta êmén na ya ibuhan, ay panay na yan impaalap hên kahabiên.

<sup>27</sup> Hêñ nalabah ya loway taon ay hi Porcio Festo ya nanagili kan Gobernador Felix. Gawan ha labay ni Gobernador Felix hên main hilan utang nakêm kana ya hilay Israelita, ay pinaulayan na ya tana ha hukulan hi apostol Pablo.

## 25

### *Pinakidawat ni apostol Pablo hên iarap la ya tana kanan Emperador, ya pinakapoon ha kal-atan bansa ya sakop hên boon Roma*

<sup>1</sup> Hi Festo ay nilumatêng ha Cesarea ta hiyay nag-in kahagili ni Gobernador Felix. Pangalabah hên tatloy allo, ay nilumakat ya ha Jerusalem. <sup>2</sup> Hêñ nilumatêng ya bayro hi Festo, ay in-arap lan ampamaala kanlan pari haka hilay kaatag ya main tungkulon ha Israelita kana ya an-ibara la kan apostol Pablo. <sup>3</sup> Pinakidawat la kana ya ipagtan na yay na ha Jerusalem hi apostol Pablo, gawan main nag balak hên patsen la yay na hi apostol Pablo ha dann. <sup>4</sup> Noa, wana kanla ni Gobernador Festo, “Hi Pablo ay nakahukul bayro ha balayan Cesarea, haka tampol kon mag-orong bayro. <sup>5</sup> Kabay pakilamo yo kangko ya hilay manungkulon, ya mamibara kana, no main yan nadyag ya karawakan.”

<sup>6</sup> Namalabah ya pon hên walo o mapoy allo hi Gobernador Festo ha balayan hên Jerusalem biha ya nag-orong ha balayan Cesarea. Hêñ humonoy allo, ay nikno yay na ha panlingonan na hên kasos haka na impakwa hi apostol Pablo hên iarap kana. <sup>7</sup> Panlumatêng ni apostol Pablo, ay pinalibutan la yan Israelita ya ubat ha Jerusalem. Ala mapaptêgan ya kal-atan ya nangabyat ya imbara la kana. <sup>8</sup> Hinabi ni apostol Pablo, ya wana, “Panggalangên kon Gobernador, ayn akon dinyag ya halanghang ha Templo, o ha Kautuhan ya anhonolên naen Israelita, mag-in kanan Emperador, ya pinakapoon ha kal-atan bansa ya sakop hên boon Roma.”

<sup>9</sup> Noa, gawan ha labay ni Gobernador Felix hên main hilan utang nakêm kana ya hilay Israelita ya ubat ha Jerusalem, ay kinotang na hi apostol Pablo no labay nan maglakó ha Jerusalem ta bayro na tanan lingonên ya kasos na.

<sup>10</sup> Noa, naghabi hi apostol Pablo, “Panggalangên kon Gobernador, atsi ko bayri ha arapan mo, hên panlingonan nan pinakapoon ha Roma. Kabay bayri mo kon dapat lingonên. Hikan taganá ya magmuwang, ya ayn akon nadyag ya halanghang kanlan kapareho kon Israelita. <sup>11</sup> No nanalanghang ako ha patakaran, o ha hinoman ya dapat hên pamatsan kangko, ay ayn akon maikatoynungan. Noa, ayn kaptêgan ya an-ibara la kangko, haka ayn karapatan ya hinoman hên idin la ko kanla. Kabay ampakihabi kon umarap ko kanan Emperador,\* ya pinakapoon ha kal-atan bansa ya sakop hên boon Roma.”

<sup>12</sup> Nagpapayo ya pon hi Gobernador Festo ha tagapayo na, biha wana kan apostol Pablo, “Gawan hinabi moy labay mon umarap kanan Emperador, ay ipagtan kata bayro kana.”

### *Nagpapayo hi Gobernador Festo kan Arin Agripa*

<sup>13</sup> Pamakalabah hên ungnoy allo, ay nilumatêng ha Cesarea hi Arin Agripa†

\* <sup>25:11</sup> Ya pinakapoon ha kal-atan bansa ya sakop hên boon Roma. † <sup>25:13</sup> Herodes Agripa II. Hêlkên ha panlêkan labay habiên hên habi di ha bokotan hên hata Bibliya.

haka ya ali na, hi Bernice, ta êmén maniraw kan Gobernador Festo.<sup>14</sup> Gawan nabuyot-buyot hilay na bayro, ay nagpapayo hi Gobernador Festo kan Arin Agripa, tungkol ha kaso ni apostol Pablo, ya wana, “Hi Felix ay main yan imbalag bayri, ya nakahukul.<sup>15</sup> Hêñ naniraw ako ha balayan Jerusalem, ay namihumbung hilay ampamaala kanlan pari lan Israelita, haka hilay toa ya main tungkulan ha bansa, hêñ tungkol kana haka nakihabi hila ya habiêñ ko ya dapat yay nan patsêñ.<sup>16</sup> Noa, wangko kanla, ‘Alwan ugali naêñ hêñ taga-Roma, ya bat hêñ patsêñ ya nakadikil, angga ha a pon mangatoynungan, ya nakadikil hêñ mamilitas hêñ sarili na ha namidikil kana.’<sup>17</sup> Hêñ naka-tsipon hila bayri kangko ha Cesarea, ya namidikil kana, ay a kina pinabuyot, ta hêñ humonoy allo ay nikno kina ha iknoan kon panlingonan haka impakwa ko yay na hi Pablo.

<sup>18</sup> “Hêñ nangapiarap hilay na, ay ayn hila man hêñ imbara ya mabyat ya kasalanan ya an-êngganan kon ipatan lan ibara kan Pablo.<sup>19</sup> Yan, ya pinamidikilan lan bat kan Pablo ay tungkol bêngat ha paniwala hêñ Israelita, haka tungkol ha mihay nag langan Jesus ya natsi, ya an-ipalêkpêk ni Pablo, hêñ nabiyyay oman.<sup>20</sup> A ko muwang no ay-êmén kon lingonêñ ya habayto, kabay kinotang ko hi Pablo no labay nan maglakó ha Jerusalem, ta bayro ya tanan lingonêñ.<sup>21</sup> Noa, a ya nabay hi Pablo, ta pinakihabi na ya ipalingon na tana kanan Emperador ha Roma, kabay impabantay ko ya hêñ angga ha maipaatêl ko ya kana ha Roma.”

<sup>22</sup> Amêhêñ, wani Agripa kan Gobernador Festo, ya wana, “Hiko man, ay labay ko yan magilaman hêñ maghabi ya habain.”

Naghabi ya etaman hi Gobernador Festo, ya wana, “Nobukah magilaman mo ya.”

### *In-arap hi apostol Pablo kanlan Agripa*

<sup>23</sup> Hêñ humonoy allo, ay hinumwêñ bayro ha panlingonan, hi Agripa haka hi Bernice, ya nakatakop hêñ bapan hampat. Kalamo lay ampamaala kanlan hundaloh haka hilay mabandi bayro ha Cesarea. Biha impahowêñ ni Gobernador Festo hi apostol Pablo.<sup>24</sup> Naghabi hi Gobernador Festo, ya wana, “Panggalangêñ kon Arin Agripa, haka hikaw ya naka-tsipon bayri. Habaytsi ya angkahêlêk yo, ay indikil la kangko hêñ kapareho nan Israelita ha Jerusalem haka bayri ha Cesarea. In-angaw la ya dapat yan patsêñ.<sup>25</sup> Noa, ha kakokotang ko kana, ay ayn akon mahêlêk ya bat hêñ pamatsan kana. Noa, gawan labay nan ipagtan ko ya kanan Emperador, ay binalak kon ipagtan ko ya kana ha Roma.<sup>26</sup> Noa, ayn akon maihulat ya tungkol kana, ya malyarin ipagtan ko kanan Emperador<sup>‡</sup> no pata an-ipagtan ko hi Pablo kana. Kabay in-arap ko ya kamoyu, lalon-laloy na kamo anlugurêñ kon Arin Agripa, ta êmén main kon maihulat kanan Emperador pangayarin pamangotang tamo kan Pablo.<sup>27</sup> Ta para kangko, ay ayn pukat hêñ gêtan kanan Emperador, ya mihay nakahukul, hêñ a angkapaptégan ya kaso ya an-ibara kana.”

## 26

### *Nangatoynungan hi apostol Pablo ha arapan ni Arin Agripa*

<sup>1</sup> Pamakayari nan naghabi ni Gobernador Festo, ay wani Arin Agripa\* kan apostol Pablo, “Malyari minan habiêñ ya pamilitas mo ha sarili mo!” Impaktang ni apostol Pablo ya gamêt na, ha pam-i na hêñ galang, biha inumpisaan nay nan hinabi ya pamilitas nan sarili na.

---

<sup>‡</sup> **25:26** Ya pinakapoön ha kal-atan bansa ya sakop hêñ boon Roma. \* **26:1** Herodes Agripa II. Hêlkêñ ha panlêkan labay habiêñ hêñ habi di ha bokotan hêñ hata Bibliya.

<sup>2</sup> “Panggalangên kon Ari, mahigla ko hên hika ya makaarap ko hên ika-toynungan ya pamilitas hên sarili ko, ha bat lan imbara kangko hên hilay kapareho tan Israelita. <sup>3</sup> Ta paubat hên hato, ay kamwangan mina ya natotoan tamo ha toa tamo, haka ya a tamo pamikakasundo hên hikitamo ya Israelita, kabay ampakihabi ko kamo ya pagtêêhan mo kon gilamên.

<sup>4</sup> “Muwang lan kaganawan hên kapareho ta, no ay-êmên ya nag-in biyay ko hên paubat haton anak ako ha balayan Tarso, ha probinsyan Cilicia angga hên atsi kina bayro ha Jerusalem. <sup>5</sup> Mana lay nan muwang, haka mapaptêgan la, no labay la, ya paubat hên hato, ay hikoy mihay kalamo lan Pariseo. Hikay ya Pariseo ay pinakamahonol ha kaganawan paniwala naen hên Israelita. Mahipêg ko etaman hên hinumonol ha kaganawan paniwala naen. <sup>6</sup> Haka amêhên, ay atsi ko bayri hên angkotangên, gawan ha paniwala ko ha impangako ni Apo Namalyari ha ninuno tamo ya biyayên nan oman ya nangamatsi. <sup>7</sup> Habaytoy pangako na kantamon kaapo-apoan lan labinloway anak ni apo Israel, ya pan-êngganan lan kapareho tan Israelita ha pamagsimba la kan Apo Namalyari hên allo-yabi, ay habayto êt ya pinangubatan hên pamidikil kangko. Panggalangên kon Ari, hila pon êt ya kapareho ta, ya ampamara kangko, gawan ha paniwala ko ya biyayên oman ni Apo Namalyari, ya nangamatsi, gawan biniyay nan oman hi Jesus ya taga-Nazaret. <sup>8</sup> Pata angkairapan ka hên maniwala hên a ambiyayên oman ni Apo Namalyari ya nangamatsi!

<sup>9</sup> “Hên haton una kon namwangan ya tungkol kan Jesus ya taga-Nazaret, ay êndat ko etaman hên dapat kon daygên ya madyag ko, ya halanghang kanlan tagahonol na. <sup>10</sup> Kabay êmbayro tana ya dinyag ko ha Jerusalem. Malat ya ampaniwala kan Jesus ya taga-Nazaret, ya impahukul ko ha tungkulan ya indin la kangkon ampamaala kanlan pari. No main hatolan hên patsên, ay atsi ko bayro hên ampakiawyón ha ampam-in hatol. <sup>11</sup> Ha kaganawan sinagoga ay ampairapan ko hilay ampaniwala kan Jesus ya taga-Nazaret, ta êmên patolukên ko hila dayi hên maghabi hên halanghang kana, haka ha hadyay tulaw ko ay angkorongan ko hilan pairapan ha ay-iri man ya logal ya ampuwayuên la, agyan ha balayan hên alwan Israelita.”

### *Impalinaw ni apostol Pablo no ay-êmên yan naniwala kan Jesus ya taga-Nazaret*

<sup>12</sup> Inhundo ni apostol Pablo ya pamaghabi na ya wana, “Habayto êt ya pinangubatan no awta kon nammita ha Damasco, hên main kahulatan ya ubat kanlan ampamaala kanlan pari, ya main akon tungkulan hên mag-dadakêp kanlan ampaniwala kan Jesus ya taga-Nazaret. <sup>13</sup> Anggalangên kon Ari, kauugtoan allo hên atsi kay ha dann, hên nahêlêk ko ya mihay hadyay hawang ya ubat ha langit ya kapahilêw ya maigit pon ha hawang allo. Habaytoy napaihoklob kannaen hên hikay ya mikakalamo. <sup>14</sup> Naubuh kay hên nihubhub ha luta, haka nakagilam kon baêg ha habin Hebreo, ya wana, ‘Saulo, Saulo, awta ampairapan mo ko! Hika ta êt ya ampamahakit hên sarili mo, nanad kan ampanabêng hên natayad.’ <sup>15</sup> Biha wangko kana, ‘Hino ka Panginoon?’ Bayo wanana Panginoon, ‘Hiko hi Jesus, ya ampairapan mo. <sup>16</sup> Mirêng kay na ta napahlêk ko kamo ta êmên hika ya iutoh kon maghuyo kangkon mamaptêg hên tungkol ha nahêlêk mo amêhên, haka hatoy ipahlêk ko êt kamo. <sup>17</sup> Iligtas kata ha kapareho mon Israelita haka kanlan alwan Israelita ya pamiutuhan ko kamo. <sup>18</sup> Iutoh kata kanlan habayto ta êmên ka manoro kanlan atsi ha kariglêman ni Satanas, ta êmên la talibatokan ya habayto hên dumani ha kahawangan ni Apo Namalyari. No maniwala hila kangko, ay patawarên hila ha kasalanan la, haka milamo hila kanlan pinili

ni Apo Namalyari, hēn mag-in kana.' Habayto ya hinabi hēn Panginoon Jesus kangko."

*Impalinaw ni apostol Pablo ya pamaghuyu na kan Panginoon Jesus*

<sup>19</sup> "Paubat hēn hato, anggalangēn kon Ari, ay a ko nagpantok ha hinabi nan hatoy halumata ya ubat ha langit. <sup>20</sup> Nanoro ko ha balayan Damasco, ha balayan Jerusalem haka ha boon angkasakopan hēn probinsyan Judea, ya legal lan kapareho tan Israelita, bayo nanoro ko etaman kanlan alwan Israelita. An-intoro ko kanla ya dapat hilan maghēhē, haka dumani kan Apo Namalyari. Habaytoy pamaghēhē la, ay dapat mahēlēk ha dyag la. <sup>21</sup> Gawan ha habaytoy pamanoro ko, ay dinakēp la ko hēn kapareho kon Israelita, hēn atsi ko ha lalēn Templo, haka patsēn la kina dayi. <sup>22</sup> Noa, minghan man, ay a na ko êt hēn pinaulayan ni Apo Namalyari ha pamaptēg ko ha balang hino. Ayn kon anhabién ya kaatag ha impamwang lan apo Moises haka ya kapareho nan māmipamwang hēn impaihip ni Apo Namalyari kanla. <sup>23</sup> Impapēt la ya tungkol kanan Mesias, ya Cristo, ya impangakon Māmiligtas ya pinili ni Apo Namalyari hēn mamaala, ya kailangan nan matsu haka mabiyay oman. Haka gawan hiyay unan nabiyyay oman ubat ha natsi, ay hiyay mampamwang kanlan kapareho tan Israelita haka kanlan alwan Israelita, no ay-êmēn na hilan mailigtas ha kariglēman ni Satanas."

<sup>24</sup> Kaban ampahabi ya pon hi apostol Pablo, ay makhaw nan hinabi ni Gobernador Festo, ya wana, "Angkamurit ka, Pablo! Ya pamalumbang mo ha pamag-aral mo ay ampakamurit kamo!" <sup>25</sup> Noa, hinabi ni apostol Pablo, ya wana, "Anggalangēn kon Gobernador, A ko angkamurit. Panay kaptēgan ya anhabién ko. <sup>26</sup> Muwang nan anggalangēn tamon Ari ya tungkol bayro ta ayn namitago hēn habayto. Kabay a ko angkarēng-êy hēn ihabi kana ya habién ko. <sup>27</sup> Anggalangēn kon Ari, ampaniwala ka kanlan māmipamwang hēn an-ipaihip kanla ni Apo Namalyari? Muwang koy ampaniwala ka!" <sup>28</sup> Wani Arin Agripa etaman kan apostol Pablo, "Yarin maparah mo kon amuyotēn hēn mag-in Cristiano!" <sup>29</sup> Hinabi ni apostol Pablo, ya wana, "Mag-in maparah o mabuyot man, ay an-ihalangin ko kan Apo Namalyari ya alwan hikan bēngat, noa, ya balang miha ya ampakagilam amēhēn, ay mag-in kapareho kon ampaniwala kan Panginoon Jesus. Noa, a ko labay ya mihukul kaw."

<sup>30</sup> Hēn nayarin naghabi hi apostol Pablo, ay nirēng hi Arin Agripa, hi Gobernador Festo, hi Bernice haka hilay nakaikno hēn kalamo la. <sup>31</sup> Hēn nakaawah hilay na, ay wanla ha miha ta miha. "Ayn yan nadyag ya narawak hi Pablo ya pamatsan o pamihukul man kana." <sup>32</sup> Bayo hinabi ni Arin Agripa kan Gobernador Festo, ya wana, "No a na dayin pinakihabi ni Pablo ya iarap nay kasos na kanan Emperador, ay malyari yay na dayin ibuhan."

## 27

*Pamaghakay lan apostol Pablo hēn palako ha balayan Roma*

<sup>1</sup> Hēn napikakayarian lay na, ya hikay ay dapat gētan ha balayan Roma, ha Italia, ay impatsiwala hi Pablo haka hilay kaatag êt ya nangahukul, kan Kapitan Julio, ya mihay kapitan hēn hundaloh hēn Roma, ya ambaēgēn "Pangkat nan Emperador." <sup>2</sup> Himmakay kay ha mihay barko ya ubat ha balayan hēn Adramitio palako ha laylay hēn lanēm hēn pantauyan lan taga probinsyan Asia. Nammitay na ya hatoy barko ya anhakyan naēn hēn kalamo hi Aristarco ya mihay taga-Tesalonica ha probinsyan Macedonia.

<sup>3</sup> Ha humonoy allo, ay nilumatēng kay ha balayan Sidon. Gawan mangēd ya nakēm ni Kapitan Julio, ay pinaulayan na ya hi apostol Pablo hēn hirawēn na ya kababay na, êmēn la ya mahawpan ha pangangailangan na. <sup>4</sup> Hēn nag-alíh

kay bayro ha balayan Sidon, ya anhakyan naêñ ya barko ay anhalongatêñ hên angin, kabay nagdann kay tana ha dani hên polo hên Chipre ta nihalimbêng ha angin. <sup>5</sup> Nagdann kay ha dagat ya atsi ha êtêb hên probinsyan Cilicia, haka ha probinsyan Panfilia angga ha niabot kay ha balayan Mira ha probinsyan Licia. <sup>6</sup> Bayron nakatapol hi Kapitan Julio hên barko ya naubat ha balayan Alejandria ya palakon balayan Italia, haka na kay pinahakay bayro.

<sup>7</sup> Ampakanawa ya anhakyan naêñ ya barko gawan pahalongat kannaêñ ya angin, kabay inabutan kay hên ungnoy allo, bayo kay niabot ha êtêb hên balayan hên Gnido. Paubat bayro, ay a kay midann ha bêtlay dagat kabay nagdann kay tana ha dani hên Salmon ha Pulo hên Creta. <sup>8</sup> Nairapan ya barko hên nagdann ha laylay hên lanêm hên angga ha nilatêng kay ha mihay legal ya ambaêgêñ lan Payhalimbêng Barko ya narani ha balayan hên Lasea.

<sup>9</sup> Ha ungnoy allo ya nahayang ha pamanlumagay naêñ, ay kapapotog hên maghundo, gawan panaon\* bagyo. Kabay wani apostol Pablo kanla, <sup>10</sup> “Hikaw ya patêl ko, muwang ko ya no ihundo tamo ya habaytsi ya pamanlumagay tamo, ay alwan bat kalga tamo, noa, ya barko haka biyay tamo ay atsi ha kapapotog etaman. Kabay paan kitaminan mita.” <sup>11</sup> Noa, hinonol ni Kapitan Julio ya hinabi lan kapitan hên barko haka ya nagbandi hên barko ya dapat tampol hilan mita, kanan impayo ni apostol Pablo. <sup>12</sup> Gawan alwan mangêd ya habaytoy dinyanan naêñ hên pagtunggênan barko ha panaon hên bagyo, ay labay lan kal-atan ya kalamo naêñ ya ihundo naêñ ya biyahe naêñ. Labay la dayi hên maabutan lay Fenice ha polo hên Creta, ya mangêd ya pantunggênan barko ha panaon hên bagyo gawan nihalimbêng ha angin.

### *Ya makhaw ya bagyo ha dagat*

<sup>13</sup> Hêñ tinunggêñ ya makhaw ya angin, ta main mangêd ya angin ya ampangubat ha timog, ay êndat lan malyari kay hên maghakay. Kabay inhakay lay nay pabato, ta naghundo kay hên nagdann ha laylay hên lanêm ha Pulo hên Creta. <sup>14</sup> Noa, namakonkaynaman ay bininhêkan kay hên hadyay hêkaw hên bagyo, ya naubat ha tawtgut hên Creta. <sup>15</sup> Gawan ahina makwan mahalongat hên barko ya angin, ay pinaulayan naêñ tanay barko hên mipayidpid no ayrin palako man ya angin. <sup>16</sup> Hêñ nipadpad kay ha dani hên mihay nanaway pulo ya ambaêgêñ Cauda, ay nihalimbêng kay pon ha angin, kabay nairapan kay man, ay inhakay naêñ ya pon ya hatoy bangka ya pangguluyêñ hên barko. <sup>17</sup> Hêñ naihakay naêñ ya bangka, ay kinêlkêlan la ya barko hên mangahlay ya yubil ta êmêñ a maagwat ya lolog na. Ha limo la ya mipayidpid kay ha kabalahán Sirte, ya atsi ha dani hên bansan Libia, ay in-aypa lay mahlay ya tolda ya pinaglayag hên barko ta êmêñ pakanawa yan mipayidpid hên angin. <sup>18</sup> Bininhêkan kay êt hên hadyay hêkaw hên bagyo, kabay ha humonoy allo, ay inumpisaan lay nan inhamwag ha dagat ya kaatag ya karga. <sup>19</sup> Hêñ humonoy allo, ay inhamwag lay na êt ya kaatag ya manigamit-gamit hên barko ha dagat. <sup>20</sup> Hêñ hadyay hêkaw pon hên bagyo, haka hadyay buyot naêñ hên a nahêlêk ya allo haka bêtêwêñ, ay naalihan kay tsiwala hên miligtas ha kamatsan.

<sup>21</sup> Hêñ nabuyot kay hên a nakaêkan, gawan ha kayagahan naêñ hên pangênggan hên tunggêñ ya bagyo, ay nirêng ya hi apostol Pablo, ta wana, “Hikaw ya kalamo ko, no pinanggilaman yo dayi ya hinabi ko ya manugêl kitamo pon ha pagtunggênan hên barko ha Creta, ay ayn dayin karga ya inhamwag ha dagat haka ayn dayin nahira. <sup>22</sup> Noa, ampakihabi ko kamoyu ya

\* <sup>27:9</sup> Ha habin Griego êmêñ di ya nakahulat: “Nakadann ya allo hêñ magtêhêñ hêñ a mangan ta êmêñ a maabala ya panalangin.”

pataniêhêñ yoy nakêm yo, gawan ayn matsu ya miha man kantamo, ta barkon bat ya mangahihira. <sup>23</sup> Muwang koy habayto, ta nayabi ay nagpahlêk kangko ya mihay anghel ni Apo Namalyari, ya ampaghuyuan haka ansimbaêñ ko. <sup>24</sup> Hinabi na kangko ya wana, ‘Pablo, paan kan malimo, ta dapat kan umarap kanan Emperador. Haka gawan ha ingalo ni Apo Namalyari, ay iligtas na etaman ya hilay kalamo mo ha barko.’ <sup>25</sup> Kabay pataniêhêñ yoy nakêm yo, ta ampagtisiwala ko kan Apo Namalyari, ya malyari ya inhabi kangko. <sup>26</sup> Noa, mipayidpid ya barko tamo hêñ angin ha mihay pulo.”

<sup>27</sup> Hêñ ikalabin-apat ya yabi naêñ ha dagat, hêñ nipadpad kay hêñ angin ha dagat ya ambaêgêñ lan Adriatico, hêñ bonak yabi ay napansin lan siman ya andumanî kay ha laylay lanêm. <sup>28</sup> Kabay hinukat lay kalalêan hêñ lanêm haka la namwangan ya lowampoy dêpa hêñ lalêñ lanêm bayro. Hêñ nikakahig hêñ pêrad ya barko, ay nanukat hilay na êt haka la namwangan ya labinlima tanay dêpa hêñ kalalêan lanêm. <sup>29</sup> Nalimwan hila, ta kayno misapung ya barko ha bato. Ya dinyag la, ay innabo la ha lanêm ya apat ya pabato ha bandan bulin barko, ta êmên ya dayi tunggêñ. (Nangwa hila etaman hêñ yubil ya pamtêh† lan tabla, ya nanad manobela hêñ barko.) An-ipanalangin la etaman, ya dayi ay tampol mawatah. <sup>30</sup> Labay lan siman dayi hêñ magtakah hila, kabay in-aypa lay habaytoy bangka ha lanêm ta nagbabara hêñ maynabo hêñ pabato ha unaan hêñ barko. <sup>31</sup> Noa, hinabi ni apostol Pablo kan Kapitan Julio haka kanlan hundaloh na, “No a hila patêkbêk bayri ha barko ya siman, ay ayn miligtas kamoyu.” <sup>32</sup> Kabay bintah lan hundaloh ya yubil hêñ hatoy bangka, haka la pinaulayan ya habayto hêñ mianol.

<sup>33</sup> Hêñ maranin maranon, ay naubuh na hilan hinagyat hêñ mangan ni apostol Pablo, ya wana, “Ikalabin-apat ya allo amêhêñ, ya a kaw nangan gawan ha kayagahan yon pangênggan hêñ tunggêñ ya bagyo. <sup>34</sup> Kabay ampakihabi ko ya mangan kaw pon dayi hêñ pêrad, ta kailangan yoy habaytsi ta êmên kaw hêñ humkaw. Ayn matsu kantamo, o mahakitan man.” <sup>35</sup> Hêñ pangahabi nan habayto ni apostol Pablo, ay nandampot yan puto, impahalamat na kan Apo Namalyari ha arapan lan kal-atan, haka na pinutohpotoh, haka ya nangan. <sup>36</sup> Gawan ha hinabi ni apostol Pablo, ay naubuh hêñ hinumkaw ya nakêm la, kabay nangan hila etaman. <sup>37</sup> (Ya kabooan naêñ ya nakahakay ha barko ay lowang gatoh boy pitumpo boy anêm.) <sup>38</sup> Hêñ nangabhoj hilay na, ay intapon lay na ha dagat ya tagan hêñ trigo ta êmên lumpaw ya hatoy barko.

### *Nangahihira ya barko ya anhakyan lan apostol Pablo*

<sup>39</sup> Hêñ humonoy maranon, ay main hilan naipatanêh ya laylay lanêm, noa, a la muwang no hinon pulo ya habayto. Nadambi lay kabalaham awud hêñ habaytoy laylay lanêm, kabay napikakayarian lan ipatunggêñ ya barko bayro no malyari. <sup>40</sup> Kabay bintah lay nay yubil hêñ habaytoy apat ya pabato ta pinaulayan la bayro ha lalêñ dagat. Inokal la êt ya hatoy yubil ya pinamtêh lan tabla, ya nanad manobela hêñ barko, ya pinamiptêhan la hêñ innabo‡ lay pabato. Intag-ay la etaman ya layag ha unaan, ta êmên ya ipayidpid hêñ angin hêñ palako ha laylay lanêm ya barko. <sup>41</sup> Noa, hêñ marayo kay pon ha laylay lanêm, ay niballok ya unaan hêñ barko ha balah. A yay na taganán maalih bayro. Nangaagwat ya bulian hêñ barko gawan ampungkogêñ hêñ mangakhaw ya tandulon.

<sup>42</sup> Labay lan hundaloh hêñ patsêñ ya nakahukul ta êmên ayn makakaway hêñ makatakah kanla. <sup>43</sup> Noa, binawal hila ni Kapitan Julio, ta labay nan

† 27:29 Dyag 27:40. ‡ 27:40 Dyag 27:29.

militas hi apostol Pablo. Pinalukho na hila ha dagat ya kamwang hēn mangaway ta êmēn hila miabot bayro ha laylay lanēm ya angkahêlêk la. <sup>44</sup> Hilay kaatag etaman ay inutuhan na hēn mipangwa hēn tabla o kaatag ya kayo ya ubat ha barko. Ha êmbayro ay niabot kay ha laylay lanēm hēn ayn man miha ya nalêmêh.

## 28

### *Hilan apostol Pablo ha Pulo hēn Malta*

<sup>1</sup> Hēn naligtasan naêñ hēn niabot ha laylay lanēm, ay namwangan naêñ ya habaytoy pulo awud ay ambaêgêñ lan Malta. <sup>2</sup> Bapan hampat ya pamanggap la kannaêñ hēn hilay taga-Malta. Gawan uran haka nakêbêl, ay pinangatog la kay, haka dinambi la kay hēn mangêd. <sup>3</sup> Hi apostol Pablo etaman, ay namumpon hēn kayo. Hēn niohong na habayto bayro ha nakaatog, ay main inumawah ya utan gawan angkanangnang yan apoy. Habaytoy utan, ya nagkamandag, ay nangumbibit hēn nangayat hēn gamêt ni apostol Pablo. <sup>4</sup> Hēn nahêlêk lan taga bayro ya hatoy utan ya nakabitsin ha gamêt na, ay nahabi la ha miha ta miha, “Mapamatsi yan tawoy habain ya lalaki. Nakaligtas ya ha dagat, noa, matsu yan taganá gawan ha kasalanan na.” <sup>5</sup> Noa, ingkampag nan bêngat ni apostol Pablo ha apoy ya hatoy utan, haka a ya man hēn nahakitan. <sup>6</sup> An-êngganan la bayro ya gumayá hi apostol Pablo o kaya biglan matumba hēn matsu. Hēn nabuyot hilay nan nag-êêtpa, ta ayn etaman hēn angkalyari kana, ay nagbayo hilan ihip, ya wanla, “Miha yay diyos ya habain!”

<sup>7</sup> Ha dani hēn habaytoy legal ya pinaidyanan naêñ ay bali nan ampamaala bayro ha pulo, ya nag langan Publio, ya mahiglan nananggap kannaêñ hēn tatloy allo. <sup>8</sup> Hēn habayto êt, ay an-omotêñ haka antakaêñ ya tatang ni Publio. Hiniraw na ya ni apostol Pablo ta impanalangin na ya hēn impalunto nay gamêt na kana. Tampol etaman nag-alíh ya hakit na. <sup>9</sup> Nibahwag ya habaytoy nalyari, kabay nipanlumatêng hilay kaatag ya nipaghakit, haka namaalih hi apostol Pablo hēn hakit la etaman. <sup>10</sup> Dinyanan la kay hēn mal-at ya digalo, haka hēn mag-alíh kay bayro, ay mal-at êt ya inhakay la ha barko, ya pangailangan naêñ ha biyahe.

### *Ya palako ha balayan Roma paubat ha Malta*

<sup>11</sup> Tatloy buwan ya nalabah bayo kay nakaalih ha pulo ya ambaêgêñ lan Malta. Nakahakay kay ha mihay barko, ya ubat ha balayan Alejandria, ya namalabah êt hēn abagat bayro ha Malta. Habaytoy barko ay nag batêk ni Castor haka Polux ya kambal, ya diyos, ya ansimbaêñ lan mal-at ya siman. <sup>12</sup> Nagdann kay ha balayan hēn Siracusa, haka namalabah kay bayro hēn tatloy allo. <sup>13</sup> Inhundo naêñ ya pamanhumaçay ha barko, hēn angga ha niabot kay ha balayan Regio. Pangalabah hēn mihay allo naêñ bayro, ay main mangêd ya angin ya naubat ha timog ha ubatan naêñ, kabay inhundo naêñ ya biyahe naêñ angga ha niabot kay ha pagtunggênan hēn barko ha Puteoli ha ikalwan allo. <sup>14</sup> Main kay bayron napagkahabi ya ungnoy patêl ha Panginoon ya nanagyat kannaêñ hēn paidi bayro hēn pitoy allo. Pamakalabah, ay inhundo naêñ ya tawlin pamammita naêñ hēn palako ha balayan Roma hēn nammitsih. <sup>15</sup> Hēn namwangan lan patêl ha Panginoon ya atsi bayro ha Roma, ya atsi kay ha dann hēn magpalako bayro, ay marayo ya binita la hēn nanupa kannaêñ. Hilay kaatag ay nanupa kannaêñ ha Foro de Apio, haka hilay kaatag ay nanupa kannaêñ ha Tres Tabernas. Hēn pamakahêlêk kanla ni Pablo ay nagpahalamat ya kan Apo Namalyari, ta hinumkaw ya nakêm na.

*Nakalatêng hilan apostol Pablo ha balayan Roma*

<sup>16</sup> Hên milatêng kay ha balayan Roma, ay pinaulayan la hi apostol Pablo hên mangupa hên bali, ya paidyanan na hên kalamoy mihay hundaloh ya ampagbantay kana.

<sup>17</sup> Pamakalabah hên tatloy allo, ay impa-tsipon ni apostol Pablo hilay kapareho nan Israelita, ya ampamaala bayro kanlan Israelita ha Roma. Hên naka-tsipon hilay na, ay wana kanla, “Hikaw ya patêl ko, agyan ayn akon dinyag ya halanghang ha kapareho tamon Israelita, o ha ugali hên ninuno tamo, ay dinakêp la kon kapareho tamo ha balayan Jerusalem, haka la ko indin ha gamêt lan ampamaala ya ubat bayri ha balayan hên Roma. <sup>18</sup> Hên pangayari lan nilingon ya kasok, ay ibuhan la kina dayi ta gawan ayn hilan nahêlêk ya dapat lan pamatsan kangko. <sup>19</sup> Noa, hên a hila taganán nabay hên habayto, ya kapareho tamon Israelita, ay napilitan kina hên iarap ya kasok ko kanan Emperador, ayn ako man hên idikil kanlan kapareho tamon Israelita. <sup>20</sup> Impa-tsipon kataw ya kapareho kon Israelita amêhê, gawan labay kataw hên makahabi, ta êmén yo maintindihan ya nakagapoh ko hên habaytsi ya taykala, gawan bat ha paniwala ko ha Mámilitas ya impangako, ya an-êngganan tamon hikitamoy Israelita.”

<sup>21</sup> Wanla etaman kana, “Ayn kay hên natanggap ya hulat ya ubat ha probinsyan Judea ya tungkol kamo. Haka ayn hilan hinabi ya narawak ya tungkol kamo hên hilay patêl tamo ya ubat bayro. <sup>22</sup> Embayro man, ay labay naén hên magilaman no hino ya mahabi mo, ta muwang naén ya ha ay-iri man ya legal, ay mal-at ya ampaghabin halanghang kamoyun anhumonol ha toro ni Jesus.”

<sup>23</sup> Ni-tsi-tsipan hilan mihababi ha kaatag ya allo. Hên nilumatêng ya habaytoy allo, ay mal-at ya naniraw ha ampaidyanan ni apostol Pablo. Namapayabi yan nangipamwang kanla, haka nan ampaptêgan ya tungkol ha pamanlokop ni Apo Namalyari. Impamwang na etaman ya inhulat ni apo Moises, haka ya inhulat lan kaatag ya mampipamwang hên an-ipaihip kanla ni Apo Namalyari, ya tungkol ha Mámilitas, ta êmén na hila mapaniwala ya hi Panginoon Jesus ya habaytoy Mámilitas. <sup>24</sup> Main kanlan Israelita ya naniwala ha hinabi ni apostol Pablo, haka main kaatag ya a naniwala ha hinabi na. <sup>25</sup> Kabay a hila angkapikasundo ha hinabi ni apostol Pablo. Hên mag-alih hilay na dayi, ay hinabi na êt kanla, “Pêtêg bay ya impahabi nan Espiritu ni Apo Namalyari kan Propeta Isaias, kanlan ninuno tamo, ya wana,

<sup>26</sup> ‘Hali, lakwên mo hila ta habiên mo kanla,  
Pakagilamén yo man, ay a yo maintindihan,  
haka pakahêlkên yo man, ay a yo mamwangan ya anhêlkên yo. Habayto ya  
habiên mo kanla,

<sup>27</sup> ta mangakdêy ya nakêm lan habayto.

Ampagmamatlakan, haka ampagbuwag-buwagan hila ha kaptêgan,  
ta no alwa dayin êmbayro, ay makahêlêk, makagilam, haka makamulah hila,  
ta kayno pakarani hila kangko,

haka patawarêñ ko hila.’\*

Habayto ya wanana Panginoon.” <sup>28</sup> Wana êt kanla ni apostol Pablo, “Kabay labay kon ipamwang kamoyu ya main in-utoh ya mamipamwang kanlan alwan Israelita, hên habaytsi ya kaligtasan ya ubat kan Apo Namalyari. Haka hila etaman ya alwan Israelita, ay manggilam hila.” <sup>29</sup> [Hên nayari nan hinabi ni apostol Pablo ya habayto, ay nag-alih hilay nay kapareho nan Israelita hên hadyay pamihuhubakan la ha miha ta miha.]†

\* <sup>28:27</sup> Isaias 6:9-10. † <sup>28:29</sup> Ayn ya ha Bibliyan Griego ya habaytsi.

<sup>30</sup> Loway taon yan napaidi hi apostol Pablo ha balayan hēn Roma ha an-upaan nay bali, haka mahiglay nakêm na hilan ampahowênen ya ampaniraw kana. <sup>31</sup> Makhaw ya nakêm na hēn impamwang haka intoro ya tungkol ha pamanlokop ni Apo Namalyari haka ya tungkol kan Panginoon Jesu-Cristo kanlan naniraw kana, haka ayn nanaad kana.

## Ya hulat ni apostol Pablo kanlan ampaniwala kan Apo Jesu-Cristo ha Roma

### *Paunan habi*

Hata inhulat ni apostol Pablo ay kanlan ampaniwala kan Apo Jesu-Cristo ha balayan Roma ta êmén la muwang ya labay na hilan hirawên, haka ta êmén la muwang ya pahawop ya kanla ha pamanlumagay na ha bansan España. An-ipamwang na kanla ya tungkol ha biyay ya ayn angga gawan ha paniwala kan Apo Jesu-Cristo, haka no ay-êmén dapat mamiyay hên mihay Cristiano hên allo-allo.

An-ipamwang na êt di, ya balang miha, Israelita man o alwa, ay makasalanan haka kailangan parusaan hên ayn angga. Noa, hilay ampaniwala kan Apo Jesu-Cristo, ay an-itad ni Apo Namalyari hên ayn kasalanan. Iligtas na hila ha parusa ya ayn angga, gawan bat ha ayn kapantag ya ingalo na, alwan gawan ha pamanhumonol la ha hinon kautuhan. An-ipamwang na êt di ya hilay an-itad ni Apo Namalyari hên ayn kasalanan, gawan ha paniwala la kan Apo Jesu-Cristo, ay magkamain pakikimiha kan Apo Jesu-Cristo.

An-ipamwang ni apostol Pablo ya kal-atan kanlan Israelita ay a naniwala kan Apo Jesu-Cristo, êmbayro man, ay a na hila pinaulayan ni Apo Namalyari hên anggan-angga. Ta iningalwan na ya alwan Israelita hên dinyanan hilan panaon, ta êmén hila maniwala etaman. Lano mapakinabangnan lan Israelita etaman ya ingalo na.

Kabooan hên laman hên hata hulat:

Umpisan hulat 1:1-17

Makasalanan ya balang miha, haka kailangan hên iligtas ha parusa 1:18-3:20

No ay-êmén na kitamon an-iligtas ni Apo Namalyari 3:21-4:25

Ya bayoy biyay gawan ha dinyag ni Apo Jesu-Cristo ha ikakangêd tamo 5:1-8:39

Ya tinalagá ni Apo Namalyari para kanlan Israelita 9:1-11:36

Ya ugali hên Cristiano 12:1-15:13

Katganan habi 15:14-16:27

<sup>1</sup> Hiko hi Pablo, ya ampanulat, ya ampaghuyó kan Apo Jesu-Cristo. Pinili na ko ni Apo Namalyari hên mag-in apostol ni Apo Jesu-Cristo, hên mangitoro hên Mangêd ya Habi tungkol ha biyay ya ayn angga ya ubat kan Apo Namalyari.

<sup>2</sup> Habaytoy Mangêd ya Habi, ay mana nay nan impangako, ta impahulat na kanlan mâmipamwang hên an-ipaihip na kanla ha Banal ya Kahulatan na. <sup>3-4</sup> Habaytoy Mangêd ya Habi ay tungkol ha Anak na, ya Panginoon tamon Jesu-Cristo, ya nag-in tawo, hên hiyay in-anak ha kaapo-apoan ni Arin David. Napaptégan ya panga-Diyos na hên hiyay biniyay oman gawan ha kapangyarihan hên Espiritu ni Apo Namalyari. <sup>5</sup> Gawan kan Apo Jesu-Cristo, ay indin kangko ya ayn kapantag ya ingalo ni Apo Namalyari, haka ya tungkulon hên mag-in apostol, hên mangitoro ha balang bansa, ta êmén main alwan Israelita ya mangipakarani hên maniwala, haka humonol kana.

<sup>6</sup> Haka hikaw bahêñ ha balayan Roma, ay kalamo kaw bayro ha hinagyat ni Apo Namalyari hên mag-in kan Panginoon Jesu-Cristo.

<sup>7</sup> Habaytsi ya hulat ko ay para kamoyun atsi bahêñ ha balayan Roma ya anlugarûn ni Apo Namalyari ya pinili na hêñ mag-in kana.

An-ihalangin kataw ya ingalwan na kaw ni Panginoon tamon Jesu-Cristo haka ni Apo Namalyari, ya Tatang tamo. Patékbékên la dayi ya nakêm yo.

<sup>8</sup> Mu-muna, ay an-ipagpahalamat kataw kan Apo Namalyari, ta ya paniwala yo kan Apo Jesu-Cristo ay namwangan ha boon luta. Haka anggilamên ni Apo Namalyari hata pagpahalamat ko gawan kan Apo Jesu-Cristo.

<sup>9</sup> Muwang ni Apo Namalyari, ya ampaghuyuan ko hêñ boon nakêm ha pangipamwang hêñ Mangêd ya Habi tungkol ha Anak na, ya panay kataw hêñ an-ilamo ha pamanalangin ko. <sup>10</sup> Nabuyot kinan an-ipanalangin haka ampakidoko kan Apo Namalyari, no kalabayan na, ay dyanan na kon panaon hêñ makahiraw ako bahêñ kamoyu. <sup>11</sup> Labay-labay kon maniraw kamoyu, ta labay kon itoro kamoyu ya intoro kangkon Espiritu ni Apo Namalyari, ta êmén tumaniêh ya paniwala yo. <sup>12</sup> Ya labay kon habiêñ, ay mapipapakhaw kitamon nakêm gawan ha paniwala tamo, ya paniwala yo haka ya paniwala ko.

<sup>13</sup> Patêl ha Panginoon, labay kon mamwangan yo, ya kata-ungno kinan labay maniraw bahêñ, noa, panay hêñ main ampakaabala kangko. Labay ko dayi hêñ mapahanan hilay ampaniwala kan Apo Jesu-Cristo bahêñ gawan ha panoro ko, hêñ nanad ha nalyari kanlan kaatag ya legal lan alwan Israelita.

<sup>14</sup> Main akon utang nakêm kan Apo Namalyari hêñ mangipamwang hêñ tungkol kan Apo Jesu-Cristo ha balang miha, kanlan taga-balayan o mag-in marayo ha balayan, kanlan main pinag-aralan o mag-in ayn pinag-aralan.

<sup>15</sup> Kabay labay-labay kon ipamwang etaman bahêñ kamoyu ha balayan Roma, ya tungkol ha Mangêd ya Habi.

### *Ya kapangyarihan hêñ Mangêd ya Habi*

<sup>16</sup> A ko an-ikarêng-êy ya Mangêd ya Habi tungkol kan Apo Jesu-Cristo, ta habaytoy kapangyarihan ni Apo Namalyari ha ikaligtañ hêñ kaganawan ya ampaniwala kan Apo Jesu-Cristo. Muna kanlan Israelita, bayo kanlan alwan Israelita. <sup>17</sup> Ta gawan ha Mangêd ya Habi, ay mamwangan tamo no ay-êmén na kitamon an-itad ni Apo Namalyari hêñ ayn kasalanan. Ya pinangubatan hêñ habayto ay yabay ya paniwala tamo kan Apo Jesu-Cristo. Ta nakahulat ha impahulat ni Apo Namalyari, ya êmén di, “Hilay an-itad ni Apo Namalyari hêñ ayn kasalanan, gawan ha paniwala la, ay dyanan hêñ biyay ya ayn angga.”\*

### *Makasalanan ya balang miha*

<sup>18</sup> Hi Apo Namalyari ya atsi ha langit, ay namipamwang hêñ huluk na kanlan ayn limo kana, haka kanlan ampanyag karawakan, ta ya karawakan la, ay ampakahabát ha pamanhumwêñ hêñ kaptêgan hêñ tungkol kana ha ihip la, <sup>19</sup> gawan malinaw nan impamwang kanla ni Apo Namalyari ya mamwangan hêñ tungkol kana. <sup>20</sup> A ya man angkahêlêk hi Apo Namalyari, ay paubat hêñ dinyag nay hata luta, ay angkahêlêk ha kaganawan dinyag na, ya panga-Diyos na haka kapangyarihan na ya ayn angga. Kabay a la mahabi ya ayn Diyos. <sup>21</sup> Ta agyan muwang la ya main Diyos, ay a la yan ansimbaêñ o ampahalamatan man, yan bat hilan ampangihip hêñ ayn kapukat-pukat, gawan binuwag ya kaihipan la ha kaptêgan. <sup>22</sup> Ampagmuwang-muwangan hila, noa, anlumtaw hilan ayn minúwang. <sup>23</sup> Ta kisa simbaêñ la hi Apo Namalyari ya ayn ubatan haka ayn angga, yan ansimbaêñ lay rebulto hêñ tawo, haka ayop hêñ nanad ha manok, baka, haka utan.

\* <sup>1:17</sup> Habacuc 2:4.

<sup>24</sup> Kabay pinaulayan hilay na ni Apo Namalyari ha hinon karawakan kalabayan lawini la. Taganán kapaparêng-éy ya andaygén la ha lawini hén miha ta miha. <sup>25</sup> Ta ya kaptégan ya tungkol kan Apo Namalyari, ay hinagilyan lan alwan pêtég, ta ya sinimba haka pinaghuyuan la, ay dinyag bat ni Apo Namalyari. A la sinimba haka pinaghuyuan hi Apo Namalyari ya nanyag hén habayto. Hiya ya hépat hén simbaén hén angga-angga! Amen.

<sup>26</sup> Kabay pinaulayan hilay na ni Apo Namalyari ha hinon karawakan kalabayan lawini, hén nanad ha ampitakéh hén parehon babayi, ya dapat bat ha lalaki haka babayi ya miahawa. <sup>27</sup> Haka êmbayro êt kanlan lalaki, tinalibatokan lay pamakitakéh ha babayi, ta maotoy hila ha kapareho lan lalaki. Kapaparêng-éy ya andaygén la ha miha ta miha, haka antanggapén lay nay parusa ya hépat ha pandaygén la.

<sup>28</sup> Gawan a la anggalangén hi Apo Namalyari, ay pinaulayan na hilay na ha hinon karawakan kalabayan kaihipan la. Kabay andaygén lay nay alwan hépat hén daygén. <sup>29</sup> Antalanén hilan kaganawan alwan mangéd, karawakan, kapanalaréhan, haka karawakan kalabayan lawini. Panay hilan ampanyag karidyaan, pamatsin kapareho, pamanubuk, kalokwan, pamairap, pamandikaw, pamanyakaw, <sup>30</sup> pamaniran kapareho, panhumémék kan Apo Namalyari, kamusmusan, kapagmahlayan, kalangkaan, kapanalanghangan ha toa, haka mapangihip hila hén kaatag pon ya karawakan ya madyag la. <sup>31</sup> Mapanyag hilan ayn kapukatan, alwa hilan mapaypaniwal-an, alwan mangéd ya nakém la, haka alwa hilan maingaloén. <sup>32</sup> Agyan muwang lay na ya parusaan ni Apo Namalyari hén kamatsan ya hilay manyag êmbayro, ay daygén la pon êt, haka an-ikahigla la pon êt ya kapareho lan ampanyag hén êmbayro.

## 2

### *Makatoynungan ya pamanatol ni Apo Namalyari*

<sup>1</sup> Kayno an-ihipén yo ya dapat parusaan ya habaytoy mapanyag karawakan ya inungkat ko. Noa, kaillag kaw, ta ha pamanatol yo hén kapareho yo, ay anhabién yoy dapat kaw hén parusaan, ta hikaw man, ay ampanyag hén karawakan, haka lano kiarap kaw kan Apo Namalyari ha Allon Pamanukom na. <sup>2</sup> Muwang tamina ya makatoynungan ya pamanatol ni Apo Namalyari hén parusaan hilay mapanyag karawakan. <sup>3</sup> Noa, hikaw ya ampamintas kanlan mapanyag karawakan, êndat yon makatakah kaw ha parusa ni Apo Namalyari, ya hikaw man êt, ay ampanyag hén karawakan! <sup>4</sup> Kayno an-itad yon ayn pukat ya ayn kapantag ya pamangingalo, haka pamagtéêh ni Apo Namalyari kamoyu!

Yarin a yo muwang ya andyanan na kaw hén panaon hén maghêhê hén manalibokot ha pamanyag yon kasalanan! <sup>5</sup> Noa, ha kakdêyan ulo yo, hén a kaw ampaghêhê, ay ampabyatén yoy parusa ni Apo Namalyari kamoyu lano no lumatêng ya Allon Pamanukom na ya makatoynungan, <sup>6</sup> ta tumbahan na ya balang miha ha dinyag la. <sup>7</sup> Mam-i yan biyay ya ayn angga kanlan ampagtéêh hén mag-in ikahigla na. <sup>8</sup> Noa, parusaan na hén ayn ingalo hilay makasarili, ya a ampanonol ha kaptégan ya ubat kana, ta ampanyag hila tanan karawakan. <sup>9</sup> Hadyay kairapan ya maranasan lan balang mapanyag karawakan, haka mamalagêhbêg ya nakém la, kapareho kon Israelita, o alwan Israelita. <sup>10</sup> Noa, hilay mapanyag kangérân, ay ingalwan na hén dyanan karangalan, dayêw haka kapatékbêkan ha biyay ya ayn angga, kapareho kon Israelita man, o alwan Israelita. <sup>11</sup> Gawan hiyay ayn anggampian, ta pantag ya panlêk na ha balang miha.

**12** Hinoman ya nanyag kasalanan, ay idayo kan Apo Namalyari hên parusaan hên ayn angga. Hilay Israelita, ya nagmuwang hên Kautuhan ya indin ni Apo Namalyari kan apo Moises, ay parusaan, ta a la hinonol ya habayto. Hila etaman ya alwan Israelita, ya ayn muwang hên tungkol ha Kautuhan, ay a hila parusaan ha a la hinonol ya habayto, noa, parusaan hila ha pamanyag lan karawakan. **13** Hilay an-itad ni Apo Namalyari hên ayn kasalanan, ay habaytoy mahonol ha Kautuhan, alwan hilay nakagilam haka a hinumonol. **14** Hila etaman ya alwan Israelita, ay ayn muwang hên tungkol ha Kautuhan ya indin ni Apo Namalyari kan apo Moises. Embayro man, ay main kanla ya mapanyag kangérān, gawan ha nakêm la, ya nanad main kautuhan. **15** Ha pamanyag lan kangérān, ay nanad nakahulat ha nakêm la ya Kautuhan. Minghan an-ipapanêmtêm hên konsinsya la kanla ya nakadyag hilan karawakan, minghan etaman, ay an-ipapanêmtêm na kanla ya nakadyag hilan kangérān. **16** A na liwaan ni Apo Namalyari ya habayto ha Allon Pamanukom, ustion ipalingon na kan Apo Jesu-Cristo, ya kaganawan dinyag lan balang miha anggan ya inlihim la. Habaytoy agpang ha Mangêd ya Habi ya an-ipamwang ko.

*Ya Israelita haka ya Kautuhan ya indin ni Apo Namalyari kan apo Moises*

**17** Hikaw ya kapareho kon Israelita, êndat yon madyanan kaw hên biyay ya ayn angga, gawan ha pamanhumonol yo ha Kautuhan, haka an-ipaglambung yo ya muwang yo hi Apo Namalyari. **18** Muwang yo kano ya kalabayan na, haka no hinoy mangêd ya dapat daygén, gawan pinag-aralan yoy Kautuhan. **19** Êndat yon ampakaakay kaw kanlan nanad buwag ya kaihipan! Êndat yon nanad kaw hên hawang ya ampamahawang hên dann hên palako kan Apo Namalyari para kanlan nanad atsi ha kariglêman. **20** Êndat yon gawan atsi kamoyu ya Kautuhan, ay muwang yoy hinon kamwangan, haka êndat yon pêtêg ya hinon anhabiên yo. **21** Ampanoro kaw ha kaatag! Awta a yon an-honolên ya an-itoro yo! Ambawalên yo hilay manakaw, noa, ampanakaw kaw etaman! **22** Ambawalên yo hilan manakêh ha alwa lan ahawa, noa, ampamabayi haka ampakilalaki kaw etaman! Anhumêmêk kaw ha rebulto hên alwan pêtêg ya diyos, noa, anhumwên kaw hên manakaw bayro ha pagsimbaan kanla! **23** An-ipaglambung yoy kangérān hên Kautuhan ya indin ni Apo Namalyari kan apo Moises, noa, an-ipakarêng-êy yo hi Apo Namalyari, ha a yon anhonolên ya habaytoy Kautuhan na! **24** Habaytoy inungkat ha impahulat ni Apo Namalyari ya êmén di, “Hilay alwan Israelita, ay ampammusmus kan Apo Namalyari gawan kamoyun Israelita.”\*

**25** Ya pamatuli kantamo ay kamwangan ya hikitamo ay pinili ni Apo Namalyari, noa, no a tamo anhonolên ya Kautuhan, ay ayn pukat ya pamatuli kantamo, ta nanad kitamo tana kanlan alwan Israelita, ya a tinuli. **26** Noa, hilay alwan Israelita, ya a tinuli, ya anhumonol ha Kautuhan, ay nanad mantêg tinuli, ta an-itad hila ni Apo Namalyari hên pinili na. **27** Haka hila ya maghabi hên dapat kaw parusaan ni Apo Namalyari, gawan atsi kamoyu ya Kautuhan, yan a yo anhonolên ya habayto. **28** Hilay an-itad ni Apo Namalyari hên pinili na hên mag-in kana, ay alwan hilay Israelita, ya tinuli. **29** Noa, ya an-itad ni Apo Namalyari hên pinili na hên mag-in kana, ay hilay binayo ya nakêm, ya nanad mantêg hên tinuli, ya nalinisan hên Espiritu ni Apo Namalyari. Malyarin a hila dayêwên hên kapareho la, noa, taganán dayêwên hila ni Apo Namalyari.

---

\* **2:24** Ezekiel 36:22.

**3**

<sup>1</sup> Kayno an-ihipêñ yoy êmêñ di, “No êmbayro awud, ay hinoy alagá hêñ panga-Israelita tamo kanlan alwan Israelita? Hinoy makwa tamon Israelita ha pangatuli tamo?” <sup>2</sup> Habièñ ko etaman kamoyu ya taganán main alagá hêñ panga-Israelita tamo haka ya pangatuli tamo, ta impatsiwala ha ninuno tamon Israelita ya habi ni Apo Namalyari. <sup>3</sup> Pêtêg ya main kapareho tamon Israelita ya alwan mahonol kan Apo Namalyari. Yarin a na tuparêñ ni Apo Namalyari ya impangako na, gawan main nag-in alwan mahonol kana! <sup>4</sup> Ahê! Malarâm man ya balang miha, ay taganán alwan malaram hi Apo Namalyari! Ihipêñ yoy nakahulat, ya wana, “Apo Namalyari, pêtêg ya hinon anhabièñ mo, haka panay kan ampanambut, no main ibara kamo.”\*

<sup>5</sup> Main pilosopo ya ampaghabi ya alwan makatoynungan hi Apo Namalyari ha pamarusa na kantamo, ta ya katoynungan na kano, ay angkahêlêk bat gawan ha karawakan tamo. <sup>6</sup> Taganán alwan pêtêg ya habayto! Ta no alwa yan makatoynungan hi Apo Namalyari ha pamarusa na kantamon Israelita, no manyag kitamon karawakan, ay alwa yan makatoynungan ha pamarusa na ha alwan Israelita.

<sup>7</sup> Kayno main maghabi ya dapat a hila parusaan gawan makasalanan hila, ta ha kalokwan la, ay mahêlêk ya kaptégan hêñ habi ni Apo Namalyari, haka hiyay purièñ. <sup>8</sup> Hilay ampaghabin êmbayro, ay nanad lay nan anhabièñ ya êmêñ di, “Hali, manyag kitamon karawakan, ta êmêñ ya mapuri hi Apo Namalyari!” Haka main ampamibara kangko, ya êmbayroy an-itoro ko! Hilay parusaan ni Apo Namalyari haka habaytoy hêpat kanla.

*Pamaptêg ya ayn hinoman ya banal ha hêlêk ni Apo Namalyari*

<sup>9</sup> Yarin hikitamoy Israelita ay mangêd ha hêlêk ni Apo Namalyari kanlan alwan Israelita! Mana kinan intoro kamoyu ya balang miha ay antalanêñ hêñ kasalanan. <sup>10</sup> Gawan nakahulat ha habi ni Apo Namalyari, ya wanahulat,

“Ayn tawo ya ayn kasalanan. Ayn taganán miha man ya ayn kasalanan.

<sup>11</sup> Ayn miha man ya main ustoy pamangintindi hêñ tungkol kan Apo Namalyari, haka ayn ampanapol kana.

<sup>12</sup> Ya balang miha, ay nagdayo kana. Naubuh hilan nag-in ayn pukat.

Ayn miha man ya mapanyag kangêran.”†

<sup>13</sup> “Ya pamaghabi la ay hadyay dawak, hêñ nanad ha nabata ya ubat ha pamilbêngan natsi ya inloat.

Panay kalokwan ya panhabièñ la.”‡

“Mapanira ya panhabièñ la, hêñ nanad utan ya makamatsi.”§

<sup>14</sup> “Panay kapanuboyan haka kahêmêkan ya atsi ha bêbêy la.”\*

<sup>15</sup> “Maparah hilan makamatsi hêñ kapareho la.

<sup>16</sup> Antoman ya lakwêñ la, ay manira hila, haka main mag-in kapaingalo gawan kanla.

<sup>17</sup> A hila taganán kamwang hêñ makilamo haka mag-in mapatêkbêk.”†

<sup>18</sup> “Ayn hilan pamanggalang kan Apo Namalyari, gawan ayn hilan limo kana.”‡

<sup>19</sup> Habaytoy nakahulat ha habi ni Apo Namalyari, ay para kantamon, Israelita, ya atsi ha aypa hêñ Kautuhan ni apo Moises, kabay malinaw ya

\* 3:4 Awit 51:4. † 3:12 Awit 14:1-3, 53:1-3. ‡ 3:13 Awit 5:9. § 3:13 Awit 140:3. \* 3:14 Awit 10:7. † 3:17 Isaias 59:7-8. ‡ 3:18 Awit 36:1.

ayn hinoman ya makapaghabi ya ayn yan kasalanan ha Allon Pamanukom ni Apo Namalyari, ta ya balang miha ha boon luta ay makasalanan, haka hépat hén parusaan. <sup>20</sup> Ayn miha man ya an-itad ni Apo Namalyari hén ayn kasalanan gawan ha pamanhumonol ha Kautuhan, ta ayn taganán makahonol hén habayto. Noa, gawan ha Kautuhan, ay mamwangan no hino ya kasalanan haka mamwangan ya makasalanan ya balang miha.

*Ayn kitamon kasalanan ha hélêk ni Apo Namalyari no ampaniwala kitamo ha dinyag ni Apo Jesu-Cristo ha ikakangéd tamo*

<sup>21</sup> Noa, améhén, ay impamwang kantamo, no ay-émén na kitamon an-itad ni Apo Namalyari hén ayn kasalanan, haka habayto ay alwan ha pamanhumonol ha Kautuhan. Habaytoy inungkat ha inhulat ni apo Moises haka ha inhulat lan kaatag ya mámpamwang hén an-ipaihip kanla ni Apo Namalyari. <sup>22</sup> Améhén, an-itad na kitamina hén ayn kasalanan, ya balang ampaniwala ha dinyag ni Apo Jesu-Cristo ha ikakangéd tamo, Israelita man o alwa. <sup>23</sup> Ta ya balang miha ay nakadyag hén kasalanan, haka main pamagkulang kan Apo Namalyari. <sup>24</sup> Embayro man, ay améhén an-itad na kitamo ni Apo Namalyari hén ayn kasalanan, gawan ha ayn kapantag ya ingalo na, ya indigalo na kantamo, gawan ha daya ni Apo Jesu-Cristo, ya pinamayad ha parusa hén kasalanan tamo. <sup>25</sup> Hiyay in-utoh ni Apo Namalyari hén mag-in átang, ya pamayad hén kasalanan tamo. Haka gawan ha daya na, ay mapatawad ya kasalanan tamo no maniwala kitamo kana. In-utoh ni Apo Namalyari hi Apo Jesu-Cristo, ta êmén maipahlék ya main katoynungan ya mana nan dinyag hén bayo nan in-utoh hi Apo Jesu-Cristo, ta ha pamagtéêh na, ay a na pon pinarusaan ya tawo hén haton lagi ha pamanyag lan kasalanan, <sup>26</sup> noa, améhén ay impahlék na, ya a na naliwaan ya habaytoy kasalanan la hén hato, ta pinilamo nay na ha kasalanan ya binayaran ni Apo Jesu-Cristo. Kabay napaptégan ya andaygén na ay main katoynungan, haka an-itad na hén ayn kasalanan, ya hilay ampaniwala kan Apo Jesu-Cristo.

<sup>27</sup> Kabay a tamina maipaglambung, ya gawan ha pamanhumonol tamo ha Kautuhan, ay ayn kitamina kasalanan! Ta an-itad na kitamina ni Apo Namalyari hén ayn kasalanan gawan ha paniwala tamo kan Apo Jesu-Cristo. <sup>28</sup> Ta malinaw ya hikitamoy an-itad ni Apo Namalyari hén ayn kasalanan, gawan ha paniwala tamo kan Apo Jesu-Cristo, haka alwan gawan ha pamanhumonol ha Kautuhan. <sup>29</sup> Hikaw ya kapareho kon Israelita, kayno éndat yon hi Apo Namalyari ay Diyos tamon bat hén Israelita! Alwa! Hiyay Diyos hén alwan Israelita etaman! <sup>30</sup> Gawan ha mimihay Diyos, ay an-itad na kitamon Israelitay ayn kasalanan, gawan ha paniwala tamo kan Apo Jesu-Cristo, hén nanad êt kanlan alwan Israelita. <sup>31</sup> Noa, paan yon ihipén ya ayn nanan pukat ya Kautuhan gawan an-itad na kitamo ni Apo Namalyari hén ayn kasalanan, gawan ha paniwala tamo ha dinyag ni Apo Jesu-Cristo, ta no ampaniwala kitamina kan Apo Jesu-Cristo, ay lalo tamon mahonol ya Kautuhan.

## 4

*Hi Apo Abraham ay intad ni Apo Namalyari hén ayn kasalanan  
(Galacia 3:6-9)*

<sup>1</sup> Ihipén tamo hi apo Abraham ya ninuno naén Israelita. Awta hiyay intad hén ayn kasalanan ni Apo Namalyari? <sup>2</sup> No hiyay intad hén ayn kasalanan gawan ha dinyag na, ay main ya dayin maipaglambung. Noa, ha kaptégan, ayn yan maipaglambung ha arapan ni Apo Namalyari. <sup>3</sup> Habaytsi ya impahulat ni Apo Namalyari ya tungkol kana ha Kahulatan, “Naniwala hi

Abraham ha hinabi ni Apo Namalyari, kabay hiyay intad ni Apo Namalyari hên ayn kasalanan.”\* <sup>4</sup> Hilay ampakiorba ay ampananggap hên upa, alwan digalo, ta habayto ay pinaghayngêtan la. <sup>5</sup> Noa, an-itad ni Apo Namalyari ya hilay makasalanan hên ayn kasalanan, hên alwan gawan ha pamaghayngêt la, noa, gawan ha paniwala la kana. <sup>6</sup> Hêñ hato, ay wani Arin David ya iningalwan hilay an-itad ni Apo Namalyari hên ayn kasalanan, hên alwan gawan ha dinyag la, noa, gawan ha paniwala la.

<sup>7</sup> “Iningalwan hilay pinatawad ni Apo Namalyari ha kasalanan la, ta inalíh nay na kanla.

<sup>8</sup> Iningalwan hilay an-itad ni Apo Namalyari hên ayn kasalanan.”†

<sup>9</sup> Yarin kannâen bat Israelita ya tinuli, ya habaytoy pangingalo ni Apo Namalyari! Alwa! Ta habayto ay para etaman kanlan alwan Israelita a hila man tinuli. Ihipêñ tamon oman ya impahulat ni Apo Namalyari, ya tungkol kan apo Abraham, ya naniwala ha hinabi ni Apo Namalyari, kabay intad ya ni Apo Namalyari hên ayn kasalanan. <sup>10</sup> Nakano yan intad ni Apo Namalyari hên ayn kasalanan hi apo Abraham, bayo ya tinuli, o pangayari? Hi apo Abraham ay intad ni Apo Namalyari hên ayn kasalanan hêñ bayo ya tinuli, ya labay habiêñ hêñ bayo ya nag-in Israelita. <sup>11</sup> Tinuli ya ha pamaptêg ya hiyay intad ni Apo Namalyari hên ayn kasalanan gawan ha paniwala na. Kabay hiyay nag-in nanad ninuno lan ampaniwala kan Apo Namalyari, ya an-itad ni Apo Namalyari hên ayn kasalanan, agyan a hila tinuli, ya labay habiêñ agyan alwa hilan Israelita. <sup>12</sup> Hiya etaman ya ninuno naen Israelita ya tinuli, ya ampaniwala ha impangako ni Apo Namalyari hêñ nanad ha paniwala ni Abraham hêñ bayo ya tinuli, ya palatandaan ya ampaniwala ya kan Apo Namalyari.

### *Ya impangako ni Apo Namalyari kan apo Abraham*

<sup>13</sup> Hêñ haton lagi, ay impangako ni Apo Namalyari kan apo Abraham haka kanlan mag-in kaapo-apoan na, ya ingalwan na hilay tawo ha balang bansa.‡ Habayto ay alwan gawan ha pamanhumonol ni apo Abraham ha Kautuhan, noa, gawan ha paniwala na kan Apo Namalyari. Gawan habaytoy paniwala na, ay hiyay intad ni Apo Namalyari hêñ ayn kasalanan. <sup>14</sup> Ta no alimbawa, ta hilay anhumonol ha Kautuhan, ay dyanan hêñ impangako ni Apo Namalyari, ay ayn kapukatan ya paniwala, haka ya impangako. <sup>15</sup> Ta ya Kautuhan ay main kalamoy parusa. Gawan no main Kautuhan, ay main humalanghang.

<sup>16</sup> Kabay ya pangako ay matupad bat kanlan ampaniwala kan Apo Namalyari, ta êmén na maidigalo ya habayto gawan ha ayn kapantag ya ingalo na kanlan balang miha ya main paniwala nanad kan apo Abraham, alwan bat kanlan kapareho kon Israelita, ya dinyanan Kautuhan. Gawan hi apo Abraham ay nanad ninuno hêñ balang miha ya ampaniwala kan Apo Namalyari. <sup>17</sup> Gawan habaytsi ya impahulat ni Apo Namalyari ya tungkol kan apo Abraham, “Pinili kata hêñ mag-in ninuno hêñ kal-atan bansa.”§ Matupad ya habayto, ta ya nangako, ya pinaniwal-an ni apo Abraham, ay hi Apo Namalyari, ya nanyag hêñ boon luta ha utoh nan bêngat, haka main kapangyarihan hêñ biyayén ya natsi. <sup>18</sup> Agyan ayn ana ha ihip ni apo Abraham, ya magkaanak ya kan Sara, ta mantêg hilay nan toa ya miahawa, ay naniwala ya, ya hiyay mag-in ninuno hêñ kal-atan bansa, hêñ nanad ha hinabi ni Apo Namalyari kana, ya wana, “Ya mag-in kaapo-apoan mo ay a makwan mabilang, hêñ nanad ha bêtêwêñ ya a makwan mabilang.”\*

\* **4:3** Genesis 15:6   † **4:8** Awit 32:1-2.   ‡ **4:13** Genesis 12:3b, 18:18 haka 22:18.   § **4:17** Genesis 17:5.   \* **4:18** Genesis 15:5.

<sup>19</sup> Agyan mantêg yay nan toa ta mag-magatoh ya taon na, haka layuh ya hi Sara, ya ahawa na, ay a naalih ya paniwala na. <sup>20</sup> A ya nag-alangan ha pangako kana ni Apo Namalyari, noa, tinumaniêh ya paniwala na ha pamagsimba na kan Apo Namalyari. <sup>21</sup> Booy nakêm nan naniwala, ya agyu ni Apo Namalyari hên tuparêh ya impangako kana. <sup>22</sup> Gawan ha paniwala na, ay hiyay intad ni Apo Namalyari hên ayn kasalanan. <sup>23</sup> Hata habi, ya “Hiyay intad ni Apo Namalyari hên ayn kasalanan,”† ay alwan bat para kan apo Abraham, <sup>24</sup> noa, habayto ay para kantamo etaman. Ta hikitamoy ampaniwala kan Apo Namalyari, ya namabiyay oman kan Panginoon tamon Jesu-Cristo, ay itad etaman hên ayn kasalanan. <sup>25</sup> Hi Panginoon Jesu-Cristo ay in-utoh ni Apo Namalyari hên matsu gawan ha kasalanan tamo, haka hiyay biniyay oman, ta êmén hikitamo ay itad ni Apo Namalyari hên ayn kasalanan.

## 5

### *Hi Panginoon tamon Jesu-Cristo, ya pinangubatan hên pamakiúmang tamo kan Apo Namalyari*

<sup>1</sup> Gawan ha paniwala tamo kan Panginoon tamon Jesu-Cristo, ay an-itad kitamina ni Apo Namalyari hên ayn kasalanan, haka gawan ha pangamatsi ni Panginoon tamon Jesu-Cristo, ay niúmang kitamina kan Apo Namalyari. <sup>2</sup> Gawan ha paniwala tamo kan Panginoon tamon Jesu-Cristo, ay angkatanggap tamina ya ayn kapantag ya ingalo ni Apo Namalyari. Haka hadyay kahiglaan tamo, ta angkasurado tamo ya lano, ay makapakilamo kitamo kana ha langit. <sup>3</sup> Alwan bêngat habayto, noa, an-ikahigla tamo êt ya kairapan, haka pamanubuk ya angkaranasan tamo, gawan habaytoy am-pakapitoro kantamo hên mag-in mapagtêh. <sup>4</sup> Haka ya pamagtêh tamo, ay ampakapahigla kan Apo Namalyari, kabay angkasurado tamo ya lano, ay makalamo tamo ya ha langit nanad ha impangako na. <sup>5</sup> Haka a maglungkot ya ihip tamo, ta angkasurado tamo ya lano, ay tuparêh ni Apo Namalyari ya habaytoy impangako na, gawan pinaptêgan nay hadyay pamanlugud na kantamo, ya angkatanam tamo gawan ha Espiritu na ya indigalo na kantamo.

<sup>6</sup> Ta hên nilumatêng ya panaon ya intakda ni Apo Namalyari, ay natsi ya hi Apo Jesu-Cristo ha ikakangêd tamon makasalanan, ya a makapiligtas hên sarili ha parusa. <sup>7</sup> Kantamon tawo, ay bihiran main matsu para ha mihay kapareho tamo ya mahonol ha Kautuhan ni Apo Namalyari, êmbayro man, ay malyarin main maghêkaw nakêm, hên matsu para ha mihay maingaloën, ya mapanyag kangêran. <sup>8</sup> Noa, hi Apo Namalyari etaman, ay pinaptêgan nay pamanlugud na kantamo, ta hên haton makasalanan kitamo pon, ay in-utoh na hi Apo Jesu-Cristo hên matsu ha ikakangêd tamo. <sup>9</sup> Amêhêñ, ta an-itad na kitamina ni Apo Namalyari hên ayn kasalanan, gawan ha daya ni Apo Jesu-Cristo ha pangamatsi na, ay taganán iligtas na kitamo ni Apo Jesu-Cristo ha hadyay pamarusa ni Apo Namalyari lano ha Allon Pamanukom na. <sup>10</sup> Hêñ hato, ay hikitamoy kapatsi ni Apo Namalyari, noa, amêhêñ ay niúmang kitamina kana, gawan ha pangamatsi hên Anak na, kabay angkasurado tamo ya ligtas kitamina ha parusa, gawan kanan Anak na hi Panginoon Jesu-Cristo, ya angkabiyay ha langit hên ampanawop kantamo. <sup>11</sup> Alwan bat habayto, noa, amêhêñ hi Apo Namalyari ya simbaën haka an-ikahigla tamo, gawan kan Panginoon tamon Jesu-Cristo, ya pinangubatan hên pamakiúmang tamo kan Apo Namalyari.

† [4:23 Genesis 15:6.](#)

*Gawan kan Adan, ay nagkamain kasalanan, haka gawan kan Apo Jesu-Cristo, ay nagkamain kaligtasan*

<sup>12</sup> Ya pinangumpisaan hēn pamanyag kasalanan hēn balang miha bayri ha luta, ay hi Adan, haka gawan ha kasalanan na, ay hiyyay natsi. Kabay paubat hēn habayto, ay maubuh kitaminan matsu, gawan kaganawan tamo ay nakadyag kasalanan. <sup>13</sup> Bayo nan indin ni Apo Namalyari ya Kautuhan kan apo Moises, ay makasalanan hilay nay tawo. Noa, ya pamanyag lan kasalanan, ay alwan halanghang kanlan habaytoy Kautuhan, gawan ayn pon ya habaytoy Kautuhan hēn hato. <sup>14</sup> Embayro man, ay muwang tamo ya paubat hēn panaon ni Adan angga ha panaon ni apo Moises, ay kamatsan ya nag-in tagēy hēn pamanyag kasalanan, agyan ya kasalanan la ay alwan êmēn nanad ha kasalanan ni Adan ya a nanonol ha utoh ni Apo Namalyari.

Main pareho kan Adan haka kan Apo Jesu-Cristo, yabay ya pangadamay hēn kal-atan gawan kanla. <sup>15</sup> Noa, taganán alwan magkapareho ya imbalag la ha kal-atan. Pêtèg ya nagkamain hēn kamatsan ya balang tawo, gawan ha kasalanan nan mihay tawo, ya hi Adan, noa, taganán makapangyarihan ya indigalo ni Apo Namalyari ha kal-atan gawan ha ingalo na, ya indigalo na gawan ha ayn kapantag ya ingalo hēn mihay tawo, ya hi Apo Jesu-Cristo.

<sup>16</sup> Mas makapangyarihan ya ayn kapantag ya ingalo, ya indigalo ni Apo Namalyari, kanan kasalanan ni Adan. Gawan ha kasalanan ni Adan, ay mananggap hēn kamatsan ya balang miha. Noa, gawan ha ayn kapantag ya ingalo ni Apo Namalyari, ay mapatawad, haka maitad hēn ayn kasalanan ya balang miha. <sup>17</sup> Gawan ha kasalanan nan mihay tawo, ya hi Adan, ay nanambut ya kamatsan, kabay nagkamain hēn kamatsan ya balang tawo. Noa, taganán makapangyarihan ya dinyag nan mihay tawo, ya hi Apo Jesu-Cristo, ta gawan kana, ay maubuh hēn madyanan biyay ya ayn angga, hēn mamaala hēn kalamo na, ya hilay intad ni Apo Namalyari hēn ayn kasalanan, ya pinaigan na hēn ayn kapantag ya ingalo na.

<sup>18</sup> Kabay, no ay-êmēn mananggap hēn kamatsan ya balang miha, gawan ha unan kasalanan ni Adan, ay êmbayro êt, gawan ha kamatsan ni Apo Jesu-Cristo, ya ayn kasalanan, ay maitad ni Apo Namalyari ya balang miha hēn ayn kasalanan, ta êmēn hila madyanan hēn biyay ya ayn angga. <sup>19</sup> Gawan ha pamanalanghang ni Adan, kan Apo Namalyari, ay mal-at ya nag-in makasalanan, noa, ha pamanhumonol ni Apo Jesu-Cristo kan Apo Namalyari, ay mal-at ya itad ni Apo Namalyari hēn ayn kasalanan.

<sup>20</sup> Hēn indin ni Apo Namalyari ya Kautuhan na, ay namwangan lan tawo ya mal-at awud ya kasalanan la. Noa, nilum-at man ya pamanyag kasalanan, ay lalon nilum-at ya ingalo na. <sup>21</sup> Kabay no ay-êmēn ya kamatsan ay nag-in tagēy hēn pamanyag kasalanan, ay amêhēn, gawan an-itad na kitamina na hēn ayn kasalanan, ay ampamaala ya ayn kapantag ya ingalo na, ta êmēn kitamo madyanan biyay ya ayn angga, gawan kan Panginoon tamon Jesu-Cristo.

## 6

### *Ya pakikimiha tamo kan Apo Jesu-Cristo*

<sup>1</sup> Hino awud ya mahabi tamo? Maghundo kitamo hēn manyag kasalanan, ta êmēn mapahanan ya ayn kapantag ya ingalo ni Apo Namalyari kantamo?

<sup>2</sup> Paan! Ta hikitamo ay nanad natsi ya ahina ampakadyag kasalanan. Kabay paan taminan ihundo ya pamanyag kasalanan. <sup>3</sup> Yarin a yo muwang ya hēn binawtismoan kitamo, ay nagkamain kitamon pakikimiha kan Apo Jesu-Cristo, haka nanad kalamo kitamo ha kamatsan na! <sup>4</sup> Kabay nanad kitamo

hêñ kalamo na hêñ natsi haka in-ilbêng hêñ hikitamo ay binawtismoan, ta êmêñ kitamo magkamain hêñ bayoy pamimiyay hêñ nanad ha pamamiyay oman kan Apo Jesu-Cristo, gawan ha ayn kapantag ya kapangyarihan ni Apo Namalyari, ya Tatang tamo.

<sup>5</sup> Ta no inlamo kitamo kan Apo Jesu-Cristo ha kamatsan na hêñ indayo ha manan pamimiyay tamo, ay taganán inlamo kitamo ha pangabiyay nan oman hêñ nadyanan kitamo hêñ bayoy pamimiyay. <sup>6</sup> Ta muwang tamo ya nakalamo kan Apo Jesu-Cristo hêñ impako ha koros ya manan pangatawo tamo, haka ya kalabayan tamo hêñ manyag kasalanan, ta êmêñ a kitamina talanêñ hêñ kasalanan. <sup>7</sup> Gawan hilay natsi, ay ahinan antalanêñ hêñ kasalanan. <sup>8</sup> Haka no nakalamo kitamo ha pangamatsi ni Apo Jesu-Cristo, ay ampaniwala kitamo ya angkabiyay kitamina para maghuyo kan Apo Namalyari gawan ha pakikimiha tamo kan Apo Jesu-Cristo. <sup>9</sup> Muwang tamo ya nangoman yan nabiyay hi Apo Jesu-Cristo, haka a yay na mangoman matsi. Ayn nanan kapangyarihan kana ya kamatsan. <sup>10</sup> Ya pangamatsi na ay minghan bat hêñ para ha kasalanan tamo. Ya pangabiyay na, ay ta êmêñ ya maghuyo kan Apo Namalyari. <sup>11</sup> Kabay dapat tamon itad ya sarili tamo hêñ nanad natsi, ya ahina ampakadyag kasalanan, ta angkabiyay kitamina para maghuyo kan Apo Namalyari gawan ha pakikimiha tamo kan Apo Jesu-Cristo.

<sup>12</sup> Kabay paan taminan ipatalan ya sarili tamo ha kasalanan, ta êmêñ a kitamo manyag karawakan kalabayan lawini. <sup>13</sup> Paan paulayan hêñ manyag kasalanan ya hinon atsi ha boon lawini tamo. Noa, iubuh tamon idin ya boon lawini tamo kan Apo Namalyari êmêñ manyag kangêran, ta habaytoy hêpat kantamo, ya nanad natsi, ya dinyanan nan bayoy biyay. <sup>14</sup> Gawan ahina dapat manalan kantamo ya kasalanan, ta ayn kitamina ha aypa hêñ Kautuhan, noa, ya kaligtasan tamo ay gawan ha ayn kapantag ya ingalo ni Apo Namalyari.

### *Dapat iubuh ya boon lawini haka nakêm ha pamanyag kangêran*

<sup>15</sup> Ay-êmêñ? Yarin manyag kitamon kasalanan gawan ayn kitamina ha aypa Kautuhan, ta ya kaligtasan tamo ay gawan ha ayn kapantag ya ingalo ni Apo Namalyari! Ahê! <sup>16</sup> Yarin a yo muwang no paipoh kaw, ay ipoh kaw hêñ anhonolêñ yo! No anhonolêñ yoy kasalanan, ay matsi kaw hêñ midayo kan Apo Namalyari, hêñ parusaan hêñ ayn angga. Noa, no mahonol kaw kan Apo Namalyari, ay mag-in mangêd ya pamimiyay yo. <sup>17</sup> Noa, halamat kan Apo Namalyari, ta hikaw ya manan ipoh hêñ kasalanan, ay boon nakêm hêñ ampanonol ha kaptêgan ya intoro kamoyu. <sup>18</sup> Imbuhan na kaw ni Apo Namalyari ha aypa hêñ kasalanan, kabay mahonol kaw na kana ha paghuyo yo kana. <sup>19</sup> Paalimbawa ya toro ko, ta êmêñ yo tampol maintindihan gawan alwa pon nananiêñ ya paniwala yo. Hêñ hato, ay impaipoh yoy sarili yo ha pamanyag hêñ karêmêkan, haka ya hinon karawakan. Noa, amêhêñ ay dapat yon iubuh ya boon lawini haka nakêm yo ha pamanhumonol kana, ta êmêñ mag-in mangêd ya pamimiyay yo hêñ marayo ha karawakan.

<sup>20</sup> Hêñ haton ipoh kaw hêñ kasalanan ay ayn kaw muwang ya tungkol ha mag-in mahonol kana. <sup>21</sup> Yarin ikakangêd yo ya mana yon dinyag ya an-ikarêng-êy yo amêhêñ! Hilay ampanyag hêñ êmbayro ay matsi, hêñ midayo kan Apo Namalyari, hêñ parusaan hêñ ayn angga. <sup>22</sup> Noa, amêhêñ ta alwa kaw nan ipoh hêñ kasalanan, ta ampaghuyo kaw na kan Apo Namalyari, ay ampamiyay kaw hêñ pamanhumonol ha kalabayan na, haka madyanan kaw hêñ biyay ya ayn angga. <sup>23</sup> Gawan hêpat ha kasalanan ya kamatsan, ya

main parusa ya ayn angga, noa, biyay ya ayn angga, ay an-idigalo ni Apo Namalyari, gawan ha pakikimiha tamo kan Panginoon tamon Jesu-Cristo.

## 7

### *Ayn kitamina ha aypa hēn Kautuhan*

<sup>1</sup> Hikaw ya patêl ko ha Panginoon, muwang ko ya maintindihan yoy humonol ya alimbawa, ya tungkol ha patakaran hēn gobyerno, ta muwang yo ya kaban angkabiyyay kitamo, ay atsi kitamo ha aypa hēn habaytoy patakaran. Noa, no matsu kitamo, ay ayn kitamina ha aypa hēn habayto. <sup>2</sup> Alimbawa, wanan patakaran ya mihay babayi ya main ahawa, ay dapat makilamo ha ahawa na, kaban angkabiyyay ya pon. Noa, no matsu ya ahawa na, ay ayn yay na ha aypa hēn patakaran hēn tungkol ha miahawa. <sup>3</sup> Ha maparah ya habi, no makiahawa yan oman kaban nabiyyay ya ahawa na, ay wanana patakaran ya ampakilalaki ya. Noa, no matsu ya ahawa na, ay ayn yay na ha aypa hēn patakaran hēn tungkol ha miahawa, haka a ya ampakilalaki no makiahawa yan oman.

<sup>4</sup> Patêl ko ha Panginoon, êmbayro êt etaman, ay nanad natsi kitamina ha kapangyarihan hēn Kautuhan hēn natsi kitamo hēn inlamo ha pangamatsi ni Apo Jesu-Cristo ha koros, ta êmén kitamo makalamo kana ha pangabiyay nan oman, hēn maghuyo kan Apo Namalyari. <sup>5</sup> Hēn haton anhonolêñ tamo pon ya kalabayan hēn lawini tamo hēn manyag kasalanan, ay napahanan ya karawakan kalabayan lawini tamo hēn namwangan tamoy Kautuhan. Haka ya pamanyag tamon habayto, ay namidayo kantamo kan Apo Namalyari hēn parusaan hēn ayn angga. <sup>6</sup> Noa, amêhēn, gawan nakalamo kitamina ha kamatsan ni Apo Jesu-Cristo, ay ayn kitamina ha aypa hēn habaytoy Kautuhan. Kabay mahiglay nay pamaghuyo tamo kan Apo Namalyari, gawan ha bayoy pamimiyay tamo ha pamanawop hēn Espiritu na, alwan nanad hēn haton napilitan kitamo hēn humonol ha Kautuhan.

### *Gawan ha Kautuhan ay mamwangan tamo no hinoy kasalanan*

<sup>7</sup> Èndat lan kaatag ya Kautuhan ay pinangubatan hēn kasalanan. Noa, hēn ayn pon Kautuhan, ay main nanan kasalanan. No ayn Kautuhan, ay a ko dayi namwangan ya kasalanan awud ya andaygêñ ko. Ta alimbawa, no ayn utoh ya bawal hēn mag-in maridya, ay a ko dayin muwang ya kasalanan ya habayto. <sup>8</sup> Mana kinan makasalanan kabay hēn namwangan ko ya bawal awud ha Kautuhan ya mag-in maridya, ay pinukaw hēn kasalanan ya atsi kangko, ya kalabayan kon manyag hēn hinon karidyaan. Ta no ayn Kautuhan, ay a tamo mamwangan ya ampanyag kitamon kasalanan. <sup>9</sup> Nahawang ya ihip ko hēn hato hēn a ko angkaintindihan ya laman hēn Kautuhan. Noa, hēn naintindihan kina, ay bigla kon namwangan ya ampanyag ako awud hēn kasalanan. <sup>10</sup> Bayro kon namwangan ya nidayo ko awud kan Apo Namalyari. Ya Kautuhan ay indin ta êmén itoro ya dann ya palako ha biyay ya ayn angga. Noa, gawan a ko hinumonol ha Kautuhan, ay migtan ako dayi ha kamatsan hēn midayo kan Apo Namalyari, hēn parusaan hēn ayn angga. <sup>11</sup> Ya kalabayan kon manyag kasalanan ay nanloko kangko, ta èndat ko ya magkamain akon biyay ya ayn angga ha pamanhumonol ko ha Kautuhan. Noa, ha kaptêgan, ay a ko awud anhumonol ha Kautuhan, kabay nidayo ko kan Apo Namalyari hēn parusaan hēn ayn angga.

<sup>12</sup> Kabay, banal ya Kautuhan, haka ya balang utoh ay usto haka mangêd ta ubat hila kan Apo Namalyari. <sup>13</sup> Kayno èndat lan kaatag ya Kautuhan ya namigtan dayi kangko ha kamatsan, hēn nidayo kan Apo Namalyari. Taganán alwan Kautuhan ya namigtan dayi kangko ha kamatsan hēn nidayo

kan Apo Namalyari, hēn parusaan hēn ayn angga. Noa, gawan ha kasalanan, ay nagētan ako dayi ha kamatsan, gawan ha a ko hinumonol ha Kautuhan. Tinalagá ni Apo Namalyari ya main Kautuhan, ta êmēn mapaptēgan no ay-êmēn karawak ya kasalanan.

### *A tamo madyag ya kahampatan ya labay tamon daygēn*

<sup>14</sup> Muwang tamo ya mangēd ya Kautuhan gawan ubat hila ha Espiritu ni Apo Namalyari. Noa, hiko etaman, ay tawo kon bēngat ya makasalanan. Nanad akon inhaliw hēn nag-in ipoh hēn kasalanan. <sup>15</sup> A ko angkaintindihan ya sarili ko. Ta a ko madyag ya labay kon daygēn. Ta hatoy a ko labay daygēn, ay habayto ya andaygēn ko. <sup>16</sup> Kabay ha a ko labay hēn manyag hēn karawakan ya andaygēn ko, ay habaytoy ampamaptēg ya an-uyunēn ko ya mangēd ya habaytoy Kautuhan. <sup>17</sup> Kabay alwan hiko ya ampanyag hēn habaytoy karawakan gawan ha kalabayan ko, noa, gawan ha nangarawak ya kalabayan hēn lawini ko hēn manyag kasalanan. <sup>18</sup> Gawan muwang ko ya ayn pērad man kangēran ya ubat ha kalabayan lawini ko hēn manyag kasalanan, ta agyan labay kon manyag kangēran, ay a ko madyag ya habayto. <sup>19</sup> Ta a ko ampanyag hēn kangēran ya labay kon daygēn, haka ya karawakan ya a ko labay daygēn, ay habayto ya andaygēn ko. <sup>20</sup> No ihundo koy pamanyag hēn a ko labay, ay alwan gawan ha kalabayan ko ya hikoy ampanyag hēn habaytoy karawakan, noa, gawan ha kalabayan hēn lawini ko hēn manyag kasalanan.

<sup>21</sup> Kabay angkaêtpanan ko ha sarili ko, ya agyan labay kon manyag kangēran, maparah akon manyag karawakan. <sup>22</sup> Boon nakêm haka ihip ko, ay anlugarûn koy Kautuhan ni Apo Namalyari, <sup>23</sup> noa, muwang kina ya kaatag ya ampamaala ha lawini ko. Yabay ya kasalanan, haka habaytoy kasalanan ay ampanalanghang ha Kautuhan ni Apo Namalyari ya labay kon honolên, kabay ampakadyag akon kasalanan, haka hikoy antalanêhēn kasalanan. <sup>24-25</sup> Kapapaingalo kon taganá! Habaytsi ya angkalyari kangko. Boon nakêm ko ay labay kon humonol ha Kautuhan ni Apo Namalyari, noa, ya lawini ko ay antalanêhēn kasalanan. Hinoy makapiligtas kangko ha kalabayan lawini ko hēn manyag kasalanan, ya ampamigtan kangko ha kamatsan, hēn midayo kan Apo Namalyari, hēn parusaan hēn ayn angga?

Halamat kan Apo Namalyari ta gawan ha dinyag ni Panginoon tamon Jesu-Cristo, ay manambut kitamo!

## 8

### *Ya pamimiay lan ampaakay ha Espiritu ni Apo Namalyari*

<sup>1</sup> Hikitamoy main pakikimiha kan Apo Jesu-Cristo, ay taganán ahinan lingonêhēn parusaan para ha kasalanan tamo. <sup>2</sup> Gawan dinyanan kitamon bayoy biyay ya indigalo hēn Espiritu ni Apo Namalyari, haka gawan ha pamamaala na ha biyay tamo, ay ayn kitamina ha aypa hēn kapangyarihan hēn kasalanan tamo, ya mamigtan dayi kantamo ha kamatsan, hēn midayo kan Apo Namalyari, hēn parusaan hēn ayn angga. <sup>3</sup> Ya Kautuhan ay a makapialih kantamo ha lokop hēn kapangyarihan hēn kasalanan tamo, gawan tawo kitamon bat ya a ampakahonol ha Kautuhan. Noa, dinyag ni Apo Namalyari ya a madyag hēn Kautuhan. In-utoh nay kamiha-mihaan nan Anak ya nag-in tawo, ta êmēn hiyay parusaan para ha kasalanan tamo. Ha êmbayro ay inalih ni Apo Namalyari ya kapangyarihan hēn kasalanan, ya nanalan ha lawini tamo. <sup>4</sup> Dinyag ni Apo Namalyari ya habayto, ta êmēn hikitamo ya ampaakay ha Espiritu na, haka a anhumonol ha kalabayan hēn

lawini tamo hēn manyag kasalanan, ay main kapangyarihan hēn manonol ha Kautuhan.

<sup>5-6</sup> Ta hilay mapanyag kalabayan lan lawini la hēn manyag kasalanan, ay bayron bat nakapéptēng ya kaihipan la, kabay migtan hila ha kamatsan hēn midayo kan Apo Namalyari, hēn parusaan hēn ayn angga. Noa, hilay mapanyag kalabayan hēn Espiritu ni Apo Namalyari, ay nakapéptēng ya kaihipan la kana, kabay mag-in mapatēkbēk ya kaihipan la, haka madyanan hilan biyay ya ayn angga. <sup>7</sup> Gawan hilay nakapéptēng ya kaihipan ha kalabayan lawini la hēn manyag kasalanan, ay anhumalanghang kan Apo Namalyari. A la anhonolēn ya Kautuhan ni Apo Namalyari, ta ha kaptēgan, ay a la mahonol ya habayto. <sup>8</sup> Hilay anhumonol ha kalabayan lan lawini la hēn manyag kasalanan, ay a ampakapahigla kan Apo Namalyari.

<sup>9</sup> Noa, hikaw etaman, ay ampaidi kamoyu ya Espiritu ni Apo Namalyari, haka hiyay nay anhonolēn yo, alway nan kalabayan lawini yo hēn manyag kasalanan. Pakaihipēn yo, ya hilay a ampaidyanan hēn Espiritu ni Apo Namalyari, ay alwa pon kan Apo Jesu-Cristo. <sup>10</sup> Noa, no ampaidi ya kamoyu hi Apo Jesu-Cristo, matsu man ya lawini yo, gawan ha kasalanan, ay mabiyay ya espiritu yo ha langit gawan intad na kaw ni Apo Namalyari hēn ayn kasalanan. <sup>11</sup> Miha pon, ya Espiritu ni Apo Namalyari, ay namabiyay oman kan Apo Jesu-Cristo, kabay no ampaidi ya kamoyu ya Espiritu na, ay lano, habaytoy Espiritu ya mamabiyay kamoyun oman.

<sup>12</sup> Kabay patēl ha Panginoon, main kitamon utang ya nakēm hēn honolēn ya Espiritu ni Apo Namalyari, haka alway nan kalabayan lawini tamo hēn manyag kasalanan. <sup>13</sup> Ta no anhonolēn yo pon ya kalabayan hēn lawini yo hēn manyag kasalanan, ay migtan kaw ha kamatsan hēn midayo kan Apo Namalyari, hēn parusaan hēn ayn angga. Noa, madyanan kaw hēn biyay ya ayn angga, no ha kapangyarihan nan Espiritu ni Apo Namalyari, ay talibatokan yoy kalabayan yo hēn manyag kasalanan. <sup>14</sup> Ta hilay paakay ha Espiritu ni Apo Namalyari ay yabay ya maának ni Apo Namalyari. <sup>15</sup> Ta gawan ha Espiritu ni Apo Namalyari, ya indigalo ni Apo Namalyari kantamo, ay hikitamoy dinyag maának ni Apo Namalyari. A na kitamo dinyag ipoh ya malimon maparusaan ya nanad mana tamon pamimiyay. Noa, ha kapangyarihan nan Espiritu ni Apo Namalyari, ay mabaēg tamo yay nan Tatang hi Apo Namalyari. <sup>16</sup> Haka ya Espiritu ni Apo Namalyari ya ampamaptēg hēn kalamo hēn nakēm tamo, ya hikitamo ay maának nay na ni Apo Namalyari. <sup>17</sup> Haka gawan maának na kitamina, ay tanggapēn tamo ya in-il-an na para kantamo hēn kalamo ni Apo Jesu-Cristo. Ta no tēêhēn tamoy pamairap\* gawan ha paniwala tamo kan Apo Jesu-Cristo, hēn nanad ha pamakiatag tamo hēn hiyay nagdusa, ay mamaala kitamo etaman hēn kalamo na ha langit.

### *Ya pamangēnggan ha pamamaala hēn kalamo ni Apo Jesu-Cristo*

<sup>18</sup> No an-ihipēn koy kairapan ya angkatanam tamo di ha luta, ay taganán tampol tamon liwaan ya habayto, gawan lano ay mamaala kitamo hēn kalamo ni Apo Jesu-Cristo ha langit hēn ayn angga. <sup>19</sup> Alwan bat hikitamo noa, ya kaganawan ya dinyag ni Apo Namalyari, ay labay-labay hēn tampol nay na dayin ipamwang no hino hilay mantēg nan maának. <sup>20</sup> Ta inalíh na pon ni Apo Namalyari ya alagá hēn dinyag na. A la labay hēn parusaan hilan êmbayro, noa, habaytoy tinalagá na. Êmbayro man, ay main hilan maêngganan, <sup>21</sup> gawan tinalagá ni Apo Namalyari ya kaganawan ya dinyag na, ay mibuhan

\* <sup>8:17</sup> 2 Corinto 1:5, 1 Pedro 4:13, 2 Timoteo 2:11-12.

ha kapangyarihan hên kamatsan, haka milamo ha maának na lano hên bayoén, boy dyanan hên kahampatan ya ayn kapantag. <sup>22</sup> Muwang tamo ya paubat hên haton lagi, ay ampan-agul ya kaganawan dinyag, hên nanad ha babayi ya angkairapan ha pamanganak. <sup>23</sup> Alwan bat hilay habaytoy kaatag ya dinyag ya angkairapan, noa, hikitamo êt, ya pinaigan hên Espiritu ni Apo Namalyari, ya unan indigalo ni Apo Namalyari kantamon ampaniwala. Ya kaihipan tamo ay nanad ampan-agul êt ha pamangênggan tamo ha pamipamwang ni Apo Namalyari ya hikitamoy mantêg nan maának, ya hagilyan lano ya lawini hên panlangit ya ahina matsu. <sup>24</sup> Gawan habaytoy an-êngganan tamo paubat hên naligtas kitamo. Ta no natupad ya habayto, ay yarin êngganan tamo ya pon! Ayn ampangênggan ha natupad. <sup>25</sup> Noa, gawan a pon natupad ya an-êngganan tamo, ay ampangênggan kitamo hên main pamagtêh.

<sup>26</sup> Alwan bat ha sigurado tamo ya maêngganan tamo ya habayto, noa, ya Espiritu ni Apo Namalyari ay ampanawop kantamo etaman ha pamanalanganin tamo, gawan a tamo muwang, no ay-êmén, haka no hino ya dapat tamon ihalangin. Kabay hiyay ampakihabi kan Apo Namalyari para kantamo hên main pamanguyámêh, ya a makwan habtan. <sup>27</sup> Hi Apo Namalyari etaman, ya ampakamwang hên laman nakêm, ay muwang na etaman ya an-iabot kana hên Espiritu na, ya ampakihabi kan Apo Namalyari para kantamo, ya pinili na hên mag-in kana, ta habaytoy ayon ha kalabayan na.

<sup>28</sup> Muwang tamo ya balang angkalyari kantamo ay mag-in ha ikakangêd tamon ampanlugud kana, ya pinili na ha pamanhumonol ha tinalagá na. <sup>29</sup> Hên haton lagi, hên bayo na dinyag ya luta, ay muwang nay na ni Apo Namalyari no hinoy mag-in maának na, haka pinili na hila hên humonol ha pamimiyay hên Anak na, ya hi Apo Jesu-Cristo. Ha êmbayro ay hi Apo Jesu-Cristo ya mag-in pinakakabaya tamon kal-atan mipapatêl. <sup>30</sup> Haka hikitamoy pinili na hên mag-in nanad kan Apo Jesu-Cristo, ay hinagyat na hên humonol kana. Intad na kitamo êt hên ayn kasalanan, haka lano ay makapakiatag kitamo ha pamamaala ni Apo Jesu-Cristo.

### *Ya pamanlugud ni Apo Namalyari kantamo gawan kan Apo Jesu-Cristo*

<sup>31</sup> Kabay mahabi tamo, ya gawan gampian na kitamo ni Apo Namalyari, ay taganán ayn makahambut kantamo! <sup>32</sup> A na in-imot ya kamiha-mihaan nan Anak, ya hi Apo Jesu-Cristo, ta in-utoh nan matsu ha ikakangêd tamon balang miha. No dinyag ni Apo Namalyari ya habayto, yarin a na idin kantamo ya kaganawan kailangan tamo! <sup>33</sup> Yarin main makapayhumbung hên kasalanan tamo kan Apo Namalyari, ya namili kantamo, haka na-mitad kantamon ayn kasalanan! <sup>34</sup> Ayn taganán makapaghabi ya dapat kitamon parusaan ha impiyerno, gawan hi Apo Jesu-Cristo mismo ya natsi para kantamo! Biniyay yan oman, haka atsi yay na hên ampamaala ha dapit panabtab ni Apo Namalyari, hên ampakihabi kan Apo Namalyari ha ikakangêd tamo. <sup>35</sup> Ayn taganán makapihiyay kantamo ha pamanlugud ni Apo Jesu-Cristo! Agyan malatngan kitamo hên kairapan, kapahiran nakêm, pamairap kantamo hên kapareho tamo gawan ha paniwala tamo, hadyay lonoh, ayn maitakop, hinoman ya kapapotog, o patsêñ la kitamo man, ay ayn taganán makapihiyay kantamo ha pamanlugud ni Apo Jesu-Cristo. <sup>36</sup> Ya êmbayroy kairapan ay nanad ha impahulat ni Apo Namalyari, ya wanana hulat,

“Gawan ha paniwala naén kamo, Panginoon, ay labay la kay patsêñ hên boon allo.

Nanad kay hén tupu ya maranin patsén.”†

<sup>37</sup> No maranasan tamo man ya êmbayroy kairapan, ay taganán ubuhén tamon hambutén ya habayto, gawan kan Apo Jesu-Cristo ya ampanlugud kantamo. <sup>38</sup> Angkasigurado ko ya matsu kitamo man, o mabiyay kitamo pon, ay matanam tamoy pamanlugud na. Ayn makapihiyay kantamo ha pamanlugud ni Apo Jesu-Cristo, anghel man, o hilay nangarawak ya a angkahélék, o hinon kapangyarihan, o hinon angkalyari améhén, o ya a êt nalyari, ya lumaténg, <sup>39</sup> o hinon atsi bayro ha tag-ay o bayri ha aypa, o hinoman pon ya a inungkat, ay taganán ayn makapihiyay kantamo ha pamanlugud ni Apo Namalyari, ya angkatanam tamo gawan kan Panginoon tamon Jesu-Cristo.

## 9

### *Makatoynungan hi Apo Namalyari hén mangingalo ha labay na*

<sup>1</sup> Main akon labay ipamwang kamoyu ya tungkol ha kapareho kon Israelita ya taganán pêtêg. Muwang koy pêtêg ya habaytsi gawan ha pakikimiha ko kan Apo Jesu-Cristo, haka malinis ya konsinsya ko gawan ha Espiritu ni Apo Namalyari ya ampamaala ha nakém ko. <sup>2</sup> Hadyay kalungkutan ko haka ampamalagéhbég ya nakém ko, <sup>3</sup> ta kal-atan kanlan kapareho kon Israelita ay a pon ampaniwala ya hi Apo Jesu-Cristo ay hiyay Mámiligtas ya an-êngganan la. No malyari dayi, ay hiko tanay parusaan ha impiyerno miligtas hila tana dayi. <sup>4</sup> Ta hila ay kapareho kon Israelita, ya dinyanan karapatan ni Apo Namalyari hén mag-in maának na. Impahlék na kanla ya panga-Diyos na. Mangéd ya nakipagkahundoan ya kanla. Indin na kanla ya pangako na ya ingalwan na hila, haka mal-at pon ya pangako, haka ya Kautuhan. Intoro na kanla ya pêtêg ya pamagsimba. <sup>5</sup> Ya ninuno naén ay anggalangén hén paubat hén haton lagi, haka ya Mesias, ya Mámiligtas ya hi Apo Jesu-Cristo ay nangubat kanla hén hiyay nag-in tawo. Hiya hi Apo Namalyari ya ampamaala ha hinon atsi ha langit haka ha luta. Purién ya hén ayn-angga. Amen.

<sup>6</sup> A ko anhabién ya a natupad ya impangako ni Apo Namalyari kanlan kapareho kon Israelita gawan ha kal-atan la, ya a ampaniwala kan Apo Jesu-Cristo, ta main Israelita ya alwan taganán maának ni Apo Namalyari.

<sup>7</sup> Haka miha pon, ya intad ni Apo Namalyari hén mantég kaapo-apoan ni apo Abraham ay hilan bat ya kaapo-apoan nan anak na, ya hi Isaac, ta wani Apo Namalyari kan apo Abraham, “Ya itad mon kaapo-apoan mo, ya impangako ko kamo, ay hilay habayton bat ya mangubat kan Isaac.”\* <sup>8</sup> Ya labay habién, ay a nan ubuhén ni Apo Namalyari hén itad maának na ya mag-in kaapo-apoan ni apo Abraham, noa, hilay haton bêngat ya mangubat kan Isaac, ya impangako. <sup>9</sup> Ta habaytsi ya impangako ni Apo Namalyari kan apo Abraham, ya wana, “Mag-orong ako di ha mihay taon. Ha pag-orong ko ay manganak hén lalaki ya ahawa mo, ya hi Sara.”†

<sup>10</sup> Alwan bêngat habaytoy hinabi ni Apo Namalyari kan apo Abraham, ya ampampahlék no ay-êmén yan ampamili hi Apo Namalyari. Ta main êt êmbayro ya nalyari kanlan kambal ya hi Jacob haka hi Esau, ya anak ni Isaac kan Rebecca. <sup>11-12</sup> Gawan bayo hilan in-anak ya kambal haka bayo hila nakadyag hén kangérán o karawakan, ay impamwang nay na ni Apo Namalyari ya tinalagá na, ta êmén mamwangan ya pinili na kanlan lowa, ay alwan gawan ha dinyag la, noa, gawan antuparén nay tinalagá na, ta hinabi na kan Rebecca, ya wana, “Ya unan umawah kanlan lowa ay maghuyo

† 8:36 Awit 44:22. \* 9:7 Genesis 21:12. † 9:9 Genesis 18:10,14.

ha humonol kana.”‡ 13 Êmbayro êt ya labay habiên hên impahulat ni Apo Namalyari, ya wana, “Hi Jacob ay nilugud ko, noa, hi Esau ay a ko labay.”§

14 Kayno main maghabi ya main yan anggampian hi Apo Namalyari. Taganán a la dapat habiên ya habayto! 15 Gawan main yan katoynungan hên manyag habayto, ta wana kan apo Moises, “Angkaingalo ko ha labay kon kaingalwan.”\* 16 Kabay muwang tamo ya pamamili ni Apo Namalyari hên mag-in maának na, ay alwan pamanhumonol ha kalabayan tawo, o gawan ha dyag la, noa, gawan ingalo na. 17 Ihipén tamo ya Kahulatan ya impahulat ni Apo Namalyari, no hinoy nakahulat bayro ya hinabi ni Apo Namalyari kan Faraon, ya ari ha Egipto hên haton lagi, “Dinyag katan ari ta êmén ipahlék ya kapangyarihan ko kamo, haka ta êmén mamwangan ha boon luta ya langan ko.”† 18 Kabay muwang tamo ya angkaingalwan na, ay hatoy labay nan kaingalwan. Haka pakdêyên nay ulo lan hatoy labay nan pakdêyên ya ulo.

### *Parusaan ni Apo Namalyari ya dapat nan parusaan*

19 Kayno main kamoyu ya mangotáng hên êmén di, “No êmbayro, ay awta anhêhêen ni Apo Namalyari ya tawo ha pamanyag kasalanan? Hinoy maka-halanghang ha tinalagá na?” 20 Ya mahabi ko etaman, ay tawo kan bêngat. Ayn kan katoynungan hên mangotáng kan Apo Namalyari hên êmbayro. Yarin main korên ya mangotáng ha manyag kana, “Awta dinyag mo kon êmén di?” 21 Atsi kanan manyag korên no hinoy daygén na. Bayro ha naorit ya luta ya gamitên na, ay malyari yan manyag hên pan-allo-allo hên gamitên o ya pambisitan bat, atsi kana ya habayto.

22 Êmbayro êt kan Apo Namalyari. Main yan katoynungan hên manyag no hinoy labay na. No labay nan ipahlék ya huluk na haka ya kapangyarihan na hên parusaan hilay mapanyag karawakan, ay atsi kana. Noa, pinagtêehan na hila pon, 23 ta êmén maipahlék ya panga-Diyos na kanlan an-ingalwan na, ya in-il-an na hên mag-in kalamo na ha langit. 24 Kalamo kitamo bayro ha an-ingalwan na ya pinili na, haka alwan bat hikay ya Israelita, noa, hikaw êt ya alwan Israelita. 25 Habayto ay nanad ha impahulat na kan apo Oseas, “Hilay a ko pinili, ay itad kon pinili ko, haka hilay a ko nilugud, ay lugurên ko.

26 Bayro ha logal ya pinaghbian ko kanla ya alwa hilan maának ko, ay baêgén hilay nan maának ni Apo Namalyari, ya angkabiyay hên angga-angga.”‡

27 Habaytsi etaman ya impamwang ni Propeta Isaias ya tungkol ha Israelita, ya wana,

“Mag-in hila man hên kalakê hên balah ha laylay hên dagat, ay u-ungnon bêngat kanla ya miligtas.

28 Ta bigla nan ubuhêñ hên parusaan ni Apo Namalyari ya dapat nan parusaan di ha luta.”§

29 Wana pon êt ni Propeta Isaias,

“Ha ingalo hên Panginoon ya makapangyarihan, ay namitagan yan ungro kannaêñ hên Israelita.

No a na dayin dinyag ya habayto, ay nag-in kitamina dayin nanad kanlan taga-Sodoma, haka taga-Gomorra ya inubuh hên pinatsi.”\*

### *Hilay Israelita ay a naniwala ya hi Apo Jesus, ay yabay ya Mesias, ya Cristo ya impangako*

‡ 9:11-12 Genesis 25:23. § 9:13 Malakias 1:2-3. \* 9:15 Exodo 33:19. † 9:17 Exodo 9:16.

‡ 9:26 Oseas 2:23, 1:10. § 9:28 Isaias 10:22-23. \* 9:29 Isaias 1:9.

<sup>30</sup> Habaytsi tanay kabooan hēn labay kon habiēn. Hilay alwan Israelita, ya a pinakikwanan hēn mag-in ayn kasalanan ha hēlēk ni Apo Namalyari, ay intad nan ayn kasalanan, gawan ha paniwala la kan Apo Jesu-Cristo. <sup>31</sup> Noa, hilay Israelita ya pinakikwanan hēn mag-in ayn kasalanan ha hēlēk ni Apo Namalyari ha pamanhumonol la ha Kautuhan ni apo Moises, ay a awud nag-in ayn kasalanan. <sup>32</sup> A hila nag-in êmbayro, gawan êndat lan mag-in hilan ayn kasalanan ha pamanyag lan kangēran alwan gawan ha paniwala. A hila naniwala kan Apo Jesu-Cristo, ta hiyay nanad ha bato ya pinibátolan la. <sup>33</sup> Habaytoy nanad êt ha nakahulat ya tungkol ha Mesias, ya Cristo, “Hēlkēn yo! Main akon indin ya miha ya nanad bato ha Sion.† Hiyay pinibátolan la. Noa, hilay maniwala kana ay a mahira ya nakêm.”‡

## 10

<sup>1</sup> Hikaw ya patêl ko ha Panginoon, boon nakêm, ay labay ko dayin miligtas ya kapareho kon Israelita. Habaytoy panay kon an-ihalangin kan Apo Namalyari. <sup>2</sup> Angkapaptēgan ko ya ampatolukēn lan maghuyo kana, noa, alwan usto ya pamaghuyo la. <sup>3</sup> Gawan matag-ay ya nakêm la, ay a la antanggapēn ya an-idigalo ni Apo Namalyari, no ay-êmēn na hila dayin itad hēn ayn kasalanan, ta êndat la ya itad hilan ayn kasalanan ha pamanhumonol ha Kautuhan. <sup>4</sup> Noa, gawan kan Apo Jesu-Cristo ay ayn nanan an-itad hēn ayn kasalanan ha pamanhumonol ha Kautuhan, ta an-itad ni Apo Namalyari hēn ayn kasalanan ya kaganawan ya ampaniwala kan Cristo.

### *Ya kaligtasan ay para ha balang miha*

<sup>5</sup> Habaytsi ya hinulat ni apo Moises ya tungkol ha mag-in ayn kasalanan ha hēlēk ni Apo Namalyari, gawan ha pamanhumonol ha Kautuhan, ya wanhan hulat, “Hilay taganán ampanonol ha balang utoh ay madyanan biyay ya ayn anggaan.”\* <sup>6</sup> Noa, impahulat êt ni Apo Namalyari ya ampamipamwang kantamo ya gawan bēngat ha paniwala kan Apo Jesu-Cristo, ay an-itad na kitamina ni Apo Namalyari hēn nanad ayn kasalanan. Êmēn di ya wanhan habaytoy hulat, “Paan yon habiēn ha nakêm yo, ya kailangan main munik ha langit hēn mangalap kan Cristo. <sup>7</sup> Haka paan yon habiēn ha nakêm yo, ya kailangan main tumaoy ha legal lan natsi hēn mamabiyay kan Cristo. <sup>8</sup> Ta atsi kamoyu ya habi ni Apo Namalyari. Atsi ya ha nakêm yo, haka maipamwang yo ya.” Habaytoy habi ni Apo Namalyari ya an-ipamwang naén ya tungkol ha paniwala kan Apo Jesu-Cristo. <sup>9</sup> Yabay ya no ipamwang yo hi Apo Jesu-Cristo, ya hiyay pinaka-Panginoon, haka ampaniwala kaw hēn boon nakêm ya hiyay biniyay oman ni Apo Namalyari, ay miligtas kaw. <sup>10</sup> Gawan boon nakêm kitamon ampaniwala, ay an-itad na kitamo ni Apo Namalyari hēn ayn kasalanan, haka ha pamipamwang tamo ya ampaniwala kitamo kan Apo Jesu-Cristo, ay miligtas kitamo. <sup>11</sup> Bayro ha Kahulatan ya impahulat ni Apo Namalyari ay main nakahulat, ya wana, “Noa, hilay ampaniwala kana, ay a mahira ya nakêm.”† <sup>12</sup> Ya labay habiēn hēn habayto, ay parehon bat ha hēlēk ni Apo Namalyari, ya hilay Israelita, haka hilay alwan Israelita. Mimihay Panginoon hēn balang miha, haka mahiglay nakêm yan ampam-i ha kaganawan ampakiingalo kana. <sup>13</sup> Ta impahulat ni Apo Namalyari, ya wanhan hulat, “Hinoman ya makiingalo ha Panginoon ay miligtas.”‡

† <sup>9:33</sup> balayan Jerusalem. ‡ <sup>9:33</sup> Isaias 8:14, 28:16. Hēlkēn etaman ha 1 Pedro 2:6-8. \* <sup>10:5</sup> Levítico 18:5. Hēlkēn yo etaman ha Galacia 3:12. † <sup>10:11</sup> Isaias 28:16. ‡ <sup>10:13</sup> Joel 2:32.

<sup>14</sup> Noa, ay-êmén hilan makapakiingalo ha Panginoon ya kaatag, no ayn hila pon paniwala kana? Ay-êmén hilan maniwala kana, no a la pon nagilam ya tungkol kana? Haka ay-êmén lan magilaman ya tungkol kana, no ayn mamipamwang kanla hên habayto? <sup>15</sup> Haka ay-êmén magkamain hên mámipamwang no ayn mamiutoh kanla? Ha kaptégan ay main nanan in-utoh, ta impahulat ni Apo Namalyari, ya wanhan hulat, “Ampakapahigla hilay mámipamwang hên mangangêd ya habi!”<sup>§</sup> <sup>16</sup> Noa, u-ungnon bat ya naniwala ha Mangêd ya Habi, ta wanhan hulat ni Propeta Isaías, “Panginoon, hinoy naniwala ha hinabi na ên?”\* <sup>17</sup> Embayro man, ya paniwala tamo kan Apo Jesu-Cristo ay nangubat ha pamanggilam hên kaptégan ya tungkol kana.

<sup>18</sup> Yarin a la êt nagilam hên kapareho kon Israelita ya tungkol kan Apo Jesu-Cristo! Taganán nagilam lay na, ta impahulat ni Apo Namalyari, ya wanhan hulat, “Nibhwag ha boon luta ya balita.

Ayn hinon logal ya a naabutan hên habayto.”†

<sup>19</sup> Yarin a la êt naintindihan hên kapareho kon Israelita ya tungkol kan Apo Jesu-Cristo! Siguradon naintindihan lay na, noa, a la pinaniwal-an ya habayto, ta impahulat ni Apo Namalyari kan apo Moises, ya wanhan hulat, “Paimonêñ kataw kanlan alwan Israelita, haka pahulukêñ kataw kanlan ayn muwang hên tungkol kangko.”‡

<sup>20</sup> Ya impahulat ni Apo Namalyari kan Propeta Isaías ay malinaw. Êmén di ya wanhan hulat,

“Hilay a nanapol kangko ay hila ya nakahêlêk kangko.

Nagpahlêk ako kanlan a nanapol kangko.”§

<sup>21</sup> Habaytsi pon ya impahulat ni Apo Namalyari kan Propeta Isaías, ya tungkol ha kapareho kon Israelita,

“Bapan buyot kinan ampanagyat kanla, noa, alwa hilan mahonol, haka nakdêy ya ulo la.”\*

## 11

### *An-ingalwan ni Apo Namalyari hilay Israelita*

<sup>1</sup> Kayno êndat yon tinalibatokan hila ni Apo Namalyari ya hilay kapareho kon Israelita gawan a hila naniwala! Siguradon ahê! Ta hiko man ay mihay Israelita, haka hi apo Abraham haka hi apo Benjamin ay ninuno ko. <sup>2</sup> A na pinaulayan ni Apo Namalyari ya una nan pinili hên hato. Panêmtêmén yoy balita ni apo Elias\* kan Apo Namalyari hên tungkol ha dinyag lan kapareho nan Israelita, ya nakahulat ha Kahulatan ya impahulat ni Apo Namalyari, ya wana, <sup>3</sup> “Panginoon, pinatsi lay kapareho kon mámipamwang hên an-ipaihip mo kannaêñ. Inagwat lay pamiulaman hên an-iátang kamo. Mimiha ko tanay natágan haka labay la kon patsêñ.” <sup>4</sup> Noa, hinabi kana ni Apo Namalyari, ya wana, “Main pon hên piton libo ya lalaki ya kapareho mo ya impapawa ko ya a ampagsimba kan Baal, ya alwan pêtêg diyos.” Habaytoy hinabi ni Apo Namalyari kan apo Elias. <sup>5</sup> Embayro êt amêhêñ, main pon ungnoy kapareho kon Israelita ya ampaniwala kan Apo Jesu-Cristo, ya pinili ni Apo Namalyari, gawan ha ingalo na ya ayn kapantag. <sup>6</sup> Haka no hikay pinili gawan ha ingalo na, ya ayn kapantag, ay habaytoy alwan gawan ha hinon kangêran dyag na ên, noa, gawan bat ha ingalo na, ya ayn kapantag.

§ **10:15** Isaías 52:7. \* **10:16** Isaías 53:1. † **10:18** Awit 19:4. ‡ **10:19** Deuteronomio 32:31.  
§ **10:20** Isaías 65:1. \* **10:21** Isaías 65:2. \* **11:2** 1 Hari 19.

<sup>7</sup> Ya labay habiēn hēn habayto, ay u-ungnon bat ya kapareho kon Israelita ya labay hēn mag-in ayn kasalanan, ay pinili hēn maniwala kan Apo Jesu-Cristo. Hilay kal-atan ay pinakdēy nay na ya ulo. <sup>8</sup> Habaytoy nanad ha impahulat ni Apo Namalyari, ya wanana hulat,

“Dinyanan hila ni Apo Namalyari hēn kaihipan hēn nanad ha kaihipan hēn mihay angkabêlêw.

Kabay angga amêhêñ, agyan main hilan mata, ay a hila ampakahêlêk, haka agyan main hilan têkk, ay a hila ampakagilam.”†

<sup>9</sup> Haka main yan impahulat hi Apo Namalyari kan Arin David, ya tungkol kanlan ayn paniwala, ya wanana hulat,

“Dayi ya kaluto la, ay mag-in nanad paēn ha pamandakêp kanla. Bigla hila dayin madakêp hēn nanad ha manok lalê, o ayop ya minabo ha patsibung ta êmén hila maparusaan.

<sup>10</sup> Gumulagê ta dayi ya mata la, ta êmén hila a kahêlêk,

haka dayi tumukoko‡ hila kaban angkabiyay hila, gawan ha kairapan ya angkatanam la.”§

<sup>11</sup> Nibatol hilay kapareho kon Israelita, ta a hila naniwala kan Apo Jesu-Cristo. Kayno êndat yon a hilay na miligtas! Alwa, ta main hila pon hēn panaon hēn miligtas! Gawan ha pamibatol la, ya kasalanan la ya a hila naniwala, ay nadyanan kaligtasan hilay alwan Israelita, kabay mangimon hilay Israelita, gawan labay la etaman hēn miligtas. <sup>12</sup> Hadyay ingalo ni Apo Namalyari kanlan alwan Israelita gawan ha kasalanan lan Israelita ya a naniwala. Kabay taganán igit pon bayro ya ingalo na kanla no maniwala hilay nay Israelita.

### *Ya kaligtasan lan alwan Israelita*

<sup>13</sup> Habaytsi etaman ya labay kon habiēn kamoyun alwan Israelita. Gawan hikoy in-utoh ni Apo Namalyari hēn manoro kamoyu, ay boon nakêm kon tuparêñ ya tungkulon ko, <sup>14</sup> ta êmén hila mangimon hilay kapareho kon Israelita, haka ha êmbayro, ay main ungno kanla ya miligtas. <sup>15</sup> Ta no ya pamaulay kanla, ay nag-in dann ta êmén madyanan kaligtasan hilay alwan Israelita, hēn makiúmang kan Apo Namalyari, ay lalon mangêd no maniwala hila kan Apo Jesu-Cristo ya hilay kapareho kon Israelita, ta nanad bayton nabiyyay oman ya natsi.

<sup>16</sup> Ya ninuno naêñ hēn Israelita ay maialimbawa ha duman ya imparaêp kan Apo Namalyari. Haka hikay, ay maialimbawa ha kaganawan ya naga-pah, ya kan Apo Namalyari etaman. Ya ninuno naêñ hēn Israelita, ay maialimbawa etaman ha yamot hēn mihay kayo. Haka hikay, ay maialimbawa ha hanga. No kan Apo Namalyari ya yamot, ay kana ya anggan hanga. <sup>17</sup> Main kapareho kon Israelita ya nanad hanga hēn mantêg kayon olibo, ya pinutoh gawan a hila naniwala kan Apo Jesu-Cristo, haka hikaw ya alwan Israelita, ay nanad hanga hēn olibo ya bat tinumubo ha lalê, ya pinutoh, haka intumpang ha pinamutohan hēn hanga hēn mantêg olibo. <sup>18</sup> Kabay paan yon musmusêñ hilay nanad hanga ya pinutoh, haka paan kaw maglambung, ta alwan hikaw ya ampamabiyay ha yamot, noa, ya yamot ay ampamabiyay kamoyu.

<sup>19</sup> Kayno main kamoyun maghabin êmén di, “Mangêd kay ya alwan Israelita, ta main pinutoh, ta êmén kay mizagili kanla.” <sup>20</sup> Pêtêg ya main pinutoh, ta êmén kaw mizagili kanla. Noa, pinutoh hila gawan a hila naniwala, haka inhagili kaw kanla gawan ha paniwala yo. Kabay paan kaw mangihip ya mangêd kaw kanla, paan kaw magmahlay, haka kaillag kaw,

† **11:8** Deuteronomio 29:4, Isaías 29:10. ‡ **11:10** bumokót. § **11:10** Awit 69:22-23.

**21** ta no a na ampahayangan ni Apo Namalyari ya mantêg hanga, ay yarin pahayangan na kaw, ya intumpang bat! **22** Bayri tamon mahêlêk no ay-êmên yan mangingalo, haka no ay-êmên yan mamarusa. Pinarusaan na hilay a naniwala, noa, an-ingalwan na kaw no ihundo yoy paniwala yo. Noa, no a yo ihundo ya paniwala yo kanan ampangingalo kamoyu, ay potohêna na kaw. **23** Hila man ya kapareho kon Israelita ay maitumpang, no a la ipalêkpêk ya kakdêyan ulo la hèn a maniwala, ta main yan kapangyarihan hi Apo Namalyari hèn itumpang hilan oman. **24** No hikaw ya alwan Israelita, ya nanad hanga hèn olibo ya bat tinumubo ha lalê ya pinutoh, ay naitumpang ni Apo Namalyari ha pinamutohan hèn hanga hèn mantêg olibo, ay taganán maitumpang nan oman ya mantêg hanga ha ubatan la.

### *Ya ingalo ni Apo Namalyari kanlan Israelita*

**25** Patêl ko ha Panginoon, main ako pon hèn ipamwang kamoyu ya a pon impamwang hèn hato, ta êmên a kaw mangihip ya mangêd kaw kanlan kapareho kon Israelita. Ya kakdêyan ulo la hèn a maniwala hèn hilay kapareho kon Israelita, ay angga ha a maboo ya bilang lan alwan Israelita ya miligtas. **26** Pangayarin habayto ay miligtas ya kaganawan kapareho kon Israelita hèn nanad ha impahulat ni Apo Namalyari, ya wanana hulat, “Ya Mámiligtas ay lumatêng hèn ubat ha Sion, alihêñ nay karawakan lan kaapo-apoan ni apo Jacob.

**27** Haka habaytoy pamanupad kon kahundoan ko kanla hèn hato, ya alihêñ koy kasalanan la.”\*

**28** Gawan ha a la tinanggap ya Mangêd ya Habi, hilay Israelita, ay hilay nag-in kapatsi ni Apo Namalyari, haka habaytoy nag-in ikakangêd yon alwan Israelita. Noa, anlugurên na hila pon êt, ta gawan hilay pinili na hèn hato, haka gawan ha impangako na ha ninuno la. **29** Ta a ampangoman ya ingalo na, haka ya tinalagá na kanlan pinili na. **30** Hikaw ya alwan Israelita, ay a kaw pon hinumonol kana hèn hato, noa, naingalwan kaw na, gawan ha a pamanhumonol lan Israelita. **31** A hila pon ampanonol kana, noa, lano mapakinabangnan la etaman ya ingalo ni Apo Namalyari nanad ha napakinabangnan yo ya ingalo na kamoyu. **32** Pinaulayan na ya balang miha hèn mag-in ipoh ha pamanalanghang, ta êmên na hila maingalwan.

### *Purién hi Apo Namalyari*

**33** Ayn kapantag ya ingalo ni Apo Namalyari! Ayn anggaan ya kagalingan haka kamwangan na! Ayn ampakaintindi ha hinon tinalagá na, haka no ay-êmên nan tuparêñ ya habayto! **34** Ta êmên ya di ya impahulat ni Apo Namalyari, ya wanana hulat,

“Ayn hinoman ya makamwang hèn kaihipan ni Apo Namalyari.

Haka ayn hinoman ya makapayo kana.”†

**35** “Ayn hinoman ya nakapam-i kan Apo Namalyari,

ta êmên hila main maêngganan kana ta ya kaganawan ay ubat kana.”‡

**36** Gawan hiyay nanyag hèn kaganawan, haka hiyay ampamaala bayro. Purién ya hèn ayn angga! Amen.

## 12

### *Ya bayoy biyay lan main pakikimiha kan Apo Jesu-Cristo*

**1** Patêl ko ha Panginoon, gawan ha haday ingalo ni Apo Namalyari kantamo, ay ampakihabi ko kamoyu ya idin yoy boon biyay boy nakêm yo

\* **11:27** Isaias 59:20-21, Jeremias 31:31, 34. † **11:34** Isaias 40:13, 1 Corinto 2:16. ‡ **11:35** Job 41:11.

kan Apo Namalyari hēn nanad átang, ya angkabiyay, ya banal, haka ya an-ikahigla kana. Habaytoy hēpat ya pamagsimba kana. <sup>2</sup> Paan kaw pagtan kanlan a ampagpalokop kana, noa, paulayan yon bayoēn na ya kaihipan yo, ta ha êmbayro ay mag-in bayo ya pamimiyay yo. Mamwangan yoy kalabayan na haka umayon kaw bayro, ta êmēn yo madyag ya mangêd, haka ya ikahigla na, haka ya taganán usto.

<sup>3</sup> Gawan ha tungkulan hēn apostol ya indin ni Apo Namalyari kangko, ay an-aralan kataw ya paan kaw magmahlay, noa, dapat kaw mag-in manakêm no an-ihipêñ yoy galing, ya indin kamoyu ni Apo Namalyari, gawan ha paniwala yo kan Apo Jesu-Cristo. <sup>4</sup> Ya lawini tamo ay kabooan hēn ulo, mata, bitsih, haka mal-at pon ya pinilalamo, haka alwan pare-pareho ya andaygên lan habaytoy pinilalamo. <sup>5</sup> Êmbayro etaman ya hikitamoy ampaniwala kan Apo Jesu-Cristo, agyan mal-at kitamo, ay maialimbawa kitamo ha mimihay lawini, gawan ha pakikimiha tamo kan Apo Jesu-Cristo, haka ampihahawop kitamo. <sup>6</sup> Ya balang miha kantamo, ay dinyanan ni Apo Namalyari hēn galing ya dapat tamon gamitêñ. No indin kantamo ya galing hēn mamipamwang hēn an-ipaihip na kantamo, ay ipamwang tamon ya habayto ha pamanhu-monol ha paniwala tamon kana. <sup>7</sup> No indin kantamo ya galing hēn manawop ha kapareho, ay dapat pêtêg ya pamanawop tamon. No indin kantamo ya galing hēn manoro, ay dapat magpakahipêg kitamo ha pamanoro tamon. <sup>8</sup> No indin kantamo ya galing hēn mam-in aral, haka mamakhaw nakêm, ay dapat habayto ya daygên tamon. No indin kantamo ya galing hēn mam-i, ay dapat mahiglay nakêm tamon hēn mam-i. No indin kantamo ya galing hēn mamaala, ay magpakahipêg kitamon mamaala. No indin kantamo ya galing hēn mangingalo, ay mangingalo kitamo ha kaatag hēn main kahiglaan.

<sup>9</sup> Dapat mag-in pêtêg ya pamanlugud tamon. Dapat kahêmêkan tamoy karawakan. Dapat panay hēn manyag kangêran. <sup>10</sup> Dapat milulugud haka migagalang kitamo. <sup>11</sup> Dapat boon nakêm kitamo hēn magpakahipêg hēn maghuyo ha Panginoon. <sup>12</sup> Dapat ikahigla tamon ya an-êngganan tamon, dapat tamon têêhêñ ya kairapan, haka dapat ihundo tamoy pamanalangin kan Apo Namalyari. <sup>13</sup> Dapat tamon hawpan hilay kapareho tamon pinili na hēn mag-in kana ha pangangailangan la, haka dapat mahiglan nakêm tamon pahowêñen ha bali tamon ya hilay anlumagay.

<sup>14</sup> Dapat tamon ihalangin ya ingalwan hila dayi ni Apo Namalyari ya ampamairap kantamo. Paan tamon hilan ihumpa. <sup>15</sup> Dapat makihipla kitamo kanlan angkahigla, haka makilungkot kitamo kanlan ampaglunkot. <sup>16</sup> Dapat mamiyay kitamo hēn main pakikimiha. Paan kitamon mag-in matag-ay ya nakêm, noa, makilamo kitamo kanlan maaypa ya tungkulan. Paan tamon ihipêñ ya hikitamon bat ya main kamwangan.

<sup>17</sup> Paan tamon tumbahan hēn narawak ya nanyag karawakan kantamo. Pakikwanan tamon manyag hēn kangêran, ta êmêñ ayn mamintas kantamo.

<sup>18</sup> No malyari, ay pakikwanan yon makilamo hēn mangêd ha balang miha.

<sup>19</sup> Anlugurêñ kon patêl ha Panginoon, paan kaw manumbah kanlan ampanayag karawakan kamoyu, ta ipaulay yo tana kan Apo Namalyari ya habayto. Ta main yan impahulat hi Apo Namalyari, ya wanana hulat,

“Hiko ya Panginoon yo ya manumbah kanlan manyag karawakan kamoyu.”\*

<sup>20</sup> Alwan bat habayto, noa, dapat tamon etaman hēn honolêñ ya habaytsi ya impahulat ni Apo Namalyari, ya wanana hulat,

\* **12:19** Deuteronomio 32:35.

“No angkablay lonoh ya kapatsi yo, ay pakanêñ yo ya, haka no kainêñ ya, ay painêñ yo ya. Ha pamakan haka pamainêñ yo kana, ay mipakarêng-êy ya haka maghêhê ya.”†

**21** Manambut kitamo no tumbahan tamon kangêran ya ampanyag karawakan kantamo.

## 13

### *Dapat palokop kanlan ampamaala ha gobyerno*

**1** Ya balang miha kantamo ay dapat palokop kanlan ampamaala ha gob-yerno, ta ya balang tungkulan hêñ mamaala ay ubat kan Apo Namalyari, haka hilay ampamaala ay pinili na. **2** Kabay hilay anhumalanghang kanlan ampamaala, ay anhumalanghang kanlan pinili ni Apo Namalyari, haka parusaan hila. **3** Hilay ampamaala ay dapat kalimwan hêñ mapanyag karawakan. Hilay mapanyag kangêran ay ayn ikalimo kanlan ampamaala. Kabay no labay tamon a malimo kanlan ampamaala, ay magpakadyag kitamon kangêran, ta êmêñ la kitamon dayêwêñ hêñ ampamaala kantamo.

**4** Hilay ampamaala ay dinyanan ni Apo Namalyari hêñ tungkulon la ha ikakangêd tamo. Noa, no manyag kitamon karawakan, ay dapat kitamon malimo kanla, ta main hilan katoynungan hêñ mamarusa kanlan mapanyag karawakan. **5** Kabay dapat kitamon palokop kanla, alwan bat ha malimo kitamon parusaan, noa, gawan muwang tamo ya usto haka alwan usto.

**6** Ampamayad kitamon buwih gawan muwang tamo ya hépat ya habayto, ta hilay ampamaala, ya dinyanan tungkulon ni Apo Namalyari, ay angkumagal ha ikakangêd tamo. **7** Dapat tamon bayaran hêñ main pamanggalang ya hinon buwih ya hingilêñ lan ampamaala kantamo. Dapat tamo hilan galangêñ ya hilay ampamaala kantamo.

### *Dapat manlugud ha kapareho*

**8** No main kitamon utang, ay dapat tampol tamo hêñ bayaran ya habayto. Noa, ya utang nakêñ tamon manlugud ha kapareho tamo, ay dapat ayn angga. Hilay ampanlugud ha kapareho la ay anhumonol ha Kautuhan ni Apo Namalyari. **9** Habaytoy Kautuhan, nanad ha, “Paan mamabayi o makilalaki, paan mamatsin kapareho, paan manakaw, paan bat maridya,” haka ya kaatag ya Kautuhan, ay angkaboo ha mimihay utoh, “Lugurêñ moy kapareho mo hêñ nanad ha pamanlugud mo ha sarili mo.” **10** Ta no anlugarêñ tamoy kapareho tamo, ay a tamo hilan ampanyagan karawakan, haka anhonolêñ tamo bayto ya kabooan hêñ Kautuhan.

**11** Dapat tamon daygêñ ya habayto, ta no ialimbawa tamo ya hata panaon ha angkawatah, ay mahabi ko ya nilumatêñ ya oras êmêñ mimata, ta ya pamilitas ni Apo Jesu-Cristo kantamo ha karawakan hêñ hata luta, ay marani yana. Marani ya amêhêñ kanan una kitamon naniwala. **12** Nanad kariglêman yabi ya karawakan bayri ha luta, noa, amêhêñ ay nanad angkawatah. Kabay itêgêñ tamoy pamanyag karawakan, haka boon nakêñ kitamon manyag kangêran, ta habaytoy nanad ha an-ihulod tamoy kangêran, ya nanad ha pinaka-kalahag pagaw tamo ha pamanlumaban kan Satanas. **13** Dapat kitamon mamiyay hêñ malinis, ta atsi kitamina ha hawang. Paan kitamon maglahing, paan makilahingan, paan mamabayi, paan makilalaki, haka paan manyag hêñ hinon karawakan kalabayan lawini, paan maki-hubakan haka paan mahêm. **14** Ya dapat tamon daygêñ ay totoêñ tamoy pamimiyay ni Panginoon Jesu-Cristo, paan tamon honolêñ ya kalabayan lawini tamo hêñ manyag kasalanan.

† **12:20** Kawikaan 25:21-22.

## 14

### *Paan miyahatol ya patêl ha Panginoon* (1 Corinto 8:1-13; 10:23-33)

<sup>1-2</sup> No main patêl ha Panginoon, ya alwa pon nananiêh ha paniwala, ya ampag-alangan pon no imbawal ni Apo Namalyari hên mangna hên kêna, ta panay gulay tana ya pangkaén la, ay tanggapên yo hila, haka alwa yo hilan pakihubakan, ampaniwala kaw man ya ayn hinon pamangan ya imbawal ni Apo Namalyari. <sup>3</sup> Paan kaw miyahatol hên tungkol bayro, ta pare-pareho kaw tinanggap ni Apo Namalyari. <sup>4</sup> Ayn kitamon karapatan hên manatol ha nakiamo ha kaatag, haka êmbayro êt, ay ayn kitamon karapatan hên manatol ha kapareho tamon patêl ha Panginoon. Ya Panginoon ay ampamaala kantamo, haka mahawpan na kitamon pare-pareho hên manyag no hinoy usto.

<sup>5</sup> Main kantamon patêl ha Panginoon ya ampaghabi ya main allo, ya taganán in-il-an para magsimba kan Apo Namalyari, haka wanlan kaatag ya hinoman ya allo ay malyarin magsimba. Wangko etaman, ya dapat magsimba kaw ha pamanhumonol yo ha nakêm yo. <sup>6</sup> Hilay ampagsimba ha hinoman ya allo, ay ampagsimba ha Panginoon. Hilay mangna hên hinon kêna ya an-ipahalamat la pon kan Apo Namalyari, ay gawan ha pamanggalang la ha Panginoon. Haka hilay a ampangna hên hinon kêna, ay gawan êt ha pamanggalang la ha Panginoon, haka ampagpahalamatan la hi Apo Namalyari. <sup>7</sup> Ta ayn kantamo ya ampamiyay o natsi man ha ikahigla tamon bat, <sup>8</sup> ta dapat ha ikahigla hên Panginoon ya pamimiay haka ya kamatsan tamo. Kabay no angkabiyay kitamo pon o natsi man, ay kana kitamon Panginoon. <sup>9</sup> Gawan hi Apo Jesu-Cristo ay natsi haka nangoman nabiay, ta êmén na mag-in Panginoon lan angkabiyay haka Panginoon lan natsi. <sup>10</sup> Kabay paan kitamon miyahatol o mimusmusan, ta lano parepareho kitamon umarap ha hukoman ni Apo Namalyari. <sup>11</sup> Ta êmén ya di ya impahulat ni Apo Namalyari, ya wanana hulat,

“Hikoy Panginoon yo, ya ampaghabi hên taganán matupad ya habaytsi. Ya balang miha ay mandoko ha arapan kon magsimba kangko hên habiên ya hikoy Diyos.”

<sup>12</sup> Kanan habayto, ay umarap ya balang miha kan Apo Namalyari, ta lingonên kitamo.

### *Paan manyag hên hinoman ya pangubatan hên pamanyag kasalanan hên kapareho tamo*

(1 Corinto 6:12-20; 8:1-13)

<sup>13</sup> Kabay paan kitamon miaatol, haka siguradoên tamo hên a manyag hên hinoman ya pangubatan hên pamanyag kasalanan hên kapareho tamo.

<sup>14</sup> Gawan ha pakikimiha ko kan Panginoon Jesu-Cristo, ay taganán muwang ko ya ayn pamangan ya an-ibawal ni Apo Namalyari, noa, no an-ihipêñ hên kaatag ya main pamangan ya an-ibawal ni Apo Namalyari, ay taganán kasalanan lay na no kaén lay habayto. <sup>15</sup> A kitamo ampanlugud no angkaén tamo ha arapan hên patêl tamo ha Panginoon ya muwang tamoy bawal kana, ta no matukso yan mangan etaman, ay habaytoy makahakit hên nakêm na. Hiya man ay patêl tamo ha Panginoon ya inlighas gawan ha kamatsan ni Apo Jesu-Cristo, kabay paan tamon kaén ya pangubatan pamigtan hên hinoman ha impiyerno. <sup>16</sup> Agyan alwa bawal kantamoy habaytoy pamangan, ay paan tamon kaén, ta êmén ayn makapaghabi ya nanyag kitamon karawakan.

<sup>17</sup> Ta ya maalagá ha pamanlokop ni Apo Namalyari, ay alwan pamangan o inêmén, noa, ya pamag-in mahonol kana, haka ya pamikakasundo, haka ya

kahiglaan gawan ha kapangyarihan nan Espiritu ni Apo Namalyari. <sup>18</sup> No êmbayro ya pamimiyay tamo ha pamaghuyo kan Apo Jesu-Cristo, ay ikahigla kitamo ni Apo Namalyari, haka galangêñ la kitamo hên kapareho tamo.

<sup>19</sup> Kabay pakikwanan tamon daygêñ ya pangubatan hên pamikakasundo, haka ya makapataniêh hên paniwala hên balang miha. <sup>20</sup> Paan tamon hiraêñ ya paniwala kan Apo Namalyari ya indin na ha patêl tamo ha Panginoon, gawan bat ha pamangan. Ayan alwan bawal kantamo ya hinon pamangan, ay paan tamon kaêñ ya pangubatan hên pamanyag kasalanan hên kaatag.

<sup>21</sup> Paan kitamon mangna hên kêña, o minêñ alak, o manyag hên hinoman ya pangubatan hên mag-in kasalanan hên patêl tamo ha Panginoon. <sup>22</sup> Paan tamon ipamwang ha kaatag ya paniwala tamo ya tungkol ha imbawal, haka a imbawal ni Apo Namalyari, ta hiya haka hikitamo bat ya dapat magmuwang hên habayto. Mahigla kitamo, no manyag kitamo hên alwan halanghang ha konsinsya tamo. <sup>23</sup> Noa, no ampag-alangan kitamo no bawal ya hinoman ya pamangan, ay paan kaêñ ya habayto, ta no kaêñ tamo ya, ay kasalanan ya habayto gawan halanghang ya ha muwang tamoy mangêd. Hinoman ya andaygêñ tamo ya halanghang ha muwang tamoy mangêd ay kasalanan.

## 15

### *Dapat manyag hên ikahigla haka ikakangêd hên kapareho*

<sup>1</sup> Hikitamo ya nananiêh ya paniwala, ay pagtêêhan tamo hilay a pon nananiêh ya paniwala. Paan kitamon manyag bêngat hên ikahigla haka ikakangêd tamo. <sup>2</sup> Ya balang miha ay dapat manyag hên ikahigla haka ikakangêd hên kapareho tamo. Dapat tamon daygêñ ya habayto ta êmén tumaniêh ya paniwala la. <sup>3</sup> Hi Apo Jesu-Cristo man, ay a na dinyag ya ikahigla hên sarili na. Minusmus la ya man, ay dinyag nay ikahigla ni Apo Namalyari. Ta nanad hiyay main habi di ha Kahulatan, “Ha pammusmus la kamo, ay hiko ya minusmus la.”\* <sup>4</sup> Paan yon liwaan ya kakwaan tamon aral, ya kaganawan impahulat ni Apo Namalyari ha Kahulatan hên hato, ta êmén ha pamagtêêh, haka kahiglaan nakêñ ya ubat ha Kahulatan, ay maihundo tamoy pamangênggan tamo ha idigalo na kantamo. <sup>5</sup> Hi Apo Namalyari ya ampangubatan hên pamagtêêh haka pamahiglan nakêñ. Dayi hawpan na kaw hên mamiyay hên main pamikakasundo ha pamanungtung yo ha pamimiyay ni Apo Jesu-Cristo, <sup>6</sup> ta êmén kaw milalamo hên magpuri kan Apo Namalyari, ya Tatang ni Panginoon tamon Jesu-Cristo.

### *Ya ingalo ni Apo Namalyari kanlan alwan Israelita*

<sup>7</sup> No ay-êmén na kaw tinanggap ni Panginoon Jesu-Cristo, ay êmbayro êt ya pamananggap yo ha miha ta miha, ta êmén ya mapuri hi Apo Namalyari.

<sup>8</sup> Hêñ haton lagi, ay nangako hi Apo Namalyari kanlan ninuno naêñ Israelita, ya mamiutoh yan Mâmiligtas, ya Mesias. Ha pamanupad ni Apo Jesu-Cristo bayro ha impangako ni Apo Namalyari, ya mamiutoh yan Mâmiligtas, ay namwangan naêñ ya pêtêg awud hên ampanupad hi Apo Namalyari hên pangako na. <sup>9</sup> Gawan êt bayro ha pamanupad ni Apo Jesu-Cristo, ay naipahlêk ni Apo Namalyari ya ingalo na kanlan alwan Israelita. Haka gawan bayro ha ingalo na, ay ampagpuri hilay na kana. Habaytoy nakatupad ha impahulat ni Apo Namalyari kan Arin David hên hato, ya wani Arin David,

“Puriêñ kata hêñ kalamo ko hilay alwan Israelita,  
haka magkanta kon pamagpuri kamo!”†

<sup>10</sup> Inungkat hila êt di ha impahulat ni Apo Namalyari, ya wanana hulat,

\* **15:3** Awit 69:9. † **15:9** Awit 18:49.

“Maghigla kaw, ya alwan Israelita hên kalamo yo hilay pinili ni Apo Namalyari!”<sup>‡</sup>

<sup>11</sup> Nakahulat êt, ya wana,

“Hikaw ya alwan Israelita, puriên yoy Panginoon!

Hikaw ya atsi ha kaganawan bansa, ay magpuri kaw ngan kana!”<sup>§</sup>

<sup>12</sup> Embayri êt ya impahulat ni Apo Namalyari kan Propeta Isaias, ya tungkol kan Apo Jesu-Cristo, ya wanana hulat,

“Lano, ay lumatêng ya mihay kaapo-apoan ni apo Jesse.

Hiyay iutoh ni Apo Namalyari hên mamaala kanlan alwan Israelita.

Haka taganán muwang la, ya tuparén nay impangako na.”<sup>\*</sup>

<sup>13</sup> An-ihalangin kataw ya pahiglaen na dayi ni Apo Namalyari ya nakêm yo, haka dyanan na kaw hên kapatékbékan ihip gawan ha paniwala yo kana, ta êmén ha kapangyarihan hên Espiritu na, ay mapahanan pon ya kasiguradoan yo, ya matanggap yoy impangako na.

### *Ya panoro ni apostol Pablo kanlan alwan Israelita*

<sup>14</sup> Hikaw ya patêl ko ha Panginoon, angkasigurado ko ya panay mangêd ya andaygên yo. Usto ya angkaintindihan yoy kaptêgan ya ubat kan Apo Namalyari, haka malyari yon toroan ya kapareho yo hên tungkol bayro.

<sup>15</sup> Embayro man, ay di ha hulat ko ay indiretsa koy kaatag ya toro ko, ta êmén a yo maliwaan ya habayto. Diniretsa kataw, gawan ha indin kangkoy tungkulon ni Apo Namalyari, gawan ha ingalo na ya ayn kapantag, <sup>16</sup> ta êmén ko mapaghuyuan hi Apo Jesu-Cristo hên mamipamwang hên Mangangêd ya Habi ya ubat kan Apo Namalyari kanlan alwan Israelita. Hilay mag-in nanad in-átang kan Apo Namalyari ya an-ikahigla na, gawan dinyag hila hên Espiritu na hên banal. <sup>17</sup> Gawan ha pakikimiha ko kan Apo Jesu-Cristo, ay malyari kon ipagmahlay ya pamaghuyo ko kan Apo Namalyari. <sup>18</sup> Ayn akon kaatag ya maipagmahlay, no alwan ya dinyag ni Apo Jesu-Cristo, ta êmén mahagyat hilay alwan Israelita hên humonol kan Apo Namalyari gawan ha hinabi haka dinyag ko, <sup>19</sup> haka gawan ha makapangyarihan ya kapapaêpapah ya nadyag, gawan ha kapangyarihan nan Espiritu ni Apo Namalyari. Kabay ha ay-irin logal ya pinanoroan ko, paubat ha balayan Jerusalem angga ha probinsyan Ilirico, ay impamwang kina ya Mangêd ya Habi tungkol kan Apo Jesu-Cristo. <sup>20</sup> Mimihan bat ya ampakapakikwanan ko. Yabay ya maipamwang ko ya Mangêd ya Habi kanlan a pon nakagilam hên tungkol kan Apo Jesu-Cristo, ta êmén a ko manoro kanlan tinoroan hên kaatag. <sup>21</sup> Ha panoro ko ay angkatupad ya habaytsi ya impahulat ni Apo Namalyari ha Kahulatan,

“Hilay a pon nakagilam hên tungkol kana, ay makagilam hên tungkol kana, haka makamulah hên tungkol kana.”<sup>†</sup>

### *Labay ni apostol Pablo hên maniraw ha balayan Roma*

<sup>22</sup> Gawan habaytoy pamanoro ko ha hino-hinon logal, ay panay angkaabala ya pamaniraw ko bahêñ. <sup>23</sup> Noa, amêhêñ ta nayari ya pamanoro ko bayri, haka gawan nabuyot kinan labay-labay hên maniraw kamoyu, <sup>24</sup> ay magdann ako bahêñ kamoyu ha pammako ko ha bansen Espana. Panga-ubat kon nanugêl bahêñ, ta napi papahigla kitamina, ay pahawop ako kamoyu ha pamanlumagay ko ha bansen Espana. <sup>25</sup> Noa, amêhêñ, ay iatêl ko pon ya pera ya ihawop kanlan pinili ni Apo Namalyari hên mag-in kana ha Jerusalem ya kapareho kon Israelita, <sup>26</sup> ta hilay patêl ha Panginoon ha probinsyan

<sup>‡</sup> **15:10** Deuteronomio 32:43.    <sup>§</sup> **15:11** Awit 117:1.    <sup>\*</sup> **15:12** Isaias 11:10.    <sup>†</sup> **15:21** Isaias 52:15.

Macedonia haka Acaya ya alwan Israelita, ay nahiglan nami-tsipon hên alay ya ihawop ha mangairap ya patêl ha Panginoon bayro ha Jerusalem. <sup>27</sup> Mahiglay nakêm lan nami-tsipon hên alay gawan ha utang nakêm la kanlan patêl ha Panginoon ha Jerusalem. Gawan napakinabangnan lan alwan Israelita ya Mangêd ya Habi ya ubat kanlan kapareho kon Israelita, ay hépat ya pamanawop la. <sup>28</sup> Kabay no naiatêl kinay habaytoy pera, ay magdann kina bahêن kamoyu ha pamanlumagay ko ha España. <sup>29</sup> Haka muwang ko ha pamaniraw ko bahêن, ay taganán mapakinabangnan tamo ya ayn kapantag ya ingalo ni Apo Jesu-Cristo.

<sup>30</sup> Patêl ko ha Panginoon, gawan kan Panginoon tamon Jesu-Cristo, haka gawan ha pamanlugud, ya an-indin kantamo hên Espiritu ni Apo Namalyari, ay ampakihabi ko kamoyu ya boon nakêm yo kon ihalangin, <sup>31</sup> ya illagan ako ni Apo Namalyari kanlan ayn paniwala kan Apo Jesu-Cristo ya atsi ha probinsyan Judea. Haka ipanalangin yo êt ya habaytsi ya pera ya anggêtan ko, ya dayi nakal-an hên tanggapêن lan kapareho tamon pinili ni Apo Namalyari hên mag-in kana ha Jerusalem, <sup>32</sup> ta ha êmbayro, no kalabayan ni Apo Namalyari, ay mahigla ya pamanlumatêng ko bahêن, haka mapahigla yo ko. <sup>33</sup> An-ihalangin kataw kan Apo Namalyari ya pinangubatan hên kapatékbêkan ihip, ya panay na kaw lamoan. Amen.

## 16

### *Pangumusta ni apostol Pablo*

<sup>1</sup> Di ha hulat ko, ay ipabalay ko kamoyu ya mihay babayi ya hi Febe, ya patêl tamo ha Panginoon ya ampanawop kanlan patêl ha Panginoon ya angkapi-tsi-tsipon ha balayan Cencrea. <sup>2</sup> Panlumatêng na bahêن, ay dapat mahiglay nakêm yo yan tanggapêن, ya hépat kantamon pinili ni Apo Namalyari hên mag-in kana. Dayi hawpan yo ya ha kaganawan kailangan na, ta hiya man ay mal-at ya nahawpan nay na, anggan hiko.

<sup>3</sup> Ikumusta yo ko kan Priscila haka Aquila, ya miahawa ya kapareho kon ampaghuyo kan Apo Jesu-Cristo. <sup>4</sup> Nakal-an hilan matsi ta êmên la iligtas ya biyay ko ha kapapotog. Alwan bat hiko ya ampagpahalamat kanla, ta ampagpahalamat êt kanla ya hilay alwan Israelita, ya patêl ha Panginoon ya angkapi-tsi-tsipon ha ay-iri man ya legal. <sup>5</sup> Ikumusta yo ko êt kanlan patêl ha Panginoon ya angkapi-tsi-tsipon ha bali lan Priscila haka Aquila.

Ikumusta yo ko êt kan Epeneto ya anlugarê kon patêl ha Panginoon ya unan naniwala kan Apo Jesu-Cristo ha probinsyan Asia. <sup>6</sup> Ikumusta yo ko êt kan Maria ya mahipêg hên nagpagal hên nanaglap kamoyu. <sup>7</sup> Ikumusta yo ko êt kanlan Andronico haka Junia ya kapareho kon Israelita, ya nakalamo ko ha hukulan. Hilay taganán kilala lan apostol haka hilay nuna kangkon naniwala kan Apo Jesu-Cristo.

<sup>8</sup> Ikumusta yo ko êt kan Ampliato ya anlugarê kon patêl ha Panginoon, <sup>9</sup> haka kan Urbano, ya kapareho kon ampaghuyo kan Apo Jesu-Cristo, haka kan Estaquis, ya anlugarê ko, <sup>10</sup> haka kan Apeles, ya namaptêg hên paniwala na kan Apo Jesu-Cristo, haka ha kalamo na ha bali ni Aristobulo. <sup>11</sup> Ikumusta yo ko êt kan Herodion ya kapareho kon Israelita. Ikumusta yo ko êt kanlan ampaniwala ha Panginoon ya atsi ha bali ni Narciso.

<sup>12</sup> Ikumusta yo ko êt kanlan Trifena haka Trifosa ya mahipêg hên tagahuyo hên Panginoon. Ikumusta yo ko êt kan Persida ya anlugarê kon patêl ya nagpagal ha pamaghuyo ha Panginoon. <sup>13</sup> Ikumusta yo ko êt kan Rufo, ya muwang gawan ha kahipêgan pamaghuyo na ha Panginoon. Ikumusta yo ko êt kanan indo ni Rufo ya nanad sarili kon indo. <sup>14</sup> Ikumusta yo ko êt kanlan

Asincrito, Flegonte, Hermes, Patrobas, Hermas haka kanlan patêl ya kalamo la. <sup>15</sup> Ikumusta yo ko êt kanlan Filologo, Julia, Nero haka ha kapotoh pohêl na ya babayi, haka kan Olimpas haka kanlan kaganawan ya pinili ni Apo Namalyari hên mag-in kana, ya kalamo la.

<sup>16</sup> Mikukumusta kaw ta êmén ipahlék ya pamanlugud yo ha miha ta miha hên nanad patêl ha Panginoon. Angkumustaên kaw lan patêl ha Panginoon ya angkapi-tsi-tsipon ha ay-iri man ya legal.

### *Kaatag ponya utoh*

<sup>17</sup> Hikaw ya patêl ha Panginoon, ampakihabi ko kamoyu ya kaillag kaw kanlan mapaniran pagmimiha yo, ta ya toro la ay halanghang ha ustoy toro ya pinaniwal-an yoy na. Dayuán yo hila. <sup>18</sup> Ta hilay êmbayro ay ahê hên ampaghuyo kan Apo Jesu-Cristo ya Panginoon tamo, ta sarili lan kalabayan tana ya an-ihipêl la. Gawan ha nangaayang ya habi haka pamandayêw ay angkaloko hilay bat makihonol ha hinon habi. <sup>19</sup> Ya pamanhumonol yo kan Apo Jesu-Cristo ay angkabalit-an ha ay-iri man ya legal. Kabay angkahigla ko kamoyu. Êmbayro man, ay labay ko ya mag-in kaw hên magaling ha pamanyag kangêran, haka linaw ha pamanyag karawakan. <sup>20</sup> A mabuyot, ay ipahambut na kamoyu hi Satanas ni Apo Namalyari ya ampam-in kapatêkbêkan ihip.

Ingawan na kaw dayi ni Panginoon tamon Jesu-Cristo.

<sup>21</sup> Angkumustaên na kaw ni Timoteo, ya kalamo ko ha pamipamwang hên Mangangêd ya Habi. Angkumustaên na kaw lan kapareho kon Israelita ya hilan Lucio, Jason haka Sosipatro.

<sup>22</sup> Tercio ya pinamihulatan kon hata hulat ay ampangumusta êt kamoyu gawan hiyay kapareho tamon ampaniwala ha Panginoon.

<sup>23</sup> Angkumustaên na kaw ni Gayo ya kinatulyan ko. Di ha bali na ay angkapi-tsi-tsipon kay ya patêl ha Panginoon. Angkumustaên na kaw ni Erasto, ya ampamaala di ha pera hên balayan, haka ya patêl tamo hi Cuarto.

<sup>24</sup> [Dayi ingawan na kaw ngan ni Panginoon Jesu-Cristo. Amen.]

### *Ya tawlin pamagpuri*

<sup>25</sup> Purién ya hi Apo Namalyari! Ampakataniêh yan paniwala yo gawan ha Mangêd ya Habi ya an-itoro ko ya tungkol kan Apo Jesu-Cristo. Habaytoy a pon impamwang hên haton lagi, <sup>26</sup> noa, impamwang amêhêng gawan ha impahulat ni Apo Namalyari kanlan mámpamwang hên impaihip na kanla hên hato ha Kahulatan. Hiya ya ayn umpisa haka ayn angga, ay namiutoh kantamo hên ipamwang ya habayto ha balang legal, ta êmén main humonol hên maniwala kana ha balang bansa.

<sup>27</sup> Mimiha na ni Apo Namalyari ya magmuwang hên balang hino. Purién ya angga-angga gawan kan Apo Jesu-Cristo! Amen.

## Ya unan hulat ni apostol Pablo kanlan ampaniwala kan Apo Jesu-Cristo ha Corinto

### *Paunan habi*

Bayri ha unan hulat ni apostol Pablo kanlan ampaniwala kan Apo Jesu-Cristo ha balayan Corinto, ay inhulat na ya alwan mangêd ha pamimiyay la, ta labay na ya bayoën la ya habayto. Ya balayan Corinto ay atsi ha lokop hên probinsyan Acaya, ya atsi ha lokop hên bansen Italia, hên habayton panaon ni apostol Pablo. Hilay tawo bayro ay ampaghabi hên habin Griego. Ya balayan Corinto ay andayêwên gawan ha kahipégan haka ha kamwangan lan ampaidi bayro, noa, hadya êt ya karawakan la, haka hino-hinoy paniwala la bayro.

Hadyay potog ni apostol Pablo hên namwangan na ya ayn hilay nan pamikakasundo ya hilay ampaniwala kan Apo Jesu-Cristo bayro, haka gawan karawakan kalabayan lawini ya andaygên lan kaatag. Pinakibatan nay kotang la hên tungkol ha pamiahawa, no hino ya dapat lan daygên lan babayi ya bawo haka ya kaatag ya ayn ahawa, haka ya tungkol ha pamangan ya imparaêp ha ansimbaën lan kaatag, ya rebulto, ya alwan pêtêg ya diyos. Nanulat ya êt hên tungkol ha kagalingan, pamangintindi boy kaatag ya anidigalo nan Espiritu ni Apo Namalyari, haka hên tungkol ha pangabiyay oman ni Panginoon Jesu-Cristo boy hilay ampaniwala kana.

Labay na ya magkamain hilan kangêran ha pamimiyay la, kabay hinulatan na hila.

Kabooan hên pinakalaman

Umpisan hulat 1:1-9

Ayn pamikakasundo ha pami-tsi-tsipon lan ampaniwala 1:10-4:21

Dapat paral-an hilay patêl ha Panginoon, ya ampanyag karawakan 5:1-13

Ya pamiarap hên kaparehon ampaniwala kan Apo Jesu-Cristo hên gêtan ha manungkulon 6:1-11

Ya pamimiyay ya an-ikahigla ni Apo Namalyari 6:12-20

Ya kotang tungkol ha pamag-ahawa 7:1-40

Ya ampanyag hên karawakan kalabayan lawini haka ya pamag-ahawa 5:1-7:40

Hilay ampaniwala haka a ampaniwala kan Apo Jesu-Cristo 8:1-11:1

Biyay lan ampaniwala kan Apo Namalyari haka ya pamagsimba la 11:2-14:40

Ya pangabiyay oman ni Panginoon Jesu-Cristo haka hilay ampaniwala kana 15:1-58

Ya idigalo kanlan ampaniwala ya taga-Judea 16:1-4

Ya pamaglêan ni apostol Pablo haka ya tawlin habi 16:5-24

<sup>1</sup> Hiko hi Pablo, ya pinili ni Apo Jesu-Cristo hên mag-in apostol na, gawan ha kalabayan ni Apo Namalyari. Hi Sostenes, ya patêl tamo ha Panginoon, ay kalamo kon ampangumusta kamoyu.

<sup>2</sup> Anhulatan kataw bahêh ha Corinto, ya pinili ni Apo Namalyari hên mag-in kana. Ha pakikimiha yo kan Apo Jesu-Cristo, ay hikaw ya inorong na hên impapawa êmén manyag kangêran, hên kalamo lan patêl ha Panginoon ya angkapi-tsi-tsipon, ya kapareho tamon ampanalangin kan Panginoon tamon Jesu-Cristo, ha ayri man ya logal.

<sup>3</sup> An-ihalangin naêñ kaw ya dyanan kaw dayi hêñ kapatêkbêkan, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

*Ya ayn kapantag ya ingalo ya ubat kan Apo Jesu-Cristo*

<sup>4</sup> Panay kataw an-ipagpahalamat kan Apo Namalyari, ya ansimbaêñ ko, gawan ha ayn kapantag ya ingalo na kamoyu, ya tinanggap yoy na ha pamakimiha yo kan Apo Jesu-Cristo. <sup>5</sup> An-ipagpahalamat kataw, ta gawan ha pamakimiha yo kana, ay dinyanan na kaw hêñ hino-hino kay na hêñ ya kagalingan, ta êmêñ yo maintindihan haka maipamwang ya tungkol kana. <sup>6</sup> Ya intoro naêñ kamoyu, ya tungkol kan Panginoon Jesu-Cristo, ay kaptêgan ya angkahêlêk ha pamimiyay yo. <sup>7</sup> Kabay a kaw ampagkulang ha hinoman ya an-idin nan Espiritu ni Apo Namalyari, kaban an-êngganan yon mag-orong ya Panginoon tamon Jesu-Cristo. <sup>8</sup> Pataniêhêñ nay nakêm yo, kaban atsi kitamo pon bayri ha luta, êmêñ na kaw malatêng hêñ ayn kapintasan ha allon pamag-orong na. <sup>9</sup> Mapaypaniwal-an hi Apo Namalyari, ya namili kamoyu, ta êmêñ kaw magkamain hêñ pamkilamo ha Anak na, ya hi Panginoon tamon Jesu-Cristo.

*Ya toro kanlan main paniwala kan Apo Jesu-Cristo ya angkapi-papawá ha balayan Corinto*

<sup>10</sup> Hikaw ya patêl ko ha pakikimiha kan Panginoon tamon Jesu-Cristo, am-pakihabi ko kamoyu, ya magmimiha kaw hêñ nakêm, ihip haka pamaghabi, ta êmêñ maalíh ya pami-gagampi yo. <sup>11</sup> Hikaw ya patêl ko, an-iaral koy habayto kamoyu, ta main ubat ha bali ni Cloe, ya namipamwang kangko ya angkapi-huhubak kaw. <sup>12</sup> Êmêñ ya di ya labay kon habiêñ, ya tungkol kamoyu: wanen miha, “Anhonolêñ koy an-itoro ni Pablo.” Wanay na êt hêñ miha, “Kan Apolos ako.” Main kaatag kamoyu ya ampaghabin, “Anhonolêñ koy an-itoro ni apostol Pedro.” Haka main êt hêñ ampaghabin, “Anhonolêñ koy an-itoro ni Apo Jesu-Cristo.” <sup>13</sup> Yarin mapiaatagan hi Apo Jesu-Cristo! Yarin hiko, hi Pablo, ya natsi ha koros ha ikakangêd yo! Yarin binawtismoan kaw ha langan ko! <sup>14</sup> Ampahalamatan ko hi Apo Namalyari ta hi Crispo haka hi Gayon bêngat ya binawtismoan ko bahêñ kamoyu, <sup>15</sup> ta êmêñ ayn makapaghabin binawtismoan kaw ha tungkulan ko. <sup>16</sup> (Main êt awud ya binawtismoan ko, ya hi Estefanas haka ya pamilya na. Ayn kinan muwang ya kaatag ya binawtismoan ko.) <sup>17</sup> Ta a na ko in-utoh ni Apo Jesu-Cristo hêñ mamawtismo, noa, in-utoh na ko hêñ idiretsa kon ipamwang ya Mangêd ya Habi, ya tungkol kana ta êmêñ a maalihan alagá ya pangamatsi ni Apo Jesu-Cristo ha koros.

*Hi Apo Jesu-Cristo, ya kapangyarihan haka ya kamwangan ni Apo Namalyari*

<sup>18</sup> Ya toro tungkol ha pangamatsi ni Apo Jesu-Cristo ha koros ay kamulalaan kanlan mipalako ha impiyerno. Noa, kantamon an-iligtas na, ay habayto ay kapangyarihan ni Apo Namalyari êmêñ miligtas kitamo ha impiyerno. <sup>19</sup> Ta nakahulat ha Kahulatan\* ni Apo Namalyari, ya wana, “Alihêñ koy kamwangan lan manga-talino, ta ipamwang ko ya ayn kapukatan ya habayto.” <sup>20</sup> No êmbayro, ay ay-êmêñ hilay main kamwangan? Ay-êmêñ hilay mánoron Kautuhan ni apo Moises? Ay-êmêñ hilay magaling hêñ magdebate amêhêñ. Intad nay na ni Apo Namalyari hêñ kamulalaan, ya kamwangan lan a ampagpalokop kana.

\* <sup>1:19</sup> Isaias 29:14.

<sup>21</sup> Ta gawan ha kamwangan ni Apo Namalyari, ay a na pinaulayan ya hiya ay makilala, gawan ha talino lan a ampagpalokop kana. Ya labay na ay miligtas kitamo ya ampaniwala, gawan ha pangipamwang hên tungkol kan Apo Jesu-Cristo, agyan habiên lan main kamwangan ya ubat di ha luta, ya kamulalaan, ya toro ya tungkol kan Apo Jesu-Cristo. <sup>22</sup> Hilay kapareho kon Israelita, ay ampanapol hên kapapaêpapah, bayo hila maniwala ya pêtêg ya angkagilaman la hên tungkol ha tinalagá ni Apo Namalyari. Haka hilay alwan Israelita, ay ampanapol hên kamwangan. <sup>23</sup> Embayro man, ay an-ipamwang naêñ ya tungkol kan Apo Jesu-Cristo ya natsi ha koros. Habayto ay kapahuluk ha kapareho kon Israelita. Haka habayto ay an-itad lan kamulalaan, lan alwan Israelita. <sup>24</sup> Noa, kantamon pinili ni Apo Namalyari, hên nag-in kana, Israelita man, o alwa, hi Cristoy kapangyarihan haka kagalingan ni Apo Namalyari. <sup>25</sup> Ta ya kamatsan ni Apo Jesu-Cristo ha koros, ya êndat lan kaatag, ay kamulalaan ni Apo Namalyari, ay magaling pon ha kamwangan hên hinon tawo. Êndat lan kaatag ya kamatsan ni Apo Jesu-Cristo, ay palatandaan hên ayn kapangyarihan hi Apo Namalyari, noa, ya kapangyarihan ya ginamit na, ay makapangyarihan pon ha kapangyarihan hên hinon tawo.

<sup>26</sup> Hikaw ya patêl ko ha Panginoon, pakaihipén tamo no ay-êmén ya pangatawo tamo hên bayo na kitamo pinili ni Apo Namalyari hên humonol kan Apo Jesu-Cristo. Main ungnon bêngat kantamo ya main galing ha hêlêk lan tawo di ha luta. Main ungnon bêngat kantamo ya main tungkul. Haka ungnon bêngat kantamo ya mabandi. <sup>27</sup> Ta pinili na kitamo, ya ayn minuwang ha hêlêk lan a ampagpalokop kan Apo Namalyari, ta êmén mipakarêng-éy hilay ampaghabi ya hila ay main kamwangan. Pinili na kitamoy makapéy ha hêlêk lan ayn paniwala kan Apo Jesu-Cristo, ta êmén mipakarêng-éy hilay ampaghabin makhaw hila. <sup>28</sup> Pinili na kitamoy manga-aypa ha hêlêk lan tawo, hên daygén ayn pukat ya hilay manga-tag-ay ya tungkul ha hêlêk lan a ampagpalokop kan Apo Namalyari. <sup>29</sup> Dinyag nay habayto, ta êmén ayn hinoman ya makapaglambung ha arapan na. <sup>30</sup> Ya pakikimiha tamo kan Apo Jesu-Cristo, ay nangubat kan Apo Namalyari. Hi Apo Jesu-Cristo ya nag-in kamwangan tamo. Gawan kana ay inakbusan kitamo ha pangaipoh tamo ha kasalanan. Gawan êt kana ay hikitamoy an-intad ni Apo Namalyari hên ayn kasalanan, haka a kitaminan manalagá hên manyag kasalanan. <sup>31</sup> Kabay nanad ha nakahulat ha Kahulatan ni Apo Namalyari, “Ya dyag ni Apo Namalyari ya dapat tamon ipagmahlay no main kitamon labay hên ipagmahlay.”†

## 2

### *An-ipamwang ni apostol Pablo hi Apo Jesu-Cristo, ya impako ha koros*

<sup>1</sup> Hikaw ya patêl ko ha Panginoon, hên nanoro ko bahêñ kamoyu hên nangipamwang hên impamwang ni Apo Namalyari kangko, ya tungkol kan Apo Jesu-Cristo, ya a na pon impamwang ha kaatag, ay alwan mangalalê ya pamaghabi ko, haka a ko nanggamit hên kagalingan lan ayn paniwala kan Apo Jesu-Cristo. <sup>2</sup> Ta tinalagá ko ya ayn akon kaatag ya ipamwang kamoyu, no alwan bat hi Apo Jesu-Cristo, haka lalon-laloy na, ya pangamatsi na ha koros. <sup>3</sup> Hêñ haton atsi ko bahêñ, ay alwan makhaw ya nakêm ko haka namêgpêg ako ha hadyay limo ko, ta atsi ha ihip ko ya kayno a ko madyag ya an-ipadyag ni Apo Namalyari kangko. <sup>4</sup> Ha pamaghabi ko haka ha pangipamwang ko, ay a kataw hên inamuyot hên mangangêd ya habi hên

† 1:31 Jeremias 9:24.

tungkol bêngat ha kamwangan hên tawo. Noa, ya pamaghabi ko, haka ya pangipamwang ko, ay kalamo hên kapapaêpapah ya ubat ha kapangyarihan nan Espiritu ni Apo Namalyari.

<sup>5</sup> Kabay ya paniwala yo ay gawan ha kapangyarihan ni Apo Namalyari, alwan gawan ha kamwangan hên tawo bayri ha luta.

### *Ya kamwangan ni Apo Namalyari*

<sup>6</sup> Main kamwangan ya an-ipamwang naêñ kanlan nakataniêh ya nakêm ha paniwala la kan Apo Jesu-Cristo. Habaytoy kamwangan ay alwan kamwangan di ha luta haka alwan kapangyarihan lan ampamaala, ya main anggaan.

<sup>7</sup> Noa, ya kamwangan ya an-ipamwang naêñ ay babayon impamwang ni Apo Namalyari. Binalak na hên haton lagi, ya hikitamoy makapakilamo ha panga-Diyos na ha langit. <sup>8</sup> Habaytoy pamipamwang ay a lan naintindihan lan ampamaala di ha luta, ta no naintindihan la dayi, ay a la ya impapako ha koros hi Apo Jesu-Cristo, ya ayn kapantag, ya Panginoon hên langit. <sup>9</sup> Noa, ya dinyag ni Apo Namalyari ay nanad ha nakahulat ha Kahulatan na, ya wana: “Ayn pon nakahêlêk o nakagilam, haka ayn pon nakaihip, hên in-il-an ni Apo

Namalyari kanlan ampanlugud kana.”\*

<sup>10</sup> Noa, habaytoy impamwang kantamo hên Espiritu ni Apo Namalyari. Hiya ya main kamwangan ha kaganawan kamwangan. Muwang na êt ya mangalalê ya atsi ha ihip ni Apo Namalyari. <sup>11</sup> Ayn hên ampakamwang hên laman nakêm tamо no alwan hikitamon bat. Embayro êt hi Apo Namalyari. Ayn makamwang hên laman nakêm na, no alwan bat ya Espiritu na. <sup>12</sup> Hata Espiritu na, ay tinanggap taminan ampaniwala kan Apo Jesu-Cristo, ta êm  en tamо maintindihan ya kaganawan ya indigalo na kantamo. A tamо tinanggap ya kaihipan ya ubat kanlan a ampagpalokop kan Apo Namalyari.

<sup>13</sup> Kabay an-ipamwang naêñ, ya ubat ha Espiritu ni Apo Namalyari, kamoyun hinapatan nay na. Ya an-ipamwang naêñ ay alwan ubat ha kamwangan h  n tawo. <sup>14</sup> Habaytoy an-ipamwang naêñ ay a maintindihan lan a pon hinapatan h  n Espiritu na, ta êndat la no kamulalaan ya habayto, gawan a la angkaintindihan ya angkaintindihan tamо ya hinapatan ana. <sup>15</sup> Hikitamoy an-akay  n nan Espiritu ni Apo Namalyari, ay ampanimb  gan, no mang  d o alwan mang  d ya kaganawan. Noa, hilay a pon hinapatan h  n Espiritu ni Apo Namalyari, ay a ampakaintindi h  n pangatawo tamо an-akay  n nan Espiritu na. <sup>16</sup> Ta êm  en di ya nakahulat ha Kahulatan ni Apo Namalyari: “Ayn hinoman ya makamwang h  n kaihipan ni Apo Namalyari.

Haka ayn hinoman ya malyarin mam-in payo kana.”†

Noa, hikitamoy hinapatan nan Espiritu ni Apo Namalyari, ay atsi kantamo ya kaihipan, ya nanad kaihipan ni Apo Jesu-Cristo.

## 3

### *Hilay ampaghuyu kan Apo Namalyari*

<sup>1</sup> Pat  l ko ha Panginoon, h  n atsi ko bah  n kamoyu, ay a kataw tinoroan h  n mangalal   ya toro ya nanad ha an-itoro ko kanlan hinapatan Espiritu ni Apo Namalyari. Noa, tinoroan kataw h  n nanad kanlan ampanyag h  n kalabayan lan lawini, ta nanad kaw ha nanaway anak, ya a pon nakataniêh ya nak  m ha paniwala kan Apo Jesu-Cristo. <sup>2</sup> Kabay ya pamanoro ko kamoyu, ay nanad kataw h  n pinain  m h  n gatas, ta nanad kaw h  n a pon maka  kan h  n mant  g ya pamangan. A kataw tinoroan h  n mangalal   ya tungkol kan Apo Namalyari, ta angga am  h  n, ay a yo pon angkaintindihan ya habayto.

\* <sup>2:9</sup> Isaias 64:4. † <sup>2:16</sup> Isaias 40:30.

**3** A yo pon angkaintindihan ya mangalalê ya tungkol kan Apo Namalyari, gawan andaygên yo pon ya kalabayan hên lawini yo. Ta ampag-inakit kaw, haka ampakihubak kaw. Habayto ay ampamaptêg hên dyag yo, ay nanad pon kanlan ayn paniwala kan Apo Jesu-Cristo. **4** Ta wanay miha, “Anhonolên koy an-itoro ni apostol Pablo.” Haka wanay na êt hên miha, “Anhonolên koy toro ni Apolos.” Ha habi yon habayto ay nanad kaw pon kanlan ayn paniwala kan Apo Jesu-Cristo.

**5** Awta? Hino hi Apolos? Haka hino ko? Hikay ya tagahuyon bat ni Apo Namalyari ya anggamitên na, ta êmên kaw maniwala kan Apo Jesu-Cristo. Tsi-tsi-iha kay ampanyag hên an-ipadyag na kannaên ni Apo Namalyari.

**6** Hikoy nanad mihay namitanêm hên bini. Hi Apolos ay nanad hên mihay nanugtug lanêm ha intanêm. Noa, hi Apo Namalyari ya namatubo. **7** Di ha paytoron habi na, ay alwan hiko, ya nanad ampangitanêm, ya dapat dayêwên. Haka alwan hilay ampaytugtug lanêm ha intanêm, ya dapat dayêwên. Noa, hi Apo Namalyari ya ampamatubo, ya dapat puriên. **8** Hiko ya nanad ampangitanêm, haka hila ya nanad ampaytugtug ha intanêm, ay parehon bêngat ha hêlêk ni Apo Namalyari. Hiyay ampam-i kannaên hên tsitsi-ihan úpa naén bayro ha pinapgaganan naén. **9** Hikay ay parehon tagahuyo ni Apo Namalyari, haka hikaw ay nanad ha pananêman na ya an-obraên naén.

Nanad kaw êt hên bali ya an-ipairêng ni Apo Namalyari. **10** Ha ayn kapan>tag ya ingalo ya indigalo ni Apo Namalyari kangko, ay nanad akon mihay magaling ya manyag bali ya namipairêng hên napah-êy ya tarêk, ta hikoy nunan nanoro kamoyu hên tungkol kan Apo Jesu-Cristo. Kaatag etaman ay nanad ampamihundo hên pamanyag bali, ta an-ihundo lay paytoro la kamoyu hên tungkol kana. Noa, kailangan kaillag, ya balang ampamihundo ha pamanyag bali, no ay-êmên ya pamanyag la. **11** Ta mimiha na ni Apo Jesu-Cristo, ya nanad napah-êy ya tarêk hên habain ya bali. Dapat ayn ihagili kana, ta hiyan bat ya makapiligtas kantamo. **12** Hino-hino kay na hên ya anggamitên lan ampamihundo hên manyag bali. Main ampanggamit hên a maulam hên nanad ha ginto, pilak haka mangakamal ya bato. Hilay kaatag ay ampanggamit hên maulam hên nanad ha kayo, yabot, o aray. **13** Ha Allon Pamanukom ni Apo Jesu-Cristo, ay subukên ya dyag hên balang miha ha apoy, ta êmên mamwangan no ay-êmên kakangêd ya. **14** No a maulam ya impairêng bayro ha napah-êy ya tarêk, ay makatanggap hilan úpa, hilay habaytoy in-alimbawa kanlan namipairêng hên habayto. **15** No maulam ya impairêng la, ay a hila makatanggap hên úpa. Maligtas tanay biyay la hên nanad kanlan inligtas ha bali ya angkaulam.

**16** Nanad a yo muwang ya hikaw ay bali ni Apo Namalyari, ya am-paidyanan nan Espiritu na! **17** Ya bali ni Apo Namalyari ay impapawan bat para kana, haka hikaw ay habaytoy bali na. Hilay manyag hên manira kamoyu ay hiraên na.

**18** Alwa yon lokoên ya sarili yo. No êndat yon matalino kaw ha hêlêk lan tawo di ha luta, ya mangêd ay talibatokan yoy habayto, ta êmên kaw magkamain mantêg kamwangan ha hêlêk ni Apo Namalyari, agyan itad la kaw bayton ayn minuwang. **19** Ta ya kamwangan lan a ampagpalokop kana, ay kamulalaan ha hêlêk na. Êmên ya di ya nakahulat ha Kahulatan\* na: “Andakpên ni Apo Namalyari hilay êndat lan manga-talino hila, ta ipahlêk na kanla ya ayn pukat, ya êndat lan kamwangan.” **20** Wana† êt ha Kahulatan na: “Muwang hên Panginoon ya ayn pukat ya an-ihipêñ lan main

\* **3:19** Job 5:13. † **3:20** Awit 24:11.

kamwangan ha hêlêk lan tawo di ha luta.” <sup>21</sup> Kabay paan yon ipaglambung ya pamanhumonol yo ha miha man kannaén, ta naubuh kay hêñ in-utoh kamoyu. Ya balang hino ay kamoyu, <sup>22</sup> mag-in hiko, o hi Apolos, o hi Pedro, o kaatag ya atsi bayri ha luta. Ya biyay yo, ya kamatsan yo, ya allo amêhén, haka ya alloy lumatêng, ay panay ubat kan Apo Namalyari ha ikakangêd yo, <sup>23</sup> gawan ha pakikimiha yo kan Apo Jesu-Cristo, ya main pakikimiha kan Apo Namalyari.

## 4

### *Hilay apostol ni Apo Jesu-Cristo*

<sup>1</sup> Hikay ya apostol ni Apo Jesu-Cristo, ay dapat mamwangan ha paghuyo naén kana. Impatsiwala ni Apo Namalyari kannaén ya toro na, ya a na impamwang hêñ haton lagi. <sup>2</sup> Hilay dinyanan tungkulon, ay dapat mag-in mapaypaniwal-an. <sup>3</sup> Ayn pukat ya laman ihip yo, haka ya laman ihip hêñ kaatag ha pamangotang kangko hêñ tungkol ha paniwala ko. Hiko man, ay a ko angkotangêñ ya sarili ko. <sup>4</sup> Malinis ya nakêm ko. Noa, a ko anhabien ya ayn akon kasalanan. Mimiha na ni Panginoon ya manatol kangko. <sup>5</sup> Kabay paan kaw mangatol. Éngganan yoy pamanatol hêñ Panginoon. Iubuh nan ipamwang ya a pon nailtaw, haka ya kaihipan hêñ balang miha. Bayo dayêwên ni Apo Namalyari ya dapat nan dayêwên.

<sup>6</sup> Hikaw ya patêl ko ha Panginoon, ha ikakangêd yo ay in-alimbawa ko hi Apolos haka ya sarili ko, ta êmén yo maintindihan ya aral ya nakahulat. Ta no honolêñ yoy habayto, ay mag-in pantag ya hêlêk yo kannaén hêñ pareparehon tagahuyo ni Apo Namalyari. <sup>7</sup> Alwa kaw mangêd ha kapareho yo. Ya kaganawan atsi kamoyu, ay ubat kan Apo Namalyari, kabay paan yon ipaglambung ya indigalo kamoyu, ya waringan pinapgagal yo.

<sup>8</sup> Kayno êndat yon atsi kamoyu ya kaganawan ya an-idigalo nan Espiritu ni Apo Namalyari. Kayno êndat yon mangêd kaw kannaén, haka ampamaala kaw na. Mangêd dayi no êmén bayro, ta êmén yo kay makalamo ha pama-maala yo. <sup>9</sup> Ha ihip ko, ay nam-i hi Apo Namalyari kannaén, ya apostol na, hêñ pinakamaaypa ya tungkulon ha hêlêk lan tawo. An-itwad la kay hêñ nanad kanlan ampatsêñ, ya an-ibita pon hêñ ipahlêk ha balang miha, kanlan tawo haka anghel. <sup>10</sup> Gawan ha pamaghuyo naén kan Apo Jesu-Cristo, ay an-itad la kay hêñ mangakapêy ya ayn minúwang. Noa, anhabien yo ya hikaw ay manga-talino, gawan ha pakikimiha yo kan Apo Jesu-Cristo. Hikay etaman, ay alwa kay hêñ makhaw kano. Noa, hikaw ay mangakhaw kano. A la kay anggalangêñ, noa, anggalangêñ la kaw. <sup>11</sup> Paubat hêñ hato angga amêhén hikay ya kit, ay angkablay lonoh haka angkaangan. Ya takop naén ay nikagugulot. Ampatokêñ la kay. Ayn kay hêñ sarilin legal ya paidyanan. <sup>12</sup> Hikay ay ampagpagal ha an-ikabiyay naén. Musmusêñ la kay man ay an-ihalangin naén hila. No ampairapan la kay ay ampagtêéhan naén ya pamairap la kannaén. <sup>13</sup> No anhiraén la kay, ay ampakibatan naén hila hêñ naamêy ya pamaghabi. Paubat hêñ hato angga amêhén ay an-itad la kay hêñ basura, ya intapon.

<sup>14</sup> Hiko ya ampanulat hêñ habaytsi kamoyu, alwan ha an-ipakarêng-êy kataw, noa, antoroan kataw ta hikaw ay nanad kinan anak ya anlugurêñ ko.

<sup>15</sup> Main man hêñ mapon libo ya manoro kamoyu hêñ tungkol kan Panginoon Jesu-Cristo, ay hiko pon êt ya pinagka-toa yo ha paniwala kan Panginoon Jesu-Cristo, ta hiko ya nangitoro kamoyu hêñ Mangêd ya Habi tungkol kana.

<sup>16</sup> Kabay ampakihabi ko kamoyu, ya daygêñ yo kon alimbawa. <sup>17</sup> Kabay ampalakwêñ ko bahêñ hi Timoteo, ya anlugurêñ haka tapat kon anak ha

paniwala, ta êmén na ipaihip kamoyu, ya an-itoro ko. Ha kaganawan legal, ay habaytsi ya an-itoro ko kanlan patêl ha Panginoon ya angkapi-tsi-tsipon.

<sup>18</sup> Main ungro kamoyu bahén, ya ampaglambung, ya êndat la no a ko makalako bahén. <sup>19</sup> No kalabayan hên Panginoon, ay tampol kataw hirawên. Mamwangan kina bayto, no main hilan kapangyarihan hilay ampaglambung, o no angga hilan bat ha bêbêy. <sup>20</sup> Ta no nagpalokop kitamina kan Apo Namalyari, ay mahêlêk ya kapangyarihan na ha biyay tamo hên alwan bat ha habi. <sup>21</sup> Hinoy labay yo? Ha paniraw ko kamoyu, ay mantan akon pangumpah kamoyu, o matoroan kataw hên main pamanlugud haka kaaypaan nakêm?

## 5

### *Dapat paral-an hilay patêl ha Panginoon, ya ampanyag karawakan*

<sup>1</sup> Angkabalalit-an ko ya main kamoyun ampaniwala kan Apo Jesu-Cristo, ya miha ya ampanyag hadyay karawakan kalabayan lawini, ta antakhêñ nay ikalwan ahawa hêñ tatang na. Hila man ya a ampagpalokop kan Apo Namalyari, ay a ampanyag hên êmbayro ya karawakan. <sup>2</sup> Alwan bat habayto ta ampaglambung kaw êt, ya dapat yon ikalungkot, haka ya ampanyag hên êmbayro ya karawakan, ay dapat yon paalihêñ ha pam-i-tsi-tsipon yon ampaniwala kan Apo Jesu-Cristo. <sup>3</sup> Agyan ayn ako bahén, ay atsi kamoyu ya nakêm ko, kabay anhabiên ko ya dapat yon paral-an ya ampanyag hên êmbayro. <sup>4</sup> Kabay ihipêñ yoy aral ko kamoyu, no magtsipon kaw hêñ pihabian ya dapat yon daygêñ. Ha tungkulon haka kapangyarihan ni Panginoon Jesus, ay <sup>5</sup> paulayan yoy nan pairapan ni Satanas ya lawini hêñ ampanyag hêñ habayto, ta êmén na talibatokan ya karawakan dyag na, haka êmén miligtas ya kaêlwa na ha allon pamag-orong ni Panginoon Jesu-Cristo.

<sup>6</sup> Alwan mangêd ya kalangkaan yo. Muwang yoy na ya hata kahabian, ya wana, “Ya pêrad ya pampaalsa ay makapakahlay hêñ kal-atan arina.” Kayno totoêñ lan kaatag ya habaytoy narawak ya dyag, ya nanad ha pampaalsa bayro ha kahabian. <sup>7</sup> Dapat yon alihêñ ya nangarawak, ya nanad pampaalsa, ta dinyag na kaw ni Apo Jesu-Cristo hêñ ayn kasalanan ha arapan ni Apo Namalyari. Dapat yon alihêñ ya habaytoy nangarawak, ta êmén ya pamimiyay yo, ay mag-in nanad bayon puto, ya ayn pampaalsa, ya an-ilamo ha biseron tupa ya in-átang, ya pampaskwa. Gawan natsi yay nay namiligtas kantamo, ya ayn kaatag no alwan hi Apo Jesu-Cristo, ya maialimbawa bayro ha biseron tupa.\* <sup>8</sup> Kabay magpakahigla† kitamoy ampaniwala kan Apo Jesu-Cristo, hêñ mamiyay hêñ ayn kasalanan, haka karawakan, ta dapat panay kangêran haka kaptégan ya pamimiyay tamo.

<sup>9</sup> Hinulatan kataw hêñ hato, ya paan kaw makilamo kanlan mapanyag karawakan kalabayan lawini. <sup>10</sup> Ya labay kon habiên, ay hilay mapanyag karawakan, ya ampaniwala na kan Apo Jesu-Cristo, ya dapat yon dayuán. Kaban atsi kaw di ha luta, ay panay yon matupa hilay mapanyag karawakan, ya a pon ampaniwala kan Apo Jesu-Cristo, ya hilay mapanyag karawakan kalabayan lawini, kapanalarêhan, kapanakawan, haka hilay ampagsimba ha alwan pêtêg ya diyos. Taganán a yo hila madayuán kaban atsi kaw pon di ha luta. <sup>11</sup> Ya labay kon habiên, ay paan kaw makilamo kanlan ampaghabin patêl hila ha Panginoon, noa, mapanyag hilan karawakan kalabayan lawini, karidyaan, kapamusmusan, kapaniraan, kapaglahingan, kapanakawan, o magsimba ha alwan pêtêg ya diyos. Paan kaw makiaêm man kanla.

\* <sup>5:7</sup> Exodus 12:5. † <sup>5:8</sup> (nanad kitamon makipista ha Pistang Pangaligtas ha Egipto) Exodus 13:7, Deuteronomio 16:3.

<sup>12</sup> Ayn kitamon tungkulon hên hatolan hên parusaan hilay a pon ampaniwala kan Apo Jesu-Cristo. Ya dapat tamon lingonê hên parusaan, ay hilay ampaniwalay na, ya mapanyag karawakan, ya ampakilamo ha pami-tsi-tsipon tamon patêl ha Panginoon. <sup>13</sup> Lingonê ni Apo Namalyari hên parusaan hilay a pon ampaniwala kan Apo Jesu-Cristo. Ya dapat yon daygên, ay paalihê yoy habaytoy ampanyag hadyay karawakan kalabayan lawini ha pami-tsi-tsipon yon patêl ha Panginoon.

## 6

### *Ya pamiarap hên kaparehon ampaniwala kan Apo Jesu-Cristo hên gêtan ha manungkulan*

<sup>1</sup> No main kamoyu ya main reklamo laban ha kapareho yon ampaniwala kan Apo Jesu-Cristo, ay dapat marêng-êy hilan mangiarap kanlan mánlingon kaso, ya ayn pon paniwala kan Apo Jesu-Cristo. Dapat palingon hila ha kapareho lan ampaniwala. <sup>2</sup> Yarin a yo muwang ya lano, ay hikitamoy main paniwala kan Apo Jesu-Cristo, ya manatol hên parusaan hilay a ampagpalokop kan Apo Namalyari! No hatolan tamo hilay ayn paniwala kan Apo Jesu-Cristo lano, ay malingon tamo pon kaya ya alwan nabyat ya kaso hên kapareho tamon main paniwala! <sup>3</sup> Lano, hatolan tamo hilay anghel ha langit. No mahatol tamoy anghel, ay malingon tamo pon kaya ya angkalyari hên allo-allo di ha luta amêhê? <sup>4</sup> No main kaw hên kaso ya êmên di, awta an-iarap yo hila kanlan ayn paniwala kan Apo Jesu-Cristo? <sup>5</sup> Kaparêng-êy hên iarap ya kaparehon ampaniwala kan Apo Jesu-Cristo, ha mánlingon kaso, ya ayn paniwala kan Apo Jesu-Cristo. Siguradon main kapareho yo ya kamwang hên mamitoyo hên a angkapikakasundo. <sup>6</sup> Yan an-iarap yoy kapareho yon ampaniwala kan Apo Jesu-Cristo ha mánlingon kaso ya a ampaniwala kan Apo Jesu-Cristo.

<sup>7</sup> Ya pamididikil yo hên miha ta miha ay pamaptêg hên main kaw hên pamagkulang kan Apo Namalyari. Ya mangêd, ay têêhêñ yo tana ya kasalanan la kamoyu. Haka paulayan yo hila tana dayi hên mangwan bandi yo. <sup>8</sup> Yan, hikaw pon êt ya ampaniwala kan Apo Jesu-Cristo, ay ampiapahakitan hên nakêm ha miha ta miha, haka ampangwan bandi hên kapareho yo man ampaniwala. <sup>9</sup> Nanad a yo pon muwang, ya hilay mapanyag karawakan, ay a makapakilamo ha lokop ni Apo Namalyari. Paan yon lokoén ya sarili yo. A makapakilamo ha lokop ni Apo Namalyari, hilay mapanyag karawakan kalabayan lawini, hilay ampagsimba ha alwan pêtêg ya diyos, hilay mamabayi, hilay makilalaki, hilay mâmigagalaw ya parehon lalaki o parehon babayi, <sup>10</sup> hilay mapanakaw, hilay mangatalarêh, hilay mapaglahing, hilay mapammusmus, haka hilay mapanloko. Ayn kanla ya makapakilamo ha lokop ni Apo Namalyari. <sup>11</sup> Main ungno kamoyu ya nanyag hên êmbayro hên hato. Noa, gawan ha kapangyarihan ni Panginoon Jesu-Cristo haka ya Espiritu ni Apo Namalyari, ay hikaw ay nilinisan, hikaw ay pinili ni Apo Namalyari hên mag-in kana, haka hikaw ay an-itad na hên ayn kasalanan.

### *Ya pamimiay ya an-ikahigla ni Apo Namalyari*

<sup>12</sup> Main kamoyu, ya ampaghabin madyag tamina ya hinon a imbawal ni Apo Namalyari. Êmbayro man, ay mal-at ya dyag, ya alwan ha ikakangêd tamo. Haka a ko dapat manyag hên a ko maitêgên, no labay nan itêgên kina ya habayto. Ta no panay kon andaygên ya habayto, ay nanad hikoy nag-in ipoh hên andaygên ko. <sup>13</sup> Pêtêg ya anhabiên yo ya pamangan ay para ha bitoka, haka ya bitoka ay pangipalamnan hên pamangan. Lumatêng ya allo

ay parehon hiraên ni Apo Namalyari. Kabay alwan maalagá ya pamangan. Ya maalagá ay lawini tamo, ta habayto ay alwan para manyag karawakan kalabayan, noa, habayto ay pan-ihuyo ha Panginoon, haka hiya ya mam-in kaganawan kailangan hén habayto. <sup>14</sup> Ya lawini tamo ay biyayênan oman ni Apo Namalyari nanad ha biniyay nan oman hi Panginoon Jesu-Cristo ha kapangyarihan na.

<sup>15</sup> Muwang yoy na ya lawini tamon ampaniwala kan Apo Jesu-Cristo, ay nakalamo ha pinakalawini na. Awta magpapawa kaw pon êt, hén kilamo ha lawini hén babayi ya magatê, ya narawak ya pamimiyay? Paan kaw manyag hén êmbayro! <sup>16</sup> Yarin a yo muwang, ya lalaki ya ampanakêh ha êmbayroy magatê ya babayi, ya narawak ya pamimiyay, ay mag-in mimiha tanay lawini la? Nakahulat ha Kahulatan\* ya impahulat ni Apo Namalyari kan apo Moises, ya êmén di, “Hilay loway ampitakêh ay mimihay lawini.” <sup>17</sup> Noa, ya main pakikimiha kan Apo Jesu-Cristo, ay mimihay espiritu na haka ya Espiritu ni Apo Jesu-Cristo.

<sup>18</sup> An-ipakihabi ko kamoyu, ya paan kaw migalaw ya alwan miahawa. Gawan habaytoy kasalanan ay makarêmek hén sarilin lawini yo hén igit pon ha pamanyag hén kaatag ya kasalanan. <sup>19</sup> Pakaihipén yo, ya lawini yo ay bali hén Espiritu ni Apo Namalyari ya impahapat na kamoyu, haka ampaidi ya kamoyu. Ya lawini yo, ay alway nan kamoyu, ta kanay na. <sup>20</sup> Ta binayaran kaw na hén daya ni Apo Jesu-Cristo, kabay gamitênyoy lawini yo êmén mapuri hi Apo Namalyari.

## 7

### *Ya tungkol ha pamakiahawa*

<sup>1</sup> Amêhêñ, habaytsi ya mahabi ko tungkol ha kotang yo, ha hulat yo kangko, no mangêd ha lalaki ya paan makiahawa. <sup>2</sup> Gawan mal-at bahêñ ya ampigalaw ya alwan miahawa, ay mangêd ya mag-ahawa ya balang miha, ta êmén hila a matukso hén manyag karawakan kalabayan hén lawini. <sup>3</sup> Dapat tuparêñ lan miahawa ya tungkulan la ha ahawa la hén mitakêh. <sup>4</sup> Ya lawini nan babayi ay mag-in kanay nan ahawa nay lalaki, haka ya lawini nan lalaki ay mag-in kanay nan ahawa nay babayi. <sup>5</sup> Alwa yon iimot ya lawini yo ha miha ta miha, angga ha a yo pon napihabian hén ipéptêng yoy ihip yo ha panalangin hén ungnoy allo. Pangayari hén panalangin yo, ay dapat kaw na hén mitakêh, ta êmén a kaw tuksôen ni Satanas hén makilalaki o mamabayi, no a yo mapigil ya kalabayan lawini yo.

<sup>6</sup> Habayto ya hinabi ko kamoyu, ay alwan utoh, noa, payo kon bat. <sup>7</sup> Labay ko dayi ya ayn kaw hén ahawa, hén nanad kangko. Noa, tsi-tsi-pha kitamon biyay ya indigalo ni Apo Namalyari. Hilay kaatag ay pinaigan na hén mag-ahawa, haka hilay kaatag ay pinaigan na hén a mag-ahawa.

<sup>8</sup> Aralan kataw ya ayn êt ahawa, haka hikaw ya kinamatsan ahawa, ya paan kaw mag-ahawa hén nanad kangko ya a nag-ahawa. <sup>9</sup> Noa, no a yo mapigil ya lawini yo, ay mag-ahawa kaw tana. Ta mangêd ya mag-ahawa kaw kanan mag-in magulo ya nakêm yo, hén gawan ha kalabayan lawini yo.

<sup>10-11</sup> Habaytsi ya utoh ha nipag-ahawa, ay ubat ha Panginoon, alwan ubat kangko, ya paan hilan makihiyay ya babayi ha ahawa la. Êmbayro êt kanlan lalaki ya paan lan ihiyay ya ahawa la. Noa, no makihiyay hilay babayi ha ahawa la, ay paan hilan makilamo ha kaatag ya lalaki. Makapakiúmang hila yato ha ahawa la, no labay la.

---

\* **6:16** Genesis 2:24.

<sup>12</sup> Kanlan miahawa ya a pon parehon ampaniwala kan Apo Jesu-Cristo, ay habaytsi ya anhabien ko. Ayn yan hinabi ya tungkol di, hi Panginoon Jesus. No main lalaki, ya ampaniwala kan Apo Jesu-Cristo, ya main ahawa ya ayn pon paniwala kan Apo Jesu-Cristo, ay a la dapat hēn ihiyay ya ahawa la, no labay la pon hēn makilamo kanla, ya babayi. <sup>13</sup> Embayro êt kanlan babayi ya ampaniwalay na kan Apo Jesu-Cristo. No a hila pon ampaniwala kan Apo Jesu-Cristo ya ahawa la, ay a la dapat hēn ihiyay ya ahawa la, no labay lan lalaki hēn mihundo ya pamilamo la. <sup>14</sup> Gawan an-itad ni Apo Namalyari hēn malinis, ya ahawa la, ya ayn pon paniwala kan Apo Jesu-Cristo, gawan ha pakikimiha la ha ahawa lay ampaniwalay na. No alwa dayin pêtêg ya habayto, ay a na hila dayin itad hēn malinis ni Apo Namalyari ya anak la, noa, ha kaptêgan ay an-itad na hilan malinis. <sup>15</sup> Noa, no main a pon ampaniwala kan Apo Jesu-Cristo, ya labay hēn mamihiyay hēn ahawa la, ay paûlayan yo hila. Ha êmbayro, ay pareho hilay nan nanad ayn ahawa. Ta labay ni Apo Namalyari ya ayn gulo ha pamimiyay tamo. <sup>16</sup> Kayno hikaw ya ampaniwalay na kan Apo Jesu-Cristo, ay mag-in dann, ta êmén ya ahawa yo ay maniwala etaman kan Apo Jesu-Cristo.

*Hinoman ya pamimiyay ya naidigalo hēn Panginoon kantamo, ay habaytoy dapat tamon ihundo*

<sup>17</sup> Embayro man, ay hi Panginoon ya namidigalo kantamo hēn tsi-tsi-ihan pamimiyay, haka dapat ihundo tamoy habayto, hinagyat na kitamo man ni Apo Namalyari hēn magpalokop kana. Habayto ya an-iutoh ko ha ay-atoman ya main patêl ha Panginoon ya angkapi-tsi-tsipon. <sup>18</sup> No alimbawa ta nag-in Cristiano hilay kapareho kon Israelita, ya impatuli hēn hato, ay a la dapat ikarêng-êy ya impatuli hila. Embayro etaman, no nag-in Cristiano hilay a pon impatuli, ay paan hilay nan patuli. <sup>19</sup> Maalagá ya pamanhumonol ha utoh ni Apo Namalyari, alwan ya pamanhumonol ha manan ugali naen Israelita, nanad ha patuli. <sup>20</sup> No ay-êmén ya pamimiyay tamo, hēn bayo kitamo nagpalokop kan Apo Jesu-Cristo, ay êmén tana bayro ya pamimiyay tamo amêhêñ ha nagpalokop kitamina kana.

<sup>21</sup> No alimbawa, ta ipoh kitamo hēn nagpalokop kitamo kan Apo Jesu-Cristo, ay ihundo tamo ya pangaipoh tamo. Noa, no labay lan amo tamo, ya ibuhan la kitamo ha pangaipoh, ay makaalih kitamina bayto ha pangaipoh tamo. <sup>22</sup> Ta hilay ipoh ya nagpalokop kan Apo Jesu-Cristo, ay nanad imbuhan, agyan ipoh hila pon hēn tawo. Embayro etaman, hikitamoy alwan ipoh, ya nagpalokop kan Apo Jesu-Cristo, ay mag-in kitamon nanad ipoh ni Apo Jesu-Cristo ta huyuêñ tamo ya. <sup>23</sup> Gawan hikitamoy nagpalokop kan Apo Jesu-Cristo, ay binayaran kitaminan daya ni Apo Jesu-Cristo. Kabay paan kitamon paipoh ha kaatag. <sup>24</sup> Hikaw ya patêl ko ha Panginoon, hinoman ya pamimiyay tamo, hēn a kitamo pon nagpalokop kan Apo Jesu-Cristo, ay kailangan ihundo tamo ya habayto, hēn main pamakilamo kan Apo Namalyari.

*Ya kotang ya tungkol kanlan ayn ahawa*

<sup>25</sup> Amêhêñ, patêl ko ha Panginoon, hikaw etaman ya ayn ahawa, ay ayn akon utoh ya ubat ha Panginoon ya tungkol di. Noa, gawan ha hikoy mihay mapaypaniwal-an hēn Panginoon, ay aralan kataw ha ingalo na. <sup>26</sup> Gawan ha kairapan amêhêñ, ya mangêd, ay paan pon makiahawa. <sup>27</sup> Hikaw ya lalaki, no main kaw hēn ahawa, ay paan yo hilan ihiyay. Haka no ayn kaw êt hēn ahawa, ay paan kaw pon makiahawa. <sup>28</sup> Noa, no makiahawa kaw, ay alwan kasalanan ya habayto. Embayro etaman kanlan dalaga, ay alwan

kasalanan no makiahawa hila. Noa, labay kon midayo kaw ha kairapan ya angkaranasan lan nipag-ahawa.

<sup>29</sup> Emén ya di ya labay kon mamwangan yon patêl ko ha Panginoon: Pérad tanay panaon para huyuén ya Panginoon. Kabay paubat améhén, ay dapat huyuén lan nipag-ahawa ya Panginoon hén nanad kanlan ayn ahawa. <sup>30</sup> Hikaw ya ampaglungkot, ay ihundo yoy pamaghuyo yo ha Panginoon hén ahina ampangabala kamoyu ya an-ikalungkot yo. Hikaw etaman ya main ikahigla, ay ihundo yoy pamaghuyo yo hén ahina ampangabala kamoyu ya an-ikahigla yo. Hikaw ya main hinaliw, ay ihundo yoy pamaghuyo yon nanad hén ayn kamoyu ya hinaliw yo. <sup>31</sup> Paan tamon ubuhén ya hékaw tamo ha hinoman di ha luta. Ta ahina hén mabuyot ya hata luta.

<sup>32</sup> A ko labay ya maabala kaw. Hikitamoy lalaki, ya ayn ahawa, ay maiubuh tamoy hékaw tamo ha ikahigla hén Panginoon. <sup>33</sup> Noa, hilay lalaki, ya main ahawa, ay maubuh ya hékaw la di ha luta, no ay-émén lan mapahigla ya ahawa la, <sup>34</sup> kabay loway an-ihipén la. Embayro êt etaman hilay babayi ya ayn ahawa, haka hilay dalaga pon. Maiubuh lay sarili la ha pamaghuyo ha Panginoon. Noa, ya ampansinén lan babayi ya nag ahawa, ay tungkol di ha luta, ta labay lan mapahigla lay ahawa la.

<sup>35</sup> Anhabién koy habaytsi kamoyu ha ikakangéd yo. Alwan ha an-igpitán kataw. Labay kon bêngat ya ayn makaabala kamoyu ha hêpat haka mangéd ya pamaghuyo yo ha Panginoon.

<sup>36</sup> Tungkol etaman ha mikabaan, ya ampikakono no ihundo lay kasal la, ay habaytsi ya aral ko kanla: no ya ihip hén lalaki ay nakapéptêng ha kabaan na, ay kailangan ihundo lay kasal la. Alwan kasalanan ya habayto, ta napikasundo hilay nan mikasal. <sup>37</sup> Noa, no ayn ha nakém hén lalaki ya makiahawa, ta main yan pamagpigel ha sarili na, ta tinalagá nay na ya a ya makiahawa, ay mangéd ya paan hilay nan makiahawa. <sup>38</sup> Kabay mangéd ya mag-ahawa, noa, ya mangéd pon, ay paan mag-ahawa.

<sup>39</sup> Hilay babayi ya main ahawa, ay dapat makilamo ha ahawa la, kaban angkabiyy hila pon. Noa, no matsi ya ahawa la, ay malyari hilan makiahawa ha hinon labay la, no kapareho lan ampaniwala kan Apo Jesu-Cristo.

<sup>40</sup> Noa, ihip ko, ay mahigla hila no paan hilay nan makiahawan oman. Haka muwang ko, ay atsi kangko etaman ya Espiritu ni Apo Namalyari.

## 8

### *Ya pamangan ya imparaêp ha ansimbaên lan kaatag*

<sup>1</sup> Améhén, patêl ko ha Panginoon, ipalinaw ko kamoyu ya tungkol ha pamangan ya imparaêp ha arapan lan ansimbaên lan kaatag.

Ya balang miha kantamo ay main kamwangan. Ya kamwangan ay mangihobohob kantamo hén mag-in mapagmatag-ay. Noa, no milulugud kitamo, ay ampataniéhén tamoy kapareho tamo. <sup>2</sup> No êndat tamo ya hukad ya kamwangan tamo, ay a tamo awud muwang ya main kitamo pon hén dapat mamwangan. <sup>3</sup> Noa, kilala ni Apo Namalyari ya balang ampanlugud kana.

<sup>4</sup> Améhén, pakibatan koy kotang yoy tungkol ha pamangan ya imparaêp ha ansimbaên lan kaatag, ya rebulto, ya alwan pêtêg ya diyos. Muwang tamo ya ayn hilan pukat, ta mimihay Diyos haka yabay ya hi Apo Namalyari. <sup>5</sup> Malat man ya alwan pêtêg diyos ya anhabién la, ya atsi kano ha langit haka ha luta, ya êndat lan pêtêg hén diyos haka panginoon, ay <sup>6</sup> para kantamon ampaniwala kan Apo Jesu-Cristo, ay mimihay Diyos. Yabay ya hi Apo Namalyari ya Tatang tamo, ya nanyag hén kaganawan. Ampamiyay kitamo ta êmén humuyo haka magsimba kana. Mimihay Panginoon tamo. Yabay ya

hi Apo Jesu-Cristo ya kalamo ni Apo Namalyari hên nanyag hên balang hino, haka hiyay namiúmang kantamo kan Apo Namalyari.

<sup>7</sup> Noa, main ampaniwala kan Apo Jesu-Cristo, ya a ampakaintindi ya mimiha ni Apo Namalyari ya main kapangyarihan, ta sanay hilay na ha alwan pêtêg ya dijos ya mana lan ansimbaên, haka êndat la pon ya main hilan hêkaw. Kabay no mangan hilan imparaêp kanlan habayto, ay ampanyag hilan bawal ha konsinsya la. <sup>8</sup> Noa, alwan pamangan ya makapiúmang kantamo kan Apo Namalyari. Ayn kana no mangan kitamon imparaêp o no a tamon kaên ya habayto.

<sup>9</sup> Noa, kaillag kitamo ta agyan ayn pamangan ya bawal kantamo, ay kayno hikitamoy mag-in pangubatan kasalanan hên kaatag, ya ampag-alangan pon no binawal ni Apo Namalyari ya mangan hên imparaêp ha alwan pêtêg ya dijos. <sup>10</sup> Hikaw ya ampakaintindi ya ayn pamangan ya bawal, ay paan kaw bat hên mangan hên imparaêp ha arapan hên alwan pêtêg ya dijos. Kayno main makahêlêk kamoyu ya ampag-alangan pon no binawal ni Apo Namalyari ya habayto, haka matukso hilan mangan hên bawal ha konsinsya la. <sup>11</sup> Kabay gawan ha pamangintindi yo, ya ayn pamangan ya bawal, ay nakadyag kasalanan hilay patêl tamo ha Panginoon ya ampag-alangan pon no binawal ni Apo Namalyari ya mangan hên imparaêp ha alwan pêtêg ya dijos. Hila man ay patêl tamo ha Panginoon ya inligtas gawan ha kamatsan ni Apo Jesu-Cristo. <sup>12</sup> Gawan nangan kaw hên habayto, ay nakadyag kaw hên kasalanan kanlan ampag-alangan pon, no pêtêg nan binawal ni Apo Namalyari ya mangan hên imparaêp ha alwan pêtêg ya dijos, haka nakadyag kaw hên kasalanan kan Apo Jesu-Cristo. <sup>13</sup> Kabay para kangko, no mikasalanan hilay ampag-alangan pon no binawal ni Apo Namalyari ya mangan hên imparaêp ha alwan pêtêg ya dijos, gawan ha ampanagan akon imparaêp, ay a kina kaên ya habayto, ta êmén hila a mikasalanan ya patêl ko ha Panginoon.

## 9

### *A ya nanggamit hên karapatan na ha pangaapostol na hi apostol Pablo*

<sup>1</sup> Yarin ayn akon karapatan hên manyag hên hinon labay kon daygên, ya a mantan ha kasalanan! Yarin alwa kon mantêg apostol hên Panginoon tamon Jesu-Cristo!\* Yarin a ko ya nahêlêk! Hikaw bay ya tistigos ya hikoy mihay tagahuyo na, ta naniwala kaw kana hên nanoro ko kamoyu. <sup>2</sup> Agyan a la kon ambalayêng apostol hên kaatag, ay ayn ya habayto. Noa, hikaw, ay dapat muwang yoy na, gawan ha pakikimiha yo kan Apo Jesu-Cristo, ya ampamaptêg ha pangaapostol ko.

<sup>3</sup> Habaytsi ya anhabiên ko kanlan ampamintas kangko. <sup>4</sup> Pakaihipêng yo ya tungkul hên mihay apostol. Yarin ayn kay hên karapatan hên pakanêng hên antoroan naêng! <sup>5</sup> No alimbawa ta main akon ahawa ya ampaniwala kan Apo Jesu-Cristo, ay yarin a ko ya magêtan no an-ipamwang ko ya Mangêd ya Habi tungkol kan Apo Jesu-Cristo, nanad kanlan Pedro haka hilay patêl ni Apo Jesu-Cristo, ya anggêtan lay ahawa la ha anlakwêng! <sup>6</sup> Yarin lo-lowâng ni Bernabe ya ayn karapatan hên iubuh ya hêkaw naêng ha panoro hên tungkol kan Apo Jesu-Cristo! <sup>7</sup> Alimbawa, yarin ayn suweldo hilay hundaloh! Yarin a la pakinabangnan hên main tanaman, ya tagêy hên tanaman la! Yarin a pakinabangnan hên ampanayhay hên ayop ya ayop la!

<sup>8</sup> Ya anhabiên ko ay alwan bêngat ugali tamo, noa, nakahulat etaman ha Kautuhan ya impahulat ni Apo Namalyari. <sup>9</sup> Êmén ya di ya nakahulat ha

\* <sup>9:1</sup> Dyag 9:1-7.

Kautuhan ni Apo Namalyari ya impahulat na kan apo Moises: “Alwa yon bawalên ya ayop yo hên mangan no anggamitên yo yan panggiêk.”† Yarin impahulat ni Apo Namalyari ya habaytsi gawan bêngat ha ayop! <sup>10</sup> Alwa! Ta hikay ya apostol, ya in-alimbawa na bayro. Hilay manyarol haka hilay manggapah ay maêngganan lay atag la. <sup>11</sup> Ya panoro naên kamoyu ay nanad ha nangitanêm kay hên habi ni Apo Namalyari ha nakêm yo. Kabay main kay hên karapatan hên mananggap hên kailangan naên ha allo-allo. <sup>12</sup> No hilay kaatag ya ampanoro kamoyu ay main maêngganan, ay hikay pon ya dapat main maêngganan, ta hikay ya nunan nanoro kamoyu.

Noa, a naên ginamit ya karapatan naên ha pangaapostol, ta tinêêh naên tana ya kairapan, ta êmên kay a mag-in habkol ha paniwala yo ha Mangêd ya Habi tungkol kan Apo Jesu-Cristo. <sup>13</sup> Muwang yo bay, ya hilay pari ya ampaghuyo ha Templo, ay andyanan hên pamangan.‡ Haka hilay ampaghuyo ha pamilaman hên an-iátang kan Apo Namalyari, ay andyanan hên atag ha imparaêp. <sup>14</sup> Êmbayro etaman ya pan-iutoh hên Panginoon, ya hilay ampanoro hên Mangangêd ya Habi ya tungkol kan Apo Jesu-Cristo, ay dapat dyanan hên kaganawan kailangan la hên antoroan la.§

<sup>15</sup> Noa, hiko, ay a ko ginamit ya karapatan ko ha pangaapostol. Haka a kataw anhulatan amêhêñ, ta êmêñ kikwan hawop yo. Mangêd ya matsi ko pon, kanan alihêñ kangko ya malyari kon ipagmahlay, ya a ko ampakikwa hên main ako man hên karapatan hên êngganan kamoyu. <sup>16</sup> A ko labay habiêñ ya an-ipagmahlay ko ya panoro kon Mangangêd ya Habi ya tungkol kan Apo Jesu-Cristo, ta anhonolêñ kon bat ya in-utoh kangko. Kaingalo ko no a ko itoro ya hata Mangêd ya Habi, ya tungkol kan Apo Jesu-Cristo. <sup>17</sup> No alimbawa ta hiko ya namili hên mag-in mánoro hên habayto, ay manapol ako bayton suweldo. Noa, ampanoro ko gawan impatsiwala ni Apo Namalyari ya habaytoy pamanoro kangko. <sup>18</sup> Hino bayto ya makwa ko ha pagal ko? Ayn kaatag no alwan ya kahiglaan ko ha panoro hên Mangêd ya Habi tungkol kan Apo Jesu-Cristo, hên ayn suweldo, main ako man karapatan hên mananggap hên suweldo.

<sup>19</sup> Alwa kon ipoh hên hinoman ya tawo. Noa, nanad an-itad kon ipoh ya sarili ko ha balang miha, ta êmêñ ako hên makaakay hên mal-at ya tawo hên maniwala kan Apo Jesu-Cristo. <sup>20</sup> No kalamo ko hilay kapareho kon Israelita, ay ampakilamo ko kanla hên mangêd, ta êmêñ ko hila maiakay kan Apo Jesu-Cristo. Êmbayro man ya ayn kina ha aypa hên Kautuhan ya impahulat ni Apo Namalyari kan apo Moises, ay anhonolêñ ko pon ya habaytoy Kautuhan, ta êmêñ ko hila maiakay hên maniwala kan Apo Jesu-Cristo. <sup>21</sup> Êmbayro etaman, no kalamo ko hilay ayn ha aypa hên Kautuhan ni Apo Namalyari, hilay alwan Israelita, ay ampakilamo ko kanla, ta êmêñ ko hila maiakay kan Apo Jesu-Cristo. Ta no anhonolêñ koy in-utoh ni Apo Jesu-Cristo, ay anhonolêñ ko êt bayto ya Kautuhan ni Apo Namalyari. <sup>22</sup> No kalamo ko hilay alwan nakataniêh ha paniwala kan Apo Jesu-Cristo, ay ampakilamo kon mangêd kanla, ta êmêñ ko mapataniêh ya paniwala la. Ampakilamo kon mangêd ha balang miha, ta êmêñ ko hila maiakay hên maniwala kan Apo Jesu-Cristo, hinoman ya kailangan kon daygên. <sup>23</sup> An-ubuhêñ kon daygên ya habayto, ta êmêñ hiko man ay makapakiatag ha ingalo ya an-idin ni Apo Namalyari gawan ha Mangêd ya Habi tungkol kan Apo Jesu-Cristo.

<sup>24</sup> Muwang tamo ya ha mihay hali-tagtagan ay ampakiwanan lan kal-atan ya primyo, noa, mimihan bêngat ya makakwan habayto. No ipantag tamoy

† 9:9 Deuteronomio 25:4. ‡ 9:13 Deuteronomio 18:1-4. § 9:14 Mateo 10:10, Lucas 10:7, 1 Timoteo 5:17.

pamanhumonol tamo kan Apo Jesu-Cristo ha mihay hali-tagtagan ya main primyo, ay dapat pakikwanan tamon huyuén mangêd hi Apo Namalyari, ta êmén tamo makwa ya primyo. <sup>25</sup> Hilay ampammayu ha hali-tagtagan ay main pamagpigil ha sarili haka allo-allo hila hén ampakapagsanay, ta êmén la makwa ya mihay primyo ya tampol mahira. Noa, ya ampakikwanan tamon anhumonol kan Apo Jesu-Cristo, ay ayn anggaan. <sup>26</sup> Kabay nanad akon mihay ampuwayu ha hali-tagtagan, ya a ampihayahay ha dapat nan danan, ya ayn tégén ha puwayu hén angga ha milatêng ya ha pianggaan. Nanad ako etaman hén mihay boksingero, ya ampakatumbuk hén kailangan nan tumbukén. <sup>27</sup> Main akon pamagpigil ha sarili ko, ta êmén ko a madyag ya karawakan kalabayan hén lawini ko. Ta kayno ubat kon impamwang ha kaatag no ay-êmén makwa ya primyo, ay hiko pon êt ya a makakwa hén habayto.

## 10

### *Paan magsimba ha alwan pêtêg ya diyos*

<sup>1</sup> Patêl ko ha Panginoon, main akon labay hén ipaihip kamoyu ya nalyari hén hato ha ninuno naén hén Israelita, ha panaon ni apo Moises. Ha pamammita lan ubat ha bansan Egipto, ay naubuh hilan hinaninungan ni Apo Namalyari hén lêmm. Haka naubuh hilan namatah ha ambaégen lan Dagat ya Naorit.\* <sup>2</sup> Ya pamangillag kanla hén ginêm, haka ya pamagbatah la ha Dagat ya Naorit ay, yabay ya nanad pangabawtismo la, ta êmén mamwangan ya anhumonol hila kan Moises. <sup>3</sup> Naubuh hilan nangan hén pamangan ya indin ni Apo Namalyari ya ubat ha langit.† <sup>4</sup> Haka naubuh hila etaman hén ninêm ha lanêm ya impaawah na ha bato. Ya alimbawa hén habaytoy bato, ay hi Apo Jesu-Cristo, ya mantêg lan kalamo ya nam-i kanla hén kailangan la.‡ <sup>5</sup> Embayro man, ya kal-atan kanla ay a an-ikahigla ni Apo Namalyari, kabay pinatsi hila, haka ya but-o la, ay nikalat bayro ha kabalah-balahan.§

<sup>6</sup> Habaytoy nalyari kanlan ninuno naén Israelita, ay alimbawa haka aral kantamo. Paan tamon labayén ya karawakan hén alwan nanad kanlan ampanlabay hén alwa lan ikakangéd.\* <sup>7</sup> Paan kitamon magsimba ha alwan pêtêg ya diyos, hén êmén kanlan kaatag ninuno, hén hato. Ta nakahulat ha kahulatan ni Apo Namalyari, ya wana, “Nipammikno hila hén nangan haka ninêm ha nagkaluto, haka nipaghayaw hila êt ha pamagpuri kanan habaytoy alwan pêtêg diyos.”† <sup>8</sup> Paan kitamon manyag hadyay karawakan kalabayan lawini, hén êmén ha dinyag lan kaatag hén hato, gawan dinyag lay habayto, ay pinatsi ya main lowampo boy tatlon libo ha mihay allo.‡ <sup>9</sup> Haka paan tamon subukén ya Panginoon hén êmén ha dinyag lan kaatag hén hato, hén pinatsi hila hén utan.§ <sup>10</sup> Haka paan kitamon nagmulongan hén nanad ha dinyag lan kaatag hén hato. Gawan ha nagmulongan hila ay impapatsi hila ni Apo Namalyari ha Anghel hén kamatsan.\*

<sup>11</sup> Ya nalyari kanlan ninuno naén hén Israelita, ay alimbawa ha bawal hén daygén. Haka inhulat ya habaytsi ta êmén mag-in aral kantamo. Ta hatsi ya ampaidyanan tamoy luta ay main anggaan.

<sup>12</sup> Kabay hinoman kantamo ya ampangihip ya hiyay napah-êy ha paniwala, ay dapat kaillag, ta kayno matukso ya. <sup>13</sup> Ayn panubuk ya nilumatêng

\* **10:1** Exodus 13:21, 22, Exodus 14:22-29. † **10:3** Exodus 16:35. ‡ **10:4** Exodus 17:6; Bilang 20:11.

§ **10:5** Bilang 14:29, 30. \* **10:6** Bilang 11:4. † **10:7** Exodus 32:6. ‡ **10:8** Bilang 25:1-18. § **10:9** Bilang 21:5, 6. \* **10:10** Exodus 12:23; Bilang 14:1-38, 16:41-49.

kantamo ya a pon dinanas hēn kaatag. Tapat hi Apo Namalyari, haka a na paulayan hēn subukan kitamo hēn igit ha matēēh tamo, ta dyanan na kitamo hēn hēkaw ta êmēn mapagtēēhan haka mahambut tamoy habayto.

<sup>14</sup> Kabay anlugurēn kon patēl, paan kaw magsimba ha alwan pêtêg ya diyos. <sup>15</sup> Magaling kaw hēn ampangahip, kabay manimbángan kaw dayi ha anhabien ko no pêtêg ya, o alwa. <sup>16</sup> Alimbawa, no magkomunyon kitamo, ay an-ipagpahalamat tamo ya daya haka lawini ni Apo Jesu-Cristo, ya pinangubatan hēn pakikimiha tamo kana, haka ya pakikimiha tamon ampaniwala kana. Ya puto ay boo, ta êmēn kitamo mapiaaêm.<sup>†</sup> <sup>17</sup> Malat kitamo man, ay nanad mimiha kitamo, gawan ha pakikimiha tamo ha pinakalawini ni Apo Jesu-Cristo, ya nanad ha puto ya boo, ya binih-il, ta êmēn kaganawan tamo ay makaêkan.

<sup>18</sup> Ihipêñ yon kapareho kon Israelita. Main hilan pakikimiha kan Apo Namalyari, no ampangan hilan an-iparaêp la kana.<sup>‡</sup> <sup>19</sup> Ha pamawal ko kamoyu hēn mangan hēn imparaêp ha rebulto hēn alwan pêtêg ya diyos, ay taganán alwan labay habiêñ ya main alagá ya habaytoy imparaêp. Embayro etaman, ay taganán ayn alagá ya alwan pêtêg ya diyos. <sup>20</sup> Ha kaptêgan, ya an-iparaêp lan a ampagpalokop kan Apo Namalyari ha arapan hēn alwan pêtêg ya diyos, ay an-iparaêp la ha nangarawak ya a angkahêlêk, ya kalamo ni Satanas, alwa kan Apo Namalyari. A ko labay ya main kaw hēn pakikimiha kanlan nangarawak ya a angkahêlêk.<sup>§</sup> <sup>21</sup> Bawal hēn magkomunyon ha arapan ni Apo Namalyari no ampangan haka ampinêm kaw hēn imparaêp kanlan nangarawak ya a angkahêlêk. <sup>22</sup> No ihundo yoy pangan yo hēn imparaêp kanlan nangarawak ya a angkahêlêk, ay ampaimonêñ yoy Panginoon. Yarin matakahan tamoy pamarusa ni Apo Namalyari!\*

<sup>23</sup> Main ampaghabin madyag tamo ya hinon labay tamon daygên. Pêtêg ya habayto. Noa, main dyag ya alwan ha ikakangêd hēn kapareho tamo. Haka ya kaatag ya dyag ay makahabkol ha pangakay hēn kapareho tamo hēn maniwala kan Apo Jesu-Cristo.<sup>†</sup> <sup>24</sup> Dapat tamon daygên ya ikakangêd hēn kapareho tamo, alwan bêngat ya ikakangêd hēn sarili tamo.

<sup>25</sup> Malyari tamon kênaêñ ya hinoman ya kêna ya an-ihaliw la ha palengke hēn ayn pag-alangan no imparaêp ha alwan pêtêg ya diyos ya habayto, ta êmêñ a yumagah ya nakêm tamo. <sup>26</sup> Ta ayn bawal ya hinon maêkan, gawan nakahulat ha Kahulatan ni Apo Namalyari, ya wanahulat, “Ya luta haka ya atsi ha luta ay kanan Panginoon.”<sup>‡</sup>

<sup>27</sup> Kabay, no hagyatêñ kitamo hēn mangan ha bali hēn a pon nagpalokop kan Apo Jesu-Cristo, ay mangan kitamo tana, hēn paan kitamon mangotâng no imparaêp ya habayto ha alwan pêtêg ya diyos, ta êmêñ a yumagah ya nakêm tamo. <sup>28</sup> Noa, no main maghabi kantamo, ya imparaêp ya habayto ha alwan pêtêg ya diyos, ay paan kitaminan mangan, ta êmêñ a mag-in habkol kanlan namihumbung kantamo, haka ta êmêñ a yumagah ya nakêm <sup>29</sup> lan habaytoy namihumbung kantamo. Ta hinoy makwa tamo no ipalêkpêk tamoy karapatan tamo hēn mangan hēn habaytoy imparaêp, no êndat lan namihumbung ya kasalanan hēn mangan habayto? <sup>30</sup> Haka hino awud ya makwa tamo, no isadsad tamo hēn mangan hēn naipahalamat tamina kan Apo Namalyari, no pintasan kitamo hēn habaytoy namihumbung kantamo? Ayn bay!

---

<sup>†</sup> **10:16** Mateo 26:26-28, Marcos 14:22-24, Lucas 22:19, 20.    <sup>‡</sup> **10:18** Deuteronomio 14:22-27.  
<sup>§</sup> **10:20** Deuteronomio 32:17.    \* **10:22** Deuteronomio 32:21.    † **10:23** 1 Corinto 6:12.    ‡ **10:26**  
 Awit 24:1.

<sup>31</sup> Ya dapat, ay ha pangan tamo, o pamminêm, o hinoman ya andaygên tamo, ay ihipêñ tamo ya ikapuri ni Apo Namalyari. <sup>32</sup> Dapat ayn mahêlêk ha pamimiyay tamo ya mag-in habkol ha pangakay hêñ hinoman hêñ maniwala kan Apo Jesu-Cristo, Israelita man o alwa. Haka paan kitamon manyag hêñ hinoman ya pangubatan hêñ matukso ya kapareho tamon ampaniwala kana. <sup>33</sup> Daygên yo dayi ya andaygên ko. Ampakikwanan kon mapahigla ya balang miha ha kaganawan dyag ko. A ko antsikapêñ ya sarili kon ikakangêd. Ta antsikapêñ koy ikakangêd hêñ kal-atan, ta êmên ko hila maiakay kan Apo Jesu-Cristo.

## 11

<sup>1</sup> Manungtung kaw kangko hêñ êmên ha panungtung ko kan Apo Jesu-Cristo.\*

### *Ya mihay ugali ha pamagsimba, haka tungkol ha pagpalokop*

<sup>2</sup> Andayêwêñ kataw ta anhonolêñ yoy intoro ko kamoyu ha hinoman ya andaygên yo, haka anhonolêñ yoy ugali ha pamagsimba ya intoro ko kamoyu. <sup>3</sup> Noa, labay kon maintindihan yo, ya balang lalaki, ay atsi ha lokop ni Apo Jesu-Cristo. Hilay babayi etaman, ay atsi ha lokop hêñ ahawa la. Hi Apo Jesu-Cristo etaman ay atsi ha lokop ni Apo Namalyari. <sup>4</sup> Kabay ha pamagsimba tamo, no alimbawa ta main lalaki ya nakabawmbong, ya ampanalangin, o ampamipamwang hêñ an-ipaihip ni Apo Namalyari kana, ay ampam-in dêng-êy kan Apo Jesu-Cristo, ya ampanlokop kana. <sup>5</sup> Haka no alimbawa ta main babayi ya ayn bawmbong ya ampanalangin, o ampamipamwang hêñ an-ipaihip ni Apo Namalyari kana, ay ampam-i yan dêng-êy ha ahawa nay ampanlokop kana. Nanad yan babayi ya kinalbo, ya kaparêng-êy. <sup>6</sup> No main babayi ya a mabay hêñ magbawmbong, ya mangêd, ay pakalbo ya tana. Noa, gawan kaparêng-êy hêñ pakalbo, ay dapat magbawmbong ya.

<sup>7</sup> Hikitamoy lalaki etaman, ay paan magbawmbong, gawan hikitamoy panlêkan hêñ itsura haka tungkulon ni Apo Namalyari. Noa, hilay babayi ay panlêkan hêñ tungkulon hêñ lalaki, kabay dapat magbawmbong hila.† <sup>8</sup> Gawan hêñ dinyag ni Apo Namalyari, ya unan lalaki haka babayi, ya babayi ay dinyag ha tagyang hêñ lalaki. Alwan lalaki ya dinyag ha tagyang hêñ babayi. <sup>9</sup> A na etaman dinyag ni Apo Namalyari ya lalaki ha ikakangêd hêñ babayi. Noa, dinyag nay babayi ha ikakangêd hêñ lalaki.‡ <sup>10</sup> Kabay dapat magbawmbong hilay babayi, kamwangan hêñ hilay ampagpalokop ha ahawa la, ta êmên hila man ya anghel ni Apo Namalyari, ay mamwangan, ya kamwang hilan mam-in galang ya hilay babayi. <sup>11</sup> Embayro man, ha pakikimiha tamo ha Panginoon, ay kailangan lan babayi ya lalaki. Haka kailangan lan lalaki ya babayi. <sup>12</sup> Gawan ya unan babayi ay dinyag man ni Apo Namalyari ha tagyang hêñ lalaki, ay paubat hêñ habayto, ay balang lalaki ay in-anak hêñ babayi. Haka hi Apo Namalyari ya ampangubatan hêñ balang miha haka ya kaganawan dinyag.

<sup>13</sup> Amêhêñ, manimbâgan kaw no hépat ha mihay babayi hêñ magbawmbong no manalangin ya kan Apo Namalyari ha arapan hêñ kaatag! <sup>14</sup> Paubat hêñ haton lagi, ay atsi ha ihip hêñ tawo, ya kaparêng-êy ya lalaki ya makarang ya habot. <sup>15</sup> Noa, ikahampat hêñ babayi, no a na potohêñ ya habot na. Ta indin kana ni Apo Namalyari ya habayto hêñ pinakabawmbong na. <sup>16</sup> No labay yon makihubakan tungkol bayro, ay mahabi ko, ya habaytoy mana

\* **11:1** 1 Corinto 4:16, Filipos 3:17. † **11:7** Genesis 1:26-27. ‡ **11:9** Genesis 2:18-23.

kinan ugali, haka manay nan ugali lan kapareho kon patêl ha Panginoon ya angkapi-tsi-tsipon ha kaatag ya legal.

*Komunyon, ya pamangan ya in-utoh ni Apo Jesu-Cristo  
(Mateo 26:26-29; Marcos 14:22-25; Lucas 22:14-20)*

**17** Ha humonol ya toro, ay a kataw malyarin dayêwên, gawan ya pami-tsi-tsipon yon patêl ha Panginoon, ay alwan ha ikakangêd yo, ta ha ikadawak yo awud ya habain. **18** Una, ay ipamwang ko kamoyu, ya nabalit-an ko, ya ayn kaw hêñ pakikimiha ha pami-tsi-tsipon yon patêl ha Panginoon. Siguro pêtêg ya nabalit-an ko. **19** Kailangan ya habayto, ta êmén mamwangan no hino kamoyu ya mantêg hêñ ampaniwala. **20** Ha pami-tsi-tsipon yon patêl ha Panginoon, ay a yo ya awud an-ihipêñ ha pagkomunyon yo, nanad ha in-utoh na kantamo. **21** Ta ha pangan yo, ay a kaw ampiênggan. Ta main munan mangan haka minêm hêñ main kahibaan, kabay main hêñ ahina kaêkan haka ya kaatag ay ampipaglahing. **22** Yarin ayn kaw hêñ sarilin bali! Dapat mangan haka minêm kaw pon ha bali yo, ta êmén yo a hibaan ya lamo yo ha pami-tsi-tsipon yo hêñ magkomunyon. Dapat yon daygêñ ya habayto, ta êmén yo a musmusêñ hilay ampaniwala kan Apo Jesu-Cristo, haka ta êmén yo a ipakarêng-êy ya mangairap. Hino pon ya mahabi ko kamoyu? Êndat yon dayêwên kataw? A ko!

**23** Intoro kina kamoyu, ya toro, ya tinanggap ko kanan Panginoon Jesus, ya êmén ya di: Ha yabin in-upit hi Panginoon Jesus, kaban ampangan ya hêñ kalamo na hilay labinloway tagahonol na, ay nandampot yan puto, ta **24** impahalamat nay habayto kan Apo Namalyari, haka na pino-potoh, ta wana, “Habaytsi ya lawini ko, ya an-idin ko ha ikakangêd yo. Dapat panay yon daygêñ ya habaytsi, ta êmén yo ko maihipan.” **25** Êmbayro êt, hêñ nayari hilan nangumapon, ay nandampot yan pamminêman ya nag alak, ta wana, “Habaytsi ya daya ko ya nanad pinakapirma hêñ bayoy kahundoan ni Apo Namalyari, haka hilay pinili na hêñ mag-in kana. Inêmén yoy habaytsi, haka balang kaw minêm, ay dapat yo kon panêmtêmén.”<sup>§</sup> Êmbayro ya in-utoh ni Panginoon Jesus.

**26** Ta balang kaw magkomunyon, hêñ angga ha pag-orong na di, ay an-ipamwang yo ya natsi ya hi Panginoon Jesus. **27** Kabay no bat kaw hêñ magkomunyon, hêñ alwan hépat ya an-ihipêñ o ya andaygêñ yo, ay taganán mikasalanan kaw, ta andaygêñ yon ayn alagá ya lawini haka daya na. **28** Kabay bayo kitamon magkomunyon, ay pakapoliahêñ tamoy nakêm tamo hêñ kikwan patawad ha nadyag tamoy kasalanan. **29** Ta no a tamon am-paalagaan ya lawini hêñ Panginoon, ha pamagkomunyon tamo, ay parusaan kitamo. **30** Kabay mal-at kamoyu ya ampaghakit haka ayn higlay lawini, haka main nanan natsi. **31** Noa, no pakapoliahêñ tamoy nakêm tamo, hêñ kikwan patawad ha nadyag tamoy kasalanan, bayo kitamo magkomunyon, ay a kitamo bayton parusaan hêñ Panginoon. **32** Noa, no amparusaan na kitamon Panginoon, ay an-itoynong na kitamo, ta êmén kitamo a mipalako ha impiyerno, hêñ kalamo lan a ampagpalokop kan Apo Namalyari.

**33** Kabay patêl ha Panginoon, no magkomunyon kaw, ay miêênggan kaw. **34** No anlonohêñ kaw, ay dapat mangan kaw pon ha bali yo, bayo kaw mi-tsi-tsipon ta êmén a kaw parusaan ni Apo Namalyari. Ya tungkol ha kaatag ya labay kon ipamwang kamoyu, ay itoro ko tana ha paglatêng ko bahêñ.

## 12

*Ya kagalingan, pamangintindi haka kaatag ya an-idigalo nan Espiritu ni Apo Namalyari*

<sup>1</sup> Amêhén, hikaw ya patêl ko, ay labay kon mamwangan yoy kaptégan ya tungkol ha an-idigalo nan Espiritu ni Apo Namalyari. <sup>2</sup> Muwang yo, ya hèn haton a kaw pon ampagsimba kan Apo Namalyari, ay angkaamuyot kaw hèn magsimba ha rebulto hèn alwan pêtêg ya diyos, ya a kahabi. <sup>3</sup> Kabay an-ipamwang ko kamoyu, ya no atsi kantamo ya Espiritu ni Apo Namalyari, ay a tamo maihumpa hi Apo Jesu-Cristo. Haka ayn makapaghabi, ya hi Apo Jesu-Cristoy Panginoon, no ayn kana ya Espiritu ni Apo Namalyari.

<sup>4</sup> Hino-hino kay na hèn ya galing haka pamangintindi ya an-idigalo hèn Espiritu ni Apo Namalyari kantamo, noa, mimiha na ya ampamidigalon habayto. <sup>5</sup> Ya pamaghuyo tamo ay alwan pare-pareho. Noa, mimihay Panginoon ya ampaghuyuan tamo. <sup>6</sup> Alwan pare-pareho ya andaygên nan kapangyarihan ni Apo Namalyari ha biyay tamo, noa, mimiha na ni Apo Namalyari ya ubatan hèn kapangyarihan ya atsi kantamo. <sup>7</sup> Ya balang miha kantamon ampaniwala kan Apo Jesu-Cristo, ay andyanan nan Espiritu ni Apo Namalyari hèn tsi-tsihan galing ha ikakangêd tamon angkapi-tsitsipon. Habaytsi ya galing ay ampamaptêg hèn atsi kantamo ya Espiritu na. <sup>8</sup> Ya kaatag ay andyanan nan Espiritu hèn galing hèn mamipamwang hèn kamwangan ya ubat kan Apo Namalyari, haka ya kaatag, ay andyanan nan galing hèn mamipamwang hèn tungkol kan Apo Namalyari. <sup>9</sup> Ya kaatag ay andyanan nan makhaw ya paniwala ha kapangyarihan ni Apo Namalyari. Ya kaatag ay andyanan nan kapangyarihan hèn mamaalih hèn hakit. <sup>10</sup> Ya kaatag ay andyanan nan kapangyarihan hèn manyag kapapaêpapah. Ya kaatag ay andyanan nan galing haka hêkaw nakêm hèn mamipamwang hèn an-ipaihip na kanla. Ya kaatag, ay andyanan nan kagalingan hèn manimbângan, ta êmén la mamwangan ya pêtêg ya indigalo na, o no ubat kanlan Satanas. Ya kaatag, ay andyanan nan kagalingan hèn maghabi ha hino-hino kay na hèn ya habi ya a tamo muwang. Haka kanlan kaatag êt, ay andyanan nan pamangintindi, ta êmén la ipamwang ya impahabi na kanlan habaytsi. <sup>11</sup> Mimiha nan Espiritu ni Apo Namalyari ya ampamidigalo hèn habayto. Hiyay ampam-i kantamon balang miha ya ampaniwala kan Apo Jesu-Cristo, hèn tsi-tsihan galing ha labay nan idin.\*

*Ya kabooan lawini*

<sup>12</sup> Ya lawini tamo ay kabooan hèn ulo, mata, bitsih, haka mal-at pon ya pinilalamo. Agyan mal-at ya pinilalamo, ta êmén maboo ya lawini tamo, ay mimihay lawini tamo. Embayro etaman hi Apo Jesu-Cristo, haka hikitamoy kal-atan ya pinakalawini na.† <sup>13</sup> Ta binawtismoan kitamina ha Espiritu ni Apo Namalyari ya mimiha. Kabay nag-in kitamon kalamo ha pinakalawini ni Apo Jesu-Cristo, Israelita kitamo man, o Griego kitamo, o ipoh kitamo man, o alwan ipoh, ta hinapatan kitamon mimihay Espiritu, yabay ya Espiritu ni Apo Namalyari.

<sup>14</sup> Ya pamilalamo tamon patêl ha Panginoon ay maialimbawa ha mihay lawini, ya mal-at ya pinilalamo, ta êmén ya maboo. <sup>15</sup> Alimbawa, no habiêñ hèn bitsih, ya alwa hilan gamêt, kabay alwa hila kanon kalamo ha lawini tamo, ay agyan habiêñ lay habayto, ay taganán nakalamo hila ha lawini tamo. <sup>16</sup> Embayro etaman no alimbawa ta habiêñ hèn têkk ya alwa hilan mata, kabay alwa hila kanon kalamo ha lawini tamo, agyan êmbayro ya habiêñ la, ay

\* **12:11** Roma 12:6-8. † **12:12** Colosas 1:18.

taganán nakalamo hila ha lawini tamo. <sup>17</sup> No panay tanan mata, ya kabooan hén lawini tamo, ay hino bayto ya panggilam tamo? No panay etaman têkk ya kabooan lawini tamo, ay hino awud ya pandaép tamo? <sup>18</sup> Taganán tinalagá ni Apo Namalyari ya kabooan lawini tamo ha mal-at ya pinilamo ta habaytoy kalabayan na. <sup>19</sup> Ay-émén maboo ya lawini tamo no ayn mal-at ya pinilalamo? <sup>20</sup> Ha kaptégan, kal-atan ya pinilamo, ta êmén maboo ya lawini tamo.

<sup>21</sup> Alimbawa ha lawini tamo, ay a na dapat habiên hén mata tamo ha gamêt tamo, ya a hila kailangan. A na etaman dapat habiên hén ulo tamo ha bitsih tamo, ya a na hila kailangan. <sup>22</sup> Ya êndat tamon alwan maalagá ha lawini tamo, ay habaytoy taganán kailangan. <sup>23</sup> Ya an-ihipén tamo, ya alwan maalagá ha lawini tamo, ay habayto ya anhayhayén tamon mangêd. Haka ya an-ikaréng-éy ha lawini tamo, ay antagpénan tamo. <sup>24</sup> Noa, ya mangahampat ha lawini tamo, ay a tamon kailangan hén tagpénan. Binoo ni Apo Namalyari ya lawini tamo, ta êmén madyanan pamandayéw ya kailangan dayéwén. <sup>25</sup> Kabay dapat main pakikimiha ya kabooan lawini tamo. Haka dapat miyahawop hilay pinilalamo. <sup>26</sup> No angkairapan ya miha, ay angkairapan ya balang miha. No andayéwén ya miha, ay dapat mag-in ikahigla hén balang miha ya habayto.

<sup>27</sup> Ya labay habiên hén habayto, ay hikitamo ya ampaniwala kan Apo Jesu-Cristo, ay nanad kabooan hén pinakalawini na, haka ya balang miha kantamo ay kalamo ha pinakalawini na. <sup>28</sup> Kantamon ampaniwala kana, ay tinalagá ni Apo Namalyari hén dyanan kitamon tsi-tsihan galing ya ubat ha Espiritu na. Una, main kantamo ya dinyanan nan galing hén mag-in apostol na. Ikalwa, main kantamo ya dinyanan nan galing hén mag-in máripamwang hén an-ipaihip na kanla. Ikatlo, ay main kantamo ya dinyanan nan galing hén mag-in mónoró hén habi na. Bayo main êt kantamo ya dinyanan nan galing hén manyag kapapaépapah, haka kaatag ay dinyanan nan galing hén mamaalíh hén hakit. Main kantamo ya dinyanan nan galing hén manawop ha kapareho la. Main kantamo ya dinyanan nan galing hén mamaala, haka main kantamo ya dinyanan nan galing hén maghabi ha kaatag ya habi ya a la muwang.<sup>‡</sup> <sup>29</sup> Hikitamo ya ampaniwala kan Apo Jesu-Cristo, ay alwan kaganawan apostol, alwan kaganawan hén máripamwang hén an-ipaihip ni Apo Namalyari kantamo, alwan kaganawan hén mónoró hén habi na, alwan kaganawan hén main kapangyarihan hén manyag kapapaépapah, <sup>30</sup> alwan kaganawan hén main kapangyarihan hén mamaalíh hén hakit, alwan kaganawan hén main galing hén maghabi ha kaatag ya habi ya a tamo muwang, haka alwan kaganawan hén main galing hén ipamulah ya labay habiên hén anhabiên la ha habi ya a la muwang. <sup>31</sup> Kabay pakikwanan tamoy maalagáy galing ya ikakangéd tamo, haka ya ikakangéd hén kapareho tamo.

Améhén, toroan kataw hén tungkol ha mangêd pon, ha hinoman ya galing ya indin kantamo.

## 13

### *Ya pamanlugud*

<sup>1</sup> Makapaghabí kitamo man hén habi hén kaatag, haka habi lan anghel, no ayn kitamon panlugud ha kapareho tamo, ay nanad kitamon tonoy ya bat hén ampagtonoy hén ayn labay habiên. <sup>2</sup> Malyarin main kitamon galing, ya ubat ha Espiritu ni Apo Namalyari, hén nanad ha pamipamwang hén an-ipaihip na kantamo. Malyari etaman hén main kitamon pamangintindi ha

<sup>‡</sup> **12:28** Efeso 4:11.

kaganawan a pon impamwang. Malyari êt hên main kitamon kaganawan kamwangan ya mamwangan lan tawo ya tungkol kan Apo Namalyari. Haka malyari ya main kitamon paniwala ya makhaw ya makapiálih hên tawtgug. Noa, no ayn kitamon pamanlugud ha kapareho tamo, ay ayn pukat ya habayto.\* <sup>3</sup> Idigalo tamo man ya kaganawan pibandian tamo ha mangairap, haka paulayan tamo man hên ulamén† ya lawini tamo, no ayn kitamon pamanlugud ha kapareho tamo, ay a tamo mapakinabangnan ya dinyag tamo.

<sup>4</sup> No mapanlugud kitamo, ay mapagtêeh kitamo, haka maingaloên kitamo. Alwa kitamo maridya, mapaglalang, o mapagmatag-ay. <sup>5</sup> No mapanlugud kitamo, ay alwa kitamon mapammusmus, maimot, mahuhulukên, o mapagtanêm hên hakit nakêm. <sup>6</sup> No mapanlugud kitamo, ay a tamo an-ikahigla ya karawakan. Noa, an-ikahigla tamoy kaptégan. <sup>7</sup> No mapanlugud kitamo, ay matêéhan tamo ya hinon angkalyari, haka a maalih ya tsiwala tamo ha kapareho tamo, a etaman maalih ya pamangênggan tamon kangêran, haka matagalanan tamo ya hinoman.

<sup>8</sup> Ya galing ya an-idigalo nan Espiritu ni Apo Namalyari, ya nanad ha pamipamwang hên an-ipaihip ni Apo Namalyari kantamo, ay main angga. Êmbayro êt ya galing hên mag-habi ha kaatag ya habi, ya a tamo muwang, ay main anggaan. Haka ya pamipamwang hên tungkol kana, ay main angga etaman. Noa, ya pamanlugud ay ayn angga, <sup>9</sup> ta ya kamwangan, ya tungkol kana, haka ya pamipamwang hên an-ipaihip na kantamo, ay kulang pon. <sup>10</sup> Noa, ha pamanlumatêng nan ganap ay maalih ya main pamagkulang.

<sup>11</sup> Alimbawa, hên anak kitamo pon, ya ihip, pamangintindi, haka ya habi tamo ay nanad kanlan anak. Noa, gawan toa kitamina, ay inalih tamina ya nanad ha pandaygên lan anak. <sup>12</sup> Êmbayro êt kantamon ampaniwala kan Apo Jesu-Cristo. Ya kamwangan tamo, ya tungkol kan Apo Namalyari amêhên, ay kulang pon, nanad ha pamanlêk ha solamin ya naburarêg. Noa, lano, lumatêng ya allo, ay mahêlêk tamina hi Apo Namalyari, hên arap-arapan, hên ayn kulang, ta makilala tamo ya, hên nanad ha pagkakilala na kantamo.

<sup>13</sup> Kabay hata tatlo ay ayn angga. Una, ya paniwala tamo kana, ikalwa ya pamangênggan tamo ha pamag-orong na hên mantan kantamo ha am-paidyanan na ha langit, haka ikatlo, ya pamilulugud tamo. Noa, ya pinaka-mangêd kanlan habaytoy tatlo ay yabay ya pamilulugud.

## 14

### *Ya kaatag pon ya tungkol ha an-idigalo nan Espiritu ni Apo Namalyari*

<sup>1</sup> Mangêd ya pakikwanan tamon mag-in malugud. Pakaêngganan tamo êt ya an-idigalo nan Espiritu ni Apo Namalyari, lalon-laloy na, ya galing hên mamipamwang hên an-ipaihip na kantamo. <sup>2</sup> No ampaghabi kitamo ha kaatag ya habi, ya a tamo muwang, ay hi Apo Namalyarin bêngat ya kahabi tamo, gawan ayn kaatag ya makamulah ha anhabiên tamo ha kapangyarihan hên Espiritu na. <sup>3</sup> Noa, no mamipamwang kitamo hên an-ipaihip ni Apo Namalyari kantamo, ay mag-in nananiêh ya paniwala lan ampanggilam, maaralan hila, haka mahawpan hila hên magtêeh ha kairapan. <sup>4</sup> No ampaghabi kitamo ha habi, ya a tamo muwang, ay sarili tamon paniwalan bêngat ya ampataniêhên tamo. Noa, no mamipamwang kitamo hên an-ipaihip ni Apo Namalyari kantamo, ay mapataniêh ya paniwala lan patêl ha Panginoon ya angkapi-tsi-tsipon. <sup>5</sup> Labay ko dayin makapaghabi

\* <sup>13:2</sup> Mateo 17:20, 21.21; Marcos 11:23. † <sup>13:3</sup> o êmên main kitamon maipaglambung.

kitamon kaganawan ha habi, ya a tamo muwang. Noa, mangêd pon ya mamipamwang kitamo hên an-ipaihip ni Apo Namalyari kantamo. Gawan maalagá pon ya habayto, kanan maghabi kitamo ha kaatag ya habi, ya a tamo muwang, maliban ha main mamipamulah hên anhabién tamo, ta êmén mapataniêh ya paniwala lan patêl ha Panginoon ya angkapi-tsi-tsipon.

<sup>6</sup> Hikaw ya patêl ko ha Panginoon, no alimbawa ta maniraw ko bahén, ta maghabi ha habi, ya a tamo muwang, ay a yon mapakinabangnan ya habayto. Noa, no mamitoro ko hên habi ni Apo Namalyari, o mamipamwang kamoyu hên an-ipaihip na kangko, ay mahawpan kaw. <sup>7</sup> Embayro êt ha bulongudyong o ha gitara man ya antsig-tsigen, ya alwan usto ya pangatono, ay hinoy mapakinabangnan tamo, no a tamo maintindihan ya habayto!

<sup>8</sup> Haka nanad etaman ha tambuyok ya ampatonoyén, no umpisan labanan, no alwan usto ya tonoy, ay ayn makapaglêan hên makilaban! <sup>9</sup> Embayro etaman ya pamaghabi tamo ha habi ya a tamo muwang, ay ayn makamulah hên anhabién tamo, haka ayn bayton kapukatan ya habi tamo. <sup>10</sup> Mal-at ya habi bayri ha luta, haka ya balang miha ay main labay habiên. <sup>11</sup> Noa, no a tamo angkaintindihan ya anhabién hên kahabi tamo, ay pareho kitamo hên a mapikakaintindi nanad kitamon dayuhan, ya ubat ha marayo ya bansa. <sup>12</sup> Gawan ha labay-labay yon digaloan kaw nan Espiritu ni Apo Namalyari, ya una ya dapat yon pakikwanan, ay mapataniêh ya paniwala hên balang miha kamoyun patêl ha Panginoon, ya angkapi-tsi-tsipon.

<sup>13</sup> Ha êmbayro, ay hikitamo ya ampaghabi ha kaatag ya habi, ya a tamo muwang, ay kailangan manalangin kitamo etaman, ya maipamwang tamo dayi ya anhabién tamo. <sup>14</sup> Ta no ampanalangin kitamo ha habi ya a tamo muwang, ay ampanalangin ya espiritu tamo, noa, a mapakinabangnan hên ihip tamo ya panalangin tamo. <sup>15</sup> Hino bayto ya dapat tamon daygén? Ya daygén tamo ay manalangin kitamo, haka magkanta kitamo ha espiritu tamo ha kaatag ya habi. Dapat kitamo êt hên manalangin, haka magkanta ha mantêg habi tamo, hên gamitén ya ihip tamo. <sup>16</sup> Ha pagpahalamat tamon panalangin kan Apo Namalyari, ha kaatag ya habi, ayn makapaghabin, “Amen.” gawan a la angkaintindihan ya anhabién hên espiritu tamo. <sup>17</sup> Agyan ampaghahalamat kitamo ha kaatag ya habi, ay habayto ay a mapakinabangnan hên kapareho tamo, ha pamataniêh hên paniwala la no a la angkaintindihan.

<sup>18</sup> Ampahalamatan ko hi Apo Namalyari, ta ampakapaghabi ko ha habi, ya a ko muwang, hên igit kamoyun kaganawan. <sup>19</sup> Noa, ha pami-tsi-tsipon tamon patêl ha Panginoon, ay mangêd pon, ya maghabi kitamon li-limay habi ya angkaintindihan, ya makab-in aral, kanan libo-liboy habi ya a angkaintindihan. <sup>20</sup> Patêl ko ha Panginoon, ha tungkol di, ay paan kaw mag-in kaihip hên anak. Malyari yon tuwarén ya anak, ya ayn muwang ha karawakan. Noa, ya pamangihip yon tungkol di, ay dapat mag-in nanad ihip lan manakêm. <sup>21</sup> Emén ya di ya nakahulat ha Kahulatan ya impahulat ni Apo Namalyari, “Mamiutoh akon tawo ya ubat ha kaatag ya bansa, ya ampaghabi hên kaatag ya habi, ta êmén manggilam hilay Israelita. Noa, agyan iutoh ko hilay maghabi kanla ha kaatag ya habi, ay a hila manggilam.”\* <sup>22</sup> Di ha kahulatan ay mamwangan tamo ya galing hên maghabi ha habi, ya a tamo muwang, ay indin ni Apo Namalyari êmén mamwangan lan a pon ampaniwala kana, ya kapangyarihan na. Noa, ya galing hên mamipamwang hên anipaihip na kantamo, ay para mapataniêh ya paniwala tamon ampaniwalay na.

\* **14:21** Isaias 28:11-12.

<sup>23</sup> Kabay ha pami-tsi-tsipon tamon patêl ha Panginoon, ay dapat main mamipamulah hên anhabiên tamo ha habi ya a tamo muwang. Ta kayno main maniraw, ya main kalamoy a pon ampaniwala kan Apo Jesu-Cristo, haka no ayn mamipamulah, ta bat kitamon mipaghabi ha habi ya a tamo muwang, ay habiên la tana ya murit kitamo. <sup>24</sup> Noa, no ha pami-tsi-tsipon tamo, ay an-ipamwang tamo ha mantêg habi tamo ya an-ipaihip ni Apo Namalyari kantamo, ay mamwangan lan habaytoy naniraw ya makasalanan hila. <sup>25</sup> Mahawangan bayto ya kaihipan la, haka hila mandoko hên kikwan patawad ha nadyag lay kasalanan, haka la simbaên hi Apo Namalyari, ya wanla, “Pêtêg awud, hi Apo Namalyari ay atsi di hên kalamo yo.”

*Dapat alwan magulo ya pami-tsi-tsipon lan ampaniwala kan Apo Jesu-Cristo*

<sup>26</sup> Patêl ko ha Panginoon, labay kon habiên, ya no mi-tsi-tsipon kitamo hên magsimba kan Apo Namalyari, ay dapat ya kaganawan dyag tamo, ay matataniêh hên paniwala lan angkapi-tsi-tsipon. Main magkanta, main manoro, main mampamwang hên habi ni Apo Namalyari, main maghabí ha habi, ya a tamo muwang, haka main etaman mamipamulah hên hinabi lan habayto. <sup>27</sup> No main maghabí ha habi ya a na muwang, ay hukad ya lowa o tatlo ya mibanoh, haka kailangan main mamipamulah hên hinabi lan habayto. <sup>28</sup> No ayn bayro ya mamipamulah hên hinabi la, ay paan hilan maghabí ha pami-tsi-tsipon lan patêl ha Panginoon, ta maghabí hila tana kan Apo Namalyari ha nakêm la. <sup>29</sup> Tungkol etaman kanlan mampamwang hên an-ipaihip ni Apo Namalyari kanla, ay lowa o tatlo etaman ya mibanoh, ta dapat manimbângan lan kaatag ya nagilam la, no ubat kan Apo Namalyari, ya habayto o alwa. <sup>30</sup> No main kaatag pon ya main labay hên ipamwang, ya ubat etaman kan Apo Namalyari, kaban ampaghabi ya miha, ay dapat tunggên pon ya hatoy ampaghabi, ta êmén ya makahabi ya miha. <sup>31</sup> Hikitamo ya angkapi-tsi-tsipon ay maubuh hên malyarin miha-mihan mamipamwang hên an-ipaihip ni Apo Namalyari kantamo, ta êmén maubuh kitamon matoroan, ta êmén mapataniêh ya paniwala tamo. <sup>32</sup> Hila man ya mampamwang hên an-ipaihip ni Apo Namalyari kanla, ya dinyanan nan dapat habiên, ay kailangan mibabanoh hên mag-habi. <sup>33</sup> Taganán a na labay ya main gulo ha pami-tsi-tsipon tamon patêl ha Panginoon.

Ya dapat ugaliên di, ay nanad ha andaygên ha balang pami-tsi-tsipon lan pinili ni Apo Namalyari hên mag-in kana. <sup>34</sup> Kailangan patêkbék hilay babayi. Bawal kanlan maghabí ha pami-tsi-tsipon, ta nakahulat ha Kautuhan naén hên Israelita, ya bawal kanlan babayi hên mamaala. <sup>35</sup> No main hilan labay mamwangan, ay dapat kotangên lay ahawa la, no lumatêng hila ha bali la. Kaparêng-êy hên maghabí ya babayi ha lalêng pagtsiponan ha oras hên pamagsimba.

<sup>36</sup> Yarin ubat kamoyu ya habi ni Apo Namalyari? O êndat yon hikaw bêngat ya ampakamwang hên tungkol kan Apo Namalyari? <sup>37</sup> Hinoman ya ampangihip, ya hila ay mampamwang hên an-ipaihip ni Apo Namalyari kanla, haka hinoman ya ampangihip ya hila ay an-akayêh hên Espiritu ni Apo Namalyari, ay dapat lan balayêh ya habaytsi ya hulat ko kamoyu, ay pêtêg ya utoh ni Apo Namalyari. <sup>38</sup> Ya a ampamansin hên habaytsi, ay alwa yon pansinêh.

<sup>39</sup> Kabay, patêl ha Panginoon, hangarêh yo ya mag-in mampamwang hên an-ipaihip ni Apo Namalyari kamoyu, noa, paan yo hilan bawalêh ya ampaghabi ha kaatag ya habi, ya a tamo muwang. <sup>40</sup> Dapat hépat haka ayn gulo ya kaganawan dyag yo ha pami-tsi-tsipon yo.

## 15

### *Ya panga-biyay oman ni Apo Jesu-Cristo*

<sup>1</sup> Hikaw ya patêl ko ha Panginoon, amêhén, ay an-ipaihip ko kamoyu ya Mangêd ya Habi ya impamwang ko kamoyu, ya ginilam yo, ya ampaniwal-an yoy na. <sup>2</sup> Habaytsi ya Mangêd ya Habi tungkol kan Apo Jesu-Cristo, ya impamwang ko kamoyu, ay makapiligtas kantamo ha parusa, no ihundo tamoy mantêg ya paniwala tamo.

<sup>3</sup> Habaytsi ya intoro ko kamoyu, ya impamwang kangko, ay maalagá ha kaganawan intoro ko. Yabay ya, hi Apo Jesu-Cristo ay natsi ta êmén mapatawad ya kasalanan tamo. Nalyari ya habayto hên nanad ha nakahulat ha Kahulatan ya impahulat ni Apo Namalyari.\* <sup>4</sup> In-ilbêng hi Apo Jesu-Cristo, haka ha ikatlon allo, ay biniyay yan oman hên nanad ha nakahulat etaman ha Kahulatan ya impahulat ni Apo Namalyari.† <sup>5</sup> Nagpahlék ya kan Pedro, bayo nagpahlék ya etaman kanlan kaatag ya tagahonol na, hên kalamo la hi Pedro.‡ <sup>6</sup> Bayo nagpahlék ya etaman ha maigit pon ha liman gatoh ya patêl ha Panginoon ya naka-tsipon. Mal-at kanla, ay angkabiyay pon. Noa, ya kaatag kanla ay nunay na ha ikalwan biyay. <sup>7</sup> Nagpahlék ya êt kan Santiago, bayo nagpahlék yay na êt oman kanlan apostol na, hên naka-tsipon hilangan.

<sup>8</sup> Hiko etaman, ay pinagpahlékan nay na êt ha katatawlian, hên a ko an-ihipén.§ <sup>9</sup> Anhabién koy habaytsi ta ha kaganawan apostol, ay hikoy pinaka-maaypa, haka a ko dayin baégen apostol gawan pinairapan ko hilay ampaniwalan kan Apo Jesu-Cristo.\* <sup>10</sup> Embayro man, gawan ha ayn kapantag ya ingalo ni Apo Namalyari, ay hikoy nag-in apostol. A nahayang ya ingalo na kangko. Ta gawan habaytoy ingalo na, ay nagpagal ako hên igit pon kanlan kaatag ya apostol, ha pamipamwang hên tungkol kan Apo Jesu-Cristo gawan ha ingalo na kangko, alwan gawan ha sarili kon hêkaw. <sup>11</sup> Ubat kanla man o ubat kangko, ay pareho kay hên ampamipamwang hên tungkol kan Apo Jesu-Cristo ya pinaniwal-an yo.

### *Ya tungkol ha pangoman pangabiyay lan natsi*

<sup>12</sup> Amêhén, gawan ha an-ipamwang ya hi Cristoy biniyay oman, ay dapat ayn kantamon maghabin a biyayén oman ya hilay natsi. <sup>13</sup> Ta no a hila biyayén oman, ay labay habién, a biniyay oman hi Apo Jesu-Cristo. <sup>14</sup> Ta no a ya biniyay oman hi Apo Jesu-Cristo, ay ayn kay hên ipamwang kamoyu, haka ayn kaw hên paniwal-an. <sup>15</sup> No a ya biniyay oman hi Apo Jesu-Cristo, ay ampaglaram kay hên tungkol kan Apo Namalyari, ta hinabi naén ya biniyay nan oman hi Apo Jesu-Cristo. Noa, no pêtêg ya a biyayén oman ya hilay natsi, ay a na bayto biniyay oman hi Apo Jesu-Cristo. <sup>16</sup> Ta no a biyayén ya hilay natsi, ay a ya biniyay oman hi Apo Jesu-Cristo. <sup>17</sup> Haka no a ya biniyay oman hi Apo Jesu-Cristo, ay alwan pêtêg ya paniwala tamo, haka a kitamo bayto pinatawad ha kasalanan tamo. <sup>18</sup> No a ya biniyay oman hi Apo Jesu-Cristo, ay labay habién a pinatawad ya kasalanan lan natsi ya naniwala kana, ta nipalako hila ha impiyerno. <sup>19</sup> No ya pamangénggan tamo kan Apo Jesu-Cristo, ay para din bat ha biyay tamo ha luta, ay taganán ayn kapaingalo no alwan hikitamo.

<sup>20</sup> Noa, ha kaptégan, ay biniyay oman hi Apo Jesu-Cristo. Kabay muwang tamo ya biyayén oman ya hilay natsi. <sup>21</sup> No ay-êmén nagkamain hên kamatsan gawan kan Adan, ya unan tawo, ay êmbayro êt ya pangabiyay

---

\* <sup>15:3</sup> Isaias 53:5-12. † <sup>15:4</sup> Awit 16:8-10; Mateo 12:40; Dyag 2:24-32. ‡ <sup>15:5</sup> Mateo 28:16-17; Marcos 16:14; Lucas 24:34,36; Juan 20:19. § <sup>15:8</sup> Dyag 9:3-6. \* <sup>15:9</sup> Dyag 8:3.

oman, ay gawan kan Apo Jesu-Cristo, ya nag-in tawo. <sup>22</sup> Kaganawan tamo ay matsu gawan kan Adan. Embayro êt, gawan ha pakikimiha tamo kan Apo Jesu-Cristo, ay mabiyay kitamon oman. <sup>23</sup> Noa, tsî-tsihan biyayêñ oman. Nuna hi Apo Jesu-Cristo. Haka ha pag-orong na di, ay biyayêñ nay nagpalokop kana, <sup>24</sup> bayo lumatêng baytoy anggaan, hêñ idin nay na kan Apo Namalyari ya Tatang tamo, ya tungkulon nan mamaala panga-ubat nan hambutêñ ya kaganawan kapatsi na, ya hilay ampamaala, haka hilay main kapangyarihan. <sup>25</sup> Ta taganán, kailangan hêñ mamaala hi Apo Jesu-Cristo angga ha mahambut ya balang kapatsi na.<sup>†</sup> <sup>26</sup> Ya tawlin kapatsi, ya hambutêñ na, ay kamatsan, <sup>27</sup> ta êmên ya di ya nakahulat ha Kahulatan<sup>‡</sup> ni Apo Namalyari, “Impahuko kana ni Apo Namalyari ya kaganawan ya dinyag.” Muwang tamo ya a na impahuko ni Apo Namalyari ya sarili na kan Apo Jesu-Cristo, gawan impahuko nan bat kan Apo Jesu-Cristo ya kaganawan ya dinyag na. <sup>28</sup> Noa, no naubuh hêñ impahuko ya balang hino kan Apo Jesu-Cristo, ya Anak ni Apo Namalyari, ay hi Apo Jesu-Cristo man, ay paihuko ha kapangyarihan ni Apo Namalyari ya namahuko hêñ balang hino kan Apo Jesu-Cristo, ta êmên hi Apo Namalyari ya taganán mamaala ha balang hino.

<sup>29</sup> Orongêñ tamon ihipêñ ya main taganán pangabiyay oman. Hila man ya ampabawtismo hêñ oman para kanlan natsi ya a pon binawtismoan, ay ampamaptêg, hêñ ampaniwala hila ha pangabiyay oman. <sup>30</sup> Yarin bat kay panay hêñ paipasubo ha kairapan, no a hila biyayêñ oman ya hilay natsi! <sup>31</sup> Allo-allo, pérad ako ta dayin natsi. Anhabien koy habayto ta hikaw ya patêl ko ha Panginoon, ya an-ipagmahlay ko, hêñ gawan ha pakikimiha tamo kan Apo Jesu-Cristo, ya Panginoon tamo. <sup>32</sup> Main taganán pangabiyay oman. Kabay di ha balayan Efeso, ay matêéh koy kapalimoy pamakihubak, ya nanad ha pamanlumaban ha ayop ya makamatsi. No ayn pangabiyay oman, ay a kina dayin lumaban ta honolén ko tanay hata kahabian, ya wana, “Magpakapda kitaminan mangan, haka minêm ta ayn kitamon maêngganan ya ubat kan Apo Namalyari.”<sup>§</sup>

<sup>33</sup> Paan yon lokoêñ ya sarili yo ta pêtêg ya habaytsi ya humonol ya kahabian ya wana, “No makilamo kitamo kanlan mapanyag karawakan, ay manwad kitamo kanla.” <sup>34</sup> Magpaketino kaw, haka talibatokan yoy karawakan. Ya kaatag kamoyu, ay alwan pêtêg ya pamakakilala kan Apo Namalyari, haka habaytoy dapat yon ikarêng-ey.

### *Ya mag-in lawini tamo ha pangabiyay hêñ oman*

<sup>35</sup> Main mangotâng ya wanla, “Ay-êmên nan biyayêñ oman ni Apo Namalyari ya hilay natsi? Ay-êmên ya lawini tamo bayto?” <sup>36</sup> Paan kitamon mag-in ayn minuwang. Nanad êt bêngat hêñ but-o hêñ tanaman ya kailangan hêñ itanêm ha luta bayo ya mabiyay oman. <sup>37</sup> Ya an-itanêm tamo ay but-o. Noa, no tumubo yay na ay alwa yay nan but-o, ta mag-in tanaman yay na. <sup>38</sup> Noa, atsi kan Apo Namalyari no hinoy mag-in lawini hêñ hino-hinon but-o. <sup>39</sup> Alwan pare-parehoy laman hêñ dinyag na. Mihay laman tamo. Mihay laman hêñ kênan lanêm. Miha ya laman hêñ manok lalê haka ya kaatag pon ya ayop.

<sup>40</sup> Main dinyag ya panluta haka main etaman dinyag ya panlangit. Mihay kahampatan hêñ dinyag ya panluta, haka kaatag ya kahampatan hêñ dinyag ya panlangit. <sup>41</sup> Mihay kahampatan hêñ hêñag allo, haka kaatag ya kahampatan hêñ hêñag hêñ buwan. Miha pon êt ya kahampatan hêñ hêñag hêñ bêtewêñ. Haka hilay bêtewêñ ay tsî-tsihan kahampatan hêñ hêñag.

<sup>†</sup> 15:25 Awit 110:1. <sup>‡</sup> 15:27 Awit 8:6. <sup>§</sup> 15:32 Isaias 22:13.

<sup>42</sup> Èmbayro etaman ya lawini tamo amêhén, ay alwan pareho ha lawini lan biyayén oman ni Apo Namalyari, ta ya bangkay ya an-iilbêng ay anggumata. Noa, ya lawini ya biyayén oman ay ahina hén gumata. <sup>43</sup> Ya bangkay ya an-iilbêng ay alwan mangahampat haka ayn hilan alagá. Noa, ya lawini ya biyayén oman, ay mag-in mahampat haka makhaw. <sup>44</sup> Ya in-ilbêng ay lawini ya panluta. Noa, ya lawini ya biyayén oman, ay mag-in lawini ya panlangit. Gawan main lawini ya panluta, ay main etaman lawini ya panlangit. <sup>45</sup> Ta nakahulat ha Kahulatan ni Apo Namalyari, ya wanana hulat, “Ya unan tawo ya dinyag, ay hi Adan, ya biniyay ni Apo Namalyari hén dinyanan hén kaélwa.” Noa, hi Apo Jesu-Cristo, ya Taga-Langit, ya In-anak Tawo, ay dinyanan hén Espiritu ni Apo Namalyari hén lawini ya panlangit. Hi Apo Jesu-Cristo ya mam-in biyay ya panlangit.\* <sup>46</sup> Munay lawini ya panluta, bayo lanoy na ya lawini ya panlangit. <sup>47</sup> Hi Adan, ya unan tawo, ay ubat ha luta, ta luta ya ginamit ni Apo Namalyari ha pamanyag kana. Noa, hi Apo Jesu-Cristo, ya maialimbawa ha ikalwan Adan, ay taga-langit. <sup>48</sup> Hikitamoy kaapo-apoan ni Adan, ay panluta ya lawini tamo. Noa, hilay makapikilako lano ha langit, ay mag-in panlangit, hén nanad kan Apo Jesu-Cristo ya taga-langit. <sup>49</sup> No ay-émén kitamoy nanad kan Adan amêhén, ay émén bayro etaman ay mag-in kitamo hén nanad kan Apo Jesu-Cristo lano.

<sup>50</sup> Hikaw ya patêl ko ha Panginoon, hata lawini tamo, ya main laman haka daya ay alwan panlangit. Ta hata lawini ya main anggaan, ay a makapakiatag ha biyay ya ayn anggaan. <sup>51</sup> Pakagilamén yo ya habaytsi ya kapapaépapah ya impamwang ni Apo Namalyari: Pag-orong ni Apo Jesu-Cristo, ay main yan malatêng ya angkabiyay di ha luta. Hila, haka hilay nunan natsi, ay bayoén na ngan. <sup>52</sup> Namakonkaynaman, ha mihay karérêpan mata, ha tonoy hén tambuyok, ay omanén biyayén ya hilay natsi, ta hilay dyanan hén lawini ya ahina matsi hén angga-angga.† <sup>53</sup> Ta tinalagá ni Apo Namalyari ya hata lawini tamo, ya main kamatsan haka anggumata, ay hagilyan hén lawini ya ayn kamatsan ya ahina gumata. <sup>54</sup> Kabay, no nahagilyan ya main kamatsan, hén ayn kamatsan, ay matupad ya nakahulat ha Kahulatan ni Apo Namalyari, ya wanana hulat, “Nahambut ya kamatsan kabay taganán ayn nanan kamatsan!”‡ <sup>55</sup> “Taganán ayn nanan panambut ya kamatsan! Taganán ayn nanan kapangyarihan ya kamatsan hén mamatsi!”§ <sup>56</sup> Makamatsi ya pamanyag hén kasalanan, haka no nahambut kitamon kasalanan, ay nalyari ya habayto, gawan ha pamanyag tamo hén bawal ha Kautuhan ni Apo Namalyari. <sup>57</sup> Noa, magpahalamat kitamo kan Apo Namalyari, ya ampam-i kantamo hén panambut ha kasalanan gawan kan Panginoon tamon Jesu-Cristo.

<sup>58</sup> Kabay, anlugurén kon patêl ha Panginoon, pakatalanén yoy paniwala yo kana, hén paan paamuyot ha kaatag ya toro. Panay kaw magpakahipêg ha pamaghuyo yo kana, ta muwang yoy na, ya pamagpagal yo kana, ay a mahayang.

## 16

*Ya tungkol ha pamanipon, hén idigalo kanlan mangairap ya ampaniwala kan Apo Jesu-Cristo*

<sup>1</sup> Amêhén, patêl ko ha Panginoon, ipalinaw ko kamoyu ya tungkol ha pamanipon yon ihawop yo kanlan pinili ni Apo Namalyari hén mag-in kana, ya atsi ha Jerusalem ha probinsyan Judea, ay kailangan yon daygén hén

\* **15:45** Genesis 2:7. † **15:52** 1 Tesalonica 4:15-17. ‡ **15:54** Isaias 25:8. § **15:55** Oseas 13:14 (LXX).

nanad ha hinabi ko kanlan patêl ha Panginoon ya angkapi-tsi-tsipon ha Galacia.\* <sup>2</sup> Balang unan allo ha parominggo, ay dapat mangil-an ya balang miha kamoyu hên hatoy agyu na. Bayo, tsiponén yoy habayto, ta êmén ahina kailangan hên manipon, no atsi kina bahên. <sup>3</sup> Ha paglatêng ko bahên, ay ipagtan ko kanlan napili yo, ya natsipon yoy ihawop yo kanlan atsi bayro ha Jerusalem. Ihulat ko êt ya ipahlék la bayro, ya main hilan karapatan hên mantan hên hawop yo. <sup>4</sup> No alimbawa ta kailangan hên hikoy mantan hên habayto ha Jerusalem, ay pakilako ko hila.

### *Ya pamaglén ni apostol Pablo hên lumagay*

<sup>5</sup> Maniraw ko bahên kamoyu ha balayan Corinto panga-ubat ko ha probinsyan Macedonia, ta tinalagá kon bayro kon magdann.† <sup>6</sup> Labay kon magbuyot bahên, kayno angga ha makalabah ya panaon hên kâbél, ta êmén ko pahawop kamoyu ha humonol ya pamanlumagay ko ha ayri man ya lakwén ko. <sup>7</sup> A ko labay hên magdann bêngat bahên, ta labay kon magbuyot bahên, no kalabayan hên Panginoon.

<sup>8</sup> Maglaêh ko bayri ha Efeso angga ha Pistan Pentecostes.‡ <sup>9</sup> Bayri ko pon, gawan mal-at ya mabay hên manggilam hên toro ko. Main etaman mal-at ya anhumalanghang kangko.§

<sup>10</sup> Ha pamanlumatêng na bahên ni Timoteo, ay pakilamoan yo yan mangéd, ta êmén ya a manyagah, ta hiyay kapareho kon ampaghuyu ha Panginoon.\*

<sup>11</sup> Paan yo yan musmusén, noa, galangén yo ya, haka dapat hawpan yo ya, ta êmén mahigla ya pag-orong na di, ta an-êngganan naén yan kapareho kon tagahuyo ni Apo Jesu-Cristo.

<sup>12</sup> Amêhên, patêl ko ha Panginoon, ya tungkol etaman kan Apolos, ay pinakikwanan kon impapakahabi kana ya maniraw ya bahên, hên kalamo lan patêl, noa, a na labay amêhên, ta lano tana kano no maarap na.

### *Tawlin habi*

<sup>13</sup> Pakaillag kaw. Magpaketaniêh kaw ha paniwala yo kan Apo Jesu-Cristo. Pataniêhén yoy ihip yo haka pakhawén yoy nakém yo. <sup>14</sup> Dapat main pamanlugud ya hinoman ya andaygén yo.

<sup>15</sup> Patêl ko ha Panginoon, muwang yo hilay atsi ha bali† ni Estefanas, ya nunan naniwala kan Apo Jesu-Cristo bahên ha Acaya, ya probinsya yo, ay ampaghuyoy na kan Apo Namalyari ha panawop kanlan kapareho tamon pinili na hên mag-in kana. Ampakihabi ko kamoyu ya <sup>16</sup> palokop kaw kanlan nanad kanla, haka kanlan kapareho lan ampagpagal ha pamaghuyu kan Apo Namalyari.

<sup>17</sup> An-ikahigla ko ya pamanlumatêng bayri, lan Estefanas, Fortunato, haka Acaico, gawan andaygén lay a yo madyag, gawan a kitamo napilalamo.

<sup>18</sup> Hilay namahigla kangko, hên nanad ha pamahigla la kamoyu. Dambién yo hilan mangéd ya hilay tawo ya nanad kanla.

<sup>19</sup> Angkumustaén la kaw hên patêl ha Panginoon ya angkapi-tsi-tsipon di ha probinsyan Asia. Angkumustaén la kaw hên boon nakém hi Aquila, hi Priscila, haka hilay patêl ha Panginoon, ya angkapi-tsi-tsipon ha bali la.‡

<sup>20</sup> Angkumustaén kaw êt hên patêl ha Panginoon bayri.

Mikukumusta kaw, ta êmén ipahlék ya pamanlugud yo ha miha ta miha hên nanad patêl ha Panginoon.

<sup>21</sup> Hiko hi Pablo ya ampanulat hên habaytsi.

\* **16:1** Roma 15:25, 26. † **16:5** Dyag 19:21. ‡ **16:8** Levitico 23:15-21; Deuteronomio 16:9-11.

§ **16:9** Dyag 19:8-10. \* **16:10** 1 Corinto 4:17. † **16:15** 1 Corinto 1:16. ‡ **16:19** Dyag 18:2.

<sup>22</sup> Parusaan dayi ni Apo Namalyari hilay ayn pamanlugud ha Panginoon. Marana tha! O Panginoon naêñ, dayi tampol kan lumatêng.

<sup>23</sup> Ingawan na kaw dayi ni Panginoon Jesus.

<sup>24</sup> Anlugurên kataw ya kaganawan gawan ha pakikimiha tamo kan Apo Jesu-Cristo.

## Ya ikalwan hulat ni apostol Pablo kanlan ampaniwala kan Apo Jesu-Cristo ha Corinto

### *Paunan habi*

Ha unan hulat ni apostol Pablo kanlan ampaniwala kan Apo Jesu-Cristo ha balayan Corinto, ay hinabyanan na hila gawan ayn hilan pamikakasundo, haka gawan ha main hilan kaatag pon ya andaygên ya alwan mangêd. Hiniraw na hila êt (2 Corinto 2:1; 12:14; 13:1-2) noa, a hila êt nanggilam, kabay hadyay lungkot na hên nag-orong ya ha balayan Efeso.

Nanoro ya ha balayan Troas bayo ha probinsyan Macedonia, haka bayro nan natupa hi Tito ya ubat ha balayan Corinto. Hadyay higla ni apostol Pablo hên namwangan na kan Tito ya naghêhê hilay ampaniwala kan Apo Jesu-Cristo ha balayan Corinto, haka ayn hilay nan hakit nakêm kan apostol Pablo (2 Corinto 7:5-7).

Di ha ikalwan hulat na kanla, ya hinulat na hên atsi ya ha probinsyan Macedonia, ay hinulat na no awta hinabyanan na hila hên haton main ungno kanlan angkapi-tsi-tsipon ya nanalanghang kana. Hinabyanan na hila ha unan hulat na kanla, hên alwan ha pahakitan ya nakêm la noa, êmên ipamwang kanla no ay-êmên kahlay ya pamanlugud na kanla. An-ipahlêk na di ha ikalwan hulat kanla ya labay nan makipagkahundo kanla. Habaytsi ya humonol êt ya laman hên hata hulat na:

Kabooan hên pinakalaman

Umpisan hulat 1:1-11

Ya an-ihipêni apostol Pablo hên tungkol kanlan patêl ha Panginoon ya angkapi-tsi-tsipon ha Corinto haka hên tungkol ha pamimiyay na haka ya an-itoro na 1:12-7:16

Ya utoh ni apostol Pablo hên tungkol ha pamanipon hên ihawop kanlan ampaniwala ha Jerusalem 8:1-9:15

An-ilaban ni apostol Pablo ya tungkulon na ha pangaapostol na 10:1-13:10  
Tawlin habi 13:11-13

<sup>1</sup> Hiko hi Pablo ya pinili ni Apo Namalyari hên mag-in apostol ni Apo Jesu-Cristo. Kalamo ko di hi Timoteo, ya patêl tamo ha paniwala.

Ampanulat ako hên habaytsi kamoyun patêl ha Panginoon ya angkapi-tsi-tsipon ha balayan Corinto haka kamoyu ya pinili ni Apo Namalyari hên mag-in kana ha boon probinsyan Acaya.

<sup>2</sup> An-ihalangin naêñ kaw ya dyanan kaw dayi hên kapatêkbêkan, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

### *Pamahalamat ni apostol Pablo ha pamitalaba ni Apo Namalyari kana*

<sup>3</sup> Purién tamo hi Apo Namalyari, ya Tatang ni Panginoon tamon Jesu-Cristo. Hiyay pinangubatan hên ingalo haka pamitalaba ya ayn kapantag.

<sup>4</sup> Antalabaêñ na kitamo ha kaganawan kairapan tamo, ta êmên makatalaba kitamo êt hên kaatag, hên nanad ha pamitalaba na kantamo. <sup>5</sup> No ay-êmên ya hadyay pamairap kannaêñ, gawan ha pamakimiha naêñ kan Apo Jesu-Cristo, ay êmbayro etaman ya pamitalaba na kannaêñ. <sup>6</sup> Ya hadyay kairapan ya andanasêñ naêñ haka ya pamairap kannaêñ ha pamanoro hên habi ni Apo Namalyari, ay ha ikakangêd haka ha ikaligtas yo. Ha pamitalaba na kannaêñ ni Apo Namalyari, ay makapaytalaba kay etaman kamoyu, ta êmên

yo matêêh ha parehon pamairap ya ampagtêêhan naêñ. <sup>7</sup> Angkasigurado naêñ ya ihundo yoy paniwala yo kan Apo Jesu-Cristo, ta muwang naêñ no pairapan kaw man, hêñ nanad kannaêñ, ay talabaêñ na kaw etaman ni Apo Namalyari, hêñ nanad ha pamaytalaba na kannaêñ.

<sup>8</sup> Patêl ha Panginoon, labay naêñ hêñ mamwangan yoy hadyay pamairap kannaêñ, hêñ atsi kay ha probinsyan Asia. Êndat naêñ no matsi kay, ta pêrad tanan a naêñ matêêh ya habayto. <sup>9</sup> Taganán êndat naêñ no nilumatêng ya anggaan biyay naêñ. Nalyari ya habayto ta êmên kay a pahimala ha kagalingan naêñ, noa, kan Apo Namalyari bat, ya ampam-in biyay kanlan natsi. <sup>10</sup> Hiyay namiligtas kannaêñ ha kamatsan, haka hiya pon êt ya ampamiligtas kannaêñ. Angkasigurado naêñ ya iligtas na kay ha kaganawan ya mamatsi kannaêñ. <sup>11</sup> Ihundo yo dayi ya pangipanalangin yo kannaêñ, ta êmên mal-at ya magpahalamat kan Apo Namalyari gawan ha pamakibat na hêñ pangipanalangin kannaêñ hêñ kal-atan.

### *No pata a ya pon nakahiraw kanla hi apostol Pablo*

<sup>12</sup> An-ipagmahlay naêñ, ya malinis ya konsinsya naêñ ta ayn pagbabara, haka panay main kaptêgan ya dinyag haka hinabi naêñ ha balang miha, lalon-laloy na kamoyu. Habaytoy alwan gawan ha sarili naêñ kamwangan, noa, gawan ha ayn kapantag ya ingalo ni Apo Namalyari. <sup>13-14</sup> Ta ya an-ihulat naêñ kamoyu, ay ayn kaatag no alwan ya agyu yon bahaêñ haka maintindihan. Amêhêñ ay a yo pon mantêg hêñ angkaintindihan ya ugali naêñ, noa, dayi maintindihan yoy nan mangêd, ta êmên ha pamag-orong ni Panginoon Jesu-Cristo, ay maipagmahlay yo kay haka maipagmahlay naêñ kaw etaman.

<sup>15</sup> Gawan angkasigurado ko ya an-ipagmahlay yo kay, ay naihipan ko hêñ haton una ya hirawêñ kataw bahêñ hêñ katalwa, ta êmên katalwa kataw mapahigla. <sup>16</sup> Naihipan kon magdann ako bahêñ ha pamaniraw ko di ha probinsyan Macedonia, haka ha pamag-orong hêñ ubat di, ay magdann kina êt dayi bahêñ, ta pahawop ako ha kailangan ko ha pamanlumagay ko ha probinsyan Judea. <sup>17</sup> Gawan ha a ko nagdann bahêñ ha pamaniraw ko di ha probinsyan Macedonia, ay kayno êndat yon bat ampangoman ya ihip ko, hêñ nanad kanlan ayn limo kan Apo Namalyari ya bat hêñ maghabi hêñ awo hêñ a la tuparêñ. <sup>18</sup> Tapat hi Apo Namalyari, haka tapat kay etaman. A kay ampaglaram. <sup>19</sup> Taganán a ya balingbing hi Apo Jesu-Cristo, ya anak ni Apo Namalyari, ya impamwang naêñ ni Silvano haka hi Timoteo kamoyu, ta panay nan antuparêñ ya pangako na. <sup>20</sup> Hi Apo Jesu-Cristo ay nanupad hêñ balang impangako ni Apo Namalyari, kabay ampakapaghabi kitamo hêñ “Amen” ya labay habiêñ “taganán pêtêg ya habayto” no puriêñ tamo hi Apo Namalyari gawan kan Apo Jesu-Cristo! <sup>21</sup> Hi Apo Namalyari ya ampamataniêh hêñ paniwala tamo kan Apo Jesu-Cristo, haka hiya ya namili kantamo hêñ maghuyo kana. <sup>22</sup> Hiya êt ya namahapat kantamo hêñ Espiritu na, ya nanad tatak, ya pamaptêg ya kana kitamo. Haka gawan ampaidi ya kantamo ya Espiritu na, ay angkasigurado tamo ya tuparêñ nay kaganawan impangako na kantamo.

<sup>23</sup> A ko pon naniraw bahêñ kamoyu ha Corinto amêhêñ, ta êmên ko a makapaghabi hêñ ikahakit hêñ nakêm yo. Muwang ni Apo Namalyari ya pêtêg ya an-ihulat ko, ta muwang nay laman hêñ nakêm ko! <sup>24</sup> Alwan ha labay naêñ hêñ mamiutoh kamoyu no hino ya dapat yon paniwal-an, ta muwang naêñ ya nakataniêh kaw na ha paniwala. Ya labay naêñ bat, ay hawpan kaw, ta êmên kaw mag-in mahigla ha pamimiyay yo ya hêpat ha mantêg ya pamanhumonol kan Apo Jesu-Cristo.

**2**

<sup>1</sup> Kabay naihipan ko ya a ko pon maniraw kamoyu bahên ta êmên a kataw mahabyanan oman hén makabalagêhbég nakêm yo. <sup>2</sup> Ta no palungkutêñ koy nakêm yo, ay hino pon bayto ya mamahiglan nakêm ko! Ayn! <sup>3</sup> Kabay indiretsa koy pamanulat ko kamoyu bayro ha mihay hulat, ta êmên ha pamiraw ko bahên, ay maayos ya pamimiyay yo, haka a yo ko palungkutêñ, noa, hikaw dayi ya mamahigla kangko. Ta sigurado ko ya ikahigla yo etaman, ya ikahigla ko. <sup>4</sup> Hén haton hinabyanan kataw bahên ha hulat ko kamoyu, ay pérad tanan a ko matêêh ya nakêm ko ya namalagêhbég haka hadyay pamanangih ko. Hinulatan kataw alwan ha mamalungkot kamoyu, noa, êmên ipamwang kamoyu no ay-êmên kahlay ya pamanlugud ko kamoyu.

*Dapat patawarêñ ya habaytoy patêl ha Panginoon ya nanyag kasalanan*

<sup>5</sup> Amêhêñ, tungkol kanan habain ya nanyag kasalanan, ya namalungkot kangko, ay alwan hikon bat ya dinyanan nan kalungkutan, noa, namalungkot ya êt ha balang miha kamoyu o pérad tanan balang miha kamoyu ta a ko labay pakahlayêñ ya dinyag na. <sup>6</sup> Hukad anay pamarala yo kana. <sup>7</sup> Gawan naghêhê yay na, ay patawarêñ yo ya etaman, haka talabaêñ yo ya, ta êmên ya a mantêg mahiraan nakêm. <sup>8</sup> Kabay an-ipapakahabi ko kamoyu ya ipahlék yo kana, ya hiyay taganán anlugarêñ yo pon. <sup>9</sup> Hinulatan kataw êt hén hato, ta êmên ko mamwangan no mahonol kaw ha balang in-utoh ko kamoyu. <sup>10</sup> No patawarêñ yoy ampakikwan patawad, ay patawarêñ ko ya etaman no main yan dinyag ya dapat kon patawarêñ. Daygêñ koy habayto ha ikakangêd yo ha arapan ni Apo Jesu-Cristo, <sup>11</sup> ta êmên kitamo a mahambut ni Satanas no a kitamo mamatawad. Gawan taganán muwang tamina ya karawakan ya labay nan daygêñ kantamo ni Satanas.

*Nanyagah hi apostol Pablo hén atsi ya ha balayan Troas*

<sup>12</sup> Hén nilumatêng ako ha balayan Troas, ta êmên ipamwang ya Mangêd ya Habi tungkol kan Apo Jesu-Cristo, ay in-il-an awud hén Panginoon ya nakêm la bayro, ta mal-at ya nanggilam ha toro ko. <sup>13</sup> Noa, niyumagah ako êt ta a ko natapol bayro hi Tito, ya patêl ko ha Panginoon. Kabay nagpamwang kina hén nagtagloh ha probinsyan Macedonia.

*Pamanambut gawan kan Apo Jesu-Cristo*

<sup>14</sup> Noa, halamat kan Apo Namalyari, ta gawan ha pamakimiha naêñ kan Apo Jesu-Cristo, ay an-ilamo na kay ya ampanoro ha pamanambut na. Ha panoro naêñ, ay ampiabot ha boon luta ya kamwangan ya tungkol kan Apo Jesu-Cristo ya nanad ha pabango ya anhumngaw. <sup>15</sup> Gawan ha panoro naêñ hén tungkol kan Apo Jesu-Cristo, ay nanad kay hén pabango ya ampamahigla kan Apo Namalyari haka ya angkaraêp lan main kaligtasan, haka hilay mipalako ha impiyerno. <sup>16</sup> Kanlan ampaniwala kan Apo Jesu-Cristo, ay nanad kay hén pabango, ta hilay dyanan hén biyay ya ayn angga. Noa, kanlan a ampaniwala kan Apo Jesu-Cristo, ay nanad kay hén anggumata, ta hila ay mipalako ha impiyerno. No alwan ha hawop hén Espiritu ni Apo Namalyari, ay ayn makapitoro hén Mangangêd ya Habi! <sup>17</sup> Ta hikay ya taganán in-utoh ni Apo Namalyari, haka gawan ha pamakimiha naêñ kan Apo Jesu-Cristo, ay boon nakêm naêñ ipamwang ya Mangêd ya Habi ha arapan ni Apo Namalyari. Alwa kay nanad hén kaatag ya ampagkaperaan bat ya habi na.

**3***Ya bayoy kahundoan ni Apo Namalyari kantamo*

<sup>1</sup> Kayno êndat yon andayêwên naên ya sarili naên oman. Yarin kailangan naên ya hulat ya ubat ha kaatag ta êmén yo kay paniwal-an! Yarin kailangan naên ya hulat ya ubat kamoyu ya ipahlék ha kaatag ta êmén kay paniwal-an! <sup>2</sup> Hikaw tana ya nanad pinakahulat naên ta êmén kay paniwal-an, gawan mahélék hên kaatag, no ay-êmén binayo ya biyay yo gawan ha panoro naên kamoyu. <sup>3</sup> Haka mahélék hên kaatag ya biyay yo, ya binayo ni Apo Jesu-Cristo, kabay hikaw ay nanad hulat na. Habaytoy alwa hên nanad ha Kautuhan ni Apo Namalyari ya nakadukit ha pinipakay bato, noa, nanad nakêm yo ya hinulatan hên Espiritu ni Apo Namalyari, gawan ha toro naên kamoyu.

<sup>4</sup> Angkahabi naên hên êmbayro gawan main kay hên paniwala kan Apo Namalyari, gawan kan Apo Jesu-Cristo. <sup>5</sup> No ha sarili naên, ay a naên agyu ya pamanoro haka ya kaatag pon ya andaygên naên, ta hi Apo Namalyari ya ampanawop kannaên, <sup>6</sup> ta êmén naên maitoro ya tungkol ha bayoy kahundoan na. Habaytoy bayoy kahundoan na, ay alwan nanad ha Kautuhan, ya ampam-in kaparusaan ya ayn angga kanlan a anhumonol ha nakahulat bayro. Ta ya bayoy kahundoan ay tungkol ha andaygên nan Espiritu na ha nakêm, haka habaytoy ampam-in biyay ya ayn angga.

<sup>7</sup> Bayro ha pam-in manan kahundoan, ay impahlék ni Apo Namalyari ya kapangyarihan na kanlan Israelita, ta angkapanat man, ay atsi pon kan apo Moises ya kapahilêw ya kahampatan ni Apo Namalyari hên babayo nan indin kanla ya Kautuhan ya nakadukit ha pinipakay bato. Kabay angkahilêw hila no hêlkên lay lupa ni apo Moises. No êmbayroy kapangyarihan ya impahlék ni Apo Namalyari hên indin nay Kautuhan ya ampam-in parusa ya ayn angga, <sup>8</sup> ay taganán makapangyarihan pon êt bayro ya mahélék ha bayoy kahundoan, gawan ha pamanhumapat nan Espiritu ni Apo Namalyari! <sup>9</sup> No main lamoy kapahilêw ya kahampatan ya Kautuhan ya ampam-in parusa ya ayn angga, ay taganán makapangyarihan pon êt bayro ya mahélék ha bayoy kahundoan, no ay-êmén na kitamon itad ni Apo Namalyari hên ayn kasalanan. <sup>10</sup> Pêtêg hên nanad nabaw-ahan ya kapahilêw ya kahampatan hên Kautuhan, gawan ha hadyay kapahilêw ya kahampatan hên bayoy kahundoan! <sup>11</sup> No main kapahilêw ya kahampatan hên babayon indin ya Kautuhan, ya main anggaan, ay lalon kapahilêw ya kahampatan hên bayoy kahundoan, ya ayn anggaan!

<sup>12</sup> Gawan angkasigurado naên ya ayn anggaan ya bayoy kahundoan, ay taganán makhaw ya nakêm naên hên itoro ya habayto, <sup>13</sup> alwan nanad hên hato kan apo Moises ya naghalimbêng lupa na, ta êmén a mahélék lan kapareho nan Israelita ya pamagpanat hên kapahilêw ya kahampatan hên nayari yan naghabi kanla. <sup>14</sup> Noa, kinumdêy ya ulo la, haka angga amêhêñ nanad naghalimbêng ya ihip lan kaapo-apoan la, no ambahaêñ lay manan kahundoan ya hinulat ni apo Moises, ta a maalíh ya nakahalimbêng angga ha a hila maniwala ya hi Apo Jesu-Cristo ay yabay ya Mesias, ya impangakon Mámilitgas. <sup>15</sup> Angga amêhêñ, ay nanad main nakahalimbêng ha kaihipan la no ambahaêñ lay hinulat ni apo Moises. <sup>16</sup> Noa, no maniwala hila ha Panginoon, ay maalíh ya nanad nakahalimbêng ha kaihipan la. <sup>17</sup> Ya Panginoon ya inungkat ko, ay yabay ya Espiritu ni Apo Namalyari, haka no atsi ya ha nakêm tamo, ay alwa kitaminan antalanêñ hên kasalanan, haka a kitamina ampanapol hên biyay ya ayn angga ha pamanhumonol ha Kautuhan. <sup>18</sup> Amêhêñ, ya balang miha ya ampaniwala kan Apo Jesu-Cristo ay alway nan nanad kan apo Moises hên haton naghalimbêng ya lupa na, ta amêhêñ angkahélék ha biyay tamо ya kapahilêw ya kahampatan hên

Panginoon Jesus. Ta ya ampamabayo hên nakêm haka biyay tamo, angga ha hikitamoy mag-in nanad kan Apo Jesu-Cristo, ay yabay ya Espiritu ni Apo Namalyari.

## 4

### *Ya Mangêd ya Habi ay in-alimbawa ha ayn kapantag ya pibandian ya atsi ha pamyanan ya maparah mapha*

<sup>1</sup> Gawan ha ingalo ni Apo Namalyari ay ampanoro kay, kabay a kay angkaalihan hêkaw nakêm ha pamanoro naên. <sup>2</sup> Andayuán naên ya kaparêng-êy ya andaygên lan kaatag ya an-itago la. Ayn kalokwan ha pamanoro naên, haka a naên an-omanên ya Habi ni Apo Namalyari. Noa, an-ipamwang naên ya kaptêgan ha balang miha, haka muwang la, haka muwang ni Apo Namalyari ya habayto. <sup>3</sup> No main pon hên nanad nakahalimbêng ha ihip lan antoroan naên hên Mangangêd ya Habi ya tungkol kan Apo Jesu-Cristo, ay habayto ay gawan mipalako hila ha kaparusaan ya ayn anggaan. <sup>4</sup> A hila naniwala ta ya nakêm la ay binuwag ni Satanas, ya anhonolên lan a ampagpalokop kan Apo Namalyari. Binuwag nay nakêm la, ta êmên a la maintindihan ya paypamwang hên Mangangêd ya Habi ya tungkol ha panga-Diyos ni Apo Jesu-Cristo. Hi Apo Jesu-Cristo ya namipahlék kantamo no ay-êmên ya ugali ni Apo Namalyari. <sup>5</sup> Haka hiyay an-ipamwang naên, alwan tungkol ha sarili naên. An-ipamwang naên ya hi Apo Jesu-Cristo ay Panginoon tamon balang miha. Hikay etaman, ay tagahuyo yo gawan kana. <sup>6</sup> Ta hi Apo Namalyari ya naghabi, “Magkamain hawang ha kariglêman,” ay hiya êt ya nam-in hawang ha nakêm naên, ta êmên naên maintindihan ya panga-Diyos na ya mahêlék kan Apo Jesu-Cristo.

<sup>7</sup> Noa, hikay ay maialimbawa ha pamyanan ya dyag ha tagumbid ya maparah mapha, haka ya Mangêd ya Habi ay maialimbawa ha ayn kapantag ya pibandian ya indin bayro. Ha êmbayro ay malinaw ya angkaubat kan Apo Namalyari, ya kapangyarihan ya ayn kapantag, haka alwa kannaên. <sup>8</sup> Hino-hino kay nahên ya pamairap kannaên, noa, a kay ampahambut ha pamairap. Angkagulo ya ihip naên, noa, a kay angkahiraan nakêm. <sup>9</sup> Ampairapan la kay, noa, a na kay ampaulayan ni Apo Namalyari. Ampatsên la kay dayi, noa, angkabiyay kay pon. <sup>10</sup> Ay-iri man ya lakwên naên, ay panay kamatsan ya an-arapan naên, nanad kay kan Apo Jesu-Cristo hên atsi ya pon di ha luta, ta êmên mahêlék etaman ha lawini naên ya biniyay yan oman, ta ya kapangyarihan na ay ampangillag kannaên. <sup>11</sup> Ta kaban angkabiyay kay pon di ha luta, ay panay kamatsan ya an-arapan naên, gawan ha pamaghuyo naên kan Apo Jesu-Cristo, ta êmên mahêlék ya biniyay yan oman ha pamangillag na kannaên ha lawini naên ya main angga. <sup>12</sup> Agyan kamatsan ya an-arapan naên di ha luta, ay madyanan kaw tana dayi etaman hên biyay ya ayn angga gawan ha panoro naên kamoyu.

<sup>13</sup> Ampanoro kay gawan main kay hên paniwala kan Apo Namalyari, hên nanad kan Arin David ya nanulat ha Kahulatan ni Apo Namalyari, ya wana, “Main akon hinabi gawan ampaniwala ko kamo, Apo Namalyari.”\* Êmbayro êt ya paniwala naên, kabay an-ipamwang naên ya ampaniwalan naên. <sup>14</sup> Ampanoro kay gawan muwang naên, ya hi Apo Namalyari, ya namabiyay oman kan Panginoon Jesu-Cristo, haka hiyay mamabiyay oman etaman kannaên, gawan ha pakikimiha naên kan Panginoon Jesu-Cristo. Êmbayro êt ya malyari kamoyu ta ilamo na kitamo ha ampaidyanan na. <sup>15</sup> Ya kaganawan pamairap ya anteéhan naên, ay ha ikakangêd yo, ta no mal-at

\* **4:13** Awit 116:10.

ya makatanggap hên ayn kapantag ya ingalo na, ay mapahanan pon hilay ampagpahalamat haka ampagpuri kan Apo Namalyari.

### *Nakapêptêng ya ihip lan apostol Pablo ha hinon makalangit*

<sup>16</sup> Kabay a kay angkahiraan nakêm, ta pêrad-pêrad man hên angkamatsi ya lawini naên, ay anhumigla ya nakêm naên. <sup>17</sup> Angkairapan kay man di, ay nanad alwan mabuyot haka alwan mabyat ya habaytoy kairapan, no iparis ya ha biyay tamo lano ha langit, ya ayn kapantag haka ayn angga. <sup>18</sup> Kabay nakapêptêng ya ihip naên ha hinon makalangit ya ayn angga, alwan ha hinon atsi bayri ha luta ya main angga.

## 5

<sup>1</sup> Gawan muwang tamina, ya no matsi ya lawini tamo ya nanad tolda ya ampaidyanan tamo, ay dyanan na kitamo ni Apo Namalyari hên lawini ya panlangit ya a matsi hên angga-angga. <sup>2</sup> Ampiuuyamêh kitamo bayri, gawan labay-labay naên ana dayin makapaidi ha langit, hên main lawini ya panlangit. <sup>3</sup> Labay tamina dayin ihulod ya lawini ya panlangit, ta êmén main bayoy lawini ya kaêlwa tamo, ha pangamatsi tamo. <sup>4</sup> Pêtêg ya angkabyatan kitamo di ha lawinin panluta, haka ampiuuyamêh kitamo, gawan labay tamina dayin mapahilyan hên lawini ya panlangit, ya hata lawini tamo ya panluta. Alwan ha labay taminan matsi, noa, labay tamina dayin mapahilyan hên lawini ya main biyay ya ayn angga, ya hata lawini ya main angga. <sup>5</sup> Hi Apo Namalyari ya namil-an kantamo hên lawini ya panlangit, haka angkasigurado tamo ya pêtêg ya habayto, gawan ha Espiritu na ya impahapat na kantamo.

<sup>6</sup> Kabay panay makhaw ya nakêm naên, agyan muwang naên, ya kaban atsi kay pon bayri ha lawini ya panluta, ay ayn kay pon ha langit ha pandyanan hên Panginoon. <sup>7</sup> Angkasigurado naên ya makapaidi kay bayro lano, gawan ha paniwala naên, kabay nakapêptêng ya ihip naên bayro, gawan nanad angkahêlêk naên ya habayto. <sup>8</sup> Awo. Makhaw ya nakêm naên. Haka labay naên dayi hên makapaidi yana bayro, ha langit, ha pandyanan hên Panginoon. <sup>9</sup> Noa, atsi kay man di ha luta, o mag-in bayro man ha langit, ay nakapêptêng ya ihip naên hên manyag hên ikahigla na. <sup>10</sup> Ta ha Allon Pamanukom, ya balang miha kantamo ay kiarap kan Apo Jesu-Cristo, ta tumbahan na kitamo ha dinyag tamoy mangêd man, o narawak, hên angkabiyyay kitamo pon bayri ha luta.

### *Niúmang kitamo kan Apo Namalyari gawan kan Apo Jesu-Cristo*

<sup>11</sup> Gawan muwang tamo ya kapalimo ya habaytoy Allon Pamanukom ni Panginoon Jesu-Cristo, ay ampakikwanan naên hên hagyatêh ya balang miha hên maniwala kana. Muwang ni Apo Namalyari ya habayton bat ya labay naên, haka dayi muwang yo etaman ya habayton bat ya labay naên. <sup>12</sup> Kayno êndat yo ya andayêwên naên ana êt ya sarili naên. Alwa! Ta labay naên bat ya main kaw hên mahabi kanlan ampammusmus kannaên. An-ipagmahlay lan bat ya angkahêlêk la hên mata la, a lan dyanan pukat ya laman nakêm. <sup>13</sup> No êndat lan kaatag ya angkamurit kay, ay ayn kannaên ya habayto, ta anhonolên naên ya kalabayan ni Apo Namalyari. No habiên lan kaatag etaman, ya muwang naên ya mangêd haka alwan mangêd, ay ha ikakangêd yoy habayto. <sup>14</sup> Ta ya pamanlugud ni Apo Jesu-Cristo, ay ampamakhaw hên nakêm naên, hên ihundo ya panoro naên, gawan taganán muwang naên, ya hiyay natsi para ha balang miha, kabay ya balang miha ay intad hên natsi hên kalamo na. <sup>15</sup> Natsi ya ha ikakangêd hên balang miha, ta êmén hikitamo

ya nanad hēn kalamo na hēn nabiay yan oman\* ay mamiyay hēn alway nan para ha sarili tamo, noa, para kana ya natsi haka nabiay oman hēn para kantamo.

<sup>16</sup> Kabay paubat amêhēn ay a naēn anhabiēn ya mangēd o narawak ya mihay tawo gawan ha angkahēlēk, ta êmbayroy dinyag naēn kan Apo Jesu-Cristo hēn haton una. Êndat naēn no tawo yan bēngat, ta a naēn tampol namwangan ya hiya awud, ya Mesias, ya Cristo, ya impangakon Mámiligtas ya pinili ni Apo Namalyari hēn mamaala. <sup>17</sup> Kabay hilay main pamakimiha kan Apo Jesu-Cristo, ay nabayoy na. Ayn ana ya mana lan karawakan ihip haka ugali, ta naubuh hēn nabayo ya habayto. <sup>18</sup> Habaytoy dinyag ni Apo Namalyari ya namiúmang kantamo kana gawan ha pangamatsi ni Apo Jesu-Cristo. Haka hiyay namiutoh kannaēn hēn ipamwang ha kaatag ya tungkol ha pamiúmang na. <sup>19</sup> An-itoro naēn, ya gawan kan Apo Jesu-Cristo, ay an-iúmang ni Apo Namalyari kana, ya kaganawan ya mabay hēn payúmang kana, ta patawarēn na hila ha kasalanan la. Yabay ya impatsiwala na kannaēn hēn itoro.

<sup>20</sup> Kabay hikay, ay in-utoh ni Apo Jesu-Cristo, haka nanad mismo hi Apo Namalyari ya ampakidoko kamoyu ha anhabiēn naēn. Gawan kan Apo Jesu-Cristo ay ampakihabi naēn kamoyu, ya makiúmang kaw kan Apo Namalyari.

<sup>21</sup> Hi Apo Jesu-Cristo ya ayn kasalanan, ay intad ni Apo Namalyari hēn makasalanan gawan ha kasalanan tamo, ta êmēn na kitamo maitad hēn ayn kasalanan gawan ha pakikimiha tamo kan Apo Jesu-Cristo.

## 6

<sup>1</sup> Gawan ha ampanawop kay kan Apo Namalyari ha pamiúmang hēn tawo kana, ay ampakihabi kay ya a yon daygēn ayn pukat ya ingalo na ya ayn kapantag. <sup>2</sup> Ta impahulat ni Apo Namalyari, ya wana,  
“Ha panaon ya intakda ko, ay ginilam koy panalangin mo.

Haka hēn nilumatēng ya allon pamilitas ko kamo, ay hinawpan kata.”\*

Pakagilamēn yo! Tanggapēn yoy na dayi ya ingalo ni Apo Namalyari!  
Amêhēn ya allo hēn pamilitas!

<sup>3</sup> A naēn labay hēn mag-in habkol ha pangaligta hēn hinoman, ta êmēn a kay pintasan ha pamanoro hēn Mangangēd ya Habi ya tungkol kan Apo Jesu-Cristo. <sup>4</sup> Ha balang andaygēn naēn, ay pan-ipahlēk naēn, ya hi Apo Namalyari ya anhuyuēn naēn. Habaytoy mahēlēk ha pamagtēêh naēn ha hinon kairapan, pamagdusa, kapapotog, <sup>5</sup> pamatok, pamihukul, pamabugbog hēn dinawhong kay, hadyay pagal ha pamagobra, pamagpuyat, haka lonoh. <sup>6</sup> Mahēlēk etaman ya hi Apo Namalyari ya anhuyuēn naēn ha kangēran pamimiyay naēn, ha kamwangan naēn ya tungkol kan Apo Jesu-Cristo, ha pamagtēêh naēn, ha kangēran nakēm naēn, ha pamanyag naēn kangēran ha kapangyarihan hēn Espiritu na, ha mantēg ya pamanlugud naēn, <sup>7</sup> haka ha panoro naēn hēn kaptēgan ha kapangyarihan na. Ya pamanhumonol naēn kana, ay pinakakalahag haka pinakahundang naēn. <sup>8</sup> Ha pamaghuyo naēn kan Apo Namalyari, ay main ampanggalang kannaēn, haka main ampanira kannaēn. An-itad la kay hēn mapaglaram, kaptēgan man ya an-itoro naēn. <sup>9</sup> Muwang la man hēn balang miha, ya apostol kay, ay an-itad la kay hēn alwan apostol. Êndat la, no angkamatsi kay. Noa, hēlkēn yo, angkabiyay kay pon! Amparusaan kay, noa, a kay angkamatsi. <sup>10</sup> Panay kay anhumigla, ampakaranas kay man hēn kalungkutan. An-itad la kay hēn mairap, noa, mal-at ya ampananggap hēn ingalo ni Apo Namalyari, gawan ha toro naēn.

\* <sup>5:15</sup> Roma 6:4. \* <sup>6:2</sup> Isaias 49:8.

Ayn kay pibandian panluta, noa, atsi kannaēn ya kaganawan pibandian panlangit.

<sup>11</sup> In-ubuh kon impamwang kamoyu ya laman nakêm naēn. Hadyay pamalugud naēn kamoyu. <sup>12</sup> Ayn pamakulang ya pamanlugud naēn kamoyu, noa, natambaang kaw na ha pamanlugud yo kannaēn. <sup>13</sup> Hikaw ay nanad maának ko, kabay lugurêñ yo kay etaman dayi.

### *Paan panay makilamo kanlan ayn paniwala kan Apo Jesu-Cristo*

<sup>14</sup> Paan kaw panay makilamo kanlan ayn paniwala kan Apo Jesu-Cristo. Yarin mapilamo ya mapanyag kangêran haka ya mapanyag karawakan! Yarin mapilamo ya hawang haka ya kariglêman! <sup>15</sup> Yarin mapikasundo hi Apo Jesu-Cristo haka hi Satanas! Yarin mapikasundo hilay main paniwala kan Apo Jesu-Cristo haka hilay ayn paniwala kana! <sup>16</sup> Yarin maihowêñ ha Templo ni Apo Namalyari, ya rebulto hêñ alwan pêtêg ya diyos! Hikitamo ya pinaka-Templo ni Apo Namalyari, gawan impahulat ni Apo Namalyari, ya wana,

“Paidi ko ha maának ko, hêñ panay manlamo kanla.

Hikoy mag-in Diyos la, haka hilay mag-in anak ko.”†

<sup>17</sup> Kabay wana êt hêñ Panginoon,

“Dayuán yo hilay mapanyag karawakan, haka papawa kaw kanla.”‡

“Paan kaw manyag hêñ hinoman ya karêmêkan, ya kasalanan, ta êmêñ kataw matanggap.

<sup>18</sup> Ta hikoy mag-in Tatang yo,

haka hikaw ay mag-in maának ko.”§

Habaytoy hinabi ni Apo Namalyari ya makapangyarihan.

## 7

<sup>1</sup> Anlugarêñ kon patêl ha Panginoon, gawan habayto ya impangako ni Apo Namalyari kantamo, ay dapat alihêñ tamo ya kaganawan pamanyag karawakan ya ampakarêmêk hêñ nakêm, haka lawini tamo. Dapat mamiyay kitamo hêñ ayn kapintasan gawan ha pamanggalang tamo kana.

### *An-ikahigla ni apostol Pablo ya pamaghêhê lan patêl ha Panginoon ya angkapi-tsi-tsipon ha balayan Corinto*

<sup>2</sup> Lugurêñ yo kay etaman dayi, ta ayn kay hêñ kasalanan kamoyu. A naēn kaw inamuyot hêñ manyag karawakan ha pamanoro naēn, o ha pamimiyay man. A naēn kaw êt hêñ niloko. <sup>3</sup> A kataw ampintasan, ta mana kinan hinabi, ya anlugarêñ naēn kaw hinoman ya angkalyari ha pamimiyay tamo, o ha kamatsan man, ay a magbayo ya pamanlugud naēn kamoyu. <sup>4</sup> Pêtêg kataw hêñ ampagtsiwal-an, haka panay kataw hêñ andayêwêñ ha arapan hêñ kaatag. Ampakadanás kay man hêñ kaganawan kairapan, ay angkatalaba ko, haka hadyay kahiglaan nakêm ko.

<sup>5</sup> Agyan ha probinsyan Macedonia, ay ayn painawa ya lawini naēn, ta hino-hino kay na hêñ ya kairapan ya nadanasan naēn ta main nanalanghang kannaēn, haka niyumagah êt ya nakêm naēn. <sup>6</sup> Noa, hi Apo Namalyari ya ampamitalaba kanlan angkahiraan nakêm, ay hiya êt, ya nanalaba kannaēn ha pamanlumatêng ni Tito. <sup>7</sup> Haka alwan bat ya pamanlumatêng na ya nanalaba kannaēn, noa, nanalaba êt kannaēn ya pamipamwang na kannaēn hêñ tungkol ha pamitalaba yo kana, gawan ha hadyay lêngêw yo kangko, ta pinaghêhêan yoy dinyag yoy alwan mangêd, haka ha pamakigampi yo kangko. Pamakagilam kon imbalita na, ay lalo kon hinumigla.

† **6:16** Levítico 26:12, Jeremias 32:38, Ezekiel 37:27. ‡ **6:17** Isaias 52:11. § **6:18** Isaias 43:6.

<sup>8</sup> Nakab-i ko man hên kalungkutan kamoyu hên babayo yon tinanggap ya unan hulat ko, ay a kinan anhêhêen ya sarili ko ha pamanulat kon habayto, agyan hinêhê ko ya sarili ko pon hên namwangan ko ya nakbék kaw bayro ha hinulat ko. <sup>9</sup> Amêhêen ay mahigla ko, alwan gawan ha nakab-i kon ikabêlêgêhbêg nakêm yo, noa, mahigla ko ta habaytoy namitolak kamoyu êmên yo paghêhêan ya pinaulayan yoy karawakan ya nalyari kamoyu. Habaytoy bêlêgêhbêg nakêm yo ay ayon ha kalabayan ni Apo Namalyari, kabay pinakinabangan yoy habayto. <sup>10</sup> Embayroy bêlêgêhbêg nakêm ya ayon ha kalabayan ni Apo Namalyari, ay ampamitolak kantamo hên manalibokot ha karawakan, ha ikaligtas tamo hên ayn nanan anhêhêen ya sarili. Noa, ya bêlêgêhbêg nakêm lan a ampagpalokop kan Apo Namalyari, ya a manalibokot ha karawakan, ay ampamitolak kanla ha kamatsan, ya kaparusaan ya ayn angga. <sup>11</sup> Pakaihipên yoy nalyari ha biyay yo gawan ha bêlêgêhbêg nakêm yo, ya ayon ha kalabayan ni Apo Namalyari! Kinahêmêkan yoy sarili yo, haka hadyay limo yo, ya maparusaan kaw, kabay tampol yoy nan pinaral-an ya nanyag kasalanan ya pinaulayan yo hên hato. Ha êmbayro ay naipahlêk yoy na ha kaatag, ya anhumonol kaw na ha kalabayan ni Apo Namalyari. Labay-labay yo kon mahêlêk, ta êmên miúmang ya pamilalamo tamo.

<sup>12</sup> Amêhêen ay malinaw no awta êmbayroy laman hên hatoy hulat ko kamoyu. Habaytoy alwan bat ha nanyag kasalanan o ha pinanyagan kasalanan, noa, ta êmên na êt maipamwang kamoyu ni Apo Namalyari, no ay-êmên ya pamanlugud yo kannaên. <sup>13</sup> Ha dinyag yoy habayto, ay taganán tinalaba kay.

Alwan bêngat habayto, noa, napahigla kay êt ha kahiglaan ni Tito, gawan pinahigla yo ya haka hinumawang ya ihip na hên atsi ya bahê. <sup>14</sup> Impagmahlay kataw kan Tito, bayo ya naniraw kamoyu, haka a ko etaman nipakarêng-êy kana, ta no ay-êmên hên pêtêg ya kaganawan intoro naêñ kamoyu, ay êmbayro êt, ay napaptêgan nay pamidayêw naêñ kamoyu, ha arapan na. <sup>15</sup> Napahanan ya pamanlugud na kamoyu gawan ha pamanggalang yo ha pamananggap yo kana, haka ha boon nakêm yon hinonol ya hinabi na kamoyu. <sup>16</sup> Hadyay kahiglaan ko gawan sigurado ko ya ihundo yoy pamanyag hên kalabayan ni Apo Namalyari.

## 8

### *Dapat boon nakêm ya pam-i*

<sup>1</sup> Patêl ko ha Panginoon, labay kon mamwangan yoy tungkol ha dinyag nan ayn kapantag ya ingalo ni Apo Namalyari kanlan patêl ha Panginoon ya angkapi-tsi-tsipon ha probinsyan Macedonia. <sup>2</sup> Ta ampakaranas hila man hên hadyay kairapan, ay ayn angga ya kahiglaan la, haka ampakulang hila man ha kaganawan kailangan la, ay mahiglay nakêm lan nam-i. <sup>3</sup> Hilay nam-i hên mahiglay nakêm, hên alwan bat ha kaya la, noa, igit pon bayro. Ampaptêgan koy habayto, <sup>4</sup> ta nakiingalo hila kannaên ya dyanan hilan panaon hên manawop kanlan pinili ni Apo Namalyari hên mag-in kana ha balayan Jerusalem ha probinsyan Judea ya ampangailangan. <sup>5</sup> Haka igit pon ha an-êngganan naêñ, ay nagpalokop hila ha Panginoon, bayo hinawpan la kay êt ha pamanhumonol la ha kalabayan ni Apo Namalyari. <sup>6</sup> Gawan hilay taga-Macedonia ay nanyag hên habayto, haka gawan hi Tito ya nunan nama-tsipon hên maiyawop yo kanlan patêl ha Panginoon ha Jerusalem, ya ampangailangan, ay naihipan ko ya hiyay dapat kon iutoh kamoyu, ta êmên na kaw mahawpan hên yariêñ ya pamitsipon yon habaytoy pamipahlêk hên ingalo yo. <sup>7</sup> Gawan hikaw ay ampibahwag gawan ha kataniêhan paniwala

yo, pamipamwang yon habi ni Apo Namalyari, kamwangan yo tungkol kana, kahipégan yo, haka pamanlugud yo kannaén, ay labay naén dayi hén maibahwag etaman ya ingalo yo.

<sup>8</sup> Alwa ha an-utuhan kataw hén mam-i, noa, an-ipamwang kon bat kamoyu ya kahipégan pamanawop lan kapareho yon patêl ha Panginoon, ta no tuwarén yoy pamam-i la, ay mamwangan naén ya pêtêg ya pamanlugud yo.

<sup>9</sup> Muwang yo no ay-êmén kahlay ya ayn kapantag ya ingalo ni Panginoon tamon Jesu-Cristo, ta atsi man kana ya kaganawan bandi ha langit, ay im-balag na pon ya habayto hén hiyay nag-in tawo, ta êmén kitamo magkamain pibandian ha langit.

<sup>10</sup> Amêhén, ya mahabi ko hén tungkol ha habaytoy pamitsipon hén maiha-wop yo, ay mangéd no yarién yoy habayto, gawan haton nagdann ya taon, ay hikaw ya mu-munan labay-labay hén mam-i, haka nag-umpisa kaw na hén manipon. <sup>11</sup> Yarién yo dayi ya habayto, ta êmén ha kahipégan ya impahlék yo hén una, ay maboo ya idin yo ha agyu yon idin. <sup>12</sup> Ta no ha mahiglay nakém ya pam-i yo, ay antanggapén ni Apo Namalyari ya pan-idin yo. A na an-êngganan ya mam-i kaw hén a yo kayan idin.

<sup>13</sup> A ko labay hén mag-in pabyat hila kamoyu, ya hilay patêl ha Jerusalem, ta êmén mag-in mabandi hila. Labay kon bat mabaw-ahan ya pamagkulang la ha pamangailangan. <sup>14</sup> Nitsighaw kaw amêhén, kabay mahawpan yo hila. Lano etaman no nitsighaw hila, ta magkakulang kaw ha pamangailangan, ay mahawpan la kaw. Ha êmbayro ay miyahawop kaw. <sup>15</sup> Habaytoy nanad ha impahulat ni Apo Namalyari, ya tungkol ha nanipon hén manna, ya kaén ya ubat ha langit,

“Hilay nanipon hén mal-at, ay a nagsobra,

haka hilay nanipon hén pérad, ay a etaman hén nagkulang.”\*

<sup>16</sup> Ampahalamat ako kan Apo Namalyari ta hi Tito, ay dinyanan nan kahipégan nakém hén manawop kamoyu hén nanad kahipégan nakém ko hén manawop kamoyu. <sup>17</sup> Muwang koy habayto, ta hén impakihabi ko kan Tito ya iutoh ko ya kamoyu, ay labay-labay na etaman, ta mana nay na awud hén labay hén maniraw bahén. <sup>18</sup> Pakilamo ko kana ya mihay patêl tamo ha Panginoon, ya nibahwag ha kaganawan pagtsiponan lan patêl ha Panginoon, gawan ha pamipamwang na hén Mangangéd ya Habi ya tungkol kan Apo Jesu-Cristo. <sup>19</sup> Alwan bêngat habayto, noa, hiyay pinili la hén mag-in kalamo naén ha pamiatél hén hawop yo kanlan patêl ha Panginoon ya angkapi-tsi-tsipon ha Jerusalem. Ya êmbayroy pamaghuyo naén, ay ha ikapuri hén Panginoon, haka maipahlék ya kangéran nakém naén kanlan mairap.

<sup>20</sup> Ampangillag kay, ta êmén ayn mamintas kannaén ha pamanipon haka pamitayak hén mahlay ya an-ihawop. <sup>21</sup> Ampakikwanan naén hén mag-in usto ya habayto, alwan bat ha hêlék ni Apo Namalyari noa, ha hêlék hén balang miha.

<sup>22</sup> Pakilamo naén êt kanlan habaytoy lowa, ya miha pon ya patêl tamo. Nahêlék naén ya kahipégan na ha kaganawan dyag. Haka amêhén, ay labay-labay na hén manawop kamoyu gawan sigurado ya, ya labay yon manawop.

<sup>23</sup> Hi Tito etaman, ay hiyay kalamo ko haka kahawop ko ha pamaghuyo kamoyu. Haka hila etaman ya loway kaatag pon ya patêl ha Panginoon, ay pan-iutoh lan patêl ha Panginoon ya angkapi-tsi-tsipon ha ikapuri ni Apo Jesu-Cristo. <sup>24</sup> Kabay ipahlék yo kanla ya pamanlugud yo, ta êmén la mapaptégan kanlan patêl ha Panginoon ha ayri man ya pagtsiponan lan patêl ha Panginoon, ya pêtêg ya pamidayêw naén kamoyu ha arapan la.

\* <sup>8:15</sup> Exodus 16:18.

**9**

*Pamanipon hên ihawop kanlan patêl ha Panginoon ha balayan Jerusalem ha probinsyan Judea*

<sup>1</sup> A kina kailangan hên ihundo ya pamanulat ko kamoyu hên tungkol ha pamanawop kanlan pinili ni Apo Namalyari hên mag-in kana ha Jerusalem, <sup>2</sup> ta muwang koy nakal-an kaw hên manawop, haka an-ipagmahlay kataw ha taga-probinsyan Macedonia. Gawan hinabi ko kanla ya hikaw ya tagabalyan Corinto, haka ya kaatag pon ya taga-probinsyan Acaya, ay nakal-an hên mam-i hên hato pon nagdann ya taon. Hên namwangan la ya labay-labay yo hên mam-i, ay napukaw êt ya kalabayan lan mam-i. <sup>3</sup> Noa, an-ipauna ko hilan Tito bahên, ta êmén ko a mipakarêng-êy ha pangipagmahlay kamoyu, haka êmén mail-an ya ihawop yo, hên nanad ha hinabi ko. <sup>4</sup> Ta kayno mipakarêng-êy ako no main makilamo kangko bahên ya patêl ha Panginoon, ya taga-probinsyan Macedonia, haka mahêlêk la kaw ya a nakal-an. Ta no êmbayro, ay mipakarêng-êy kaw etaman. <sup>5</sup> Kabay pinakihabian ko hilan Tito, ya hila pon ya muna bahên, êmén mail-an ya impangako yoy ihawop yo. Ha êmbayro, ay mahêlêk kamoyu, ya mahigla kaw mam-i, haka a kaw napilitan.

<sup>6</sup> Pakaihipên yoy habaytsi, hilay ampamitanêm hên pêpêrad, ay ampamopol hên pêpêrad. Haka hilay ampamitanêm hên mal-at, ay ampamopol hên mal-at. <sup>7</sup> Ya balang miha ay kailangan hên mam-i hên pamanhumonol ha nakêm la, alwan ha angkapilitan bêngat, haka ayn kalamoy pamaghêhê ha sarili, ta anlugarûn ni Apo Namalyari hilay ampam-i hên mahiglay nakêm. <sup>8</sup> Mitsighaw kaw ha kaganawan kailangan yo gawan kan Apo Namalyari, ta êmén kaw makab-i hên kailangan lan kaatag. <sup>9</sup> Habaytoy nanad ha impahulat ni Apo Namalyari hên tungkol ha mapanyag kangêran, “Mapam-i ya kanlan ampangailangan, haka ya pamanyag nan kangêran ay ayn angga.”\*

<sup>10</sup> Hi Apo Namalyari ya ampam-i hên bini ya an-itanêm, haka ampamatubon habayto, ay hiya êt ya mamahan hên atsi kamoyu, ta êmén mapahanan êt ya pamanyag yon kangêran ha pam-i. <sup>11</sup> Ha balang hino, ay patsighawên na kaw, ta êmén mapahanan êt ya pam-i yo hên boon nakêm. Lum-at bayto ya pahalamat kan Apo Namalyari, gawan ha hawop yo ya gêtan naêñ kanla. <sup>12</sup> Ta ha pam-i yo, ay mahawpan hilay pinili ni Apo Namalyari hên mag-in kana ha Jerusalem ya ampangailangan, haka mahigla hilan mipagpahalamat kan Apo Namalyari. <sup>13</sup> Ya boon nakêm yon pam-i kanla, haka ha kaatag, ay mamaptêg ya anhonolên yoy Mangêd ya Habi tungkol kan Apo Jesu-Cristo. Ha êmbayro ay puriên la hi Apo Namalyari. <sup>14</sup> Kabay boon nakêm la kaw hên lugurûn haka ihalangin gawan ha a makwan ihipêñ ya ayn kapantag ya ingalo ni Apo Namalyari ya pinangubatan hên pam-i yo. <sup>15</sup> Halamat kan Apo Namalyari ha indigalo na kantamo ya ayn taganán kapantag, haka ya a makwan ihipêñ!

**10**

*An-ilaban ni apostol Pablo ya tungkulon na ha pangaapostol na*

<sup>1</sup> Hiko, hi Pablo, ay maaypa ya nakêm kano no arap-arapan, noa, maigpit kano no ampanulat ako ubat ha marayo. Noa, gawan ha kaaypaan nakêm ni Apo Jesu-Cristo ya maingaloën, ay ampakihabi kon nangaamêy ya habi, <sup>2</sup> ya a dayi kailangan hên mag-in maigpit ako, no atsi ko ha arap-arapan yo, ta kaya kon habyanan hilay ampaghabi ya ayn ya ha pamimiyay naêñ, ya

\* 9:9 Awit 112:9.

Espiritu ni Apo Namalyari. <sup>3</sup> Pêtêg ya tawo kay bat! Noa, a kay anlumaban kanlan anhumalanghang ha andaygên ni Apo Namalyari, hên nanad ha pamanolumaban lan tawo di ha luta. <sup>4</sup> Ta ya armas naên ay alwan nanad armas lan tawo di ha luta. Noa, ya kapangyarihan ni Apo Namalyari, ay yabay ya panlaban ta êmén mahambut ya hêkaw ni Satanas, ha pamipamwang naên ya kamalian hên toro lan anhumalanghang kan Apo Namalyari, <sup>5</sup> haka ya kaihipan lan mapagmatag-ay, ya ampamaabala kanla ha pamikiúmang la kan Apo Namalyari. Angka-pabayoy naên ya kaganawan kaihipan, ta êmén habaytoy mag-in mahonol ha kalabayan ni Apo Jesu-Cristo. <sup>6</sup> Hikaw etaman, ustom napaptêgan yoy nay pamanhumonol yo, ay nakal-an kay hên paral-an hilay alwan mahonol kan Apo Jesu-Cristo.

<sup>7</sup> Paan kaw mapaniwala ha angkahêlêk yon bat! No angkasigurado yo ya apostol ni Apo Jesu-Cristo ya mihay tawo, ay dapat yon ihipêñ ya hikay man, ay apostol ni Apo Jesu-Cristo. <sup>8</sup> No an-ipagmahlay naên man ya tungkulon ya indin kannaêñ hên Panginoon, ay a kay mipakarêng-êy ta malinaw ya pêtêg ya anhabien ko, ta habaytoy tungkulon naên, ay ha ikataniêñ hên paniwala yo, alwan ha ikaalih hên paniwala yo. <sup>9</sup> Paan yon ihipêñ ya ampalimoêñ kataw ha hulat ko. <sup>10</sup> Main ampaghabibi ya maigpit ako kano ha pamanulat ko, noa, paglatêng ha arap-arapan, ay angkalimo kon maghabin êmbayro, kabay ayn pukat kano ya anhabien ko. <sup>11</sup> Dapat lan mamwangan hên hilay ampaghabin êmbayro, ya no ay-êmén ya an-ihulat ko, ay êmbayro ko êt ha arap-arapan, ta pêtêgêñ ko ya hinulat ko.

<sup>12</sup> Hikay etaman, ay a naêñ an-ipagmahlay ya sarili naêñ hên nanad ha pandaygên lan kaatag. Ha pangamulala la, ay ampanukat hilan kangêran la ha kangêran hên kapareho la. <sup>13</sup> Noa, hikay etaman, ay an-ipagmahlay naêñ bat ya impadyag kannaêñ ni Apo Namalyari, haka kalamo bayro ya pamanoro naêñ kamoyu. <sup>14</sup> Ha tungkulon naêñ kamoyu, ay a naêñ ampalumbangan ya impadyag ni Apo Namalyari kannaêñ, ta hikay ya nunan nilumagay hên namipamwang kamoyu hên Mangangêd ya Habi ya tungkol kan Apo Jesu-Cristo. <sup>15</sup> Ya pamagmahlay naêñ, ay alwan palumbang ha impadyag kannaêñ. A naêñ ipagmahlay ya pinagpagalan hên kaatag. An-êngganan naêñ ya tumaniêñ ya paniwala yo, ta êmén mapahanan ya madyag naêñ bahêñ. <sup>16</sup> Maipamwang naêñ bayto ya Mangêd ya Habi tungkol kan Apo Jesu-Cristo ha mangarayo ya balayan ya a pon naabutan. Haka ayn mahabi ya an-ipagmahlay naêñ ya pinagpagalan lan kaatag.

<sup>17</sup> Honolêñ tamo ya impahulat ni Apo Namalyari, ya wanana hulat, “No main labay hên magmahlay, ay dapat nan ipagmahlay ya dinyag hên Panginoon.” <sup>18</sup> Ayn pukat ya lambung lan mapaglambung! Noa, ya pamandayêw ya ubat kan Apo Namalyari ay main pukat.

## 11

*Impamwang ni apostol Pablo ya tungkol kanlan nagbabaran apostol ni Apo Jesu-Cristo*

<sup>1</sup> Dayi maintindihan yo ko, no hiko man ya ampaghabin nanad ayn minuwang. Têêhêñ yoy pamaghabibi ko! <sup>2</sup> Anlugurêñ kaw hên nanad ha pamanlugud ni Apo Namalyari kamoyu. Ya kaalimbawaan yo ay mihay malinis ya dalaga ya a pon nakitakêh. Ya kaalimbawaan ni Apo Jesu-Cristo, ay mihay lalaki ya an-ikasal kanan habaytoy dalaga. Ya kaalimbawaan ko etaman ay mihay ampanayhay hên habaytoy dalaga ta êmén ko ya iarap kan Apo Jesu-Cristo hên malinis. <sup>3</sup> Noa, ampotogêñ ako, ta kayno midayo kaw ha pêtêg ya pamanlugud yo kan Apo Jesu-Cristo. Habaytoy nanad ha

nalyari kan Eva, ya niloko ni Satanas. <sup>4</sup> Ta tampol yon antanggapêñ ya hinon anlumatêng ya ampangitoro hêñ tungkol kan Apo Jesus, alwa man hêñ pareho ha toro naêñ. Natanggap yoy na ya Espiritu ni Apo Namalyari, yan antanggapêñ yo êt ya hinon kaatag ya espiritu. Tinanggap yoy nay Mangêd ya Habi tungkol kan Apo Jesu-Cristo, yan antanggapêñ yo êt ya hinon bayon paniwala.

<sup>5</sup> Anhabiên la ya hila kano ya mantêg hêñ apostol ni Apo Namalyari, noa, ha ihip ko etaman, ay a ko angkatawli kanlan habayto. <sup>6</sup> Malyarin ayn akon galing hêñ mag-habi ha arapan hêñ kal-atan, noa, muwang koy anhabiên ko! Siguradon muwang yo etaman ya pêtêg ya habayto, ta napaptêgan yoy na.

<sup>7</sup> A ko etaman impabayad ya pamipamwang ko hêñ Mangangêd ya Habi ya tungkol kan Apo Jesu-Cristo. Mahabi yo warin kasalanan ya habayto? Nagpakaaypa ko, ta êmêñ kaw mitag-ay. <sup>8</sup> Ya nam-in pamangailangan ko hêñ haton antoroan kataw, ay hilay patêl ha Panginoon ya angkapi-tsi-tsipon ha kaatag ya legal, kabay nanad ko hilay nan pinamaw-ahan ha pamangailangan la, êmêñ kataw matoroan. <sup>9</sup> Hêñ nagkulang ako ha kaganawan kailangan hêñ atsi ko bahêñ, ay a ko nag-in pabyat kamoyu, ta inatlan la ko hêñ patêl ya taga-probinsyan Macedonia. Kabay paubat hêñ hato angga amêhêñ, ay a ko nag-in pabyat kamoyu. <sup>10</sup> Gawan ampaghuyo ko kan Apo Jesu-Cristo, haka gawan hiyay taganán pêtêg, ay pêtêg etaman ya anhabiên ko. Ipagmahlay ko ha boon probinsyan Acaya, ya a ko nag-in pabyat kamoyu. <sup>11</sup> Awta kaya, a ko pahawop kamoyu? Yarin gawan a kataw anlugurêñ! Muwang ni Apo Namalyari ya anlugurêñ kataw!

<sup>12</sup> Ihundo ko ya a ko nag-in pabyat kamoyu, ta êmêñ a mahabi lan alwan pêtêg apostol, ya pamaghuyo la, ay pareho ha pamaghuyo naêñ. <sup>13</sup> Hila ay alwan pêtêg apostol. Hilay manloko hêñ ampagbabaran apostol ni Apo Jesu-Cristo. <sup>14</sup> Paan yon pag-êpapahan ya main ampagbabaran apostol hila ni Apo Jesu-Cristo. Hi Satanas man, ay ampagbabara ya hiyay anghel hêñ hawang ya ubat kan Apo Namalyari. <sup>15</sup> Kabay paan yon pag-êpapahan ya hilay tagahuyo ni Satanas, ay ampagbabara hêñ hila ay mahonol ya tagahuyo ni Apo Namalyari. Ya mag-in parusa la lano, ay hêpat ha andaygêñ lay karawakan.

### *Ya kairapan ya nadanasan ni apostol Pablo ha pangaapostol na*

<sup>16</sup> Paan kaw mangihip hêñ ayn akon minúwang. No êndat yon ayn akon minúwang, ay hali gilamêñ yoy nay pamaglambung ko, ta anggilamêñ yo etaman ya pamaglambung lan kaatag. <sup>17</sup> Ya pamaglambung ko, ay alwan kaugalian ni Panginoon Jesu-Cristo, noa, kaugalian lan ayn minúwang. <sup>18</sup> Gawan main bahêñ kamoyu ya ampaglambung hêñ tungkol ha panluta, ay hiko man, ay makalambung, ta êmêñ ko mailaban ya tungkulon ko ha pangaapostol ko. <sup>19</sup> Siguradon paulayan yo kon maglambung, ta anggilamêñ yoy paglambung lan ampagbabaran apostol ni Apo Jesu-Cristo. Êndat yon manga-galing kaw mangihip! <sup>20</sup> Ampaulayan yon ipohêñ la kaw, an-tsi-tsikmêñ, panlokoêñ, musmusêñ, haka tampalingêñ. <sup>21</sup> Yarin mangêd ya êmbahêñ ya andaygêñ la kamoyu! An-aminêñ ko ya a ko madyag ya êmbahêñ kamoyu!

Noa, ya paglambung lan habain, ay agyu ko êt hêñ tuwarêñ, hêñ nanad ayn minúwang. <sup>22</sup> Hebreo hila man, ay Hebreo ko etaman! Israelita hila man, ay Israelita ko etaman! Láhi hila man ni apo Abraham, ay láhi ko etaman ni apo Abraham. <sup>23</sup> Anhabiên la ya tagahuyo hila ni Apo Jesu-Cristo, noa, nanad pamaghabin mihay angkamurit, ay anhabiên ko ya hikoy taganán tagahuyo na. Mahipêg ako kanla, panay akon angkahukul gawan ha pamanoro hêñ

tungkol kan Apo Jesu-Cristo, panay akon angkalatiko, haka panay akon ampamérad matsi. <sup>24</sup> Katalima kon nilatiko hén mani tatlumpo boy siyam ya latiko hén kapareho kon Israelita. <sup>25</sup> Katatlo kon pinagpapatok hén hundalon gobyernon Roma. Minghan akon pinbabato, katatlon nangaagwat ya barko ya anhakyan ko, haka minghan mamapayabi haka mamapawatah ako hén nakababad ha bonak hén dagat. <sup>26</sup> Mal-at ya naranasan koy kapapotog ha panay akon anlumagay hén manoro. Angkaanol ako ha ilog, haka anhabatén akon manakaw. Atsi ko ha kapapotog gawan ha kapareho kon Israelita, haka gawan kanlan alwan Israelita. Atsi ko ha kapapotog ha balayan, ha kabalah-balahan, ha dagat, haka gawan kanlan ampagbabara ya patêl hila ha Panginoon. <sup>27</sup> Naranasan ko êt ya hadyay pamagkulang ha pamangailangan, haka ya hadyay pagal ha pamag-obra. Panay akon angkay-puyat, panay akon anlonohén haka kainêm. Naranasan ko êt ya hadyay kâbel haka ayn maisambra. <sup>28</sup> Miha êt, ay panay anyumagah ya kaihipan ko ha patêl ha Panginoon ha kaganawan pagtsiponan la. <sup>29</sup> Angkadamatay ako ha kaganawan angkaranasan la, no angkumbél hila ha paniwala la, ay anyumagah ya nakêm ko. Haka hadyay huluk ko ha pangubatan hén pamanyag kasalanan la.

<sup>30</sup> Gawan kailangan kon maglamburg, ay ipaglamburg ko ya ayn akon madyag ha sarili kon hékaw haka galing. <sup>31</sup> Muwang ni Apo Namalyari ya Tatang ni Panginoon Jesu-Cristo ya pêtéy ya an-ihulat ko. Purién ya hén ayn-angga! <sup>32</sup> Hén atsi ko ha balayan Damasco, ay in-utoh ni Arin Aretas ya ipabantay ni gobernador ya awahan ha balayan ta êmén ipadakêp ako. <sup>33</sup> Noa, ingkulug la kon patêl ha Panginoon ha mahlay ya lubon, haka impadann la ko ha dorongawan hén in-antotoh ha bakod hén balayan, kabay nakatakah ako.

## 12

### *Ya impahalumata kan apostol Pablo*

<sup>1</sup> Angkapilitan akon maglamburg, ayn man kapukat-pukat ya paglamburg. Ipaglamburg ko améhén, ya impahalumata haka ya impaihip kangko hén Panginoon. <sup>2</sup> Main akon kilala ya lalaki\* ya main pakikimiha kan Apo Jesu-Cristo. Nakalabah ya mapo boy apat ya taon hén hiyay gintan ha ikatlon langit, ya ampaidyanan ni Apo Namalyari. A ko muwang no kalamo ya lawini na o no espiritu nan bêngat. Hi Apo Namalyarin bat ya ampakamwang hén habayto. <sup>3</sup> Omanén kon ihulat, ya hiyay gintan ha Paraiso, ya ampaidyanan ni Apo Namalyari. A ko muwang no kalamo ya lawini na o no espiritu nan bêngat. Hi Apo Namalyarin bat ya ampakamwang hén habayto. <sup>4</sup> Bayro ha langit ya ambaégén Paraiso, ay main yan nagilam ya a makwan ipamwang ha kaatag, haka binawal êt ni Apo Namalyari hén ipamwang. <sup>5</sup> Nakal-an akon ipaglamburg ya habaytoy lalaki. A ko ipaglamburg ya sarili ko, noa, ipaglamburg kon bat ya ayn akon madyag ha sarili kon hékaw haka galing. <sup>6</sup> No labay kon maglamburg, ay a ko maghabi hén nanad pamaghabin ayn minúwang, ta panay pêtéy ya anhabien ko. Noa, a ko maglamburg, ta a ko labay hén itag-ay ko hén igit ha dapat. Labay kon mamwangan ako gawan ha kangéran dyag ya angkahêlêk ha biyay ko haka gawan ha angkagilaman la ha toro ko.

<sup>7</sup> Ta êmén ko a ipagmahlay ya kapapaêpapah ya impahêlêk ni Apo Namalyari kangko, ay pinaulayan nan hikoy pairapan hén in-utoh ni Satanas ya

\* **12:2** An-ipamwang ni apostol Pablo ya nalyari kana, noa, an-idann na ha istorya hén kaatag.

nanad diwi ha lawini ko ya taganán a mialíh. <sup>8</sup> Katatlo kon impanalangin ha Panginoon ya alihén na ya habayto. <sup>9</sup> Noa, wana kangko, “Hukad ya pangingalo ko kamo ta êmén mo matéêh ya habayto, haka lalon mamwangan ya kapangyarihan ko no ayn kan sarilin hékaw haka galing.” Ya pamagku-lang ko ha sarilin hékaw haka galing, ay yabay ya tana ya an-ipaglambung ko, ta êmén mahélêk kangko ya kapangyarihan ni Apo Jesu-Cristo. <sup>10</sup> Kabay napatékbék ya nakém ko, no gawan ha pamaghuyo ko kan Apo Jesu-Cristo, ay angkaranasan ko ya kakulangan ha sarili kon hékaw haka galing, o pammusmus, o kairapan, o hadyay pamairap, o ya kapapotog. Ta no ayn akon sarilin hékaw haka galing, ay ampakhawên ako ni Apo Jesu-Cristo.

*Ya pamanlugud ni apostol Pablo kanlan patêl ha Panginoon ya angkapi-tsitsipon ha balayan Corinto*

<sup>11</sup> No ya pamanulat ko ay nanad pamanulat hén ayn minúwang, ay habaytoy gawan hikaw ya nangipilit kangko hén ipagmahlay ya sarili ko gawan a yo ko an-ipaglaban ha arapan lan ampaghabin apostol hila. A ko ampitawli kanlan habain ya ampagbabaran apostol, ayn ako man hén sarilin kaya.

<sup>12</sup> Hén haton atsi ko bahê kamoyu, ay namwangan yo etaman ya pêtêg akon apostol, gawan ha hino-hino kay na hén ya kapapaêpapah haka makapangyarihan ya impadyag ni Apo Namalyari kangko. Inhundo koy impadyag na kangko hén main pamagtêêh. <sup>13</sup> Parehon bat ya pamanoro ko kamoyu, haka ya pamanoro ko kanlan kaatag ya patêl ha Panginoon ya angkapi-tsitsipon ha ayri man ya legal. Mihan bêngat ya alwan pareho, yabay ya a ko nag-in pabyat kamoyu ta a ko nakikwa hén hinoman kamoyu. No êndat yon kasalanan ko kamoyu ya habayto, ay patawarê yo ko.

<sup>14</sup> No makahiraw ako bahê, ay pantatloy nan pamaniraw koy habayto. Labay kon pataniêhén ya paniwala yo, haka nanad hén hato, ay a ko mag-in pabyat kamoyu, ta alwan pibandian yo, noa, pamanlugud yo ya antapolên ko. Ta hikoy nanad toa yo, haka ya dapat manipon hén para ha anak, ay toa la, alwan anak ya manipon hén para ha toa. <sup>15</sup> An-ikahigla kon idin ya kaganawan atsi kangko, anggan sarili ko ha ikakangêd yo. Noa, kayno gawan ha hadyay pamanlugud ko kamoyu, ay pêpérâd ya pamanlugud ya itumbah yo kangko! <sup>16</sup> Muwang yo ya a ko nag-in pabyat ha hinoman kamoyu. Noa, main ungno kamoyu ya ampaghabi hén hikaw ya tsinékmê ko. <sup>17</sup> Awta? Tsinékmê kataw ha hinon kalamo ko ya in-utoh ko bahê? <sup>18</sup> Pinakihabian ko hi Tito hén maniraw bahê, haka pinakilamo ko kana ya mihay patêl ha Panginoon. Awta? Hi Tito ya nanékmê kamoyu? Yarin alwan mimihay pamimiyay naê! Yarin alwan pareho ya pamakilamo naê!

<sup>19</sup> Awta? Êndat yon an-iligtas naê ya sarili naê ha arapan yo? Alwa! Anlugurên kon patêl ha Panginoon, gawan ha pakikimiha naê kan Apo Jesu-Cristo, ay an-ipalinaw ko ha arapan ni Apo Namalyari ya ha ikataniêh hén paniwala yo ya kaganawan ya anhabiêh, haka andaygén naê. <sup>20</sup> Mampotog ako ta kayno ha pamaniraw ko bahê, ay main akon mahélêk ha pamimiyay yo ya a ko malabayan, haka mahélêk yoy pamarala ko kamoyu, ya a yo labay mahélêk. Ta kayno makalatêng akon ampiuhubakan, ampiriridyaan, ampiuhuluk, pami-iimot, pamidadaêh, pamididikaw, kalangkaan, haka kaguloan. <sup>21</sup> Ampotogén ako ta kayno mipakarêng-êy akon oman ha arapan ni Apo Namalyari gawan kamoyu no makalatêng akon êmbayroy pamimiyay yo. Ampotogén ako êt ta kayno malatêng ko hilay nanyag kasalanan hén hato ya a pon naghêhê hén nanalibokot ha pamanyag lan karawakan kalabayan lawini nanad ha pamanakêh ha alwa lan ahawa, haka ya panay hén

pamanyag hēn kaatag êt ya kagatēan ya kapaparêng-êy. Mamalagêhbêg ya nakêm ko no êmbayroy malatêng ko.

## 13

### *Kaatag pon ya babalá haka pangumusta*

<sup>1</sup> No makahiraw ako bahêن, ay pantatlon pamaniraw ko ya habayto. Haka no main bahêن ya kailangan kon lingonêن, ay mahonol ya impahulat ni Apo Namalyari, ya wanana hulat, “No main hêن ambad-an hêن nanyag hêن karawakan, ay kailangan main lowa o tatloy katawo ya mamaptêg.”\* <sup>2</sup> Ha ikalwan pamaniraw ko bahêن, ay binawal ko hilay nipanyag kasalanan. No a la êt intunggêن ya habayto, ay omanêن kon habiêن kanla, anggan kanlan ampakihonol kanla ya ubuhêن ko hilan paral-an. <sup>3</sup> Daygêن koy habayto ha kapangyarihan ni Apo Namalyari, ta êmêن ko paptêgan kamoyu ya ampan-gubat kan Apo Jesu-Cristo ya anhabiêن ko. Taganán makapangyarihan ya haka paral-an na kaw no habaytoy kailangan yo. <sup>4</sup> Hêن natsi ya ha koros, ay êndat lan kaatag ya ayn yan kapangyarihan, noa, hêن nabiyay yan oman, ay namwangan la, ya atsi kana ya ayn kapantag ya kapangyarihan ni Apo Namalyari. Ha pamaniraw ko bahêن, ay tinêêh ko ya andaygêن yoy karawakan, gawan ha pakikimiha ko kana. Noa, ha pag-orong ko bahêن, gawan êt ha pakikimiha ko kana, ay mahêlêk yo ya main akon kapangyarihan ya ubat kan Apo Namalyari hêن paral-an hilay mapanyag karawakan, no a la itunggêن ya habayto.

<sup>5</sup> Nakêm yo, ya dapat yon pakapoliahêن no ampamiyay kaw hêن main paniwala kana. Taganán muwang yo ya atsi kamoyu hi Apo Jesu-Cristo! Kayno ayn ya pon kamoyu, no a kaw pon ampaniwala kana. <sup>6</sup> Taganán mamwangan yo êt ya hikoy pêtêg ya apostol na! <sup>7</sup> Noa, an-ihalangin naêن kan Apo Namalyari ya a kaw dayi manyag hêن hinon karawakan ya dapat pamaral-an kamoyu, alwan ha ikadayêw naêن, noa, êmêن kaw makadyag no hinoy mangêd, lumtaw kay man hêن nanad ayn kapangyarihan gawan a naêن naipahlêk ya tungkulon naêن hêن paral-an kaw. <sup>8</sup> Ta a kay malyarin humalanghang ha kaptêgan, noa, an-ipamwang naêن ya habayto. <sup>9</sup> Ta humigla kay no nakataniêh ya paniwala yo, lumtaw kay man hêن nanad ayn kapangyarihan. An-ihalangin naêن kaw, ya madyag yoy mangêd ha hêlêk ni Apo Namalyari. <sup>10</sup> An-ihulat koy habaytsi kaban ayn ako pon bahêن, ta êmêن ha paglatêng ko, ay a kina kailangan hêن ipahlêk kamoyu ya tungkulon ya indin na kangko ni Apo Namalyari hêن paral-an kaw. Ta habaytoy tungkulon ay ha ikataniêh hêن paniwala yo, alwan ha ikaalíh hêن paniwala yo.

<sup>11</sup> Patêl ko ha Panginoon, angga tana pon di. Kaillag kaw. Pakikwanan yon mag-in mangêd ya pamimiyay yo, haka pakahonolêن yoy kaganawan imbilin ko kamoyu. Mikakahundo kaw haka milalamo kaw hêن mangêd ta no daygêن yoy habayto ay magpaidi ya kamoyu hi Apo Namalyari, haka maranasan yo ya pamanlugud haka kapatêkbêkan ya ubat kana.

<sup>12</sup> Mikukumista kaw ta êmêن ipahlêk ya pamanlugud yo ha miha ta miha hêن nanad patêl ha Panginoon.

Angkumustaêن la kaw hêن kaganawan ya pinili ni Apo Namalyari hêن mag-in kana. <sup>13</sup> An-ihalangin kataw ya panay na kaw ingalwan ni Panginoon Jesu-Cristo, haka panay yon matanam ya pamanlugud ni Apo Namalyari, haka maubuh kaw hêن magkamain hêن mangêd ya pamilalamo ha miha ta miha gawan atsi kamoyu ya Espiritu na.

\* **13:1** Deuteronomio 19:15.

## Ya hulat ni apostol Pablo kanlan ampaniwala kan Apo Jesu-Cristo ha Galacia

### *Paunan habi*

Hêñ intoro ya Mangêd ya Habi tungkol kan Apo Jesu-Cristo kanlan alwan Israelita, ay tinanggap la ya habayto, noa, nilumtaw ya kotang no dapat lan honolêñ ya Kautuhan ya impahulat ni Apo Namalyari kan apo Moises. Bayro kanlan ampaniwala ha Galacia, ya mihay probinsyan Roma ha Asia Menor, ay main nilumatêng ya ampanoro hêñ kailangan honolêñ ya Kautuhan ni apo Moises bayo mag-in mangêd ha hêlêk ni Apo Namalyari. Labay ni apostol Pablo di ha hulat na kanlan taga-Galacia, ay paorongêñ hila ha pêtêg ya paniwala, ta nitama hilay na bayro ha alwan pêtêg ya toro.

Hinulat ni apostol Pablo di, ya hilay tawo ay mag-in mangêd ha hêlêk ni Apo Namalyari gawan ha paniwala la kan Apo Jesu-Cristo, alwan gawan ha pamanhumonol la ha Kautuhan.

Kabooan hêñ pinakalaman

Umpisan hulat 1:1-10

Ya pangaapostol ni apostol Pablo 1:11-2:21

No ay-êmêñ mag-in mangêd ha hêlêk ni Apo Namalyari 3:1-4:31

Paan mag-orong ha pangaipoh 5:1-26

Dapat miyahawop 6:1-10

Tawlin habi 6:11-18

<sup>1</sup> Hiko hi Pablo ya mihay apostol, ya in-utoh ni Apo Namalyari. Alwan tawo ya namili hêñ nangiutoh kangko, ta ya nangiutoh kangko, ay hi Apo Jesu-Cristo, haka ya Tatang na, hi Apo Namalyari, ya namabiyay kanan oman. <sup>2</sup> Hilay kalamo ko di, ya patêl ha Panginoon, ay kalamo ko hêñ ampangumusta kamoyun patêl ha Panginoon ya angkapi-tsi-tsipon bahêñ ha probinsyan Galacia.

<sup>3</sup> An-ihalangin naêñ kaw ya dyanan kaw dayi hêñ kapatêkbêkan nakêm, haka ingalwan kaw dayi ni Apo Namalyari ya Tatang tamo, haka Panginoon Jesu-Cristo. <sup>4</sup> Ha kalabayan nan Tatang tamo, hi Apo Namalyari, ay indin ni Apo Jesu-Cristo ya lawini na hêñ matsu, gawan ha kasalanan tamo, ta êmêñ kitamo miligtas haka midayo ha kaganawan nangarawak ya angkalyari amêhêñ di ha luta. <sup>5</sup> Purién hi Apo Namalyari hêñ angga-angga. Amen.

### *Ya pêtêg ya toro ya tungkol kan Apo Jesu-Cristo*

<sup>6</sup> Hi Apo Namalyari ya nanagyat kamoyu, gawan ha ayn kapantag ya ingalo ni Apo Jesu-Cristo. Ampag-êpapah ako kamoyu ta nataluh yo yan tinalibatokan ta nagtugigih kaw ha alwan pêtêg ya toro. <sup>7</sup> Ya Mangêd ya Habi, ya miligtas kitamo gawan ha paniwala tamo kan Apo Jesu-Cristo, ay ahina maioman. Noa, main ampanggulo hêñ ihip yo ta labay lan itumbalik ya habayto ya kaptégan. <sup>8</sup> Main man anghel ya ubat ha langit, o miha kannaêñ man, ya ampamitoro hêñ halanghang ha intoro naêñ kamoyu, ay parusaan ya dayi ni Apo Namalyari ha impiyerno. <sup>9</sup> Omanêñ kina êt habiêñ kamoyu ya habaytoy hinabi naêñ haton bayri, no main mamitoro kamoyu hêñ kaatag ya toro ha tinanggap yoy nay toro, ay parusaan ya dayi ni Apo Namalyari ha impiyerno.

<sup>10</sup> Hino ya mahabi yo ha an-ipamwang ko? Kapareho ko, o hi Apo Namalyari ya labay kon pahiglaêñ? Kayno êndat yo no hikoy ampanapol êt hêñ

pamandayêw hên tawo, hên nanad ha mana kon andaygên. No ampanapol akon pamandayêw hên tawo, ay alwa kon tagahuyo ni Apo Jesu-Cristo.

### *No ay-êmén nag-in apostol hi Pablo*

<sup>11</sup> Patêl ko, labay kon mamwangan yo ya Mangêd ya Habi ya impamwang ko kamoyu, ay alwan ubat ha kaihipan tawo. <sup>12</sup> Alwan tawo ya namidaoh o namitoro hên habayto kangko, noa, hi Apo Jesu-Cristo ya namipamwang hên habayto kangko.

<sup>13</sup> Kayno nabalitaan yo kina no ay-êmén ya biyay ko hên haton bayri ha pamanhumonol ko ha paniwala naén hên Israelita. Hên hato ay hadyay pamairap ko kanlan ampaniwala kan Apo Jesu-Cristo, ta labay kon ubuhêñ hilan patsên. <sup>14</sup> Ha kal-atan naén Israelita ya kapareho kon edad ay hiko ya pinakamahipêg ha pamanhumonol ha kaugalian hên ninuno naén.

<sup>15</sup> Noa, gawan ha ayn kapantag ya ingalo ni Apo Namalyari, ay pinili na kina hên hato êt, bayo ko in-anak, ta daygên na kon tagahuyo na. <sup>16</sup> Kabay hên impamwang na kangko ya Anak na ya hi Apo Jesu-Cristo, ta êmén ko ya itoro kamoyun alwan Israelita, ay hinonol ko yan tampol hên a kina nakikwa hên payo ha hinoman ya tawo. <sup>17</sup> Haka a ko nilumakat ha balayan Jerusalem hên nagpatoro kanlan nuna kangkon nag-in apostol. Noa, nagtagloh ako ha logal ya marayo ha tawo ha bansan Arabia. Hên pinag-aralan koy kahulatan ni Apo Namalyari bayro, ay nag-orong ako ha balayan Damasco. <sup>18</sup> Pangayari hên tatloy taon ay nilumakat ako ha balayan Jerusalem hên nakibalay kan Pedro. Nilaêh ako bayro kana hên labinlimay allo. <sup>19</sup> Ayn akon nahêlêk bayro ya kaatag ya apostol no alwan bêngat hi Santiago ya ali ni Apo Jesu-Cristo.

<sup>20</sup> Pêtêg ya an-ihulat ko kamoyu. A ko ampaglaram. Muwang ni Apo Namalyari.

<sup>21</sup> Pangayari hên habayto ay nammita ko ha probinsyan Siria haka Cilicia. <sup>22</sup> A la ko êt mantêg muwang hên hilay patêl ha Panginoon ya angkapi-tsi-tsipon ha probinsyan Judea. <sup>23</sup> Nagilam lan bêngat ha kaatag ya ampaghabi ya wanla, “Ya ampamairap kantamo pon haton bayri, ay ampamitoroy na amêhêñ, hên tungkol ha paniwala kan Panginoon Jesu-Cristo, ya paniwala ya labay nan hiraêñ hên haton allo.” <sup>24</sup> Pinuri la hi Apo Namalyari gawan ha nalyari kangko, ya no ay-êmén akon nagkamain hên paniwala ya nanad kanla.

## 2

### *Naniraw ana êt hi apostol Pablo ha Jerusalem*

<sup>1</sup> Pangayari hên labin-apat ya taon ay nilumakat kina êt ha balayan Jerusalem. Kalamo ko hi Bernabe haka pinakilako ko êt hi Tito. <sup>2</sup> Nilumakat kina êt bayro ta impaihip kangko ni Apo Namalyari ya dapat kon maniraw bayro kanlan ampamaala kanlan patêl ha Panginoon ya angkapi-tsi-tsipon. Kanlan ampamaala bêngat, ay impalinaw ko ya an-itoro\* ko kamoyun alwan Israelita. Impamwang koy habayto, ta a ko labay ya mag-in ayn alagá, ya pagal ko hên hato angga amêhêñ. <sup>3</sup> Nakiuyon hila etaman ha impamulah ko ta a la impatuli hi Tito ya kalamo ko, Griego ya man ya a pon tinuli. <sup>4</sup> Noa, ya nalyari ay main nakilamo bayro hên ungnoy kaparehon Israelita ya waringan ampaniwala kan Apo Jesu-Cristo, ta labay la kay hên imatonan gawan ayn kitamina ha aypa lan Kautuhan ni apo Moises gawan main kitaminan pamakimiha kan Apo Jesu-Cristo. Labay lan pahonolêñ la kitamo

\* **2:2** Ya miligtas kaw gawan ha paniwala yo kan Apo Jesu-Cristo. A yoy nan kailangan palokop ha kaugalian naén Israelita hên nanad ha panuli.

pon bayro ha Kautuhan hên nanad hên ipoh. <sup>5</sup> Noa, pêrad man, ay a kay nakiuyon kanla, ta êmén a mahamutan hên alwan kaptêgan ya Mangêd ya Habi tungkol kan Apo Jesu-Cristo, ya ampaniwal-an yo.

<sup>6</sup> Hila man ya ambalayêñ poon lan patêl ha Panginoon ya angkapi-tsi-tsipon ha Jerusalem, ay ayn hilan impahan ya dapat kon itoro. Ayn kangko no hino hila ta pare-pareho kitamo ha arapan ni Apo Namalyari. <sup>7</sup> Pinaniwal-an la ko ya hiko ay pinili ni Apo Namalyari hên mangitoro hên Mangêd ya Habi kamoyun alwan Israelita. Hi Pedro etaman, ay pinili nan mangitoro kanlan kapareho naêñ Israelita. <sup>8</sup> Gawan bay, no ay-êmén na yan hinawpan ni Apo Namalyari hi Pedro ha pangaapostol na kanlan kapareho naêñ Israelita, ay êmbayro êt, ay hinawpan na ko etaman ha pangaapostol ko kamoyun alwan Israelita. <sup>9</sup> Kabay hi Santiago, hi Pedro, haka hi Juan ya ambalayêñ poon lan patêl ha Panginoon ya angkapi-tsi-tsipon ha Jerusalem, ay nananggap kannaêñ hên mag-in kalamo la, hên nabalayan la ya ayn kapantag ya ingalo ni Apo Namalyari kangko. Napikahundoan naêñ ni Bernabe ya ihundo ya panoro naêñ kamoyun alwan Israelita, ta hila etaman ay ihundo lay panoro la kanlan kapareho naêñ Israelita. <sup>10</sup> Pinakihabi lan bêngat kannaêñ ya a naêñ paulayan hilay mangairap kanlan patêl ha Panginoon ya angkapi-tsi-tsipon ha Jerusalem. Mahigla ko etaman hên manyag habayto.

### *Hinabyanan ni apostol Pablo hi apostol Pedro*

<sup>11</sup> Minghan, hên naniraw hi Pedro bayro kannaêñ ha balayan Antioquia, ay arap-arapan ko yan hinabyanan gawan main yan dinyag ya alwan mangêd. <sup>12</sup> Ta haton minghan in-utoh kannaêñ ni Santiago ya ungnoy lalaki, ya Israelita, ya ampaniwala kan Apo Jesu-Cristo. Bayo hila nilumatêng ay ampangan yay na hi Pedro hên kaaêm lan kapareho yon alwan Israelita. Noa, hên nilumatêng hilay habaytoy in-utoh ni Santiago ay nagpakanawa yan nagdayo hên nagpapawa kanlan kaaêm na, gawan bawal kannaêñ hên Israelita, hên kiaêm kanlan alwan Israelita. Dinyag nay habayto ta malimo ya hên mahabyanan yan Israelita ya an-ipalêkpék ya dapat patuli hilay ampaniwala kan Panginoon Jesu-Cristo, no labay la hên madyanan hilan biyay ya ayn angga. <sup>13</sup> Haka hilay kaatag ya patêl ha Panginoon ya Israelita, ay nanoto kan Pedro, ya waringan a hila kiaêm kanlan alwan Israelita, kabay hi Bernabe ay naamuyot etaman ha pagbabara la. <sup>14</sup> Hêñ nahêlék ko ya ampidayo hilay na ha kaptêgan hên Mangêd ya Habi tungkol kan Apo Jesu-Cristo, ay hinabi ko kan Pedro ha arapan lan kal-atan, ya wangko, “No hika, ya mihay Israelita, ay a kay nan anhumonol ha ugali naêñ, ay dapat a mon patolukêñ hilay alwan Israelita hên humonol.”

### *Mag-in kitamo hên ayn kasalanan ha hêlêk ni Apo Namalyari, gawan ha paniwala tamo kan Apo Jesu-Cristo*

<sup>15</sup> Hinabi kina êt kanlan kal-atan hên taga-Antioquia, ya wangko, “Hikay ya Israelita, ay alwan nanad kamoyun alwan Israelita. <sup>16</sup> Êmbayro man, ay muwang naêñ ya a nan an-iúmang kana ni Apo Namalyari hên an-itad hên ayn kasalanan ya hinoman gawan ha pamanhumonol la ha Kautuhan ni apo Moises. An-itad na kitamo ni Apo Namalyari hên ayn kasalanan gawan bêngat ha paniwala tamo kan Apo Jesu-Cristo. Hikay man ya Israelita ay ampaniwala kana, ta êmén na kay itad hên ayn kasalanan gawan ha paniwala naêñ kana, alwan gawan ha pamanhumonol naêñ ha Kautuhan.

<sup>17</sup> “Labay-labay tamon mag-in ayn kasalanan ha hêlêk ni Apo Namalyari, hên gawan bêngat ha paniwala tamo kan Apo Jesu-Cristo, noa, wanlan kaatag

ya kapareho kon Israelita ya kasalanan kano ya habain, ta a tamo anhonolên ya Kautuhan. No êmbayro dayi, ay hi Apo Jesu-Cristo awud ya ubatan kasalanan tamo. Taganán alwan pêtêg ya habayto. <sup>18</sup> Ta no muwang tamina ya an-itad na kitamo ni Apo Namalyari hên ayn kasalanan gawan bêngat ha paniwala tamo kan Apo Jesu-Cristo, noa, anhabiên tamo ya kailangan tamon honolên ya Kautuhan bayo na kitamo itad hên ayn kasalanan, ay kasalanan ya habayto. <sup>19</sup> Ta gawan ha Kautuhan, ya a ko kayan honolên, ay namwangan ko, ya hinatolan akinan matsi hên ipapawa kan Apo Namalyari, kabay an-itad kinay sarili kon natsi ha Kautuhan ta êmén ko madyag ya kalabayan ni Apo Namalyari. <sup>20</sup> Nanad akinan natsi hên kalamo ni Apo Jesu-Cristo ha koros, haka hiya tana ya angkabiyay kangko. Kabay, kaban atsi ko pon kanan hata lawini ko di ha luta, ay ampamiyay ako hên gawan ha paniwala ko kana, ya Anak ni Apo Namalyari, ya namihalanggo hên biyay na ha koros gawan ha pamanlugud na kangko. <sup>21</sup> A ko andaygên hên ayn alagá ya ayn kapantag ya ingalo ni Apo Namalyari. Ta no gawan bêngat dayi ha pamanhumonol ha Kautuhan ya pan-itad na kitamon ayn kasalanan, ay a yay na dayi natsi hi Apo Jesu-Cristo.” Habayto ya hinabi ko kanlan taga-Antioquia.

### 3

#### *Mangêd ya paniwala kan Apo Jesu-Cristo kanan pamanhumonol ha Kautuhan*

<sup>1</sup> Hikaw ya taga-probinsyan Galacia, ya ampaniwala kan Apo Jesu-Cristo, ay nanad kaw nan ayn minúwang. Awta naamuyot kaw ha alwan pêtêg? Impamulah kinan mangêd kamoyu no pata natsi hi Apo Jesu-Cristo ha koros. <sup>2</sup> Pakaihipên yo ya hinumapat ya kamoyu ya Espiritu ni Apo Namalyari gawan ha paniwala yo ha nagilam yoy tungkol kan Apo Jesu-Cristo, alwan gawan ha pamanhumonol yo ha Kautuhan ni apo Moises. <sup>3</sup> Nanad a kaw ampangihip. Hêna ay naniwala kaw kan Apo Jesu-Cristo ya mag-in kaw hêna mangêd ha hawop nan Espiritu ni Apo Namalyari. Awta labay yoy na êt hêna mag-in mangêd ha hêlêk ni Apo Namalyari ha sarili yon dyag? <sup>4</sup> Naliwaan yoy na lawêh ya kairapan ya dinanan yoy na. Dapat yon ihipên ya dinanan yo. <sup>5</sup> Indin ni Apo Namalyari ya Espiritu na kamoyu haka nanyag yan kapapaêpapah ha pibonakan yo, hêna gawan ha paniwala yo ha nagilam yoy tungkol kan Apo Jesu-Cristo. A na dinyag ya habayto, hêna gawan ha pamanhumonol yo ha Kautuhan ni apo Moises.

<sup>6</sup> Daygên tamon alimbawa hi apo Abraham. Habaytsi ya impahulat ni Apo Namalyari ya tungkol kana, “Naniwala hi apo Abraham ha hinabi ni Apo Namalyari, kabay intad ya ni Apo Namalyari hêna ayn kasalanan.”\* <sup>7</sup> Kabay dapat yon maintindihan ya hilay main paniwala kan Apo Jesu-Cristo ay an-itad mantêg kaapo-apoan ni apo Abraham. <sup>8</sup> Haton lagi êt, ay nakahulat ha Kahulatan ya impahulat ni Apo Namalyari, ya itad na kaw ya alwan Israelita hêna ayn kasalanan, gawan ha paniwala. Habain ya labay habiên ni Apo Namalyari hêna hinabi na kan apo Abraham ya wana, “Gawan kamo ay ingalwan ko hilay tawo ha balang bansa.”† <sup>9</sup> Kabay an-ingalwan ni Apo Namalyari hilay main paniwala kan Apo Jesu-Cristo, hêna nanad ha pangingalo na kan apo Abraham ya naniwala ha impangako kana.

<sup>10</sup> Noa, hilay êndat lan mag-in hilan ayn kasalanan ha hêlêk ni Apo Namalyari ha pamanhumonol ha Kautuhan ni apo Moises, ay kalamo lan parusaan na. Ta nakahulat ha Habi ni Apo Namalyari, “Hilay a anhumonol ha balang

\* <sup>3:6</sup> Genesis 15:6. † <sup>3:8</sup> Genesis 12:3b, 18:18 haka 22:18.

utoh ya nakahulat ha Kautuhan, ay parusaan hēn ayn angga.”<sup>‡</sup> <sup>11</sup> Muwang tamo ya ayn hinoman ya itad ni Apo Namalyari hēn ayn kasalanan gawan ha pamanhumonol la ha Kautuhan, ta nakahulat êt ha Habi na ya habaytsi: “Hilay an-itad ni Apo Namalyari hēn ayn kasalanan, ay hilay mamiyay gawan ha paniwala la kana.”<sup>§</sup> <sup>12</sup> Noa, ya pamanhumonol ha Kautuhan ni apo Moises ay marayo ha paniwala kan Apo Jesu-Cristo ta impahulat na êt ni Apo Namalyari ya habaytsi: “Hilay anhumonol ha Kautuhan, ay dyanan hēn biyay ya ayn angga.”\*

<sup>13</sup> Noa, gawan ayn makahonol ha balang mihay Kautuhan, ay hikitamo ay kalamo ha inhumpa ni Apo Namalyari hēn parusaan. Noa, daya ni Apo Jesu-Cristo, ya pinamayad ha parusa hēn kasalanan tamo. Muwang tamo ya nalatngan nay parusa ni Apo Namalyari ta impahulat ya habaytsi ha Kahulatan ni Apo Namalyari: “Nalatngan ya parusa ni Apo Namalyari, hēn hilay pinatsi ha koros.”<sup>†</sup> <sup>14</sup> Inhalanggo ni Apo Jesu-Cristo ya sarili na, ta êmēn, ya kangēran ya impangako ni Apo Namalyari kan apo Abraham, ay mipalako etaman kamoyun alwan Israelita, hēn gawan ha paniwala yo kan Apo Jesu-Cristo. Gawan habayto, ay hikitamoy ampaniwala kan Apo Jesu-Cristo, ay pare-pareho kitamon makatanggap hēn Espiritu ni Apo Namalyari, ya impangako na.

### *A nabayo hēn Kautuhan ya impangako ni Apo Namalyari*

<sup>15</sup> Patêl ko ha Panginoon, muwang tamina ya no main lowa kantamo ya main kahundoan ya nipagpermaan, ay ayn nanan hinoman ya makapibayo o makapahan hēn habayto. Gilamēn yo, ta êmēn ya di ya an-ipamwang ko kamoyu. <sup>16</sup> Hēn haton lagi, hēn ayn pon Kautuhan, ay nangako hi Apo Namalyari kan apo Abraham haka kanan miha kanlan mag-in kaapo-apoan na, ya ingalwan na hila. Miha wangko, ta ya habi kaapo-apoan, ya impahulat ni Apo Namalyari ay labay habiēn mimiha, alwan kal-atan. Habaytoy miha ay hi Apo Jesu-Cristo, ya kaapo-apoan ni apo Abraham. <sup>17</sup> Ya labay kon habiēn ay êmēn di: Ya pangako ni Apo Namalyari kan apo Abraham ha kahundoan la, ya miligtas hila gawan kan Apo Jesu-Cristo, ay a mabayo hēn gawan bat ha Kautuhan ni apo Moises, ya indin ni Apo Namalyari hēn pagkalabah hēn 430 taon. <sup>18</sup> Ya ingalo ni Apo Namalyari, ay a na an-idin kantamo hēn gawan ha pamanhumonol tamo ha Kautuhan ni apo Moises. Ha kaptēgan, ay indin ni Apo Namalyari ya ingalo na kan Apo Abraham gawan ha pangako na, alwan gawan ha pamanhumonol ha Kautuhan.

<sup>19</sup> Malyarin main mangotáng: No êmbayro awud, ya main nanan pangako, pata indin êt ya Kautuhan? Indin êt ni Apo Namalyari ya habaytoy Kautuhan ta êmēn mamwangan no hino ya kasalanan ha hêlêk na, ta habaytoy Kautuhan ay dapat lan honolên, kaban a ya pon nilumatêng ya kaapo-apoan ni apo Israel, ya hi Apo Jesu-Cristo, ya pinangakoan. Habaytoy Kautuhan, ay impahabi ni Apo Namalyari kanlan anghel na, kan apo Moises. <sup>20</sup> Noa, ya pamidin nan pangako, ay a na impadann ha anghel o ha kaatag, ta indiretsa na kan apo Abraham.

### *Main anggaan ya tungulan hēn Kautuhan*

<sup>21</sup> Kayno êndat yo no ampihalanghang ya Kautuhan ni apo Moises haka ya impangako ni Apo Namalyari. Alwa. Ta no main dayin Kautuhan ya ampam-in biyay ha langit, ay pamanhumonol tamo dayi hēn habayto ya pangubatan hēn pan-itad na kitamo ni Apo Namalyari hēn ayn kasalanan.

---

<sup>‡</sup> **3:10** Deuteronomio 27:26.   <sup>§</sup> **3:11** Habacuc 2:4.   \* **3:12** Levitico 18:5.   † **3:13** Deuteronomio 21:23.

<sup>22</sup> Noa, nakahulat ha Kahulatan ya impahulat na, ya ayn makaalih ha kapangyarihan hēn kasalanan. Kabay kaapo-apoan man ni apo Abraham o alwa, ay kailangan maubuh kitamon maniwala kan Apo Jesu-Cristo, ta êmēn tamo matanggap ya ingalo ya impangako ni Apo Namalyari. <sup>23</sup> Bayo impamwang ya main kaligtasan ha paniwala kan Apo Jesu-Cristo, ay atsi kitamo pon ha aypa hēn Kautuhan. <sup>24</sup> Gawan ha Kautuhan ay namwangan tamo ya makasalanan kitamo haka namwangan tamo ya kailangan kitamon maniwala kan Apo Jesu-Cristo ta êmēn na kitamo itad hēn ayn kasalanan ni Apo Namalyari. <sup>25</sup> Amêhēn ta ampaniwala kitamina kan Apo Jesu-Cristo, ay ayn kitamina ha aypa hēn Kautuhan.

<sup>26</sup> Kabay hikaw ngan, Israelita man o alwa, ay nag-in anak ni Apo Namalyari, gawan ha paniwala yo kan Apo Jesu-Cristo. <sup>27</sup> Gawan hikaw ngan, ya binawtismoan gawan ha pakikimiha yo kan Apo Jesu-Cristo, ay mag-in kaugali na, ya nanad imbaro yo yay na. <sup>28</sup> Israelita kaw man o alwa, ipoh kaw man o alwa, lalaki man o babayi ay main kitaminan pakikimiha, hēn gawan ha pakikimiha tamo kan Apo Jesu-Cristo. <sup>29</sup> No main kaw hēn pakikimiha kan Apo Jesu-Cristo ay hikaw ay kaapo-apoan ni apo Abraham haka makatanggap kaw etaman hēn impangako ni Apo Namalyari kana.

## 4

<sup>1</sup> Gilamēn yo êt ya êmēn di ya an-ipamwang ko kamoyu. No main mihay mabandi ya natsi, ya nag mimihay anak, ay hata anak ay kapareho na êt bēngat hēn ipoh kaban nanawa ya pon, agyan kana ya bandi hēn toa na, <sup>2</sup> gawan dapat nan honolēn ya utoh hēn ampanayhay kana, hēn angga ha miabot ya ha panaon, ya intakda nan toa na, ya hiyay manalan hēn impamana kana. <sup>3</sup> Embayro kitamo êt, hēn a kitamo pon naniwala kan Apo Jesu-Cristo, ta atsi kitamo pon ha aypa hēn manan paniwala di ha luta. <sup>4</sup> Noa, hēn nilumatêng ya panaon ya intakda ni Apo Namalyari, ay in-utoh nay Anak na di ha luta, hēn ianak hēn mihay babayi, haka kaban anhumlay ya ay hinonol nay Kautuhan ni apo Moises. <sup>5</sup> In-utoh ya di ta êmēn na kitamo ialih ha aypa hēn habaytoy Kautuhan ta êmēn kitamo mag-in anak ni Apo Namalyari.

<sup>6</sup> Haka gawan hikitamo ay anak nay na ni Apo Namalyari, ay impahapati na kantamo ya Espiritu na, ya impangako ni Apo Jesu-Cristo. Habaytoy Espiritu ay ampam-i kantamo hēn karapatan hēn baêgêyan, “Tatang ko” hi Apo Namalyari. <sup>7</sup> Kabay amêhēn hikaw ay maának nay na ni Apo Namalyari. Alwa kaw nan ipoh ha aypa hēn manan paniwala di ha luta, noa, hikaw ay anak ni Apo Namalyari, ta andyanan na kaw hēn hatoy an-idin na ha maának na.

### *Naingalwan ni apostol Pablo hilay taga-probinsyan Galacia*

<sup>8</sup> Hēn a yo êt kilala hi Apo Namalyari, ay nanad kaw hēn ipoh ya atsi ha lokop lan a angkahêlêk, ya hilay ayn mantêg hēn tungkulon. <sup>9</sup> Noa, amêhēn ta kilala yoy na hi Apo Namalyari...o mangêd awud habiêen, amêhēn ta kilala na kaw na...awta labay yo hēn palokop a êt kanlan a angkahêlêk, ya ayn tungkulon? Nanad hēn labay yoy na êt hēn mag-in ipoh. <sup>10</sup> Èndat yon mangêd kaw ha hêlêk ni Apo Namalyari no anhonolênyo ya manan ugali ya tungkol ha allo, buwan, panaon, haka taon hēn pamagsimba. <sup>11</sup> Mampotog ako kamoyu, ta kayno nahayang bêngat ya pamagpagal ko kamoyu.

<sup>12</sup> Ampakihabi ko kamoyun mangêd ya tuwarênyo ko ya ayn kina ha aypa hēn Kautuhan. Kaapo-apoan ako man ni apo Israel, ay nakitad kina kamoyun alwan kaapo-apoan na, ya a na dinyanan ni Apo Namalyari hēn

Kautuhan. Hêñ haton atsi ko bahêñ kamoyu ay ayn kaw hêñ dinyag ya narawak kangko. <sup>13</sup> Muwang yo ya nakatoro ko kamoyu hêñ Mangêd ya Habi hêñ haton una, gawan ha hakit ko. <sup>14</sup> Nakabyat ko man kamoyu gawan ha hakit ko, ay a yo ko kinahulapoan, haka a yo ko kinadamogan. Noa, tinanggap yo ko hêñ nanad ha mihay anghel ni Apo Namalyari o hi Apo Jesu-Cristo mismo. <sup>15</sup> Hadyay kahiglaan yon nanawop kangko hêñ hato. Muwang ko ya hêñ hato no malyarin bêngat, ay agyan mata yo ay idin yo kangko. Awta alwa kaw nan mahigla kangko amêhêñ? <sup>16</sup> Amêhêñ ay an-itad yo kinan kapatsi yo, hêñ gawan ha inhabi koy kaptêgan kamoyu.

<sup>17</sup> Hilay ampanoro hêñ kaatag ya toro, ay labay-labay la kaw hêñ amuyotêñ ha alwan pêtêg, noa, alwan mangêd ya labay la kamoyu. Labay lan bêngat hêñ mipakarayo ya nakêm yo kangko ta êmêñ kaw milamo kanla. <sup>18</sup> Alwan narawak hêñ makihawpan no ha ikakangêd ya habayto, haka panay, alwan bêngat no atsi ko bahêñ. <sup>19</sup> Anlugarêñ kon maának, nanad akon mihay babayi ya ampanganak ya ampananam hêñ hadyay ilab angga ha mag-in nanad ugali ni Apo Jesu-Cristo ya ugali yo. <sup>20</sup> No atsi ko dayi bahêñ amêhêñ, ay matanam yoy yagah nakêm ko kamoyu.

### *Ya alimbawa ya tungkol kanlan Sara haka ni Agar*

<sup>21</sup> Hatsi ya mihay kotang ko kamoyun labay paaypa ha Kautuhan ni apo Moises. Angkaintindihan yoy labay habiêñ hêñ habaytoy Kautuhan? <sup>22</sup> Nakahulat ha Hulat ni Apo Namalyari, ya hi apo Abraham, ay main loway anak ya lalaki. Ya miha ay anak ni Agar, ya ipoh, haka ya miha ay ha mantêg nan ahawa. <sup>23</sup> Ya anak na kan Agar, ya ipoh, ay in-anak gawan ha naihipan lan bêngat lan apo Abraham haka hi Sara. Noa, ya anak na kan Sara, ya mantêg nan ahawa, ay na-ianak gawan ha pangako ni Apo Namalyari. <sup>24</sup> Hatoy loway indo ay kaalimbawaan hêñ loway kahundoan. Ya mihay kahundoan ay ubat ha Tawgtug hêñ Sinai ha Arabia, ta bayro indin ni Apo Namalyari ya Kautuhan kan apo Moises. Habayto ya kahundoan ay nanad kan Agar, ya ipoh haka ha anak na ya nag-in ipoh. <sup>25</sup> Hi Agar ay kaalimbawaan hêñ Tawgtug hêñ Sinai ha Arabia haka ya balayan Jerusalem, gawan habayto ay ampaidyanan hêñ kapareho kon Israelita ya nanad ipoh, gawan anhumonol hila ha Kautuhan ni apo Moises. <sup>26</sup> Noa, hi Sara ya alwan ipoh, ay nanad ha ikalwan kahundoan, ta kaalimbawaan nay bayon balayan Jerusalem, bayro ha langit, haka hiyay nanad indo tamo, ya alwan ipoh ha Kautuhan. <sup>27</sup> Ta nakahulat ha Kahulatan ni Apo Namalyari ya êmêñ di, “Humigla ka ya babayi ya a nagkaanak. Iangaw moy kahiglaan mo, ya hika ya a nakadanas hêñ ilab panganak, ta mal-at pon ya anak hêñ babayi ya dinamog, kanan babayi ya nag-ahawa.”

<sup>28</sup> Hikaw ya patêl ko ha Panginoon, hi Isaac ay nag-in anak ni Sara, hêñ gawan ha pangako ni Apo Namalyari kan apo Abraham. Hikitamoy nag-in anak ni Apo Namalyari, hêñ gawan ha pangako na kan apo Abraham etaman. <sup>29</sup> Hi Isaac, ya anak ni Sara ay in-anak gawan ha kapangyarihan hêñ Espiritu ni Apo Namalyari. Hi Ismael, ya anak ni Agar, ay in-anak hêñ gawan ha naihipan lan bêngat lan apo Abraham haka hi Sara. Pinairapan ni Ismael hi Isaac. Êmêñ êt bayro ya angkalyari amêhêñ. <sup>30</sup> Noa, nakahulat ha Kahulatan ya impahulat ni Apo Namalyari ya êmêñ di, “Ipaplag mo ya babayi, ya ipoh, haka ya anak na, ta ya anak na, ay a malyarin makiatag ha bandi ya ipamana na ha anak na ha mantêg nan ahawa.” <sup>31</sup> Kabay patêl ko ha Panginoon, hikitamo ay alwan nanad anak hêñ mihay ipoh, ta hikitamo ay anak nay na ni apo Abraham ha mantêg nan ahawa ya hi Sara.

## 5

*Paan mag-orong ha pangaipoh*

<sup>1</sup> Imbuhan kitamina ni Apo Jesu-Cristo ha pangaipoh tamo. Kabay pakataniêhén yoy nakêm yo haka paan kaw mag-orong ha pangaipoh yo.

<sup>2</sup> Pakagilamên yo. Hiko hi Pablo ya ampaghabi kamoyu ya no magpatuli kaw gawan êndat yon hikaw ay mag-in mangêd ha hêlêk ni Apo Namalyari, ay a yoy nan mapakinabangnan ya dinyag ni Apo Jesu-Cristo. <sup>3</sup> Anhabiên kon oman kamoyun lalaki ya malabay hên magpatuli, ya no êmbayro ya labay yo, ay kailangan yon honolên ya kaganawan Kautuhan ni apo Moises.

<sup>4</sup> Hikaw ya labay hên itad hên ayn kasalanan ni Apo Namalyari gawan ha pamanhumonol yo ha Kautuhan, ay ampidayo kan Apo Jesu-Cristo haka antalibatokan yoy ayn kapantag ya ingalo ni Apo Namalyari. <sup>5</sup> Noa, hikay, ay an-êngganan naêñ, ya maiúmang kay kan Apo Namalyari uston itad na kay hên ayn kasalanan gawan ha paniwala naêñ kan Apo Jesu-Cristo, haka habaytoy malyari ha kapangyarihan hên Espiritu ni Apo Namalyari. <sup>6</sup> Ta no ampaniwala kitamo kan Apo Jesu-Cristo, ay alway nan maalagá kan Apo Namalyari no tuli kitamo o alwa, ta ya paniwala ya angkahêlêk ha dyag tamo, ya main pamanlugud ay yabay ya maalagá kana.

<sup>7</sup> Hêñ hato ay anhumonol kaw ha kaptêgan ya tungkol kan Apo Jesu-Cristo. Hinoy namagulon nakêm yo ta pinatgênan yoy pamanhumonol yo ha kaptêgan? <sup>8</sup> A ya manyag hên êmbayro hi Apo Namalyari, ya nanagyat kamoyu hên maniwala kan Apo Jesu-Cristo. <sup>9</sup> Kaillag kaw ta êmên a la kaw maamuyot, ta habaytoy alwan pêtêg ya toro la, ay nanad ha pampaalsa kanan hata kahabian, ya wana, “Ya pérâd ya pampaalsa ya pinakigawgaw ha kal-atan arina ay ampakapaalsa hên habayto ngan.” <sup>10</sup> Êmbayro man, ay gawan ha pakikimiha tamo kan Panginoon Jesu-Cristo, ay angkasigurado ko ya honolên yoy kaptêgan. Angkasigurado ko etaman ya parusaan ni Apo Namalyari hilay ampamagulo kamoyu.

<sup>11</sup> Hikaw ya patêl ko ha Panginoon, main kaatag ya ampaghabin ya anitoro ko pon ya kailangan hên patuli. No an-itoro ko ya kailangan hên patuli, pata angga amêhén ay ampairapan la ko? No êmên bayro, ay a dayi mam-in yagah kanla ya pangitoro ko hên tungkol ha pangamatsi ni Apo Jesu-Cristo ha koros. <sup>12</sup> Ya labay ko kanlan habain ya ampamagulo hên nakêm yo, ay magpakapon hila tana.

<sup>13</sup> Hikaw ya patêl ko ha Panginoon, hinagyat kaw ni Apo Jesu-Cristo hên mag-alih ha aypa hên Kautuhan. Noa, paan kaw manyag hên nangarawak ya kalabayan hên lawini gawan bêngat ha ayn kaw ha aypa hên Kautuhan. Noa, dapat miyahawop kaw hên main pamanlugud. <sup>14</sup> Gawan ha angkaboo ya kaganawan Kautuhan ni Apo Namalyari ha mimihay utoh, “Lugurêñ moy kapareho mo hên nanad ha pamanlugud mo hên sarili mo.” <sup>15</sup> Noa, no ihundo yoy pamipapatsi yo, ay mahira ya pamilalamo yo.

*Ya pamimiyay ha kapangyarihan nan Espiritu ni Apo Namalyari*

<sup>16</sup> Habaytsi ya aral ko kamoyu: palokop kaw ha Espiritu ni Apo Namalyari ta êmên a kaw makadyag hên nangarawak ya kalabayan lawini yo. <sup>17</sup> Ta ya nangarawak ya kalabayan hên lawini, ay halanghang ha kalabayan hên Espiritu ni Apo Namalyari, haka ya kalabayan hên Espiritu ni Apo Namalyari, ay halanghang etaman ha nangarawak ya kalabayan hên lawini. Habaytoy lowa ay ampihalanghang. Kabay a yo madyag ya labay yon daygêñ. <sup>18</sup> No nagpalokop kaw ha Espiritu ni Apo Namalyari, ay ayn kaw na ha aypa hên Kautuhan.

<sup>19</sup> Mabalayan ya nangarawak ya dyag hēn lawini, hēn nanad ha pamankēh ha alwan ahawa, pamanyag hēn kaatag êt ya kagatēan, haka ya panay hēn pamanyag hēn habaytoy karémēkan ya kapaparéng-êy, <sup>20</sup> ya pamagsimba ha alwan pêtēg ya diyos, manggamit hēn dangá, humêmék, pamipapatsi, pamangimon, tulawēn, mag-in matalarêh, pamitatayak, pampagampi, <sup>21</sup> karidyaan, pamaglahing, panay makilahingan, haka kaatag êt ya dyag ya êmén bayro ya karawakan. Omanê kon habiên ya hinabi ko kamoyu hēn hato, ya hilay ampanyag hēn êmbayro ay a makapakilamo ha pamanlokop ni Apo Namalyari.

<sup>22</sup> Noa, no atsi kantamo ya Espiritu ni Apo Namalyari, ay mag-in kitamon malugud, mahigla, mapatékbék ya nakém, mapagtêeh, maingaloén, mapaypaniwal-an, <sup>23</sup> maaypay nakém haka mapagpigel ha sarili. No êmén di ya ugali tamo ay alwan bawal ha patakaran ya dyag tamo. <sup>24</sup> Hikitamo ya main pakikimiha kan Apo Jesu-Cristo ay ahina hēn manyag hēn nangarawak ya kalabayan hēn lawini ta nanad impako tamina ya habayto ha koros hēn kalamo ni Apo Jesu-Cristo. <sup>25</sup> Dinyanan na kitamon Espiritu ni Apo Namalyari hēn bayoy biyay, kabay dapat palokop kitamina kana. <sup>26</sup> Paan kitamon magmahlay, paan mamahuluk hēn miha ta miha, haka paan miriridyaan.

## 6

### *Dapat miyahawop*

<sup>1</sup> Hikaw ya patêl ko ha Panginoon, no main kamoyu ya nakadyag hēn kasalanan, ay hikaw ya ampaakay ha Espiritu ni Apo Namalyari, ay aralan yo ya hēn maaypa ya nakém ta êmén ya miúmang kan Apo Namalyari. Haka kaillag kaw, ta kayno hikaw êt ya matukso. <sup>2</sup> Dapat miyahawop kaw ta ha pamihahawop yo ay mahonol yoy utoh ni Apo Jesu-Cristo. <sup>3</sup> No main kamoyu ya êndat na ya hiyay mangêd ha kaatag, ay anlokoén nay sarili na. <sup>4</sup> Dapat pakaihipêh hēn balang miha ya sarili nan dyag, ta no mangêd, ay malyari yan humigla. Paan iparis ya dyag na, ha dyag lan kaatag, <sup>5</sup> ta ya balang miha ay main yan sarilin dyag ya dapat nan daygén.

<sup>6</sup> Ha hinon angkakwa nan antoroan, ay dapat atagan nay ampaypamwang kana hēn Habi ni Apo Namalyari.

<sup>7</sup> Paan yon lokoén ya sarili yo. Hi Apo Namalyari ay a maloko hēn hinoman. No hinoy intanêm tamo ay habayto êt ya popolên tamo. <sup>8</sup> Hilay mapanyag hēn karawakan kalabayan hēn lawini la, ay makakwa hēn kaparusaan ya ayn anggaan ha impiyerno. Noa, hilay ampanyag hēn kalabayan hēn Espiritu ni Apo Namalyari ay makakwa hēn biyay ya ayn anggaan ya an-idin nan Espiritu ni Apo Namalyari. <sup>9</sup> Paan kitamon humawa ha pamanyag hēn kangêran, ta lano ha lumatêng ya allo, ay main kitamon matanggap no a kitamo anhumawa. <sup>10</sup> Kabay kaban angkabiyay kitamo pon ay manyag kitaminan kangêran ha balang miha, lalon-laloy na kanlan patêl tamo ha Panginoon.

### *Tawlin aral ni apostol Pablo kanlan taga-Galacia*

<sup>11</sup> Hatsi ya angkahêlêk yo ya mangahlay ya letra ay hiko ya nanulat hēn hatsi ha mantêg kon gamêt.

<sup>12</sup> Hilay kapareho kon mánoro ya Israelita ya ampanapol hēn pamandayêw kanlan kapareho naêñ Israelita, ay ampamatoluk kamoyu hēn patuli kaw. Andaygén lay habayto ta êmén a hila pairapan, hēn nanad kanlan kaatag ya ampaniwala ya hukad ana ya pangamatsi ni Apo Jesu-Cristo ha koros, haka ahina kailangan patuli. <sup>13</sup> Tinuli hila man, ay a hila anhumonol ha kaatag ya

Kautuhan. Noa, labay lan patuli kaw, ta êmén hila main maipagmahlay ha kapareho naêñ ya Israelita, ya hikaw ay napahonol lan magpatuli. <sup>14</sup> Noa, hiko ay ayn akon kaatag ya an-ipagmahlay, no alwan ya pangamatsi ni Panginoon Jesu-Cristo ha koros. Gawan ha pangamatsi na, ay ayn nanan alagá kangko ya maalagá kanlan a ampagpalokop kan Apo Namalyari. Haka ha hêlêk la kangko ay ayn akon alagá. <sup>15</sup> Kantamon main pakikimiha kana, ay alwan maalagá no tinuli kitamo o ahê. Ya maalagá ay binayo ya ugali tamo.

<sup>16</sup> Hikaw ya anhumonol ha toro ko, ay mag-in dayin mapatêkbék ya ihip yo ta hikaw ay mantêg hêñ anak ni Apo Namalyari. Dayi ingalwan na kaw ngan.

<sup>17</sup> Ampakihabi ko ya paubat amêhêñ, ay a kinan papotogêñ ya miha man kamoyu, ta hukad ana kangko ya hikoy nangapipiyatan gawan ha pamanhumonol ko kan Apo Jesu-Cristo.

<sup>18</sup> Hikaw ya patêl ko, dayi ingalwan kaw ngan ni Panginoon tamon Jesu-Cristo. Amen.

## Ya Hulat ni apostol Pablo kanlan ampaniwala kan Apo Jesu-Cristo ha Efeso

### *Paunan habi*

Nanulat hi apostol Pablo kanlan ampaniwala kan Apo Jesu-Cristo ha balayan Efeso. Una nan impamwang kanla, ya daygén ni Apo Namalyari lano, ya tsiponén na ya atsi ngan ha langit, haka ya atsi ngan ha luta, ta ikamihan na kan Apo Jesu-Cristo ya pamaala hén habayto (1:10). Kabay labay ni apostol Pablo ya balang miha ay magkamain dayin pamakimiha kan Apo Jesu-Cristo, haka dapat mahélék ya habayto ha pamimiyay la.

In-alimbawa na, ya pами-тси-тсипон lan ampaniwala kan Apo Jesu-Cristo ha mihay lawini haka in-alimbawa na hi Apo Jesu-Cristo ha pinakaulo hén habaytoy lawini. In-alimbawa na êt hilay ampaniwala kan Apo Jesu-Cristo ha mihay bali haka hi Apo Jesu-Cristo ya pinakamaalagáy bato ta êmén mag-in napah-êy ya bali.

Hinulat na êt di ya tungkol ha pamimiyay hén miahawa (5:21-33), anak haka toa (6:1-4), tagahuyo haka amo (6:5-9). Hinulat na êt di ya tungkol ha panlaban kan Satanas (6:10-20).

Kabooan hén pinakalaman

Paunan Habi 1:1-2

Ya ingalo ya ubat ha Espiritu ni Apo Namalyari gawan kan Apo Jesu-Cristo 1:3-3:21

Ya pakikimiha lan ampaniwala kan Apo Jesu-Cristo 4:1-6:20

Ya tawlin habi 6:21-24

<sup>1</sup> Hiko hi Pablo, ya mihay apostol ni Apo Jesu-Cristo, gawan ha kalabayan ni Apo Namalyari.

Hatsi ya hulat ko, ay kamoyun taga-balayan Efeso ya pinili ni Apo Namalyari hén mag-in kana, ya mahonol ha kalabayan ni Apo Jesu-Cristo.

<sup>2</sup> An-ihalangin kataw ya dyanan kaw dayi hén kapatékbékan nakém, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

*Ya ingalo ya angkatanggap lan ampaniwala gawan ha pakikimiha la kan Apo Jesu-Cristo*

<sup>3</sup> Purién tamo hi Apo Namalyari, ya Tatang ni Panginoon Jesu-Cristo, ta gawan ha pakikimiha tamo kana, ay namidigalo hi Apo Namalyari kantamo hén kangéran ya ubat ha langit ya andaygén nan Espiritu ni Apo Namalyari ha nakém tamo. <sup>4</sup> Mana na kitaminan pinili ni Apo Namalyari hén magkamain pakikimiha kan Apo Jesu-Cristo, hén a pon dinyag ya hata luta. Tinalagá nay habayto, ta êmén hikitamoy mag-in banal hén ayn kapintasan ha hélék na. Gawan ha pamanlugud na kantamo, <sup>5</sup> hén hato pon, ay pinili na kitamo hén mag-in maának na gawan kan Apo Jesu-Cristo, ta habaytoy labay na hén malyari kantamo. <sup>6</sup> Kabay purién tamo hi Apo Namalyari, gawan ha a makwan ihipén ya ayn kapantag ya ingalo na kantamo, hén indin na ya anlugarén nan Anak êmén matsi ha ikakangéd tamo.

<sup>7</sup> Daya ni Apo Jesu-Cristo, ya pinamayad ha pangakbus ha parusa hén kasalanan tamo, ta êmén kitamo mapatawad. Embayro ya ayn kapantag ya ingalo ni Apo Namalyari <sup>8</sup> ya indin na kantamo hén booy nakém. Hén main kalamoy kamwangan haka pamangintindi, <sup>9</sup> ay impamwang na kantamo ya

daygén na, ya a pon impamwang, ta atsi ya pon ha ihip na, ya tinalagá na, ya tuparén ni Cristo. <sup>10</sup> Ta ya daygén na, no lumatêng ya intakdan allo, ay tsiponén na ya kaganawan ya atsi ha langit, haka ha luta, ta ikamihan na kan Cristo, ya pamaala hén habayto ngan.

<sup>11</sup> Gawan ha pakikimiha naén kan Cristo, ay dinyag na kitamo ni Apo Namalyari hén anak na gawan ha kalabayan na. Habaytoy tinalagá na hén haton lagi, haka panay nan andaygén ya tinalagá na. <sup>12</sup> Hikay ya unan nangénggan kan Cristo, ay tinalagá ni Apo Namalyari hén mamiyay hén magsimba kana gawan ha panga-Diyos na.

<sup>13</sup> Hikaw ay nagkamain hén pakikimiha kan Apo Jesu-Cristo etaman hén ginilam yoy Mangéd ya Habi, ya kaptégan, ya ligtas kitamo gawan kana. Haka dinyanan na kaw ni Apo Namalyari hén Espiritu na ya impangako na. Ya pam-i hén Espiritu na ay nanad pamaptég ya hikitamo ay kana, haka <sup>14</sup>nanad bandi ya impauna, ya kasiguradoan ya iboo nay kaligtasan tamo, haka ya kaganawan ya impangako na. Purién tamo ya panga-Diyos na.

### *Ya inhalangin ni apostol Pablo*

<sup>15</sup> Améhén, paubat hén namwangan ko ya tungkol ha paniwala yo kan Panginoon Jesus haka ya pamanlugud mo ha kapareho mon pinili ni Apo Namalyari hén mag-in kana, <sup>16</sup> ay a ko an-itêgén ya pamagpahalamat ko kan Apo Namalyari gawan kamoyu. Panay kataw an-ihalangin. <sup>17</sup> An-ihalangin ko kan Apo Namalyari ya ampurién tamon Tatang, ya namiutoh kan Panginoon Jesu-Cristo, ya dyanan na kaw hén kamwangan haka pamangintindi ya tungkol kan Apo Namalyari ya ubat ha Espiritu na. <sup>18</sup> An-ihalangin ko êt ya mahawangan ya kaihipan yo, ta êmén yo maintindihan ya pangako na kantamo hén pinili na kitamo hén makilamo kana hén angga-angga. Dayi maintindihan yo etaman ya kal-atan ingalo ya idin kantamo gawan hikitamo ay pinili na hén mag-in kana. <sup>19</sup> An-ihalangin ko êt ya maintindihan yo, ya a makwan maihip ya kapangyarihan ni Apo Namalyari ya anggamitén nan manyag kangéran ha nakém tamon ampaniwala. Habaytoy kapangyarihan na, <sup>20</sup> ay ginamit na hén biniyay nan oman hi Apo Jesu-Cristo, haka hén pinaikno na ya ha dapit panabtab na ha langit hén mamaala hén kalamo na. <sup>21</sup> Kabay makapangyarihan hi Apo Jesu-Cristo ha kaganawan ya ampamaala haka ha kaganawan ya main tungkulon. Hiyay pinakamatag-ay ha langit haka ha luta améhén haka hén angga-angga. <sup>22</sup> In-ubuh nan indin ni Apo Namalyari ha aypa hén kapangyarihan na ya habayto, haka hiyay dinyag nan pinaka-uloh tamo ya ampaniwala kana. <sup>23</sup> Hikitamo ya ampaniwala kan Apo Jesu-Cristo, ay pinakalawini na, ya nanad kabooan\* na. Haka hiya ya kabooan hén kaganawan.

## 2

### *Hilay main pakikimiha kan Apo Jesu-Cristo ay main bayoy biyay*

<sup>1</sup> Hén hato ay nanad kaw natsi gawan ha kasalanan yo kan Apo Namalyari. <sup>2</sup> Hén hato ay angkagtan kaw ha karawakan ugali haka uso lan a ampagpalokop kan Apo Namalyari, haka hinonol yo hi Satanás, ya poon lan narawak ya a angkahélék. Angga améhén, ay hiya ya ampamaala ha biyay lan tawo ya a anhumonol kan Apo Namalyari. <sup>3</sup> Hén hato, ay hikitamo ngan ay nanad kanla. Andaygén tamoy nangarawak ya kalabayan hén lawini haka ihip tamo. In-anak kitamo hén main nanan kasalanan kabay hikitamoy kalamo lan kaatag ya makasalanan ya parusaan ni Apo Namalyari.

\* <sup>1:23</sup> Colosas 1:18.

<sup>4</sup> Noa, ayn pamagkulang ya ingalo ni Apo Namalyari kantamo haka hadyay pamanlugud na kantamo. <sup>5</sup> Natsi kitamo man, gawan kasalanan tamo, ay biniyay na kitamo hēn kalamo ni Apo Jesu-Cristo. Ya ayn kapantag ya ingalo ni Apo Namalyari kantamo, ay ubatan hēn kaligtasan tamon ampaniwala kana. <sup>6</sup> Gawan ha pakikimiha tamo kan Apo Jesu-Cristo ay biniyay kitaminan oman etaman, haka pinaikno kitamo ha langit hēn mamaala hēn kalamo ni Apo Jesu-Cristo. <sup>7</sup> Dinyag ni Apo Namalyari ya habayto ta êmén paubat amêhēn hēn angga-angga ay maipahlék nay ayn kapantag ya ingalo na kantamo, ya indigalo na kantamo gawan kan Apo Jesu-Cristo. <sup>8</sup> Habaytoy ayn kapantag ya ingalo na, ay ubatan hēn kaligtasan tamon ampaniwala kana. Habaytoy kaligtasan tamo haka ya paniwala tamo kan Apo Jesu-Cristo ay a angkakwa ha pagal tamo, noa, indigalo ni Apo Namalyari ya habayto. <sup>9</sup> Kabay ayn maipagmahlay ya hiya ay naligtas ha sarili nan dyag. <sup>10</sup> Gawan bay hikitamo ay dinyag ni Apo Namalyari haka binayo nay biyay tamo hēn manyag kangēran gawan ha pakikimiha tamo kan Apo Jesu-Cristo. Hēn hato pon una ay tinalagá na ya hikitamo ay manyag habaytoy kangēran.

### *Hilay main pakikimiha kan Apo Jesu-Cristo ay nanad mimihay bansa*

<sup>11</sup> Pakaihipén yo ya hikaw ay anak hēn alwan Israelita. An-itad la kaw hēn ayn alagá lan Israelita, gawan a kaw tinuli. Èndat la no anak hila ni Apo Namalyari gawan ha pangatuli la. Noa, ya pangatuli ay dyag bat hēn tawo ha balat. <sup>12</sup> Hēn hato ay marayo kaw kan Apo Jesu-Cristo. Kaatag kaw kannaén Israelita ya pinili ni Apo Namalyari. Kabay alwa kaw kalamo ha pangako ni Apo Namalyari kannaén. Ayn kaw hēn kasiguradoan ya madyanan kaw hēn biyay ya ayn angga haka a yo muwang hi Apo Namalyari. <sup>13</sup> Noa, agyan marayo kaw kan Apo Namalyari hēn hato, ay nidani kaw na kana gawan ha daya ni Apo Jesu-Cristo. <sup>14</sup> Hiya ya pinangubatan hēn pamakilamo tamo, ta hēn hato ay hikay ya Israelita, haka hikaw ya alwan Israelita ay main kitamon nanad bakod ya pamihuhuluk, ya namihiyay kantamo. Noa, habaytoy inalíh nay na. <sup>15</sup> Hēn natsi ya ha ikakangéd tamo, ay inalíh nay alagá hēn Kautuhan naén hēn Israelita no ay-êmén dumani kan Apo Namalyari. Kabay mimihay bansa kitamina ha arapan ni Apo Namalyari, haka amêhēn ay angkapisusundo kitamina, ya hikay ya Israelita haka hikaw ya alwan Israelita. <sup>16</sup> Impa-úmang na kitamon pare-pareho kan Apo Namalyari, hēn mag-in pinakalawini na hēn natsi ya ha koros. Kabay angkapisusundo kitamina. <sup>17</sup> Hi Apo Jesu-Cristo ay nagpaidi di ha luta hēn namipamwang hēn Mangangéd ya Habi ya tungkol ha pamiúmang tamo kan Apo Namalyari. Impa-úmang na kaw ya marayo kana, haka hikay ya Israelita ya banhagan lan narani kana. <sup>18</sup> Gawan kan Apo Jesu-Cristo ay pare-pareho kitaminan makaarap kan Apo Namalyari, ya Tatang tamo ha hawop hēn Espiritu na, ya atsi kantamo.

<sup>19</sup> Kabay amêhēn, ay alwa kaw nan kaatag kannaén Israelita, ta hikaw ay kalamo lan pinili ni Apo Namalyari hēn mag-in pamilya na. <sup>20</sup> Hikitamoy ampaniwala kan Apo Jesu-Cristo ay nanad bali. Hilay apostol haka māmipamwang ni Apo Namalyari ya nanoro hēn habi na, ay nanad napah-êy ya pundasyon hēn habaytoy bali, haka hi Apo Jesu-Cristo ay nanad pinakamaalagáy bato ya pampah-êy hēn habayto. <sup>21</sup> Hi Apo Jesu-Cristo ya pinaykabitan tamo ngan hēn nanad ha kabooan bali ya napah-êy. Haka gawan ha pakikimiha tamo ha Panginoon, ya habaytoy bali ay anhumlay hēn mag-in mihay banal ya templo. <sup>22</sup> Haka gawan ha pakikimiha yo kan Apo Jesu-Cristo ay inlamo kaw etaman kanan habaytoy nanad templo ya naipairêng ya ampaidyanan nan Espiritu ni Apo Namalyari.

## 3

*Ya Panoro ni apostol Pablo kanlan alwan Israelita*

<sup>1</sup> Gawan habaytoy dinyag ni Apo Namalyari, ay an-ihalangin kataw. Awo, hiko hi Pablo, ya nakahukul ha ikakangéd yon alwan Israelita, gawan ha panoro ko hén tungkol kan Apo Jesu-Cristo. <sup>2</sup> Kayno namwangan yoy na ya impatsiwala kangko ni Apo Namalyari, ya ipamwang kamoyu ya Mangéd ya Habi, ya tungkol ha ayn kapantag ya ingalo na kamoyu. <sup>3</sup> Haka kayno namwangan yoy na ya impamwang ni Apo Namalyari kangko ya tungkol kan Apo Jesu-Cristo. Inungkat kinay habayto, di ha hulat. <sup>4</sup> Kabay ha pamaha yon hata hulat, ay maintindihan yo ya a pon impamwang hén hato, ya tinalagá ni Apo Namalyari, ya antuparén ni Apo Jesu-Cristo. <sup>5</sup> A na impamwang ni Apo Namalyari ya habayto hén haton lagi, noa, amêhén, ay impamwang nan Espiritu na kannaén apostol na, haka kanlan propeta, ya mámpamwang na. <sup>6</sup> Impamwang na ya Mangéd ya Habi, ya alwan hikay bat ya Israelita ya iligtas na, noa, hikaw etaman ya alwan Israelita ya ampaniwala kan Apo Jesu-Cristo. Kalamo kaw na kannaén ha pinakalawini na. Haka matanggap yo etaman ya impangako na gawan ha pakikimiha yo kan Apo Jesu-Cristo.

<sup>7</sup> Ha ayn kapantag ya ingalo ni Apo Namalyari, haka ha kapangyarihan na ay dinyag na kon mámpamwang hén habayto ya Mangéd ya Habi. <sup>8</sup> Hikoy pinakamaaypa kanlan pinili ni Apo Namalyari hén mag-in kana. Êmbayro man ay dinyanan na kon pribileyo hén mámpamwang kamoyun alwan Israelita hén tungkol ha ayn kapantag ya ingalo ya maidin kamoyu, gawan kan Apo Jesu-Cristo. <sup>9</sup> Hi Apo Namalyari, ya nanyag ngan, ay namiutoh kangko hén ipalinaw ha kaganawan no ay-êmén nan tuparén ya tinalagá na, haka babayo nan impamwang ya habaytoy tinalagá na. <sup>10</sup> Haka amêhén an-ipamwang nay habayto, gawan kantamon ampaniwala kan Panginoon Jesu-Cristo. Uston mahélék lan anghel ya ampamaala, haka kaatag êt ya main kapangyarihan ha langit ya pamakimiha tamon patéh ha Panginoon, ay mamwangan la hén tungkol ha kamwangan na ya igit ha hinon kamwangan. <sup>11</sup> Habayto ay tinalagá ni Apo Namalyari hén haton lagi, haka antuparén nay na gawan kan Apo Jesu-Cristo ya Panginoon tamо. <sup>12</sup> Gawan ha paniwala tamо kan Apo Jesu-Cristo, ay main kitamon pakikimiha kana ya ampamahékaw hén nakém tamо hén umarap kan Apo Namalyari. <sup>13</sup> Kabay ampakihabi ko kamoyu ya paan kaw mahiraan nakém gawan ha kairapan ya angkaranasan ko di ha hukulan ta hatsi ay ha ikakangéd yo.

*Ya pamanlugud ni Apo Jesu-Cristo kantamo*

<sup>14</sup> Kabay ampandoko ko ha panalangin ko kan Apo Namalyari ya Tatang tamо. <sup>15</sup> Hiya ya Tatang hén kaganawan maának na ha langit haka ha luta. <sup>16</sup> An-ihalangin ko kana ya ha kapangyarihan na ya ayn kapantag, ay pahiglaén nay nakém yo hén Espiritu na. <sup>17</sup> An-ihalangin ko êt ya magpaidi ya ha nakém yo hi Apo Jesu-Cristo gawan ha paniwala yo kana. Dayi mag-in mananiéh ya pamanlugud yo, hén nanad ha kayo ya mangalalé ya yamot, <sup>18</sup> ta êmén hikaw haka hilangan ya pinili ni Apo Namalyari hén mag-in kana, ay makaintindi hén ayn kapantag ya pamanlugud ni Apo Jesu-Cristo. <sup>19</sup> Dayi makaranas kaw hén habaytoy pamanlugud ni Apo Jesu-Cristo ya a makwan ihipén, ta êmén panay mahélék ha pamimiyay yo ya kabooan hén kabanalan ni Apo Namalyari. <sup>20</sup> Kabay purién tamina hi Apo Namalyari. A makwan maihip ya kapangyarihan na ya anggamítén na ha pamabayo kantamo. Ta hiyay makadyag hén igit êt ha an-idawat tamо kana o ha maabot tamon

ihipên. <sup>21</sup> Hikitamoy ampaniwala kan Panginoon Jesu-Cristo, ay puriên tamo ya hén oras-oras hén angga-angga. Amen.

## 4

### *Ya pakikimiha lan ampaniwala kan Panginoon Jesu-Cristo*

<sup>1</sup> Hiko ya atsi ha hukulan gawan ha pamanhumonol ko kan Panginoon Jesu-Cristo, ay ampakihabi kamoyu, ya mamiyay kaw hén mangéd, ya nanad ha tinalagá na hén hinagyat na kaw hén mag-in anak na. <sup>2</sup> Mamiyay kaw hén maaypa ya nakém. Gawan ha pamilulugud yo, ay dapat kaw mag-in mapagtéêh ha pamatawad yo kanlan ampanyag hén alwan mangéd kamoyu. <sup>3</sup> Magpakahipég kaw hén milulugud, ta êmén ya pakikimiha yo gawan ha Espiritu ni Apo Namalyari ya ampam-in kapatékbékan kamoyu, ay a maalíh. <sup>4</sup> Hikitamoy ampaniwala ay mimiha, hén nanad pinakalawini ni Apo Jesu-Cristo. Haka mimiha êt ya Espiritu ni Apo Namalyari ya atsi kantamo. Mimiha êt ya biyay ya ayn angga ya an-êngganan tamo, gawan impaihip na kantamo hén palokop kana. <sup>5</sup> Mimihan bêngat ya ampaniwal-an tamo. Yabay ya hi Panginoon ya mimiha haka mimihay bawtismo tamo. <sup>6</sup> Hi Apo Namalyari ya Tatang tamo ngan ay mimiha. Hiyay makapangyarihan ha kaganawan. An-ipadyag nay kalabayan na kantamo ngan, haka ampaidi ya kantamo ngan.

<sup>7</sup> Ya balang miha kantamo ay dinyanan ni Apo Jesu-Cristo hén galing ya hêpat kantamo, gawan ha ayn kapantag ya ingalo na. <sup>8</sup> Êmén di ya nakahulat ha Habi ni Apo Namalyari ya tungkol kan Panginoon Jesu-Cristo, “Hén nag-orong ya ha langit, ay nantan yan mal-at ya dinakép, haka main yan indigalo kanlan tawo.” <sup>9</sup> No nag-orong ya ha langit, ay labay habiên nag-aypa ya pon di ha luta. <sup>10</sup> Ya nag-aypa, ay hiya etaman ya nag-orong ha katatag-ayan langit, ta êmén na daygén hén ayn kapintasan ya kaganawan. <sup>11</sup> Hiya ya namidigalo hén kagalingan ya main mag-in apostol na, main mag-in propeta, ya mámpamwang na, main mag-in mamipamwang hén habi na kanlan a pon ampaniwala, main mag-in pastor haka móro kanlan ampaniwalay na. <sup>12</sup> Indigalo nay habaytoy kagalingan ta êmén hikitamoy pinili ni Apo Namalyari hén mag-in kana ay nakal-an hén maghuyo kana, haka ta êmén tumaniéh ya paniwala tamo ya pinakalawini na. <sup>13</sup> Ha êmbayro ay mag-in mimihay nakém tamo ha paniwala haka ha kamwangan tamo kan Apo Jesu-Cristo ya Anak ni Apo Namalyari. Magkamain kitaminan nakém ya nanad ha nakém ni Apo Jesu-Cristo ya banal.

<sup>14</sup> Habaytoy labay ni Apo Namalyari ta êmén a kitamo magtan ha hino-hinon toro hén nanad anak ya angkagtan ha nanga-ayang ya habi, o nanad ha bangka ya angkaipayidpid hén angin. Mangéd no a kitamina paamuyot kanlan mapanloko. <sup>15</sup> Ya mangéd ay mamiyay kitamo ha kaptégan gawan ha pamilulugud tamo. Ha êmbayro ay papérad-pérad kitamon mag-in nanad kan Cristo ya pinaka-uloh tamo ngan. <sup>16</sup> Gawan kana, ay hikitamoy pinakalawini na, ay main pakikimiha hén nanad ha kabooan lawini ya nangapitutumpang ha pilngoan. No ya balang miha kantamo ay manyag hén an-ipadyag ni Apo Namalyari hén main pamilulugud, ay humlay haka kumhaw ya pinakalawini ni Apo Jesu-Cristo.

### *Ya bayoy biyay kan Panginoon Jesu-Cristo*

<sup>17</sup> Améhén, gawan ha tungkulon ya indin na kangko ni Panginoon ay an-ipapakahabi ko kamoyu ya taganán a yoy na dapat tuwarén hilay ahé ampagsimba kana, ta ayn alagá ya pangihip la. <sup>18</sup> Ayn hilan muwang hén

tungkol kan Apo Namalyari, haka ayn kanla ya bayoy biyay ya an-idin na gawan ha kakdêyan ulo la, ya a la ya labay mamwangan. <sup>19</sup> Ayn hilay nan dêng-êy, kabay ha kariyaan la, ay ampaulayan lay lawini la hên manyag hên hino-hino kay na hên ya karawakan.

<sup>20</sup> Noa, hikaw ay alwan êmbayro ya napag-aralan yo, ya tungkol kan Apo Jesu-Cristo! <sup>21</sup> Gawan bay namwangan yoy nay Mangêd ya Habi tungkol kana, haka ya pêtêg ya toro, gawan atsi kana ya kaptêgan. <sup>22</sup> Kabay alihêñ yoy mana yon ugali, ya ubat ha mana yon pamimiyay, ya bat manyag kalabayan lawini, ta ya panyag hên êmbayro ay ikahira yo. <sup>23</sup> Dapat yon bayoén ya nakêm haka ihip yo, ta êmén ya narawak ay mahagilyan hên mangêd. <sup>24</sup> Dapat yon ihulod ya bayoy ugali, ya nanad ugali ni Apo Namalyari, ya mahêlêk ha pamimiyay ya taganán mahonol kana, ya main kabanalan.

<sup>25</sup> Kabay alihêñ yoy nay ugali yo hên maglaram ta dapat habiêñ ya kaptêgan ha miha ta miha, gawan hikitamo ay nanad mimihay lawini ni Apo Jesu-Cristo. <sup>26</sup> No waringan ta main kaw hên ikahuluk, ay dapat yon tambêng alihêñ ya habayto, ta êmén a kaw makadyag kasalanan. Paan yon êngganan ya manaboy allo bayo yon alihêñ ya huluk, <sup>27</sup> ta êmén a ya makatuksó kamoyu hi Satanas. <sup>28</sup> No alimbawa ta main kamoyu ya manakaw, dapat itgêñ nay na ya habayto. Ya mangêd ay magpakahipéñ ya tanan mag-obra, ta êmén na makwa ya kailangan na. No êmbayroy daygêñ na, ay makahawop ya êt ha kaatag ya ampangailangan. <sup>29</sup> Paan kaw maghabi hên nangarawak. Dapat panay ha ikakangêd ya habiêñ yo, ya makahawop kanlan ampanggilam ayon ha kailangan la. <sup>30</sup> Paan yon dyanan kalungkutan ya Espiritu ni Apo Namalyari ha panyag yon alwan mangêd, ta hiyay nanad tatak ni Apo Namalyari kamoyu, ya pamaptêg ya taganán akbusan kaw ha parusa hên kasalanan yo ha Allon Pamanukom. <sup>31</sup> Alihêñ yoy kaganawan narawak ya nanad ha hêmek, omot ulo, haka huluk. Haka paan kaw miuhubak. Paan kaw maghabin pamanira ha kapareho yon tawo. Haka paan kaw mangihip hên manyag karawakan ha kapareho yo. <sup>32</sup> Ya mangêd ay, mag-in kaw hên mapanawop ha miha ta miha, haka maingaloén. Mamatawad kaw, ta pinatawad kaw ni Apo Namalyari gawan ha pakikimiha yo kan Apo Jesu-Cristo.

## 5

### *Ya ugali lan nahawangan ya kaihipan*

<sup>1</sup> Gawan hikaw ay anak ni Apo Namalyari ya anlugarêñ na, ay dapat tuwarêñ yo ya. <sup>2</sup> Dapat mamiyay kaw hên main pamanlugud ha balang andaygêñ yo, hên nanad ha pamanlugud ni Apo Jesu-Cristo kantamo hên indin nay biyay na ha ikakangêd tamo. Habaytoy dinyag na ay nanad nabango ya paraép ha arapan ni Apo Namalyari.

<sup>3</sup> Gawan hikaw ay pinili ni Apo Namalyari hên mag-in kana, ay dapat marayo kaw ha pamakilalaki, pamabayi, haka ha pamanyag kaatag pon ya karawakan kalabayan lawini haka kariyaan. Paan kaw man mamiistoriya hên tungkol bayro ha miha ta miha. <sup>4</sup> Paan kaw maghabi hên nikadadawak haka ayn pukat, haka hên kaparêng-êy ya ngaw-ngaw haka istorya. Noa, ya mangêd ay, panay kaw tanan magpahalamat kan Apo Namalyari. <sup>5</sup> Habaytsi ya pakamwangan yo: A milamo ha lokop ni Apo Namalyari angga kan Apo Jesu-Cristo ya hilay ampamabayi o ampakilalaki o ampanyag hên hinoman ya karawakan hên kalabayan lawini. A êt milamo bayro ya hilay maridya ya ayn pamanlugud kan Apo Namalyari ta kaatag ya andaygêñ lan diyos la.

<sup>6</sup> Paan kaw paloko ha nangaayang ya habi lan maghabin alwan kasalanan ya babayo kon inungkat. Ta ya kaptēgan ay parusaan ni Apo Namalyari hilay manyag hēn êmbayro. <sup>7</sup> Kabay paan kaw makilamo kanla. <sup>8</sup> Hēn hato ay atsi kaw ha aypa ni Satanas haka nanad nariglēm ya biyay yo, noa, amêhēn ay atsi kaw na kanan Panginoon, haka nanad nahawangan ya biyay yo. Kabay dapat mag-in hēpat ya pamimiyay yo nanad ha pamimiyay lan nahawangan ya ihip. <sup>9</sup> Gawan, ya mahēlēk ha pamimiyay lan nahawangan ya ihip, ay kangēran haka kaptēgan. <sup>10</sup> Dapat yon mamwangan no hino ya ikahigla ni Apo Namalyari, haka habaytoy dapat yon daygēn. <sup>11</sup> Paan kaw kilamo kanlan manyag hēn ayn pukat ya ubat ha kariglēman. Noa, ya daygēn yo, ay ihundo yoy pandaygēn yoy kangēran, ta êmēn mamwangan ya nangarawak ya dyag la. <sup>12</sup> Gawan bay kapaparēng-êy hēn habiēn ya andaygēn la hēn patago. <sup>13</sup> Noa, gawan ha kangēran dyag yo, ay nanad mahawangan hilan atāng, haka mamwangan ya andaygēn la ay narawak. <sup>14</sup> Haka ya kaganawan ya angkahawangan, ay mag-in nahawang. Habaytoy nanad ha impahulat ni Apo Namalyari, ya wana,

“Hikaw ay nanad hēn nabēlēw o nanad natsi gawan ha kasalanan yo.

Magmukat kaw, haka kaw mimata, bayo hawangan nay na ni Apo Jesu-Cristo ya kaihipan yo.”

<sup>15</sup> Kabay kaillag kaw ha pamimiyay yo. Mamiyyay kaw hēn nanad kanlan nagmuwang no hinoy ikahigla ni Apo Namalyari, alwan nanad kanlan ayn minuwang. <sup>16</sup> Paan kaw manayang hēn oras. Panay kaw manyag hēn kangēran kaban angkabiyay kaw pon, ta mal-at ya karawakan ya andaygēn lan tawo amêhēn. <sup>17</sup> Paan kaw mag-in ayn minuwang. Noa, pakimuwangan yoy kalabayan ni Apo Namalyari.

<sup>18</sup> Paan kaw maglahing ta habaytoy makahira hēn mangēd ya pamimiyay. Noa, ya dapat ay mamaala kamoyu ya Espiritu ni Apo Namalyari. <sup>19</sup> No magtsipon kaw ay magkanta kaw hēn kanta ya nakahulat ha Kahulatan ni Apo Namalyari, haka ya kaatag êt ya kanta hēn pamapguri kana, haka ya bayoy kanta ya maka-Diyos. Dapat boon nakēm kaw hēn magkantan pamapguri ha Panginoon. <sup>20</sup> Dapat panay yon ipahalamat ya kaganawan ya angkalyari kan Apo Namalyari ya Tatang tamo, gawan ha pakikimiha yo kan Panginoon Jesu-Cristo.

### *Payo ha mitaahawa*

<sup>21</sup> Palokop kaw ha miha ta miha gawan ha pamanggalang yo kan Apo Jesu-Cristo. <sup>22</sup> Hikaw ya babayi ya nipag-ahawa, palokop kaw ha ahawa yo hēn nanad ha pamagpalokop yo ha Panginoon. <sup>23</sup> Gawan bay ya lalaki ay ampamaala ha ahawa na hēn nanad ha pamamaala kantamo ni Apo Jesu-Cristo, ya pinaka-uloh tamon ampaniwala kana, ya pinakalawini na. Hiya êt ya ampamilitas kantamo. <sup>24</sup> No ay-êmēn ya pamagpalokop tamo kana, ay êmbayro êt ya hikaw ya babayi ay dapat palokop ha ahawa yo hēn boon nakēm.

<sup>25</sup> Hikaw ya lalaki, dapat lugurēn yoy ahawa yo hēn nanad ha pamanlugud ni Apo Jesu-Cristo kantamo. Impakit nay pamanlugud na hēn indin nay lawini na ha ikakangēd tamo. <sup>26</sup> Dinyag nay habayto, ta êmēn na kitamon tanggapēn ni Apo Namalyari paubat hēn nalinisan kitamina ha pamanhumonol ha Habi na, haka ha pagpabawtismo tamo. <sup>27</sup> Dinyag nay habayto etaman ta êmēn hikitamoy ampaniwala kana ay nakal-an hēn umarap kana hēn nanad ha mihay dalaga ya angkasalēn ya mahampat, mangēd, haka malinis, hēn ayn kapintasan ha arapan ni Apo Namalyari. <sup>28</sup> Kabay dapat lugurēn lan lalaki ya ahawa la hēn nanad ha pamanlugud la ha sarili lan

lawini. Hilay lalaki ya ampanlugud ha ahawa la ay ampanlugud etaman ha sarili la. <sup>29</sup> Ayn anhumêmêk ha sarilin lawini, ta habaytoy ampakanên haka anhayhayêñ la hén nanad ha andaygêñ ni Apo Jesu-Cristo kanlan ampaniwala kana, <sup>30</sup> gawan bay hikitamo ay pinakalawini na. <sup>31</sup> Nakahulat ha Habi ni Apo Namalyari ya êmên di, “Gawan di ay lakwanan nan lalaki ya toa na ta milamo hilay nan miahawa, ta mag-in mimiha hila tana.”\* <sup>32</sup> Habayto ya inungkat ko, ya nakahulat ha Habi ni Apo Namalyari, ay main malalê ya labay habiêñ ya tungkol ha pakikimiha ni Apo Jesu-Cristo kantamon ampaniwala kana. <sup>33</sup> Embayro man, main ya êt labay habiêñ ya tungkol ha mitaahawa. Kabay hikaw ya lalaki ya main ahawa, ay dapat lugurêñ yoy ahawa yo hén nanad ha pamanlugud yo ha sarili yo. Hikaw ya babayi etaman, ay galangêñ yoy ahawa yo.

## 6

### *Aral ha pamilya*

<sup>1</sup> Hikaw ya anak, dapat yon honolên ya utoh hén toa yo, ta mangêd ya habayto kanlan main pakikimiha ha Panginoon. <sup>2</sup> Gawan nakahulat ha Habi ni Apo Namalyari ya, “Galangêñ moy toa mo.”\* Habaytoy unan utoh ni Apo Namalyari ya main lamo hén pangako. Êmên ya di ya laman hén habaytoy pangako, <sup>3</sup> “ta no daygêñ yoy habayto, ay kumarang haka mitsighaw ya biyay yo di ha luta.”

<sup>4</sup> Hikaw etaman ya toa, paan yon pahulukêñ ya anak yo. Noa, itoro yo kanla ya labay ni Panginoon Jesu-Cristo ha biyay la, haka paral-an yo hila no manyag hilan kasalanan.

### *Hilay tagahuyo haka hilay ámo*

<sup>5</sup> Hikaw ya nakiámo, ay pakahonolên yoy ámo yo di ha luta hén nanad ha pamanhumonol yo kan Panginoon Jesu-Cristo hén main pamanggalang, haka limo. <sup>6</sup> Daygêñ yoy habayto, alwan bêngat no main ampamantay kamoyu hén nanad kanlan ampanapol hén pamandayêw hén tawo, noa, magpakahipég kaw hén nanad anhuyuêñ yo hi Panginoon Jesu-Cristo ha pamanyag kalabayan ni Apo Namalyari hén booy nakêm. <sup>7</sup> Huyuêñ yoy ámo yo hén booy nakêm hén nanad ha pamaghuyo yo ha kalabayan nan Panginoon, ta ha êmbayro ay anhonolên yoy kalabayan nan Panginoon alwan bat kalabayan tawo. <sup>8</sup> Siguradon tumbahan nan Panginoon ya balang miha, ha kangêran ya dinyag la, tagahuyo man o alwa.

<sup>9</sup> Hikaw ya ámo, dapat mag-in mangêd ya pamamaala yo kanlan nakiamo kamoyu. Paan yo hilan hablaêñ ta muwang yo ya hikitamo ay main ámo ha langit, ya hi Apo Namalyari ya ayn ampiliêñ.

### *Ya panlaban tamo kan Satanas*

<sup>10</sup> Amêhêñ, hatsi ya tawlin toro ko kamoyu, ya tanggapêñ yoy kapangyarihan ya pan-idin nan Panginoon kantamon ampaniwala kana, ta êmên yo pataniéhêñ ya nakêm yo. <sup>11</sup> Ihulod yo ya kabooan panlaban ya indin kamoyu ni Apo Namalyari, ta êmên yo mapaglabanan ya an-ipadanias ni Satanas. <sup>12</sup> Gawan, ya kapatsi tamo ay alwan tawo, noa, hi Satanas, haka hilay kalamo na ha hêwang ya nangarawak ya a angkahêlêk, ya main tungkulán hén mamaala kanlan tawo ya atsi pon ha kariglêman di ha luta. <sup>13</sup> Kabay ihulod yoy kabooan panlaban ya indin ni Apo Namalyari, ta êmên kaw manambut

\* **5:31** Genesis 2:24. \* **6:2** Genesis 6:2-3; Exodus 20:12; Deuteronomio 5:16.

ha panlaban yo kanla, haka pamakayari yon makilaban ay makhaw kaw pon hēn nakairēng.

<sup>14</sup> Kabay mirēng kaw hēn nakal-an hēn lumaban. Dapat panay kaw maghabin kaptēgan, ya nanad ha an-isinturon yoy kaptēgan.<sup>†</sup> Dapat mag-in kaw hēn mahonol kana, hēn nanad ha an-ihulod yoy habaytoy paman-humonol, ya nanad pinakakalahag pagaw yo. <sup>15</sup> Dapat nakal-an kaw hēn mamipamwang hēn Mangangēd ya Habi hēn tungkol kan Apo Jesu-Cristo ya ubatan hēn pamiúmang kan Apo Namalyari. Habaytoy nanad nag-apin bitsih yo hēn nakal-an hēn lumaban. <sup>16</sup> Dapat pakatalanēn yoy paniwala yo kan Apo Jesu-Cristo ta habayto ay nanad kalahag yo ya panangga boy pamarē ha angkumlab ya tarêm hēn yawo ni Satanas. <sup>17</sup> Ya kasiguradoan hēn kaligtasan yo, ay dapat yon ikopya hēn nanad elmit. Haka ya Habi ni Apo Namalyari, ya an-ipaihip kamoyu hēn Espiritu na, ay yabay ya nanad hundang yo. <sup>18</sup> Dapat yon daygēn ya habayto ngan, hēn main pamakiingalon manalangin kan Apo Namalyari. Panay kaw manalangin ha hawop hēn Espiritu na. Paan kaw humawa hēn manalangin haka ihalangin yo hilangan ya pinili ni Apo Namalyari hēn mag-in kana. <sup>19</sup> Ihalangin yo ko etaman ya dyanan na ko ni Apo Namalyari hēn galing ha pamaghabi ta êmēn makhaw ya nakēm kon mamipamwang hēn Mangangēd ya Habi ya tungkol kan Apo Jesu-Cristo ya impamwang amêhēn. <sup>20</sup> Ihalangin yo ko gawan hikoy mihay in-utoh na hēn ipamwang ya hata Mangēd ya Habi, noa, amêhēn ay nakahukul ako gawan ha pamipamwang kon habayto. Kabay ihalangin yo ko ya maipamwang koy habayto hēn makhaw ya nakēm ta habaytoy an-ipadyag ni Apo Namalyari kangko.

#### *Ya tawlin inhulat*

<sup>21</sup> No hiko etaman ya labay yon kotangēn, hi Tiquico tanay maghabi kamoyu hēn tungkol kangko haka ya tungkol ha andaygēn ko di. Hiya ya mihay anlugarēn tamon patēl haka mapaypaniwal-an ya tagahuyo hēn Panginoon. <sup>22</sup> In-utoh ko ya bahēn kamoyu êmēn yo mamwangan ya pamibiyay-biyay naēn di, haka ta êmēn humigla ya nakēm yo.

<sup>23</sup> Patēl ko ha Panginoon, an-ihalangin kataw ya hi Apo Namalyari ya Tatang tamo, haka hi Panginoon Jesu-Cristo ay mam-in kapatékbēkan nakēm yo, haka mamipahan hēn pamilulugud yo. Mapataniēh dayi ya paniwala yo kan Apo Jesu-Cristo. <sup>24</sup> Dayi ingalwan kaw kaganawan ya ampanlugud kan Panginoon Jesu-Cristo hēn main pamanlugud ya ayn angga.

---

<sup>†</sup> **6:14** Isaias 11:5.

## Ya hulat ni apostol Pablo kanlan ampaniwala kan Apo Jesu-Cristo ha Filipos

### *Paunan habi*

Hinulatan ni apostol Pablo hilay ampaniwala kan Apo Jesu-Cristo ya angkapi-tsi-tsipon ha balayan Filipos ha probinsyan Macedonia ya atsi ha legal hēn Europa. Ha Dyag 16:6-40 ay mabáha no ay-êmēn naipairêng ya habaytoy unan pami-tsi-tsipon lan ampaniwala bayro ha Europa. Hinulatan na hila ubat ha hukulan ta nagpahalamat ya ha hawop ya impagtan la kana, impalinaw na kanla ya tungkol ha hakit ni Epafroditio ya tawlin nantan hawop la, haka na hila inaralan.

Kabooan hēn pinakalaman

Umpisan hulat 1:1-11

Ya pamaptēg ni apostol Pablo 1:12-26

Ya dapat mag-in pamimiyay lan ampaniwala kan Apo Jesu-Cristo 1:27-2:18

Ya tungkol kan Timoteo haka Epafroditio 2:19-30

No ay-êmēn mag-in mangēd ha hēlēk ni Apo Namalyari 3:1-15

Hilay ampanoro hēn alwan pētēg 3:16-21

Ya aral ni apostol Pablo kanlan taga-Filipos ya tungkol ha pamikakasundo  
haka kapatēkbēkan 4:1-9

Ya pahalamat ni apostol Pablo ha impagtan lay hawop kana 4:10-20

Tawlin habi 4:21-23

<sup>1</sup> Hiko hi Pablo. Kalamo ko hi Timoteo ya kapareho kon ampaghuyu kan Apo Jesu-Cristo. Anhulatan kataw ya atsi bahēn ha balayan Filipos ya pinili ni Apo Namalyari hēn mag-in kana gawan ha pakikimiha yo kan Apo Jesu-Cristo. Habaytsi ya hulat ay kamoyu etaman ya toa ya ampamaala haka ampanawop ha pami-tsi-tsipon yon patēl ha Panginoon.

<sup>2</sup> An-ihalangin naêñ kaw ya dyanan kaw dayi hēn kapatēkbēkan nakêm, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

### *An-ihalangin ni apostol Pablo hilay taga-Filipos, ya ampaniwala kan Apo Jesu-Cristo*

<sup>3</sup> Balang kataw angkaihipan ya ampaniwala kan Apo Jesu-Cristo ha balayan Filipos, ay panay akon ampagpahalamat kan Apo Namalyari, ya ansimbaen ko. <sup>4</sup> Panay ako etaman angkahiglan mangihalangin hēn balang miha kamoyu, <sup>5</sup> gawan paubat hēn una kaw naniwala kan Apo Jesu-Cristo, angga amêhēn, ay anhawpan yo ko, ta êmēn ko maitoro ya Mangangēd ya Habi ya tungkol kana. <sup>6</sup> Angkasigurado ko ya hi Apo Namalyari ya ampangubatan hēn kangēran ya atsi ha ihip haka biyay yo. Angkasigurado ko êt ya hiya etaman ya mamihundo ha pandaygēn na kamoyu angga ha a mayari ya kalabayan na ha biyay yo, ha pamag-orong ni Apo Jesu-Cristo di ha luta.

<sup>7</sup> Hēpat bat no êmbayroy an-ihipêñ ko ya tungkol kamoyu, gawan atsi kaw di ha nakêm ko. Hikaw ay kalamo kon an-ingalwan ni Apo Namalyari di amêhēn ha hukulan, haka hēn hato ha pamilaban kon kaptēgan hēn tungkol kan Apo Jesu-Cristo haka ha paypamwang hēn habaytoy kaptēgan, ta êmēn nag-in mananiêh ya paniwala yon ampaniwala. <sup>8</sup> Muwang ni Apo Namalyari ya

angkalêngêw ako kamoyu, ta no ay-êmên kaw anlugarûn ni Apo Jesu-Cristo, ay êmbayro etaman ya pamanlugud ko kamoyu.

<sup>9</sup> An-ihalangin kataw ya mapahanan dayi ya pamilulugud yo, ya kamwan-gan yo haka ya pamangintindi yo hên tungkol ha dapat yon daygên, <sup>10</sup> ta êmên yo madyag ya pinakamangêd. No êmên di, ay malatêng na kaw ni Apo Jesu-Cristo hên malinis ya ayn kapintasan ha allon pag-orong na di. <sup>11</sup> An-ihalangin ko êt ya mag-in kaw hên taganán mahonol kana, gawan ha pakikimiha yo kan Apo Jesu-Cristo, ta êmên la galangên haka puriên hi Apo Namalyari.

### *Ya paypamwang hên tungkol kan Apo Jesu-Cristo*

<sup>12</sup> Hikaw ya patêl ko ha balayan Filipos, labay kon mamwangan yo, ya gawan ha pangakulung ko, ay lalo hên naipamwang ya Mangêd ya Habi tungkol kan Panginoon Jesu-Cristo. <sup>13</sup> Namwangan lan hundaloh ya am-pananod di ha balin ampamaala ha Gobyernon Roma, haka mal-at pon ya kaatag bayri, ya hikoy nakakulung gawan bêngat ha pakikimiha ko kan Apo Jesu-Cristo. <sup>14</sup> Gawan ha pangakulung ko, ay mal-at kanlan patêl ha Panginoon ya tinumaniêh ya paniwala, haka lalo lan an-ipamwang ya tungkol kan Apo Jesu-Cristo hên ayn limo.

<sup>15</sup> Main hên ampampamwang hên tungkol kan Apo Jesu-Cristo, gawan ha angkaridya hila, o gawan ha labay lan kipatsi. Noa, ya kaatag ay ampampamwang hên tungkol kana hên booy nakêm la. <sup>16</sup> Hilay ampampamwang hên tungkol kana, hên booy nakêm la, ay ampampamwang gawan ha pamanlugud la, ta muwang la ya atsi ko di gawan ha pinili na ko ni Apo Namalyari hên mamaptêg, ya pêtêg ya Mangêd ya Habi tungkol kan Apo Jesu-Cristo. <sup>17</sup> Hilay ampampamwang gawan ha angkaridya hila, hên alwan boon nakêm la, ay êndat la no mapahanan ya kairapan ko di ha hukulan, gawan ha paypamwang la. <sup>18</sup> Êmbayro man ya nakêm lan ampaypamwang, ay mahigla ko, ta an-ipamwang ya tungkol kan Panginoon Jesu-Cristo, hên gawan ha kangêran nakêm, o karawakan nakêm man.

Ihundo koy pamaghigla ko <sup>19</sup> ta muwang ko ya mibuhan ako, gawan ha pangihalangin yo kangko, haka gawan ha hawop nan Espiritu ni Apo Jesu-Cristo. <sup>20</sup> Ya pan-êngganan ko, haka taganán labay ko, ay a ko madyag ya hinoman ya ikarêng-êy ko, noa, panay kumhaw ya nakêm ko hên manyag hên mamapuri kan Apo Jesu-Cristo, kaban biyay ko êt, o ha kamatsan ko man. <sup>21</sup> Ta no kotangên yo ko, ay kaban nabiyay ko pon, ay an-iubuh koy sarili ko kan Apo Jesu-Cristo, haka no matsi ko man, ay ha ikakangêd ko etaman ya kamatsan. <sup>22</sup> No waringan ta a la ko patsên, ay makapaghuyo ko pon kan Apo Jesu-Cristo. Kabay a ko mahabi no labay kinan matsi, o mabiyay pon. <sup>23</sup> Angkairapan akon mamili, kanlan lowa. Labay ko hên mag-alih di ha luta, ta êmên mapagkalamo kina hi Apo Jesu-Cristo, ta pêtêg hên mangêd ya habayto. <sup>24</sup> Noa, kailangan kon mabiyay pon, ta êmên kataw mahawpan. <sup>25</sup> Angkasiguradoan koy habayto, kabay muwang ko ya kumarang pon ya biyay ko haka a kataw pon lakwanan, ta êmên kataw mahawpan ha pamihundo yo ha paniwala yo kan Apo Jesu-Cristo, ya main kahiglaan. <sup>26</sup> Kabay ha pag-orong ko bahê, ay lalo yon maipaglangka ya pakikimiha yo kan Apo Jesu-Cristo haka kangko.

<sup>27</sup> Ya maalagá, ay daygên yoy kangêran ya namwangan yo ha Mangêd ya Habi tungkol kan Apo Jesu-Cristo, ta mag-orong ako man kamoyu, o a ko maka-orong, ay mamwangan ko ya tungkol kamoyu, ya an-illagan yoy pakikimiha yo hên milalamo hên an-ipaglaban ya paniwala yo ha Mangêd ya Habi tungkol kan Apo Jesu-Cristo. <sup>28</sup> Paan kaw malimo ha ampamairap

kamoyu, ta no panay makhaw ya nakêm yo hên umarap kanla, ay mamwangan lan taganá ya parusaan hila ni Apo Namalyari hên ayn angga, haka hikaw ay iligtas na <sup>29</sup>ta ya karapatan ya indin kamoyun ampaghuyo kan Apo Jesu-Cristo, ay alwan bêngat ha paniwala, noa, dapat nakal-an kaw etaman hên magdanas hên kairapan ha paghuyo yo kana. <sup>30</sup>Haka hata kairapan ya andanasan yo amêhêñ, ay nanad êt ha dinanas ko, haka hên nanad ha angkabalit-an yoy andanasan ko êt amêhêñ.

## 2

### *Ya pagpakaaypa haka panga-Diyos ni Panginoon Jesu-Cristo*

<sup>1</sup> Patêl ko ha Panginoon, ya pakikimiha yo kan Apo Jesu-Cristo ay ampam-in hêkaw hên nakêm yo haka ya pamanlugud na ay ampamaalih hên yagah yo. Main kaw hên pamakilamo ha Espiritu ni Apo Namalyari. Main kaw etaman hên pamilulugud haka an-ingalwan yoy miha ta miha. <sup>2</sup>Kabay pimimihaêñ yoy ihip haka nakêm yo. Haka lalo kaw hên milulugud, ta êmén mapahiglay nakêm kon pêtêg. <sup>3</sup>Paan kaw manyag hên hinoman gawan bat ha sarili yon kalabayan, o gawan kalangkaan yo. Noa, magpakaaypa kaw hên nakêm ha miha ta miha. Alwa yon ihipêñ ya mangêd kaw kanlan kaatag. <sup>4</sup>Alwan bêngat ha sarili yon ikakangêd ya ihipêñ yo, noa, dapat yon ihipêñ ya ikakangêd hên kaatag etaman. <sup>5</sup>Dapat magkamain kaw hên kaaypaan nakêm nanad kan Apo Jesu-Cristo, <sup>6</sup>ta agyan atsi kana ya panga-Diyos ni Apo Namalyari, ay a na in-imot ya panga-Diyos na. <sup>7</sup>Noa, nanad imbalag na pon ya habayto hên hiyay nag-in tawo, haka naghuyo hên êmén ipoh. Ha hêlêk lan tawo kana ay tawo yan bêngat. <sup>8</sup>Nagpakaaypa ya haka hinonol nay kalabayan ni Apo Namalyari hên pinaulayan na hilan namatsi kana hên impako la ya ha koros. <sup>9</sup>Gawan ha dinyag na, ay indin ni Apo Namalyari kana ya pinakamatag-ay ya tungkulon ya matag-ay pon ha hinon tungkulon, <sup>10</sup>ta êmén ya balang miha ya atsi ha luta, haka ha langit haka hilay naunay na ha mihay biyay, ay mipandokon magsimba kana. <sup>11</sup>Habiên lan kaganawan, ya hi Apo Jesu-Cristo ay Panginoon. Ha habi lan habayto, ay mapuri hi Apo Namalyari, ya Tatang tamo.

### *Hikaw ay nanad hawang ha yabi*

<sup>12</sup>Anlugurên kon patêl ha Panginoon, hên atsi ko bahêñ kamoyu, ay panay yon dinyag ya in-aral ko kamoyu. Kabay amêhêñ, ta ayn ako bahêñ, ay dapat lalo yon daygêñ ya in-aral ko kamoyu gawan ha pamanggalang yo kan Apo Namalyari, haka gawan ha limo yo kana, ta êmén maboo ya kaligtasan yo. <sup>13</sup>Dapat yon daygêñ ya habayto, ta hi Apo Namalyari ay panay hên ampamaihip kamoyu hên manyag kalabayan ná, haka andyanan na kaw hên galing ta êmén yo madyag ya habayto.

<sup>14</sup>Ha hinon andaygêñ yo, ay paan kaw manitol haka paan kaw makihubak, <sup>15</sup>ta êmén hikaw ya maának ni Apo Namalyari ay mag-in ayn kapintasan, línow, ya panay mangêd, atsi kaw man ha pibonakan lan tawo ya nangarawak ya mapanyag kasalanan. Kabay nanad kaw hên hêneg ya ampam-in hawang bayri ha luta, <sup>16</sup>ta an-ipamwang yo kanla ya habi ya ampangubatan hên biyay ya ayn angga, ta êmén lano ha allon pamag-orong ni Apo Jesu-Cristo, ay main akon kahiglaan hên maipagmahlay, ya a nahayang ya pamagpagal ko kamoyu.

<sup>17</sup>Ya paniwala yo kan Apo Jesu-Cristo ay nanad átang kan Apo Namalyari. Mahigla ko, haka pahiglaêñ kataw, patsêñ la ko man ta ya daya ko ay nanad ha alak ya ibullog ha pamagsimba kan Apo Namalyari. <sup>18</sup>Dapat ikahigla yo etaman ya êmbayro ta makihihigla kaw kangko.

*Ya tungkol kan Timoteo haka Epafroditō*

<sup>19</sup> No kalabayan ni Panginoon Jesus, ay tampol ko dayin palakwēn hi Timoteo bahēn kamoyu, ta êmēn hiko man dayi, ay mapahigla, no mamwangan ko ya tungkol bahēn kamoyu ha pag-orong na di. <sup>20</sup> Ayn kaatag ya êmēn kana ya ampakimihan nakêm kangko hēn mabay hēn manawop kamoyu. <sup>21</sup> Hilay kaatag ay ampangihip bēngat hēn para ha sariili la. A la an-ihipēn ya para kan Panginoon Jesu-Cristo. <sup>22</sup> Noa, hi Timoteo ay muwang yo etaman ya kangēran ugali na. Muwang yo no ay-êmēn na kon hinawpan, ha pamipamwang ya Mangēd ya Habi tungkol kan Apo Jesu-Cristo. Ya panawop na ay nanad ha panawop hēn mihay anak ha toa na. <sup>23</sup> Kabay pamakamwang ko no hinoy malyari kangko bayri, gawan ha pamanatol hēn kaso ko, ay tampol ko yan maiutoh bahēn. <sup>24</sup> Haka sigurado ko, no kalabayan ni Panginoon, ay a mabuyot ay makalako ko bahēn etaman.

<sup>25</sup> Naihipan ko ya kailangan kon paorongēn bahēn hi Epafroditō, ya patēl tamo ha Panginoon ya in-utoh yo, hēn manawop kangko ha balang kailangan ko. Hiyay kapareho kon ampaghuyo kan Apo Jesu-Cristo, haka nanad kapareho kon hundaloh ni Apo Jesu-Cristo. <sup>26</sup> Paorongēn ko ya bahēn ta angkalēngēw yay na kamoyu, haka gawan ampanyagah ya do ha balita ya nidaoh kamoyu, ya tungkol ha pamaghakit na. <sup>27</sup> Pêtēg bay mabyat ya hakit na, kabay namērad ya tanan natsi. Noa, iningalwan na ya ni Apo Namalyari, kabay namahig-pahig yay na. Alwan bat hi Epafroditō ya iningalwan ni Apo Namalyari, noa, hiko etaman ya iningalwan na, ta no natsi ya dayi, ay napahanan ya kalungkutan ko. <sup>28</sup> Kabay taganán labay kon makaorong ya bahēn ta êmēn kaw humigla ha mahēlēk yo yan oman haka mabaw-ahan ya yagah ko. <sup>29</sup> Kabay tanggapēn yo ya hēn hadyay kahiglaan gawan ha pakikimiha yo kan Panginoon, haka galangēn yo hilay ampanyag hēn nanad ha dinyag na. <sup>30</sup> Ta ha pamanyag na hēn impadyag kana ni Apo Jesu-Cristo, ay namērad yan natsi. Intaya nay biyay na ta hiyay nag-in kahagili yo hēn manawop kangko.

### 3

*No ay-êmēn mag-in mangēd ha hēlēk ni Apo Namalyari*

<sup>1</sup> Patēl ko ha Panginoon, bayo ko anggaan ya hata hulat ko, ay mahabi ko pon kamoyu ya pakahigla kaw gawan ha pakikimiha yo ha Panginoon. A ko angkahawa hēn omanēn hēn ihulat ya habaytsi kamoyu, ta ha iökakangēd yo ya hatsi.

<sup>2</sup> Kaillag kaw ha nangarawak ya tawo, ya ampangitoro hēn dapat patuli kitamo ta êmēn kitamo mag-in mangēd ha hēlēk ni Apo Namalyari. <sup>3</sup> Pakaihipēn yon mangēd, ya alwan hila, noa, hikitamo, ya nanad mantēg hēn tinuli, ta ansimbaēn tamo ya gawan ha kapangyarihan hēn Espiritu na. Ya pakikimiha naēn kan Apo Jesu-Cristo ya an-ipaglambung naēn, alwan ya ugali ya panluwal ya nanad ha pangatuli, ta êmēn tamo mag-in mangēd ha hēlēk ni Apo Namalyari.

<sup>4</sup> No labay ko, ay malyari kon paniwal-an haka ipaglambung ya ugali ya panluwal gawan hinonol koy habayto hēn igit pon ha hinoman. <sup>5</sup> Ha pamanhumonol ha Kautuhan ni apo Moises, hikoy tinuli ha panwalon allo ubat akon in-anak. Miha koy pêtēg ya Hebreo, ya Israelita. Hikoy mihay kaapo-apoan ni apo Benjamin. No tungkol ha Kautuhan etaman, ay hikoy nag-in mihay Pariseo ya pangkat naēn hēn Israelita ya pinakamahonol ha Kautuhan ni apo Moises. <sup>6</sup> Boon nakêm kon namairap kanlan ampaniwalā kan Apo Jesu-Cristo, ta êndat kon habaytoy kalabayan ni Apo Namalyari. No

tungkol ha pamanhumonol ha Kautuhan ni apo Moises, ay ayn maipintas kangko, ta naubuh kon hinonol ya habayto.

<sup>7</sup> Noa, hêñ naniwala ko kan Apo Jesu-Cristo, ay intad kinan ayn pukat, ya êndat ko hêñ hato, ay mapakinabangnan ko. <sup>8</sup> Alwan bêngat ya mana kon dyag, noa, ya balang hino ay an-itad kinan ayn alagá ta pinahilyan kinan pinakamaalagá hêñ nakilala ko hi Apo Jesu-Cristo, ya Panginoon ko. Gawan ha paghuyo ko kana, ay intad kinan basura, ya ayn alagá, ya balang hino, ta êmén ako makapakilamo kana, <sup>9</sup> haka magkamain akon pakikimiha kana. Kabay an-itad na kon ayn kasalanan ni Apo Namalyari hêñ alwan gawan ha pamanhumonol ko ha Kautuhan, noa, gawan ha paniwala ko kan Apo Jesu-Cristo. <sup>10</sup> Ayn akon kaatag ya labay no alwan makilala ko hi Apo Jesu-Cristo hêñ mangêd, ta êmén ko matanam ha biyay ko ya kapangyarihan na ha pangabiyay nan oman. Labay ko êt ya hiko ay mag-in êmén kana ha nadanasan nay kairapan, haka pamanhumonol angga ha kamatsan. <sup>11</sup> Angkasigurado ko ya matsu ko man ay biyayêñ na ko hêñ oman ha langit.

#### *Iubuh tamoy biyay tamo angga ha kowên kitamina ni Apo Namalyari*

<sup>12</sup> A ko mahabi ya nadyag kinay habayto ngan. A ko êt mahabi ya ganap kina, ya ayn pamagkulang kan Apo Namalyari. Noa, ihundo ko pon ya panyag hêñ kalabayan na, ta hi Apo Jesu-Cristo ya ampanalan kangko.

<sup>13</sup> Patêl ko ha Panginoon, muwang ko ya alwa pon boo ya kamwangan ko tungkol kana, noa, a kinan an-ihipêñ ya nagdann, ta an-iubuh ko tanay biyay ko ha an-arapêñ ko. <sup>14</sup> Nanad ha mihambutan hêñ nakihali-tagtagan, diritso kon puwayuêñ ya nanad digalo, ya biyay ya ayn angga, ya idin ni Apo Namalyari kangko gawan ha pakikimiha ko kan Apo Jesu-Cristo. <sup>15</sup> Hikitamo ya nakataniêh ya nakêm ha paniwala ay dapat êmén bayro ya an-ihipêñ tamo dayi. Noa, no main kamoyu ya main kaatag ya kaihipan, ay hi Apo Namalyari ya mampipamwang kamoyu no hinoy usto. <sup>16</sup> Êmbayro man, ay kailangan tamon honolêñ ya namwangan tamina.

<sup>17</sup> Patêl ko ha Panginoon, magmimiha kaw nakêm ha pamanoto yo kangko, haka kanlan ampanoto ha nag-in biyay naêñ. <sup>18</sup> Panay kon anhabien kamoyu, haka amêhêñ omanêñ kon habien hêñ main lamoy tangih, ya malat êt ya kapatsi ni Apo Jesu-Cristo, ta ha pamimiyay la, ay andaygêñ lan ayn alagá ya pangamatsi na ha koros. <sup>19</sup> Impiyerno ya pilakwan la, ta ya kalabayan lawini la ya andaygêñ lan diyos. Haka an-ipaglambung lay dapat lan ikarêng-êy, haka an-ihipêñ lan bêngat ya tungkol ha biyay la bayri ha luta.

<sup>20</sup> Noa, kantamo, ay langit ya mantêg tamon logal, ya ubatan ni Panginoon Jesu-Cristo, ya mamiligtas, ya an-êngganan tamo. <sup>21</sup> Hiya ya managili hêñ lawini tamon panluta hêñ bayoy lawini, hêñ nanad lawini na, ya panlangit. Daygêñ nay habayto ha kapangyarihan na, ya ampamahuko hêñ balang hino kana.

## 4

#### *Ya aral ni apostol Pablo ya tungkol ha pamikakasundo haka kapatêkbêkan*

<sup>1</sup> Patêl ko ha Panginoon, pakataniêhêñ yoy pakikimiha yo kan Panginoon. Anlugurêñ kataw haka angkalêngêw ako kamoyu. Hikaw ya taganán am-pamahigla kangko. Andayêwêñ kataw ha arapan lan kaatag. <sup>2</sup> Hikaw, Euodia haka Sintique, ampakihabi ko kamoyu, ya mikahundo kaw na dayi ya lowa, hêñ êmén mipatêl ha Panginoon. <sup>3</sup> Ampakihabi ko êt kamo, ya mapaypaniwal-an kon kalamo, ya hawpan mo hilay hata loway babayi. Habain hilay lowa ay nakahawop kangko ha pamipamwang hêñ Mangêd ya Habi, kalamo ni Clemente haka ya kaatag ya kapareho kon mampipamwang.

Ya langan la ay inhulat ni Apo Namalyari ha libro na ya panlêkan langan lan andyanan nan biyay ya ayn angga, hên kalamo na ha langit.

<sup>4</sup> Dapat panay kaw maghigla gawan ha pakikimiha yo kan Panginoon. Anomanen kon habiên ya dapat maghigla kaw.

<sup>5</sup> Dapat magmaaypa kaw hên nakêm, ta marani yana ya pamanlumatêng nan Panginoon. <sup>6</sup> Alwa yon papotogén ya nakêm yo ha hinon malyari. Noa, ihalangin haka ipakikwa yo hên main pahalamat, ya kaganawan kailangan yo kan Apo Namalyari. <sup>7</sup> No daygén yoy habayto, ay dyanan na kaw hên kapatêkbêkan nakêm, ya a makwan maihip, haka habaytoy mag-in nanad bantay ya ampamantay hên nakêm yo gawan ha pakikimiha yo kan Apo Jesu-Cristo.

<sup>8</sup> Amêhêñ, ya tawlin aral ko kamoyun patêl, ay êmén di: dapat panay yon ihipêñ ya mangangêd, haka ya hépat hên dayêwén: ya kaganawan kaptégan, ya marangal, ya ayn kapintasan, ya malinis, ya makapalugud, haka ya makapadayêw. <sup>9</sup> No ihundo yoy panyag yon namwangan yo kangko, haka ya in-aral ko kamoyu, ha pamaghabi ko, haka ha dyag ko, ay panay na kaw lamoan ni Apo Namalyari, ya ampam-in kapatêkbêkan kantamo.

### *Ya pahalamat ni apostol Pablo ha impagtan lay hawop kana*

<sup>10</sup> Ha pakikimiha ko kan Panginoon, ay an-ikahigla kon taganá, ya ha pamakalabah hên nabuyot ya panaon, ay naipahlék yoy pamanlugud yo kangkon oman. Muwang kon taganá ya a yo ko anliwaan, haka babayo yon naarap hên ipagtan ya hawop yo kangko. <sup>11</sup> Angkahabi koy habayto hên alwan ha ampanikapan kataw hên hawop yo, ta mahiglay nay kaihipan ko, hinoman ya angkaranasan ko. <sup>12</sup> Naranasan kinay kairapan, haka nadanasan ko etaman ya kasaganaan. Ha hinon arapén ko, ay nipasnaw ya ihip ko, angkabhojy ako man, o matsi kon lonoh, kasaganaan man, o kairapan. <sup>13</sup> Maubuh kon madyag ya habayto, ta andyanan na ko ni Apo Jesu-Cristo hên kataniêhan nakêm.

<sup>14</sup> Embayro man, ay mangêd ya dinyag yo hên hinawpan yo ko. <sup>15</sup> Muwang yo etaman hên taga-Filipos, ya patêl ha Panginoon ya angkapi-tsi-tsipon, ya hikaw bêngat ya nanaglap kangko hên inumalih ako bahêñ ha Macedonia, hên habayton una kon namitoro hên Mangêd ya Habi tungkol kan Apo Jesu-Cristo. <sup>16</sup> Haka hên atsi ko man bayro ha balayan Tesalonica, ay alwan bat minghan kaw namagtan hên kailangan ko. <sup>17</sup> Alwan ha ampanapolan kataw ha an-idin yo kangko, noa, ya labay ko ay mapahanan ya itumbah ni Apo Namalyari kamoyu. <sup>18</sup> Amêhêñ, ta naubuh kinan natanggap ya impagtan yo kan Epaafroditoy ampipasnaw kina. Kaalimbawaan hên impagtan yo ay nabango ya paraêp ya tinanggap ni Apo Namalyari haka nakapahigla kana. <sup>19</sup> Gawan ha pakikimiha yo kan Apo Jesu-Cristo, ay hi Apo Namalyari, ya main pibandian ya a maubuh, ay mam-i kamoyu hên kaganawan kailangan yo. Hiya ya ansimbaêñ ko. <sup>20</sup> Puriêñ tamo ya, ya Tatang tamo hên ayn angga. Amen.

### *Tawlin pangumusta*

<sup>21</sup> Idaoh yoy hata pangumusta naêñ ha balang pinili ni Apo Namalyari ya main pakikimiha kan Apo Jesu-Cristo. Hilay patêl tamo ay kalamo ko hên ampipangumusta kamoyu bahêñ. <sup>22</sup> An-ipadaoh ya pangumusta kamoyu, hên hilay pinili ni Apo Namalyari hên mag-in kana, ya atsi bayri, lalon-laloy na hilay ampag-obra bayri ha balin ampamaala ha Gobyernon Roma.

<sup>23</sup> Panay dayin atsi kamoyu ya ingalo ni Panginoon Jesu-Cristo.

## Ya Hulat ni apostol Pablo kanlan ampaniwala kan Apo Jesu-Cristo ha Colosas

### *Paunan habi*

Ya Colosas ay mihay balayan ha Asia Menor ya atsi ha dapit awahan allo hên balayan Efeso ha dayo hên magatoh boy pitumpo boy limay kilometro. Hêñ haton ampanoro hi apostol Pablo ha Efeso, hiyay nangiutoh kan Epafras hêñ manoro hêñ mangipairêng pami-tsi-tsipon lan ampaniwala bayro ha Colosas ya balayan ya pinanhumlayan ni Epafras. Amêhêñ hinulatan hila ni apostol Pablo hêñ hata hulat gawan namwangan na ya main ampanoron alwan pêtêg, ya nanad ha kailangan simbaén pon ya ungnoy espiritu ya main kanon kapangyarihan bayo mamwangan hi Apo Namalyari, haka madyanan biyay ya ayn angga. Kabay di ha hulat ay impalinaw ni apostol Pablo kanla ya kaptégan ya tungkol kan Apo Jesu-Cristo. Hi Apo Jesu-Cristo bêngat ya makapiligtas hêñ balang miha. Taganán ayn nanan kaatag no alwan hiyan bêngat.

Kabooan hêñ pinakalaman

Umpisan hulat 1:1-2

Ya pahalamat haka ya pamakidawat ni apostol Pablo 1:3-14

Ayn yan kapantag hi Apo Jesu-Cristo 1:15-2:19

Ya bayoy pamimiyay hêñ kalamo ni Apo Jesu-Cristo 2:20-4:6

Tawlin pangumusta 4:7-18

<sup>1</sup> Hiko hi Pablo. Dinyag na kon apostol na, ni Apo Jesu-Cristo, gawan ha kalabayan ni Apo Namalyari. Hi Timoteo, ya patêl tamo ha paniwala kan Apo Jesu-Cristo, ay kalamo kon ampangumusta kamoyu. <sup>2</sup> Habaytsi ya hulat ay kamoyun tapat ya mipapatêl kan Panginoon Jesu-Cristo, ha balayan Colosas, ya pinili ni Apo Namalyari hêñ mag-in kana.

An-ihalangin naêñ kaw ya dyanan kaw dayi hêñ kapatêkbêkan nakêm, haka ingalwan kaw dayi ni Apo Namalyari ya Tatang tamo.

### *Ya pahalamat haka ya pamakidawat ni apostol Pablo*

<sup>3</sup> Panay kay hêñ ampagpahalamat kan Apo Namalyari, ya Tatang ni Panginoon tamon Apo Jesu-Cristo, no an-ihalangin naêñ kaw, <sup>4</sup> ta nagilam naêñ ya tungkol ha paniwala yo kan Apo Jesu-Cristo, haka ya pamanlugud yo kanlan pinili ni Apo Namalyari hêñ mag-in kana. <sup>5</sup> Muwang naêñ ya main kaw hêñ paniwala haka pamanlugud, gawan an-êngganan yoy tanggapêñ yo lano, ya inlêan para kamoyu ha langit. Tungkol hatsi ya an-êngganan yo, ay nagilam yoy na paubat êt hêñ una, hêñ intoro kamoyu ya kaptégan, ya Mangêd ya Habi, ya tungkol kan Apo Jesu-Cristo. <sup>6</sup> Ya hata Mangêd ya Habi ay ampibah-wag ha ayri man ya legal di ha boon luta. Habaytsi ya ampakabayo hêñ biyay hêñ balang miha, ya nanad hêñ nalyari kamoyu paubat hêñ nagilam yo, naintindihan yo, haka nadanasan yo, ya tungkol ha ayn kapantag ya ingalo ni Apo Namalyari. <sup>7</sup> Ya mapaypaniwal-an ya tagahuyo, ya namitoro kamoyu hêñ hatsi, ha hawop naêñ kamoyu, ay hi Epafras, ya anlugurêñ naêñ. Hiyay kapareho naêñ hêñ tagahuyo ni Panginoon Jesu-Cristo. <sup>8</sup> Hiya etaman ya namipamwang kannâen hêñ tungkol ha pamanlugud yo, ya indin kamoyu hêñ Espiritu ni Apo Namalyari.

**9** Kabay paubat hēn nagilam naēn ya habayto, ya tungkol kamoyu, ay panay naēn kaw hēn an-ihalangin. Ampakidawat naēn kan Apo Namalyari, ya ipakamwang na kamoyu, ya kalabayan na hēn main pamangintindi ya ayn pamagkulang, ya an-idin na kamoyu hēn Espiritu na. **10** Ha êmbayro, ay mag-in mangēd haka ikahigla ni Apo Namalyari, ya pamimiyay yo. Panay kaw manyag hēn kangēran, haka panay mapahanan ya kamwangan yo kan Apo Namalyari. **11** Pampakidawat naēn êt ya pakhawēn ni Apo Namalyari ya nakēm yo hēn kapangyarihan, ya a makwan maihip, ta êmēn yo mapagtēhan hēn main kahiglaan, ya hinon angkaranasan yo. **12** Dayi ihundo yoy pamagpahalamat yo kan Apo Namalyari, ya Tatang tamo, ta dinyag na kitamo hēn hépat hēn makapakiatag ha mana, ya idin na kantamon pinili na hēn mag-in kana lano ha lokop na, ya nanad kahawangan. **13** Gawan bay inlitas na kitamo, ha pangaipoh tamo, ha kariglēman hēn lokop ni Satanas. Haka na kitamo indin ha lokop ni Apo Jesu-Cristo, ya anlugurēn nan Anak, **14** ya namayad hēn parusan kasalanan tamo, ta êmēn kitamo makapakikwan patawad.

### *Ayn yan kapantag hi Apo Jesu-Cristo*

**15** Hi Apo Namalyari ay a angkahēlēk. Noa, no ay-êmēn ya angkahēlēk tamo kan Apo Jesu-Cristo, ay êmēn ya êt bayro ya ugali ni Apo Namalyari. Hi Apo Jesu-Cristo ya ampanalan ha kaganawan dinyag. Atsi yay na hēn ayn pon dinyag. **16** Impadyag ni Apo Namalyari kan Apo Jesu-Cristo ya kaganawan dinyag ha langit haka ha luta. Dinyag nay angkahēlēk tamo. Dinyag na etaman ya a angkahēlēk, ya hilay main kapangyarihan, haka hilay ampamaala, haka hilay main hēn angkalokopan, haka hilay main matag-ay ya tungkulon. Hi Apo Jesu-Cristo ya nanyag kanla ha ikakangēd na. **17** Bayo na dinyag ya hinoman, ay atsi yay na, haka hiyay ampanalan hēn habaytoy dinyag na. **18** Hiyay ulo tamon ampaniwala kana, ta hikitamoy pinakalawini na. Hiyay ubatan hēn biyay ya ayn angga, gawan hiyay unan biniyay oman ni Apo Namalyari ya ahinan matsi. Kabay hiya, ay ayn kapantag ha hinoman. **19** Ta ya tinalagá ni Apo Namalyari, ay no ay-êmēn ya panga-Diyos na, ay habayto êt ya mag-in panga-Diyos ni Apo Jesu-Cristo. **20** Labay na etaman, ya gawan kan Apo Jesu-Cristo ay maiúmang ya hinoman ha luta haka ha langit kan Apo Namalyari. Kabay natsi ya hi Apo Jesu-Cristo ha koros.

**21** Hēn hato ay marayo kaw kan Apo Namalyari haka nanalanghang kaw kana, gawan ha karawakan ihip haka dyag yo. **22** Noa, amêhēn ay impaúmang na kaw ni Apo Jesu-Cristo kan Apo Namalyari, gawan ha kamatsan na hēn indin nay lawini na ta êmēn na kaw maiarap kan Apo Namalyari hēn banal ya taganán ayn kapintasan. **23** Habaytoy malyari no ihundo yoy paniwala yo hēn main kataniéhan, ya ayn péradi man ya pamag-alangan. Paan yon paulayan hēn maalih kamoyu ya kasiguradoan yo ha Mangēd ya Habi ya ginilam yo. Habaytoy Mangēd ya Habi, ay an-ipamwang ha balang miha. Hiko man, hi Pablo, ay nag-in tagahuyo ta êmēn maipamwang ya habayto.

### *Ya impadyag kan apostol Pablo*

**24** An-ikahigla ko amêhēn ya pamagtēh ko hēn hadyay kairapan ha ikakangēd yo. Ta di ha kairapan hēn lawini ko, ay angkatupad ya tinalagá ni Apo Jesu-Cristo ha ikakangēd lan ampaniwala kana ya ayn kaatag no alwan ya pinakalawini na, ya hilay angkapi-tsi-tsipon hēn ampagsimba kana.

**25** Ha ikakangēd yo, ay hikoy dinyag ni Apo Namalyari hēn tagahuyo lan ampaniwala kan Apo Jesu-Cristo, hēn mamipamwang kamoyu hēn kabooan Habi na, **26** ya a nan impamwang paubat hēn haton lagi. Noa, amêhēn

ay impamwang nay na kantamon pinili na hēn mag-in kana ya habayto. <sup>27</sup> Habayto ya impamwang nay na, ay taganán ayn kapantag ha kangēran, ta habaytoy tungkol ha ingalo na ha alwan Israelita etaman, hēn dyanan hilan biyay ya ayn angga, gawan kan Apo Jesu-Cristo, ya ampaidi ha nakêm yon alwan Israelita ya ampaniwala kana. <sup>28</sup> Kabay an-ipamwang naêñ ya tungkol kana ha balang miha. An-itoro naêñ hila hēn main kamwangan, ya ubat kan Apo Namalyari, ta êmén naêñ hila maiarap kana, hēn ayn kapintasan, gawan ha pakikimiha la kan Apo Jesu-Cristo. <sup>29</sup> Ha kapangyarihan na, ya an-idin na kangko, ay nagpakahipêg kon an-iubuh ya biyay ko, ta êmén malyari ya habayto.

## 2

<sup>1</sup> Labay kon mamwangan yon taga-Colosas, no ay-êmén kon an-idin ya boon hékaw ko ha ikakangêd hēn paniwala yo, haka ha ikakangêd lan ampaniwala kan Apo Jesu-Cristo ha balayan Laodicea, haka kaatag ya kapareho yon a êt nakahélêk kangko. <sup>2</sup> An-iubuh koy hékaw ko ha ikakangêd yo ta êmén humigla ya nakêm yo, haka êmén mag-in mimiha ya nakêm yo ha pamilulugud yo. No êmén di, ay mag-in kaw hēn taganán sigurado ha pamangintindi yo ha kamwangan ya tungkol kan Apo Jesu-Cristo, ya a na impamwang ni Apo Namalyari hēn hato. <sup>3</sup> Hi Apo Jesu-Cristo ya mamipamwang hēn pamangintindi haka kamwangan ni Apo Namalyari ya nanad bandi ya babayon an-ipaawah.

<sup>4</sup> Anhabiên koy habayto kamoyu ta êmén kaw a patukso ha hinoman ya mamidann kamoyu ha nangaayang ya habi ya alwan pêtêg. <sup>5</sup> Ta atsi kamoyun taga-Colosas ya nakêm ko, ayn ako man bahêñ. Angkahigla ko ha pamilalamo yo, haka ha kataniêhan paniwala yo kan Apo Jesu-Cristo.

### *Ya pamimiay ya nanad kan Panginoon Jesu-Cristo*

<sup>6</sup> Gawan ha tinanggap yo hi Apo Jesu-Cristo hēn nag-in Panginoon yo, ay kailangan yon mamiay hēn nanad kanlan main pakikimiha kana.

<sup>7</sup> Makapamiay kaw hēn êmbayro no pakataniêhêñ yoy paniwala yo kana, hēn nanad ha kayo ya magyamot hēn malalê, haka no daygêñ yoy kalabayan na, hēn main pamagpahalamat, hēn nanad ha intoro kamoyu.

<sup>8</sup> Kaillag kaw, ta êmén kaw a kihonol kanlan ampanoro hēn kalokwan haka ya ayn kapukatan. Ya toro la ay alwan toro ni Apo Jesu-Cristo, ta ya pan-itoro la ay habi-habi lan manan tawo haka tungkol ha toro\* lan a ampagpalokop kan Apo Namalyari. <sup>9</sup> Hinabi koy habayto kamoyu gawan hēn atsi ya di ha luta hi Apo Jesu-Cristo, ay atsi kana ya panga-Diyos ni Apo Namalyari. <sup>10</sup> Haka hikaw, ay ayn kaw na hēn kailangan ya kaatag pon, gawan ha pakikimiha yo kan Apo Jesu-Cristo, ya makhaw ha hinoman ya ampamaala haka main tungkuluan.

<sup>11</sup> Gawan ha pakikimiha yo kan Apo Jesu-Cristo, ay nanad tinuli kaw na ha pamanuli na, ta tinalibatokan yoy nay kalabayan yon manyag kasalanan. Hata pamanuli ay alwan dyag hēn tawo. <sup>12</sup> Gawan bay hēn binawtismoan kaw, ay nanad ha in-ilbêng kaw hēn kalamo ni Apo Jesu-Cristo hēn in-ilbêng ya, haka nanad kaw hēn biniyay oman hēn kalamo na hēn biniyay yan oman. Habaytsi ay gawan ha ampaniwala kaw ha kapangyarihan ni Apo Namalyari ya namabiyay oman kana.

<sup>13</sup> Hēn haton bayri, hikaw ay nanad natsi ha arapan ni Apo Namalyari, gawan ampanyag kaw hēn kasalanan, haka gawan alwa kaw Israelita. Noa,

\* <sup>2:8</sup> Wanlan kaatag ya main kamwangan ha Griego ya mihay labay habiên hēn habaytsi ay hilay nangarawak ya a angkahélêk, ya ampamaala di ha luta.

amêhén ay dinyanan na kaw ni Apo Namalyari hén bayoy biyay, gawan ha pakikimiha yo kan Apo Jesu-Cristo. Inubuh nay nan pinatawad ya kasalanan yo. <sup>14</sup> Hén natsi ya ha koros hi Apo Jesu-Cristo, ay pinatawad ni Apo Namalyari ya kasalanan tamo. Nanad ayn nanan alagá ya nanad listahan hén kasalanan tamo ya bawal ha Kautuhan ni apo Moises. <sup>15</sup> Gawan ha kamatsan ni Apo Jesu-Cristo, ay hinambut na hi Satanas haka hilay kalamo na. Inalíh nay kapangyarihan la, haka impamwang nay habayto ha balang hino.

<sup>16</sup> Kabay paan kaw manggilam, no ampintasan la kaw gawan a kaw anhumonol ha patakaran la, hén tungkol ha mangan, minêm, haka allon pamagsimba. Haka paan kaw bat kipista kanla no bayoy buwan, o kaatag ya pista naén Israelita. <sup>17</sup> Gawan ya pamanhumonol kanlan habaytoy patakaran, ay nanad bêngat ha pamanhumonol ha anino hén main anino. Ya labay habiên ay habaytoy intoro hén hato ay palatandaan ha tawo ya lumatêng ya allo ay main kahagili ya habaytoy patakaran. Yabay ya hi Apo Jesu-Cristo. <sup>18</sup> Paan kaw manggilam kanlan waringan hén maaypa ya nakém, ya ampammusmus kamoyu, haka ampamilit kamoyu hén magsimba ha anghel. Êndat la no mangêd hila kamoyu gawan ha nahalumata la. Matag-ay ya nakém la haka marayo kan Apo Namalyari ya ihip la. <sup>19</sup> A hila nakatumpang kan Apo Jesu-Cristo. Hi Apo Jesu-Cristo ya nanad ulo tamon ampaniwala kana. Hikitamoy pinakalawini na, ay main kitamon pakikimiha kana, hén nanad ha kabooan hén lawini ya nangapitutumpang hén pilngoan haka éyat. Mabiyay haka humlay kitamo, gawan ha kapangyarihan ni Apo Namalyari, no nakatumpang kitamo kan Apo Jesu-Cristo.

### *Ya bayoy pamimiyay hén kalamo ni Apo Jesu-Cristo*

<sup>20</sup> Hikaw ay nanad natsi hén kalamo ni Apo Jesu-Cristo, kabay a yoy nan kailangan honolén ya toro<sup>†</sup> lan a ampagpalokop kan Apo Namalyari. Awta anhonolén yo pon ya patakaran nanad ha, <sup>21</sup> “Paan manggapá hén hatsi,” o “Paan kaw manaway hén habain,” o “Paan yon tsig-én ya habayto.” <sup>22</sup> Habaytoy patakaran, haka toro la, ay ayn pukat. Angkaubat hila ha ihip tawo, ya tungkol ha maékan, haka mainêm ya angkaubuh. <sup>23</sup> Pêtêg ya nanad main pukat ya habaytoy patakaran haka toro, ta mangêd ya main mahonol hén main kahipégan haka kaaypaan nakém ha pamagpairap ha sarilin lawini, noa, ayn pukat ya habayto ha panaad ha karawakan kalabayan lawini.

## 3

<sup>1</sup> Biniyay kaw oman hén kalamo ni Apo Jesu-Cristo, ya nakaikno ha dapit panabtab ni Apo Namalyari, ha langit, hén ampamaala hén kalamo na, kabay pakikwanan yo ya hinon makalangit. <sup>2</sup> Pakaihipén yoy makalangit, alwan ya makaluta. <sup>3</sup> Daygén yoy habayto ta nanad kaw natsi ha mana yon pamimiyay, haka main kaw na hén bayoy biyay ya a maayu kamoyu, gawan ha pakikimiha yo kan Apo Jesu-Cristo, ya atsi kan Apo Namalyari. <sup>4</sup> Hi Apo Jesu-Cristo bay, ya pinangubatan hén bayoy biyay tamo, kabay ha pamag-orong na di ha luta, ay hikitamo man, ay mahélék hén kalamo na, ha kapahilêw ya kahampatan na, ya a makwan ihipén.

### *Ya manan pamimiyay, haka ya bayoy pamimiyay*

<sup>5</sup> Kabay alihén yoy na ya panyag yo hén kalabayan lawini hén, nanad ha pamakilalaki, pamabayi, haka kaatag pon ya karawakan kalabayan lawini.

<sup>†</sup> **2:20** Wanlan kaatag ya main kamwangan ha Griego ya mihay labay habiên hén habaytsi ay hilay nangarawak ya a angkahélék, ya ampamaala di ha luta.

Haka alihêñ yoy kaotoyan haka kagatêan, haka hinoman ya a yo an-ikapda, ta ya a yo an-ikapda, ay yabay ya andaygêñ yon diyos yo. <sup>6</sup> Gawan habaytoy karawakan, ay parusaan ni Apo Namalyari hilay alwan mahonol. <sup>7</sup> Hikaw man, hêñ hato, ay êmbayro ya biyay yo, ta panay kaw nanyag hêñ êmbayro. <sup>8</sup> Noa, amêhêñ, ay dapat yoy nan alihêñ ya kaganawan narawak ya dyag, hêñ nanad ha huluk, tobag, hêmêk nakêm, pamanyakaw, haka ya kaparêng-êy ya nangarawak ya habi. <sup>9</sup> Paan kaw milalaram, ta inalíh yoy nay mana yon pangatawo, ya pamanyag yon karawakan. <sup>10</sup> Binayo ni Apo Namalyari ya pangatawo yo, haka panay nay nan ampaahanan ya kamwangan yo hêñ tungkol kana, ya nanyag kamoyu, ta ambayoên na kaw, angga ha mag-in kaw hêñ nanad ha pangatawo na. <sup>11</sup> Kabay amêhêñ, ha bayoy pangatawo tamo, ay alway nan maalagá no Israelita kitamo man, o alwa, no tinuli kitamo man, o alwa, o tawon lalê man, o main kitamon pinag-aralan man, no ipoh kitamo man, o ahê. Ya maalagá amêhêñ ay, hi Apo Jesu-Cristo haka hiyay atsi di kantamon ampaniwala kana.

<sup>12</sup> Anlugurêñ na kaw ni Apo Namalyari, haka pinili na kaw hêñ mag-in kana, hêñ ayn kapintasan. Kabay dapat maingaloën kaw, dapat mag-in mangêd ya nakêm yo, dapat mapagmaaypa kaw hêñ nakêm, napita ya nakêm, dapat mapagtêeh kaw. <sup>13</sup> Dapat mipagtêehan kaw, haka dapat mipapatawed kaw no main kaw hêñ pamagkulang ha miha ta miha, hêñ nanad ha pamatawed na kamoyu ni Apo Jesu-Cristo. <sup>14</sup> Kanlan habayto ay dapat yon pahanan ya pamilulugud, ta êmén mag-in boo ya pakikimiha yo.

<sup>15</sup> Dyanan yo etaman alagá hêñ mamitoynong kaganawan ya an-ihipêñ yo, ya kapatêkbêkan ya an-idin ni Apo Jesu-Cristo, ta hinagyat na kaw hêñ makilamo ha pinakalawini na. Haka dapat panay kaw magpahalamat kana. <sup>16</sup> Ya toro ni Apo Jesu-Cristo, ay dapat panay ha ihip yo, panay ha pangitoro yo, haka panay ha pam-i yon payo ha miha ta miha hêñ main kagalingan, ya ubat kan Apo Namalyari. Hêñ main pahalamat ha nakêm yo kana, kantaêñ yoy kanta, ya nakahulat ha Kahulatan ni Apo Namalyari, haka kaatag êt ya kantan pamagpuri, haka maka-Diyos. <sup>17</sup> Ya maalagá ay, ha kaganawan habi yo, haka dyag yo, ay kailangan yon ipahlêk ya ampaniwala kaw kan Panginoon Jesus. Haka panay kaw magpahalamat kan Apo Namalyari, ya Tatang tamo, gawan ha pakikimiha tamo kan Panginoon Jesus.

### *Ya kailangan ha pamakilamo ha bayoy pamimiyay*

<sup>18</sup> Hikaw ya babayi, ya nipag-ahawa, ay dapat palokop kaw ha ahawa yo, ta hêpat ya hatsi, kanlan main pakikimiha kan Panginoon Jesus.

<sup>19</sup> Hikaw ya lalaki, ya nipag-ahawa, ay dapat lugurêñ yoy ahawa yo, haka alwa yo hilan daygêñ ipoh.

<sup>20</sup> Hikaw etaman ya anak, ay dapat panay yon honolêñ ya utoh hêñ toa yo, ta habayto ay mamahigla kan Panginoon Jesus.

<sup>21</sup> Hikaw etaman ya toa, paan yo hilan pahulukêñ ya anak yo, ta êmén a mahira ya nakêm la.

<sup>22</sup> Hikaw etaman ya ipoh, ay dapat pakahonol kaw ha amo yo di ha luta. Dapat daygêñ yo ya kaganawan an-iutoh la kamoyu, angkahêlêk la man, o ahê, ta andaygêñ yoy habayto, alwan bat para humigla hila kamo, noa, boon nakêm yo hilan paghuyuan, gawan ha pamanggalang yo kan Apo Namalyari.

<sup>23</sup> Dapat boon nakêm yon daygêñ ya hinoman ya andaygêñ yo, hêñ nanad ha anhuyuan yo hi Panginoon Jesu-Cristo, ta alwan kakapag tawo ya anhuyuan yo. <sup>24</sup> Muwang yo ya tumbahan na kaw lano ni Panginoon Jesu-Cristo hêñ impangako na, ta hiya ya anhuyuan yo. <sup>25</sup> Noa, hilay ampamihundo hêñ manyag karawakan, ay parusaan ni Apo Namalyari, ta ayn yan ampiliêñ.

**4**

<sup>1</sup> Hikaw etaman ya ámo, ya nipag-ipoh, ay kailangan hêpat, haka hukad ya idin yo kanla, ta muwang yo ya main kaw etaman hên Amo ha langit.

*Ya kaatag ponya aral*

<sup>2</sup> Dapat boon nakêm yon panay ihundo ya panalangin, hên main pahalamat kan Apo Namalyari. <sup>3</sup> Ihalangin yo kay etaman, ya manyag hi Apo Namalyari hên dann, ta êmén naêñ maipamwang ya tungkol kan Apo Jesu-Cristo, ya a êt impamwang hên hato. Atsi ko di ha hukulan, gawan ha impamwang koy habayto. <sup>4</sup> Ihalangin yo êt, ya maipalinaw koy habayto hên mangêd, ta habayto ay dapat kon daygêñ.

<sup>5</sup> Pakangêrên yoy pamakilamo yo kanlan a êt ampaniwala kan Apo Jesu-Cristo, ta êmén yo maipamwang kanla, ya tungkol kana kaban malyari pon.

<sup>6</sup> Pakaihipêñ yon mangêd, ya anhabiên yo, ta êmén panay ha ikakangêd la, ya habi yo. No êmén di ya daygêñ yo, ay mamwangan yo, no ay-êmén ya mangêd ya pamakibat yo kanlan balang miha.

*Tawlin pangumusta*

<sup>7</sup> Amêhêñ, no hiko etaman ya labay yon kotangêñ, ay hi Tiquico tanay maghabi kamoyu, hên tungkol kangko. Hiyay mihay anlugarûn naêñ patêl ha Panginoon, ya mapaypaniwal-an ha panawop kangko, haka hiyay kapareho kon tagahuyo ni Panginoon Jesu-Cristo. <sup>8</sup> An-iutoh ko ya bahêñ kamoyu, êmén yo mamwangan, ya tungkol kannaêñ, haka ta êmén na pahiglaêñ ya nakêm yo. <sup>9</sup> Kalamo na hi Onesimo, ya taga bahêñ kamoyu. Hi Onesimo ay mihay anlugarûn tamon patêl ha Panginoon amêhêñ. Hiyay mapaypaniwal-an. Ipamwang la kamoyu ya kaganawan ya nalyari bayri kannaêñ.

<sup>10</sup> Angkumustaêñ kaw ni Aristarco, ya kalamo kon nakahukul, haka hi Marcos ya patêl ni Bernabe, ay ampangumusta êt kamoyu. Yabay ya hi Marcos, ya mana kinan hinabi, ya no lumatêng ya bahêñ, ay dapat tanggapêñ yo yan mangêd. <sup>11</sup> Angkumustaêñ kaw êt ni Jesus, ya ambanhagan lan Justo. Habaytsi ya tatlon bêngat, ha kapareho kon Israelita, ya ampaniwalay na kan Apo Jesu-Cristo, ya kalamo naêñ hên mangaral hên tungkol ha pamanlokop ni Apo Namalyari. Pinahigla lay nakêm ko. <sup>12</sup> Angkumustaêñ kaw êt ni Epafras, ya mihay taga bahêñ êt kamoyu, ya mihay tagahuyo ni Apo Jesu-Cristo etaman. Panay na kaw hên an-ihalangin hên boon nakêm na, ya mananiêñ dayi ya paniwala yo, ta êmén kaw mag-in mahonol, hên ayn kapintasan ha kalabayan ni Apo Namalyari. <sup>13</sup> Ampaptêgan ko ya hadyay kahipêgan na, ha ikakangêd yo, haka ha ikakangêd lan ampaniwalha balayan Laodicea haka ha Hierapolis. <sup>14</sup> Angkumustaêñ kaw êt ni Demas haka ni Lucas, ya anlugarûn tamoy doktor.

<sup>15</sup> Habiên yo kanlan mipapatêl kan Panginoon Jesu-Cristo ha Laodicea ya angkumustaêñ ko hila. Êmbayro êt kan Ninfas, haka hilay patêl ha Panginoon ya angkapi-tsi-tsipon ha bali na. <sup>16</sup> Pangayari yon bahaêñ ya hata hulat ko kamoyu, ay ipabaha yo etaman kanlan patêl ha Panginoon ya angkapi-tsi-tsipon ha Laodicea. Êmbayro êt, ay bahaêñ yo dayi ya hulat ko ya ubat ha Laodicea. <sup>17</sup> Habiên yo kan Arquipo ya ihundo nay impatsiwala kana gawan ha pakikimiha na kan Panginoon.

<sup>18</sup> Hikon taganá, hi Pablo, ya ampanulat hên hatsi ya tawlin pamangu-musta kamoyu, ta êmén yo mamwangan ya taganán ubat kangko ya hata hulat. Dayi ihalangin yo ko di ha hukulan.

Ingawan na kaw dayi ni Apo Namalyari.

## Ya unan hulat ni apostol Pablo kanlan ampaniwala kan Apo Jesu-Cristo ha Tesononica

### *Paunan habi*

Hêñ main namaalih kan apostol Pablo, kan Silas, haka kan Timoteo ha balayan Filipos, ay nanoro hila ha balayan Tesalonica. Ya balayan Tesalonica ay kapitolyo hêñ probinsyan Macedonia, ya mihay probinsya, ya angkasakopan lan taga-Roma. Main Israelita bayro ya main sinagoga ya pagsimbaan la kan Apo Namalyari. Bayro yan nanoro hi apostol Pablo hêñ tatloy allon pamagsimba. Impamwang na kanla no ay-êmêñ nakahulat ha Habi ni Apo Namalyari, ya kailangan yan matsi boy mabiyay oman, ya Mesias, ya Cristo, ya impangakon Mâmiligtas, ya pan-êngganan lan Israelita, haka hi Apo Jesu-Cristo ya nakatupad hêñ kaganawan ya impamwang ya tungkol ha Mesias, kabay hiya yan taganá. A lay na dapat êngganan hêñ kaatag. Magpalokop hila tana dayi kan Apo Jesu-Cristo êmêñ hila mapatawad haka madyanan hêñ biyay ya ayn angga hêñ kalamo ni Apo Namalyari. Ya kaatag kanlan Israelita, ay naniwala ha toro lan apostol Pablo. Main etaman ya kaatag Griego ya naniwala. Kabay nabuyot-buyot ay ampi-tsi-tsipon hila ha bali ni Jason, ya miha kanlan ampaniwala, ya ampanngilam toro lan apostol Pablo.

Amêhêñ, labay lan Israelita, ya a ampaniwala ha toro lan apostol Pablo, ya dakpêñ dayi hilan apostol Pablo. Hêñ namwangan lan Jason ya habayto, ay tambêng lan impalako hilan apostol Pablo ha balayan Berea, ta êmêñ hila a madakêp. Nanoro hilan apostol Pablo etaman ha Berea, haka main mal-at ya taga-Berea ya naniwala ha toro la. Noa, hêñ nagilam lan habaytoy Israelita ha Tesalonica ya labay mandakêp kanla, ya atsi hila ha Berea, ay nunta hila ha Berea, ta dakpêñ la dayi hilan apostol Pablo, noa, in-atêl hi apostol Pablo hêñ kaatag kanlan ampaniwala ha toro na, ha balayan Atenas. Hilan Silas haka hi Timoteo ay nabalag ha Berea. Nanoro ya etaman hi apostol Pablo ha Atenas, haka main naniwala ha toro na tungkol kan Apo Jesu-Cristo. Hêñ nabuyot-buyot yay na bayro hi apostol Pablo, ay naglako yay na ha balayan Corinto. Hêñ atsi ya bayro ha balayan Corinto, ay naihipan nan hulatan hilay taga-Tesononica ya ampaniwala kan Apo Jesu-Cristo. Habaytsi ya unan hulat na kanla.

Kabooan hêñ pinakalaman

Pahalamat haka pamandayêw 1:2-3:13

Ya pamimiyay ya ampamahigla kan Apo Namalyari 4:1-12

Ya malyari kanlan natsi haka kanlan angkabiyay ha pag-orong lano ni Apo Jesu-Cristo 4:13-18

Ya pamangênggan ha pag-orong ni Apo Jesu-Cristo 5:1-11

Tawlin aral haka pangumusta 5:12-28

<sup>1</sup> Hiko hi Pablo, kalamo ko hi Silas haka hi Timoteo ya ampipangumusta kamoyu ya patêl ha Panginoon ya atsi ha Tesalonica, ya angkapi-tsi-tsipon gawan ha ampaniwala kaw kan Apo Namalyari, ya Tatang tamo, haka kan Panginoon Jesu-Cristo.

An-ihalangin naêñ kaw ya dyanan kaw hêñ kapatêkbêkan nakêm, haka ingalwan kaw ni Apo Namalyari.

<sup>2</sup> Panay kay ampaahalamat kan Apo Namalyari gawan ha paniwala yo, haka panay naêñ kaw an-ihalangin. <sup>3</sup> An-ipagpahalamat naêñ ya dyag yo, gawan

paniwala yo, ya pamagpagal yo ha pamanawop ha kapareho yo, gawan pamanlugud yo, haka ya pamagtêêh yo ha ampanalanghang kamoyu, gawan angkasigurado yo ya mag-orong ya hi Panginoon tamon Jesu-Cristo.

<sup>4</sup> Patêl ha Panginoon, anlugurên na kaw ni Apo Namalyari, ta muwang naêñ ya pinili na kaw hêñ mag-in kana, <sup>5</sup> ta ya Mangêd ya Habi ya ampaniwal-an naêñ, ay impamwang naêñ kamoyu ha kapangyarihan nan Espiritu ni Apo Namalyari. Hêñ atsi kay bahêñ, ay nahêlêk yo etaman ya pamimiyay naêñ ha ikakangêd yo. <sup>6</sup> Haka tinoto yo kay boy tinoto yo hi Panginoon. Ta dinanan yo man ya hadyay pamairap ubat kanlan a ampaniwal-a, ay tinanggap yo ya Mangêd ya Habi ya intoro naêñ kamoyu hêñ main kahiglaan ya ubat ha Espiritu ni Apo Namalyari.

<sup>7</sup> Kabay hikaw ay nag-in alimbawa kanlan ampaniwal-a kan Apo Jesus ha probinsyan Macedonia haka ha probinsyan Acaya. <sup>8</sup> Alwan bêngat ha probinsyan Macedonia haka ha probinsyan Acaya, noa, ha ayri man ya logal ay namwangan lan tawo ya Mangêd ya Habi tungkol kan Apo Jesus gawan pamimiyay yo haka paniwala yo kan Apo Namalyari. Kabay a naêñ kailangan habiêñ kanla ya tungkol kamoyu. <sup>9</sup> Ta hila ya ampamipamwang no ay-êmêñ yo kay tinanggap. Hila êt ya ampamipamwang no ay-êmêñ yon intêgêñ ya pamagsimba yo ha alwan pêtêg ya diyos, ya mana yon pinuri, ta êmêñ yo simbaêñ hi Apo Namalyari ya mantêg ya Diyos, ya angkabiyay. <sup>10</sup> An-ipamwang la êt no ay-êmêñ yon pan-êngganan ya pamag-orong hêñ anak na, ya hi Apo Jesus, ya mangubat ha langit. Hiyay biniyay oman ni Apo Namalyari haka hiya etaman ya ampamiligtas kantamo ha parusa ya lumatêng ya ubat kan Apo Namalyari.

## 2

### *Ya pamaghuyo ni apostol Pablo ha balayan Tesalonica*

<sup>1</sup> Patêl ha Panginoon, muwang yo ya a nahayang ya pamaniraw naêñ bahêñ kamoyu ha Tesalonica, gawan mal-at ya naniwala hêñ nanoro kay.

<sup>2</sup> Muwang yo etaman ya hêñ atsi kay pon ha balayan Filipos,\* ay minusmus kay haka hadyay pamairap kannaêñ. Noa, hêñ nilumatêng kay bahêñ kamoyu ay pinataniêh ni Apo Namalyari ya nakêm naêñ, ta êmêñ naêñ naipamwang kamoyu ya Mangêd ya Habi na, main man mal-at ya kalamo yo ya nanalanghang kannaêñ.† <sup>3</sup> Kaptêgan taganá ya intoro naêñ kamoyu, ta ayn kay hêñ narawak ya ihip hêñ lokoêñ kaw. <sup>4</sup> Ta impakatsiwala ni Apo Namalyari kannaêñ ya pamipamwang hêñ Mangangêd ya Habi na. Kabay ya pamipamwang naêñ ay alwan gawan kalabayan tawo, noa, gawan ha kalabayan ni Apo Namalyari ya ampakamwang hêñ laman ihip tamo.

<sup>5</sup> Muwang yo haka muwang ni Apo Namalyari ya a kay nanoro kamoyu gawan ampanapol kay hêñ bandi, haka a naêñ kaw dinayêw, ha naayang ya habi gawan main kay hêñ labay kamoyu. <sup>6</sup> A naêñ êt tinapol ya pamandayêw yo, o ya pamandayêw hêñ kaatag. <sup>7</sup> Main kay man hêñ tungkul-an gawan hikay ay apostol ni Apo Jesu-Cristo, ay naaypa ya nakêm naêñ hêñ atsi kay bahêñ. Malugud kay nanad hêñ indo ya ampanayhay hêñ mantêg nan anak.

<sup>8</sup> Ha hadyay lugud naêñ kamoyu, ay namipamwang kay hêñ Mangangêd ya Habi ni Apo Namalyari kamoyu, haka a naêñ in-imot ya biyay naêñ ha ikakangêd yo. <sup>9</sup> Patêl ha Panginoon, muwang naêñ ya a yo naliwaan, ya allo-yabi kay hêñ nagpagal hêñ nag-obra, ta êmêñ a kay pabyat ha hinoman kamoyu hêñ mamakan kannaêñ, hêñ atsi kay bahêñ kamoyu hêñ ampanoro hêñ Mangangêd ya Habi ni Apo Namalyari.

\* **2:2** Dyag 16:16-24. † **2:2** Dyag 17:5-10.

<sup>10</sup> Hikaw haka hi Apo Namalyari, ay ampamaptêg ya taganán ayn kapintasan ya pamakilamo naên kamoyun ampaniwala ha Panginoon, ta hinonol naên ya kalabayan ni Apo Namalyari hên atsi kay bahêñ kamoyu. <sup>11</sup> Muwang yo êt ya ugali naên bahêñ kamoyu, ay nanad ugali hên mangêd ya toa ha panoro hên anak na. <sup>12</sup> Ta ya dinyag naên, ay tinoroan naên kaw hên mangêd, haka pinahigla naên ya ihip yo, ta êmén kaw magpakahipêg hên manyag kangêran, ya ikahigla ni Apo Namalyari ya ampanagyat kamoyu hên palokop kana, hên makilamo ha ayn kapantag ya karangalan na.

<sup>13</sup> Panay kay etaman ampagpahalamat kan Apo Namalyari gawan namwangan yo, ya toro naên ya pinaniwal-an yoy na, ay alwan bêngat toro hên tawo, noa, kaptégan ya ubat kan Apo Namalyari. Habaytoy habi na ay ampam-i kamoyun ampaniwala hên kapangyarihan hên manyag kangêran. <sup>14</sup> Hikaw ya patêl ha Panginoon ya angkapi-tsi-tsipon, napaptêgan ya ampaniwala kaw, ta hikaw man ay pinairapan lan kabalyan yo, ya nanad hên nalyari kanlan patêl ha Panginoon, ya angkapi-tsi-tsipon ha probinsyan Judea, ya pinairapan lan kapareho lan Israelita. <sup>15</sup> Hila bay, ya Israelita, ya namatsi kanlan namipamwang hên habi ni Apo Namalyari hên hato, haka amêhêñ pinatsi la êt hi Panginoon Jesus. Hila êt ya nangipaplag kannaên. Anhalanghangêñ lay kaganawan tawo haka hi Apo Namalyari. <sup>16</sup> Ta ambawalêñ la kay hên mamipamwang hên tungkol kan Apo Jesus kanlan alwan Israelita, ta êmén hila a mailigtas ha parusa ya lumatêng. Gawan nibunton ya karawakan la, ay nalatngan hilan huluk ni Apo Namalyari ta siguradon parusaan hila ha parusa ya lumatêng.

*Labay ni apostol Pablo hên hirawêñ na hilan omany a patêl, ya ampaniwala kan Apo Jesus ha balayan Tesalonica*

<sup>17</sup> Patêl ha Panginoon, naipêk man ya panaon hên nangapipapawa kitamo, ay panay naên kaw hên angkaihipan. Labay-labay naên kaw dayin mahêlêk oman gawan angkalêngêw kay kamoyu. <sup>18</sup> Labay naên dayi hên mag-orong kamoyu. Hiko man, kata-ungno kinan labay hên maniraw bahêñ, noa, panay a ampihundo gawan an-abalaêñ na kay ni Satanas. <sup>19</sup> Labay naên kaw hên hirawêñ, ta hikaw ya an-ikahigla naên, ta angkasigurado naên ya ihundo yoy paniwala yo. Hikaw ya maipagmahlay naên ha arapan ni Panginoon tamon Jesus ha pag-orong na di, gawan pinaniwal-an yoy toro naên. <sup>20</sup> Taganán hikaw ya an-ikahigla naên, haka ya maipagmahlay naên.

### 3

<sup>1</sup> Kabay hên a naên matêêh ya kalêngêwan naên, ay nabalag kay tana ha balayan Atenas, <sup>2</sup> ta in-utoh naên tana bahêñ kamoyu ya mihay patêl tamo ha Panginoon, ya hi Timoteo, ya ampaghuyó kan Apo Namalyari. Hi Timoteo ay kalamo naên ha pamitoro hên Mangêd ya Habi tungkol kan Apo Jesu-Cristo. In-utoh naên yan mamatanîh hên paniwala yo, haka mamahigla hên ihip yo, <sup>3</sup> ta nalatngan kaw man hên habaytoy pamairap, ay ayn dayi kamoyu ya maалиhan paniwala. Ta muwang yo ya habayto ya pamairap, ay tinalagá ni Apo Namalyari kantamon ampaniwala kan Apo Jesu-Cristo. <sup>4</sup> Muwang yo ya habayto, ta hên atsi kay bahêñ kamoyu, ay mana naên hinabi ya malatngan kitamo hên pamairap, haka amêhêñ natupad ya habayto. <sup>5</sup> Kabay hên a kina nakatêêh gawan panyagah ko hên tungkol kamoyu ay, in-utoh ko hi Timoteo bahêñ kamoyu ta êmén ko mamwangan no nananiêh pon ya paniwala yo kan Apo Jesu-Cristo. Nampotog ako ta kayno natukso kaw ni Satanas, hên itêgêñ ya paniwala yo kan Apo Jesu-Cristo, haka kayno nahayang bêngat ya paytoro naên kamoyu hên tungkol kana.

<sup>6</sup> Amêhén, nag-orong yay na hi Timoteo ya ubat bahén, haka nantan yan mangêd ya balita ya tungkol ha paniwala yo, haka ha pamanlugud yo. Hinabi na êt ya panay yo kay hên angkaihipan, haka angkalêngêw kaw êt kannaén, êmén ha angkalêngêw kay kamoyu. <sup>7</sup> Kabay, gawan pan-ihundo yoy paniwala yo, ay mahiglay nay ihip naén, angkalatngan kay man hên hadyay kairapan haka pamairap. <sup>8</sup> Gawan nakataniêh ya paniwala yo, ay mahigla ya biyay naén. <sup>9</sup> Ayn angga ya pagpahalamat naén kan Apo Namalyari ha pamahigla yo kannaén. <sup>10</sup> Allo-yabi ay panay naén kaw hên an-ipaka-panalangin ya mahêlêk naén kaw dayi, ta êmén naén mapahanan ya paniwala yo.

<sup>11</sup> Dayi, hi Apo Namalyari, ya Tatang tamo, haka hi Panginoon Jesus ya mamaalíh hên ampamahabkol kannaén ta êmén naén kaw mahiraw. <sup>12</sup> Haka an-ihalangin naén kaw, ya dayi, ay pahanan hên Panginoon ya pamanlugud yo ha miha ta miha, haka ha kaganawan tawo, hên nanad ha pamanlugud naén kamoyu. <sup>13</sup> Ta êmén na pataniêhêh ya ihip yo, êmén na kaw malatêng hên ayn kapintasan ha arapan ni Apo Namalyari, ya Tatang tamo, ha pag-orong na di ni Panginoon tamon Jesus ubat ha langit, hên kalamo na ya kaganawan ya pinili ni Apo Namalyari hên mag-in kana.

## 4

### *Ya pamimiay ya ampakapahigla kan Apo Namalyari*

<sup>1</sup> Patêl ha Panginoon, main kay pon êt hên labay ipamwang kamoyu. Ampakihabi naén kamoyu ha tungkulan ya indin kannaén ni Panginoon Jesus, ya ipakahundo yo dayi ya intoro naén kamoyu ya tungkol ha pamimiay yo, ya pandaygên yoy na, êmén mapahigla hi Apo Namalyari. <sup>2</sup> Gawan muwang yoy na ya habaytoy intoro naén kamoyu ay ubat kan Panginoon Jesus. <sup>3</sup> Ta labay ni Apo Namalyari ya taganán ayn kaw hên kasalanan, nanad ha mamabayi haka makilalaki. <sup>4</sup> Ya balang miha kamoyu ay dapat mangillag hên lawini na ha karawakan, ta êmén kaw mamiyay hên ayn ikarêng-éy ha arapan tawo, haka banal ha arapan ni Apo Namalyari. <sup>5</sup> Paan kaw panay hên mangihip hên kalabayan lawini, hên nanad kanlan a ampagpalokop kan Apo Namalyari. <sup>6</sup> Paan yon lokoén ya kapareho yo hên tungkol ha ahawa na, ta impamwang naén ana kamoyu, ya hi Panginoon ay siguradon mamarusa ha manyag hên êmbayro. <sup>7</sup> Ta pinili na kitamo ni Apo Namalyari êmén kitamo mamiyay hên ayn kapintasan ha arapan na. A na kitamo pinili ta êmén manyag hên karawakan hên kalabayan lawini. <sup>8</sup> Kabay no an-araén yoy hata toro naén, alwan bêngat hikay ya an-araén yo, noa, an-araén yo etaman hi Apo Namalyari ya nam-i kantamo hên Espiritu na.

<sup>9</sup> Tungkol ha pamilulugud yon nagpalokop kan Apo Namalyari, ay a kinan kailangan ihulat kamoyu, ta tinoroan na kaw na, ya dapat kaw milulugud. <sup>10</sup> Haka ampanlugud kaw na ha kaganawan patêl ha Panginoon ha boon probinsyan Macedonia. Êmbayro man, ay ampakihabi naén kamoyu ya pahanan yo pon ya pamanlugud yo kanla. <sup>11</sup> Pakikwanan yon mamiyay hên mapatêkbék. Paan kaw makiêmén ha biyay hên kaatag, noa, magpakahipêg kaw, hên nanad ha intoro naén kamoyu. <sup>12</sup> Ta no daygên yoy habayto, ay a yoy na kailangan hên kikwa ha kaatag, haka galangên la kaw hên a pon nagpalokop kan Apo Namalyari.

### *Ya malyari kanlan natsi haka kanlan angkabiyay ha pag-orong lano ni Apo Jesu-Cristo*

<sup>13</sup> Patêl ha Panginoon, labay naén hên mamwangan yo ya kaptêgan ya tungkol kanlan natsi ya naniwala kan Apo Jesu-Cristo, êmén a kaw

maglungkot hên nanad kanlan ayn kasiguradoan ya mipalako hila ha biyay ya ayn angga hên kalamo ni Apo Namalyari. <sup>14</sup> Ampaniwala kitamo ya hi Panginoon Jesus ay natsi haka biniyay oman. Embayro êt, ampaniwala kitamo ya biyayêñ oman ni Apo Namalyari ya hilay natsi ya naniwala kana. Bayo ipalamo na hila kan Apo Jesu-Cristo ha pag-orong na di ha luta.

<sup>15</sup> Ta habaytsi ya hinabi hên Panginoon, ay an-itoro naêñ kamoyu amêhén, ya hikitamoy angkabiyay pon, ha allon pag-orong na di, ay a miuna kanlan natsi hên manupa kana. <sup>16</sup> Ta kanan habayto, ay muna-oy ya Panginoon ubat ha langit hên kalamo hên makhaw ya utoh, hên baëg hên miha kanlan pinakapoon hên anghel ni Apo Namalyari, haka ya tonoy hên tambuyok ni Apo Namalyari. Ha pantumaoy ni Apo Jesu-Cristo ay munan mabiyay oman, hilay natsi ya nagpalokop kana. <sup>17</sup> Bayo hikitamo ya angkabiyay pon ay tsiponêñ ha lêmm hên kalamoy biniyay nan oman hên palako ha langit hên manupa kana. Kabay paubat habayto, ay makapaidi kitamina ha langit hên kalamo hên Panginoon hên angga-angga. <sup>18</sup> Habaytsi ya toro ay ipaihip yo ha miha ta miha, êmén kaw mangapipapahigla.

## 5

### *Panay kitamon maglêan ha pag-orong ni Panginoon Jesu-Cristo*

<sup>1</sup> Patêl ya ampaniwala ha Panginoon, tungkol ha pag-orong hên Panginoon ay a naêñ kailangan hên ihulat kamoyu no makano yan mag-orong, <sup>2</sup> ta muwang yoy na, ya a tamu muwang no makano yan mag-orong, ta ya pag-orong hên Panginoon ay nanad ha pamanlumatêng hên mihay manakaw ya biglan lumatêng. <sup>3</sup> Habaytoy allo ay habiêñ lan a ampaniwala, ya ayn nanan gulo haka ayn nanan ikapotog, noa, kanan habayto, ay namakonkaynaman ay lumatêng kanla ya kaparusaan ya ayn angga. A hila makapuwayu, ta siguradon lumatêng ya hata parusa, ya nanad ha siguradon mananam hên ilab ya mihay babayi ya nabuktot, bayo ya manganak. <sup>4</sup> Noa, hikaw ya patêl ha Panginoon, ay a kaw na ampanyag hên karawakan ta ayn kaw na ha kariglêman. Kabay a kaw mabigla, bigla man ya pag-orong na, ya nanad ha pamanlumatêng hên manakaw ya taganán bigla. <sup>5</sup> Hikaw ngan ay atsi ha kahawangan, hên nanad angkahawangan allo. Ayn kitamina ha kariglêman hên nanad kariglêman hên yabi. <sup>6</sup> Kabay dapat panay kitamon nakal-an. Dapat panay kitamon nakamukat hên nakal-an alwan nanad kanlan atsi ha kariglêman ya a nakal-an. <sup>7</sup> Ta hilay nabêlêw ay angkabêlêw ha yabi, haka hilay mapamminêm alak ay maglahing ha yabi. <sup>8</sup> Hikitamo, ya nanad angkabiyay ha allo, ay dapat panay kitamon nakal-an hên manyag kangêran. Dapat tamon pakataniêhén ya paniwala tamo, haka pahanan ya pamanlugud tamo ya nanad ha kalahag ya ampamiillag kantamo ha karawakan. Dapat tamo êt hên ihundo ya paniwala tamo ha kasiguradoan hên biyay ya ayn angga, ya nanad halimbêng hên ulo tamo. <sup>9</sup> Ta a na labay ni Apo Namalyari ya maparusaan kitamo. Pinili na kitamo ta êmén na kitamo iligtas ni Panginoon tamon Jesu-Cristo ha parusa. <sup>10</sup> Natsi ya gawan kantamo, ta êmén na kitamo ilamo ha biyay ya ayn angga. Ha pag-orong na di, gêtan na kitamo ha langit, angkabiyay kitamo man o natsi. <sup>11</sup> Kabay mipapahigla kaw haka mipapataniêh kaw hên paniwala hên miha ta miha, ya nanad hên andaygén yoy na.

### *Kaatag ponya aral haka pangumusta*

<sup>12</sup> Ampakihabi naêñ kamoyun patêl ha Panginoon, ya igalang yo hilay pinili ni Apo Namalyari ya ampagpagal hên mamaala haka manoro kamoyu.

**13** Pakalugurêñ yo hila hêñ main galang gawan ha pamagpagal la. Milalamo kaw hêñ magpakaaypan nakêm ta êmêñ mag-in mimiha ya ihip yo.

**14** Amêhêñ, ampakihabi naêñ kamoyun patêl ha Panginoon, ya habyanan yo hilay mabarog ta êmêñ hila humipêg. Pahiglaêñ yoy nakêm lan ampanyagah. Pakataniêhêñ yoy ihip lan kinumbêl ya paniwala. Pibat-an yo hilangan hêñ main kaaypaan nakêm. **15** Alwa yon tumbahan narawak ya ampanyag kamoyun narawak, noa, panay kaw manyag hêñ ikakangêd hêñ miha ta miha, haka ha kaganawan tawo.

**16** Panay kaw maghigla. **17** Panay kaw hêñ manalangin. **18** Panay kaw magpahalamat, ha hinoman ya angkalyari, ta habaytoy kalabayan ni Apo Namalyari kantamon ampaniwala kan Apo Jesu-Cristo.

**19** Alwa yon habkolêñ ya an-ipadyag nan Espiritu ni Apo Namalyari kamoyu. **20** Alwa yon musmusêñ hilay ampamipamwang hêñ an-ipaihip kanla ni Apo Namalyari. **21** Embayro man, ay pakaihipêñ yo pon ya toro la haka honolêñ yoy nay mantêg ya ubat kan Apo Namalyari. **22** Haka dayuán yoy kaganawan karawakan.

**23** Amêhêñ, an-ihalangin naêñ kaw, ya pataniêhêñ na kaw ni Apo Namalyari ya ampam-in kapatêkbêkan ihip, ta êmêñ yo dayuán ya kaganawan nangarawak. An-ihalangin naêñ êt ya illagan na kaw, ta êmêñ ha pagorong na di ni Panginoon tamon Jesu-Cristo, ay ayn kaw hêñ kapintasan ha boon pagkatawo yo, ha espiritu yo, ha kaêlwa yo, haka ha lawini yo.

**24** Haka muwang naêñ ya tapat hi Apo Namalyari ya namaihip kamoyu hêñ magpalokop kana, kabay daygêñ nay hata inhalangin naêñ kana.

**25** Patêl ha Panginoon, ihalangin yo kay êt.

**26** Mikukumusta kaw ta êmêñ ipahlêk ya pamanlugud yo ha miha ta miha hêñ nanad patêl ha Panginoon.

**27** Ampakihabi ko kamoyu ha langan ni Panginoon Jesu-Cristo, ya bahaêñ yoy hata hulat ha arapan lan patêl tamo.

**28** Panay atsi kamoyu dayi ya ingalo ni Panginoon tamon Jesu-Cristo.

## Ya ikalwan hulat ni apostol Pablo kanlan ampaniwala kan Apo Jesu-Cristo ha Tesalonica

### *Paunan habi*

Habaytsi ay ikalwan hulat ni apostol Pablo kanlan ampaniwala kan Apo Jesu-Cristo ha balayan Tesalonica. Hilay ampaniwala kan Apo Jesu-Cristo ha balayan Tesalonica ay panay ampairapan lan Israelita ya a ampaniwala kana. Kabay hinulatan na hilay na êt ni apostol Pablo ta pataniêhén na dayi ya ihip la.

Angkalipáng ya ihip lan patêl kan Apo Jesu-Cristo ha Tesalonica ya tungkol ha pamag-orong ni Apo Jesu-Cristo. Èndat lan kaatag ya nag-orong yay na. Èndat lan kaatag pon ya a lay na kailangan hên humipêg, ta marani yanay pag-orong ni Apo Jesu-Cristo. Di ha hulat, ay hinabyanan ni apostol Pablo hilay habaytoy ayn nanan hipêg, haka impalinaw na kanla ya tungkol ha pag-orong ni Apo Jesu-Cristo.

Kabooan hên pinakalaman

Umpisan hulat 1:1-2

Pahalamat ha paniwala lan Tesalonica 1:3-12

Aral ya tungkol ha pag-orong ni Apo Jesu-Cristo 2:1-17

Aral ya tungkol ha panalangin haka kahipêgan 3:1-16

Tawlin habi 3:17-18

<sup>1</sup> Hiko hi Pablo, kalamo ko hi Silas haka hi Timoteo ya ampipangumusta kamoyun patêl ha Panginoon ya atsi bahêh ha Tesalonica ya angkapi-tsi-tsipon. Hikaw ay atsi ha lokop ni Panginoon Jesu-Cristo haka ni Apo Namalyari, ya Tatang tamo. <sup>2</sup> An-ihalangin naêñ kaw ya dyanan kaw dayi hên kapatékbékan nakêm, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

### *Ya pamanatol ha pag-orong ni Panginoon Jesu-Cristo*

<sup>3</sup> Patêl ha Panginoon, dapat panay naêñ kaw ipahalamat kan Apo Namalyari. Hêpat ya habayto, gawan angkapahanan ya paniwala yo kan Apo Jesu-Cristo haka ya pamanlugud yo ha miha ta miha. <sup>4</sup> Kabay an-ipagmahlay naêñ kaw ha kaatag ya patêl ha Panginoon ya angkapi-tsi-tsipon. An-ipagmahlay naêñ ya kataniêhan paniwala yo kan Apo Jesu-Cristo, ampagtêéhan yo man ya hadyay kairapan haka ya hadyay pamairap.

<sup>5</sup> Habayto ay ampamaptêg ya makatoynungan ya pamanatol ni Apo Namalyari, haka kabay hikaw ay mag-in hêpat hên ilamo ha pamanlokop na ha langit, ya ikatêéh yon kairapan. <sup>6</sup> Makatoynungan ya pamanatol ni Apo Namalyari gawan hiyay manumbah ha ampamairap kamoyu. <sup>7</sup> Ta hikaw ya ampagtêéh hên kairapan ay papaynawaêñ hên kalamo naêñ ha pag-orong ni Panginoon Jesus ya ubat ha langit ya kalamo na hilay makapangyarihan ya anghel na. <sup>8</sup> Pag-orong na di, ay nakapalibot kana ya hadyay apoy, ta parusaan nay a nagpalokop kan Apo Namalyari haka a anhumonol ha Mangêd ya Habi tungkol kan Apo Jesus, ya Panginoon tamo. <sup>9</sup> Ayn angga ya parusa kanla, haka angga-angga, ay a la mahêlêk ya Panginoon, haka ya kapapaêpapah ya kapangyarihan na. <sup>10</sup> Maubuh hên malyari ya habayto ha pag-orong na. Mag-orong ya, ta êmén la yan pag-êpapahan, haka puriêñ lan

kaganawan ya pinili ni Apo Namalyari hên mag-in kana. Hikaw ay kalamo bayro etaman, ta pinaniwal-an yo, ya impamwang naêñ kamoyu.

<sup>11</sup> Kabay panay naêñ kaw hên an-ilamo ha panalangin kan Apo Namalyari, ya dayi ay daygên na kaw hên mangêd, ya hépat kanlan pinaihipan nan magpalokop kana. Dayi dyanan na kaw hên kapangyarihan na, ta êmén yo mahonol ya kalabayan yon manyag kangêran, gawan ha paniwala yo kana. <sup>12</sup> No êmbayro, ay mapuri ya Panginoon Jesus gawan ha biyay yo, haka hikaw man ay madayêw hên kalamo na, gawan ha ayn kapantag ya ingalo ni Apo Namalyari haka Panginoon tamon Jesu-Cristo.

## 2

### *Ya pay-iltaw hên hadyay dawak ya poon hên kahalanghangan*

<sup>1</sup> Amêhêñ, patêl ha Panginoon, ay ipapakalinaw naêñ kamoyu ya tungkol ha pag-orong ni Panginoon tamon Jesu-Cristo, haka ha pamitsipon na kantamo hên manupa kana. <sup>2</sup> An-ipakihabi naêñ kamoyu ya paan kaw dayin manyagah o mampotog man, ha balita ya nilumatêng ana kano ya pag-orong hên Panginoon. Paan kaw maniwala ha balita la, habiêñ la man ya impamwang ya habayto hên Espiritu ni Apo Namalyari, o habi kano, o hulat man ya banhagan lan ubat kannaêñ. <sup>3</sup> Paan kaw paloko ha panhabiêñ lan mapaglaram, ta a ya lumatêng hi Panginoon Jesu-Cristo, no a pon malyari ya hadyay panhumalanghang hên tawo kan Apo Namalyari, haka no a pon iiltaw ya poon hên kapatsi ni Apo Namalyari, ya siguradon migtan ha impiyerno. <sup>4</sup> Halanghangêñ na hi Apo Namalyari haka ya balang ansimbaêñ hên tawo, ta itag-ay nay sarili na, ta hiyay nay simbaêñ hên kal-atan ha Templo, ya bali ni Apo Namalyari, ta hiya kano hi Apo Namalyari.

<sup>5</sup> Muwang yo ya hinabi kinay hatsi kamoyu hên atsi ko bahêñ. <sup>6</sup> Muwang yo etaman no hino ya, ya ampamiawat kana, ta êmén ya a pon iiltaw angga ha a pon lumatêng ya panaon na. <sup>7</sup> Ta ya kapangyarihan hên kahalanghangan ha kangêran, ay naumpisaan hên a la muwang hên kaatag, ta ampamaihip ya ha tawo ya manalanghang hila, noa, hiya ay nakakabat pon, kabay a ya pon ipaltaw angga ha a pon inalih ya ampamiawat kana. <sup>8</sup> No inalih ya ampamiawat kana, ay pay-iltaw yay na. Noa, ha pamanlumatêng ni Panginoon Jesus hên kalamoy kapahilêw ya kahampatan na, ay patsêñ nay na ha inanawa nan bêngat. <sup>9</sup> Ya pamanlumatêng nan habaytoy poon hên kapatsi ni Apo Namalyari, ay main yan kalamo hên narawak ya kapangyarihan, haka hino-hino kay na hên ya tanda, ya pamanloko, haka kaatag pon ya kapapaêpapah ya kalaraman ni Satan. <sup>10</sup> Kalamo na êt ya hino-hino kay na hên ya karawakan ya pamanloko na kanlan tawo ya mipalako ha kaparusaan ha impiyerno, gawan a la panlugurên ya kaptêgan ya tungkol kan Apo Jesus, ta êmén hila dayi mailigtas ha kaparusaan. <sup>11</sup> Kabay paulayan hila ni Apo Namalyari hên maniwala ha dyag ya kalokwan, <sup>12</sup> ta êmén hilay na maparusaan gawan pinili lay karawakan, ta ya kaptêgan ay a la pinaniwal-an.

### *Hikitamo ay pinili hên mapagkalamo ni Apo Jesu-Cristo ha langit*

<sup>13</sup> Noa, hikaw, patêl ya anlugarûn hên Panginoon, hépat kannaêñ ya panay naêñ kaw an-ipagpahalamat kan Apo Namalyari ta pinili na kaw hên iligtas ha kaparusaan ya lumatêng paubat hên una, gawan dinyag na kaw hên Espiritu na hên malinis, hên ayn kapintasan, haka gawan pinaniwal-an yoy kaptêgan. <sup>14</sup> Ya Mangêd ya Habi ya in-aral naêñ kamoyu, ay habayto ya ginamit ni Apo Namalyari ha panagyat na kamoyu hên magpalokop kana, êmén kaw makapakilamo ha karangan ni Panginoon tamon Jesu-Cristo.

<sup>15</sup> Kabay, patêl ha Panginoon, pataniêhêni yoy ihip yo. Ipakatanêm yo ha ihip yo ya intoro naêni kamoyu, ya hatoy hinabi naêni haka hatoy inhulat naêni êt.

<sup>16</sup> Ampanalangin kay kan Panginoon tamon Jesu-Cristo haka kan Apo Namalyari, ya Tatang tamo ya nanlugud kantamo. Gawan ha ayn kapantag ya ingalo na, ay dinyanan na kitamo hêni kahiglaan nakêm ya a ampangoman, haka kasiguradoan hêni tungkol ha arapêni tamo. <sup>17</sup> Hiya dayi, ya mamahigla haka matananiêh hêni nakêm yo, ta êmêni yo maihabi haka madyag ya panay kangêran.

### 3

#### *Ihalangin yo kay*

<sup>1</sup> Patêl ha Panginoon, bayo ko yariêni ya habaytsi ya hulat kamoyu, ay ampakihabi ko ya ihalangin yo kay, ta êmêni ya habi ni Apo Namalyari, ay tambêng mibahwag, haka paniwal-an hêni balang miha, hêni main galang, hêni nanad ha pinaniwal-an yo. <sup>2</sup> Ihalangin yo êt ya illagan na kay ni Apo Namalyari ha kaganawan ya ampanyag karawakan, ta main mal-at ya ayn pon paniwala, ya ampanalanghang kannaêni. <sup>3</sup> Noa, mapaypaniwal-an ya Panginoon ya matananiêh hêni ihip yo, haka mamiillag kamoyu ha dyag ni Satanas. <sup>4</sup> Muwang naêni ya an-ihundo yo amêhêni, haka ihundo yo angga-angga ya pamahumonol yo ha toro naêni kamoyu, gawan ampaniwal-an yo ya Panginoon.

<sup>5</sup> An-ihalangin naêni kaw ya lalo yon matanam ya pamanlugud ni Apo Namalyari, haka ya matananiêni Apo Jesu-Cristo hêni nakêm yo.

#### *Magpakahipêg kitamo*

<sup>6</sup> Patêl ha Panginoon tamon Jesu-Cristo, pan-iutoh naêni kamoyu ha tungkulan ya indin na kannaêni, ya lakwanan yo hilay patêl ya mangabarog, ya hilay a ampanhumonol ha toro naêni kamoyu. <sup>7</sup> Muwang yoy na ya dapat kaw hêni manoto kannaêni, ya a kay nagbarog hêni atsi kay bahêni. <sup>8</sup> A kay bat nangan hêni indin kannaêni, noa, binayaran naêni, ta allo-yabi kay nagpagal hêni nag-obra, êmêni a kay pabyat ha hinoman kamoyu. <sup>9</sup> Main kay hêni tungkulan hêni kikwa kamoyu hêni kaganawan kailangan naêni, noa, labay naêni hêni mag-in kay hêni alimbawa ya mahonol yo. <sup>10</sup> Hêni atsi kay êt bahêni, ay hinabi naêni kamoyu ya paan yon pakanêni ya mangabarog.

<sup>11</sup> An-ungkatêni naêni habayto gawan angkagilaman naêni ya bahêni kamoyu, ay main mangabarog ya bat hêni ampakiêmêni ha biyay hêni kaatag.

<sup>12</sup> Ha langan ni Panginoon Jesu-Cristo, ampakihabi naêni kanla, haka an-iutoh naêni hila, ya magpakahipêg hila ha mangangêd ya dyag, êmêni la maêkan ya pinagpagalan la.

<sup>13</sup> Patêl ha Panginoon, alwa kaw hêni humawa hêni manyag hêni kangêran.

<sup>14</sup> Pakatandaan yo hila ya a anhumonol ha an-ihulat naêni, haka dayuán yo hila, ta êmêni hila mipakarêng-êy. <sup>15</sup> Noa, paan yo hilan itad hêni kapatsi yo, ta habyanan yo hila tanan nanad patêl.

#### *Inhalangin ni apostol Pablo ya hilay taga-Tesalonica*

<sup>16</sup> Ya Panginoon ya ampangubatan kapatêkbêkan ay panay dayin mam-in kapatêkbêkan kamoyu, hinoman ya angkalyari. Dayi lamoan na ya balang miha kamoyu.

<sup>17</sup> Hiko hi Pablo ya ampanulat hêni hata pangumusta di ha impahulat ko. Ha pêtêg kon gamêt ay ampanulat akon habaytsi hêni nanad ha balang hulat ko, ta êmêni yo mamwangan ya pêtêg ya hiko ya nanulat.

**18** An-ihalangin naêñ kaw ya dayi ingalwan na kaw ngan ni Panginoon tamon Jesu-Cristo.

## Ya unan hulat ni apostol Pablo kan Timoteo

### *Paunan habi*

Hi Timoteo ay mihay miyawhay ya atsi ha balayan Listra ya ampaniwala kan Apo Jesu-Cristo. Ya indo na ay mihay Israelita ya ampaniwala etaman kan Apo Jesu-Cristo. Ya toa nan lalaki ay alwan Israelita ta hiyay Griego. Hêñ atsi hila ha balayan Listra hi apostol Pablo, haka hi Silas, ay hinagyat ni apostol Pablo hi Timoteo hêñ manawop ha pamibahwag hêñ Mangêd ya Habi tungkol kan Apo Jesu-Cristo. Hi Timoteo ay nag-in mihay kalamo ni apostol Pablo bayo nabalag ya ha balayan Efeso ta toroan na hilay ampaniwala bayro. Di ha unan hulat ni apostol Pablo kan Timoteo, ay imbilin na kan Timoteo ya kailangan nan daygêñ ha biyay na, haka ya kailangan nan itoro kanlan ampaniwala kan Apo Jesu-Cristo ha balayan Efeso. Imbilin na êt kan Timoteo ya tungkol ha dapat lan daygêñ no mi-tsi-tsipon hilay patêl ha Panginoon hêñ magsimba, haka no ay-êmêñ mamwangan no hino hilay hêpat hêñ mamaala kanlan patêl ha Panginoon.

Kabooan hêñ pinakalaman

Umpisan hulat 1:1-2

Ya tungkol kanlan ampanoro hêñ alwan pêtêg 1:3-11

Ya pahalamat ni apostol Pablo ha ingalo ni Apo Namalyari 1:12-20

Ya tungkol kanlan ampi-tsi-tsipon haka hilay ampamaala kanla 2:1-3:16

Ya aral kan Timoteo ya tungkol ha paghuyo na 4:1-6:21

<sup>1</sup> Hiko hi Pablo ya ampanulat hêñ hatsi, ya mihay apostol ni Apo Jesu-Cristo. Hikoy in-utoh ni Apo Namalyari, ya mamiligtas kantamo, haka ni Apo Jesu-Cristo ya ubatan hêñ kasiguradoan tamo hêñ tungkol ha arapêñ tamo.

<sup>2</sup> Anhulatan kata Timoteo, ya pêtêg kon anak ha paniwala kan Apo Jesu-Cristo.

An-ihalangin kata ya dyanan ka dayi hêñ kapatêkbêkan nakêm, haka ingalwan ka dayi ni Apo Namalyari ya Tatang tamo, haka ni Panginoon Jesu-Cristo.

### *Dapat bawalêñ hilay ampanoro hêñ alwan pêtêg*

<sup>3</sup> Labay kon mabalag ka pon ha balayan Efeso, nanad ha pinakihabi ko kamo hêñ nammita ko ha probinsyan Macedonia, gawan main ungro ya ampaytoro hêñ alwan pêtêg. Dapat mo hilan paghabyanan, ya itêgêñ lay paytoro la. <sup>4</sup> Habyanan mo hila ya a la dayi hayangêñ ya panaon la ha ayn kapukatan pamakiistorya hêñ tungkol ha istorya ya didinyag bat, haka hêñ tungkol ha paylistaan hêñ ninuno la ya pangubatan hêñ hubakan. Habayto, ay a ampakataniêñ hêñ paniwala tamo kan Apo Namalyari. <sup>5</sup> Habyanan mo hila, ta êmêñ hila mag-orong ha pamanlugud ya ubat ha mangêd ya nakêm, ha malinis ya konsinsya, haka ha naahig ya paniwala kan Apo Jesu-Cristo. <sup>6</sup> Habaytoy ampaytoro hêñ alwan pêtêg, ay ahinan ampanlugud hêñ êmbayro, ta ampiistorya hila hêñ ayn kapukatan. <sup>7</sup> Labay la hêñ mag-in mánoron Kautuhan ni Apo Namalyari, noa, a la agyu, ta a la angkaintindihan ya panhabiên la. A la êt angkaintindihan ya an-ipilit lan pêtêg.

<sup>8</sup> Muwang tamo ya mangêd ya Kautuhan ni Apo Namalyari no honolêñ tamo ya labay lan habiên.

<sup>9</sup> Muwang tamo ya Kautuhan na, ay alwan para kanlan mahonol kana, noa, para kanlan alwan mahonol kana, haka para kanlan mapanalanghang,

haka para kanlan mapanyag kasalanan, haka para kanlan ayn limo kan Apo Namalyari, haka para kanlan mapanuboy, haka para kanlan mapamatsin toa la anggan kaatag ya tawo.<sup>10</sup> Habaytoy Kautuhan ay para êt kanlan nanad aho ya makitakêh ha kapareho lan lalaki o babayi o ha anak. Habaytoy Kautuhan ay para êt kanlan manlipot,\* haka para kanlan malarlam, haka para êt kanlan malarlam ya tistigos ha kaso, haka para kanlan anhumalanghang ha kaganawan pêtêg ya toro,<sup>11</sup> ya pamanhumonol ha Mangêd ya Habi ya ubat kan Apo Namalyari ya makapangyarihan, haka hépat tamon simbaën. Impatsiwala na kangko hên ipamwang ya habaytoy Mangêd ya Habi.

*Pahalamat ni apostol Pablo ha ingalo ni Apo Namalyari*

<sup>12</sup> Ampahalamat ko hi Panginoon tamon Jesu-Cristo ya ampamataniêh hên ihip ko, ta êmêñ ko madyag ya an-ipadyag na kangko. Ampahalamat ko ya etaman gawan pinili na ko, haka intad na ko hên mapaypaniwal-an hên hato.<sup>13</sup> Agyan hinalanghang ko ya, minusmus ko ya man, haka agyan pinairapan ko ya hên hato, ay iningalwan na ko ni Apo Namalyari gawan êndat kon pandaygên koy kalabayan na, gawan a ko pon ampaniwala kan Panginoon Jesu-Cristo.<sup>14</sup> Ya ayn kapantag ya ingalo na kangko, ay a ko makwan maihip, ta hiko, ay dinyanan nan paniwala, haka pamanlugud ya ubat kan Panginoon Jesu-Cristo.<sup>15</sup> Pêtêg ya habaytsi ya anhabiên ko, ya dapat pakapaniwal-an hên balang miha. Hi Panginoon Jesu-Cristo, ay nilumatêng di ha luta, ta êmêñ na iligtas hilay makasalanan, haka hiko ya pinakanarawak ha kal-atan makasalanan.<sup>16</sup> Noa, iningalwan ako ni Apo Namalyari, ta êmêñ na impahêlêk ha balang miha no ay-êmêñ angga ya pamagtêh ni Panginoon Jesu-Cristo ha pinakanarawak ya tawo, ta êmêñ hikoy mag-in alimbawa kanlan maniwala kana, ya madyanan hên biyay ya ayn angga.<sup>17</sup> Purién haka galangêñ ya hên ayn angga, ya kamiha-mihaan poon tamo hi Apo Namalyari, ya ayn ubatan haka ayn angga. A ya matsi haka a ya mahêlêk hên mata tamo. Amen.<sup>†</sup>

<sup>18</sup> Timoteo, anak ko, ipatsiwala ko kamo ya hata utoh hên nanad ha impapapêt ni Apo Namalyari ya tungkol kamo, kanlan poon lan angkapi-tsi-tsipon hên pinaluntoan la kan gamêt la, hên in-utoh la kan maypamwang hên tungkol kan Apo Jesu-Cristo. Pakaihipên moy hatoy hinabi la ya tungkol kamo ya mamahigla kamo ha paglaban mo ha anhumalanghang ha kaptêgan.<sup>19</sup> Pakataniêhên moy paniwala mo, haka pakalinisên moy konsinsya mo, ta main kaatag ya ayn konsinsya, gawan a la anggilamên ya an-ipaihip hên kangêran nakêm la, kabay nahira ya paniwala la.<sup>20</sup> Kalamo lan habaytsi hilan Himeneo haka hi Alejandro. Impaulay ko hilay na pon kan Satanas ta êmêñ hilay nan tunggêñ hên manalanghang kan Apo Namalyari.

## 2

*Ya tungkol ha daygêñ no mi-tsi-tsipon hilay patêl ha Panginoon*

<sup>1</sup> Una kon ampakihabi kamoyu, ya panay yon ihalangin ya kailangan yo, haka ya kailangan hên balang miha kan Apo Namalyari. Ipagpahalamat yo hila etaman kana.<sup>2</sup> Ihalangin yoy kaganawan ya main tungkulon ha gobyerno, ta êmêñ hikitamoy ampaniwala kan Apo Jesu-Cristo, ay mamiyyay hên mapatêkbêk hên ayn gulo, ya main galang kan Apo Namalyari haka ha tawo.<sup>3</sup> Habaytoy mangêd haka ikahigla ni Apo Namalyari ya namiligta kantamo.<sup>4</sup> Labay na, ya miligtas ya balang miha haka mamwangan lay

\* **1:10** Hilay mandakêp mayaman haka kikwan mal-at ya pera bayo la ibuhan ya dinakêp la. † **1:17** Ya labay habiên hên ‘amen’ ay pêtêg ya habaytsi.

kaptêgan. <sup>5</sup> Labay nan habayto ni Apo Namalyari, gawan hiyay kamiha-mihaan Diyos. Haka hi Apo Jesu-Cristo, ya nag-in tawo, ay kamiha-mihaan mamilatan hên tawo kan Apo Namalyari. <sup>6</sup> Indin ni Apo Jesu-Cristo ya biyay na ha pangakbus hên balang miha. Ya pangamatsi ni Apo Jesu-Cristo ha intakday allo, ay pamaptêg ya kalabayan ni Apo Namalyari, ya miligtas ya balang miha. <sup>7</sup> Kabay pinili na ko hên mag-in apostol na hên manoro kanlan alwan Israelita, ta êmén hila maniwala, gawan pamipamwang kon kaptêgan kanla. Pêtêg ya hata panhabiên ko.

<sup>8</sup> Amêhêñ, patêl, labay ko dayi ha balang pami-tsi-tsipon yo, ay manalangin hilay lalaki. Kailangan malinis ya nakêm la ha arapan ni Apo Namalyari hên ayn inakit o huluk ha kaatag.

<sup>9</sup> Hilay babayi etaman, ay dapat mahinhin, maayos ha pagtakop, alwa etaman sobra ya pag-ayos ha habot, haka ha panggamit hên ginto haka ha kaatag ya magastos ya hino-hino. <sup>10</sup> Noa, ya mangêd, ay mamwangan hilay babayi ya nagpalokop kan Apo Namalyari ha mangangêd ya dyag la. <sup>11</sup> No main mánoro ha pami-tsi-tsipon yo, ay dapat hilan manggilam tana hên magpatékbék ya babayi. <sup>12</sup> A ko labay ya main babayi ya manoro ha pami-tsi-tsipon yo. Palokop hila tana ha lalaki, haka magpatékbék hilan manggilam. <sup>13</sup> Gawan una nan dinyag ni Apo Namalyari, ay hi Adan bayo hi Eva. <sup>14</sup> Hi Eva ya niloko, hên natukso hên nakadyag hên kasalanan, alwan hi Adan. <sup>15</sup> Noa, miligtas hilay babayi ha panganak,\* no panay hilan maniwala kan Apo Namalyari, haka no ihundo lay pamanlugud la ha kapareho la, haka no ayn hilan pamagkulang ha arapan ni Apo Namalyari, haka no ihundo lay kahinhinan la.

### 3

#### *Ya dapat ugalién lan ampamaala ha pami-tsi-tsipon lan patêl ha Panginoon*

<sup>1</sup> Pêtêg ya habaytsi ya nakahulat: No hinoy labay mamaala ha pami-tsi-tsipon lan patêl ha Panginoon, ay mangêd ya pan-ihipêñ nan daygêñ. <sup>2</sup> Ya ampamaala ha pami-tsi-tsipon lan patêl ha Panginoon, ay dapat a manyag hên kasalanan. Dapat mimihay ahawa nan bêngat, haka mapamigil ha sarili. Dapat alwan magulo ya biyay na, êmén ya galangêñ hên kaatag. Kailangan nahawang ya ihip na, no main maniraw ha bali na, haka kailangan magaling yan manoro. <sup>3</sup> Dapat a ya mapamminêm alak, kailangan maaypa ya nakêm, dapat alwa yan mahuluk, haka dapat alwa yan kamata hên pera. <sup>4</sup> Dapat mangêd ya pamaala na ha pamilya na, haka kailangan yan galangêñ hên maának na. <sup>5</sup> Ta no a na muwang hên mamaala ha pamilya na, ay-êmén na mapamaalaan hilay patêl ha Panginoon ya angkapi-tsi-tsipon? <sup>6</sup> A ya malyari hên mamaala no babayo yan ampaniwala ha Panginoon, ta kayno magmahlay ya, haka ya parusaan ni Apo Namalyari hên nanad ha dinyag na kan Satanas, ya pinarusaan hên nagmahlay ya. <sup>7</sup> Ya mamaala ha pami-tsi-tsipon hên patêl ha Panginoon, ay kailangan galangêñ etaman lan a pon nagpalokop ha Panginoon. No alwan êmbayro, ay kayno pintasan ya, haka ya marakêp ni Satanas.

#### *Ya dapat ugalién lan ampanawop ha pami-tsi-tsipon lan patêl ha Panginoon*

<sup>8</sup> Hilay ampanawop ha pami-tsi-tsipon ay kailangan etaman hên main mangêd ya ugali, alwan malarâm, alwan mapamminêm alak, haka alwan kamata hên pera. <sup>9</sup> Kailangan nataniêñ ya paniwala la kan Apo Namalyari haka malinis ya konsinsya la. <sup>10</sup> Bayo pilién hilay manawop ha pami-tsi-tsipon,

\* <sup>2:15</sup> Miligtas hilay babayi no ubat hilan manganak.

ay dapat hêlkên pon no main hilan pamagkulang kan Apo Namalyari. <sup>11</sup> Ya ahawa la etaman, ay dapat mangêd ya ugali, a la dapat honolên ya narawak ya kalabayan hên lawini la, haka dapat mapaypaniwal-an hila, haka dapat alwan maghabi hên ikahira. <sup>12</sup> Dapat mimihay ahawa lan ampanawop ha pami-tsi-tsipon, haka dapat mangêd ya pamamaala la ha pamilya la. <sup>13</sup> Hilay mangangêd ya ampanawop ha pami-tsi-tsipon, ay galangên, haka makhaw ya nakêm la hên mámipamwang ya tungkol ha paniwala la kan Apo Jesu-Cristo.

### *Ya kapapaêpapah ha paniwala tamo*

<sup>14</sup> Kaban ampanulat akon hatsi, ay an-ihipêñ ko ya a mabuyot, ay hirawêñ kata dayi. <sup>15</sup> Noa, no a ko kamot hên makabita, ay mabáha mo di ha hulat ya dapat mag-in ugalin pamilya ni Apo Namalyari, ya angkabiyay. Hikitamoy ampaniwala kana, ay pinakatarêk hên kaptêgan hên tungkol kan Apo Jesu-Cristo. <sup>16</sup> Kapapaêpapah hên taganá ya paniwala tamo:

Impamwang ni Apo Namalyari kantamo ya hi Panginoon Jesu-Cristo, ay nag-in tawo, haka pinaptêgan nan Espiritu ni Apo Namalyari ya hiya, ay ayn kasalanan, haka hiyay nahêlêk lan anghel ni Apo Namalyari. Hiyay impamwang ha balang bansa. Hiyay pinaniwal-an hên tawo ha boon luta, haka hiyay gintan ha langit hên mamaala hên kalamo ni Apo Namalyari.

## 4

<sup>1</sup> Malinaw ya hinabi nan Espiritu ni Apo Namalyari, ya lumatêng ya panaon, ay lakwanan lan kaatag ya paniwala la kan Apo Namalyari, ta honolên la tana hilay ampanoro hên kalokwan ya impaihip kanla hên nangarawak ya a angkahêlêk. <sup>2</sup> Habaytoy toro, ay ibahwag lan mapaglaram ya kinintalan ni Satanas hên mag-in ipoh na, kabay ayn hilay nan konsinsya. <sup>3</sup> Ibawal lay pamakiahawa, haka kaatag ya pangkaêñ. Noa, dinyag ni Apo Namalyari ya habaytoy pangkaêñ, ta êmén hikitamoy ampaniwala haka ampakamwang hên pêtêg ya toro, ay maêkan ya habayto ubat tamon pinahalamatan kana. <sup>4</sup> Ya balang dinyag ni Apo Namalyari ay mangêd, haka dapat tanggapêñ hên main pahalamat. Paan araêñ ya dinyag na. <sup>5</sup> Ya kaganawan pangkaêñ, ay nadyag hên mangêd ha utoh ni Apo Namalyari haka ha panalangin tamo.

### *Ya mangêd ya tagahuyo ni Apo Jesu-Cristo*

<sup>6</sup> No ipamwang moy habaytsi ya utoh kanlan kapareho mon ampaniwala kan Apo Jesu-Cristo, ay mangêd kan tagahuyo na, haka ha panoro mon habaytsi, ay tumaniêh ya paniwala mo ha ampag-aralan moy kaptêgan ya ubat kan Apo Namalyari, ya anhonolên mina. <sup>7</sup> Dayuán moy istorya ya didinyag bat, ya ayn kapukatan, ta ya daygêñ mo, ay sanayêñ moy sarili mo hên manyag kalabayan ni Apo Namalyari. <sup>8</sup> Main pakinabang ya pagsanay ha lawini, noa, mantêg mon pakinabangnan ya pagsanay hên pamanyag kalabayan ni Apo Namalyari, ya ikakangêd hên hata biyay haka ya biyay ha langit. <sup>9</sup> Pêtêg ya habaytsi ya panhabiêñ ko ya dapat pakapaniwal-an. <sup>10</sup> Kabay ampagtêêh kitamo haka mahipêg kitamo hên ampanyag kalabayan ni Apo Namalyari, ta ampagtsiwalâ kitamo kana, ya angkabiyay, ya Mámilitas hên kaganawan tawo, lalon-laloy na kanlan ampaniwala kana.

<sup>11</sup> Ipamwang moy hata utoh haka toro kanlan kapareho mon ampaniwala kan Apo Jesu-Cristo. <sup>12</sup> Agyan alwa ka pon mantêg toa, a la ka dapat musmusêñ. Mag-in kan alimbawa kanlan ampaniwala kan Apo Jesu-Cristo ha panhabiêñ mo, haka ha dyag mo, ha pamanlugud mo, ha paniwala mo kan Apo Namalyari, haka ha kalinisan hên pamimiyay. <sup>13</sup> Kaban ayn ako

pon bahēn, ihundo moy pamaha ha arapan hēn kal-atan ya Kahulatan ya impahulat ni Apo Namalyari, haka ipamwang mo no hinoy labay habiēn hēn habayto. Itoro mo kanlan ampaniwala kan Apo Jesu-Cristo ya dapat lan daygēn. <sup>14</sup> Paan mon paulayan ya kamwangan, ya indin nan Espiritu ni Apo Namalyari kamo, hēn inhalangin la ka hēn hilay toa ya ampamaala ha pagtsiponan lan patēl ha Panginoon. Impalunto lay gamēt la ha ulo mo, haka main namipapēt hēn impaihip ni Apo Namalyari kanla. <sup>15</sup> Pakikwanan mon daygēn ya habaytoy pamaha haka panoro, ta êmēn mahēlēk lan kaganawan ya angkapahanan ya galing mo ha panupad mon tungkulon mo. <sup>16</sup> Kaillag ka ha pamimiyay mo haka panoro mo, ta no daygēn moy habayto, ay miligtas ka anggan hilay ampanggilam hēn habi mo.

## 5

### *Ya mangēd ya toro kanlan ampaniwala kan Apo Jesu-Cristo*

<sup>1</sup> Alwa mon paghabyanan hēn mahakit ya matoa kamo. Noa, pakihabian mo hilan nanad tatang mo. Haka hilay alwa pon toa ya lalaki, ay itad mon ali mo. <sup>2</sup> Itad minan indo mo hilay toay babayi, haka hilay alwa pon toa ya babayi, ay arapan mo hēn malinis ya ihip hēn nanad ha ali mo.

<sup>3</sup> Galangēn haka hawpan mo hilay babayi ya bawo\* ya ayn kaatag ya pangwanan ikabiyay. <sup>4</sup> Noa, no main babayin bawo ya main anak o apō, ay hila pon ya dapat hēn manawop kana hēn mamayad utang nakēm la ha toa la, ta habayto ay kalabayan ni Apo Namalyari. <sup>5</sup> Ya babayin bawo, ya ayn pamilya ya manawop kana, ay ampagtsiwalan kan Apo Namalyari, kabay allo-yabi yan ampangihalangin hēn kailangan na. <sup>6</sup> Noa, ya babayin bawo ya panay ampanyag pansarili nan kalabayan, ay agyan angkabiyay ya, ay nanad yay nan natsi. <sup>7</sup> Ipamwang mo kanla ya habaytoy utoh, ta êmēn ayn maipintas kanla. <sup>8</sup> No main kamoyu ya a ampanayhay hēn pamilya na o kaatag ya kamag-anak na, ay antalibatokan nay paniwala na kan Apo Namalyari, haka narawak ya ha mihay a pon ampaniwala kan Apo Jesu-Cristo.

<sup>9</sup> Hilay babayi ya bawo ya hawpan mo, ay hilay main anêmapoy taon o patag-ay, ya minghan bêngat nag-ahawa.† <sup>10</sup> Dapat mamwangan hila ha kangêran dyag la, ya nanad ha kangêran hēn pamakahlay lan anak la, kahiglaan lan namahowēn hēn naniraw kanla, kaaypaan nakēm lan nanawop ha kapareho lan ampaniwala, pamanawop la ha kaatag pon ya nangailangan, haka panay hilan nanyag kangêran.

<sup>11</sup> Hilay babayi ya bawo ya anak pon, ay a mon ilamo ha mantēg ya bawo ya main nanan anêmapo ya taon, ta kayno mag-ahawa hilan oman haka liwaan lay pangako la kan Apo Jesu-Cristo.‡ <sup>12</sup> Ta no nagpangako hila ya kakapag ni Apo Jesu-Cristo ya huyuēn la, bayo mag-ahawa hila, ay main hilan pamagkulang kan Apo Namalyari. <sup>13</sup> Ta kayno mag-in mabarog hilay na. Ta maniraw-hiraw hila tana hēn ayn kapukatan, mag-in mayakaw, haka makiêmēn ha biyay hēn kaatag. <sup>14</sup> Ya mangēd, ay mag-ahawa hila tanan oman, manganak hila, haka pansinêl lan mangēd ya pamilya la, ta êmēn ayn hilan mahabi kantamo ya kapatsi tamo. <sup>15</sup> Hinabi koy habayto ta main kaatag ya babayi ya bawo ya naamuyot ni Satanas. <sup>16</sup> Kabay, no main babayi ya ampaniwala kan Apo Jesu-Cristo, ya main kamag-anak ya babayi ya bawo,

\* <sup>5:3</sup> ha habin Griego mantēg bawo (hilay olila ya ayn nanan anak-anakan ya manawop kanla).

† <sup>5:9</sup> Dapat a ya nakilalaki. ‡ <sup>5:11</sup> Magpangako hila ya a hilay na mag-ahawa ta iubuh lay kaya la hēn manawop kanlan patēl ha Panginoon ya angkapi-tsi-tsipon.

ay dapat nan hawpan ya habaytoy bawo, ta êmén a ya mag-in pabyat kanlan ampaniwala, haka mahawpan la tanay babayi ya bawo ya ayn kamag-anak.

<sup>17</sup> Atagan yon mangéd hilay toa ya magaling hén ampamaala kamoyu, lalo hilay mánoro haka mámpamwang hén habi ni Apo Namalyari. <sup>18</sup> Ta êmén ya di ya nakahulat ha Kahulatan ya impahulat ni Apo Namalyari, “Paan yon pêthén ya bêbêy hén baka no ampanggiék ta êmén ya kaékan.”<sup>§</sup> Nakahulat êt: “Ya ampag-obra, ay dapat bayaran.”\* <sup>19</sup> Alwa mon tanggapén ya anibara ha mihay toa ya ampamaala kanlan patêl ha Panginoon no ayn lowa o tatloy manistigos. <sup>20</sup> Noa, ha arapan lan kal-atan tawo, ay habyanan mo hilay panay hén ampamihundo hén manyag kasalanan, ta êmén hila malimwan ya kaatag.

<sup>21</sup> Ha arapan ni Apo Namalyari, ha arapan ni Apo Jesu-Cristo haka ha arapan lan banal ya anghel, ampakapakihabi ko kamo, ya dapat mon honolén ya hata hinulat ko, haka dapat pipantayén moy pamanlék mo ha balang miha. <sup>22</sup> Alwa mon bêngat ipalunto ya gamêt mon ihalangin hén dyanan kapangyarihan hén mamaala ha a mon muwang, ta no main yan kasalanan, ay kayno ilamo ka ha kasalanan. Pakarayo ka ha kaganawan narawak.

<sup>23</sup> Alwan bêngat hén lanêm ya inêmén mo, noa, minêm ka êt hén pêrad ya alak, ya makahawop ha bitoka mo haka gawan panay kan ampaghakit.

<sup>24</sup> Ya kasalanan hén kaatag, ay angkahélék améhén, haka muwang tamo ya maparusaan hila, noa, ya kasalanan lan kaatag êt, ay a pon angkahélék.

<sup>25</sup> Embayro êt ya main mangangéd ya dyag ya angkahélék améhén, haka main kaatag ya mangangéd ya dyag ya mahélék lano.

## 6

<sup>1</sup> Hilay ipoh ya ampaniwala kan Apo Jesu-Cristo, ay dapat lan galangén ya amo la, ta êmén ayn mamintas kan Apo Namalyari haka ha an-itoro tamon nagpalokop kana. <sup>2</sup> No ya amo la, ay kapareho lan ampaniwala kan Apo Jesu-Cristo, ay a la dapat ihipén, ya a la kailangan hén galangén ya amo la, gawan hila ay kapareho lan ampaniwala. Noa, dapat pakikwanan lan huyuén hén mangéd ya amo la, ta ya makinabang hén pagal la, ay kapareho lan ampaniwala ya anlugarén la. Habayto ya pakikwanan mon itoro bahén.

### *Ya pamakihubak haka ya kamata hén pera*

<sup>3</sup> No main bahén ya ampanoro hén kaatag ya toro, ya alwan pareho ha pêtég ya habi haka toro ni Panginoon tamon Jesu-Cristo ya tungkol ha pamimiyay ya maka-Diyos, <sup>4</sup> ay hiyay mapagmahlay, haka ayn yan minuwang. Labay-labay na tana hén makihubak, haka magdebate hén tungkol ha habi. Ya êmbayroy dyag ay pangubatan hén karidyaan, hubakan, pamaghabi ya maniran kapareho, haka narawak ya êlêp ha kapareho. <sup>5</sup> Habayto ay pangubatan êt hén ayn anggay pa-tsian lan ampangihip hén alwan mangéd, ta a la muwang ya kaptégan, ta êndat la no yumaman hila ha paniwala la kan Apo Namalyari.

<sup>6</sup> Pêtég ya mahlay ya pakinabang tamo no ampaniwala kitamo kan Apo Jesu-Cristo, haka no mahigla kitamo, hinoman ya angkalyari ha biyay tamo.

<sup>7</sup> Hén ubat kitamo ha bitokan indo tamo, ay ayn kitamon kalga, haka pamilbêng la kantamo, ay ayn kitamon magétan. <sup>8</sup> Kabay dapat mahigla kitamo tana, no main kitamon maékan haka maitakop. <sup>9</sup> Noa, hilay kamata hén pera, ay matukso haka maamuyot ha hino-hino kay na hén ya narawak

§ <sup>5:18</sup> Deuteronomio 25:4. \* <sup>5:18</sup> Lucas 10:7.

ya kalabayan ya maniran biyay la haka mamigtan kanla ha impiyerno. <sup>10</sup> Ta ya pamag-in kamata hēn pera, ay ampangubatan hēn kaganawan karawakan. Main tawo ya kamata hēn pera, ya nangaalihan paniwala kan Apo Jesu-Cristo haka panay kalungkutan ya anlumatêng kanla.

*Ya kaatag ya utoh ni apostol Pablo kan Timoteo*

<sup>11</sup> Noa, hika, Timoteo, ya ampaghuyo kan Apo Namalyari, ay dayuán moy êmbayro ya dyag. Pakikwanan mon mag-in mahonol kana. Ihundo moy paniwala mo kan Apo Jesu-Cristo, haka ya pamanlugud mo ha kapareho mon ampaniwala. Têéhêن moy kairapan, haka magpakaaypa kan ihip. <sup>12</sup> Pakataniêhêن moy paniwala mo, haka magpakahipêg kan maghuyo kan Apo Jesu-Cristo. Pakikwanan mon mag-in nanad hēn nakihali-tagtagan ha puwayuan, ya iubuh nay hêkaw na êmén ya manambut. Ta pinili ka ni Apo Namalyari hēn dyanan kan biyay ya ayn angga, hēn impamwang mo ha arapan hēn kal-atan tawo, ya ampaniwala ka kan Apo Jesu-Cristo. <sup>13</sup> Ha arapan ni Apo Namalyari, ya ubatan biyay hēn kaganawan angkabiyyay, haka ha arapan ni Apo Jesu-Cristo ya naghabin kaptêgan ha arapan ni Poncio Pilato, <sup>14</sup> ay ampaka-pakihabi ko kamo, ya dapat mon honolêن ya habaytoy inungkat ko hēn main naahig ya paniwala, ya ayn kapintasan angga ha pag-orong ni Panginoon Jesu-Cristo. <sup>15</sup> Ya pag-orong na, ay atsi kan Apo Namalyari, ya hêpat tamon puriên, ya makapangyarihan ha kaganawan ari, haka ha kaganawan panginoon ya main tungkulon. <sup>16</sup> Hiyan bêngat ya a matsi, haka hiyan bêngat ya atsi ha kahawangan ya a makwan pakaranian hēn hinoman. Ayn êt nakahêlêk kana, haka ayn taganán makahêlêk kana. Hiya ya makapangyarihan ya puriên haka galangêن hēn ayn angga. Amen.\*

<sup>17</sup> Iutoh mo hilay mabandi di ha luta, hēn paan hilan magmatag-ay, haka paan lan ihipêن ya pera la ay makapiligtas kanla, ta a magbuyot ya habayto. Noa, dapat lan paniwal-an hi Apo Namalyari ya ampam-i kantamo hēn ikahigla tamo gawan hiyay alwan maimot. <sup>18</sup> Iutoh mo hilay mabandi hēn panay hēn manyag kangêran. Dapat panay hilan nakal-an hēn mam-i kanlan ampangailangan. <sup>19</sup> No êmbayro ya daygêن la, ay madyanan hilan mangêd êt ha bandi ha langit, gawan madyanan hilan kasiguradoan ya lumatêng ya allo, ay madyanan hilan pêtêg ya biyay hēn kalamo ni Apo Namalyari.

<sup>20</sup> Timoteo, anak ko, pakaillagan moy impatsiwala kamo. Dayuán moy pamakiistorya ya ayn kapukatan, ya a na labay ni Apo Namalyari. Éndat lan kaatag no mapangwanan kamwangan ya habayto. <sup>21</sup> Main ampaghabi ya main hilan kamwangan ya nanad êmbayro, kabay naalihan hilan paniwala kan Apo Jesu-Cristo.

Ingawan kaw dayi ni Apo Namalyari.

---

\* <sup>6:16</sup> Ya labay habiêن hēn ‘amen’ ay pêtêg ya habaytsi.

## Ya ikalwan hulat ni apostol Pablo kan Timoteo

### *Paunan habi*

Hata ikalwan hulat ni apostol Pablo kan Timoteo, ay hinulat na hēn atsi ya ha hukulan ha balayan Roma. Atsi ya ha hukulan gawan ha pangitoro nay Mangangêd ya Habi ya tungkol kan Apo Jesu-Cristo. Muwang ni apostol Pablo ya marani yay nan patsên, kabay labay nan tambêng yan hirawêni ni Timoteo.

An-ipaihip na kan Timoteo ya kailangan hēn daygêñ hēn mihay ampaghuyo kan Apo Namalyari. Kailangan nan têhêñ ya hinon kairapan ya lumatêng kana. Dapat panay yan manoro hēn kaptêgan ya atsi ha Habi ni Apo Namalyari, haka dapat nan dayuán ya pamakiistorya ya ayn kapukatan.

Kabooan hēn pinakalaman

Umpisan hulat 1:1-2

Pahalamat gawan kan Timoteo haka aral kana 1:3-20

Ya ugali lan mapaypaniwal-an ya tagahuyo ni Apo Jesu-Cristo 2:1-13

Ya pamimiyay ya ampamahigla kan Apo Namalyari 2:14-26

Ya ugali lan tawo no marani yanay pag-orong ni Apo Jesu-Cristo 3:1-9

Aral kan Timoteo 3:10-4:8

Tawlin utoh 4:9-18

Tawlin habi 4:19-22

<sup>1</sup> Hiko hi Pablo ya nag-in mihay apostol ni Apo Jesu-Cristo gawan ha kalabayan ni Apo Namalyari, ya nangiutoh kangko hēn mangitoro hēn tungkol ha biyay ya impangako na, gawan ha pakikimiha tamo kan Apo Jesu-Cristo.

<sup>2</sup> Anhulatan kata Timoteo, ya anlugarûn ko, hēn nanad sarili kon anak.

An-ihalangin kata ya dyanan ka dayi hēn kapatêkbêkan nakêm, haka ingalwan ka dayi ni Apo Namalyari ya Tatang tamo, haka ni Panginoon Jesu-Cristo

### *Ya an-ipagpahalamat ni apostol Pablo*

<sup>3</sup> Allo-yabi, panay katan an-ihalangin haka an-ipahalamat kan Apo Namalyari, ya anhuyuan ko hēn malinis ya konsinsya, hēn nanad ha pamaghuyo lan ninuno ko. <sup>4</sup> No angkaihipan koy pantolo hēn luwa mo, ay angkalêngêw ako kamo, haka labay-labay katan mahêlêk, ta êmén ako magkamain hēn hadyay kahiglaan. <sup>5</sup> Angkaihipan ko ya boon nakêm kan naniwala kan Apo Jesu-Cristo, hēn nanad ha paniwala hēn ápo mo, hi Loida, haka hēn indo mo, hi Eunice. Sigurado ko etaman ya an-ihundo moy paniwala mo kan Apo Jesu-Cristo. <sup>6</sup> Kabay an-ipaihip ko kamo ya magpakahipêg kan manggamit hēn kagalingan ya indin kamo hēn Espiritu ni Apo Namalyari, hēn impalunto koy gamêt ko ha ulo mo, hēn inhalangin kata.\* <sup>7</sup> Paan kan malimo hēn manggamit habain ya kagalingan, ta dinyanan na kitamo ni Apo Namalyari hēn Espiritu na, ya main kapangyarihan, pamanlugud haka pamagpigel ha sarili.

<sup>8</sup> Kabay a mo ikarêng-êy ya pamaptêg mo hēn tungkol ha Panginoon tamo. Haka a mo ikarêng-êy ya pangahukul ko, gawan ha panoro kon tungkol kana. Noa, ha kapangyarihan ya pan-idin ni Apo Namalyari kamo, ha pangitoro mo ya Mangêd ya Habi, ay pagtêéhan mo etaman ya kairapan ya lumatêng kamo. <sup>9</sup> Hiya ya namiligtas kantamo, haka namaihip kantamo hēn palokop

\* <sup>1:6</sup> 1 Timoteo 4:14, Dyag 14:23.

kitamo kana. Dinyag nay habayto gawan kalabayan na, haka gawan ha ayn kapantag ya ingalo na kantamo, alwan gawan kangéran hén dyag tamo. Hén a na pon dinyag ya hata luta, ay atsi yana ha ihip ni Apo Namalyari ya ingalwan na kitamo gawan ha pakikimiha tamo kan Apo Jesu-Cristo. <sup>10</sup> Babayo amêhén ay impamwang ya habaytoy ingalo na ya ayn kapantag, hén impapaltaw ya Mámiligtas di kantamo, yabay ya hi Apo Jesu-Cristo. Hiyay nanambut hén kamatsan, haka hiyay namipamwang hén Mangangéd ya Habi ni Apo Namalyari ya tungkol ha biyay ya ayn angga.

<sup>11</sup> Hikoy pinili na hén mag-in mihay apostol na hén mamipamwang haka mamitoro hén habaytoy Mangéd ya Habi. <sup>12</sup> Gawan pandaygén koy impadyag na kangko, ay ampagdusa kina. Noa, a ko an-ikarêng-êy ya hata kairapan, gawan muwang ko yan taganá hi Apo Jesu-Cristo haka ampaniwala ko kana haka sigurado ko ya maillagan na ya impatsiwala ko kana, angga ha pag-orong na di. <sup>13</sup> Ha panoro mo, ipakahundo mon daygén alimbawa, ya pêtég ya habi ya intoro ko kamo. Manoro ka hén main paniwala, haka pamanlugud ya pan-idin ni Apo Namalyari kantamo, gawan nagpalokop kitamina kan Apo Jesu-Cristo. <sup>14</sup> Illagan moy kaptégan ya impatsiwala kamo ha hawop nan Espiritu ni Apo Namalyari ya atsi kantamo, ta êmén ya kaptégan ay a mahamutan hén alwan pêtég ya toro.

<sup>15</sup> Muwang mo ya inalihan akon kaganawan taga-probinsyan Asia haka hilan Figelo boy Hermogenes. <sup>16</sup> Ingalwan dayi ni Panginoon ya pamilya ni Onesiforo, ta kata-ungno yan namahigla kangko haka a na ingkarêng-êy ya pangahukul ko. <sup>17</sup> Hén atsi ya di ha Roma, ay pinakatapol na ko, angga ha natapol na ko. <sup>18</sup> Muwang mina no ay-êmén na kon hinawpan ha balayan Efeso. Dayi ha pag-orong na di hén Panginoon ay ingalwan na ya.

## 2

*Hilay ampaniwala kan Apo Jesu-Cristo ay in-alimbawa ha hundaloh haka ha mihay ampaki-halitagtagan ha puwayuan haka ha mihay mahipég ya mananaman*

<sup>1</sup> Timoteo, anak ko, pataniêhén ka dayi hén ayn kapantag ya ingalo ni Apo Jesu-Cristo. <sup>2</sup> Ya toro ko ya nagilam mo ha arapan hén kal-atan, ay itoro mo ha mapaypaniwalan, ya main galing hén mamitoro ha kaatag.

<sup>3</sup> Pakikwanan mon pagtêuhan ya kairapan, ta hépat ya habayto ha mangéd ya hundaloh ni Apo Jesu-Cristo. <sup>4</sup> Ya mihay hundaloh ay a ampakiêmén ha hinoman ya alwan hépat ha hundaloh, noa, pakikwanan na hén manyag kalabayan hén namili kana hén mag-in hundaloh. <sup>5</sup> Haka no main miha ya ampaki-halitagtagan ha puwayuan, ay a ya makahambut no a ya anhumonol ha patakaran hén hali-tagtagan. <sup>6</sup> Hépat kanan mihay mananaman hén mu-munan mangwa hén atag na ha pinaghayngétan na. <sup>7</sup> Pakaihipén moy panhabiên ko, ta ubuhén nan ipamulah kamo hén Panginoon ya habayto.

<sup>8</sup> A mon liwaan hi Apo Jesu-Cristo, ya biniyay oman, ya mihay kaapo-apoan ni Arin David, ta yabay ya Mangéd ya Habi ya an-ipamwang ko. <sup>9</sup> Gawan panoro kon habayto, ay ampakaranas kinan kairapan. Inggapoh la ko hén nanad ha mihay mapanyag karawakan. Embayro man, ay ampibahwag ya habi ni Apo Namalyari, gawan a ma-gapoh ya habi na. <sup>10</sup> Gawan êmbayro, ay pagtêuhan koy kaganawan kairapan, ta êmén ko mahawpan ya hilay pinili ni Apo Namalyari. Ta êmén hila etaman miligtas gawan kan Apo Jesu-Cristo, haka madyanan biyay ya ayn angga hén kalamo na ha langit. <sup>11</sup> Pêtég ya humonol ya pangahabi.

“No natsi kitamo hén kalamo na, ay mabiyay kitamo hén kalamo na.

<sup>12</sup> No pagtêêhan tamoy kairapan, ay mamaala kitamo hên kalamo na. No araêñ tamo ya, ay araêñ na kitamo etaman.

<sup>13</sup> Agyan alwa kitamon tapat kana, ay tapat ya, gawan a malyarin a na daygêñ ya hinabi na.”

### *Ya dapat ugalién hên maghuyo kan Apo Jesu-Cristo*

<sup>14</sup> Habaytsi ya ipaihip mo kanlan antoroan mo, haka pakahabyanan mo hila ha arapan ni Apo Namalyari, ya itêgêñ lay nay pamihuhubak la, ta alwan mangêñ ya habayto, noa, ikahiran bêngat hên paniwala lan ampanggilam.

<sup>15</sup> Pakikwanan mon mag-in ikahigla ni Apo Namalyari, ya mihay mánoro ya ayn ikarêng-êy, ta mangêñ ya panoro na hên mantêg habi ni Apo Namalyari.

<sup>16</sup> Dayuán moy pamakiistorya ya ayn kapukatan ta habaytoy makapidayo hên tawo kan Apo Namalyari. <sup>17</sup> Ta ya pan-itoro la ay nanad hên kapadiri ya hakit ya makaalit. Hilan Himeneo haka hi Fileto ay kalamo lan ampanoro hên habayto. <sup>18</sup> Marayo hilay na ha kaptêgan ta panhabiên la, ya nayari ana ya pamabiyay oman ni Apo Namalyari kanlan natsi. Ha habi lan êmbayro ay anhiraêñ lay paniwala lan kaatag. <sup>19</sup> Noa, ya pêtêg ya habi ni Apo Namalyari, ay a maoman ta nanad yan napah-êy ya tarêk ya mihay pundasyon ya a matsigê. Haka nakahulat bayro ya wana, “Muwang hên Panginoon no hino hilay ampagpalokop kana, haka dapat dayuán lay karawakan.”\*

<sup>20</sup> Ha mihay mahlay ya bali, ay alwan panay ginto haka pilak ya gamit la, noa, main etaman hên dinyag ha kayo haka tagumbid. Ya dinyag hên ginto haka pilak ay para ha kaluto, noa, ya dinyag ha kayo haka tagumbid ay pan-allo-allo. <sup>21</sup> Êmbayro man, no dayuán tamoy narawak ya toro, ay mag-in kitamo hên nanad ha dinyag ha ginto haka pilak, ya tawo ya impapawa êmên makahuyo kan Apo Namalyari. Haka hino man ya oras ay nakal-an kitamo, haka hépat kitamo ha ikakangêñ ya dyag. <sup>22</sup> Kabay, dayuán moy narawak ya kalabayan hên miyawhay ya kulang pon ha kaihipan, ta pakikwanan mon mag-in mahonol kana, ihundo moy paniwala mo, haka pamanlugud mo, haka pamimiyay mo hên main kapatékbêkan kalamo lan ayn kapintasan, ya ampaniwala ha Panginoon hên boon nakêm. <sup>23</sup> Dayuán mo ya ayn kapukatan pamakiistorya kanlan pilosopo, ta habaytoy pangubatan hên hubakan. <sup>24</sup> Alwan hépat ha ampaghuyo ha Panginoon ya makihubak, noa, ya hépat kana ay lugurêñ na ya balang miha. Dapat magaling yan manoro, haka mag-in mapagtêeh. <sup>25</sup> Dapat maaypa ya nakêm nan toroan hilay anhumalanghang kana, ta kayno hawpan hila ni Apo Namalyari hên paghêhêan hên talibatokan lay pamanyag kasalanan, haka kikwan patawad ta êmên la maintindihan ya kaptêgan. <sup>26</sup> Ha êmbayro ay mimukat hila, haka mibuhan hila ha hilo ni Satanas, ya nandakêp haka nangipoh kanla.

## 3

### *Ya malyari ha pag-orong ni Apo Jesu-Cristo*

<sup>1</sup> Pakaihipêñ yoy hatsi, no marani yanay pag-orong ni Apo Jesu-Cristo, hadyay nay kairapan ya lumatêng. <sup>2</sup> Hilay tawo ay mag-in maimot, kamata hên pera, mapagmahlay, mapaglangka, mapaniran kapareho, mapanalanghang ha toa, ayn utang nakêm, ayn galang kan Apo Namalyari, <sup>3</sup> ayn pamanlugud, a mapamatawad, mapammusmus, a mapaggil ha sarili, matobag, kapatsi hên kangêran, <sup>4</sup> mapay-upit, a malilimoën, haka mapagmatag-ay. A hila manlugud kan Apo Namalyari ta lugurêñ lay kalabayian la. <sup>5</sup> Ampagbabara hila hên main hilan paniwala, noa, ayn ha biyay

\* <sup>2:19</sup> Bilang 16:5.

la, ya kapangyarihan ni Apo Namalyari, gawan a hila pon nagpalokop kana. Kabay dayuán mo hila. <sup>6</sup> Ta main ungnoy lalaki kanla ya anhumwên ha balin babayi ya makasalan, hén manloko kanlan habaytoy babayi ya ayn pamagpigel ha sarili. Angkaakay hilay habaytoy babayi ha hino-hino kay na hén ya toro ya labay lan gilamén. <sup>7</sup> Panay hila hén ampag-arat ya habaytoy babayi, noa, a la angkaintindihan ya kaptégan. <sup>8</sup> Hilay habaytoy lalaki etaman, no ay-émén lan hinalanghang hi apo Moises ni Janes haka Jambres,\* ay êmbayro êt ay anhalanghangen lay kaptégan hén habaytoy lalaki ya ampanloko kanlan habaytoy babayi, ta ayn kangérān ha ihip la, haka ya paniwala la, ay ayn alagá ha hélék ni Apo Namalyari. <sup>9</sup> Noa, a lay na maihundo ya pamanyag lan karawakan, ta mamwangan ya balang dyag la, ya êmén ha nalyari kan Janes haka kan Jambres.

### *Ya utoh ni apostol Pablo kan Timoteo*

<sup>10</sup> Noa, hika Timoteo, ay muwang mo ya tungkol ha toro ko, pamimiyay ko, kalabayan ko ha biyay, paniwala ko, pamangénggan ko hén ayn huluk, pamanlugud ko, pamagtéêh ko, <sup>11</sup> pamairap la kangko, haka kairapan ko, ya nalyari kangko ha Antioquia, Iconio angga ha Listra. Hadyay pamairap ya tinéêh ko, noa, inlitas ako hén Panginoon ha kaganawan hén habayto. <sup>12</sup> Êmbayron taganá. Balang mabay hén mamiyay hén nanad ha mihay nagpalokop kan Apo Jesu-Cristo ay pairapan. <sup>13</sup> Haka hilay narawak ya tawo boy hilay manloloko ay lalon dumawak, ta inhundo lay pamanloko la, haka hila man ay lokoén. <sup>14</sup> Noa, hika, Timoteo, ay ihundo moy pamanyag hén namwangan mo, ya angkasurado mo, ta muwang mo no hinoy nanoro hén habayto kamo. <sup>15</sup> Ta ubat hén nagkaihip ka, ay muwang mina ya laman hén Banal ya Kahulatan ya impahulat ni Apo Namalyari, ya ampangitoro hén dann ya palako ha kaligtasan gawan ha paniwala kan Apo Jesu-Cristo. <sup>16</sup> Ya kaganawan ya nakahulat ha Kahulatan ya impahulat ni Apo Namalyari, ay ubat kana. Kabay maalagá ya habayto ha panoro hén kaptégan, haka êmén itoynung ya mali ya toro, haka êmén habyanan hilay ampanyag karawakan, haka mapangwaan aral êmén mag-in malinis ya pamimiyay. <sup>17</sup> Di ha habi na, ay makwa tamo, ya kaganawan ya kailangan tamon tagahuyo na, ta êmén kitamo mag-in hépat, haka panay nakal-an hén manyag kaganawan kangérān ya an-ipadyag na kantamo.

## 4

### *Kaatag ya utoh ni apostol Pablo kan Timoteo*

<sup>1</sup> Ha pag-orong na di ni Apo Jesu-Cristo hén mamaala, ay hatolan na hilay angkabiyyay pon haka hilay natsi. Kabay ha arapan ni Apo Namalyari haka Apo Jesu-Cristo, ay ampakapakihabi ko kamo, <sup>2</sup> ya dapat kan panay hén nakal-an hén mamipamwang hén habi ni Apo Namalyari agyan hinon oras. Ha panoro mon habaytoy kaptégan, ay dapat mamwangan lan ampanyag karawakan, ya kangérān ya hépat lan daygén. Habyanan mo hilay ampanyag karawakan, hén main kaaypaan nakém, haka pibat-an moy antoroan mo. Pataniéhén moy nakém la. <sup>3</sup> Ta lumaténg ya allo, ay a lay nan gilamén ya kaptégan ya an-itoro tamo. Ta tapolén la hilay ampanoro hén hino-hino kay na hén ya narawak ya toro ya labay lan gilamén. <sup>4</sup> A lay nan gilamén ya kaptégan ya ubat kan Apo Namalyari, ta ya gilamén la tana, ay kayabolan hén istorya ya didinyag bat. <sup>5</sup> Noa, hika, Timoteo ay paan kan tumalibaha ha hinoman ya angkalyari. Pagtéêhan moy kairapan ya lumaténg

\* <sup>3:8</sup> Exodus 7:11, 22.

kamo. Ipamwang mo ya Mangangêd ya Habi, haka tuparêñ moy kaganawan impadyag kamo hên nanad ha hépat ha mihay ampaghuyo kana.

<sup>6</sup> Hiko etaman, ay marani kinan matsi. Ya biyay ko ay in-átang ya nanad ha inêmén ya intugtug ha arapan ni Apo Namalyari. <sup>7</sup> Nanad akon mihay nakihali-tagtagan ha puwayuan ya nilumatêng ha anggaan. Indin koy boon hêkaw ko. Ya pamanhumonol ko ha Panginoon, ay inhundo ko hên main ahig ya paniwala kana. <sup>8</sup> Améhén, ha panambut ko ha pamanhumonol ko kana, ay madyanan akon primyo ha pag-orong na di hên manatol hên main katoynungan. Alwan hikon bêngat ya madyanan primyo, noa, ya balang miha ya ampangênggan ha pag-orong na.

### *Ya kalabayan ni apostol Pablo*

<sup>9</sup> Pakikwanan mo dayin kamot hên maniraw kangko. <sup>10</sup> Ta nilakwanan na ko ni Demas gawan angkaridyaan na ya atsi di ha luta, haka dinyag nay kalabayan na hên nammita ya ha balayan Tesalonica. Hi Cresente ay nammita ha probinsyan Galacia, haka hi Tito ay atsi ha probinsyan Dalmacia. <sup>11</sup> Hi Lucas tana ya atsi di hên kalamo ko. Danan mo hi Marcos, ta ilamo mo ya di, ta mahlay ya maihawop na kangko ha pamaghuyo ko ha Panginoon. <sup>12</sup> In-utoh ko hi Tiquico ha balayan Efeso. <sup>13</sup> Ha pammita mo di, ay gêtan mo ya pangkêbel ko ya imbalag ko kanlan Carpo ha balayan Troas. Ubuhêñ mon gêtan ya libro ko, lalon laloy na ya dyag ha balat. <sup>14</sup> Mal-at ya karawakan ya dinyag na kangko ni Alejandro, ya maminday hên tanso. Ya Panginoon tanay maghigantsi kana. <sup>15</sup> Hika man ay kaillag ka kana, ta hadyay halanghang na ha panoro tamo.

<sup>16</sup> Ayn nanawop kangko ha pamakidungot ha manuyon kaso hên haton unan in-arap ako. Mimiha ko tana, ta naubuh la kon nilakwanan. Patawarêñ hila dayi ni Apo Namalyari. <sup>17</sup> Noa, nilamoan ako ni Panginoon, haka na ko dinyanan hên nataniêh ya ihip ta êmén ko naipamwang ya kabooan hên Mangêd ya Habi ni Apo Namalyari, kanlan alwan Israelita bayri, ya hilay a pon nagpalokop kana. Inlitas na ko ha kamatsan. <sup>18</sup> Haka iligtas na kon Panginoon ha kaganawan karawakan ta iatêñ na ko ha pamanlokop na ha langit. Purién ya hên ayn angga. Amen.

### *Tawlin pangumusta*

<sup>19</sup> Ikumusta mo ko ha loway mitaahawa, hi Priscila haka hi Aquila, haka ya boon pamilya ni Onesiforo. <sup>20</sup> Nabalag hi Erasto ha balayan Corinto. Hi Trofimo etaman, ay imbalag ko ha balayan Mileto gawan main yan hakit. <sup>21</sup> Pakikwanan mon makalatêng di, bayo lumatêng ya panaon hên kêbel. Angkumustaêñ la ka ni Eubulo, Pudente, Lino, Claudia, haka hilay kaatag pon ya patêñ ha Panginoon ya atsi di.

<sup>22</sup> Panay na ka dayin lamoan hên Panginoon. Haka dayi ingalwan na kaw ngan.

## Ya hulat ni apostol Pablo kan Tito

### *Paunan habi*

Habaytsi ay hulat ni apostol Pablo kan Tito, ya mihay alwan Israelita ya ampaniwala kan Apo Jesu-Cristo gawan ha toro ni apostol Pablo (Tito 1:4). Hi Tito ay kalamo lan apostol Pablo hên naniraw hila ha Jerusalem (Galacia 2:1). Hiya êt ya in-utoh ni apostol Pablo hên mamaala ha pami-tsi-tsipon hên maihawop lan taga-Corinto kanlan patêl ha Panginoon ha Jerusalem (2 Corinto 8:6, 16-24). Hiya ya imbalag ni apostol Pablo ha Pulo hên Creta ta êmén ya mamaala kanlan ampaniwala kan Apo Jesu-Cristo ya angkapi-tsi-tsipon bayro. Di ha hulat ay inaralan ni apostol Pablo hi Tito hên tungkol ha dapat nan daygên bayro.

Kabooan hên pinakalaman

Ya umpisan hulat 1:1-4

Ya payo ni apostol Pablo kan Tito, no ay-êmén mamaala kanlan patêl ha Panginoon ha pulo ya nag langan Creta 1:5-16

Ya kangérān ya dapat itoro kanlan nagpalokop kan Apo Namalyari 2:1-15

Ya dapat mag-in pamimiyay lan ampaniwala kan Apo Jesu-Cristo 3:1-11

Tawlin habi 3:12-15

### *Ya umpisan hulat*

<sup>1</sup> Hiko hi Pablo ya mihay ampaghuyó kan Apo Namalyari, haka hikoy nag-in mihay apostol ni Panginoon Jesu-Cristo.

In-utoh na ko ni Panginoon Jesu-Cristo hên mamatanîêh hên paniwala lan pinili na hên mag-in kana, haka êmén êt mamipamwang kanla hên kaptégan. Ta hata kaptégan ay ampamipadyag kanla hên kalabayan na. <sup>2</sup> Habaytsi ya kaptégan, ya ampaniwal-an la, ay ampam-i kanla hên kasiguradoan ya hila ay madyanan biyay ya ayn angga, ha langit. Hêna na pon dinyag ya hata luta ni Apo Namalyari, ya a manloko, ay nangako ya, ya idin na ya biyay ya ayn angga kanlan magpalokop kana. <sup>3</sup> Ha takdan panaon, ay namipamwang hi Apo Namalyari, ya Mámiligtas tamo, hên hata pangako nay biyay ya ayn angga, haka na impatsiwala kangko etaman, hên itoro ya habayto gawan in-utoh na ko.

<sup>4</sup> Anhulatan kata, Tito, ya nanad kon mantêg anak gawan ha paniwala ta.

An-ihalangin kata ya dyanan ka dayi hên kapatêkbêkan nakêm, haka ingalwan ka ni Apo Namalyari ya Tatang tamo, haka ni Panginoon Jesu-Cristo, ya Mámiligtas tamo.

### *Ya payo ni apostol Pablo kan Tito, no ay-êmén mamaala kanlan patêl ha Panginoon*

<sup>5</sup> Imbalag kata ha Creta, ta êmén mo yarién ya a pon nayari. Ha balang balayan ya main patêl ha Panginoon, ay mamili ka hên toa ya mamaala kanla hên nanad ha in-utoh kina kamo. <sup>6</sup> Hilay pilién mon mamaala ay hatoy angkahêlêk ha biyay la ya a hila ampanyag kasalanan, haka mimihay ahawa la. Ya maának la etaman ay dapat main paniwala ha Panginoon, dapat alwa hilan mapanyag karawakan, haka alwan mapanhumañanghang ha matoa kanla. <sup>7</sup> Kanlan ampamaala ha pami-tsi-tsipon lan patêl ha Panginoon, ay dapat ayn mahêlêk ya hinon kapintasan, ta hila ay pinatsiwal-an hên maghuyo kan Apo Namalyari. Dapat alwa hilan mapagmatag-ay, alwan mapaghuluk, alwan mapamminêm alak, alwan tulawên, haka alwan kamata hên pera.

<sup>8</sup> Noa, ya dapat kanla ay mahiglan mamahowên hên bisita, mapanyag kangêran, natoay ihip, hêpat makilamo ha kapareho, mapanyag kalabayan ni Apo Namalyari, haka mapamigil ha sarili. <sup>9</sup> Dapat lan pakapaniwal-an ya kaptêgan ya an-itoro ta, ta êmén la mapataniêh ya nakêm hên kaatag ha naahig ya toro, haka mahabyanan lay anhumalanghang ha pêtêg ya toro.

<sup>10</sup> Ta main mal-at ya anhumalanghang haka ampanloko, ta ya toro la ay ayn alagá, lalon-laloy na kanlan Israelita ya an-ipalêkpêk ya dapat patuli hilay ampaniwala kan Panginoon Jesu-Cristo, no labay la hên madyanan hilan biyay ya ayn angga. <sup>11</sup> Yabay hilay habaytoy ampanoron bat, ta êmén hila makakwa hên pera ya para ha sarili la. Hila ay dapat patêgênen hên manoro, ta main ungnoy pamilya ya angkaguloy nakêm gawan ha pamitoro la hên alwan dapat itoro. <sup>12</sup> Mihay propeta lan taga-Creta ay naghabi, ya wana, “Hilay taga-Creta ay panay hên ampaglaram, haka nanad hilan ayop ya kapalimo, mangahiba haka mangatamad.” <sup>13</sup> Habayto ya hinabi na ay pêtêg. Kabay habyanan mo hila hên mahakit, êmén mag-in naahig ya paniwala la. <sup>14</sup> Daygên moy habayto ta êmén maalih ya paniwala la ha istoryan Israelita ya didinyag lan bêngat, haka ha pan-itoro lan tawo ya nanalibokot ha kaptêgan. <sup>15</sup> Hilay malinis ya kaihipan, ay ampamitad malinis ya balang hino, noa, hilay narawak ya kaihipan haka ayn paniwala, ay ampangihip hên ayn malinis, ta ya ihip la boy nakêm la ay narawak. <sup>16</sup> Anhabien lan habaytoy nangarawak, ya nagpalokop hilay na kan Apo Namalyari, noa, ayn kaptêgan ya habayto, ta ampanyag hilan karawakan, haka anhumalanghang hila kana. A hila ampakadyag hên kangêran.

## 2

### *Ya kangêran ya dapat itoro kanlan nagpalokop kan Apo Namalyari*

<sup>1</sup> Hika etaman, Tito, dapat panay mon itoro ya naahig ya kaptêgan. <sup>2</sup> Toroan mo hilay toay lalaki hên a la honolên ya narawak ya kalabayan hên lawini. Kailangan mapagpigel hila ha sarili, haka kailangan mag-in natoay nay ihip la. Dapat pakapaniwal-an la ya pêtêg ya toro, dapat lan pakalugurên ya kapareho lan tawo, haka dapat lan têhêhêh ya hinon kairapan. <sup>3</sup> Embayro êt ya habiên mo kanlan toay babayi, ya dapat hilan manyag hên hêpat kanlan nagpalokop kan Apo Namalyari. Paan hilan mamiyakaw-yakaw hên maniran kaatag, haka paan hilan mag-in mapamminêm alak, noa, ya dapat ay mangitoro hila hên kangêran. <sup>4</sup> Ha êmbayroy dyag la, ay matoroan la hilay alwa pon mantêg toa ya babayi hên manlugud hên ahawa la haka maának la. <sup>5</sup> Matoroan la hila etaman hên mag-in mapagpigel ha sarili, panay hên manalibokot ha kasalanan, magpakahipêg ha bali la, haka magpasakop ha ahawa la. Dapat lan daygên ya habayto ta êmén a mapintasan ya habi ni Apo Namalyari.

<sup>6</sup> Embayro etaman pakahabyanan mo hilay alwa pon mantêg toa ya lalaki ya mag-in hila dayin mapagpigel ha sarili la. <sup>7</sup> Hika etaman, ay dapat panay kan manyag kangêran, ta êmén la mamwangan hên kaatag ya dapat lan daygên. Paan mon daygên kamungaw ya pangitoro mo, noa, ipakatoro mo ya kaptêgan. <sup>8</sup> Dapat pêtêg ya kaganawan ya an-itoro mo, ta êmén mipakarêng-êy hilay anhumalanghang kamo, gawan ayn hilan mahabi kantamo.

<sup>9</sup> Pakahabyanan mo hila etaman hilay ipoh hên palokop hila ha amo la ha hinon ipadyag kanla, ta êmén la pahiglaên ya amo la. Dapat alwa hilan matobag. <sup>10</sup> Paan lan panakawan ya ámo la hên hinoman, noa, ya dapat, ay panay hilan mapagtsiwal-an. No êmbayro ya daygên la, ay puriên hên balang miha ya toro ya tungkol kan Apo Namalyari, ya Mámiligas tamo.

<sup>11</sup> Madyag dayi ya hata hinulat ko, gawan impamwang ya ayn kapantag ya ingalo ni Apo Namalyari, ya ampam-in kaligtasan ha hino-hino kay na hēn ya tawo. <sup>12</sup> Habaytoy ayn kapantag ya ingalo ni Apo Namalyari, ay makapiakay kantamo hēn manalibokot ha pamimiyay ya alwan maka-Diyos, ta êmēn kitamo mag-in mahonol ha kalabayan ni Apo Namalyari, mapagpigel ha sarili, haka êmēn mag-in hépat ya pamakilamo ha kapareho tamo kaban atsi kitamo pon bayri ha luta. <sup>13</sup> Ta êmbayro ya dapat tamon ugalién kaban an-êngganan tamo ya pangubatan hēn hadyay kahiglaan tamo. Yabay ya pay-iltaw hēn kapahilêw ya kahampatan hēn panga-Diyos ni Apo Jesu-Cristo ha pag-orong na di. Hiya ya makapangyarihan ya Diyos tamo, haka hiyay Mámilitas tamo. <sup>14</sup> Indin nay sarili na ha pangakbus kantamo, ta êmēn na kitamo mialih ha pamanyag hēn kaganawan karawakan. Nilinisan na kitamo hēn mag-in kana, ta êmēn kitamon humipêg hēn manyag kalabayan na.

<sup>15</sup> Atsi kamo ya tungkulan hēn itoro ya habayto. Ya kaatag ay dapat mon pakhawêñ ya nakêm, haka ya kaatag ay dapat mon habyanan. A mo hila paulayan hēn musmusêñ la ka.

### 3

<sup>1</sup> Ipaihip mo kanla bahêñ ya palokop hila kanlan main tungkulan. Dapat honolêñ la hila, haka kailangan panay hilan nakal-an hēn manyag kangêran. <sup>2</sup> Paan hilan maghabi hēn ikahira hēn hinon tawo, haka dapat paan hilan panay hēn makihubak. Noa, dapat manlugud haka gumalang hila ha balang miha. <sup>3</sup> Gawan hēn hato ay hikitamo man, ay ayn kitamon muwang ya tungkol kan Apo Namalyari. A tamo ya anhonolêñ, haka tampol kitamon angkagtan ha alwan kangêran. Ampakihonol-honol kitamo pon ha nan-garawak ya kalabayan ya an-ikapdan bêngat hēn lawini tamo. Ya angkahêlêk pon ha biyay tamo hēn hato ay nangarawak ya pangingihip, karidyaan, haka hêmek. <sup>4</sup> Noa, hēn impamwang kantamo ya kangêran haka pamanlugud ni Apo Namalyari ya Mámilitas tamo, <sup>5</sup> ay inligtas na kitamo ha kaparusaan. Ya pangiligtas na kantamo, ay alwan gawan ha pamanyag tamo hēn kangêran, noa, gawan ha ingangalo na. Hikitamo ay in-anak oman gawan ha panlinis na kantamo. Haka ya Espiritu ni Apo Namalyari ay nam-i kantamon bayoy biyay. <sup>6</sup> Gawan kan Apo Jesu-Cristo ya namiligtas kantamo, ay boon nakêm nan impahapat kantamo ni Apo Namalyari ya Espiritu na. <sup>7</sup> Êmbayroy dinyag na, ta êmēn na kitamo itad hēn ayn kasalanan gawan ha ayn kapantag ya ingalo na, haka ta êmēn na kitamo dyanan hēn kasiguradoan hēn biyay ya ayn anggaan, ya an-êngganan tamo.

<sup>8</sup> Pêtêg ya habayto ya inhulat ko. Kabay ipakatoro mo hēn mimihay ihip mo ya habayto kanlan ampaniwala kan Apo Namalyari, ta êmēn hila mag-pakadyag hēn kangêran. Habayto ay mangangêd haka mapakinabangnan la. <sup>9</sup> Dayuán mo ya pamikotang la ya ayn kapukatan ya tungkol ha listahan hēn ninuno la. Dayuán mo etaman ya ayn kapukatan ya pamiistorya haka ya pamihuhabak la hēn tungkol ha Kautuhan ni apo Moises. <sup>10</sup> Paghabyanan mo hilay ampangubatan hēn hubakan, gawan alwan pêtêg ya toro la. No katalwa mo hilay nan pinaghabyanan, ta a hila manggilam ay ayn nanan madyag. Dayuán mo hila tana. <sup>11</sup> Ta muwang mo ya êmbahêñ ya tawo ay mangarawak, haka ya kasalanan la, ay ampamaptêg ya alwan mangêd ya andaygêñ la.

<sup>12</sup> Iutoh ko kamoyu hi Aremas, o hi Tiquico. Pamilatêng na bahên ay pakikwanan mon tupaên mo ko ha Nicapolis, ta ya labay ko ay bayro kon maglaêh ha kawran. <sup>13</sup> Pakikwanan mon hawpan hi Apolos haka hi Zenas ya abogado\* ta êmên hila tampol makabita. Siguradoên mo êt ya a hila ampagkulang ha kaganawan kailangan la. <sup>14</sup> Hilay patêl tamo ha Panginoon, ay panay mon toroan hêñ manyag kangêran, haka mag-in mapanawop ha hinoman ya ampangailangan, ta êmên ya biyay la ay main pakinabang. <sup>15</sup> Angkumustaên ka hêñ hilay kalamo ko di. Ikumusta mo kay etaman kanlan ampanlugud kannaêñ, ya hilay patêl ya nagpalokop ha Panginoon.

Ingalwan kaw dayi ni Apo Namalyari.

---

\* <sup>3:13</sup> mamakidungot hêñ kaso ya bayaran hêñ main kaso.

## Ya hulat ni apostol Pablo kan Filemon

### *Paunan habi*

Habaytsi ay hulat ni apostol Pablo kan Filemon ya mihay ampaniwala kan Apo Jesu-Cristo. Hi Filemon ay mahipêg ha pagtsiponan lan ampaniwala kan Apo Jesu-Cristo ha Colosas. Hiya êt ya amo ni Onesimo ya mihay ipoh ya tinumakah. Habayto hi Onesimo, ay nilumatêng ha Roma, ha pinayhukulan kan apostol Pablo. Bayro yan naniwala kan Apo Jesu-Cristo gawan ha panoro ni apostol Pablo. Di ha hulat ay ampakihabi ni apostol Pablo kan Filemon, ya patawarên na dayi hi Onesimo, haka tanggapên na ya dayi alwan bat hêñ nanad ipoh, noa, hêñ nanad patêl ha Panginoon, ta gawan ha toro ni apostol Pablo, hiyay naniwala kan Apo Jesu-Cristo.

Kabooan hêñ pinakalaman

Umpisan hulat 1-3

Ya pamanlugud haka paniwala ni Filemon 4-7

Ya an-ipakihabi ni apostol Pablo kan Filemon ya tungkol kan Onesimo 8-22  
Tawlin habi 23-25

<sup>1</sup> Hiko hi Pablo ya main hulat hêñ habaytsi. Hikoy nakahukul gawan ha pangitoro kon tungkol kan Apo Jesu-Cristo. Hi Timoteo ya patêl tamo ha Panginoon ay kalamo kon ampanulat hêñ habaytsi ya para kamo, Filemon, ya anlugarûn naêñ kalamo ha paytoro. <sup>2</sup> Habaytsi ya hulat ay para etaman kan Apia ya patêl tamo ha Panginoon, haka para kan Arquipo ya kapareho tamo ya ayn têgêñ ha paytoro na hêñ tungkol kan Panginoon Jesu-Cristo. Habaytsi ya hulat ay para etaman kanlan patêl ha Panginoon ya angkapi-tsitsipon ha bali mo, Filemon. <sup>3</sup> An-ihalangin naêñ kaw ya dyanan kaw dayi hêñ kapatêkbêkan nakêm, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

### *Ya pamanlugud haka paniwala ni Filemon*

<sup>4</sup> Ha panalangin ko, ay panay katan an-ilamo hêñ ipagpahalamat kan Apo Namalyari, ya ansimbaêñ ko, <sup>5</sup> ta angkabalit-an koy tungkol ha paniwala mo kan Panginoon Jesus haka tungkol ha pamanlugud mo kanlan kapareho mon pinili ni Apo Namalyari hêñ mag-in kana. <sup>6</sup> An-ipanalangin ko ya paypamwang mo hêñ paniwala mo kan Apo Jesu-Cristo ay maymukat hêñ ihip lan ampanggilam kamo ya tungkol ha kaganawan kangêran ya idin kantamo gawan ha paniwala tamo kan Apo Jesu-Cristo. <sup>7</sup> Hiko etaman, patêl ko, ay haday kahiglaan ko, haka nitalaba ko gawan pamanlugud mo ya namahigla hêñ nakêm lan pinili ni Apo Namalyari hêñ mag-in kana.

### *Ya an-ipakihabi ni apostol Pablo kan Filemon ya tungkol kan Onesimo*

<sup>8</sup> Gawan ha pamanhumonol ta kan Apo Jesu-Cristo ay main akon karapatan hêñ mamiutoh kamo hêñ daygêñ ya dapat mon daygêñ. <sup>9</sup> Noa, a kata iutoh, ta gawan ha pamanlugud ko kamo, ay ampakihabi ko tana kamo. Hiko hi Pablo, ya toay na, ya nakahukul gawan kan Panginoon Jesu-Cristo. <sup>10</sup> Ampakihabi ko kamo, hi Onesimo, ya nag-in nanad kinan anak, gawan nagpalokop yay na kan Apo Jesu-Cristo kaban atsi ko di ha hukulan. <sup>11</sup> Hêñ hato ay ayn kan pakinabang kana. Noa, amêhêñ ay mahlay ya maihawop na kanta.

<sup>12</sup> Paorongêñ ko ya bahêñ kamo. Êmbayro man, ya nakêm ko ay panay atsi kana. <sup>13</sup> Labay ko dayi hêñ maglaêñ ya tana di hêñ manawop kangko, hêñ

kahagili mo kaban atsi ko ha hukulan gawan ha pangitoro kon tungkol kan Apo Jesu-Cristo. <sup>14</sup> Noa, a ko labay daygén ya habain, ta labay ko pon hén mamwangan, no mabay ka etaman. A ko labay hén pilitén ka hén manyag kangérān, noa, labay koy kalabayan mo ya mahonol.

<sup>15</sup> Ta kayno kalabayan ni Apo Namalyari ya nipapawa ya pon kamo, ta êmén ha pag-orong na ay atsi ya kamo hén ayn angga, <sup>16</sup> alwan bêngat nanad ipoh, noa, ha kapareho minan ampagpalokop kan Panginoon Jesu-Cristo etaman. Anlugarén ko ya, noa, hikan pêtèg ya manlugud êt kana dayi, ta ipoh mo ya, bayo kapareho mo ya êt hén ampagpalokop ha Panginoon.

<sup>17</sup> Kabay no an-itad mo ko hén mantèg mon kalamo, ay tanggapén mo ya etaman dayi hi Onesimo hén nanad hén pamananggap mo kangko. <sup>18</sup> Noa, no main yan kasalanan kamo, o utang man kamo, ay hikinay mamayad. <sup>19</sup> Hiko taganá hi Pablo ya nanulat hén hatsi ha sarili kon gamêt, ya pêtèg hén mamayad, ta a ko labay ungkatén kamo ya hika ay main biyay ya ayn angga gawan kangko. <sup>20</sup> Awo, patêl ko ha paniwala kan Apo Jesu-Cristo, main akon labay kamo gawan ha paniwala ta. Pahiglaén mo dayi ya nakêm ko gawan hika ay kapareho kon nagpalokop kan Apo Jesu-Cristo.

<sup>21</sup> Hinulatan kata gawan angkasigurado ko ya daygén moy kalabayan ko. Haka muwang ko ya igit pon baydo ya daygén mo. <sup>22</sup> Ampakihabi ko êt kamo ya panléan mo kon mapaidyanan ko, ta ha panalangin yo, no kalabayan ni Apo Namalyari, ay makaorong ako bahén.

### *Tawlin habi*

<sup>23</sup> Angkumustaên ka ni Epafras, ya kalamo kon nakahukul gawan ha pangitoro hén tungkol kan Apo Jesu-Cristo. <sup>24</sup> Hi Marcos, hi Aristarco, hi Demas, hi Lucas, haka ya kaatag pon ya kalamo ko ha pamanoro, ay ampangumusta etaman kamo.

<sup>25</sup> Ingawan kaw dayi ni Apo Jesu-Cristo.

## Ya Hulat kanlan Hebreo

### *Paunan habi*

A na inungkat di ha Hulat kanlan Hebreo ya ampaniwala kan Panginoon Jesus no hinoy nag hulat. Noa, muwang tamo ya nanulat ay mihay ampaniwala kan Panginoon Jesus, ya hi Panginoon Jesus ya habaytoy impangako, ya Mesias, ya Cristo, ya Mámiligtas, ya Anak ni Apo Namalyari, ya mamaala hén ayn angga, haka mam-in biyay ya ayn angga kanlan ampaniwala kana.

Di ha hulat ay ampakhawén nan nanulat ya nakém lan anhulatan na hén ihundo lay paniwala la, gawan main a ampaniwala ya anhumalanghang kanla hén main hadyay pamairap kanla. Hilay habaytoy ampamairap kanla ay ampaniwala ya a ya pon nilumaténg ya Mesias, ya Cristo, ya Mámiligtas, kabay kaatag ya an-êngganan la, alwan hi Panginoon Jesus.

An-ipaihip na kanla ya hi Panginoon Jesus ay Anak ni Apo Namalyari, haka hiya ay ayn kapantag ha hinon anghel, o hinon mámipamwang hén an-ipaihip kanla ni Apo Namalyari. Hi Panginoon Jesus ay inhagili ha pinakapoon pari ta hiyay nag-in mamilatan hén balang miha kan Apo Namalyari hén in-átang nay sarili na ha pamayad hén kasalanan tamo. Hiyay biniyyay oman ni Apo Namalyari, haka gawan kana ay main biyay ya ayn angga ha langit ya balang ampaniwala kana.

### Kabooan hén pinakalaman

Hi Apo Jesu-Cristo ay Anak ni Apo Namalyari 1:1-3

Hi Apo Jesu-Cristo ay matag-ay ha kaganawan anghel 1:4-2:18

Hi Apo Jesu-Cristo ay matag-ay kan apo Moises haka kan Josue 3:1-4:13

Hi Apo Jesu-Cristo ay matag-ay kanlan pinakapoon pari 4:14-7:28

Hi Apo Jesu-Cristo ay mamilatan hén bayoy kahundoan ya mangéd ha manan kahundoan 8:1-9:28

Ya pamiátang ni Apo Jesu-Cristo hén sarili na, ay mangéd ha kaganawan átag 10:1-39

Ya paniwala ya ayn kapantag, payo, haka panaad 11:1-12:29

Ya pamanhumonol ya ampamahigla kan Apo Namalyari 13:1-19

Inhalangin hilay hinulatan 13:20-21

Tawlin habi 13:22-25

### *Impamwang ni Apo Namalyari no hino ya, gawan kan Apo Jesu-Cristo, ya Anak na*

<sup>1</sup> Hén haton lagi, ay panay nan an-ipamwang ni Apo Namalyari ya kalabayan na kanlan ninuno tamo ha mal-at ya paraan, gawan kanlan mámipamwang na. <sup>2</sup> Noa, améhén, ay impamwang nay kalabayan na kantamo gawan ha Anak na. Gawan êt ha Anak na ay dinyag nay kaganawan. Haka ya Anak na ay pinili na hén dyanan hén habayto ngan. <sup>3</sup> Atsi êt kanan Anak ya kapahiléw ya kahampatan haka ya panga-Diyos ni Apo Namalyari. Angkahélék ha Anak no ay-émén ya ugali ni Apo Namalyari. Ya Anak ay ampamaala ha kaganawan ya atsi ha ayri man ya logal ha makapangyarihan ya utoh na. Ya Anak ay nanlinis kantamo ha kasalanan tamo, bayo nag-orong yay na ha langit ha dapit panabtab ni Apo Namalyari hén mamaala hén kalamo na.

*Matag-ay ya tungkulan ni Apo Jesu-Cristo, ya Anak ni Apo Namalyari kanlan tungkulan lan anghel*

<sup>4</sup> Ya Anak ay dinyanan hên tungkulan ya matag-ay ha tungkulan lan anghel. Muwang tamoy habayto gawan “Anak” ya pamaêg kana ni Apo Namalyari, haka “anghel” bat ya pamaêg na kanlan anghel. <sup>5</sup> Minghan man, ay a na hinabi ni Apo Namalyari ha hinon anghel ya hinabi na ha Anak na, ya wana,

“Hika ya Anak ko,  
haka amêhêñ impamwang ko ya hiko ya Tatang mo!”\*  
A na etaman hinabi hên tungkol ha hinon anghel,  
“Hikoy mag-in Tatang na,  
haka hiyay mag-in Anak ko.”†

<sup>6</sup> Haka hên hato, hên marani na yay nan iutoh ya kamiha-mihaan nan Anak ha luta, ay êmén di ya hinabi na hên tungkol kanan Anak,  
“Dapat yan simbaêñ hên kaganawan anghel ko.”

<sup>7</sup> Tungkol etaman kanlan anghel, êmén di ya hinabi na,  
“Hilay anghel etaman ay pan-iutoh kon bêngat. Ha pamaghuyo la kangko ay malyari ko hilan iutoh hên nanad ha pan-iutoh koy angin o apoy.”

<sup>8</sup> Noa, matag-ay ya tungkulan nan Anak, ta ya hinabi ni Apo Namalyari kanan Anak na, ay êmén di,

“O Diyos, ya pamamaala mo ay ayn anggaan,  
haka ampamaala ka, hên main katoynungan.

<sup>9</sup> An-ikahigla mo ya dyag ya main katoynungan,  
noa, angkahêmêkan moy karawakan,  
kabay hiko, ya Diyos mo, ay namili kamo,

hên dinyanan hên kahiglaan, ya igit pon ha kahiglaan hên hinon kalamo mo.”‡

<sup>10</sup> Haka wana êt ni Apo Namalyari hên tungkol ha Anak na,  
“Hên una, ay hika Panginoon ya nanyag hên luta haka langit.

<sup>11</sup> Lumatêng ya allo, ay maanggaan ya habayto ngan,  
noa, hika ay ayn anggaan.

Ya habayto ngan ay mag-in ayn pukat hên nanad ha gulot ya takop.

<sup>12</sup> Itapon mo ya habayto ngan ta hagilyan mina,  
hên nanad ha gulot ya takop.

Noa, hika ay a ampangoman,  
haka a antumoa o matsu man.”§

<sup>13</sup> Minghan man, ay a na hinabi ni Apo Namalyari ha hinon anghel ya hinabi na ha Anak na, ya wana,  
“Mikno ka ha dapit panabtab ko hên mamaala hên kalamo ko,  
angga ha hambutêñ ko hilay kapatsi mo, ta idin ko hila ha aypan kapangyarihan mo.”\*\*

<sup>14</sup> No êmbayro ay hino awud ya tungkulan lan anghel? Hila ay espiritu, ya a tamo mahêlêk, ya ampaghuyo kan Apo Namalyari, ta êmén mahawpan kitamo ya miligtas.

## 2

### *Hi Apo Jesu-Cristo ya pinangubatan hên ayn kapantag ya kaligtasan tamo*

<sup>1</sup> Gawan makapangyarihan ya Anak ni Apo Namalyari ha kaganawan anghel, ay dapat pakapaniwal-an tamo ya kaptêgan ya intoro kantamo, ta êmén a kitamo mipakarayo kanan habaytoy kaptêgan. <sup>2</sup> Pêtêg ya Kautuhan ni Apo Namalyari kanlan ninuno tamo, anghel na man ya namipamwang

\* <sup>1:5</sup> Awit 2:7, Dyag 13:33. † <sup>1:5</sup> 2 Samuel 7:14, 1 Cronica 17:13. ‡ <sup>1:9</sup> Awit 45:6-7. § <sup>1:12</sup> Awit 102:25-27. \* <sup>1:13</sup> Awit 110:1.

hên habayto, ta hilay a hinumonol haka nanalanghang kanlan habayto, ay nakatanggap hên parusa ya hépat kanla. <sup>3</sup> No êmbayro ya nalyari kanla, ay kantamo pon kaya no araén tamoy kaligtasan ya ayn kapantag, ya unan impamwang ni Panginoon Jesus, ya pinaptégan kantamo hên hilay nakagilam ha impamwang na. <sup>4</sup> Haka habaytoy pinaptégan êt hên kapangyarihan ni Apo Namalyari hên hino-hino kay na hên ya kapapaépapah. Pinaptégan na êt hên indin nan Espiritu na hên galing ha balang labay nan dyanan.

*Hi Apo Jesu-Cristo ay nag-in tawo ta êmén na kitamo iligtas*

<sup>5</sup> A na indin ni Apo Namalyari kanlan anghel ya pamaala ha bayon luta ya an-ungkatêñ ko. <sup>6</sup> Ha Kahulatan ya impahulat ni Apo Namalyari, ay êmén di ya nakahulat,

“Apo Namalyari, hino awud hilay tawo ta panay mo hilan ampansinêñ haka anhayhayêñ?

<sup>7</sup> In-aypa moy tungkulan la pon, hên maaypan pérad ha tungkulan lan anghel. Noa, tinalagá mo ya lumatêng ya allo ay ipadayêw haka ipagalang mo hila,

<sup>8</sup> ta iubuh mon idin ha aypa hên kapangyarihan la ya kaganawan dinyag.”\*

Ya labay nan habiêñ hên habaytoy nakahulat, ay ustion iubuh nan idin ni Apo Namalyari ya habayto ha aypa hên kapangyarihan lan tawo, ay taganán iubuh na kanla ya kaganawan dinyag. Pêtêg ya a tamo pon angkahêlêk ya habayto amêhêñ. <sup>9</sup> Noa, muwang tamo ya natupad ya habayto gawan kan Apo Jesus, ya in-aypa pon ya tungkulan hên maaypan pérad ha tungkulan lan anghel hên hiyay nag-in tawo, haka hiyay natsi ta êmén mapatawad ya kasalanan tamo, gawan ha ayn kapantag ya ingangalo ni Apo Namalyari. Haka amêhêñ hiyay dinyag hên ampamaala hên main kapangyarihan haka karangalan gawan habaytoy kamatsan na. <sup>10</sup> Hêpat bat kan Apo Namalyari, ya nanyag hên langit haka luta, haka ampanayhay hên habayto, hên ipadann nay Anak na, hi Apo Jesus, ha kamatsan ta êmén hiyay mag-in Mámiligtas ya taganán ganap. Kabay mal-at ya magétan na ha langit, ya ampaniwala kana.

<sup>11</sup> Gawan hi Apo Jesus ya ampangalíh hên kasalanan lan ampaniwala kana haka hilay an-lihan kasalanan, ay mimihay Tatang, ay a na hilay na anikarêng-éy hên baégén hilan patêl na. <sup>12</sup> Anhabiêñ na kan Apo Namalyari, “Ipamwang kata ha kaganawan patêl ko,

ha pagtsiponan la hên magsimba kamo, ay puriêñ kata!”†

<sup>13</sup> Wana êt,

“Hikoy magtsiwala kan Apo Namalyari.”

Haka wana êt tungkol kanlan nanad patêl na,

“Atsi ko di hên kalamo hilay anak ni Apo Namalyari ya impatsiwala na kangko.”‡

<sup>14</sup> Gawan hilay habaytoy anak ya impatsiwala kana ay tawo, ya main lawini ya panluta ya matsi, ay hiyay nag-in tawo etaman, ta gawan ha kamatsan na, ay mahambut na hi Satanas ya ampanalan hên kapangyarihan hên kamatsan, hên alihêñ ya kapangyarihan na. <sup>15</sup> Ha êmbayro ay nibuhan kitamo ya nanad nag-in ipoh ha kamatsan paubat hên in-anak kitamo, gawan limo tamon matsi. <sup>16</sup> Malinaw ya alwan anghel ya anhawpan na, ta hikitamoy intad kaapo-apoan ni apo Abraham ya anhawpan na. <sup>17</sup> Kabay kailangan hiyay mag-in tawo nanad kantamo, ya patêl na, ta êmén ya mag-in pinakapoon pari tamo, ya maingaloén. Haka ta êmén ya mag-in mapaypaniwal-an ya mámilatan tamo kan Apo Namalyari. Ta ha pangamatsi na, ay hiyay pinarusaan ha ikapagpapatawad hên kasalanan tamo. <sup>18</sup> Haka

\* 2:8 Awit 8:4-6. † 2:12 Awit 22:22. ‡ 2:13 Isaias 8:17-18.

gawan hiyay nagtêêh hên hadyay pamairap ha pamanukso, ay mahawpan na kitamo ha kaganawan tukso ya lumatêng kantamo.

### 3

*Matag-ayya tungkulan ni Apo Jesu-Cristo, ya Anak, kanan tungkulan ni apo Moises, ya tagahuyo*

<sup>1</sup> Patêl ha Panginoon, ya kapareho kon pinili hên mag-in maának ni Apo Namalyari haka hên makilamo kana ha langit, pakaihipên tamo ya in-utoh hi Apo Jesus, ya an-ipamwang tamo, hên mag-in pinakapoon pari ya namiúmang kantamo kan Apo Namalyari. <sup>2</sup> Mahipêg yan nanyag hên tinalagá ni Apo Namalyari, ya namili kana. Mapaypaniwal-an ya hên nanad kan apo Moises ya mapaypaniwal-an hên namaala ya kanlan ninuno tamon Israelita, ya pamilya ni Apo Namalyari. <sup>3</sup> Noa, matag-ay ya tungkulan ni Apo Jesus, kanan tungkulan ni apo Moises, hên nanad ha dapat igit dayêwên ya nanyag bali kanan bali ya dinyag na. <sup>4</sup> Gawan kaganawan bali ay main nanyag, haka muwang tamo ya hi Apo Namalyari ya nanyag hên balang hino. <sup>5</sup> Hi apo Moises, ay mapaypaniwal-an ha pamanayhay na ha pamilya ni Apo Namalyari, hiyay tagahuyo ni Apo Namalyari, noa, ya dinyag na ay alimbawan bat ha ipamwang ni Apo Namalyari lumatêng ya allo. <sup>6</sup> Noa, hi Apo Jesu-Cristo etaman, ay Anak ni Apo Namalyari, ya mapaypaniwal-an ha pamamaala ha pamilya ni Apo Namalyari. Haka hikitamoy kalamo ha maának na no nananiêh ya paniwala tamo kana, haka no a tamo ikarêng-êy ya habaytoy paniwala.

*Main pagpainawaan ha lokop ni Apo Namalyari*

<sup>7</sup> Kabay kailangan tamon pansiñen ya hinabi ni Apo Namalyari ya impahulat nan Espiritu na, ya wanana hulat,  
“No nagilam yo amêhêh ya hinabi ko,

<sup>8</sup> ay a yoy na pakdêyêh ya ulo yo, hên nanad kanlan ninuno yo,  
ya nanalanghang hên nanubuk kangko hên atsi hila ha logal ya kabalah-balahan.

<sup>9</sup> Panay la kon ansubukan hên hilay ninuno yo,  
angkahêlêk la man ya kapapaêpapah ya dinyag ko ha ikakangêd la ha apatapo  
ya taon.

<sup>10</sup> Kabay nagkamain akon huluk kanlan habayto,  
haka wangko ha sarili ko, ‘panay hilan ampagdayo kangko,  
haka a la anhonolêh ya hinon in-utoh ko kanla.’

<sup>11</sup> Kabay ha hadyay huluk ko kanla, ay inhumpa ko,  
ya taganán a hilay na makahowêh ha pagpainawaan ya in-il-an ko.”\*

<sup>12</sup> Hikaw ya patêl ko ha Panginoon, illagan yoy nakêm yo ha karawakan, ta êmêh a kaw midayo ha paniwala yo kan Apo Namalyari, ya angkabiyay hên magpa ayn angga. <sup>13</sup> Ya dapat yon daygêh, ay mipagpakhawan kaw hên paniwala ha miha ta miha hên allo-allo kaban main pon panaon, ta êmêh ayn miha man kamoyu ya manalanghang kan Apo Namalyari gawan ha natukso yan nanyag kasalanan. <sup>14</sup> Dapat yon daygêh ya habayto, gawan hikitamo ay main pamakilamo kan Apo Jesu-Cristo, no nakataniêh ya paniwala tamo kana hên angga ha anggaan biyay tamo.

<sup>15</sup> Omanêh tamon ihipêh ya impahulat ni Apo Namalyari, ya wanana Kahulatan,

“No nagilam yo amêhêh ya hinabi ni Apo Namalyari,  
ay a yoy na pakdêyêh ya ulo yo, hên nanad kanlan ninuno yo,

\* **3:11** Awit 95:7-11.

ya nanalanghang kan Apo Namalyari hên atsi hila ha legal ya kabalah-balahan.”

<sup>16</sup> Hino awud hilay habaytoy nakagilam habi ni Apo Namalyari, noa, nanalanghang kana? Hila ay ayn kaatag no alwan hilay in-awah ni apo Moises ha bansen Egipto! <sup>17</sup> Haka hino hilay habaytoy namahuluk etaman kan Apo Namalyari hên apatapo ya taon? Hila ay ayn kaatag no alwan hila êt ya nanyag kasalanan, haka natsi ha kabalah-balahan! <sup>18</sup> Haka hino hilay habaytoy inhumpa ni Apo Namalyari ya a hila makahowêñ ha pagpainawaan ya in-il-an na? Hila ay ayn kaatag no alwan hila êt ya a hinumonol kana! <sup>19</sup> Kabay malinaw ya a hila nakahowêñ ha pagpainawaan ya in-il-an na, gawan ayn hilan paniwala kana.

## 4

### *Ya pagpainawaan ya impangako ni Apo Namalyari ha lokop na*

<sup>1</sup> Amêhêñ, habaytoy pagpainawaan etaman ha lokop ni Apo Namalyari, ya impangako na, ay makahowêñ kitamo pon bayro. Kabay kaillag kitamo ta êmêñ ya balang miha kamoyu ay makalatêng bayro ha pagpainawaan. <sup>2</sup> Ta hikitamo man, ay nakagilam hên mangangêd ya habi ya tungkol ha pagpainawaan nanad kanlan ninuno. Noa, a la pinakinabangnan ya nagilam la, gawan a la pinaniwal-an. <sup>3</sup> Ta hikitamo ya naniwala kan Apo Namalyari, ay makahowêñ bayro ha pagpainawaan na. Muwang tamoy habayto, ta makwa tamo ha hinabi na di, ya tungkol kanlan a naniwala, ya wana,

“Ha hadyay huluk ko kanla, ay naghumpa ko,

ya taganán a hilay na makahowêñ ha pagpainawaan ya in-il-an ko.”

Hinabi nay habayto, agyan nakal-an ya pagpainawaan na paubat hên nayari nay na ya pamanyag hên boon luta. <sup>4</sup> Gawan main yan impahulat hi Apo Namalyari ha Kahulatan na ya tungkol ha ikapiton allo, ya êmêñ di, “Haka ha ikapiton allo ay nagpainawa hi Apo Namalyari hên nayari nay na ya pamanyag hên kaganawan dinyag na.”\* <sup>5</sup> Omanêñ tamon ihipêñ ya impahulat ni Apo Namalyari, ya wanana hulat,

“Taganán a hilay na makahowêñ ha pagpainawaan ya in-il-an ko.”

<sup>6</sup> Hilay unan nakagilam hên mangangêd ya habi ya tungkol ha pagpainawaan ni Apo Namalyari, ay a nakahowêñ gawan ha pamanalanghang la. Embayro man, ay labay ni Apo Namalyari ya main makahowêñ ha pagpainawaan ya in-il-an na. <sup>7</sup> Kabay hên nakalabah hên nabuyot ya panaon, ta panaon ana lan Arin David, ay andyanan na pon ni Apo Namalyari hilay angkabiyay hên habayto hên panaon hên makahowêñ ha pagpainawaan na. Muwang tamoy habayto, ta makwa tamo ha impahabi na kan Arin David, ya wana, “Amêhêñ.” di ha habi ya inungkat kina, ya wanana habi,

“Amêhêñ, no nagilam yoy hinabi ni Apo Namalyari,

ay a yoy na pakdêyêñ ya ulo yo.”

<sup>8</sup> Ya bansen Canaan ya pinaylakwan ni Josue kanlan ninuno tamon Israélita, ay alwan habaytoy pagpainawaan ya impangako ni Apo Namalyari, ta no habayto dayi ya legal, ay a yay na nangungkat hi Apo Namalyari hên kaatag pon ya panaon. <sup>9</sup> Ha maparah ya habi, ay main nakal-an ya pagpainawaan para kanlan ampaniwala kan Apo Namalyari nanad ha pagpainawaan na ha ikapiton allo. <sup>10</sup> Ta hilay makahowêñ ha pagpainawaan na, ay makapagpainawa ha dyag la hên nanad kana. <sup>11</sup> Kabay maka-pakikwanan tamo hên makahowêñ bayro, ta êmêñ a kitamo mag-in nanad kanlan unan a makahowêñ gawan a la hinonol ya kalabayan ni Apo Namalyari.

\* <sup>4:4</sup> Genesis 2:2.

<sup>12</sup> Ta ya habi ni Apo Namalyari, ay nanad angkabiyay, ya madyag ngan ya dapat daygén hén main kapangyarihan. Ya anhabien na ay nanad êtak ya napikapaka ya ngalab, ya ayn kapantag ya tarém, ya ampakataloh ha pilngoaan haka uték hén but-o. Habaytoy habi na ay ampakataloh ha nakém haka ihip ta ampakaawah yan an-ihipén tamo haka hén labay tamon daygén. <sup>13</sup> Ayn hinoman ya makapagtago kan Apo Namalyari, gawan mambatol ya balang miha ha hélék na, haka pakibatan tamo kana ya kaganawan dinyag tamo.

### *Hi Apo Jesu-Cristo ay pinakapoon pari ya ayn kapantag*

<sup>14</sup> Magpaketaniêh kitamo ha paniwala tamo ya an-ipamwang tamo, gawan hi Apo Jesus, ya Anak ni Apo Namalyari, ay pinakapoon pari† ya ayn kapantag, ya atsi yana ha langit ha ampaidyanan ni Apo Namalyari. <sup>15</sup> Main kitamon pinakapoon pari ya taganán ampandámay hén mangéd kantamo ta nadanasan na ya hinon tukso hén nanad ha tukso ya lumaténg kantamo, noa, hiya ay taganán a natukso hén nanyag kasalanan. <sup>16</sup> Kabay a kitamina mag-alangan hén pakarani kan Apo Namalyari ya maingaloén, ta êmén na kitamo maingalwan hén mahawpan ha oras hén mangailangan kitamo.

## 5

<sup>1</sup> Kantamon Israelita, ya balang pinakapoon pari tamo, ay ampilién ni Apo Namalyari kanlan kapareho tamo, ta habaytoy pinakapoon pari ay mámilatan tamo, ya ampam-in pahalamat haka ampamiátang ta êmén mapatawad ya kasalanan. <sup>2</sup> Hiyay ampandámay hén mangéd kanlan nakadyag kasalanan, gawan hiya man ay tawon bat ya main pamagkulang kan Apo Namalyari. <sup>3</sup> Kabay hiya man, ay ampam-i êt hén átang para ha sarili nan kasalanan, alwan bat para ha kasalanan lan kaatag. <sup>4</sup> Haka ya mag-in pinakapoon pari ay ampilién ni Apo Namalyari, hén nanad ha pamili na kan Aaron ya unan pari tamon Israelita. Alwan pinakapoon pari ya ampamili hén sarili na hén dyanan karangalan hén mag-in pinakapoon pari.

<sup>5</sup> Embayro êt hi Apo Jesu-Cristo, ay a namili hén sarili na hén dyanan karangalan hén mag-in pinakapoon pari, ta hi Apo Namalyari ya namili kana, haka naghabi kana, ya wana,  
“Hika ya Anak ko,

haka amêhén impamwang ko ya hiko ya Tatang mo!”\*

<sup>6</sup> Bayo impahulat na êt ni Apo Namalyari ha Kahulatan ya,  
“Ya pangapari mo ay ayn angaan,

hén nanad ha pangapari ni Melquisedec ya ayn angaan.”†

<sup>7</sup> Hén atsi ya pon di ha luta hi Apo Jesus, ay nakiingalo yan nanalangin kan Apo Namalyari, ya makapiligtas kana ha kamatsan. Ha panalangin nan boon nakém, ay in-ikhaw nay habi na hén main kalamoy hadyay tangih, haka nagilam ya panalangin na, gawan ha pagpakaaypan nakém na ha pamanhumonol kan Apo Namalyari. <sup>8</sup> Anak ya man ni Apo Namalyari, ay gawan ha hadyay kairapan ya dinanan na, ay naintindihan na ya labay habiên hén mag-in mahonol. <sup>9</sup> Haka gawan ayn pamagkulang ha pamanhumonol na ha impadyag kana ni Apo Namalyari, ay hiyay nag-in ampangubatan hén ayn anggay kaligtasan lan kaganawan ya ampanhumonol kana, <sup>10</sup> gawan hiyay pinili ni Apo Namalyari hén mag-in pinakapoon pari hén nanad ha ayn angga ya pangapari ni Melquisedec.

### *Kaillag kitamo ta kayno matalibatokan tamoy paniwala tamo*

† 4:14 Hebreo 2:17. \* 5:5 Awit 2:7, Dyag 13:33, Hebreo 1:5. † 5:6 Awit 110:4.

<sup>11</sup> Mal-at pon dayi ya labay naêñ habiêñ kamoyu ya tungkol ha pangapari ni Apo Jesu-Cristo haka ya pangapari ni Melquisedec, noa, mairap hêñ ipalinaw ya habayto kamoyu, ta nanad ayn nanan anhumwêñ ha ihip yo. <sup>12-13</sup> Ha kaptêgan, ay nabuyot kaw nan ampaniwala, kabay dapat dayi, ay maaralan yoy nay kapareho yo, noa, angga amêhêñ kailangan yo pon êt hêñ patoro ha unan intoro kamoyu ubat ha habi ni Apo Namalyari. Ya kaalimbawaan yo ay anak ya ampanoho pon ya a ampakagatgat hêñ mantêg pamangan. Ya labay habiêñ ya a yo pon mamwangan no hinoy mangêd ya dyag haka no hinoy narawak ya dyag. <sup>14</sup> Ta ya malalê ya toro ya maialimbawa ha mantêg ya pamangan ay para kanlan manakêm, ta nalémaw hilay nan mamili no hinoy mangêd ya dyag haka mamalay hêñ mangara ha alwan mangêd ya dyag.

## 6

<sup>1</sup> Kabay a tamina orongêñ bat ya unan intoro kantamo ubat ha habi ni Apo Namalyari ya tungkol kan Apo Jesu-Cristo, noa, paulayan tamo hêñ mapahanan ya pamangintindi tamo ta êmêñ kitamo mag-in manakêm. Alwa taminan piorong-orongan hêñ pag-aralan bat ya unan intoro kantamo, ya dapat paghêhêan hêñ talibatokan ya pamanyag hêñ ayn pukat haka dapat maniwala kan Apo Namalyari, <sup>2</sup> haka ya toro ya tungkol ha pamawtismo, ya paypalunto hêñ gamêt no ihalangin hilay binawtismoan, ya pangoman mabiyay hêñ hilay natsi, haka ya parusa ya ayn anggaan. <sup>3</sup> Kabay ha hawop ni Apo Namalyari, ay pahanan tamo ya kamwangan tamo ya tungkol ha paniwala kan Apo Jesu-Cristo.

<sup>4</sup> Ta hilay nanalibokot ha unan intoro kanla ay ahina makaorong hêñ maniwala kan Apo Jesu-Cristo. Mana hilay nan nahawangan hêñ Espiritu ni Apo Namalyari haka nadanasan lay nay kapangyarihan na haka ya ayn kapantag ya ingalo na. <sup>5</sup> Naranasan la êt no ay-êmêñ kakangêd ya habi ni Apo Namalyari haka ya kapangyarihan na ya iubuh nay nan ipamwang lano. <sup>6</sup> No tinalibatokan lay habayto, ay a hilay na makaorong kan Apo Jesu-Cristo, ta nanad ha impako la yan oman ha koros hêñ impakarêng-êy ha arapan hêñ kal-atan.

<sup>7</sup> An-ingalwan ni Apo Namalyari ya hilay ampaniwala, ya nanad luta ya panay angkauranan, haka angkatuboan hêñ kal-atan tanaman ya mapakin-abangnan. <sup>8</sup> Noa, no antumabon ya habaytoy luta hêñ tanyuong haka kinêw ya nipagdiwi, ay ayn yan pukat. A mabuyot ay ihumpa ya habayto bayo ulamêñ. Êmbayro êt ay parusaan ni Apo Namalyari hilay nanad hatoy luta ya antumabon.

<sup>9</sup> Anlugarûn naêñ patêl, êmbayro man ya pamanulat naêñ, ay angkasigurado naêñ ya a malyari kamoyu ya êmbayro, ta madyanan na kaw ni Apo Namalyari hêñ ikakangêd yo, ya an-idin na kanlan atsi ha dann hêñ kaligtasan. <sup>10</sup> Taganán makatoynungan ya. A na liwaan ya dinyag yo ha ikakangêd na, haka ya pamanlugud yo kana, ya impahlêk yoy na, haka ya an-ipahlêk yo angga amêhêñ ha pamanawop yo ha kapareho yon pinili na hêñ mag-in kana. <sup>11</sup> Labay-labay naêñ dayi hêñ mahêlêk ha balang miha kamoyu ya ihundo yoy habaytoy pamanlugud yo angga ha anggaan, ta êmêñ sigurado yon matanggap ya an-êngganan yo. <sup>12</sup> A naêñ labay ya mag-in mabarog kaw ha pamanhumonol kana, ta labay naêñ hêñ totoën yo hilay naniwala haka nagtêêh, ya hilay makatanggap hêñ impangako na.

### *Ya impangako ni Apo Namalyari ay sigurado*

<sup>13</sup> Hêñ nangako ya hi Apo Namalyari kan apo Abraham, ay nanumpa ya ha sarili na ya tuparêñ nay habayto gawan ayn makapangyarihan kana. <sup>14</sup> Wani

Apo Namalyari kan apo Abraham, “An-ipangako ko kamo ya ingalwan kata haka pakal-atên ya mag-in kaapo-apoan mo.”\* <sup>15</sup> Hi apo Abraham ay nagtêêh hên nangênggan hên angga ha natanggap nay habaytoy impangako kana. <sup>16</sup> No hikitamoy ampanumpa, ay ampanggamit kitamon langan hên mihay makapangyarihan kantamo, haka no main manumpa, ay sigurado ya habayto. <sup>17</sup> Embayro êt, hên nangako ya hi Apo Namalyari kan apo Abraham, ay nanumpa ya, ya tuparêñ nay habayto. Dinyag nay habayto, ta êmén na maipahlêk kanlan pinangakoan na, ya a ampangoman ya anhabiên na. <sup>18</sup> Atsi kantamo ya pangako na haka ya humpa na, ya a maoman gawan a ya ampaglaram. Kabay malyarin mag-in makhaw ya nakêm tamo ya tampol hên nagpahawop kana, hên nangênggan ha impangako na kantamo. <sup>19</sup> Habaytoy an-êngganan tamo kana, ay ampamataniêh hên paniwala tamo. Ta ya paniwal-an tamo ay hi Apo Jesus ya nanad nakadann ana ha pinagpênlan bayro ha Pinakabanal ya Kuwarto ha Templo ha langit ha arapan ni Apo Namalyari. <sup>20</sup> Nuna yay na bayro hi Apo Jesus hên nag-in mámilatan tamo kan Apo Namalyari ta hiyay nag-in pinakapoon pari hên ayn anggaan, hên nanad ha pangapari ni Melquisedec.

## 7

### *Ya tungkol kan Melquisedec ya pari ni Apo Namalyari*

<sup>1</sup> Hi Melquisedec\* etaman, ay ari ha balayan Salem haka pari ni Apo Namalyari. Hêñ haton lagi, hêñ ubat hilan apo Abraham hêñ nanambut kanlan apat ya ari, ay hi Melquisedec ya nanupa kana haka inhalangin na ya, ya ingalwan na ya ni Apo Namalyari. <sup>2</sup> Bayo indin ni apo Abraham kan Melquisedec ya ikamapo hêñ nakwa na kanlan ari ya nahambut na. (Ya labay habiên hêñ langan Melquisedec, ay “Ari hêñ Katoynungan.” Ya labay habiên hêñ Salem ay “kapatêkbêkan.” Gawan hiyay ari ha balayan Salem, ay hiyay “Ari hêñ Kapatêkbêkan” etaman.) <sup>3</sup> Ayn inungkat hêñ tungkol ha toa haka ninuno na. A êt inungkat no nakano yan in-anak o no nakano yan natsi. Ya pangapari na ay nanad ha pangapari nan Anak ni Apo Namalyari ya ayn angaan.

<sup>4</sup> Ihipêñ tamo ya matag-ay ya tungkulon ni Melquisedec, ta hi apo Abraham man, ya ninuno tamo, ay nam-i kana hêñ ikamapo ha nakwa na kanlan ari ya nahambut na. <sup>5</sup> No kaapo-apoan ni Levi dayi hi Melquisedec, ay maparah tamon maintindihan no awta hiyay dinyanan hêñ ikamapo ni apo Abraham. Ta hikitamoy Israelita, ay anhumonol ha utoh ya dapat kitamon mam-i hêñ ikamapo ha angkapopol tamo, haka ha kaganawan pinagpagalan tamo, kanlan kaapo-apoan ni Levi ya magpari kantamo, pare-pareho kitamo man kaapo-apoan ni apo Abraham. <sup>6</sup> Noa, hi Melquisedec, ay alwan kaapo-apoan ni Levi, êmbayro man, ay hiyay dinyanan ni apo Abraham hêñ ikamapo. Haka hiyay nanalangin ya ingalwan ni Apo Namalyari hi apo Abraham agyan hi apo Abraham, ya pinangakoan ni Apo Namalyari hêñ hato. <sup>7</sup> Muwang tamo ya matag-ay ya tungkulon nan ampanalangin kanan an-ihalangin na. Bayro tamo mamwangan ya matag-ay ya tungkulon ni Melquisedec kanan tungkulon ni apo Abraham. <sup>8</sup> Haka hilan kaapo-apoan ni Levi ya andyanan hêñ ikamapo, ay angkamatsi. Noa, hi Melquisedec etaman, ay nanad angkabiyay ya pon, gawan ayn kitamon mabáha ha habi ni Apo Namalyari ya hiya ay natsi. <sup>9</sup> Malyari êt habiên ya hilan Levi ya ampananggap hêñ ikamapo, ay nanad kalamo ni apo Abraham hêñ nam-in ikamapo kan Melchizedec, <sup>10</sup> ta

\* **6:14** Genesis 12:4, 22:16-17, 25:26. \* **7:1** Genesis 14.

hi Levi ay kaapo-apoan ni apo Abraham, haka a ya pon in-anak hēn nam-i yan ikamapo kan Melchizedec hi apo Abraham.

*Ya pangapari ni Panginoon Jesu-Cristo, ay nanad ha ayn anggay pangapari ni Melquisedec*

<sup>11</sup> Ha pam-i ni Apo Namalyari hēn Kautuhan kanlan ninuno tamon Israelita, ay tinalagá na ya hilay kaapo-apoan ni Levi ay mamaala ha pamiátang kana. Noa, ya pamiátang la ha pangapari la, ay a makapakangēd hēn tawo. Kabay kailangan lay pari, ya nanad ha pangapari ni Melquisedec, alwa hēn nanad ha pangapari ni Aaron ya kaapo-apoan ni Levi. <sup>12</sup> Haka no kailangan hēn hagilyan ya pangapari, ay kailangan êt hēn hagilyan ya Kautuhan tamon Israelita. <sup>13-14</sup> Muwang tamo ya nahagilyan ya habaytoy pangapari gawan hi Panginoon Jesu-Cristo ya inhagili ni Apo Namalyari ha pangapari lan kaapo-apoan ni Levi, ay alwan kaapo-apoan ni Levi ta hiyay kaapo-apoan ni Juda. Haka ayn yan hinabi hi apo Moises ya main kaapo-apoan ni Juda ya mag-in pari bayri ha luta.

<sup>15</sup> Nag-in malinaw ya hinagilyan ya manan pangapari, hēn nilumatēng ya kaatag ya pari ya nanad kan Melquisedec. <sup>16</sup> Habaytoy pari ay pinili hēn alwan gawan ha ninuno na, ha pamanhumonol ha Kautuhan. Noa, hiyay pinili gawan ha kapangyarihan na hēn hinambut nay kamatsan. Hiyay alwan kaatag no alwa hi Panginoon Jesus. (Haka ya habaw hēn ubas etaman ya ampihipwak, ay alwan kaatag no alwa ya daya ya in-alimbawa ha habaw hēn habaytoy ubas.) <sup>17</sup> Ta êmēn di ya impahulat ni Apo Namalyari ya tungkol kana,

“Hika ya mihay pari ya ayn anggaan,  
hēn nanad ha pangapari ni Melquisedec ya ayn anggaan.”

<sup>18</sup> Kabay hinagilyan ya manan utoh hēn tungkol ha pangapari ni Levi gawan habayto ay main pamagkulang. Haka habaytoy utoh ay <sup>19</sup> a nakapakangēd hēn tawo ha hēlēk ni Apo Namalyari. Noa, gawan kan Panginoon Jesus ya inhagili ha pangapari lan kaapo-apoan ni Levi ay ampakarani kitamina kan Apo Namalyari hēn ayn pamagkulang ha hēlēk na.

<sup>20-21</sup> Ya pangapari lan kaapo-apoan ni Levi, ay ayn kalamoy pangako. Noa, ya pangapari ni Panginoon Jesus ay main kalamoy humpa ni Apo Namalyari, gawan wani Apo Namalyari,

“Hiko ya Panginoon ya nangako,  
haka a mangoman ya ihip ko,

‘Hika ay pari hēn ayn anggaan!’ ”†

<sup>22</sup> Kabay hi Panginoon Jesus ay nag-in kasiguradoan hēn bayoy kahundoan ni Apo Namalyari ha tawo ya mangēd ha unan kahundoan.

<sup>23</sup> Haka mal-at ya kaapo-apoan ni Levi ya honol-honol hēn nag-in pari gawan hila ay tawo bat ya main anggaan ya biyay. <sup>24</sup> Noa, ya pangapari ni Panginoon Jesus ay ayn angga, ta hiyay angkabiyay hēn ayn angga.

<sup>25</sup> Gawan a ya matsi hi Panginoon Jesus, ay ayn angga ya kapangyarihan na hēn mamiligtas kanlan ampaniwala ya hiyay makapaidani kanla kan Apo Namalyari. Gawan hiyay ampamiyay hēn ayn angga hēn ampakihabi kan Apo Namalyari hēn para kantamo.

<sup>26</sup> Kabay hiyay pinakapoon pari ya kailangan tamo ya banal, ya taganán ayn kapintasan. Hiyay alwan nanad kantamo ya makasalan, haka hiyay dinyanan kapangyarihan ya ayn kapantag ha langit. <sup>27</sup> Hiyay alwan nanad kanlan pinakapoon pari ya ampamiátang hēn allo-allo, hēn para ha sarili

† **7:20-21** Awit 110:4.

lan kasalanan, haka para ha kasalanan lan kaatag. Ta minghan nan bat in-átang ya sarili na para ha kasalanan tamo, haka hukad ya habayto. Ahina hén kailangan omanén o pahanan pon ya habayto. <sup>28</sup> Ha pamanhumonol ha Kautuhan ni apo Moises, ay tawon bat, ya main pamakgkulang kan Apo Namalyari ya pinili hén mag-in pinakapoon pari. Noa, gawan ha bayoy kahundoan ni Apo Namalyari ya main humpa, ay pinili nay Anak na hén mag-in pinakapoon pari, ya banal hén angga-angga.

## 8

### *Hi Apo Jesu-Cristo ya mamilatan ha bayoy kahundoan ni Apo Namalyari ha tawo*

<sup>1</sup> Habaytsi ya maalagá ya labay naén hén mamwangan yo: ha dapt panabtab ni Apo Namalyari ha langit, ay main kitamon banal ya pinakapoon pari ya ampamaala hén kalamo ni Apo Namalyari. <sup>2</sup> Yabay ya hi Apo Jesus ya pinakapoon pari ya ampaghuyoy na ha mantèg pagsimbaan ha langit ya dinyag ni Apo Namalyari, alwan tawo.

<sup>3</sup> Di ha luta, ya balang pinakapoon pari, ay main tungkulan hén mam-in digalo haka mamiátang kan Apo Namalyari, ta êmén mapatawad ya kasalanan. Kabay kailangan ni Panginoon Jesus, ya pinakapoon pari tamo, hén main yan iátang.\* <sup>4</sup> Noa, ya pangapari na ay alwan bayri ha luta, ta no atsi ya pon dayi di ha luta, ay alwa yan pari, gawan main nanan pari ya ampamiátang bayri ha pamanhumonol ha Kautuhan ni apo Moises. <sup>5</sup> Ya pamaghuyo la ay atsi ha pagsimbaan ha luta, ya nanad aninon bat hén mantèg pagsimbaan kan Apo Namalyari ha langit. Ta hén ipairêng na dayi ni apo Moises ya toldan pagsimbaan di ha luta, ay impapaka-utoh kana ni Apo Namalyari, ya wana, “Sakto mon ipairêng ya impahlék ko kamo bayro ha tawtug.”† <sup>6</sup> Noa, ya pamaghuyo ni Apo Jesus ay mangéd ha pamaghuyo lan kaapo-apoan ni Levi, gawan hi Apo Jesus, ay mamilatan ha bayoy kahundoan ni Apo Namalyari ha tawo. Ya bayoy kahundoan ay mangéd ha unan kahundoan haka main yan kalamoy pangako ya mangéd ha unan pangako.

<sup>7</sup> No ayn dayin pamakgkulang ya unan kahundoan, ay ahina dayi hén kailangan hén hagilyan hén bayo ya habayto. <sup>8</sup> Noa, impamwang ni Apo Namalyari ya main pamakgkulang ya hilay Israelita ha pamanhumonol ha unan kahundoan, ta wana,

“Lumatêng ya allo, ay manyag akon bayoy kahundoan kanlan kaapo-apoan ni apo Jacob, hilay ampaidi ha Israel haka hilay ampaidi ha Juda.

<sup>9</sup> Habaytoy alwan nanad ha kahundoan ko ha ninuno la, hén inligtas ko hila ha pangaipoh la ha bansan Egipto.

A la hinonol ya kahundoan naén, kabay pinaulayan ko hilay na.

<sup>10</sup> Habaytsi ya mag-in kahundoan ko kanlan Israelita, lumatêng ya allo, ay itaném koy utoh ko ha ihip la, ta êmén habaytoy nay labay lan honolén.

Hikoy mag-in Diyos la,  
haka hilay mag-in anak ko.

<sup>11</sup> A lay na kailangan hén miaaral.

A lay na êt hén kailangan hén habiên ha kapareho la, ya ‘Dapat mon kilalaén ya Panginoon, ya hiyay Diyos.’

Ta kanan habayto ay maubuh hilan makamwang kangko, hinoman ya tungkulon la ha biyay.

\* <sup>8:3</sup> Hi apo Jesus etaman, ay alwan ayop ya in-átang na, ta indin nay lawini na. Mabáha ya habayto ha Hebreo 9:12. † <sup>8:5</sup> Exodo 25:40.

**12** Ta patawarêñ ko hila ha pamanyag lan karawakan, haka liwaan koy kasalanan la.”‡

**13** Ha pangungkat ni Apo Namalyari hên bayoy kahundoan, ay labay habiêñ, ayn nanan pukat ya unan kahundoan, gawan habayto ay maranin maplak.

## 9

### *Ya pagsimbaan bayri ha luta haka ha langit*

**1** Ha unan kahundoan ni Apo Namalyari, ay mal-at ya patakaran no ay-êmén ya pamagsimba kana, haka tungkol ha tolda ya pagsimbaan kana.

**2** Habaytoy toldan pagsimbaan, ay main loway kuwarto ya pinagpênlan ya ilwangan. Ya unan kuwarto ya howênen, ay ambaêgêñ Kuwarto ya Banal. Atsi bayro ya paybul-ihan solo, haka ya lamisa ya nag puto, ya in-átang kan Apo Namalyari. **3** Main makogpaw ya takop ya pinagpênlan bayro ha ikalwan kuwarto ya pagsimbaan ya atsi ha pinakalalê, ya ambaêgêñ Kuwarto ya Pinakabanal. **4** Atsi bayro ya gintoy paybul-ihan\* hên paypaahukan hên pabango ha pamagsimba kan Apo Namalyari. Atsi êt bayro ya Baol hên Kahundoan, ya nilatopan hên ginto. Bayro ha lalêñ Baol ay nag silyaw ya dyag ha ginto ya nag ïaman hên habaytoy pamangan ya ubat ha langit ya ambaêgêñ manna. Atsi êt bayro ha Baol ya têkêñ ni Aaron ya nanlanubu, haka ya pinipakay bato ya pinamidukitan hên Kautuhan ni Apo Namalyari.

**5** Ha babo hên takap hên habaytoy Baol, ay main impairêng ya nanad loway anghel† ya nag pakpak, ya pamaptêg ya atsi bayro hi Apo Namalyari. Angkahalokoban hên pakpak la ya takap hên habaytoy Baol, ya legal ya pamakikwaan ingalo. Noa, a naêñ pon iubuh hên maipalinaw ya habayto di ha hulat amêhêñ.

**6** Embayro ya pangadyag ha lalêñ tolda ya pagsimbaan kan Apo Namalyari. Allo-allo hilan hinumwêñ ha unan kuwarto hilay pari ta bayro lan andaygêñ ya tungkul lan magsimba. **7** Noa, ya pinakapoon pari bat ya nakahowêñ ha ikalwan kuwarto haka minghan bat ha mihay taon. A ya nakahowêñ no ayn yan anggêtan hên daya hên ayop ya iátang, ta êmén kikwan patawad ha kasalanan na, haka kasalanan nan kapareho nan Israelita, ya a la tinalagá. **8** Ha êmbayro, ay an-ipalinaw nan Espiritu ni Apo Namalyari, ya ayn bat ampakaarap kan Apo Namalyari no a maoman ya unan utoh hên tungkol ha pagsimbaan. **9** Habaytoy toldan pagsimbaan ha luta ay mapangwaan tamon aral amêhêñ. Habaytoy pam-in digalo haka pangiátang ta êmén mapatawad ya kasalanan lan nakadyag kasalanan, ay a makapatêkbék hên nakêm lan ampagsimba gawan a hila makaalih hên kasalanan. **10** Habaytoy utoh ay panay tungkol bat hên lawini hên nanad ha hinoy bawal hên tungkol ha pamangan, inêmén haka pamaglinis hên lawini. Habaytoy dapat honolêñ angga ha a pon indin ni Apo Namalyari ya bayoy kahundoan.

**11** Noa, amêhêñ nilumatêng hi Apo Jesu-Cristo, hên nag-in pinakapoon pari tamo haka magbêlêkêbék ha bêkê tamo ya kangêran ya ubat ha bayoy kahundoan. A ya ampaghuyo ha pagsimbaan lan ninuno, ta atsi yay na ha langit ha mantêg pagsimbaan kan Apo Namalyari. Habaytoy mangêd ha pagsimbaan lan ninuno gawan a ya dinyag hên tawo haka ayn ya di ha luta ta atsi ya bayro ha langit. **12** Ya pamanhumwêñ na bayro ay minghan bat, haka alwan gawan ha daya hên kambing o biseron baka, noa, ha sarili nan daya,

‡ 8:12 Jeremias 31:31-34. \* 9:4 Hêlkêñ ha panlêkan labay habiêñ hên habi. † 9:5 anghel: ya nakahulat ay kerubin. Hêlkêñ ha panlêkan labay habiêñ hên habi.

ya pamayad hēn parusan kasalanan tamo ta êmēn kitamo miligtas hēn angga-angga. <sup>13</sup> Main pukat ya inwihik ya daya hēn kambing, baka haka abo hēn in-ulam ya biseron baka, ya inwihik ha ninuno tamo. Habaytoy nakalinis kanla ha kaganawan dinyag lay nakarêmēk kanla, ta êmēn matanggap ni Apo Namalyari ya pamagsimba la.‡ <sup>14</sup> Noa, taganán makapangyarihan ya daya ni Apo Jesu-Cristo kanan daya lan habaytoy ayop. Awo, gawan bay, ha kapangyarihan nan Espiritu ni Apo Namalyari, ya ampamiyay hēn ayn angga, ay indin ni Apo Jesu-Cristo ya biyay na, ya ayn kapintasan. Habaytoy daya na ay nakalinis hēn nakêm tamo ha kaganawan dinyag tamo ya ayn pukat. Kabay makapagsimba kitamo kan Apo Namalyari ya angkabiyay.

<sup>15</sup> Kabay hi Apo Jesu-Cristo ay mamilatan bayro ha bayoy kahundoan ni Apo Namalyari ha tawo, ta êmēn hikitamoy pinili ni Apo Namalyari hēn mag-in kana, ay madyanan biyay ya ayn anggaan. Habaytoy malyari gawan ha pangamatsi na, ya nangakbus kantamo ha parusa hēn kasalanan tamo, ya a kitamo hinumonol ha unan kahundoan.

<sup>16</sup> Habaytoy nanad ha mihay mabandi ya main hulat no hinoy pamibagan nan pibandian na no matsi ya. Ayn makinabang hēn habayto angga ha mapaptēgan ya natsi yay nay mabandi, <sup>17</sup> ta habaytoy hulat ay ayn pukat kaban angkabiyay pon ya mabandi. <sup>18</sup> Embayro êt ha unan kahundoan, main pinatsi, bayo nagkamain alagá ya habaytoy kahundoan.§ <sup>19</sup> Alimbawa hi apo Moises hēn naipamulah nay Kautuhan kanlan kapareho nan Israelita, ay nangwa yan daya hēn kambing haka biseron baka ya pinatsi la, bayo pinahanan nan lanêm. Nangwa yan naorit ya habot tupa ya impêtêh na ha yagaw hēn isopo haka na indêrê ha daya ta inwihik na ha tawo haka ha naka-tsili-tsili ya papel ya pinangihulatan hēn Kautuhan. <sup>20</sup> Kaban andaygên nay habayto ay wani apo Moises, “Hata daya ay pamaptêg ya maalagá ya hata kahundoan ya an-ipahonol kamoyu ni Apo Namalyari.” <sup>21</sup> Winihikan na êt ya toldan pagsimbaan la kan Apo Namalyari haka ya anggamitên la ha pamagsimba la. <sup>22</sup> Ha pamanhumonol ha Kautuhan, ay ayn angkalinisan, no ayn pon ipadaya ya ayop. Embayro etaman ayn kapatawaran ha kasalanan no ayn ipadaya.\*

<sup>23</sup> Habaytoy toldan pagsimbaan ay nanad aninon bat hēn mantêg pagsimbaan kan Apo Namalyari ha langit. Embayro man, ay habaytoy kailangan hēn malinisan hēn dayan ayop, kabay habayto etaman ya mantêg pagsimbaan kan Apo Namalyari ha langit, ay kailangan hēn daya ni Apo Jesu-Cristo ya maalagá ha dayan ayop. <sup>24</sup> Ta mantêg pagsimbaan kan Apo Namalyari ha langit ya hinowênan ni Apo Jesu-Cristo hēn nag-in mamilatan kantamo hēn angga-angga. A ya hinumwêna ha pinakalalêna pagsimbaan ha luta, ya nanad aninon bat hēn mantêg pagsimbaan. <sup>25</sup> Ya dinyag ni Apo Jesu-Cristo, ay minghan bat, alwan nanad kanlan pinakapoon pari ya taon-taon hēn ampantan hēn daya hēn ayop ha Pinakabanal ya Kuwarto ya atsi ha pagsimbaan lan ninuno. A na kailangan hēn pioman-oman hēn mamiâtang lawini na. <sup>26</sup> Ya pamiâtang nan sarili na, ay minghan bêngat, haka hépat ya habayto hēn angga ha anggaan hēn luta. No alwa dayi hēn embayro, ya minghan bêngat, ay kailangan dayi ya paoman-oman ya pangamatsi na paubat hēn dinyag ya luta ta êmēn maalih ya kasalanan. <sup>27</sup> Tinalagá ni Apo Namalyari ya maubuh kitamon matsi hēn minghan bêngat, bayo hatolan

‡ **9:13** Bilang 19:1-18. § **9:18** Ha kaugalian lan Israelita, ay no main lowa kanla ya main kahundoan, ay mamatsi hila pon hēn hinon ayop ta êmēn magkamain pukat ya habaytoy kahundoan. Genesis 15.

\* **9:22** Levitico 17:11.

ana. <sup>28</sup> Êmbayro êt hi Apo Jesu-Cristo ay minghan bat hên natsi ha pangalih hên kasalanan hên kal-atan. Kabay ha pag-orong na di ay a yay nan matsin oman gawan ha kasalanan tamo, noa, mag-orong ya, ta êmén na kowêñ hilay taganán ampangênggan kana.

## 10

### *Ya pamiátang ni Apo Jesu-Cristo hên sarili na, ay ayn kapantag*

<sup>1</sup> Ya Kautuhan ni apo Moises, ay nanad aninon bat hên kangérän ya antanggapén tamo gawan kan Apo Jesu-Cristo, haka habaytoy pangiátang hên taon-taon, ta êmén mapatawad ya kasalanan lan nakadyag kasalanan, ay a makapibanal hên nakém lan ampagsimba hên angga-angga. <sup>2</sup> No ampakaalih dayi hên kasalanan hên angga-angga, ya pangiátang la, ay a hila dayin angkabyatan ha kasalanan la, haka itégen la dayi ya pangiátang la. <sup>3</sup> Noa, ha kaptégan, ay habaytoy pangiátang la hên taon-taon, ay ampamipaihip kanla ya makasalanan hila. <sup>4</sup> Ta ya daya hên baka o kambing, ay taganán a makaalih hên kasalanan.

<sup>5</sup> Kabay hên nilumatêng yay na bayri ha luta hi Apo Jesu-Cristo, ay wana kan Apo Namalyari, ya Tatang na,  
“A mo labay ya hinon ayop o kaatag pon ya an-iátang kamo hên tawo,  
kabay pinaglêan mo kon lawini ya panluta.

<sup>6</sup> Taganán a mo an-ikahigla ya hinon ayop ya ulamén hên pangiátang ha pamakikwan patawad ha kasalanan.

<sup>7</sup> Bayo wangko, ‘Apo Namalyari, atsi ko di, hên manyag kalabayan mo,  
hên nanad ha nakahulat ha Kahulatan ya impahulat mo, ya tungkol  
kangko.’ ”\*

<sup>8</sup> Pakaihipén tamo ya hinabi ni Apo Jesu-Cristo. Wana ya a na taganán labay ni Apo Namalyari ya hinon ayop o kaatag ya an-iátang, haka a na etaman labay-labay ya hinon ayop ya ulamén ha pamakikwan patawad ha kasalanan, habayto man ay in-átang ha pamanhumonol ha Kautuhan.

<sup>9</sup> Bayo wana êt, “Haka atsi ko di, hên manyag kalabayan mo.” Ha pangahabi nan habayto ay malinaw ya hinagilyan ni Apo Namalyari ya kamatsan ni Apo Jesu-Cristo ha manan an-iátang. <sup>10</sup> Haka hinonol ni Apo Jesu-Cristo ya kalabayan ni Apo Namalyari. Miminghan nan in-átang ya sarili na haka hikitamoy niluminis ha kasalanan tamo, hên dinyag hên ayn kapintasan ha arapan ni Apo Namalyari.

<sup>11</sup> Ha manan kahundoan ay allo-allo hilan nakairêng hilay pari hên antuparén ya tungkulon la. Panay hilan ampamiatang hên a ampakaalih hên kasalanan. <sup>12</sup> Noa, hi Apo Jesu-Cristo, ay kaminghan nan in-átang ya sarili na ta êmén maalih ya kasalanan hên angga-angga. Hêñ nayari nay na ya habayto, ay nikno yay na ha dapit panabtab ni Apo Namalyari hên ampamaala hên kalamo na. <sup>13</sup> Bayro nay nan an-êngganan hên angga ha mapahambut ni apo Namalyari ya kapatsi na. <sup>14</sup> Kaminghan nan in-átang ya sarili na ta êmén na hila dinyag banal hên angga-angga, ya hilay pinili ni Apo Namalyari hên impapawa hên mag-in kana.

<sup>15</sup> Haka ya Espiritu ni Apo Namalyari, ay ampamaptêg hên habayto kan-tamo gawan ha impahulat na, ya êmén di,

<sup>16</sup> “Wanan Panginoon, ‘Habaytsi ya mag-in kahundoan ko kanlan Israelita lumatêng ya allo:

Itanêm koy utoh ko ha ihip la,  
ta êmén habaytoy nay labay lan honolên.’ ”†

\* **10:7** Awit 40:6-8. † **10:16** Jeremias 31:33.

**17** Bayo wana êt,

“Haka liwaan kinay kasalanan la haka pamanyag lan karawakan.”

**18** Kabay no napatawad ya kasalanan, ay malinaw ya ahina kailangan hêñ mangiatang.

### *Ampakapakidani kitamina kan Apo Namalyari*

**19** Hikaw ya patêl ko ha Panginoon, gawan ha daya ni Apo Jesus, ay makhaw ya nakêm taminan makiarap kan Apo Namalyari, hêñ nanad ha ampakahowêñ kitamina ha Kuwarto ya Pinakabanal. **20** Ta ha pamiátang nan lawini na, ay nanad nawakwak hêñ naloat ya makogpaw ya takop ya pinagpênlan bayro ha pinakabanal ya kuwarto.<sup>‡</sup> Kabay nakaloat ya bayoy dann ya palako kan Apo Namalyari. Habaytoy dann ay ayn kaatag no alwan hi Apo Jesus ya ampamiyay hêñ ayn angga. **21** Hiyay pinakapoon pari tamo ya ampamaala ha pamilya ni Apo Namalyari. **22** Kabay dapat boon nakêm haka nataniêñ ya paniwala tamo ha pamakiarap kana. Ta ya muwang tamo ay nalinisan kitamina ha balang kasalanan ta nanad winihikan daya na, ya karawakan nakêm tamo, haka nanad nalinisan ya lawini tamo hêñ lanêñ ya ayn kapantag ha kalinawan.<sup>§</sup> **23** Pakataniêñ tamoy pamagtsiwalla tamo kana, ya main kitamon maêngganan kana hêñ ayn pamag-alangan, gawan hi Apo Namalyari ya nangako, ay tapat. **24** Haka pakaihipêñ tamoy no ayêmén kitamon mapukaw hêñ kaihipan hêñ kapareho tamoy hêñ milulugud haka manyag kangêran. **25** Haka paan tamon tuwarêñ ya kaatag ya ahinan ampi-tsi-tsipon hêñ magsimba, noa, kailangan mipapakhaw kitamon nakêm ha miha ta miha, laloy na amêhêñ, ta angkahêlêk tamina ya marani yanay pamag-orong hêñ Panginoon.

**26** No muwang tamina ya kaptêgan ya tungkol kan Apo Jesus, bayo ihundo tamoy pon êt ya pamanyag kasalanan, ay ayn nanan maiátang ha ikapatawad hêñ kasalanan tamoy. **27** Ta ya maêngganan tamoy, ay kapapalimoy kaparusaan ha apoy ya man-alob, ya mangulam ha kaganawan ya nag-in kapatsi ni Apo Namalyari. **28** Ihipêñ tamoy ya pinatsi hêñ ayn ingalo ya hinoman ya nanalanghang ha Kautuhan ni apo Moises, no main lowa o tatloy tistigos ya namaptêg ha dinyag nay kasalanan.\* **29** Mabyat pon bayro ya pamarusa ha kaganawan ya naniwala pon bayo nanalibokot ha Anak ni Apo Namalyari. Ta ha pamanalibokot la, ay intad lan ayn pukat ya daya na, ya namaptêg ha bayoy kahundoan ya nangalih hêñ kasalanan la hêñ naniwala hila. Haka ha dinyag lan habayto, ay minusmus la êt ya Espiritu ni Apo Namalyari, ya nangingalo kanla. Kabay taganán mabyat ya parusa kanla. **30** Ta muwang tamina ya kapangyarihan ni Apo Namalyari ya naghabi, “Hiko ya manumbah, hêñ mamarusa kanla.” Haka wana êt, “Hiko ya Panginoon ya manatol ha pinili ko hêñ mag-in maának ko.”† **31** Taganán kapapalimo hêñ malatngan ya pamarusa ni Apo Namalyari ya angkabiyay hêñ ayn angga.

**32** Noa, ihipêñ yo hêñ haton babayo kaw hêñ naniwala kan Apo Jesu-Cristo, ya nadanasan yo man hêñ hadyay pamairap, ay nagtêeh kaw. **33** Ha arapan hêñ kal-atan, ay minusmus kaw, haka pinairapan. Bayo no êmbayroy dinyag la ha kalamo yo, ay andamayan yo hila etaman. **34** Ta iningalwan yo hilay inhukul gawan ha paniwala la kan Apo Jesu-Cristo. Haka hêñ main nangayun bandi yo, ay pinaulayan yo hila hêñ main kahiglaan, gawan muwang yo, ya ha langit ay main kaw hêñ matanggap ya ayn angga ya mangêd ha bandi. **35** Kabay pataniêñ yoy paniwala yo kan Apo Namalyari, gawan

‡ **10:20** Marcos 15:38. § **10:22** Exodus 29:21, Exodus 29:4, 30:17-21, 40:30-32, Ezekiel 36:25. \* **10:28**

Deuteronomio 17:2-7. † **10:30** Deuteronomio 32:5-6.

main kaw hēn maēngganan kana ya primyo ya ayn kapantag ha kangēran.  
<sup>36</sup> Dapat kaw hēn mag-in mapagtēh ha pamanhumonol yo ha kalabayan ni Apo Namalyari, ta êmēn yo matanggap ya impangako na. <sup>37</sup> Gawan main yan impahulat ya wana,

“Marani yanay pamanlumatēng nan habaytoy lumatēng.

A nan paulayan ya main mangabala ha pamanlumatēng na.

<sup>38</sup> Hilay an-itad kon ayn kasalanan, ay dyanan biyay ya ayn angga gawan ha paniwala la.

Noa, hilay manalibokot ay a ko an-ikahigla.”‡

<sup>39</sup> Habaytoy hinabi ni Apo Namalyari, noa, hikitamo etaman, ay alwa kita-mon kalamo lan ampanalibokot ya ipapawa kan Apo Namalyari hēn angga-angga, ta hikitamoy kalamo lan main paniwala ya dyanan biyay ya ayn angga.

## 11

### *Ya paniwala ya ayn kapantag*

<sup>1</sup> Ya paniwala, ay kasiguradoan ya matupad ya an-êngganan tamo, agyan a tamo pon angkahêlêk ya habayto. <sup>2</sup> Gawan bat ha paniwala lan ninuno tamo, ay hilay ingkahigla ni Apo Namalyari.

<sup>3</sup> Gawan ha paniwala tamo kan Apo Namalyari, ay angkaintindihan tamo ya hēn ayn pon angkahêlêk, ay dinyag nay luta ya angkahêlêk, ha habi nan bat.

<sup>4</sup> Ihipêñ tamo hilay ninuno tamo ya ingkahigla ni Apo Namalyari. Alimbawa hi Abel, gawan ha paniwala na kan Apo Namalyari, ay mangêd ya átang na kanan in-átang hēn kaka na hi Cain. Gawan habayto ay hiyay intad ni Apo Namalyari hēn ayn kasalanan. Muwang tamo ya habayto gawan tinanggap ni Apo Namalyari ya átang na. Natsi ya man hēn haton lagi, ay mamwangan tamo êt kana ya dapat magkamain kitamon paniwala.

<sup>5</sup> Hi Enoc etaman, gawan ha paniwala na kan Apo Namalyari, ay a ya natsi. Hēn angkabiyay ya pon, ay hiyay gintan ni Apo Namalyari ha langit, kabay hiyay ahina angkahêlêk ha luta.\* Impahulat na êt ni Apo Namalyari, ya ingkahigla na hi Enoc, hēn angkabiyay ya di ha luta hi Enoc. <sup>6</sup> Noa, no ayn kitamon paniwala, ay a kitamo ampakapahigla kan Apo Namalyari, ta no makiingalo kitamo kana, ay kailangan hēn maniwala ya taganán main Diyos, haka tumbahan nan kangēran ya kaganawan ampakapakikwanan hēn makamwang kana.

<sup>7</sup> Hi Noe etaman, gawan ha paniwala na kan Apo Namalyari, ay ginilam nay impamwang ni Apo Namalyari kana, ya manyag yan barko, ta êmēn hiya haka ya ahawa na haka maának na, haka hilay manuyang na ay miligtas.† Gawan ha paniwala na ay hiyay intad ni Apo Namalyari hēn ayn kasalanan, haka nag-in malinaw ya dapat parusaan hilay a nagpalokop kan Apo Namalyari.

<sup>8</sup> Hi apo Abraham etaman, gawan ha paniwala na kan Apo Namalyari, ay hinonol na êt ya utoh ni Apo Namalyari kana. Ta hēn hiyay in-utoh ha legal ya impangako kana, ay nammita ya, a na man muwang no ay-iri ya lakwēn na. <sup>9</sup> Gawan ha paniwala na, ay nagtêh yan nagbuyot hēn nagpaidi ha tolda bayro ha legal ya impangako kana ha kaatag ya bansa. Êmbayro êt hēn nagpaidi ha tolda, ya anak na hi Isaac haka hi Jacob ya apó na, ya kapareho ni apo Abraham hēn pinangakoan ni Apo Namalyari hēn habaytoy legal.

‡ **10:38** Isaias 26:20; Habacuc 2:3-4. Hêlkêñ etaman ha Roma 1:17 haka Galacia 3:11. \* **11:5** Genesis 5:24. † **11:7** Genesis 6:9 angga ha 8:22.

**10** Nagtêêh ya bayro hi apo Abraham, gawan an-êngganan nay paidyanan na ha napah-êy ya balayan ha langit, ya tinalagá, haka impairêng ni Apo Namalyari.

**11** Hi Sara<sup>†</sup> etaman, ya ahawa ni apo Abraham, ay gawan ha paniwala na, ya hi Apo Namalyari ay mapaypaniwalan, ay nagkaanak ya, layuh ya man haka toa hilay nay miahawa. **12** Agyan êndat ni apo Abraham ya a yay na magkaanak gawan mantêg yay nan toa, ay hiyay nag-in ninuno hên kal-atan ya a makwan mabilang êmén ha kal-at hên bêtewen ya angkahêlêk ha langit haka balâh ha laylay dagat.

**13** Hilay habaytoy inungkat ko, ay naniwala pon hên hilay natsi. A la man nakwa ya impangako kanla ni Apo Namalyari kaban angkabiyay hila pon, ay nanad lay na hên angkahêlêk ya habayto ha marayo, gawan ha paniwala la. Impamwang la ya hata luta ay alwa lan mantêg paidyanan. **14** Malinaw ya hilay êmbayroy pangahabi, ay main an-êngganan ya mantêg lan paidyanan ha langit. **15** Alwan ubatan la ya labay lan orongén, ta main hila man hên panaon hên mag-orong bayro, ay a hila nag-orong. **16** Noa, ya labay-labay lan lakwén, ay mangéd pon bayro ha ubatan la. Yabay ya balayan ha langit. Kabay a ya marêng-êy hi Apo Namalyari hên hiyay baégen lan Diyos la. Muwang tamoy habayto ta pinangil-an na hilan balayan.

**17** Nahêlêk etaman ya nataniêh ya paniwala ni apo Abraham, hên hiyay inutoh ni Apo Namalyari hên iátang ya anak na hi Isaac. Hiyay a nanalanghang kan Apo Namalyari, hi Isaac man ya kamiha-mihaan nan anak ya impan-gako<sup>§</sup> kana ni Apo Namalyari, hên wana, **18** ya hi Isaac ya mag-in ninuno hên kaapo-apoan na. **19** Naniwala ya, ya biyayén nan oman ni Apo Namalyari hi Isaac. Haka nanad biniyay yan oman hi Isaac, gawan no a ya dayi binawal ni Apo Namalyari, ay pinatsi nay na dayi hi Isaac.

**20** Hi Isaac etaman, ay gawan ha paniwala na kan Apo Namalyari, ay inhalangin\* na hilay anak na, hi Jacob haka hi Esau, ya ingalwan hila dayi ni Apo Namalyari ha arapén la.

**21** Hi Jacob etaman, bayo ya natsi, ay gawan ha paniwala na kan Apo Namalyari, ay inhalangin† na ya loway anak ni Jose, ya ingalwan hila dayi ni Apo Namalyari ha arapén la. Bayo nagtêkén hi Jacob, haka sinimba na hi Apo Namalyari.

**22** Hi Jose etaman, hên marani yay nan matsi, ay gawan ha paniwala na kan Apo Namalyari, ay impamwang nay pag-alih lan Israelita ha bansom Egipto, haka namiutoh ya kanla, ya ha pag-alih la ha bansom Egipto, ay gêtan lay but-o na hên iilbêng ha legal ya lakwén la.

**23** Hilay toa etaman ni apo Moises, gawan ha paniwala la kan Apo Namalyari, ay a hila nalimo hên nanalanghang ha utoh‡ hên ari ya dapat patsén ya kapianak ya lalaki. Hên nahêlêk lay mahampat ya nag-in anak la, ay intago la hi Moises hên tatloy buwan.

**24** Hi Moises etaman, ay hiyay hinayhay hên anak ni Faraon, ya ari. Noa, hên nagkanakêm yay na, ay gawan ha paniwala na kan Apo Namalyari, ay tinalibatokan nay habayto, **25** ta êmén na makalamo hilay pinili ni Apo Namalyari hên mag-in anak na, hadyay kairapan man ya angkarasan la, kanan magpakapda hên manyag kasalanan, ta muwang na ya a mabuyot ya habaytoy kahiglaan. **26** Ta inihip na, ya mangéd ya magdanas yan pammus-mus gawan ha paniwala na ha Mesias, ya impangakon Mámiligtas, kanan

‡ **11:11** Genesis 18:15; 21:1-2.    § **11:17** Genesis 22:1-19.    \* **11:20** Genesis 27:1-40.    † **11:21** Genesis 48:1-20.    ‡ **11:23** Exodo 2:1-10.

iubuh kana ya pibandian ha bansen Egipto, ta an-êngganan nay matanggap na ha langit.

<sup>27</sup> Gawan êt ha paniwala na kan Apo Namalyari, ay nag-alih ya ha Egipto, hên a nalimo ha huluk nan ari. Ta nanad nay nan angkahêlêk hi Apo Namalyari ya a angkahêlêk. <sup>28</sup> Gawan êt ha paniwala na kan Apo Namalyari, ay hinonol nay in-utoh§ kanla ya mamatsi hilan tupa, ta ipunih lay daya ha kabat hên bali la. Dinyag lay habayto, haka hên nagdann bayro ya anghel hên kamatsan, hên patsêñ ya punganay lan Egipcio, ay a natsi ya punganay lan Israelita.

<sup>29</sup> Hila etaman ya Israelita, gawan ha paniwala la kan Apo Namalyari, ay nakabatah hila ha bonak hên Dagat ya Naorit ya pinamala ta êmên hila nakadann. Noa, hên magbatah dayi hilay Egipcio, ya ampangorong kanla, ay nilêmêh hila gawan nag-orong ya lanêm.

<sup>30</sup> Gawan êt ha paniwala la kan Apo Namalyari, ay nigêyma ya katagayan bakod ya dyag ha bato ya nakapalibot ha balayan Jerico\* pangayari lan nilibot hên pitoy allo. <sup>31</sup> Hi Rahab† etaman, ya taga-Jerico, agyan miha yan hostis, ay a ya pinakilamo kanlan a naniwala kan Apo Namalyari ya pinatsi. Gawan ha paniwala na kan Apo Namalyari, ay hiyay nanawop kanlan nangimaton, ya in-utoh ni Josue ha Jerico.

<sup>32</sup> Gawan ha paniwala la kan Apo Namalyari, ay kal-atan kapapaêpapah ya dinyag lan Gideon, Barak, Samson, Jefte, David, Samuel, haka hilay mâmipamwang hên an-ipaihip kanla ni Apo Namalyari. Noa, kulang ya panaon hên ungkatêñ ya habayto ya tungkol ha nag-in biyay la. <sup>33</sup> Mal-at ya nadyag lan habayto gawan ha paniwala la. Ya kaatag kanla, ay nanambut ha kal-atan bansa. Ya kaatag ay namaala hên main katoynungan. Ya kaatag ay nakatanggap hên impangako kanla. Ya kaatag etaman ay nakapa-tsikum hên bêbêy leon. <sup>34</sup> Ya kaatag ay nakaparê hên apoy ya mamaalob. Ya kaatag êt ay naligtas ha tabtâban. Ya kaatag ay pinakhaw, haka ya kaatag ay nag-in makhaw ha pamakilaban kabay angkaipaplag lay kal-atan hundaloh lan kaatag ya bansa. <sup>35</sup> Main hên babayi ya kinamatsan, ya biniyay oman ya habaytoy anlugurên la.‡

Main kaatag ya natsi ha hadyay pamairap kanla, gawan a la impuglaoh ya paniwala la kan Apo Namalyari. A la impuglaoh ya paniwala la gawan labay la hên madyanan biyay ya ayn angga ha langit. <sup>36</sup> Main kaatag ya pinairapan hên minusmus, haka dinapi. Kaatag pon ay inhukul hên nakagapoh hên taykala. <sup>37</sup> Main kaatag ya pinatsin pinagbabato. Ya kaatag ay nilagari hên pinakay lawini. Ya kaatag êt ay pinatsi ha êetak. Hilay kaatag ay pinaalih ha balayan la. Dinanas la ya hadyay pamagkulang ha kaganawan kailangan. Nakatakop hila tanan katat hên tupa haka kambing hên nagdanas hên hadyay pamairap. <sup>38</sup> Nanad alwan hépat kanla hên paidi hên kalamo lan a nagpalokop kan Apo Namalyari. Kabay nikotaw-kotaw hila hên napaidi ha kabalah-balahan, ha tinatawtug, nilêyang-lêyang haka ha tinanil-tanil.

<sup>39</sup> Ingkahigla hila ni Apo Namalyari gawan ha paniwala la. Noa, a la pon nakwa ya impangako kanla ni Apo Namalyari, hên angkabiyay hila ha luta, <sup>40</sup> gawan tinalagá ni Apo Namalyari ya hikitamo etaman, ay makalamo ha impangako na, ya ayn kapantag ha kangêran, ta êmên hila haka hikitamo ay pare-pareho hên mag-in ganap.

§ **11:28** Bayron nag-umpisa ya Pistan Pangaligtas ha Egipto. Exodus 12:1-36. \* **11:30** Josue 6:1-21.

† **11:31** Josue 2:11-22 haka 6:22-25. ‡ **11:35** 1 Hari 17:19-24 haka 2 Hari 4:18-37.

## 12

### *Dapat palokop kan Apo Namalyari ya Tatang tamo*

<sup>1</sup> No ialimbawa tamo ya pamanhumonol tamo kan Apo Namalyari ha hali-tagtagan, ay hilay habayto ya inungkat ya nananiêh ya paniwala kan Apo Namalyari, ay nilatêng hilay na ha anggaan hên hali-tagtagan. Haka nanad nakapalibot hilan kal-atan hên ampamantay kantamo ha pamaki-hali-tagtagan tamo. Kabay kailangan tamon paghêhêan hên alihêh ya pamanyag kasalanan, ta êmên ayn makahabkol ha pamagtêhêh tamo ha pamaki-hali-tagtagan, ta êmên tamo maabutan ya anggaan. <sup>2</sup> Dapat panay tamon ihipêh hi Apo Jesus, ya ampangubatan hên paniwala tamo haka ya ampataniêh hên paniwala tamo hên angga ha ayn pamagkulang ya habayto. Impahlék na kantamo no ay-êmên ya pamagtêhêh na hên hiyay impako ha koros, hên a na ingkarêng-êy ya habayto ta an-êngganan nay mag-in kahiglaan na ha langit. Haka ampikno yay na ha dapit panabtab ni Apo Namalyari hên ampamaala hên kalamo na.

<sup>3</sup> Dapat tamon ihipêh ni Apo Jesus ha hadyay pamanalang-hang kana hên hilay mapanyag kasalanan, ta êmên a kitamo mahiraan nakêm, haka a kitamo humawa hên humonol kana. <sup>4</sup> Ha pakikwanan yon manambut ha kasalanan, ay a êt niabot ha ikamatsi yo, ya pamakilaban yo.

<sup>5</sup> Kayno naliwaan yoy nay impahulat ni Apo Namalyari kamoyun maának na, ya dapat mag-in aral kamoyu, ya wana,

“Anak ko, paan mon daygêng ngaw-ngaw ya pamarala na kamo hên Panginoon,

haka paan kan mahiraan nakêm no an-itoynong na ka.

<sup>6</sup> Ta amparal-an ni Apo Namalyari ya hilay anlugarêh na, haka an-itoynong nay an-itad nan maának na.”\*

<sup>7</sup> Dapat yon pagtêhêhan ya kairapan ya lumatêng kamoyu, ta habaytoy pamarala kamoyu ni Apo Namalyari. Habaytoy ampamaptêh hên maának na kaw. Yarin main anak ya a amparal-an hên tatang na! <sup>8</sup> No a na kaw paral-an ni Apo Namalyari hên nanad ha kaganawan maának na, ay alwa kaw awud hên mantêh hên maának na. <sup>9</sup> Pinalar-an kitamo hên tatang tamo di ha luta, haka an-igalang tamo hila. Lalo dapat tamon pagpalokopan hi Apo Namalyari, ya nag-in Tatang tamo ha langit, gawan ha paniwala tamo kana. Ta ha êmbayro, ay magkamain kitamon biyay ya ayn angga! <sup>10</sup> U-ungnon bat ya taon, ay pinaral-an la kitamo hên toa tamo do ha an-ihipêh lay usto. Noa, panay ha ikangêd tamo ya pamarala kantamo ni Apo Namalyari ta êmên kitamo mag-in banal, hên nanad kana. <sup>11</sup> Nahakit man, haka kapalungkot ya hinon pamarala, ay pamakayarin habayto, ay mag-in mahonol kana ya pamimiyay lan nagpatoro bayro, haka magkamain hilan kapatêkbêkan nakêm.

### *Aral haka panaad*

<sup>12</sup> Kabay no nanad napagal kaw ha pamaki-hali-tagtagan, ay pakataniêhêh yoy nakêm yo. <sup>13</sup> Dapat mag-in alimbawa ya pamimiyay yo, ta êmên mapataniêh yoy paniwala lan ampag-alangan.

<sup>14</sup> Pakikwanan yon mamiyay hên main pamikahundo ha kapareho yo haka dayuán yoy pamanyag kasalanan. Ta hilay labay hên manyag kasalanan, ay a makapakilamo ha Panginoon lano ha langit. <sup>15</sup> Mihahawop kaw ta êmên ayn miha man kamoyu ya manalibokot ha ayn kapantag ya ingalo ni Apo Namalyari. Paan kaw magtanêh hên hakit nakêm ta êmên a mayawa ya kal-atan gawan habaytoy pangubatan hên gulo. <sup>16</sup> Dapat ayn miha man

\* <sup>12:6</sup> Kawikaan 3:11-12.

kamoyu ya mag-in nanad kan Esau,<sup>†</sup> ya ayn limo kan Apo Namalyari, ya mapanyag karawakan kalabayan lawini, haka namihagili hēn karapatan hēn pagkakabaya na ha pêpérad ya pamangan. <sup>17</sup> Muwang tamo ya hēn naghêhê ya ha pagkahagili hēn karapatan hēn pagkakabaya na, ay ahina indin kana ya in-utoh ni Apo Namalyari ya midin kanlan kabaya. Pakikwaan na man dayi ya habaytoy ingalo ya ubat kan Apo Namalyari hēn main kalamoy pamandoko haka luwa, ay ahina naidin kana ya habayto.

<sup>18</sup> Kabay pakikwanan tamon ihundo ya paniwala tamo, gawan mangêd ya bayoy kahundoan ni Apo Namalyari kantamo kanan manan kahundoan na ha ninuno tamo. A tamina andanasan ya kapalimo ya nadanasan lan ninuno tamo bayro ha Tawtgug Sinai hēn nahêlêk lay apoy ya mamaalob, hadyay diglêm haka hadyay hêkaw angin. <sup>19</sup> Nakagilam hila êt hēn tonoy tambuyok haka ya kapapalimoy habi ni Apo Namalyari. Hêن nagilam lay habi, ay nakiingalo hila ya itunggêن dayi ya habayto. <sup>20</sup> A la matêêh hēn manggilam habaytoy utoh ya indin kanla, “Agyan ayop man ya dumani ha tawtgug ya habayto, ay dapat batoêñ hēn angga ha mapatsi.”<sup>‡</sup> <sup>21</sup> Gawan ha hadyay kapapalimo ya nahêlêk la, ay nalinwan ya etaman hi apo Moises, ya wana, “Ampamêgpêg ako ha hadyay limo ko!”<sup>§</sup>

<sup>22</sup> Noa, hikitamo etaman ya ampaniwala amêhêñ, ay dinumani kitamina ha Tawtgug Sion,\* ya mantêg balayan Jerusalem ha langit. Dinumani kitamina ha balayan ni Apo Namalyari ya angkabiyay hēn ayn angga bayro, ha ampaidyanan hēn kal-atan anghel ya a makwan mabilang, ya ampagsimba kana hēn main hadyay kahiglaan. <sup>23</sup> Inlamo kitamina ha pagtsiponan lan maának ni Apo Namalyari ya dyanan biyay ya ayn angga, ya nakahulat ha langit ya langan. Naabutan taminay arapan ni Apo Namalyari, ya ampanlingon ha balang miha. Inlamo kitamina kanlan kal-atan ya mahonol kana ya nuna kantamo bayro ha langit, ya habaytoy intad ni Apo Namalyari hēn ayn kasalanan. <sup>24</sup> Inlamo kitamina kan Apo Jesus, ya mámilatan ha bayoy kahundoan ni Apo Namalyari ha tawo, haka ya daya na, ay nanad inwihih kantamo. Mapakinabangnan tamoy habaytoy daya na, alwan daya ni Abel<sup>†</sup> ya ampakikwa bat hēn pamanumbah.

<sup>25</sup> Kabay paan kitamon magma-matlakan ha an-ipagilam na kantamo ni Apo Namalyari. No a hila nailigtas ha parusa, hilay unan a nanggilam ha panaad ni Apo Namalyari ya impamwang ni apo Moises kanla di ha luta, ay yarin miligtas kitamo, no a kitamo manggilam ha panaad ni Apo Namalyari kantamo! <sup>26</sup> Hêñ haton lagi bayro ha Tawtgug Sinai<sup>‡</sup> ay nayêgê ya luta hēn naghabi hi Apo Namalyari, noa, amêhêñ, ay nangako ya, ya wana, “Minghan ko pon êt hēn yêgyêgêñ ya luta, haka alwan bat luta ya iyêgêñ ko, noa, anggan kaganawan ya angkahêlêk ha langit.” <sup>27</sup> Ha pangahabi nan, “Minghan pon êt,” ya labay habiên hēn habayto, ay alihêñ nay mayêgyêg ya dinyag na, ta êmén magpaayn angga ya kaganawan ya a mayêgyêg ha ampaidyanan na ha langit.

<sup>28</sup> Kabay pahalamatan tamo hi Apo Namalyari ta kalamo kitamo ha pamalokop na, ya ayn anggaan, haka ya a angkayêgê. Simbaêñ tamo ya hēn main pamanggalang haka kaaypaan nakêm. <sup>29</sup> Gawan hi Apo Namalyari, ya ansimbaêñ tamo, ay maialimbawa ha apoy ya ampakaulam no ampamarusa ya.

---

<sup>†</sup> **12:16** Genesis 25:27-34. <sup>‡</sup> **12:20** Exodus 19:12-13. <sup>§</sup> **12:21** Deuteronomio 9:19. \* **12:22** Hêlkêñ ha panlêkan labay habiên hēn habi. <sup>†</sup> **12:24** Genesis 4:10. <sup>‡</sup> **12:26** Hagai 2:6.

## 13

*Ya pamanhumonolya ampamahigla kan Apo Namalyari*

<sup>1</sup> Dapat yon ihundo ya pamilulugud yo, gawan patêl kaw ha Panginoon.

<sup>2</sup> Dapat mag-in mahigla ya pamahowên yo kanlan ubat ha marayo, ya lumatêng bahên, ta ha êmbayro, ay main nanan nakapahowên hên anghel ni Apo Namalyari hên a la muwang. <sup>3</sup> Dapat yon ingalwan ya kapareho yo, ya atsi ha hukulan haka hilay ampairapan gawan ha paniwala la kan Apo Jesu-Cristo. Pakidamayan yo hila hên nanad sarili yon lawini ya ampairapan.

<sup>4</sup> Hilay nipag-ahawa, ay dapat lan galangên ya pamag-ahawa la. Haka kailangan pareho hilan mag-in tapat ha miha ta miha. Ta parusaan ni Apo Namalyari hilay ampanakêh ha alwa lan ahawa.

<sup>5</sup> Paan kaw mag-in kamata hên pera. Dapat mahigla kaw hino man ya kapanapolan yo. Ta wani Apo Namalyari ya, “A kataw lakwanan o paulayan man.”\* <sup>6</sup> Kabay makhaw ya nakêm tamon maghabin êmên di,

“Hi Panginoon ya ampanawop kangko,  
kabay a ko angkalimo.

Ayn makaantsi kangko!”†

<sup>7</sup> Dapat yon ihipêñ ya hilay unan namaala kamoyu, ya nanoro kamoyu hên habi ni Apo Namalyari, no ay-êmên nahêlêk ya kangêran ha pamimiyay la, haka no ay-êmên hila natsi. Haka dapat yon tuwarêñ ya paniwala la. <sup>8</sup> Hi Apo Jesu-Cristo etaman, ya ampaniwal-an la, ay a ampangoman. No ay-êmên ya hên hato, ay êmên ya êt bayro amêhêñ haka hên angga-angga. <sup>9</sup> Paan kaw pagtan ha hinoman ya toro ya kalokwan. Mangêñ no ya paniwala yo ay antumaniêñ gawan ha ayn kapantag ya ingalo ni Apo Namalyari, kanan pamanhumonol ha patakaran ya tungkol ha bawal hên kaen. Ya pamanhumonol kanlan habaytoy patakaran ay a ampakataniêñ hên paniwala.

<sup>10</sup> Hilay ampamihundo hên pamiâtang lan ayop ha pagsimbaan hên pamanhumonol ha Kautuhan ni apo Moises, ay a makapakilamo kantamo, ya makiarap kan Apo Namalyari gawan kan Apo Jesus ya namiâtang hên sarili na. <sup>11</sup> Habaytoy daya lan ayop ya an-iátang taon-taon para ha kasalanan, ay gintan nan pinakapoon pari ha Pinakabanal ya Kuwarto. Noa, ya lawini lan ayop ya in-átang, ay in-ulam ha marayo-dayo ha paidyanan la. <sup>12</sup> Êmbayro etaman hi Apo Jesu-Cristo, ay gintan ha marayo-dayo ha balayan hên impako ha koros, hên hiyay natsi, ta êmên malinisan kitamo ha kasalanan tamo hên daya na. <sup>13</sup> Kabay lakwêñ tamo hi Apo Jesus ha marayo-dayo ha balayan, ya labay habiêñ, magpapawa kitamo kanlan êndat la ya mag-in hilan mangêñ ha hêlêk ni Apo Namalyari ha pamanhumonol ha Kautuhan, haka makilamo kitamo kan Apo Jesus. Magtêêñ kitamo ha pamandaêñ hên nanad ha tinêêñ na. <sup>14</sup> Gawan alwan bayri ha luta ya paidyanan tamo hên ayn angga, noa, main kitamon an-êngganan, ya balayan ha langit ya ayn angga. <sup>15</sup> Kabay panay kitamon magpuri haka magpahalamat kan Apo Namalyari gawan kan Apo Jesus, ta habaytoy átang lan ampaniwala kana. <sup>16</sup> Paan tamon liwaan hên manyag kangêran haka manawop ha kaatag, ta habayto êt ya átang ya ampamahigla kan Apo Namalyari.

<sup>17</sup> Palokop kaw kanlan ampamaala kamoyun ampaniwala, ta hilay ampakataniêñ hên paniwala yo, haka pakibatan la kan Apo Namalyari no a la daygêñ ya habayto. No honolêñ yo hila, ay mahigla lan tuparêñ ya tungkulan

\* <sup>13:5</sup> Deuteronomio 31:6. † <sup>13:6</sup> Awit 118:6.

la. Noa, no a yo hila honolêñ, ay tumabang hila, haka habaytoy alwan ha ikakangêd yo.

<sup>18</sup> Ihalangin yo kay. Angkasigurado naêñ ya malinis ya konsinsya naêñ, ta ampakapakikwanan naêñ, ya makapamiyay kay hêñ main kangêran hêñ allo-allo. <sup>19</sup> Ampakidoko ko kamoyu ya ihalangin yo ko ya tampol akon makaorong bahêñ kamoyu.

### *Inhalangin hilay hinulatan*

<sup>20-21</sup> An-ihalangin kataw ya hi Apo Namalyari ya ampangubatan hêñ kap-atêkbêkan ay mam-i kamoyu hêñ kaganawan kailangan yo, ta êmêñ ha hawop ni Panginoon Jesu-Cristo, ay mahonol yoy kalabayan na, ya makapahigla kana. Hiyay namabyay oman kan Panginoon tamon Jesus, ya pastol ya ayn kapantag, ya natsi hêñ nam-in daya na, ya namaptêg ha bayoy kahundoan ya ayn angga. Purién tamo hi Panginoon Jesu-Cristo hêñ ayn angga! Amen.

### *Tawlin habi*

<sup>22</sup> Patêl ha Panginoon, paan kaw dayi hêñ humawa ha an-iaral ko kamoyu di, ta alwa etaman makarang ya hata hulat. <sup>23</sup> Labay ko êt hêñ ipamwang kamoyu, ya hi Timoteo, ya patêl tamo ha Panginoon, ay in-awah ha hukulan. No tampol yan makalatêng bayri, ay pagkalamo ko ya ha paniraw ko bahêñ.

<sup>24</sup> Ikumusta yo kay awud kanlan ampamaala kamoyu, haka kanlan kaganawan ya pinili ni Apo Namalyari hêñ mag-in kana ya atsi bahêñ. Angkumustaêñ kaw etaman lan patêl ha Panginoon ya taga-bansan Italia.

<sup>25</sup> Ingawan na kaw dayi ni Apo Namalyari.

## Ya Hulat ni Santiago

### *Paunan habi*

Ya nanulat hēn habaytsi ya hulat ay hi Santiago, ya mihay ampamaala kanlan ampaniwala kan Apo Jesu-Cristo ha balayan Jerusalem. Hinulatan nay kapareho nan Israelita, ya ampaniwala kan Apo Jesu-Cristo, ya nangapitayak ha mal-at ya bansa. Hinulat na di ya ayn pukat ya paniwala kan Apo Jesu-Cristo, no ayn kalamoy mangangêd ya dyag (2:14-26). Ya kaatag ya hinulat na, ay mabáha bayri ha kabooan hēn pinakalaman.

Kabooan hēn pinakalaman

Umpisan hulat 1:1

Ya paniwala kan Apo Jesu-Cristo haka ya kagalingan ya ubat kan Apo Namalyari 1:2-8

Hilay mairap haka hilay mabandi 1:9-11

Ya pamanubuk haka no antoy ubatan hēn tukso 1:12-18

Dapat pantag ya hēlēk ha kapareho 2:1-13

Ayn pukat ya paniwala kan Apo Jesu-Cristo, ya ayn kalamoy mangangêd ya dyag 2:14-26

Ya dila tamo ay dapat gamitêh ha panay ikakangêd nanad ha sibol ya panay naayang ya lanêm 3:1-18

A na labay ni Apo Namalyari ya main yan kaayuan kantamo 4:1-5:6

Dapat magtêh 5:7-20

<sup>1</sup> Hiko hi Santiago\* ya ampaghuyo kan Apo Namalyari haka kan Panginoon tamon Jesu-Cristo.

Anhulatan kataw ya kapareho kon Israelita, ya ampaniwala kan Apo Jesu-Cristo, ya nangapitayak ha mal-at ya bansa. Angkumustaêh kataw.

*Ya paniwala kan Apo Jesu-Cristo haka ya kagalingan ya ubat kan Apo Namalyari*

<sup>2</sup> Hikaw ya patêl ko ha Panginoon, dapat humiglay nakêm yo, no lumatêng kamoyu ya hino-hino kay na hēn ya kairapan, <sup>3</sup> ta mana yoy nan muwang ya habaytsi, ya kairapan, ya panubuk hēn paniwala yo, ay lalo hēn mamahan hēn pamagtêh yo, no a kaw pahambut ha pamanubuk. <sup>4</sup> Kabay magpaketêh kaw, ta êmén ngumangêd ya ugali yo, haka kaw mag-in ganap ya taganán ayn pamagkulang kan Apo Namalyari.

<sup>5</sup> Noa, no ampagkulang kaw ha kagalingan hēn manyag kalabayyan na, ay kikwa kaw kana, ta mapam-i ya ha kaganawan makikwa kana hēn a mamarêng-êy. <sup>6</sup> Noa, no kikwa kaw, ay kailangan main kaw hēn paniwala, ya ayn pamag-alangan hēn dyanan na kaw. Ta no main kaw hēn pamag-alangan ha nakêm, ay nanad kaw hēn tandulon ha dagat ya ampidulin-dulin hēn angin ha antoman. <sup>7</sup> No êmbayro kaw, ay paan yoy nan ihipêh ya main kaw pon maêngganan kanan Panginoon, <sup>8</sup> ta ampag-alangan ya nakêm yo, haka alwa kaw mapaypaniwal-an.

### *Hilay mairap haka hilay mabandi*

<sup>9</sup> Hikaw ya patêl ha Panginoon ya mangairap, ay dapat pakahigla kaw gawan matag-ay kaw ha hēlêk ni Apo Namalyari, <sup>10</sup> haka hikaw etaman ya mangabandi, ay dapat pakahigla kaw no umaypa ya tungkulon yo gawan ha

\* <sup>1:1</sup> Mateo 13:55; Marcos 6:3; Dyag 15:13; Galacia 1:19.

paniwala yo, ta hilay mangabandi ay nanad hilan bulaklak ya a mabuyot. <sup>11</sup> Ta no hadyay omot allo ay angkawngêy ya bulaklak haka angkaalih ya kahampatan la. Embayro etaman hilay mangabandi. Kaban ampag-obra hila, ay bigla hilan matsi.

### *Ya pamanubuk haka no antoy ubatan hên tuksô*

<sup>12</sup> An-ingalwan ni Apo Namalyari hilay ampakatêh ha kairapan. Hata kairapan ay pamanubuk ha paniwala la kan Apo Jesu-Cristo. Gawan a hila ampahambut ha pamanubuk, ay angkamwangan ya makhaw ya paniwala la, kabay dyanan hilan biyay ya ayn angga, ya impangako hên Panginoon kanlan ampanlugud kana. <sup>13</sup> No ampakaranas kaw hên kairapan haka hên pamanukso, ay paan yon habiêñ ya hi Apo Namalyari ya ampanukso kamoyu, ta a ya matukso hên manyag karawakan, haka a ya manukso hên hinoman. <sup>14</sup> Noa, ampanukso kamoyu ya sarili yon karawakan kalabayan, ta habain ya mangamuyot kamoyu, <sup>15</sup> bayo no dyanan yon logal ha nakêm yo ya habayto, ay makadyag kaw hên kasalanan, haka no panay kaw manyag hên kasalanan, ay mipalako kaw ha kamatsan. <sup>16</sup> Anlugarûn kon patêl ha Panginoon, paan kaw paamuyot hên mangihip ya hi Apo Namalyari ya ampanukso kamoyu. <sup>17</sup> Ta hiyay Tatang tamo, ya nanyag hên ampipanhumawang ha langit. Hiyay ampam-i hên kaganawan ya mangêd haka ganap, ya ikakangêd tamo, haka a ya ampangoman, ampangoman man ya hawang ha langit. <sup>18</sup> Tinalagá nan hikitamoy mag-in maának na, kabay hinawpan na kitamo ta êmén tamo maintindihan ya habi nay kaptêgan. Dinyag nay habayto, ta êmén ha balang dinyag na, ay hikitamo ya pinili na hên mag-in kana, hên nanad ha pamamili na hên pinakamaalagáy bandi na.

### *Gilamên haka honolêñ ya habi ni Apo Namalyari*

<sup>19</sup> Anlugarûn kon patêl ha Panginoon, pakaintindiêñ yo ya habaytsi. Dapat manggilam kaw mangêd, bayo kaw maghabi, haka paan kaw bat hên manuluk, <sup>20</sup> ta no main kaw hên huluk, ay a yo madyag ya mangêd ha hêlêk ni Apo Namalyari. <sup>21</sup> Kabay itêgêñ yoy nay pamanyag hên karêmêkan kalabayan lawini, haka ya pamanyag hên kaatag pon ya karawakan. Dapat kaaypaan nakêm yon honolêñ ya habi ni Apo Namalyari ya atsi yana ha nakêm yo, ta habayto ya makapiligtas kamoyu ha parusa ya ayn anggaan.

<sup>22</sup> Dapat yon honolêñ ya habi ni Apo Namalyari, ta no bat yo tanan panggilam-gilam, ta a yo anhonolêñ, ay anlokoêñ yoy sarili yo hên iligtas kaw ni Apo Namalyari. <sup>23</sup> Ta no anggilamên yon bêngat, ta a yo anhonolêñ, ay nanad kaw inumarap ha solamin, <sup>24</sup> ya pangayari yon nahêlêk ya sarili yo, ay tampol yon naliwaan no ay-êmén ya lupa yo. <sup>25</sup> Noa, no panay yon pakapag-aralan ya kabooan hên an-itoro† ni Apo Namalyari, ya makapiligtas kantamo, haka a yo anliwaan hên honolêñ ya namwangan yo, ay ingalwan na kaw.

<sup>26</sup> No êndat yon mangêd ya pamaghuyo yo kan Apo Namalyari, noa, ayn kaw etaman hên pamagpigil ha dila yo, ay anlokoêñ yoy sarili yo, haka ayn alagá ya êndat yon mangêd ya pamaghuyo yo kan Apo Namalyari. <sup>27</sup> No labay tamon mag-in pêtêg haka maalagá ya pamaghuyo tamo kan Apo Namalyari, ya Tatang tamo, ay dapat tamon hawpan hilay olila, haka hilay kapaingalo ya babayi ya bawo. Dapat kaillag kitamo etaman ta êmén a kitamo magtan ha karawakan lan a ampagpalokop kan Apo Namalyari.

† 1:25 ha habin Griego: ya Kautuhan ya ayn pamagkulang.

## 2

*Dapat pantag ya hêlêk ha kapareho*

<sup>1</sup> Hikaw ya patêl ko, gawan ampaniwala kaw kan Panginoon Jesu-Cristo, ya ayn kapantag, ya Panginoon hên langit, ay dapat pantag ya hêlêk yo ha kapareho yo. <sup>2</sup> Alimbawa, no atsi kaw ha pagtsiponan\* yo, ta main lumatêng ya mihay lalaki ya mabandi, ya nakahinghing hên ginto, haka nakabaro hên mahampat, bayo main êt lumatêng ya mihay lalaki ya mairap ya nakabaro hên galot-galot, <sup>3</sup> ta mahiglay pananggap yo kanan nakabaro hên mahampat hên paiknoen ha mahampat ya iknoan, yan paiknoen yoy mairap akik ha danin bitsih yo, o habiên yo ya mirêng ya tana, <sup>4</sup> ay alwan pantag ya hêlêk yo ha kapareho yo. Mapamili kaw! <sup>5</sup> Anlugurên kon patêl ha Panginoon, pakagilamén yoy anhabiên ko. Hi Apo Namalyari ya namili kanlan mangairap ha hêlêk tawo, hên magkamain hên nataniêh ya paniwala kana, haka hên mag-in kalamo na ha langit, ya legal ya impangako na kanlan ampanlugud kana. <sup>6</sup> Yan hikaw ya nammusmus ha mairap. Yarin a yo muwang ya hilay mabandi ay ampamarusa kamoyu, haka hilay ampamiarap kamoyu ha mánningon kaso! <sup>7</sup> Hila êt ya ampaghabin pamanira ha ampaghuyuan yo, ya hi Panginoon Jesu-Cristo.

<sup>8</sup> Main nakanhulat ha Kahulatan † ya impahulat ni Apo Namalyari ya wana, “Lugurên moy kapareho mo hên nanad ha pamanlugud mo ha sarili mo.” No taganán anhonolén yoy habaytoy maalagáy utoh ni Apo Namalyari, ay mangêd ya andaygén yo. <sup>9</sup> Noa, no alwan pantag ya hêlêk yo ha kapareho yo, ay kasalanan ya habayto, haka gawan ha anhumalanghang kaw ha Kautuhan, ay parusaan kaw ni Apo Namalyari. <sup>10</sup> Ta no a tamo anhonolén ya agyan mihay utoh na, ay parusaan kitamo, ta nanad êt bêngat a tamo hinonol ya kaganawan Kautuhan na. <sup>11</sup> Ta hi Apo Namalyari ya namiutoh‡ ya paan mamabayi o makilalaki, ay hiya etaman ya namiutoh ya paan mamatsin kapareho. No a kaw man namabayi o nakilalaki, yan namatsi kaw hên kapareho yo, ay nakadyag kaw hên kasalanan, ta a yo hinonol ya habaytoy Kautuhan na. <sup>12</sup> Kabay dapat ya anhabiên yo haka ya andaygén yo, ay mag-in mangêd, ta muwang yo ya hatolan kaw ni Apo Namalyari ha panggamit hên kaganawan hên an-itoro§ na ya makapiligtas kamoyu. <sup>13</sup> Ta no ayn kitamon ingalo ha kapareho tamo, ay a na kitaminan ingalwan ni Apo Namalyari ha allo nan pamanatol hên mam-in parusa. Noa, hilay maingaloen, ay ayn ikapotog ha allon habayto.

*Ayn pukat ya paniwala kan Apo Jesu-Cristo, ya ayn kalamoy mangangêd ya dyag*

<sup>14</sup> Hikaw ya patêl ko ha Panginoon, no main maghabin hiyay ampaniwala, yan a nan ampaptégan ha mangangêd ya dyag na, ay yarin miligtas ya ha parusa ya ayn anggaan ha êmbayroy paniwala na, ya ayn kalamoy mangangêd ya dyag! <sup>15</sup> Alimbawa, no main kitamon patêl ha Panginoon ya ayn maibaro haka ayn maêkan, <sup>16</sup> ta habiên yo kana, ya muli ya tana hên patêkbék ya nakêm hên dyanan ya dayi ni Apo Namalyari hên takop haka pamangan, yan a yo yan dinyanan hên kailangan na, agyan main kaw hên maihawop, ay yarin mangêd ya habaytoy hinabi yo kana! <sup>17</sup> Êmbayro etaman ya paniwala, ya ayn kalamoy mangangêd ya dyag, ay ayn pukat.

<sup>18</sup> Kayno main ampidibate ya alwan pareho ya paniwala no ay-êmén kitamon miligtas ha parusa gawan kasalanan tamo. Ta wanlan kaatag

\* 2:2 sinagoga ha habin Griego. † 2:8 Levítico 19:18b. ‡ 2:11 Éxodo 20:13,14; Deuteronomio 5:17,18. § 2:12 ha habin Griego: ya Kautuhan.

ya hukad tanay paniwala ya ayn kalamoy mangangêd ya dyag êmén hila miligtas. Wanlan kaatag êt, ya hukad tanay mangangêd ya dyag ya ayn kalamoy paniwala êmén miligtas hila. Ya pamakibat ko etaman kanlan ampaghabin êmbayro ay, habaytoy pamanyag kon mangangêd ay ampamaptêg ya main akon paniwala. Yarin mapaptêgan la ya paniwala la no ayn kalamoy mangangêd ya dyag! <sup>19</sup> Ampaniwala kaw ya mimihay Diyos haka yabay ya hi Apo Namalyari. Mangêd, noa, kulang pon ha ikaligtas yo ha parusa ha impiyerno! Hila man ya narawak ya a angkahêlêk ay ampaniwala ya mimihay Diyos, haka ampamêgpêg gawan ha limo la kana. <sup>20</sup> Main pon kamoyu ya kulang ha pamangintindi? Labay yon papptêgan ko kamoyu ya ayn pukat ya paniwala ya ayn kalamoy mangangêd ya dyag! <sup>21</sup> Ihipêñ yo hi apo Abraham ya ninuno tamo, ya intad ni Apo Namalyari hên ayn kasalanan gawan ha iparaya na dayi kana ya anak na hi Isaac.\* <sup>22</sup> Nahêlêk tamo bayro ya paniwala ni apo Abraham, ya main kalamoy dyag. Ya dinyag na ay namaptêg hên usto ya paniwala na. <sup>23</sup> Natupad ya nakahulat ha Kahulatan† ya impahulat ni Apo Namalyari, ya wana, “Hi apo Abraham ay naniwala kan Apo Namalyari. Kabay intad ni Apo Namalyari hi Abraham hên ayn kasalanan.” Haka ya pamaêg la kan apo Abraham ay kaluguran ni Apo Namalyari. <sup>24</sup> Nahêlêk yo no ay-êmén intad hên ayn kasalanan hilay main mangangêd ya dyag, alwan gawan ha anhabiên la ya ampaniwala hila.

<sup>25</sup> Êmén êt bayro kan Rahab, ya mihay hostis hên hato ya nighbayo, ya intad hên ayn kasalanan gawan ha dinyag nay mangêd ha pamitago na hên mangimaton, ya kapareho tamon Israelita, haka ha pamitoro na kanla ha kaatag ya dann, ta êmén hila a madakêp. <sup>26</sup> No ay-êmén ya lawini ya ayn nanan kaêlwa, ay natsi, ay êmén êt bayro, ya paniwala kan Apo Jesu-Cristo, ya ayn kalamoy mangangêd ya dyag, ay nanad natsi.

### 3

*Ya dila tamo ay dapat gamitêñ ha panay ikakangêd nanad ha sibolya panay naayang ya lanêñ*

<sup>1</sup> Hikaw ya patêl ko ha Panginoon, paan kaw bat mangihip hên mag-in mánoro hên habi ni Apo Namalyari, ta muwang yoy na, ya mabyat pon ya pamarusa na kannaêñ mánoro no makadyag kay hên narawak kanan pamarusa na kanlan kaatag. <sup>2</sup> Ha kaptêgan, ya balang miha kantamo ay panay hên ampimali. No main kamoyu ya a ampimali ha pamaghabí, ay hila ay ayn kapintasan, ta muwang lan pigilêñ ya sarili la. <sup>3</sup> Alimbawa ha kabayo, no dyanan tamo hên pakayat ya nag hêl, ya bêbêy la, ay mapahonol tamo ya ha antoman ya lakwêñ tamo. <sup>4</sup> Ihipêñ yoy barko ha dagat ya angkaidulin makhaw ya angin, kahlayan la man, angkaibawit hilan kapitan hên barko no antoy labay nan pangilakwan gawan ha nanaway timón ya pangibawit la. <sup>5</sup> Embayro êt ya dila tamo, agyan nanawa ya, ay angkagamit ya ha pamglalang.

Ihipêñ yoy ibon dêkêt apoy, no kumlab ya habayto, ay ampakaulam hên kapanawgtugan. <sup>6</sup> Ya dila ay ampakahira hên nanad ha apoy ya ampakaulam. Ya dila tamo, ya nakalamo ha lawini tamo, ay panay ampangubatan hên hino-hino kay na hên ya karawakan ya ampakahiran ugali tamo. Hata karawakan, ya ubat kan Satanas, ay nanad apoy ya angkumlab kaban biyay tamo. <sup>7</sup> Malyari tamon toroan ya kaganawan mangahilêb ya ayop, nanad ha manok lalê, kênan dagat, haka hinon ampandakap ha luta. Haka main

\* <sup>2:21</sup> Genesis 22:1. † <sup>2:23</sup> Genesis 15:6, 2 Cronica 20:7, Isaias 41:8.

nanan nakatoro kanlan habayto,<sup>8</sup> noa, a tamo mapigil ya dila tamo, ta panay yan ampanyag karawakan haka ampaniran kapareho tamo.<sup>9</sup> Habaytsi ya dila ay anggamitén hēn magpuri kan Apo Namalyari ya Tatang tamo haka hēn manuboy kanlan kapareho tamo. No tubuyan tamoy kapareho tamo ay nanad hēn antubuyan tamo hi Apo Namalyari, ya nam-i kantamo hēn ihip hēn nanad ihip na.<sup>10</sup> Mimihay bēbēy ya an-awahan hēn pamagpuri haka tuboy. Hikaw ya patēl ko ha Panginoon, alwan mangēd ya habayto.<sup>11</sup> Yarin umawah ha mimihay sibol ya naayang ya lanēm haka nalait ya lanēm!<sup>12</sup> Hikaw ya patēl ko ha Panginoon, yarin managēy hēn olibo ya poon igos, o managēy hēn igos ya kinēw hēn ubas! Embayro etaman, a umawah ya mangēd ya lanēm ha an-awahan hēn nalait ya lanēm. Habaytsi ya mag-in dapat ha dila tamo, ya gamitén ha panay ikakangēd.

### *Ya talino ya ubat kan Apo Namalyari*

<sup>13</sup> No main kamoyu ya muwang nay sarili na haka main pamangintindi, ay dapat yon paptēgan ya habayto ha kangēran dyag yo ha pamimiyay yo hēn main kaaypaan nakēm haka talino ya ubat kan Apo Namalyari.<sup>14</sup> Noa, no main kaw hakit nakēm gawan ha angkaridya kaw, haka labay yon panay kalabayan yo ya mahonol, ay dapat paan yon ipagmahlay ya ubat kan Apo Namalyari ya talino yo, ta ha êmbayro ay daygēn yon kalaraman ya kaptēgan.<sup>15</sup> Ta no êmbayroy nakēm yo, ay alwan ubat kan Apo Namalyari ya talino yo ya an-ipagmahlay yo. Ta habayto ay ubat di ha luta, kanlan Satanas, alwa kan Apo Namalyari.<sup>16</sup> Ta no angkaridya kaw, haka labay yon panay kalabayan yo ya mahonol, ay magkamain gulo haka hino-hino kay na hēn ya karawakan.<sup>17</sup> Noa, no ubat kan Apo Namalyari ya talino yo, ay panay kangēran ya atsi ha nakēm yo. Mag-in kaw hēn māmilatan, maaypa ya nakēm, kamwang makilamo, maingaloēn, mapanawop, ayn anggampian, haka ayn pagbabara.<sup>18</sup> No mag-in kaw hēn māmilatan, ay makapamiyay kaw hēn mahonol kan Apo Namalyari, ta no hinoy intanēm, hiya êt ya popolēn.

## 4

### *A na labay ni Apo Namalyari ya main yan kaayuan kantamo*

<sup>1</sup> Hinoy ampangubatan hēn hubakan haka gulo yo? Yarin alwan ubat ha kalabayan yon mitag-ay kaw, ya ampamagulon kangēran kaihipan yo!<sup>2</sup> Main kaw hēn labay makwa, noa, a yon makwa ya habayto kabay nakal-an kaw hēn mamatsi. Angkaridya kaw ha a yo man makwa, kabay angkangapihuhubak kaw hēn angkagulo. A kaw madyanan, gawan a kaw ampakikwa kan Apo Namalyari.<sup>3</sup> Ampakikwa kaw man, ay a kaw dyanan, gawan alwan kalabayan ni Apo Namalyari ya atsi ha ihip yo, ta pansarili yon bat kalabayan ya habayto.<sup>4</sup> Nanad kaw kanlan ampakilalaki ya alwan tapat ha ahawa yo, ta alwan hi Apo Namalyari ya anlugurēn yo! Yarin a yo muwang no anlugurēn yoy atsi ha luta, ay anhumalanghang kaw kan Apo Namalyari! Kabay no antalagaēn yoy pamanyag hēn a na labay ni Apo Namalyari, ay mag-in kaw hēn kapatsi na.<sup>5</sup> Kayno êndat yon ayn kaptēgan ya nakahulat ha Kahulatan ya impahulat ni Apo Namalyari, ya wana, “A na labay ni Apo Namalyari ya main yan kaayuan ha pamanlugud tamo kana, ha Espiritu na, ya impahapat na kantamo.”<sup>\*</sup> <sup>6</sup> Noa, maingaloēn hi Apo Namalyari, kabay nakahulat<sup>†</sup> ya êmēn di ha Kahulatan na.

“A na labay ni Apo Namalyari ya dyag lan mapagmatag-ay,  
noa, an-ingalwan na hilay maaypa ya nakēm.”

\* **4:5** Exodus 20:5, Exodus 34:14, Deuteronomio 4:24. † **4:6** Kawikaan 3:34.

<sup>7</sup> Kabay palokop kaw kan Apo Namalyari. Labanan yo hi Satanas ta muwayu yay na bayto. <sup>8</sup> No paidani kaw kan Apo Namalyari, ay paidani ya kamoyu. Hikaw ya makasalan, dapat talibatokan yoy pamanyag yon kasalan ta êmén mag-in malinis ya nakém yo. Hikaw ya pabayo-bayon ihip ay dapat ipamihan yoy ihip yo kan Apo Namalyari. <sup>9</sup> Boon nakém yon paghêhêan ya kasalan yo hên main pamanangih. Hagilyan yon kalungkutan haka pamanangih ya kahiglaan haka pamangkaili yo. <sup>10</sup> Magpakaaypa kaw ha arapan ni Apo Namalyari ta an-itag-ay na hilay maaypa ya nakém.

### *Paan kaw mihihira*

<sup>11</sup> Patêl ha Panginoon, paan kaw mihihira. No ampintasan o anhatolan yoy kapareho yo, ay nanad ampintasan yoy utoh ni Apo Namalyari ya nakahulat ya dapat milulugud kitamo. Ta no ampintasan o anhatolan yoy habaytoy utoh, ay a yo anhonolên ya habayto, ta anhatolan yoy habayto ha an-ihipêñ yoy, a yoy nan kailangan hên honolên ya habayto. <sup>12</sup> Hiyan bêngat hi Apo Namalyari, ya nam-in habaytoy utoh, ay main tungkulon hên maghabi no hinoy hinumonol hên habayto, haka hiyan bêngat ya main tungkulon hên maghabi no hino ya dapat parusaan. Yarin hino kaw, ta bat kaw manatol hên kapareho yo!

### *Paan mag-in mapaglalang*

<sup>13</sup> Pakgilamêñ yoy hata anhabiêñ‡ ko, hên hikaw ya bat ampanikih hên kalabayan yo hên maghabin, amêhêñ o nobukah kaw mako ha êmêndoy balayan hên idayat ya kalakal yo. <sup>14</sup> A yo man muwang ya malyari nobukah, ta ya biyay tamo ay nanad ha ginêñ ya mahêlêk pon, noa, tapol hên mapanat. <sup>15</sup> Ya dapat yon habiêñ, ay no kalabayan hên Panginoon hên mabiyay ko pon, ay madyag koy êmêndi o êmêndo. <sup>16</sup> Noa, ampaglalang kaw awud gawan ha kapagmatag-ayan nakém yo. Narawak ya êmbayroy kapaglalangan. <sup>17</sup> No muwang yoy dapat yon daygêñ, ta a yon daygêñ, ay kasalan ya habayto.

## 5

### *Kaingalo hilay mabandi ya mautak*

<sup>1</sup> Hikaw ya mabandi, ay pakgilamêñ yoy anhabiêñ ko. Manangih kaw hên boon nakém gawan ha hadyay kairapan ya lumatêng kamoyu. <sup>2</sup> Ya bandi yo ay ayn nanan alagá ta nanad ginumata. Ya takop ya inhinêp yo ay kinibkib. <sup>3</sup> Tinaêý ya ginto haka pilak yo. Habain ya taêý, ya nanad ha apoy ya manguk-uk êt hên laman yo, gawan imot yo, ay mamaptêg hên laban kamoyu ha tawlin allo ha pamanatol ni Apo Namalyari hên mam-in parusa. Habain ya inhinêp yoy pibandian, yan marani anay tawlin allo. <sup>4</sup> Manggilam kaw, ta nanad magilaman yoy baëg hên upa ya a yo indin kanlan nanggapah ha luta yo. Haka ya pamakiingalo lan a inupaan ay nidaoh kan Apo Namalyari ya makapangyarihan. <sup>5</sup> Hikaw ya mangabandi, ay napday na ha kaganawan nilabay yo di ha luta. Hikaw ay nanad ha pinataba ya ayop ya patsêñ. <sup>6</sup> Sinintinsahan yon impapatsi hilay ayn kasalan, agyan a hila anlumaban kamoyu.

### *Dapat magtêêh*

<sup>7</sup> Patêl ha Panginoon, magtêêh kaw hên angga ha lumatêng ya Panginoon. Ihipêñ yo hilay mananaman. Ampagtêêh hilan pakaêngganan ya uran angga ha tumoay magapah la, ya taganán maalagá. <sup>8</sup> Êmbayro etaman, ay dapat

‡ 4:13 Kawikaan 27:1.

magtêêh kaw. Pakataniêhên yoy nakêm yo gawan marani yanay paman-lumatêng hên Panginoon. <sup>9</sup> Hikaw ya patêl ko, paan kaw nagmulongan ha miha ta miha, ta êmên a kaw hatolan hên parusaan hên Panginoon. Honolên yoy utoh ko, ta taganán marani yay nan lumatêng! <sup>10</sup> Anlugurên kon patêl, tuwarêñ yo hilay mâmipamwang ni Apo Namalyari ya nag-in mapagtêêh ha hadyay kairapan. <sup>11</sup> Pakaihipêñ yo ya habaytsi. An-itad tamo hilan iningal-wan ni Apo Namalyari, hilay nagtêêh ha pamanhumonol la. Nagilam yoy na ya tungkol ha pamagtêêh ni Job ha hadyay kairapan, haka ha katatawlian, no ay-êmên na yan tinumbahan kangêran ni Apo Namalyari, ya malugud haka maingaloën.

<sup>12</sup> Hikaw ya patêl ko ha Panginoon, main ako pon hên habiên kamoyu ya igit pon êt ha kal-atan. Paan kaw maghumpa hên maghabin êmên di, “Muwang hên langit,” o “Muwang hên luta,” o hino pon. Ustoy nay paawo o paahê, ta êmên kaw a parusaan ni Apo Namalyari.

#### *Ya halangin lan ayn kasalanan*

<sup>13</sup> No main kamoyun ampakaranas hên kairapan, ay dapat manalangin hila kan Apo Namalyari. No main kamoyun anhumigla, ay dapat magkanta hilan pamagpuri kana. <sup>14</sup> No main kamoyun anhakitên, ay dapat ipabaêg lay toa ya ampamaala kamoyun patêl ha Panginoon ya angkapi-tsi-tsipon. Ta êmên la hila ihalangin kan Apo Namalyari haka punihan hên pêrad ya laro\* ha langan ni Panginoon Jesu-Cristo. <sup>15</sup> Habaytoy halangin la ya main makhaw ya paniwala ha kapangyarihan ni Apo Namalyari, ay makaalih hên hakit, ta pakibatan hên Panginoon ya halangin la, haka patawarêñ na hila no nakadyag hilan kasalanan. <sup>16</sup> Kabay aminêñ yoy kasalanan yo ha miha ta miha, haka miyahalangin kaw ta êmên maalih ya hakit yo. Makhaw ya halangin lan mahonol kan Apo Namalyari ta ampakibatan na ya halangin la. <sup>17</sup> Ihipêñ yo hi Elias, ya kapareho tamo. Booy nakêm yan nanalangin kan Apo Namalyari ya a manguran, kabay ha tatloy taon haka anêm ya buwan, ay a nanguran. <sup>18</sup> Pangalabah hên habayto, ay nanalangin yay na êt oman, ya manguran, kabay nanguran ana êt haka nanagêy ya kaganawan tanaman. <sup>19</sup> Hikaw ya patêl ko ha Panginoon, pakaihipêñ yo ya habaytsi. No main kamoyu ya andumayo ha kaptêgan, ta mam-i kaw hên payo kana ya mamiorong kana ha kaptêgan, <sup>20</sup> ay dapat yon mamwangan ya mailigtas yo ha parusa ya ayn anggaan, ya kaêlwa hên habaytoy makasalanan ya andumayo ha kaptêgan, ta patawarêñ ni Apo Namalyari ya hinoman ya kasalanan nan habayto.

---

\* **5:14** Marcos 6:13.

## Ya unan hulat ni apostol Pedro

*Paunan habi ha unan hulat ni apostol Pedro*

Habaytsi ya una kanlan loway hulat ya hinulat ni apostol Simon Pedro, ya miha kanlan labinloway apostol ni Panginoon Jesu-Cristo. Hinulatan nay kapareho nan Israelita ya ampaniwala kan Panginoon Jesu-Cristo, ya napitatayak ha ayri man ya legal ha lokop hên Asia Menor ta ampairapan hila gawan ha paniwala la kan Apo Jesu-Cristo. Habaytsi ya hulat ay ampamataniêh hên nakêm lan ampairapan. An-ipaihip na kanla ya Mangêd ya Habi tungkol kan Apo Jesu-Cristo. Inungkat na êt ya tungkol ha kamatsan, pangabiyay oman haka ya pamag-orong hên Panginoon ya ampam-in kasiguradoan ya mabiyay hilan oman etaman. Gawan ha muwang lay habaytoy kaptégan, ay dapat la dayin tanggapêñ, haka têêhêñ ya hinon kaparusaan. Inaralan na hila êt no ay-êmêñ ya kaihipan haka pamimiyay la ay dapat mag-in ayn kapintasan nanad ha kaihipan haka pamimiyay ni Apo Jesu-Cristo. Dapat palokop hila ha kaganawan ampamaala kanla. Dapat mag-in maaypa ya nakêm lan ampamaala kanlan kapareho lan ampaniwala. Dapat milulugud ya hilay ampaniwala.

Kabooan hên pinakalaman

Umpisan hulat 1:1-2

Pamanêmtêm hên tungkol ha pamiligtas ya ubat kan Apo Namalyari 1:3-12

Ya tungkol ha pamimiyay ya ayn kapintasan 1:13-2:10

Dapat makatêêh ha kaparusaan 2:11-4:19

Dapat maaypan nakêm hên humonol kan Apo Jesu-Cristo 5:1-11

Ya tawlin habi 5:12-14

<sup>1</sup> Hiko hi Simon Pedro, ya mihay apostol ni Apo Jesu-Cristo. Anhulatan kataw, ya namibalag hên mantêg yon bali, haka napitatayak ha probinsyan Ponto, Galacia, Capadocia, Asia, haka Bitinia. <sup>2</sup> Hêñ hato pon, ay pinili na kaw ni Tatang tamo, hi Apo Namalyari, ta muwang nay mag-in anak na kaw. Pinili na kaw ta êmêñ kaw mag-in mahonol kan Apo Jesu-Cristo ha kapangyarihan hên Espiritu na, ya hinumapat kamoyu ta pinatawad ya kasalanan yo gawan ha daya ni Apo Jesu-Cristo hên hiyay pinatsi.

An-ihalangin kataw ya pahanan ni Apo Namalyari ya kapatêkbêkan yo haka ya ingalo na kamoyu.

*Ya biyay ya ayn angga ya an-êngganan tamo*

<sup>3</sup> Purién tamo hi Apo Namalyari ya Diyos, haka ya Tatang ni Panginoon tamon Jesu-Cristo. Gawan ha ingalo na, ya ayn kapantag, ay dinyanan na kitamon bayoy biyay gawan biniyay oman hi Apo Jesu-Cristo. Kabay sigurado kay ya matanggap naêñ ya mangangêd ya an-êngganan tamo <sup>4</sup> ya nakal-an ha langit. Habaytoy a angkahira, a andumawak, haka a mabawan-an alagá. <sup>5</sup> Matanggap yoy habayto lano no tuparêñ ni Apo Namalyari ya kaligtasan yo ha katatawlian allo, haka ya kapangyarihan na etaman ya mangillag kamoyu, gawan ha paniwala yo kan Apo Jesu-Cristo.

<sup>6</sup> Gawan habayto, ay malyari kaw hên maghigla, agyan angkaranasan yo ya hinon kairapan hên panubuk. <sup>7</sup> Ta ya kairapan ay pamanubuk, ta êmêñ mamwangan no pêtêg ya paniwala tamo kana. Nanad ha pamanubuk ha ginto. Ya paniwala tamo ya ayn anggaan, ay maalagá êt ha ginto ya main

anggaan. No pêtêg ya paniwala tamo, ay lano ha pamag-orong ni Apo Jesu-Cristo, ay pansinên, dayêwên, haka galangên kitamo ni Apo Namalyari. <sup>8</sup> A yo man êt nahélêk hi Panginoon Jesu-Cristo, ay anlugarûn yo ya. A yo ya man angkahélêk amêhén, ay ampaniwala kaw kana. Kabay a makwan ihipên ya kahiglaan yo ya ayn kapantag, <sup>9</sup> gawan angkatanggap yoy nay kaligtasan, ha paniwala yo kan Apo Jesu-Cristo.

<sup>10</sup> Habaytoy kaligtasan tamo ya indin kantamo gawan ha ingalo ni Apo Namalyari, ay impamwang lan mámpamwang hên an-ipaihip na kanla hên hato, noa, a la taganán angkaintindihan ya habayto, pinag-aralan la man hên mangêd. <sup>11</sup> Ta taganán labay lan mamwangan no makano, haka no ay-êmén matupad ya impapapêt kanla hên Espiritu ni Cristo. Ta ya impapapêt kanla, ay yabay ya kairapan ya têêhén na, ya pangabiyay nan oman, haka ya pamag-orong na ha langit. <sup>12</sup> Impamwang kanla, ya alwan ha ikakangêd la, noa, ha ikakangêd tamo ya papêt la. Yabay ya Mangêd ya Habi tungkol kan Apo Jesu-Cristo ya impalinaw kamoyu hên kalamo kon hinapatan hên Espiritu ni Apo Namalyari ya in-utoh nan ubat ha langit. Hila man ya anghel ni Apo Namalyari, ay labay la dayi hên maintindihan ya habayto.

### *Dapat mag-in ayn kapintasan ya biyay tamo.*

<sup>13</sup> Gawan ha kal-atan ya dinyag ni Apo Namalyari ha ikakangêd tamo, ay il-an tamoy ihip tamo hên manyag kalabayan na hên main pamapgigil ha sarili. Pakataniêhên tamoy nakêm tamo ha pamangêggan tamo ha ingalo na kantamo ha pamag-orong ni Jesu-Cristo. <sup>14</sup> Gawan hikitamoy mahonol ya anak ni Apo Namalyari, ay paan kitaminan manyag hên karawakan kalabayan lawini ya mana tamon andaygên, hên alwa kitamo êt hên anak na. <sup>15</sup> Noa, dapat tuwarêñ tamoy pamimiyay ya taganán ayn kapintasan, ta hi Apo Namalyari ya namili kantamo hên mag-in kana, ay banal. <sup>16</sup> Gawan nakahulat ha Kahulatan ya impahulat ni Apo Namalyari, ya êmén di, “Dapat kaw mag-in banal gawan hikoy banal.”\*

<sup>17</sup> A ya ampamilin tawo hi Apo Namalyari, ya ambaêgên yon Tatang. Ampanatol ya do ha dinyag hên balang miha. Kabay dapat yo yan galangên, kaban ampamiyay kaw di ha luta. <sup>18</sup> Muwang tamo ya hikitamoy inlitas ha ayn pukat ya pamimiyay ya pinuli tamo ha ninuno tamo. Ya pinamayad hên habaytoy kaligtasan tamo ay alwan nanad ginto haka pilak ya angkaalihan alagá, <sup>19</sup> ta ya pinamayad kaligtasan tamo, ay maalagáy daya ni Apo Jesu-Cristo. Hiyay nanad ha biseron tupa ya ayn kapintasan ya in-átang kan Apo Namalyari. <sup>20</sup> Hiyay pinili ni Apo Namalyari hên a êt dinyag ya hata luta, noa, babayo yan impamwang ha ikakangêd tamo amêhén ya marani ya anggaan hên luta. <sup>21</sup> Gawan kana, ay ampagtsiwsa kitamina kan Apo Namalyari, ya namabiyay kanan oman, haka namiorong kana ha langit hên mamaala hên kalamo na. Kabay nakapéptêng ya paniwala tamo kan Apo Namalyari haka an-êngganan tamoy impangako na.

<sup>22</sup> Gawan nalinisan taminay nakêm tamo ha pamanhumonol tamo ha kaptégan ya tungkol kan Apo Jesu-Cristo, ay pêtêg ya pamilulugud tamon patêl ha Panginoon. Kabay ihundo tamoy pamilulugud tamo hên booy nakêm. <sup>23</sup> Habaytoy nanad in-anak kitamon oman, haka hata bayoy biyay ay alwan ubat ha tawo ya matsu, noa, habaytoy ubat ha habi ni Apo Namalyari ya angkabiyay ya taganán a ampangoman. <sup>24</sup> Gawan ya nakahulat ha Kahulatan ya impahulat ni Apo Namalyari, ay êmén di,

\* <sup>1:16</sup> Levítico 11:44 haka 19:2.

“Hilay tawo ay nanad lamon ya tampol angkayango, haka ya ikadayêw la, ay a angkabuyot, ya nanad bulaklak ya angkawngêy,  
 25 noa, ya habi hên Panginoon, ay taganán a ampangoman hên angga-angga.”†

Yabay ya Mangêd ya Habi tungkol kan Apo Jesu-Cristo ya impamwang kamoyu.

## 2

### *Hi Panginoon Jesu-Cristo ay nanad ha pinakamaalagáy bato*

1 Kabay alihêñ yoy na ya panyag yo hên hinon karawakan, hinon kalokwan, pagbabara, karidyaan, haka hinon pamaniran kapareho tamo. 2 Dapat maghinta kitamo ha habi ni Apo Namalyari, hên nanad ha kopianak ya maghinta ha gatas, ta êmén humkaw ya paniwala tamo angga ha matupad ya kaligtasan tamo. 3 Daygêñ tamoy habayto gawan napaptêgan tamoy ingalo hên Panginoon.

4 Paidani kaw kan Apo Jesu-Cristo ta taganán angkabiyay ya. Hiyay nanad ha mihay bato ya in-il-an ha pamanyag bali, noa, hiyay a tinanggap hên tawo. Embayro man, hiyay maalagá ha hêlêk ni Apo Namalyari ya namili kana. 5 Hikitamo ya dinyanan biyay ni Apo Namalyari, ay nanad etaman bato ya an-il-an ha pamanyag hên pagsimbaan kana, gawan hikitamo ay andaygêñ nan angkapi-tsi-tsipon ya ampagsimba kana. Pinili na kitamo hên mag-in pinakapari na, haka ya paghuyo haka pamagpuri tamo kana ay pinakaátang tamo kana. Habaytoy madyag tamo gawan kan Apo Jesu-Cristo ha ikahigla ni Apo Namalyari. 6 Muwang tamo ya pêtêg ya habayto, gawan nakahulat ha Kahulatan ya impahulat ni Apo Namalyari, ya êmén di:

“Lêng-êñ yo! Main akon pinili, ya idistino ko ha balayan Sion. Hiyay nanad maalagáy bato ya pampah-êy hên bali, haka hilay maniwala kana ay a mahira ya nakêm.”\*

7 Kabay hikitamoy ampaniwala kana, ay an-itad tamo yan maalagá. Noa, hilay a ampaniwala kana, ay dapat lan ihipêñ ya impahulat ni Apo Namalyari, ya êmén di:

“Ya bato ya intapon lan manyag bali, ay yabay ya nag-in pinakamaalagáy bato, ya namapah-êy hên bali.”†

8 Haka na impahulat etaman ya êmén di:

“Habaytoy bato ay kapibatolán.”‡

Hêñ haton lagi êt, ay tinalagá nay na ni Apo Namalyari ya êmbayro ya malyari kanla, gawan ha a hila humonol ha Mangêd ya Habi tungkol kan Apo Jesu-Cristo.

9 Noa, hikitamoy patêl ha Panginoon ya ampaniwala kan Apo Jesu-Cristo, ay pinili ni Apo Namalyari hên mag-in kana. Hikitamoy láhi na, ya ampaghuyo kana hên nanad pari ya ampipaghuyo ha pinakapoon la ha langit, ta êmén tamo ipamwang ya kapapaêpapah ya dyag na gawan in-alíh na kitamo ha kariglêman hên kasalanan, ta gintan na kitamo ha kapapaêpapah ya kahawangan hên lokop na. 10 Hêñ haton una, ay alwa kitamo êt kana, haka a kitamo êt nakatanggap ingalo na, noa, amêhêñ ay kana kitamina, haka natanggap taminay ingalo na.

*Dapat palokop ha kaganawan main tungkulon haka panay manyag kangêran*

† 1:25 Isaias 40:6-8. \* 2:6 Isaias 28:16. † 2:7 Awit 118:22. ‡ 2:8 Isaias 8.14.

<sup>11</sup> Anlugarên kon patêl ha Panginoon ya napitatayak, ya ampaglaêh pon ha marayo, ampakihabi ko kamoyu ya paan kaw manyag hên karawakan kalabayan lawini, ta ya pamanyag hên habayto ay anlumaban ha paniwala yo kan Apo Jesu-Cristo. <sup>12</sup> Dapat mamiyay kitamo hên mangêd hên kalamo hilay a ampagpalokop kan Apo Namalyari, ta habiên la man, ya hikitamoy mapanyag hên nangarawak, ay mahêlêk la, ya mangangêd ya dyag tamo, haka la bayto puriên hi Apo Namalyari ha pamanlumatêng na hên manatol.

<sup>13</sup> Gawan ha Panginoon, ay dapat palokop kitamo ha kaganawan main tungkulon bayri ha luta. Dapat palokop kitamo ha pinakapoon tamo.

<sup>14</sup> Dapat palokop kitamo etaman kanlan gobernador haka ya kaatag ya an-iutoh hên pinakapoon hên mamarusa kanlan mapanyag karawakan, haka mam-in pamandayêw kanlan mapanyag kangêran. <sup>15</sup> Ta ya labay ni Apo Namalyari, ay gawan ha pamimiyay tamo hên ayn kapintasan, ay ayn hilan mahabi ya tungkol kana ya hilay ayn minuwang, ya anhumalanghang kana.

<sup>16</sup> Hikitamoy ampaniwala ha Panginoon, ay alway nan ipoh hên hinoman, haka habaytoy dapat mahêlêk ha biyay tamo. Noa, habayto ay a labay habiên ya malyari kitaminan manyag karawakan. Ta dapat kitamon mamiyay hên nanad tagahuyo ni Apo Namalyari. <sup>17</sup> Dapat tamon galangêh ya balang hino. Dapat lugurên tamo hilay patêl tamo ha Panginoon. Dapat igalang tamo hi Apo Namalyari haka ya pinakapoon hên bansa tamo.

### *Têêhênyâ hadyay kairapan hên ayn hakit nakêm*

<sup>18</sup> Hikaw ya ipoh, ay palokop kaw ha amo yo hên main pamanggalang, maingaloên hila o alwa man. <sup>19</sup> Mangêd no daygêñ yoy habayto, ta ikahigla kaw ni Apo Namalyari, no gawan ha muwang yo ya, ay ampakatêh kaw ha hadyay kairapan, agyan ayn kaw hên kasalanan. <sup>20</sup> Noa, no alimbawa ta nanyag kaw hên karawakan, yarin maipagmahlay yo ya pamagtêh yo ha parusa yo! Ahê! Noa, dayêwêñ kaw ni Apo Namalyari no ampakatêh kaw ha hadyay kairapan ya lumatêng kamoyu gawan ampanyag kaw hên kangêran. <sup>21</sup> Ta tinalagá ni Apo Namalyari, ya hikitamoy pinili na, ay magtêh hên hadyay kairapan. Panêmtêman yo ya hadyay kairapan ya dinanan ni Apo Jesu-Cristo ha ikaligtas tamo, hên ayn hakit nakêm. Haka ha dinyag na, ay dinyanan na kitamon alimbawa ya dapat tamon honolên. <sup>22</sup> Hi Apo Jesu-Cristo ay a nanyag hên hinon kasalanan, haka taganán a ya naglaram.

<sup>23</sup> Hêñ minusmus la ya, ay a ya nanumbah hên naghabi hên narawak. Hêñ pinairapan la ya, ay a ya nanumbah kanla. Pinaulayan na hila kan Apo Namalyari ya mangêd ya mangatoynungan. <sup>24</sup> Ha pangamatsi na ha koros, ay hiyay nagdusa gawan ha kasalanan tamo, ta êmêñ tamo talibatokan ya kasalanan tamo haka mamiyay hên mahonol kana. Gawan ha pangamatsi na, ay naiúmang kitamo kan Apo Namalyari ya nanad ha tinambalan kitamo. <sup>25</sup> Hikitamoy nanad tupa ya nitama, noa, amêhêñ ay nag-orong kitamina kan Apo Jesu-Cristo, ya pinakapastol, ya ampangillag kantamo.

## 3

### *Ya aral kanlan miähawa*

<sup>1</sup> Embayro êt, ay hikaw ya babayi, ay kailangan yon palokop ha ahawa yo, ta no main a pon ampanhumonol ha habi ni Apo Namalyari, ay mampaniwala hila, gawan ha kangêran pamimiyay yo. Mapaniwala hila, agyan a kaw maghabi, <sup>2</sup> ustom mahêlêk lay pamanggalang yo haka ya malinis ya pamimiyay yo. <sup>3</sup> Pakaihipêñ yo, ya kahampatan yo ay alwa ha pangayos lawini, nanad ha paytuyo hên habot, o ha panggamit hên ginto, o pagbaro hên mangahampat. <sup>4</sup> Noa, ya dapat mag-in kahampatan yo, ya an-ikahigla ni Apo

Namalyari, ay hatoy a ampangoman ya atsi ha nakêm ya maaypa, haka main kapatêkbêkan. <sup>5</sup> Émén ya bayro ya pamimiyay lan babayi ya maka-Diyos hên haton lagi, ya ampagtsiwalla kan Apo Namalyari. Ya pagpalokop la ha ahawa la, ay namahampat kanla. <sup>6</sup> Habaytoy nanad kan Sara ya ahawa ni Abraham, ya hinumonol kan Abraham, ya binaêg nan ámo na, ha pamanggalang na kana. Hikaw ya babayi amêhên ay manoto kaw kan Sara, no ampamiyay kaw hên main kangêran, haka no alwa kaw malimo, hinoman ya malyari.

<sup>7</sup> Hikaw ya lalaki etaman, ay dapat yon galangên haka lugurên ya ahawa yo ha pamilalamo yo, ta alwan makhaw ya lawini lan babayi, haka dinyanan hila etaman ni Apo Namalyari hên biyay ya ayn angga. Dapat yon daygên ya habayto, ta êmén ayn makahabkol ha panalangin yo.

*Têehêñoyoy pamagdusa ya lumatêng kamoyu agyan ampanyag kaw hêñ kangêran*

<sup>8</sup> Amêhêñ, ay ubuhêñ kataw hêñ aralan, ya dapat main kaw hêñ pakikim-ihia, mi-iingalo kaw, milulugud kaw, dapat panay mangêd ya nakêm yo, haka magpakaaypa kaw hêñ nakêm ha miha ta miha. <sup>9</sup> Dapat a yon tumbahan hêñ karawakan, ya hilay ampanyag hêñ karawakan kamoyu. Haka paan kaw maghabin narawak kanlan ampaghabin narawak kamoyu. Noa, ihalangin yo hila, ya ingalwan na hila, ta pinili na kaw etaman ni Apo Namalyari hêñ mag-in kana, ta êmén na kaw ingalwan. <sup>10</sup> Ya nakahulat ha Kahulatan ya impahulat ni Apo Namalyari ay êmén di:

“Hilay mabay hêñ mag-in mahigla haka mangêd ya biyay la, ay dapat patgênan lay pamaghabi hêñ nangarawak haka alwan pêtêg.

<sup>11</sup> Dapat patgênan lay pamanyag hêñ nangarawak, ta pakikwanan hila tanan manyag hêñ panay kangêran, ta êmén mangêd ya pamakilamo la ha kapareho la.

<sup>12</sup> Ta ya Panginoon ay ampangillag kanlan mahonol kana, haka gilamên nay panalangin la. Noa, ampanalanghang ya kanlan mapanyag karawakan.”

<sup>13</sup> Yarin main makapairap kamoyu no pakikwanan yon manyag kangêran!

<sup>14</sup> Noa, makaranas kaw man hêñ pamagdusa gawan ha pamanhumonol yo kan Apo Namalyari, ay malyari kaw hêñ maghigla, ta ya ingalo na ay atsi kamoyu. Kabay paan kaw malimo haka paan kaw manyagah, <sup>15</sup> noa, dapat yon simbaêñ hi Apo Jesu-Cristo, hêñ daygên yo yan Panginoon ha biyay yo. Dapat panay kaw nakal-an hêñ makibat kanlan mangotâng kamoyu hêñ tungkol ha kasiguradoan yo ya iligtas na kaw ni Apo Namalyari. <sup>16</sup> Noa, dapat naamêy ya pamaghabi yo kanla hêñ main pamanggalang. Dapat panay malinis ya konsinsya yo, ta êmén mipakarêng-êy hilay ampaghabin pamanira kamoyu gawan ha mangêd ya pamimiyay yo, ha pamanhumonol yo kan Apo Jesu-Cristo. <sup>17</sup> Ta mangêd ya makaranas kitamon pamagdusa gawan ha pamanhumonol tamo ha kalabayan ni Apo Namalyari, kanan makaranas kitamon pamagdusa ha pamanyag hêñ karawakan. <sup>18</sup> Ta natsi ya hi Apo Jesu-Cristo gawan ha kasalanan tamo. Minghan yan natsi, haka a yay nan matsin oman. Hiya ya ayn hinon kasalanan, ay natsi para kantamon makasaranan, ta êmén na kitamo maiúmang kan Apo Namalyari. Pinatsi la man ya lawini na, ay biniyay yan oman hêñ Espiritu ni Apo Namalyari.

<sup>19</sup> Ha kapangyarihan nan habaytoy Espiritu ni Apo Namalyari, ay nanoro ya kanlan espiritu lan natsi, ya nakahukul. <sup>20</sup> Hila ya habaytoy a hinumonol kan Apo Namalyari hêñ panaon ni apo Noe. Pinagtêéhan na hilan inênggan ni Apo Namalyari êmén hila dayi maghêhê ha kasalanan la, kaban ampanyag hi apo Noe hêñ barko. Noa, gawan a hila naghêhê, ay wawalo hila tana,

ya naligtas ha lanêm. Yabay ya hilan Noe. <sup>21</sup> Bayro kitamon makakwan alimbawa hên kaligtasan tamo, gawan hên binawtismoan kitamo ay inlitas kitamo ha parusa. Ta ya pamawtismo, ay alwan êmén ha pangalih hên yangat ha lawini tamo, noa, mihay pangako kan Apo Namalyari ya honolên tamo ya, gawan muwang tamo ya pinatawad ya kasalanan tamo. Main kitamon kaligtasan gawan biniyay oman hi Apo Jesu-Cristo, <sup>22</sup> ya nag-orong ha langit, haka atsi yay na ha dapit panabtab ni Apo Namalyari. Amêhên, hilay anghel, haka hilay kaganawan main kapangyarihan haka kaganawan main tungkulay ay ampagpalokop kana.

## 4

### *Ya bayoy biyay*

<sup>1</sup> Gawan haday kairapan ya nadanasan ni Apo Jesu-Cristo hên atsi ya di ha luta, ay dapat tamo êt hên iléan ya sarili tamo hên têehêna ya kairapan, ta no ihundo tamoy pamanhumonol kan Apo Namalyari, angkatanam tamo man ya kairapan, ay mapaptêgan ya tinalibatokan tamoy kasalanan. <sup>2</sup> Paubat amêhêna angga ha matsi kitamo, ay honolên taminay kalabayan ni Apo Namalyari. Alway nan sarili tamon kalabayan ya mahonol. <sup>3</sup> Hukad anay panaon ya hinayang tamo ha pamanyag karawakan, ya nanad ha andaygén lan a ampagpalokop kan Apo Namalyari, ya nanad ha pamanyag karawakan kalabayan lawini hên ayn pamagpigel ha sarili, pamaglahing, pamakilahing hên ayn têgén, kapaparêng-êy ya dyag ha pamagsimba ha alwan pêtêg ya diyos. <sup>4</sup> Ampag-êpapah hilay ayn paniwala kan Apo Namalyari, no awta a kaw na ampakilamo kanla ha pamanyag karawakan kalabayan lawini hên ayn pamagpigel ha sarili, kabay anhiraén la kaw. <sup>5</sup> Noa, lano tumbahan hila ta kiarap hila kan Apo Namalyari, ta nakal-an yan hatolan ya hilay angkabiyay pon, haka hilay natsi. <sup>6</sup> Kabay impamwang etaman Ya Mangêd ya Habi tungkol kan Apo Jesu-Cristo kanlan natsi, ta êmén hila makapaghêhê ha kasalanan la, haka mamiyay hên ayn angga hên nanad kan Apo Namalyari, natsi man ya lawini la hên nanad ha lawini hên balang miha.\*

### *Ya kaganawan daygén tamo, ay dapat ha kapangyarihan ni Apo Jesu-Cristo*

<sup>7</sup> Marani ya anggaan hên luta, kabay pakataniêhêna yoy nakêm yo, êmén yo mapigil ya sarili yo, ta êmén makapanalangin kaw hên mangêd. <sup>8</sup> Igit ha kal-atan, ay dapat milulugud kaw hên boon nakêm, ta no milulugud kitamo, ay panay kitamon ampamatawad. <sup>9</sup> Pakahigla kaw hên mama-howén kanlan patêl ha Panginoon. <sup>10</sup> Hino-hino kay na hên ya galing haka kamwangan ya indin ni Apo Namalyari ha balang miha. Kabay dapat tamon gamitén ya habayto ta êmén mapakinabangnan lan patêl tamo ha Panginoon. <sup>11</sup> Hinoman kantamo ya dinyanan galing hên manoro, ay dapat pakaihipén ya habaytoy an-itoro tamo ay habi ni Apo Namalyari. Hinoman kantamo ya dinyanan nan galing hên maghuyo, ay dapat maghuyo ha hêkaw ya an-idin ni Apo Namalyari kantamo, ta êmén masimba hi Apo Namalyari gawan kan Apo Jesu-Cristo ha kaganawan dyag tamo. Purién hi Apo Namalyari ya makapangyarihan hên ayn angga. Amen.

### *Hadyay kairapan ya pamanubuk kanlan ampaniwala kan Apo Jesu-Cristo*

<sup>12</sup> Anlugurén kon patêl ha Panginoon, paan kaw mag-êpapah ha haday kairapan hên pamanubuk ya angkaranasan yo, ta habayto ay taganán angkalyari ha ampaniwala kan Apo Jesu-Cristo. <sup>13</sup> Paan kaw mag-êpapah, noa, humigla kaw, ta angkaranasan yoy haday kairapan ya nanad ha

\* <sup>4:6</sup> Roma 5:12-17.

nadanasan ni Apo Jesu-Cristo, ta êmén kaw humigla lano, haka man-angaw kaw gawan ha kahiglaan yo, ha pamipamwang ya kapahilêw ya panga-Diyos na. <sup>14</sup> Iningalwan kaw no gawan ha paniwala yo kan Apo Jesu-Cristo ay main maghabin pamanira kamoyu, ta ya labay habiên hên habayto, ay atsi kamoyu ya makapangyarihan ya Espiritu ni Apo Namalyari. <sup>15</sup> Paan kaw mamatsin kapareho, o manakaw, o manyag kaatag pon ya karawakan, o makiêmén ha alwan dapat pakiêménan. Ta usto ya pairapan kaw no manyag kaw hên êmbayro. <sup>16</sup> Noa, paan kaw marêng-êy no makaranas kaw hên pamagdusa gawan ha paniwala yo kan Apo Jesu-Cristo, nokay puriên yo hi Apo Namalyari, gawan hikaw ay ambalayên hên kalamo lan ampaniwala kana. <sup>17</sup> Ta nilumatêng ya panaon hên pamanatol ni Apo Namalyari, haka hikitamo ya atsi ha pamilya na, ay una hên hatolan. No hata kairapan ya angkaranasan tamo, ay umpisan pamanatol, ay kapalimo taganá ya malyari kanlan a anhumonol ha Mangangêd ya Habi ya ubat kan Apo Namalyari!

<sup>18</sup> Êmén ya di ya nakahulat ha Kahulatan ya impahulat na:

“No kairapan ya angkaranasan lan miligtas, ya mahonol kan Apo Namalyari, ay hino baytoy malyari kanlan mapanyag kasalanan, ya alwan maka-Diyos!”

<sup>19</sup> Kabay no ampakaranas kaw hên kairapan gawan ha kalabayan ni Apo Namalyari, ay ihundo yoy pamanyag yo hên kangérân, haka ipatsiwala yoy sarili yo kanan nanyag kamoyu, ya a ampamaulay kamoyu.

## 5

### *Ya aral kanlan nanad pastol ya ampamaala ha patêl ha Panginoon*

<sup>1</sup> Amêhêñ, ay main akon iaral kamoyun toa ya ampamaala ha mipapatêl kan Panginoon Jesu-Cristo. Hikoy kapareho yon ampamaala ya nakahêlêk hên hadyay pamagdusa ya dinanas na, haka makapikiatag ako lano ha pamipamwang ya kapahilêw ya panga-Diyos na. <sup>2</sup> Dapat yon hayhayên ya hilay patêl ha Panginoon bahêñ ya nanad tupa ni Apo Namalyari, ya impatsiwala na kamoyu. Daygên yoy habayto hên boon nakêm hên main kahiglaan, alwan ha angkapilitan kaw haka alwan gawan labay yo hên magkamain pera. <sup>3</sup> Paan yon daygên ámo ya sarili yo ha impahayhay kamoyu, noa, dapat hikaw ya mag-in alimbawa la, ya tuwarêñ la. <sup>4</sup> Ta ha pag-orong lano ni Apo Jesu-Cristo, ya pinakapoon pastol, ya ampanayhay kantamo, ay mangêd ya mag-in primyo yo, ta makapakilamo kaw ha kapahilêw ya panga-Diyos na ya ayn anggaan.

<sup>5</sup> Hikaw etaman ya miyawhay, haka hikaw ya dalaga, haka hikaw ya anak pon, ay palokop kaw kanlan toa ya ampamaala kamoyu. Hikaw ya ampaniwala kan Apo Jesu-Cristo, ay magpakaaypa kaw ngan hên maghuyo ha miha ta miha, ta êmén di ya nakahulat ha Kahulatan ya impahulat ni Apo Namalyari:

“Anhalanghangêñ ni Apo Namalyari hilay mapaglambung, noa, an-ingalwan na hilay maaypay nakêm.”

<sup>6</sup> Kabay magpakaaypa kaw, haka kaw palokop ha kapangyarihan ni Apo Namalyari, ta êmén na kaw itag-ay lano. <sup>7</sup> Ipatsiwala yo kana ya kayagahan hên ihip yo, ta hiyay panay hên ampangillag kamoyu. <sup>8</sup> pigilên yoy sarili yo, haka pakaillag kaw, ta hi Satanas, ya kapatsi yo, ay nanad ha mihay leon ya ampilibot-libot hên ampan-êngêl hên ampanlêk hên madawhong nan iboon. <sup>9</sup> Kabay pakataniêhêñ yoy paniwala yo, ta êmén yo ya malabanan, ta muwang yo etaman ya hilay patêl yo ha Panginoon ha boon luta, ay am-pakaranas êt hên êmbayroy pamagdusa. <sup>10</sup> Alwan mabuyot ya pamakaranas

yon pamagdusa. Haka pamakayarin habayto, ay daygén na kaw hēn mangêd ni Apo Namalyari, ya maingaloën, ya nanagyat kamoyu hēn makilamo ha ayn kapantag ya karangalan na hēn angga-angga, gawan ha pakikimiha yo kan Apo Jesu-Cristo. Pataniêhēn nay paniwala yo, haka dyanan na kaw hēn kakhawan ha pamaghuyo yo kana. <sup>11</sup> Hiyan taganá ya ayn kapantag ha kapangyarihan ya magpa ayn angga! Amen.

### *Tawlin pangumusta*

<sup>12</sup> Hinulatan kataw hēn hata naipêk ya hulat, ha hawop ni Silvano ya an-ibilang kon mapaypaniwal-an ya patêl ko ha Panginoon. Hinulatan kataw ta êmēn pahiglaën ya nakêm yo, haka ta êmēn paptégan ya angkaranasan yo, ay pêtêg hēn ubat ha ingalo ni Apo Namalyari. Ihundo yoy pamimiyay yo ha ingalo na. <sup>13</sup> Hilay patêl ha Panginoon ya angkapi-tsi-tsipon ha Babilonia, ya kapareho yon pinili ni Apo Namalyari hēn mag-in kana, ay ampangumusta kamoyu. Hi Marcos, ya anlugurên kon anak ha paniwala ay ampangumusta êt kamoyu. <sup>14</sup> No mangapipihiélêk kaw, ay migagalang kaw ta êmēn mahêlêk ya ampilulugud kaw.

An-îhalangin kataw ya main pakikimiha kan Apo Jesu-Cristo, ya magka-main kaw hēn kapatêkbêkan nakêm.

## Ya ikalwan hulat ni apostol Pedro

### *Paunan habi*

Habaytsi ya ikalwa kanlan loway hulat ya hinulat ni apostol Pedro, ya miha kanlan labinloway apostol ni Panginoon Jesu-Cristo. Hinulatan nay kapareho nan ampaniwala kan Panginoon Jesu-Cristo. An-ipaihip na kanla ya hiya, haka hilay kapareho nan apostol ay nakahêlêk hên panga-Diyos ni Panginoon Jesu-Cristo. Kaban an-êngganan lan anhulatan na, ya pag-orong ni Panginoon Jesu-Cristo, ay taganán kailangan lan mamiyay hên ayn kapintasan. Paan hilan maniwala kanlan ampagbabara hên hilay ampanoro hên kaptêgan. Ya alwan pêtêg ya toro lan habayto ay ampanira hên paniwala lan ampaniwala kan Panginoon Jesu-Cristo. Hilay ampanoro hên alwan pêtêg ya toro ay ayn dêng-êy, nakdêy ya ulo, haka mangalambung, ya ayn limo hên maghabin pamanira kanlan main kapangyarihan ya a angkahêlêk.

Kabooan hên pinakalaman

Umpisan hulat 1:1-2

Ya dapat ugalién lan pinili ni Apo Namalyari hên mag-in kana 1:3-21

Hilay ampanoro hên alwan pêtêg 2:1-22

Mag-orong ya hi Panginoon Jesu-Cristo 3:1-18

<sup>1</sup> Hiko hi Simon Pedro, ya mihay apostol, ya ampaghuyo kan Apo Jesu-Cristo.

Anhulatan kataw ya kapareho naén main paniwala ya ayn kapantag, gawan ha katoynungan ni Apo Jesu-Cristo, ya Diyos haka Mámilitgas tamo.

<sup>2</sup> An-ihalangin kataw ya pahanan ni Apo Namalyari ya kapatêkbêkan yo haka ya ingalo na kamoyu, gawan kilala tamo ya, haka hi Apo Jesu-Cristo ya Panginoon tamo.

*Ya mangêd ya ugali ya dapat ugalién tamon pinili ni Apo Namalyari hên mag-in kana*

<sup>3</sup> Ha kapangyarihan na, ay indin ni Apo Namalyari kantamo ya kaganawan kailangan tamo ha pamimiyay ha pamanhumonol ha kalabayan na. Mag-in maka-Diyos ya pamimiyay tamo gawan kilala tamo ya namili kantamo hên makilamo ha karangalan haka kapangyarihan na. <sup>4</sup> Gawan habaytoy karangalan haka kapangyarihan na, ay nangako ya kantamo hên manyag yan ayn kapantag, ha ikakangêd tamo, ta êmén mag-in nanad ugali na, ya ugali tamo, ta alwa kitaminan ipoh hên karawakan, hên nanad kanlan a ampagpalokop kan Apo Namalyari ya taganán labay-labay hên manyag karawakan.

<sup>5</sup> Gawan dinyag nay na ni Apo Namalyari ya habayto, ay dapat paka-pakikwanan tamo hên mag-in mangêd. Haka paka-pakikwanan tamo etaman hên magkamain hên pamangintindi, ta êmén tamo mamwangan ya mangêd haka alwan mangêd ya daygên. <sup>6</sup> Haka paka-pakikwanan tamo etaman hên mag-in maka-Diyos, mapagtêh, haka mapagpigel ha sarili.

<sup>7</sup> Paka-pakikwanan tamo etaman hên milulugud hên manawop ha kapareho tamon patêl ha Panginoon, haka manlugud ha balang miha. <sup>8</sup> Ta no habayto ay angkahêlêk ha biyay tamo, haka panay hên angkapahanan, ay ahina mahayang ya pagkilala tamo kan Panginoon tamon Jesu-Cristo. <sup>9</sup> No a tamon ugalién ya êmbayro, ay nanad buwag ya kaihipan tamo, haka naliwaan tamo ya pinatawad ni Apo Namalyari ya kasalanan tamo.

<sup>10</sup> Kabay, patêl ko ha Panginoon, paka-pakikwanan tamon ugalién ya habayto, ta êmén mapaptégan ya pinili na kitamo ni Apo Namalyari hên mag-in kana. No daygén tamoy habayto, ay taganán a tamo talibatokan ya paniwala tamo. <sup>11</sup> Ta ha êmbayro, ay mahiglay nakêm na kitamon pahowénén ni Apo Namalyari ha ayn anggay pamanlokop ni Apo Jesu-Cristo, ya Panginoon haka Mámilitgas tamo.

<sup>12</sup> Nananiêh man ya paniwala yo ha kaptégan, ya mana yoy nan tinanggap, ay panay ko pon ipapanêmtêm kamoyu ya tungkol bayro, amêhén haka lano. <sup>13</sup> Mangéd ya an-ipapanêmtêm ko kamoyu ya tungkol bayro, kaban angkabiyay ako pon. <sup>14</sup> Ta impamwang na kangko ni Panginoon Jesu-Cristo ya marani kinan matsi. <sup>15</sup> Kabay andaygén kina ya madyag ko, ta matsi ko man, ay a yo maliwaan ya habaytoy kaganawan ya in-aryl ko kamoyu.

### *Taganán pêtêg ya an-itoro ni apostol Pedro*

<sup>16</sup> Impamwang naén kamoyu, ya makapangyarihan ya, hi Panginoon tamon Jesu-Cristo, haka mag-orong ya. Impamwang naén ya habayto, alwan gawan ha istorya ya didinyag bat ha kaihipan, noa, gawan mantêg naén hên nahêlêk ya panga-Diyos na. <sup>17</sup> Ta hikay ya kalamo na hên hato ha tawtgug hên hiyay dinyanan pamanggalang, hên impahlêk ya kapahilêw ya kahampatan na. Hên habayto ay hinabi ni Apo Namalyari, ya Tatang tamo, ya ayn kapantag ha kapangyarihan, hên habaytsi ya tungkol kana, “Hatsi ya anlugarén kon Anak ya taganán an-ikahigla ko.”\* <sup>18</sup> Hikay ya taganán nakagilam hên hatoy habi ni Apo Namalyari, hên hikay ya kalamo ni Panginoon Jesu-Cristo bayro ha banal ya tawtgug ya habayto. <sup>19</sup> Gawan ha nahêlêk naén, ay napaptégan ya taganán pêtêg ya impamwang lan mâmipamwang hên an-ipaihip kanla ni Apo Namalyari. Yabay ya dapat tamon honolên hên nanad ha pamanhumonol tamo ha hawang hên solo no ampammita kitamo no yabi. Dapat tamon honolên ya habayto angga ha pag-orong ni Panginoon Jesu-Cristo, ya nanad ha manwatah ya angkahêlêk tamo no maranon. <sup>20</sup> Taganán dapat tamon maintindihan, ya alwan ubat ha sarili lan ihip, ya hinon nakahulat ha Kahulatan ya impahulat ni Apo Namalyari kanlan mâmipamwang hên an-ipaihip na kanla. <sup>21</sup> Ayn hilan hinulat ha kalabayan hên kaatag, noa, ha kalabayan nan bat hên Espiritu ni Apo Namalyari, ay hinabi la ya impamwang na kanla.

## 2

### *Taganán narawak hilay ampanoro hên alwan pêtêg*

<sup>1</sup> Hêñ haton lagi, ay main nagbabara ya hila ay mâmipamwang hên an-ipaihip kanla ni Apo Namalyari. Êmbayro êt amêhén, ay mag-in kalamo yo, hilay ampagbabara hên hila ay ampanoro hên kaptégan. Noa, ya toro la ay alwan pêtêg, ya ampakahiran paniwala yo. Biha ipuglaoh la êt hi Panginoon Jesu-Cristo ya namilitgas kanla. Kabay bigla hilan parusaan ni Apo Namalyari hên ayn angga. <sup>2</sup> Haka mal-at ya patêl ha Panginoon ya manoto ha andaygén la ya hadyay karawakan kalabayan lawini, kabay main maghabin pamanira ha toro ya tungkol kan Panginoon Jesu-Cristo, pêtêg man ya habaytoy toro. <sup>3</sup> Gawan taganán matalarêh hila, ay lokoén la kaw ha istorya ya didinyag bêngat ha kaihipan, ta êmén la makwa ya bandi yo. Noa, hato êt bayri ay nakal-an ya sintinsya haka parusa ni Apo Namalyari kanla, kabay taganán parusaan hila hên ayn angga.

\* <sup>1:17</sup> Mateo 17:5, Marcos 9:7, Lucas 9:35.

<sup>4</sup> Muwang tamo ya parusaan hila, gawan hila man ya anghel ni Apo Namalyari ya nanyag hēn kasalanan, ay pinarusaan nan inhamwag ha kalaléan ya hadyay diglēm. Haka nakakulung hila bayro hēn angga ha lumatēng ya Allon Pamanukom. <sup>5</sup> Pinarusaan na etaman hilay a nagpalokop kana ya angkabiyay hēn haton panaon ni apo Noe hēn ginunaw ya boon luta ta êmēn maubuh hilan matsu. Hi apo Noe ya namipamwang hēn dapat honolēn ya kalabayan ni Apo Namalyari hēn mamiyyay hēn main kangēran. Hiya haka ahawa na, ya tatloy anak la, haka ya manuyang na, ay inlitas ha lubug, ya kapalimoy lanêm. <sup>6</sup> Pinarusaan na etaman ni Apo Namalyari ya hilay alwan maka-Diyos hēn hato hēn inulam nay balayan Sodoma haka Gomorra, hēn angga ha nag-in hilan abo. Habaytoy dapat mag-in palatandaan kanlan alwan maka-Diyos. <sup>7</sup> Noa, inlitas na hi Lot\* bayro ha Sodoma gawan mahonol ya kana, haka gawan taganán angkahiray nakém ni Lot ha hadyay karawakan kalabayan lawini ya andaygén lan kabalayan na. <sup>8</sup> Hi Lot ay mahonol kana, kabay angkahiray nakém na ha hadyay karawakan dyag lan kabalayan na, ya nahélék haka nagilam na hēn allo-allo. <sup>9</sup> Gawan habayto ya dinyag hēn Panginoon hēn haton lagi, ay muwang tamo, ya muwang hēn Panginoon, no ay-êmēn nan iligtas hilay mahonol kana ya ampakatanam hēn kairapan, haka no ay-êmēn nan amparusaan hilay alwan mahonol kana, angga ha lumatēng ya Allon Pamanukom. <sup>10</sup> Lalon-laloy nan parusaan hilay manyag hēn hadyay karawakan kalabayan lawini, haka hilay anhumalanghang ha main tungkulan.

Hilay ampagbabara hēn ampamitoro hilan kaptēgan ay ayn dēng-êy, nakdēy ya ulo, haka mangalambung, ya ayn limo hēn maghabin pamanira kanlan main kapangyarihan ya a angkahélék. <sup>11</sup> Agyan hilay anghel ni Apo Namalyari ya makapangyarihan kanlan habaytoy ampagbabara, ay a ampaghabin pamanira kanlan kapareho lan a angkahélék ya nanyag kasalanan. <sup>12</sup> Noa, hilay ampagbabara hēn ampamitoro hēn kaptēgan, ay ampaghabin pamanira ha a la angkaintindihan. Nanad hilan mahiléb ya ayop, ya ayn nakém, ya in-anak ta êmēn hila madakép haka mapatsi. Embayro êt ay parusaan hilan ayn angga ya hilay ampamitoro hēn alwan pêtég. <sup>13</sup> Magdusa hila lano ha panumbah ni Apo Namalyari kanla ha dinyag la ha kaatag. Allo man, ay pakapdaên la ya lawini lan manyag karawakan. Nanad ha mantsa ya ampakarawak ha bayoy takop, ay êmbayroy kakahlayan karêng-êyan ya andaygén la kamoyu ha kahibaan la no ampakiaêm hila kamoyu. <sup>14</sup> A hila angkapda ha pamabayi ha hinon babayi ya angkahélék la, haka ha pamanyag hēn hinon kasalanan. Ampangamuyot hila ha alwan nananiêh ya paniwala kan Apo Jesu-Cristo hēn manyag kasalanan. Ugali lay na ya matalarêh ha kaganawan bandin kapareho la. Gawan ha kal-atan karawakan ya andaygén la, ay taganán parusaan hila ni Apo Namalyari. <sup>15</sup> A hilay na ampanyag kangēran ta tinoto la hi Balaam ya anak ni Bosor† ya labay-labay hēn mananggap pera ha pamanyag karawakan. <sup>16</sup> Noa, gawan ha karawakan na, ay hinabyanan hi Balaam ni Apo Namalyari hēn pinahabi ya asno‡ ya anhakyen ni Balaam. Habaytoy asno ay nanaad kan Balaam ha habin lalaki, ta êmēn a mitupad ya ayn kapukatan ya atsi ha ihip na.

<sup>17</sup> Hilay ampagbabara hēn hilay ampanoro hēn kaptēgan, ay ayn pukat. Mialimbawa hila ha sibol ya ayn lanêm, haka ha naborêg ya a ampam-in uran, ta angkaialipad bat hēn makhaw ya angin. Ya pamarusaan kanla, ay in-il-an ni Apo Namalyari ha kalaléan ya hadyay diglēm. <sup>18</sup> Malangka hilan maghabin

\* **2:7** Genesis 19:1-29. † **2:15** O Beor. ‡ **2:16** Ya mihay ayop ya nanad ha nanaway kabayo.

ayn kapukat-pukat. Ha paytoro la ya alwan kasalanan ya pamanyag hēn karawakan kalabayan lawini, ay angkaamuyot hilay a pon nabuyot hēn nanalibokot ha karawakan ya andaygēn lan mana lan kabarkada, hēn orongēn lay pamanyag lan habaytoy karawakan. <sup>19</sup> Ipangako la kanlan naamuyot la, ya madyag lay kaganawan labay la, pangkata hila man awud, ay antalanēn hēn kasalanan. Ta hikitamo ay antalanēn hēn hinoman ya ampakahambut kantamo. <sup>20</sup> Ta no nakaalih hila ha pamanyag karawakan ya andaygēn lan a ampagpalokop kan Apo Namalyari, gawan ha nakilala lay na hi Apo Jesu-Cristo ya Panginoon haka Māmiligtas tamo, biha mag-orong haka pahambut hila êt ha kasalanan, ay kaingalo hila kisa haton una hēn a la ya kilala. <sup>21</sup> No êmbayroy nalyari kanla, ay mangēd ya a la dayi namwangan hēn tungkol ha mag-in mahonol kan Apo Namalyari kanan tinalibatokan ya Kautuhan na ya intoro kanla. <sup>22</sup> Ta do ha nanyag hēn êmbayro, ay pêtêg awud ya loway humonol ya kahabian.

“An-orongēn lan angkaêñ hēn aho ya huka la.”

“Palyuan man ya mihay baboy, ay mag-orong ya ta êt ha pita.”

### 3

#### *Ya pangako ni Panginoon Jesu-Cristo ya mag-orong ya*

<sup>1</sup> Anlugarûn kon patêl ha Panginoon, di ha ikalwan hulat ko kamoyu, hēn nanad êt ha una, ay main akon an-ipapanêmtêm kamoyu, ta êmên mag-in mangēd ya kaihipan yo. <sup>2</sup> Labay kon panêmtêm yoy hinabi hēn haton lagi, hēn hilay banal ya māmipamwang hēn an-ipaihip kanla ni Apo Namalyari, haka ya utoh ni Panginoon Jesu-Cristo, ya Māmiligtas tamo, ya impamwang lan apostol. <sup>3</sup> Dapat tamon maintindihan ya, no marani ya anggaan hēn luta, ha tawlin panaon, ay main lumatêng ya mapanyag karawakan kalabayan lawini la, haka musmusêñ la kaw. <sup>4</sup> Èmén di ya habiêñ la, “Ay-êmén ya pangako na, ya mag-orong ya hi Jesus? Anto ya? Natsi yay nay toa naêñ noa, a ya êt nag-orong! Paubat hēn haton lagi hēn dinyag ya hata luta, ay ayn êt nabayo ya hinoman di!” <sup>5</sup> Muwang la ya alwan pêtêg ya anhabiêñ la ya ayn êt nabayo, ta ha habi nan bat, ay dinyag ni Apo Namalyari ya langit, haka luta. Lanêñ ya dinyag nan luta, haka lanêñ ya ampangubatan hēn biyay hēn kaganawan atsi bayri ha luta. <sup>6</sup> Lanêñ êt ya pinamilêmêñ na ha angkabiyay ha luta hēn haton lagi. <sup>7</sup> Haka ha kapangyarihan hēn habaytoy habi ni Apo Namalyari ay nakatêg ya hata luta, haka ya angkahêlêk ha langit hēn angga ha Allon Pamanukom. Ulamêñ na bayto hēn hiraêñ ya boon luta haka parusaan na hilay alwan maka-Diyos hēn ayn angga.

<sup>8</sup> Anlugarûn kon patêl ha Panginoon, paan yon liwaan ya habaytsi. Ya mihay allo haka ya maliboy taon ay parehon bat kabuyot ha hêlêk ni Apo Namalyari. <sup>9</sup> Èndat lan kaatag ya an-abalaêñ hēn Panginoon ya pamag-orong na, noa, andyanan na kitamon panaon, ta labay nan paghêhêan tamon talibatokan ya kasalanan tamo, ta a na labay hēn main mipalako ha impiyerno.

<sup>10</sup> Noa, taganán lumatêng ya Allon Pamanukom. Bigla yan mag-orong ya Panginoon hēn nanad ha biglan paglatêng hēn manakaw. Biglan maplak ya kaganawan angkahêlêk ha langit hēn main kapalimoy tonoy. Maulam ya allo, buwan, bêtêwêñ haka ya boon luta. <sup>11</sup> Gawan êmbayro ya mag-in anggaan hēn balang hino, ay taganán kailangan mamiyay kitamo hēn nanad ha pamimiyay lan maka-Diyos ya taganán ayn kapintasan, <sup>12</sup> kaban an-êngganan tamoy pag-orong ni Panginoon Jesu-Cristo. Pakikwanan tamon ihundo ya pamimiyay ya maka-Diyos, ta êmén ya tambêng lumatêng ya

habaytoy Allon Pamanukom. Kanan habaytoy allo, ay ulamên ya kaganawan angkahêlêk ha langit haka malasaw ya allo, buwan, bêtêwên haka luta gawan ha hadyay omot! <sup>13</sup> Noa, impangako ni Apo Namalyari ya pahilyan nay habayto hên bayo, ya paidyanan lan mahonol kan Apo Namalyari, haka yabay ya an-êngganan tamo.

<sup>14</sup> Kabay anlugurên kon patêl ha Panginoon, kaban an-êngganan tamoy malyari ya habayto, ay paka-pakikwanan tamon mamiyay hên main pamanhu-monol ha kalabayan ni Apo Namalyari, ta êmên na kitamon malatêng hên ayn hinon kapintasan, haka ta êmên mag-in sigurado ya pakikimihha tamo kana.

<sup>15</sup> Pakaihipêñ yoy habaytsi, mapagtêéh ya Panginoon hên mangênggan gawan andyanan na kitamon panaon hên talibatokan ya kasalanan tamo, ta êmên mal-at ya mailigtas. Habayto êt ya inungkat ni apostol Pablo, ya anlugurên tamon patêl ha Panginoon, hên inhulat na kamoyu ya impamwang kana ni Apo Namalyari. <sup>16</sup> Ha balang hulat na ay an-ungkatêñ nay habayto. Main etaman kaatag ya hinulat na ya mairap hên maintindihan, ya andyanan lan alwan pêtêg ya labay habiêñ, hên hilay kulang ha kamwangan, haka alwan nananiêñ ha paniwala kan Apo Jesu-Cristo. Andyanan la êt hên alwan pêtêg ya labay habiêñ ya kaatag ya Kahulatan ya impahulat ni Apo Namalyari. Gawan andaygêñ lay habayto, ay parusaan hila hên ayn angga.

<sup>17</sup> Anlugurên kon patêl ha Panginoon, muwang yoy nay ugali lan habaytoy nangarawak ya ampanoro hên alwan pêtêg. Kabay kaillag kaw ta êmên kaw a paamuyot ha alwan pêtêg ya toro la, ta êmên kaw a midayo ha nananiêñ ya paniwala yo. <sup>18</sup> Dapat ihundo tamoy pamimiyay tamo hên maka-Diyos, ta êmên na pahanan ya ingalo na kantamo ni Panginoon Jesu-Cristo ya Mâmiligtas tamo, haka ta êmên mag-in maigêt ya pagkakilala tamo kana. Puriêñ tamo ya amêhêñ haka hên angga-angga! Amen!

## Ya Unan Hulat ni apostol Juan

### *Paunan habi*

Ya nanulat hén habaytsi ay hi apostol Juan, ya mihay tagahonol ni Apo Jesu-Cristo ya kala-kalamo na hén atsi ya pon di ha luta hén ampanoro. Hinulatan na hilay ampaniwala ya nanga-pitatayak ha lokop hén Asia Menor, ta êmén na hila hagyatén hén mamiyay hén main pamakimiha kan Apo Namalyari haka kan Apo Jesu-Cristo ya Anak na.

Nanulat ya êt gawan main ungno bayro, ya manan kalamo lan patêl ha Panginoon, ya ampanoron alwan pêtêg ya tungkol kan Apo Jesu-Cristo. An-itoro la ya boon luta kano, haka ya kaganawan atsi bayri anggan ya lawini tamo ay narawak. Kabay a la matanggap ya hi Apo Jesu-Cristo ay nag-in tawo ya main lawinin panluta. An-itoro la êt ya hi Apo Jesus, ay alwa yan Mesias, ya Cristo, ya Mámiligtas ya impangako ni Apo Namalyari.

Impakihabi na êt di ha hulat ni apostol Juan, ya hilay ampanlugud kan Apo Namalyari haka kan Apo Jesu-Cristo ay kailangan hén milulugud ha miha ta miha.

Kabooan hén pinakalaman

Umpisan hulat 1:1-4

Hawang haka kariglêman 1:5-2:29

Ya maának ni Apo Namalyari haka maának ni Satanas 3:1-24

Ya kaptêgan haka ya kalaraman 4:1-6

Dapat manlugud 4:7-21

Ya paniwala ya ampanambut 5:1-21

### *Ya habi ya ampam-in biyay*

<sup>1</sup> An-ihulat naén ya habaytsi, ya tungkol ha habi, ya hi Apo Jesu-Cristo, ya ampam-in biyay. Atsi yay na hi Apo Jesu-Cristo, hén ayn pon ya hata luta. Nagilam naén ya hinabi na. Nahêlêk naén ya. Haka napaptêgan naén ya main yan lawini. <sup>2</sup> Hén impahlék ni Apo Namalyari, ya Tatang tamo, ya hata habi ya ampam-in biyay, ya kalamo na hén ayn pon ya hata luta, ay nahêlêk naén ya. Kabay ampaptêgan naén kamoyu, haka an-ipamwang naén kamoyu, ya tungkol kana, ya biyay ya ayn angga. <sup>3</sup> An-ipamwang naén bay kamoyu etaman, ya nahêlêk naén, haka ya nagilam naén, ta êmén makalamo naén kaw ha pamakimiha kan Apo Namalyari, haka kanan Anak na hi Apo Jesu-Cristo. <sup>4</sup> An-ihulat naén ya habaytsi kamoyu, ta êmén tamo magkamain hén hadiyah kahiglaan.

### *No main kitamon pamakilamo kan Apo Namalyari ay marayo kitamo ha kasalanan*

<sup>5</sup> Habaytsi ya nagilam naén kan Apo Jesus ya an-ipamwang naén kamoyu: Hi Apo Namalyari ay nanad hawang. Ayn hinoman ya kariglêman kana.

<sup>6</sup> Kabay no anhabién tamo ya main kitamon pamakilamo kana, noa, am-pammita kitamo pon ha kariglêman, ta ampanyag kitamo hén karawakan, ay ampaglaram kitamo, haka a kitamo anhumonol ha kaptêgan habi ni Apo Namalyari. <sup>7</sup> No atsi kitamo ha kahawangan hén nanad kan Apo Namalyari, ay main kitamon pamilalamo ha miha ta miha, haka ya daya\* ni Apo Jesus, ya Anak na, ay ampamaalih hén kasalanan tamo. <sup>8</sup> No anhabién tamo, ya

\* <sup>1:7</sup> daya: Ya daya ni Apo Jesu-Cristo ya namoganggang hén hiyay natsi ha koros ha pamayad hén kasalanan tamo.

ayn kitamon kasalanan, ay anlokoén tamoy sarili tamo, haka tinalibatokan tamoy kaptégan. <sup>9</sup> Noa, no an-aminén haka an-ihuko tamina ya kasalanan tamo, ay patawarén na kitamo, haka linisén na kitamina ha nangarawak ya dyag tamo. Daygén nay habayto gawan hiyay tapat haka makatoynungan. <sup>10</sup> No anhabién tamo, ya ayn kitamon kasalanan, ay andaygén tamo hi Apo Namalyari hén mapaglaram, haka a tamo anhonolén ya habi na.

## 2

### *Hi Apo Jesu-Cristo ya ampangiúmang kantamo kan Apo Namalyari*

<sup>1</sup> Maának ko, anhulatan kataw hén habaytsi, ta êmén a kaw manyag kasalanan. Noa, no nakadyag kitamon kasalanan, ay main makihibi hén para kantamo kan Apo Namalyari, ya Tatang tamo. Yabay ya hi Apo Jesu-Cristo, ya ayn hinon kasalanan. <sup>2</sup> Hiyay nananggap parusa hén kasalanan tamo, ta êmén ya balang miha, ay mapatawad ha kasalanan. <sup>3</sup> Ampaptégan tamo ya main kitamon pamakilamo kan Apo Namalyari no anhonolén tamo ya utoh na. <sup>4</sup> No main bat hén ampaghabi ya main yan pamakilamo kan Apo Namalyari, noa, a na anhonolén ya utoh na, ay ampaghabi yan alwan pêtég, haka a ya anhumonol ha kaptégan habi ni Apo Namalyari. <sup>5</sup> Noa, hilay anhumonol ha utoh ni Apo Namalyari, ay mahélék kanla ya hilay ampanlugud kana. Ta no pandaygén tamo ya êmbayro, ay muwang tamo ya main kitamon pamakilamo kana. <sup>6</sup> Hilay ampaghabin main hilan pakikimiha kan Apo Namalyari, ay kailangan lan daygén ya kangérān, hén nanad ha dinyag ni Apo Jesu-Cristo.

### *Ya bayoy utoh*

<sup>7</sup> Hikaw ya anlugarén ko, alwan bayo ya utoh ya an-ihulat ko kamoyu, ta ya an-ihulat ko ay hatoy mana êt ya utoh. Ta paubat hén ampaniwala kaw kan Apo Jesus, ay angkagilam yoy na ya habaytsi ya in-utoh ni Apo Namalyari, ya dapat milulugud kitamo. <sup>8</sup> Êmbayro man, ay habaytsi ya utoh ya an-ihulat ko kamoyu ay bayo.\* Ya kaptégan hén habaytsi ay angkahélék kan Apo Jesus haka kamoyu. Ta ya kariglêman ay ayn kamoyu, gawan ampakahawang kamoyu ya pêtég ya hawang ya ayn kaatag no alwan hi Apo Jesus.

<sup>9</sup> Hilay ampaghabi, ya hila ay atsi ha kahawangan, noa, angkahémékan lay patêl la ha Panginoon, ay atsi hila pon ha kariglêman. <sup>10</sup> Hilay ampanlugud hén patêl la ha Panginoon, ay panay hén ampamiyay ha hawang, haka ayn kanla ya mag-in dann hén manyag kasalanan hén kaatag. <sup>11</sup> Noa, hilay anhumémék ha patêl la ha Panginoon, ay nanad hilan ampammita ha kariglêman, hén a la muwang ya anlakwén la, gawan nariglém ya panlék la.

<sup>12</sup> Anhulatan kataw ya patêl ko ha Panginoon, ya an-itad kon maának ko, gawan pinatawad kaw na ha kasalanan yo gawan ha dinyag ni Apo Jesu-Cristo. <sup>13</sup> Anhulatan kataw ya toa, ta mana yoy nan kilala hi Apo Jesu-Cristo, ya atsi yana hén ayn pon ya hata luta. Hikaw man, ya miyawhay haka dalaga, anhulatan kataw gawan nahambut yoy na hi Satanas, ya ampanukso kamoyu.

<sup>14</sup> Hikaw ya anak, ay anhulatan kataw etaman gawan mana yoy nan muwang ya Tatang tamo, ya hi Apo Namalyari. Anhulatan kataw ya toa, gawan mana yoy nan muwang, hi Apo Jesu-Cristo ya atsi yana hén ayn pon ya hata luta. Anhulatan kataw ya miyawhay, gawan ha kataniéhan nakém yo. Anhulatan kataw êt, gawan atsi kamoyu ya habi ni Apo Namalyari, ya nag-in dann ta êmén yo nahambut hi Satanas.

\* <sup>2:8</sup> Juan 13:34.

<sup>15</sup> Paan yon karyidaan ya hinoman ya atsi di ha luta ya alwan akma ha kalabayan ni Apo Namalyari, ta no karyidaan yoy habayto, ay a yo anlugarêñ hi Apo Namalyari. <sup>16</sup> Alwan mangêd ya bat maridya ha hinon atsi di ha luta, ya nanad ha pamanyag karawakan kalabayan hên lawini, haka ya pamangibêg ha hinon angkahêlêk, ta habaytoy ipaglambung yo. Ya dyag ya êmén di ay alwan nangubat kan Apo Namalyari, ya Tatang tamo. Noa, ya dyag ya êmén di ay nangubat kanlan a ampagpalokop kana. <sup>17</sup> Ya luta haka ya angkaridyaan bayri ha luta, ay main anggaan. Noa, hilay anhumonol ha kalabayan ni Apo Namalyari, ay main biyay ha langit ya ayn anggaan.

### *Ya anti-Cristo, ya poon lan kapatsi ni Apo Jesu-Cristo*

<sup>18</sup> Maának ko, marani yanay anggaan luta. Nagilam yoy na ya anlumatêng ya poon lan kapatsi<sup>†</sup> ni Apo Jesu-Cristo. Ha kaptêgan, mal-at anay nilumatêng ya kapatsi ni Apo Jesu-Cristo, kabay muwang tamina ya marani yanay anggaan. <sup>19</sup> Habaytoy kapatsi ni Apo Jesu-Cristo ay kalamo tamo hên hato, noa, alwa hilan pêtêg hên lamo tamo, ta no pêtêg dayi ya pakikimiha la kantamo, ay a hila dayin nag-alíh. Noa, ha pamag-alíh la ay napaptêgan ya taganán alwa hilan lamo tamo.

<sup>20</sup> Alwa kaw hên êmbayro, ta atsi kamoyu ya Espiritu ni Apo Namalyari, ya impahapat kamoyu ni Apo Jesu-Cristo. Kabay muwang yoy kaptêgan. <sup>21</sup> Anhulatan kataw alwan gawan a yo muwang ya kaptêgan. Noa, anhulatan kataw gawan muwang yoy kaptêgan haka muwang yo ya ayn kalaraman ya ubat ha kaptêgan.

<sup>22</sup> No êmbayro, hino awud ya mapaglaram no alwan habaytoy ampaghabin hi Apo Jesus, ay alwa yan Mesias, ya Cristo, ya Mámilitas? Hiya ya kapatsi ni Cristo, ta an-araêñ na hi Apo Jesu-Cristo haka hi Apo Namalyari ya Tatang na.

<sup>23</sup> Ta hilay ampangara kanan Anak, ay ayn pakikimiha ha Tatang na, hi Apo Namalyari. Noa, hilay ampananggap ha Anak, ay main etaman pakikimiha kan Apo Namalyari, ya Tatang na. <sup>24</sup> Itanêm yo ha nakêm yo ya habi ni Apo Namalyari ya nagilam yo paubat hên naniwala kaw, ta ha êmbayro ay magka-main kaw hên pakikimiha kanan Anak, haka kan Apo Namalyari, ya Tatang na. <sup>25</sup> Ta habaytsi ya impangako ni Apo Jesu-Cristo kantamo, ya mamiyay kitamo hên kalamo na hên ayn angga. <sup>26</sup> An-ihulat ko kamoyu ya tungkol kanlan kapatsi ni Cristo, ya hilay mabay hên mamitama kamoyu ha kaptêgan.

<sup>27</sup> Noa, a kataw nan kailangan hên toroan, ta ya Espiritu ni Apo Namalyari ya impahapat na kamoyu, ay atsi pon kamoyu. Hiyay ampamitoro kamoyu, hên kaganawan ya kailangan yon mamwangan, haka ya balang an-itoro na ay pêtêg. Kabay honolêñ yoy an-itoro na, haka ihundo yoy pakikimiha yo kan Apo Jesu-Cristo. <sup>28</sup> Kabay maának ko, ihundo yoy pakikimiha yo kana, ta êmén ayn kitamon ikalimo, haka ayn kitamon ikarêng-êy ha pag-orong na di.

<sup>29</sup> Muwang yoy na ya hi Apo Jesu-Cristo, ay makatoynungan, kabay muwang yoy na ya hinoman ya ampanyag katoynungan, ay anak ni Apo Namalyari.

## 3

### *Ya maának ni Apo Namalyari*

<sup>1</sup> Ayn kapantag ya pamanlugud ni Apo Namalyari kantamo, kabay ambaégn na kitamo hên anak na. Haka pêtêg etaman ya hikitamo ay taganán anak na. Noa, hilay a ampagpalokop kan Apo Namalyari, ay a la kitamo hên ambalayêñ hên anak na, gawan ayn hilan pamakilamo kana. <sup>2</sup> Hikaw ya anlugarêñ ko, hikitamo ay anak ni Apo Namalyari amêhêñ. A pon

<sup>†</sup> 2:18 anti-Cristo.

impamwang no ay-êmén kitamo lano. Noa, muwang tamo ya, ha pag-orong ni Apo Jesu-Cristo di ha luta, ay mag-in kitamon nanad kana, gawan mahélék tamo yan taganá. <sup>3</sup> Kaganawan ya main kasiguradoan, ya mag-in hilan nanad kana, ay panay hén manalibokot ha kasalanan, ta êmén hila mag-in banal hén nanad kana.

<sup>4</sup> Hilay mapanyag kasalanan, ay ampanyag hén halanghang ha Kautuhan ni Apo Namalyari. Gawan yabay ya kasalanan, ya pamanyag hén halanghang ha Kautuhan. <sup>5</sup> Muwang yo ya nilumaténg ya di ha luta hi Apo Jesu-Cristo ta êmén na alihén ya kasalanan tamo. Muwang yo etaman ya ayn yan kasalanan. <sup>6</sup> Hila ya main pamakimiha kana ay a ampamihundo hén manyag kasalanan, ta hilay ampamihundo hén manyag kasalanan, ay a taganán ampakabalay kana haka a la angkaintindihan no hino ya.

<sup>7</sup> Maának ko, paan kaw pagtan ha hinoman ya ampanoro ya malyarin manyag kasalanan. Hikaw ya mapanyag kangérán ay mahonol kan Apo Namalyari, hén nanad kan Apo Jesu-Cristo. <sup>8</sup> Noa, hilay mapanyag kasalanan, ay maának ni Satanas. Paubat hén ayn pon ya hata luta, ay ampanyag yay nan kasalanan hi Satanas. Nilumaténg ya di ya Anak ni Apo Namalyari ya hi Apo Jesu-Cristo, ta êmén na hiraén ya dyag ni Satanas.

<sup>9</sup> Hilay anak ni Apo Namalyari ay alwan mapanyag kasalanan ta dinyanan na hilan bayoy biyay. Alwa hilay nan mapanyag kasalanan ta hilay nag-in maának ni Apo Namalyari. <sup>10</sup> Êmén di tamon mamwangan no hino hilay anak ni Apo Namalyari, haka no hino hilay anak ni Satanas. Hilay a ampanyag kangérán haka a ampanlugud ha patêl la ha Panginoon, ay alwan anak ni Apo Namalyari.

### *Ya tungkol ha pamilulugud*

<sup>11</sup> Habaytsi ya utoh, ya nagilam tamo, hén babayo tamon nagilam ya habi ni Apo Namalyari, ya dapat milulugud kitamo. <sup>12</sup> A tamo totoén hi Cain ya namatsi hén ali na, gawan hi Cain ay anak ni Satanas. Pata pinatsi nay ali na? Gawan ya dyag na ay nangarawak, noa, ya ali na ay mahonol kan Apo Namalyari.\*

<sup>13</sup> Hikaw ya patêl ko ha Panginoon, ay paan yon pag-êpapahan no angkahémékan la kaw hén a ampagpalokop kan Apo Namalyari. <sup>14</sup> Muwang tamo ya ayn kitamina ha lokop ni Satanas, ya mam-in kamatsan, ya ayn anggaan. Atsi kitamina ha lokop ni Apo Namalyari, ya ampam-in biyay ya ayn anggaan gawan anlugarén tamoy patêl tamo ha Panginoon. Hilay a ampanlugud, ay atsi pon ha lokop ni Satanas, ya ampam-in kamatsan ya ayn anggaan. <sup>15</sup> Hilay anhumémék ha patêl la ha Panginoon, ay nanad êt ha ampamatsin kapareho lan tawo. Muwang yoy na ya hilay ampamatsin kapareho lan tawo, ay ayn hilan biyay ya ayn anggaan. <sup>16</sup> Muwang tamina no ay-êmén ya pamanlugud, ta hi Apo Jesu-Cristo ay inhalanggo nay lawini na ha ikakangéd tamo, gawan anlugarén na kitamo. Embayro êt ay dapat nakal-an kitamo etaman hén ihalanggo ya lawini tamo para kanlan ampangailangan hén hawop tamo. <sup>17</sup> No main mabandi ya ampaniwala kan Apo Jesu-Cristo, noa, a ya ampanawop ha patêl na ha Panginoon ya ampangailangan, ay yarin atsi kana ya pamanlugud ni Apo Namalyari! <sup>18</sup> Maának ko, ya pamanlugud tamo ay dapat alwan bêngat ha habi, noa, dapat tamon paptégan ya pamanlugud tamo ha kangérán dyag tamo etaman.

### *Ya kasiguradoan tamo*

\* <sup>3:12</sup> Ya dinyag ni Cain haka Abel ay mabaha ha Genesis 4:1-8.

<sup>19</sup> Gawan ampaptēgan tamo ya pamanlugud tamo ha dyag tamo, ay mamwangan tamo ya hikitamo ay anak ni Apo Namalyari ya makhaw ya nakêm hēn umarap kana. <sup>20</sup> Ta no angkaihipan tamoy karawakan tamo, ay dapat tamon panēmtêmēn ya makhaw hi Apo Namalyari kisa ha ihip tamo, haka muwang nay balang hino. <sup>21</sup> Kabay, hikaw ya anlugarēn ko, no pinatawad ya kasalanan tamo, ay dapat makhaw ya nakêm tamo hēn umarap kan Apo Namalyari. <sup>22</sup> Haka hinoman ya pakikwaan tamo kana, ay matanggap tamo, gawan anhumonol kitamo ha an-iutoh na, haka ampanyag kitamo hēn ampamakahigla kana. <sup>23</sup> Habaytsi ya an-iutoh na: kailangan tamon paniwal-an ya Anak na hi Apo Jesu-Cristo, haka dapat milulugud kitamo hēn nanad ha in-utoh na. <sup>24</sup> No anhonolēn tamoy kautuhan na, ay main kitamo hēn pakikimiha kana, haka atsi ya ha nakêm tamo. Haka mamwangan tamo ya atsi ya ha nakêm tamo, gawan indin na kantamo ya Espiritu na.

## 4

### *No ay-êmēn mamwangan ya toro ya ubat ha Espiritu ni Apo Namalyari*

<sup>1</sup> Hikaw ya anlugarēn ko, paan kaw maniwala ha balang mánoro ya ampaghabin atsi kanla ya Espiritu ni Apo Namalyari. Noa, imatonan yo pon no habaytoy pan-itoro la ay nangubat kan Apo Namalyari, ta ha ayri man ya legal, ay main mal-at ya ampibita-bitā ya ampagbabara hēn ampanoro hila hēn kaptēgan. <sup>2</sup> Mamwangan yo no pêtēg ya Espiritu ni Apo Namalyari, ya atsi kanlan ampanoro, no ampamaptēg hila ya hi Apo Jesu-Cristo ay nag-in tawo. <sup>3</sup> No a hila ampamaptēg hēn habayto, ay ayn kanla ya Espiritu ni Apo Namalyari. Noa, ampangihip hilan nanad habaytoy poon lan kapatsi ni Apo Jesu-Cristo ya impamwang kamoyu ya lumatēng. Haka di ha luta amêhēn ay mal-at ya kapatsi ni Apo Jesu-Cristo. <sup>4</sup> Maának ko, hikaw ay anak ni Apo Namalyari. Kabay nahambut yo hilay ampangitoro hēn kalaraman, ta makhaw ya Espiritu ni Apo Namalyari ya atsi kamoyu kisa kan Satanas ya ampamaala kanlan a ampagpalokop kan Apo Namalyari. <sup>5</sup> Hilay ampan-gitoro hēn kalaraman, ay atsi ha lokop ni Satanas, kabay ya pan-itoro la ay ubat kana. Haka hilay a ampagpalokop kan Apo Namalyari, ay ampanggilam hēn kalaraman la. <sup>6</sup> Noa, hikay ay anak ni Apo Namalyari, haka hilay main pamakimiha kana, ay ampanggilam aral naén. Hilay ayn pamakimiha kan Apo Namalyari, ay a ampanggilam ha aral naén. Ha êmbayro, ay mamwangan yo no ya an-itoro ay pêtēg o kalaraman.

### *Hi Apo Namalyari ay malugud*

<sup>7</sup> Hikaw ya anlugarēn ko, milulugud kitamo ta hi Apo Namalyari ay ubatan hēn pamanlugud. Hilay ampanlugud ay anak ni Apo Namalyari, haka main hilan pamakimiha kana. <sup>8</sup> Noa, hilay alwan malugud ay ayn hilan pamakimiha kan Apo Namalyari, ta hiyay malugud. <sup>9</sup> Impahlēk kantamo ya pamanlugud ni Apo Namalyari hēn in-utoh nay kamiha-mihaan Anak na di ha luta, ta êmēn hikitamo ay madyanan hēn biyay ya ayn anggaan. <sup>10</sup> Hatsi ya lugud: alwan ha hikitamoy nanlugud kan Apo Namalyari, noa, hiyay nanlugud kantamo, ta in-utoh nay Anak na hēn mananggap parusa hēn kasalanan tamo, ta êmēn kitamo mapatawad.

<sup>11</sup> Hikaw ya anlugarēn ko, gawan êmbayro ya pamanlugud ni Apo Namalyari kantamo ay kailangan milulugud kitamo. <sup>12</sup> Ayn êt nakahêlēk kan Apo Namalyari. Noa, no milulugud kitamo, ay angkapaptēgan ya atsi kantamo hi Apo Namalyari, haka ya pamanlugud na ya angkahêlēk kantamo ay usto.

<sup>13</sup> Muwang tamina ya main kitamon pakikimiha kana haka hiyay atsi kantamo gawan indin nay Espiritu na kantamo. <sup>14</sup> Nahêlêk naêñ, haka ampaptégan naêñ ya hi Apo Namalyari, ya Tatang tamo, ay namiutoh hêñ Anak na ta êmêñ na kitamo iligtas ha parusa ya ayn angga ha impiyerno. <sup>15</sup> Hilay ampamipamwang ya ampaniwala hila kan Apo Jesus, ya hiyay Anak ni Apo Namalyari, ay main pamakimiha kan Apo Namalyari haka hi Apo Namalyari ay atsi kanla. <sup>16</sup> Muwang tamo ya anlugurêñ na kitamo ni Apo Namalyari haka ampakasigurado kitamo ya ihundo nay pamanlugud na kantamo.

Hiyay malugud. Hilay panay hêñ ampanlugud kan Apo Namalyari haka ha kapareho lan tawo ay main pakikimiha kan Apo Namalyari, haka hi Apo Namalyari ay atsi kanla. <sup>17</sup> Haka no êmbayro ya pamimiyay tamo, ay pêtêg ya pamanlugud tamo, kabay makhaw ya nakêm tamo hêñ umarap kana ha Allon Pamanukom, gawan ya ugali tamo ha pamimiyay di ha luta, ay nanad ha ugali ni Apo Jesu-Cristo. <sup>18</sup> Kabay no pêtêg ya pamanlugud tamo kan Apo Namalyari, ay a kitamo malimo hêñ maparusaan, ta ya pêtêg ya pamanlugud, ay ampamaalih hêñ limo. Noa, hilay malimo hêñ maparusaan, ay ampamaptêg ya main pamagkulang ya pamanlugud la.

<sup>19</sup> Ampanlugud kitamo gawan hi Apo Namalyari ya unan nanlugud kantamo. <sup>20</sup> Malaram hilay ampaghabin hila ay ampanlugud kan Apo Namalyari noa, angkahêmêkan la pon ya patêl la. Ta no a la anlugurêñ ya patêl la, ya mantêg lan angkahêlêk, a la êt anlugurêñ hi Apo Namalyari ya a la angkahêlêk. <sup>21</sup> Haka habaytsi ya in-utoh kantamo ni Apo Jesu-Cristo: hilay ampanlugud kan Apo Namalyari ay kailangan lugurêñ la etaman ya patêl la.

## 5

### *Ya paniwala kan Apo Jesu-Cristo, ya Anak ni Apo Namalyari*

<sup>1</sup> Anak ni Apo Namalyari ya hilay ampaniwala ya hi Apo Jesus ay hiyay Mesias, ya Cristo, ya impangakon Mámiligas ya pinili ni Apo Namalyari hêñ mamaala. Haka hilay ampanlugud kan Apo Namalyari ay ampanlugud etaman ha anak na. <sup>2</sup> No anlugurêñ tamo hi Apo Namalyari haka no anhonolêñ tamoy an-iutoh na, ay muwang tamo ya anlugurêñ tamo etaman ya maának na. <sup>3</sup> Mahêlêk ya pamanlugud tamo kan Apo Namalyari, ha pamanhumonol tamo ha an-iutoh na. Haka ya an-ipahonol na kantamo, ay alwan nabyat, <sup>4</sup> gawan ya balang miha kantamon anak na, ay ampakahambut ha nangarawak, ya atsi di ha luta. Ampakahambut kitamo gawan ha paniwala tamo, ya hi Apo Jesus ay Anak ni Apo Namalyari. <sup>5</sup> Hino-hino hilay makahambut hêñ nangarawak bayri ha luta? Hilan bêngat ya ampaniwala, ya hi Apo Jesus, ay Anak ni Apo Namalyari.

<sup>6</sup> Impamwang ya hi Apo Jesu-Cristo ay Anak ni Apo Namalyari hêñ binawtismoan ya ha lanêm, haka hêñ namoganggang ya daya na hêñ hiyay natsi ha koros. Impamwang ya hiyay Anak ni Apo Namalyari, alwan bêngat hêñ hiyay binawtismoan, noa, impamwang êt ya habayto hêñ hiyay natsi. Haka ya Espiritu ni Apo Namalyari ay ampamaptêg êt ya hi Apo Jesu-Cristo ay Anak ni Apo Namalyari, ta panay kaptégan ya an-ipamwang nan Espiritu na. <sup>7</sup> Kabay main tatlo ya ampamaptêg ya hi Apo Jesu-Cristo ay Anak ni Apo Namalyari. <sup>8</sup> Habaytoy tatlo ay ayn kaatag no alwan ya Espiritu ni Apo Namalyari, ya pamawtismo kan Apo Jesu-Cristo ha lanêm, haka ya kamatsan na hêñ namoganggang ya daya na. Mimiha ya an-ipamwang la. <sup>9</sup> No antanggapêñ tamo ya pamaptêg hêñ tawo, ay dapat lalo tamon tanggapêñ ya pamaptêg ni Apo Namalyari hêñ tungkol ha Anak na, ta ya

pamaptêg na ay igit pon ha pamaptêg hên tawo. <sup>10</sup> Hilay ampaniwala ha Anak ni Apo Namalyari, ay main kasiguradoan ya pêtêg ya habaytoy pamaptêg ni Apo Namalyari. Noa, hilay a ampaniwala kana, ay pandaygên la hi Apo Namalyari hên mapaglaram, gawan a la ampaniwal-an ya pamaptêg na hên tungkol ha Anak na. <sup>11</sup> Haka habaytsi ya pamaptêg ni Apo Namalyari, ya hiyay nam-in biyay ya ayn angga kantamo, haka hata biyay, ay ampangubat kan Apo Jesu-Cristo, ya Anak na. <sup>12</sup> Hilay ampaniwala ha Anak ni Apo Namalyari, ay main biyay ya ayn anggaan, noa, hilay a ampaniwala ha Anak ni Apo Namalyari ay ayn biyay ya ayn anggaan.

### *Kasiguradoan ya dyanan kitamon biyay ya ayn angga*

<sup>13</sup> Habaytsi ay inhulat ko kamoyu hên ampaniwala kan Apo Jesu-Cristo ya Anak ni Apo Namalyari, ta êmén yo mamwangan, ya main kaw hên biyay ya ayn angga hên kalamo na. <sup>14</sup> Makhaw ya nakêm tamon pakarani kan Apo Namalyari, ta hinoman ya pakikwaan tamo kana hên ikakangêd tamo, ay idin na no kalabayan na. <sup>15</sup> No muwang tamon ya idin na ya hinon pakikwaan tamo kana, hên ayon ha kalabayan na, ay atsi yana kantamo ya pinikikwa tamo kana.

<sup>16</sup> No ampakahêlêk kitamo hên patêl tamo ha Panginoon ya ampanyag hên kasalanan ya mapatawad, ya a pon makapipalako kana ha impiyerno, ay dapat ihalangin tamo ya ta êmén ya miorong kan Apo Namalyari haka ya madyanan biyay ya ayn angga. Noa, main kasalanan ya a mapatawad, ya mamigtan ha impiyerno. A ko anhabiên ya dapat yo hilan ihalangin ya hilay ampanyag hên habaytoy kasalanan. <sup>17</sup> Ya kaganawan dyag, habi, haka ihip ya alwan mangangêd, ay kasalanan. Noa, main kasalanan ya mapatawad ya a makapipalako ha impiyerno. <sup>18</sup> Muwang tamon, ya hilay anak ni Apo Namalyari ay a antalagaên ya pamanyag hên kasalanan, ta a hilay na maiutoh ni Satanas, gawan hi Apo Jesu-Cristo, ya Anak na, ay ampangillag kanla. <sup>19</sup> Muwang tamon ya hikitamo ay anak ni Apo Namalyari, noa, hilay a ampagpalokop kana, ay atsi pon ha lokop ni Satanas. <sup>20</sup> Muwang tamon êt ya nilumatêng hi Apo Jesu-Cristo, ya Anak ni Apo Namalyari, haka impamwang na kantamo ya pêtêg ya Diyos ya hi Apo Namalyari. Haka amêhêñ, main kitamon pakikimiha kan Apo Namalyari gawan kan Apo Jesu-Cristo, ya Anak na. Hi Apo Jesu-Cristo ay pêtêg ya Diyos, haka hiyay ampangubatan hên biyay ya ayn angga. <sup>21</sup> Maának ko, talibatokan yo hilay alwan pêtêg ya diyos, ta êmén hi Apo Namalyari bat ya simbaên yo.

## Ya Ikalwan Hulat ni apostol Juan

### *Paunan habi*

Habaytsi ya ikalwan hulat ni apostol Juan, ya ambaêgên lan Toa, ay para ha “mihay babayi ya pinili,” haka “kanlan maának na.” Ya panhabien lan kaatag ay hulat ya habaytsi kanlan patêl ha Panginoon ya angkapi-tsi-tsipon ha mihay logal ya in-alimbawa ha mihay babayi, haka anak na. Di ha hulat, ay an-ipaihip na kanla ya dapat milulugud hila, haka paan hilan pagtan ha toro lan ampanoro hên alwan pêtêg.

Kabooan hên pinakalaman

Umpisan hulat 1-3

Ya pamanlugud ya ayn kapantag 4-6

Babalá ya tungkol kanlan ampanoro hên alwan pêtêg 7-11

Tawlin habi 12-13

<sup>1</sup> Hiko hi Juan, ya ambaêgên lan Toa. Ampanulat ako kamo, ya mihay babayi ya pinili ni Apo Namalyari hên mag-in kana, haka ha maának mo. Taganán anlugarûn kataw, haka alwan kakapag kon bêngat ya ampanlugud kamoyu, noa, ampanlugud kamoyu etaman ya balang miha ya nakatanggap hên kaptêgan ya tungkol kan Apo Jesu-Cristo. <sup>2</sup> Anlugarûn naén kaw, gawan habaytoy kaptêgan, ya mag-in kalamo tamo hên ayn angga, ay atsi yana ha ihip tamo. <sup>3</sup> Gawan muwang tamoy kaptêgan haka gawan ampilulugud kitamo, ay hi Apo Namalyari, ya Tatang tamo, haka hi Apo Jesu-Cristo ya Anak na, ay mangingalo dayi kantamo, haka mam-in kapatêkbékan nakêm kantamo.

### *Kaptêgan haka pamanlugud*

<sup>4</sup> Bapan higla ko, gawan nahêlêk koy kaatag kanlan maának mo, ay an-humonol ha kaptêgan hên nanad ha in-utoh kantamo ni Apo Namalyari, ya Tatang tamo. <sup>5</sup> Amêhêñ, ay main akon labay kamoyu. Alwan bayo ya utoh ya an-ihulat ko kamoyu. Noa, hata utoh ay atsi yana kantamo hên una, ya dapat milulugud kitamo. <sup>6</sup> Mahêlêk ya ampanlugud kitamo, ha pamanhumonol tamo ha utoh ni Apo Namalyari, ya nagilam tamoy na, paubat hên una, ya dapat milulugud kitamo. <sup>7</sup> Mal-at ya mapanloko, ya nilumtaw di ha luta. A hila ampaniwala ya hi Apo Jesu-Cristo ay nag-in tawo. Hilay ampanoro hên habayto ay ampanloko hên tawo haka anhumalanghang kan Cristo.\* <sup>8</sup> Kaillag kaw, ta êmén a maalih ya pinagpagalan naén hên manoro kamoyu, ta êmén maubuh yon matanggap lano ya primyo ya impangako ni Apo Namalyari. <sup>9</sup> Hilay a ampamihundo hên pamanhumonol la ha toro ni Apo Jesu-Cristo, gawan ampahanan lay habayto, ay ayn pamakilamo kan Apo Namalyari. Noa, hilay ampamihundo hên pamanhumonol la ha toro na, ay main pamakilamo kan Apo Namalyari, ya Tatang tamo, haka kanan Anak na, hi Apo Jesu-Cristo. <sup>10</sup> No main lumatêng hên manoro kamoyu, ya a ampamitoro hên toro ni Apo Jesu-Cristo, ay paan yo hilan pahowênen ha bali yo, haka paan yo hilan kumustaén. <sup>11</sup> Ta no kumustaén yo hila, ay nanad kaw kalamo ha nangarawak ya dyag la.

### *Ya tawlin habi*

\* <sup>1:7</sup> Hila ay anti-Cristo.

<sup>12</sup> Mal-at pon ya labay kon ipamwang kamoyu, noa, a kina inhulat ya habayto bayri ha hulat ta hirawêñ kataw dayi, ta êmêñ mapihahabi kitamo hêñ arap-arapan. Ha êmbayro, ay hadyay kahiglaan tamo.

<sup>13</sup> Ampangumusta kamo bahêñ ya maának nan patêl moy babayi, ya hiyay pinili etaman ni Apo Namalyari hêñ mag-in kana.

## Ya Ikatlon Hulat ni apostol Juan

### *Paunan habi*

Habaytsi ya ikatlon hulat ni apostol Juan, ya ambaêgên lan Toa, ay kan Gayo, ya mihay ampamaala kanlan patêl ha Panginoon ya angkapi-tsi-tsipon. Andayêwêni ni apostol Juan hi Gayo gawan ha pamanawop na kanlan kaatag ya angkapi-tsi-tsipon haka an-aralan na ya hèn mag-illag ya, ha lalaki ya nag langan Diotrefes.

Kabooan hèn pinakalaman  
 Umpisan hulat 1-4  
 Dinayêw hi Gayo 5-8  
 Ya tungkol kan Diotrefes 9-10  
 Dinayêw hi Demetrio 11-12  
 Tawlin aral 13-15

<sup>1</sup> Anlugurên kon Gayo, hiko hi Juan, ya ambaêgên lan Toa, ya ampanulat kamo, Gayo. Taganán anlugurên kata. <sup>2</sup> Anlugurên kon patêl ha Panginoon, una ay ampakidawat ko kan Apo Namalyari, ya dyanan na ka dayi hèn mangêd ya pamimiyay, haka kahiglaan lawini hèn nanad ha kahiglaan pamakilamo mo kana. <sup>3</sup> Bapan higla ko hèn nilumatêng hilay patêl ya naubat bahêni ha impamwang la kangko ya an-ihundo moy paniwala mo, ya angkahêlêk ha pamanhumonol mo ha pêtêg ya toro. <sup>4</sup> Ayn kaatag ya ampami kangkon hadyay kahiglaan, no alwan, ya mabalitaan ko ya maának ko ha Panginoon, ay anhumonol ha pêtêg ya toro.

### *Dinayêw hi Gayo*

<sup>5</sup> Anlugurên kon patêl ha Panginoon, taganán mangêd ya ampahowênen mo hilay patêl ha Panginoon, agyan a mo hila kilala. <sup>6</sup> Hilay namipamwang kannaén ya angkapi-tsi-tsipon ya patêl ha Panginoon, no ay-êmén ya pamanlugud mo kanla. Dayi pahanan mina êt ya panawop mo kanla hèn dyanan hila hèn kailangan la ha pamanlumagay la, gawan ampaghuyo hila kan Apo Namalyari, <sup>7</sup> ta nammita hilan manyag kalabayan ni Apo Jesu-Cristo, haka a hila ampananggap hawop ubat kanlan a ampaniwala kana. <sup>8</sup> Kabay hikitamoy mipapatêl ha Panginoon, ay dapat hèn manawop kanlan ampaghuyo kan Apo Namalyari nanad kanlan habayto, ta êmén kitamo makapiatag ha panoro la hèn kaptêgan ya tungkol kan Apo Jesu-Cristo.

### *Ya nangarawak ya dyag ni Diotrefes, haka ya mangangêd ya dyag ni Demetrio*

<sup>9</sup> Hinulatan kina ya patêl ha Panginoon ya angkapi-tsi-tsipon bahêni, noa, habaytoy hinulat ko ay a nan ampansinén ni Diotrefes ya labay-labay hèn mamaala kanla, gawan a nan antanggapén ya tungkulon ko. <sup>10</sup> Kabay pamanlumatêng ko bahêni, ay ungkatén kina ya dyag nay main nangarawak ya habi, ya kalaraman, ya tungkol kannaén. Alwan bêngat habayto ya dinyag na, ta a na êt pahowênen hilay patêl ha Panginoon, haka ambawalén na êt hilay patêl, ya mabay hèn mamahowén kanla. Bayo paalihén na êt ha pamtisi-tsipon, hilay ampamahowén kanla. <sup>11</sup> Anlugurên kon patêl ha Panginoon, paan kan manyag hèn andayêni lan mapanyag karawakan. Manyag kan kangêran, ta hilay ampanyag kangêran, ay anak ni Apo Namalyari. Noa, hilay ampanyag karawakan, ay ayn pamakilamo kan Apo Namalyari. <sup>12</sup> Hi

Demetrius etaman, ay mangêd yan tawo. Andayêwên yan balang miha, haka ya kaganawan andaygên na ay akma ha kaptêgan. Hikay man, ay ampamaptêg ya mangêd ya ugali na, haka muwang yo ya pêtêg ya panhabiên naën.

*Ya tawlin habi*

<sup>13</sup> Mal-at pon ya labay kon ipamwang kamoyu, noa, a ko inhulat ya habayto bayri ha hulat, <sup>14</sup> ta tampol kataw dayin hirawê, ta êmên mapihahabi kitamon arap-arapan. <sup>15</sup> Dyanan na ka dayi ni Apo Namalyari hên kapatêkbêkan nakêm. Hilay patêl ha Panginoon bayri ay ampangumusta kamo. Ikumusta mo kay etaman bahêñ ha balang mihay patêl ha Panginoon.

## Ya Hulat ni Judas

### *Paunan habi*

Habaytsi ya hulat ni Judas ya patêl ni Santiago. (Hiyay alwan Judas Iscariote ya nami-upit kan Panginoon Jesu-Cristo.) Habaytsi ay tungkol kanlan ampanoro hên alwan pêtêg ya toro, ya taganán parusaan ni Apo Namalyari. Ampaghabi hila ya pêtêg ya panoro la, ya malyarin manyag karawakan kalabayan lawini, gawan mapamatawad hi Apo Namalyari. Anaralan ni Judas ya hilay ampaniwala kan Panginoon Jesu-Cristo ya dapat hilan magpakataniêh ha paniwala, haka mamiyay hên ayn kapintasan. Dapat hawpan la hilay mahawpan la, ta êmén miligtas hila ha apoy ya ayn angga. Noa, kaillag hila ta kayno magtan hila ha pamanyag lan nangarawak.

Kabooan hên pinakalaman

Umpisan hulat 1-2

Pangatawo, toro haka parusa kanlan ampanoro hên alwan pêtêg 3-16

Aral ta êmén magpakataniêh ha paniwala 17-23

Inhalangin hila 24-25

<sup>1</sup> Hiko hi Judas ya ampaghuyo kan Apo Jesu-Cristo, haka hikoy kapotoh pohêl ni Santiago. Anhulatan kataw ya kapareho kon pinili ni Apo Namalyari, hên impapawa, hên mag-in kana, hên mamiyay ha pamanlugud na haka ha pamangillag ni Panginoon Jesu-Cristo.

<sup>2</sup> An-ihalangin kataw ya pahanan ni Apo Namalyari ya kapatêkbêkan yo. An-ihalangin kataw êt ya pahanan nay ingalo na kamoyu haka ya pamanlugud na kamoyu.

### *Ya hilay ampagbabara hên hila ay ampanoro hên kaptêgan*

<sup>3</sup> Anlugarûn kon patêl ha Panginoon, ya labay-labay ko dayi hên ihulat kamoyu ay tungkol ha pamiligtas kantamo. Noa, angkadambi ko, ya kailangan kataw pon hên aralan ya ipaglaban yoy kaptêgan ya ampaniwal-an tamo, ya a ampangoman, ya impamwang ni Apo Namalyari kantamon pinili na hên mag-in kana. <sup>4</sup> Ta main ungnoy alwan maka-Diyos ya bat hên nakilamo kamoyu ya ampagbabaran pêtêg ya panoro la, ya malyarin manyag karawakan kalabayan lawini, gawan mapamatawad hi Apo Namalyari. Noa, hên haton lagi ay tinalagá nay na ni Apo Namalyari ya parusa la, ta nakahulat ha Kahulatan ya impahulat na, ya parusaan hilan ayn angga, gawan an-itaah la hi Panginoon Jesu-Cristo ya mimihay Panginoon haka pinaka-Amo tamo.

<sup>5</sup> Mana yoy nan muwang ya habaytsi ya an-ihulat ko, noa, labay kon panêmtêmén yo, ya imbuhan man ni Apo Namalyari ya kaapo-apoan ni apo Israel ha pangaipoh la ha bansom Egipro, ay ha nilumatêng ya allo, ay pinatsi na hilay a naniwala kana. <sup>6</sup> Ihipèn yo etaman ya anghel na ya labay hên mitag-ay ya tungkulon ya indin ni Apo Namalyari kanla, haka nag-alíh ha legal la ha langit. Inggapoh na hilan taykala ya a maboyto hên angga-angga bayro ha kalaléan ya hadyay diglêm angga ha lumatêng ya Allon Pamanukom. <sup>7</sup> Ihipèn yo etaman ya tawo hên haton lagi ha balayan Sodoma, Gomorra haka ha balayan ya narani bayro, ya nanyag kasalanan hên nanad kanlan habaytoy anghel ya nakagapoh. Panay lan dinyag ya hino-hino kay na hên ya hadyay karawakan kalabayan lawini la, kabay amparusaan na hila ni Apo Namalyari ha apoy ya taganán a maparê. Habaytoy palatandaan

kanlan mapanyag karawakan ta mipalako hila etaman ha apoy ya taganán a maparê.

<sup>8</sup> Êmén hila êt bayro ya hilay ampagbabara ya bat hên nakilamo kamoyu. Gawan ha angkahalomata la kano, ay mapanyag hilan karawakan kalabayan lawini la, ampanalanghang hila ha main tungkulan, haka bat lan anhabiên ya pamanira kanlan anghel. <sup>9</sup> Hi Miguel man ya miha kanlan pinakapoon lan anghel ni Apo Namalyari, ay a ya naghabin pammusmus kan Satanas hên nakihubakan hila hên tungkol ha bangkay ni apo Moises. Ya hinabi na tana ni Miguel ay, “Habyanan ka hên Panginoon!” <sup>10</sup> Noa, hilay alwan maka-Diyos ya bat hên nakilamo kamoyu, ay ampaghabi hên pamanira ha hinoman ya a la angkaintindihan. Haka ya muwang la, ya nanad ugalin ayop, ya mapanyag karawakan kalabayan lawini la, ay habaytoy mamigtan kanla ha kaparusaan ya ayn angga. <sup>11</sup> Taganán kapaingalo hila, gawan ha mabyat ya parusa ya lumatêng kanla! Ta ampamiyay hila hên nanad kan Cain ya alwan maka-Diyos. Nanad hila etaman kan Balaam, ta labay-labay la êt hên mananggap pera ha mapanyag karawakan. Anhumalanghang hila kanlan ampamaala kanla hên nanad kan Core ya nanalanghang kan apo Moises. Nabyat ya parusa kan Core, haka êmbayro êt kanlan habaytsi, ay parusaan hila ni Apo Namalyari hên ayn angga.

<sup>12</sup> Nanad ha mantsa ya ampakarawak ha bayoy baro, ay êmbayroy kahibaan la no ampakiaêm hila kamoyu ha kaluto yo ya main kalamoy komunyon. Ayn hilan dêng-êy. Sarili lan bat ya an-ihipêñ la. Ayn hilan pukat. Êmén hilan ginêm, ya ampialipad hên angin, ya a ampam-in uran. Êmén hila êt hên poon kayo ya ayn tagêy ha panaon hên pamanagêy, ya nayango haka inulot. <sup>13</sup> Êmén hila êt hên tandulon ha dagat ya an-iawah haka an-ipayidpid hên narêmêk ya dalak ha laylay lanêm, ta ya andaygêñ la ay taganán kapaparêng-êy. Nanad hila êt hên bêtewêñ, ya nag-alíh ha andyanan la, ta ampakha hila ha kalaléan ya hadyay diglêm, ya in-il-an ni Apo Namalyari kanla.

<sup>14</sup> Habaytoy alwan maka-Diyos, ay impapêt ni Enoc ya apó ha tanggiginih\* ni apo Adan, ya wana hên hato, “Pakagilamên yoy habaytsi! Ya Panginoon ay lumatêng hên main lamoy libo-liboy anghel na. <sup>15</sup> Hatolan nay balang miha, haka parusaan nay alwan maka-Diyos ha kaganawan dinyag lay karawakan, haka ha kaganawan hinabi la ya pammusmus kana.” <sup>16</sup> Habaytoy alwan maka-Diyos, ay mapanitol, mapangato, mapanyag karawakan kalabayan lawini la, mapaglalang, haka maghabi hilan naayang ya habi ta êmén la makwa ya labay la.

### Panaad haka aral

<sup>17</sup> Noa, hikaw ya anlugurên kon patêl ha Panginoon, ay ihipêñ yoy hinabi lan apostol ni Panginoon tamon Jesu-Cristo. <sup>18</sup> Ta hinabi la, ya ha tawlin panaon, no marani yanay anggaan hên luta, ay main lumatêng ya mapanyag karawakan kalabayan lawini la, ya mammusmus kamoyun ampaniwala. <sup>19</sup> Habaytoy alwan maka-Diyos, ay ampangubatan hên pamaniran pakikim-ihia yo. Ipoh hila hên karawakan kalabayan lawini la, haka ayn kanla ya Espiritu ni Apo Namalyari. <sup>20</sup> Noa, hikaw, ya anlugurên kon patêl ha Panginoon, ay pataniêhêñ yoy paniwala yo ha kaptêgan ya impamwang ni Apo Namalyari kamoyu. Haka manalangin kaw ha kapangyarihan hên Espiritu ni Apo Namalyari. <sup>21</sup> Illagan yoy pamimiyay yo êmén kaw a midayo ha pamanlugud ni Apo Namalyari, kaban an-êngganan yoy biyay ya ayn angga, ya tanggapêñ tamo gawan ha ingalo ni Panginoon tamon Jesu-Cristo.

\* **1:14** ikapiton láhi.

<sup>22</sup> Haka ingalwan yo hilay ampag-alangan ha paniwala la kan Apo Jesu-Cristo. <sup>23</sup> Hawpan yo hilay mahawpan yo, ta êmén miligtas hila ha apoy ya ayn angga. Ingalwan yo etaman hilay nag-in ipoh ha pamanyag karawakan, noa, kaillag kaw ta kayno magtan la kaw ha pamanyag lan nangarawak.

*Pamagpuri*

<sup>24</sup> Purién ya hi Apo Namalyari, ya ampakapaillag kamoyu, êmén a maalíh ya paniwala yo. Hiyay mantan kamoyu hên ayn kapintasan, hên main hadyay kahiglaan, ha kapahilêw ya kahampatan na. <sup>25</sup> Purién hi Apo Namalyari, ya mimihay Diyos, ya Mámiligtas tamo gawan ha pakikimiha tamo kan Panginoon tamon Jesu-Cristo. Atsi kanay kapahilêw ya kahampatan na, ya pamagpuri, kapangyarihan haka ya tungkulan ya ayn kapantag, ya atsi yana kana paubat hên ubat, hên angga-angga! Amen.

## Ya Impamwang ni Apo Jesu-Cristo kan Juan

### *Paunan habi*

Ya Impamwang kan Juan ay inhulat ni Juan hên haton ampairapan hilay ampaniwala kan Apo Jesu-Cristo, gawan ha paniwala la kana. Hi Apo Jesu-Cristo ay nagpahalumata kan Juan no hinoy malyari ha lumatêng ya allo. Bayo impahulat nay habayto kan Juan êmén pakhawêñ ya nakêm lan ampaniwala ta êmén la mapataniêñ ya nakêm la.

Ya kaatag ya impahalumata kan Juan ay masákit intindiêñ, noa muwang tamo ya labay habiêñ hên kaatag, ya nanad ha mal-at ya mata ay mal-at ya kamwangan. Muwang tamo êt ya labay habiêñ hên mal-at ya hongay ay makhaw ya kapangyarihan haka matag-ay ya tungkulon. Muwang tamo êt ya labay habiêñ hên bitsih ay kataniêhan.

Malinaw di ha hulat ni Juan, ya hambutêñ ni Apo Namalyari hilay kapatsi na gawan kan Apo Jesu-Cristo. Malinaw êt ya hilay pêtêg hên ampaniwala kan Apo Jesu-Cristo ay magpaidi kana hên ayn angga ha langit.

Kabooan hên pinakalaman

Umpisan hulat 1:1-8

Ya unan halumata haka ya hulat kanlan pitoy pagtsiponan hên pagsimbaan ha probinsyan Asia 1:9-3:22

Ya pamagsimba ha langit haka ya naka-tsili-tsil ya hulat ya nakahara hên pitoy patak hên talo 4:1-8:1

Ya pitoy tambuyok 8:2-11:19

Ya nanad ha hadyay hêlay dapo haka ya loway kapapalimoy nanad ayop lalê 12:1-13:18

Hino-hino kay nahêñ ya halumata 14:1-15:8

Ya pamarusa ya ubat kan Apo Namalyari ya atsi ha pitoy silyaw 16:1-21

Ya balayan Babilonia ya inûlam, haka hinambut ya kapatsi ni Apo Namalyari 17:1-20:10

Impahalumata kan Juan ya katatawlian pamanatol 20:11-15

Impahalumata kan Juan ya bayoy langit, bayoy luta, haka bayoy Jerusalem 21:1-22:5

### *Umpisan hulat*

<sup>1</sup> Ya laman hên habaytsi ya hulat, ay impamwang ni Apo Namalyari kan Panginoon Jesu-Cristo, ta êmén na etaman ipamwang kanlan ampaghuyo kana, ya tinalagá ni Apo Namalyari, ya bigla hên malyari. Kabay in-utoh etaman ni Panginoon Jesu-Cristo ya anghel na hên namipamwang kangko, hi Juan, ya ampaghuyo kana hên habayto ya an-ihulat ko bayri. <sup>2</sup> Ampaptêgan ko ya kaganawan impahalumata kangko, ya habi ni Apo Namalyari ya pinaptêgan ni Panginoon Jesu-Cristo. <sup>3</sup> Iningalwan hilay ampamaha hên habaytsi ha arapan hên kaatag. Iningalwan hila êt ya anhumonol ha nagilam la bayri ha papêt, ya ahina mabuyot hên matupad.

*Pamangumusta ni Juan ha main paniwala kan Apo Jesu-Cristo ha pitoy pagtsiponan hên pagsimbaan ha Panginoon ha Probinsyan Asia*

<sup>4</sup> Habaytsi ya hulat ko kamoyun patêl ha Panginoon ya angkapi-tsi-tsipon ha Efeso, Esmirna, Pergamo, Tiatira, Sardis, Filadelfia haka ha Laodicea ya pitoy pagtsiponan hên pagsimbaan kana ha probinsyan Asia.

An-ihalangin kataw ya dyanan na kaw dayi hēn kapatēkbēkan nakêm haka ingalwan na kaw ni Apo Namalyari, ya atsi yana hēn haton lagi, amêhēn, haka hēn magpa ayn angga. Dyanan na kaw dayi hēn kapatēkbēkan haka ingalwan na kaw êt hēn Espiritu na, ya nakaarap ha iknoan na ha pitoy pahlēk hēn kapangyarihan na.<sup>5</sup> Dyanan na kaw dayi hēn kapatēkbēkan haka ingalwan na kaw etaman ni Panginoon Jesu-Cristo ya tapat, ya ampamaptēg hēn tungkol ha nakahulat di. Hiyay kauna-unaan hēn biniyay oman kanlan natsi, ya ahê natsin oman, haka hiyay pinakapoon lan ampamaala bayri ha luta.

Hiyay ampanlugud kantamo haka ya kamatsan na hēn namoganggang ya daya na, ay namibuhan kantamo ha kasalanan tamo.<sup>6</sup> Impahan na kitamo ha pamanlokop na, ta êmén kitamo mamaala hēn kalamo na, haka dinyag na kitamon pari ya ampaghuyo kan Apo Namalyari, ya Diyos, ya Tatang na. Purién tamo ya! Hiyay ampamaala hēn magpa ayn angga! Amen.<sup>7</sup> Pakaihipêñ yoy habaytsi! Lumatêng hi Panginoon Jesu-Cristo hēn kalamoy lêmm, haka mahêlêk yan balang miha, anggan hilay nanlatog hēn tagyang na. Gawan mahêlêk la ya, ay maubuh hēn mipanyêngêñ ya tawo bayri ha boon luta. Taganán malyari ya habayto. Amen.

<sup>8</sup> Wanan Makapangyarihan, ya Panginoon, hi Apo Namalyari, ya atsi yana hēn haton lagi, amêhêن, haka magpa ayn angga, “Hiko ya Alpha haka Omega, ya labay habiên, ya hikoy ampangubatan haka ya anggaan hēn balang hino.”

### *Impahalumata kan Juan hi Apo Jesu-Cristo*

<sup>9</sup> Hiko hi Juan, ya mihay patêl yo ha Panginoon. Gawan ha ampaniwala ko kana, ay hikoy kalamo yo ha pamagtêeh ha kaparusaan, haka ha pamanlokop na ya lumatêng. Ha pamarusa la kangko, gawan ha pamipamwang kon habi ni Apo Namalyari, haka ya tungkol ha impamwang ni Panginoon Jesu-Cristo, ay gintan la kon intapon ha pulo ya nag langan Patmos.<sup>10</sup> Hēn habayton mihay allon pamagsimba ha Panginoon, ay main yan impahalumata kangko ya Espiritu ni Apo Namalyari. Nagilam ko ha bokotan ko ya mihay habi, ya makhaw, ya nanad hēn tonoy tambuyok.<sup>11</sup> Wana kangko, “Ihulat moy mahêlêk mo, ta ipagtan mo kanlan angkapti-tsipon, ha Efeso, Esmirna, Pergamo, Tiatira, Sardis, Filadelfia haka ha Laodicea ya pitoy pagtsiponan hēn pagsimbaan kangko ha pitoy balayan ha probinsyan Asia.”

<sup>12</sup> Hēn namalingay ako, hēn hêlkêñ ko no hinoy ampaghabi, ya nahêlêk ko ay pitoy gintoy pamyanan solo.\*<sup>13</sup> Ha pibonakan hēn hatoy pitoy pamyanan solo, nahêlêk ko ya main nakairêng ya nanad tawo, ya nakatakop hēn angga ha boé. Main yan takop ya ginto, ya nakakábat ha pagaw na.<sup>14</sup> Bapan putsi hēn habot na hēn nanad ha kaputsi hēn bolak, haka ya mata na ay nanad dêkêt hēn apoy.<sup>15</sup> Ya bitsih na ay nanad ha tangso ya kapahilêw, haka ya habi na ay nanad lanêm ya man-awk.<sup>16</sup> Antalanêñ nay pitoy bêtêwêñ, haka main inumawah ya mihay êetak ha bêbêy na ya napikapakay ngalab ya hadyay tarêm. Ya lupa na ay kapahilêw hēn nanad ha hawang hēn allo ha kauugtoan.

<sup>17</sup> Hēn pamakahêlêk ko kana ay nandoko ko ha bandan bitsih na hēn nakadêngdêng, noa, a ko ampakahabi, ta nanad kinan natsi. Noa, impalunto na kangko ya panabtab hēn gamêt na, haka na hinabi kangko, “Paan kan malimo! Hikoy ampangubatan haka ya kaanggaan hēn balang hino.<sup>18</sup> Hiko ya angkabiyay. Natsi ko. Noa, hêlkêñ yo! Biniyay akon oman! Hiko ay angkabiyay hēn magpa ayn angga. Haka atsi yay na ha aypa hēn kapangyarihan ko ya kamatsan, haka hatoy ambaêgêñ lan Hades ya logal hēn kaêlwa

\* **1:12** kingki.

lan natsi. <sup>19</sup> Kabay ihulat mina ya nahêlêk mo, haka ya angkalyari amêhêh, haka ya malyari pon. <sup>20</sup> Ya labay habiên awud hêñ pitoy bêtêwêñ, ya nahêlêk mon antalanêñ ko, ay hilay in-utoh ya ampamaala ha angkapi-tsi-tsipon ha Efeso, Esmirna, Pergamo, Tiatira, Sardis, Filadelfia haka ha Laodicea ya pitoy pagtsiponan hêñ pagsimbaan kangko ha probinsyan Asia. Haka ya hatoy pitoy gintoy pamyanan solo,<sup>†</sup> ay yabay ya habaytoy pitoy pagtsiponan hêñ pagsimbaan kangko ha probinsyan Asia.”

## 2

### *Ya hulat kanlan patêl ha Panginoon ya angkapi-tsi-tsipon ha balayan Efeso*

<sup>1</sup> Wanay na êt hêñ namihundon pamaghabi na hi Apo Jesu-Cristo ha halumata ko, “Pagtanay mon hulat ya in-utoh hêñ mamaala kanlan angkapi-tsi-tsipon ha pagtsiponan hêñ pagsimbaan kangko ha balayan Efeso. Êmêñ ya di ya ihulat mo:

“Habaytsi ya anhabiên kon ampanalan hêñ pitoy bêtêwêñ ha panabtab hêñ gamêt ko, ya ampibita-bitâ ha pibonakan hêñ pitoy gintoy pamyanan solo:<sup>\*</sup> <sup>2</sup> Angkamwangan ko ya pamimiyay yo, pamagpagal yo, haka pamagtêh yo. Muwang ko, ya a yo ampaulayan hêñ makilamo kamoyu hilay ampanyag karawakan. Muwang ko ya nasubukan yo hilay nay ampagbabaran apostol, haka napaptêgan yo ya hila ay taganán alwan apostol, ta alwan pêtêg ya toro la. <sup>3</sup> Gawan kangko ay a kaw angkahawa hêñ idin ya boon biyay yo ha pamagtêh ha kal-atan hêñ kairapan ha pamanhumonol yo kangko. <sup>4</sup> Noa, habaytsi ya a ko angkalabayan ha pamimiyay yo: ya pamanlugud yo kangko haka kanlan kapareho yon ampaniwala kangko, ay alway nan êmêñ haton una, ta natambaang kaw na. <sup>5</sup> Panêmtêmêñ yo ya una yon pamanlugud, haka paghêhêan yon talibatokan ya pangatambaang yo kangko boy kanlan kapareho yon ampaniwala kangko. Mamiyay kaw oman hêñ nanad hêñ pamimiyay yo hêñ haton kauna-unaan kaw hêñ naniwala kangko, ta no a kaw maghêhê, ay alihêñ ko ya solo yo ha pinamyanan kana. <sup>6</sup> Noa, an-ikahigla ko, ya angkahêmêkan yo etaman ya angkahêmêkan ko, yabay ya andaygêñ lan ambaêgêñ hêñ Nicolaita, ya ampaniwala hêñ alwan narawak hêñ magsimba ha alwan pêtêg ya diyos, haka alwan narawak hêñ manyag hêñ karawakan kalabayan lawini.

<sup>7</sup> “Hikaw ya ampanggilam, ay pakaihipêñ yo ya panhabiên nan Espiritu ni Apo Namalyari kanlan angkapi-tsi-tsipon ha pagtsiponan hêñ pagsimbaan kangko! Hilay mipanambut ha karawakan, ay dyanan kon karapatan hêñ mangan tagêy hêñ kayo ya ampakab-in biyay ya ayn angga, ya atsi ha Paraiso, ha ampaidyanan ni Apo Namalyari.”

### *Ya aral kanlan patêl ha Panginoon ya angkapi-tsi-tsipon ha balayan Esmirna*

<sup>8</sup> Wanay na êt ni Apo Jesu-Cristo ha halumata ko, “Pagtanay mon hulat ya in-utoh hêñ mamaala kanlan angkapi-tsi-tsipon ha pagtsiponan hêñ pagsimbaan kangko ha balayan Esmirna. Êmêñ ya di ya ihulat mo:

“Habaytsi ya anhabiên kon ampangubatan haka ya anggaan hêñ balang hino, ya natsi, noa, biniyay oman. <sup>9</sup> Muwang ko ya pamairap ya angkaranasan yo. Muwang ko êt ya ampag-irap kaw, noa, nanad mabandi kaw, ta makhaw ya paniwala yo kangko. Haka muwang ko êt ya pamanira la kamoyu, hêñ hilay ampagbabaran ya hila ay Israelita, noa, atsi hila ha pangkat ya atsi ha lokop ni Satanás. <sup>10</sup> Paan yon kalimwan ya pamairap la

<sup>†</sup> 1:20 kingki. \* 2:1 kingki.

kamoyu ya marani yoy nan maranasan. Kaillag kaw! Ha pamanubuk hēn paniwala yo, ay ipapahukul ni Satanas ya ungro kamoyu, haka magdusa kaw ha mapoy allo. Ihundo yoy katapatan yo kangko, agyan patsēn la kaw, ta hikoy mamidin kamoyun biyay<sup>†</sup> ya ayn angga.

<sup>11</sup> “Hikaw ya ampanggilam, ay pakaihipēn yo ya panhabiēn nan Espiritu ni Apo Namalyari kanlan angkapi-tsi-tsipon ha pagtsiponan hēn pagsimbaan kangko! Hilay manambut ha karawakan, ay a mipalako ha pangalwan kamatsan, ha parusa ya ayn angga.”

*Ya aral kanlan patēl ha Panginoon ya angkapi-tsi-tsipon ha balayan Pergamo*

<sup>12</sup> Wanay na êt ni Apo Jesu-Cristo ha halumata ko, “Pagtanān mon hulat ya in-utoh hēn mamaala kanlan angkapi-tsi-tsipon ha pagtsiponan hēn pagsimbaan kangko ha balayan Pergamo. Êmēn ya di ya ihulat mo:

“Habaytsi ya anhabiēn kon main êtak ya napikapakay ngalab ya hadyay tarêm: <sup>13</sup> Muwang ko ya balayan, ya ampaidyanan yo, ay main pagtsiponan hēn pagsimbaan kan Satanas. Embayro man, ay nananiêh ya paniwala yo kangko. Haka a kaw namipuglaoh hēn paniwala yo kangko hēn hato man hēn panaon ni Antipas, ya nanonol kangko haka namaptēg hēn tungkol ha kaptēgan hēn tungkol kangko, ya pinatsi bahēn ha balayan ya ampaidyanan yo, ya angkalokopan ni Satanas. <sup>14</sup> Noa, main akon a angkalabayan ha pamimiyay yo. Main ungro kamoyu ya anhumonol ha toro ni Balaam kan Balak, ya nangamuyot kanlan Israelita hēn mangan hēn imparaēp ha alwan pêtēg ya diyos, haka hēn mamabayi boy makilalaki. <sup>15</sup> Main êt kamoyu ya anhumonol ha toro lan ambaêgēn lan Nicolaita, ya ampaniwala ya alwan narawak hēn magsimba ha alwan pêtēg ya diyos, haka alwan narawak hēn manyag hēn karawakan kalabayan lawini. <sup>16</sup> Kabay paghêhêan haka talibatokan yoy nay andaygēn yo, ta no ahê, ay bigla kon labanan hilay anhumonol ha toro lan ambaêgēn lan Nicolaita, hēn êtak koy napikapakay ngalab ya hadyay tarêm ya an-umawah ha bêbêy ko.

<sup>17</sup> “Hikaw ya ampanggilam, ay pakaihipēn yo ya panhabiēn nan Espiritu ni Apo Namalyari kanlan angkapi-tsi-tsipon ha pagtsiponan hēn pagsimbaan kangko! Ha miapanambut ha karawakan, ay dyanan kon pamangan ya ambaêgēn manna, ya nakahimpan ha langit, haka dyanan ko hila hēn tsi-tsihan bato, ya naputsi, ya pinamihulatan hēn bayoy lagan, ya ayn makamwang no alwan bat hēn hatoy dyanan hēn habaytoy bato.”

*Ya aral kanlan patēl ha Panginoon ya angkapi-tsi-tsipon ha balayan Tiatira*

<sup>18</sup> Wanay na êt ni Apo Jesu-Cristo ha halumata ko, “Pagtanān mon hulat ya in-utoh hēn mamaala kanlan angkapi-tsi-tsipon ha pagtsiponan hēn pagsimbaan kangko ha balayan Tiatira. Êmēn ya di ya ihulat mo:

“Habaytsi ya anhabiēn kon Anak ni Apo Namalyari, ya nanad hēn dêkēt hēn apoy ya mata, haka nanad tangso ya bitsih, ya kapahilêw. <sup>19</sup> Angkamwangan ko ya pamimiyay yo, kabay muwang ko ya pamanlugud yo, paniwala yo, pamaghuyo yo, haka ya pamagtêh yo ha kairapan. Muwang ko êt ya mangêd pon ya andaygēn yo amêhêñ kanan haton babayo kaw naniwala kangko. <sup>20</sup> Noa, habaytsi ya a ko angkalabayan ha pamimiyay yo: ampaulayan yo hi Jezebel, ya mihay babayi ya ampagbabara hēn hiyay mihay mâmipamwang ni Apo Namalyari. An-amuyotêñ na hilay tagahonol ko hēn manyag karawakan hēn nanad ha pamabayi, pamkilalaki haka manggan hēn imparaēp ha alwan pêtēg ya diyos. <sup>21</sup> Dinyanan ko ya hēn panaon hēn

<sup>†</sup> **2:10** korona ha habin Griego.

maghêhê, hên manalibokot ha pamakilalaki na, noa, a ya taganán magbayo. <sup>22</sup> Kabay parusaan ko ya hên nabyat ya hakit. Embayro êt, ay parusaan ko etaman, ya hilay kalamoy nan ampanyag kasalanan, no a la paghêhêan hên talibatokan ya karawakan ya andaygén la hên kalamo na. <sup>23</sup> Haka patsên ko hilay nanad nay nan anak, ya boon nakêm hên anhumonol ha toro na, ta êmén la mamwangan hên hilay angkapi-tsi-tsipon ha balang pagtsiponan hên pagsimbaan kangko, ya hikoy ampamoliah hên nakêm haka manumbah ha balang miha kamoyu, do ha dinyag yo.

<sup>24</sup> “Kamoyu etaman hên kaatag ha balayan Tiatira, ya a nanggilam ha nangarawak ya toro ni Jezebel, haka ayn muwang ha ambaêgén lan mangalalê ya toro ni Satanas, ay a kataw pabyatan ha aral. <sup>25</sup> Ya labay kon bat kamoyu, ay pataniêhêن yon mangêd ya paniwala yo kangko hên angga ha pamanlumatêng ko. <sup>26</sup> Hilay mipanambut ha karawakan, haka anhumonol ha kalabayan ko hên angga ha anggaan biyay la, ay dyanan kon tungkulan hên mamaala ha balang bansa. <sup>27</sup> Mamaala hila kanla hên ayn ingalo hên itad hila ha banga, ya bahakêh hên têkêن ya dyag ha bakal. <sup>28</sup> Ta idin ko kanla ya tungkulan ya indin kangkon Tatang ko, haka ya bêtêwêñ ya ambaêgén manwatah ha palatandaan ya nipanambut hila.

<sup>29</sup> “Hikaw ya ampanggilam, ay pakaihipêñ yo ya panhabiêñ nan Espiritu ni Apo Namalyari kanlan angkapi-tsi-tsipon ha pagtsiponan hên pagsimbaan kangko!”

### 3

#### *Ya hulat kanlan patêl ha Panginoon ya angkapi-tsi-tsipon ha balayan Sardis*

<sup>1</sup> Wanay na êt ni Apo Jesu-Cristo ha halumata ko, “Pagtanay mon hulat ya in-utoh hên mamaala kanlan angkapi-tsi-tsipon ha pagtsiponan hên pagsimbaan kangko ha balayan Sardis. Èmén ya di ya ihulat mo:

“Habaytsi ya anhabîen kon ampamaala ha pitoy pahlêk hên kapangyarihan nan Espiritu ni Apo Namalyari, haka ya ampanalan hên pitoy bêtêwêñ: muwang ko ya pamimiyay yo. Ha hêlêk tawo, ay ampaniwala kaw kangko, noa, ha kaptégan, ay pérâd tanan natsi ya paniwala yo kangko. <sup>2</sup> Mimata kaw ta pakhawêñ yoy paniwala yo, ta êmén a ya lumuyang hên matsi, ta ya pamimiyay yo ay main pamagkulang ha hêlêk ni Apo Namalyari, ya ansimbaêñ ko. <sup>3</sup> Kabay panêmtêmén yoy intoro kamoyu. Dapat honolêñ yoy habayto, haka paghêhêan yon talibatokan yoy nay pamanyag karawakan. Ta no a kaw dalin mimata, ay bigla kataw lakwêñ hên parusaan, êmén ha biglan pamanlumatêng hên manakaw. <sup>4</sup> Noa, main ungnon bat bahêñ kamoyu ha balayan Sardis, ya a ampakilamo hên manyag karawakan. Hilan bêngat ya habayto ya makalamo ko hên mita hên nakabaron naputsi, gawan hinonol lay kalabayan ni Apo Namalyari. <sup>5</sup> Hilay manambut hên karawakan, ay pabaroan etaman hên naputsi hên nanad kanla, haka ya langan la, ay a ko boraêñ ha ambaêgén libron biyay, ya nag langan lan main biyay ya ayn angga. Ha arapan ni Apo Namalyari, ya Tatang ko, angga ha arapan lan anghel na, ay ipamwang ko ya kangko hila.

<sup>6</sup> “Hikaw ya ampanggilam, ay pakaihipêñ yo ya panhabiêñ nan Espiritu ni Apo Namalyari kanlan angkapi-tsi-tsipon ha pagtsiponan hên pagsimbaan kangko!”

#### *Ya aral kanlan patêl ha Panginoon ya angkapi-tsi-tsipon ha balayan hên Filadelfia*

<sup>7</sup> Wanay na êt ni Apo Jesu-Cristo ha halumata ko, “Pagtanān mon hulat ya in-utoh hēn mamaala kanlan angkapi-tsi-tsipon ha pagtsiponan hēn pagsimbaan kangko ha balayan Filadelfia. Èmēn ya di ya ihulat mo:

“Habaytsi ya anhabiēn kon impapawa ni Apo Namalyari hēn mag-in kana, ya banal, ya ayn hinon kasalanan, ya mapaypaniwal-an, ya ampanalan hēn susi\* ni Arin David. Ya loatēn ko, ay ayn hinoman ya makapikabat, haka ya ikabat ko, ay ayn hinoman ya makaloat. <sup>8</sup> Angkamwangan ko ya pamimiyay yo. Muwang ko êt ya alwa kaw hēn makhaw, gawan pêpérad kaw, noa, hinonol yoy toro ko, haka ya paniwala yo kangko, ay a yo impuglaoh. Kabay niloat ko ya mihay ilwangan ha arapan yo haka ayn hinoman ya makapikabat hēn habayto. <sup>9</sup> Manggilam kaw! Main bahēn ya ampagbabara ya hila ay Israelita, noa, kalamo hila ha pangkat ya atsi ha lokop ni Satanas. Ipakarani ko hila kamoyu. Makadēngdēng hila ha arapan yo hēn mam-in galang kamoyu, haka mamwangan la bayto ya anlugarēn kataw. <sup>10</sup> Gawan nagtēêh kaw hēn nanad ha in-utoh ko kamoyu, ay illagan kataw kaban angkaranasan yoy kairapan ya lumatēng ha boon luta. <sup>11</sup> Bigla ya pamanlumatēng ko! Pakipahootan yon honolēn ya kaptēgan, ta êmēn a maayu hēn kaatag ya an-idin ko kamoyu, ya biyay† ya ayn angga. <sup>12</sup> Hilay manambut kan Satanas, ay itad ko ha tarēk ya pampah-êy ha pagtsiponan hēn pagsimbaan kan Apo Namalyari, ya ansimbaēn ko. Idi hila tana bayro hēn ayn angga. Mabalayan ya hila ay kan Apo Namalyari ta ihulat ko kanla ya langan na, haka ya langan hēn balayan na, ya bayoy Jerusalem, ya umaypa ubat kana ha langit. Haka Mabalayan ya hila ay kangko ta ihulat ko kanla ya bayoy langan ko.

<sup>13</sup> “Hikaw ya ampanggilam, ay pakaihipēn yo ya panhabiēn nan Espiritu ni Apo Namalyari kanlan angkapi-tsi-tsipon ha pagtsiponan hēn pagsimbaan kangko!”

### *Ya aral kanlan patēl ha Panginoon ya angkapi-tsi-tsipon ha balayan Laodicea*

<sup>14</sup> Wanay na êt ni Apo Jesu-Cristo ha halumata ko, “Pagtanān mon hulat ya in-utoh hēn mamaala kanlan angkapi-tsi-tsipon ha pagtsiponan hēn pagsimbaan kangko ha balayan Laodicea. Èmēn ya di ya ihulat mo:

“Habaytsi ya anhabiēn ko ya ambaēgēn Amen, ya mapaypaniwal-an, haka ampamaptēg ha kaptēgan, gawan hikoy ampangubatan hēn kaganawan dinyag ni Apo Namalyari. <sup>15</sup> Angkamwangan ko ya pamimiyay yo. Ya paniwala yo kangko ay nanad lanēm ya naayamēēm, ya alwan nakēbēl haka alwan naomot. Labay ko dayin naigēt ya paniwala yo kangko. <sup>16</sup> Gawan ha pangatambaang yo, ay pērad kataw tanan itaah! <sup>17</sup> Wamoyu mabandi kaw, ta main kaw hēn katsighaw, haka a yoy na kailangan ya hinoman. Yarin a yo muwang ya hikaw ay ayn taganán pukat, kapapaingalo, mairap, buwag haka ayn nanan ingkatakop ha lawini yo! <sup>18</sup> Kabay an-aralan kataw ya manaliw kaw kangko hēn naahig ya gintoy imparann ha apoy, ta êmēn kaw mag-in pētēg hēn mabandi ha arapan ni Apo Namalyari. Manaliw kaw kangko hēn nangaputsi ya takop, ta êmēn matagpēnan ya lawini yoy kapaparēng-êy, ya ayn ingkatakop. Manaliw kaw êt kangko hēn tambal mata, ta êmēn kaw makahēlēk. <sup>19</sup> Hilay anlugarēn ko ay an-atolan ko haka amparal-an ko. Kabay boon nakēm yo dayin paghēhēan ya kasalanan yo. <sup>20</sup> Manggilam kaw! Atsi ko ha ilwangan hēn nakēm hēn balang miha hēn ampamaēg. Hinoman ya manggilam hēn baēg ko, ta pahowēnēn ako, ay humwēn ako hēn makilamo

\* **3:7** Isaias 22:22. † **3:11** korona ha habin Griego.

kana hêñ nanad ha makiaêm kana. <sup>21</sup> Hinoman ya manambut karawakan, ay hiyay dyanan ko hêñ karapatan hêñ mamaala hêñ kalamo ko, hêñ nanad ha pam-i kangko ni Apo Namalyari, ya Tatang ko, hêñ karapatan hêñ mamaala hêñ kalamo na, hêñ hinambut ko hi Satanas.

<sup>22</sup> “Hikaw ya ampanggilam, ay pakaihipên yo ya panhabiên nan Espiritu ni Apo Namalyari kanlan angkapi-tsi-tsipon ha pagtsiponan hêñ pagsimbaan kangko!”

## 4

### *Impahalumata kan Juan ya pamagsimba kan Apo Namalyari ha langit*

<sup>1</sup> Pamakayarin habayto, ay nangoman akon naningla. Nahêlêk koy nakaloat ya ilwangan hêñ langit! Haka nagilam kon oman, ya habi ya nanad hêñ tonoy tambuyok, ya wana kangko, “Munik ka di, ta ipahlêk ko kamo ya habaytsi ya malyari pon, ha lumatêng ya allo.” <sup>2</sup> Tampol nan impahalumata kangko hêñ Espiritu ni Apo Namalyari, ya mihay iknoan hêñ ampamaala bayro ha langit haka hatoy nakaikno bayro. <sup>3</sup> Ya lupa nan hatoy nakaikno bayro ay nanad ha mangaalagá ya bato ya ampangislap ya ambaêgêñ hêñ haspe haka kornalina. Main mihay buwangaw ya nakabalitoktok bayro ha iknoan nan ampamaala ya nanad ha kulay bulong hêñ esmeralda, ya ampangislap. <sup>4</sup> Nakapalibot kanan nakaiknon ampamaala, ay main lowampo boy apat ya kaatag pon ya pag-iknoan hêñ ampamaala. Ya nakaikno bayro, ay lowampo boy apat ya toa, ya nipagtungkulon, ya nakatakop hêñ naputsi haka nakakopyan korona, ya dyag ha ginto. <sup>5</sup> Bayro ha iknoan ha bonak ay main angkaubat ya magpikulita ya kimat haka hêñêg hêñ kilat ya manêlêgêdêg boy magpidili-kidik. Haka ha arapan hêñ habaytoy iknoan ay main pitoy pag-atâng ya man-alob. Habaytoy pag-atâng, ay yabay ya pitoy pahlêk hêñ kapangyarihan nan Espiritu ni Apo Namalyari. <sup>6</sup> Ha arapan êt hêñ habaytoy iknoan ay main nanad solamin ya kakwalan, kalinaw haka kakislap hêñ dagat ya dyag ha kristal.

Ha danin habaytoy iknoan, ay main nakapalibot ya apat ya angkabiyay, ya napnoan hêñ mata ha arapan haka ha bokotan. <sup>7</sup> Nanad hêñ leon ya una kanlan apat ya angkabiyay. Ya ikalwa ay nanad ha baka. Ya ikatlo ay main lupa ya nanad lupa hêñ tawo. Haka ya ikapat ay nanad hêñ bulilak o lawin ya ampangalilang. <sup>8</sup> Habaytoy apat ya angkabiyay, ay mani-anêm ya pakpak. Napno hilan mata hêñ angga êt ha lalêñ pakpak, haka allo yabi lan angkantaêñ ya êmêñ di,

“Apo Namalyari, hika ya banal, ya ayn hinon kasalanan, haka ya ayn kapantag ha kangêran,

mimiha mo ya Panginoon Diyos ya makapangyarihan, ya dapat puriêñ.

Hika ya atsi yana hêñ haton lagi, amêhêñ, haka magpa ayn angga.”

<sup>9</sup> Kaban ampuriêñ, anggalangêñ haka ampagpahalamatan lan habaytoy apat hi Apo Namalyari, ya main biyay hêñ ayn angga, ya ampamaala, <sup>10</sup> ay hatoy lowampo boy apat etaman ya nipagtungkulon, ay ampipandoko hêñ nakadêngdêng hêñ ampagsimba kana. An-idin lay korona la ha arapan na ta êmêñ ipamwang ya hiya ay makapangyarihan kanla. Êmêñ ya di ya angkantaêñ la:

<sup>11</sup> “Apo Namalyari, hika ya Panginoon naêñ haka Diyos naêñ.

Hika ya hêpat hêñ mananggap hêñ pamagpuri, haka pamanggalang gawan ha kapangyarihan mo,  
ta hika ya nanyag hêñ balang hino, ha kalabayan mo.”

## 5

*Impahalumata kan Juan ya pamananggap hēn Biseron Tupa ya hulat ya antalanēn ni Apo Namalyari*

<sup>1</sup> Kaban ampanlēk ako, ay main akon nahēlēk, ya antalanēn nan hatoy nakaikno ha pibonakan, ya papel, ya naka-tsili-tsili, ya main hulat ha lalē haka ha bokot. Habaytoy papel ay nakahara hēn pitoy patak hēn talo. <sup>2</sup> Haka main akon nahēlēk ya mihay makhaw ya anghel ni Apo Namalyari, ya nay-ikhaw hēn nangotang hēn êmēn di: “Hinoy main karapatan hēn mangalih hēn talo ya pinamihara ha naka-tsili-tsili, ta êmēn ya mabuhal?” <sup>3</sup> Noa, ayn miha man ha langit, o ha luta, o ha legal lan natsi, ya malyarin mamuhal o mamaha hēn habayto. <sup>4</sup> Kabay hadyay tangih ko gawan ayn ya main karapatan hēn mamuhal haka mamaha hēn habayto. <sup>5</sup> Noa, wana kangko hēn miha kanlan hatoy lowampo boy apat ya nipagtungkul, “Paan kan manangih! Hēlkēn mo ya ambaêgênen lan Leon. Hiya ya kaapo-apoan ni apo Juda haka ya kaapo-apoan ni Arin David. Hiyay nanambut kan Satanas, kabay main yan karapatan mangalih hēn habaytoy pitoy patak talo haka mamuhal hēn habaytoy kahulatan.”

<sup>6</sup> Pamakahabi nan habayto, ay main akon nahēlēk ya mihay Biseron Tupa, ya nakairêng hēn karani hēn hatoy nakaikno ya napalibutan lan hatoy apat ya angkabiyay, ya napnoan hēn mata, haka hilay lowampo boy apat ya nipagtungkul. Hatoy Biseron Tupa ay nagpiyat, ya kamwangan ya hiyay imparaya haka nangoman nabiyay. Main yan pitoy hongay haka pitoy mata. Hatoy pitoy mata na, ay yabay ya in-alimbawa ha kapangyarihan nan Espiritu ni Apo Namalyari, ya in-utoh na ha boon luta. <sup>7</sup> Napaidani ya kanan nakaikno ha pibonakan, ta ginawang nay hatoy naka-tsili-tsili ya kahulatan ya antalanēn nan habayto. <sup>8</sup> Pamakakwa nan habaytoy kahulatan ya naka-tsili-tsili, ay hatoy apat ya angkabiyay ya napnon mata, haka hilay hatoy lowampo boy apat ya nipagtungkul, ay nipandoko hēn nakadêngdêng hēn nagsimba ha arapan hēn hatoy Biseron Tupa. Ya balang miha kanla ay ampanalan hēn alpa, haka main hilan antalanēn ya silyaw ya dyag ha ginto ya pinno hēn pabango ya paraêp. Habaytoy pabango, ay yabay ya nanad ha panalangin lan pinili ni Apo Namalyari hēn mag-in kana. <sup>9</sup> Ingkanta la ya mihay bayon kanta, ya êmēn di:

“Hika ya main karapatan hēn mananggap hēn habain ya naka-tsili-tsili ya kahulatan,  
haka mangalih hēn talo ya pinamihara kanan habain,  
gawan in-átang ka, haka ya daya mo, ay pangakbus mo kanlan pinili ni Apo Namalyari hēn mag-in kana, paubat ha balang láhi, habi, haka bansa.

<sup>10</sup> Impahan mo hila ha pamanlokop mo ta êmēn hila makapamaala hēn kalamo mo ha luta. Dinyag mo hilan pari ta êmēn hila maghuyo kan Apo Namalyari ya Diyos tamo.”

<sup>11</sup> Kaban ampanlēk ako bayro ha nakaikno ha pibonakan haka kanlan apat ya angkabiyay ya napnoan mata, haka ha lowampo boy apat ya nipagtungkul, ay nagilam koy kanta hēn kal-atan anghel, ya a makwan mabilang ya nakapalibot bayro kanla. <sup>12</sup> Makhaw lan an-ikanta ya êmēn di: “Ya Biseron Tupa ya imparaya ay hépat hēn mananggap hēn pamagpuri, pahalamat haka galang, gawan ha kapangyarihan, pibandian, galing, haka hékaw na!”

<sup>13</sup> Bayo nagilam ko ya balang angkabiyay ya atsi ha langit, ha luta, ha legal lan natsi, haka ha dagat. Naubuh hilan ampipagkanta êt hēn êmēn di:

“Dapat pahalamatan, galangén, haka purién ya nakaikno ha pibonakan haka ya Biseron Tupa, hén magpa ayn angga gawan ha kapangyarihan la!”

<sup>14</sup> Hatoy apat etaman ya angkabiyay ya napnon mata ay naghabi, ya wanla, “Amen!\*\*” Haka hilay hatoy lowampo boy apat ya nipagtungkulay ay ampipandoko hén nakadéngdéng hén nagsimba ha arapan nan Biseron Tupa haka ha arapan nan nakaikno ha pibonakan.

## 6

### *Pamangalíh nan hatoy Biseron Tupa hén hatoy pitoy patak talo ya pinamihara ha naka-tsili-tsilya kahulatan*

<sup>1</sup> Kaban ampanlék ako, ay nahélék koy inalíh nan hatoy Biseron Tupa ya miha kanlan pitoy patak talo. Bayo nagilam koy habi hén miha kanlan apat ya angkabiyay ya napnoan mata, ya wanana nay-ikhaw, ya nanad ha magpidili-kidik ya kilat, “Ka di!” <sup>2</sup> Nahélék koy mihay kabayo ya naputsi. Ya nakahakay bayro, ay main yawo ya panlaban. Dinyanan yan korona ya panihuklot na, gawan ha panambut na ha kaatag ya kapatsi na, bayo nag-orong yay na êt hén manambut ha kaatag pon ya kapatsi na ha luta.

<sup>3</sup> Hén inalíh nay na hén Biseron Tupa ya hatoy ikalwan patak talo, ay nagilam kina êt ya hatoy ikalwa kanlan angkabiyay ya napnoan hén mata, ya wana, “Ka di!” <sup>4</sup> Namakon, ay main kina êt hén nahélék ya inumawah ya miha pon ya kabayo ya hadyay orit. Ya nakahakay bayro, ay dinyanan kapangyarihan hén hiyay pangubatan hén gulo hén kaganawan bansa ha luta ta êmén mipa-patsi hilay tawo. Dinyanan la yan hadyay héláy hundang.

<sup>5</sup> Hén inalíh nay na hén Biseron Tupa ya ikatlon patak talo, ay nagilam ko ya hinabi nan ikatlon angkabiyay ya napnoan mata, ya wana, “Ka di!” Bayo nahélék ko ya mihay kabayoy nauyang. Ya nakahakay bayro ay ampanalan hén timbangan. <sup>6</sup> Haka nagilam koy nanad habi ya angkaubat ha pibonakan lan hatoy apat ya angkabiyay ya napnoan mata, ya êmén di: “Mihay kilon bengat hén trigo ya mahaliw ha napakiupa hén namapayabi, haka êmbayro êt ya alagá ha tatloy kilon sebada.\* Noa, paan hiraén ya poon olibo, ya ubatan taba, haka ya wakay hén ubas ya ubatan alak.”

<sup>7</sup> Hén inalíh nay na hén Biseron Tupa ya hatoy ikapat ya patak talo, ay nagilam kina êt ya habi nan ikapat ya angkabiyay ya napnoan mata, ya wana, “Ka di, ta hélkén mo!” <sup>8</sup> Ya nahélék ko ay mihay kabayo ya napéthaw. Ya langan nan nakahakay bayro ay Kamatsan haka ya hinumonol kana ay Hades, ya logal lan kaélwa lan natsi. Dinyanan hilan tungkulay hén patsén ya ikapat hén kabooan lan tawo ha luta ha labanan, mamapitay ya lonoh, hakit, haka ha mangahiléb ya ayop ya mapangyat.

<sup>9</sup> Bayo inalíh nay na hén Biseron Tupa ya hatoy ikalima hén patak talo. Haka nahélék kina ha hilong hén paybul-ihan† hén paypaahukan hén pabango ha pamagsimba kan Apo Namalyari, ya kaélwa lan pinatsi gawan pamanhumonol la ha habi ni Apo Namalyari, haka ha pamaptég la kanan habayto. <sup>10</sup> An-ipapakaangaw lay pamakiingalo, ya wanla, “Panginoon, hika ya makapangyarihan, ya banal, haka ya pétég! Ay-êmén pon kabuyot ya pangénggan naén hén higantsiên mon parusaan hilay nangarawak ha boon luta ya namatsi kannaén?” <sup>11</sup> Bayo dinyanan ya balang miha hén takop ya nangaputsi, haka hinabi kanla ya magpainawa hila pon hén péradi, hén angga ha maboo ya kabilangan hén kapareho lan paté, ya ampaghuyo kan Apo Jesu-Cristo, ya maranin patsén êt hén nanad kanla.

\* 5:14 Ya labay habién, ay dapat malyari ya habayto. \* 6:6 Ya nanad trigo. † 6:9 Hélkén ha panlékán labay habién hén habi.

<sup>12</sup> Hêñ inalíh nan Biseron Tupa ya hatoy ikanêm ya patak talo, ay nanlayon hêñ hadyay hêkaw, haka ya allo ay inumuyang hêñ nanad ha takop ya an-ihulod lan kinamatsan. Haka ya buwan ay inumorit hêñ êmên kaorit hêñ daya. <sup>13</sup> Ya bêtewêñ ay nangatata ha luta hêñ nanad ha tagêy hêñ igos ya nailê pon ya angkakanêgnêg hêñ hadyay hêkaw angin. <sup>14</sup> Namakonkaynaman ay biglan nagtsili-tsил ya langit hêñ nanad ha amak<sup>‡</sup> haka napanat. Ya tawtgug haka pulo ay napanat ha andyanan la. <sup>15</sup> Naubuh hêñ nalimwan hilay atsi ha luta. Hilay ari haka hilay kaatag ya main tungkulon nanad kanlan poon hundaloh, ya mangabandi, hilay main kapangyarihan, hilay ipoh boy hilay alwan ipoh, ay naubuh hêñ nipagtogo ha lêyang, haka ha mangahlay ya bato ha tawtgug. <sup>16</sup> Haka nan-angaw hila kanlan tawtgug haka kanlan bato, “Ay, tagpênan yo kay, ta êmên a naêñ ana mahêlêk ya lupa nan nakaikno hêñ ampamaala, haka êmên a naêñ ana maranasan ya hadyay huluk nan Biseron Tupa! <sup>17</sup> Gawan nilumatêng ya maalagáy allon hadyay pamarusa la kannaêñ, ya a naêñ taganán matêêh!”

## 7

### *Kabilangan lan dinyanan tatak, ya naghuyo kan Apo Namalyari ay 144,000*

<sup>1</sup> Pamakayarin habayto, ay main akon nahêlêk ya apat ya anghel ni Apo Namalyari ya nakairêng ha apat ya duyo hêñ luta, ta ampênlanan la ya ampangubatan hêñ angin, ta êmên a magkaangin ha luta, ha dagat, o ha hinon kayo. <sup>2</sup> Hila ya dinyanan ni Apo Namalyari hêñ kapangyarihan hêñ hiraêñ ya luta anggan dagat. Haka main akon nahêlêk ya kaatag ya anghel ni Apo Namalyari ya an-umawah ha dapit awahan hêñ allo, ya ampantan hêñ panatak nan ampam-in biyay, ya hi Apo Namalyari. Bayo imbaëg na bayro ha apat ya kapareho nan anghel, ya wanana nay-ikhaw, <sup>3</sup> “Paan yo pon hiraêñ ya luta, dagat o hinon kayo, angga ha a naêñ pon matatakan ya dampal lan ampaghuyo kan Apo Namalyari ta êmên hila a mablyan.” <sup>4</sup> Hêñ nayari hilay na, ay nagilam ko ya bilang lan tinatakan, dinalan boy apatapo boy apat ya libo (144,000) ubat ha kaapo-apoan lan mapo boy loway anak ni apo Israel. <sup>5</sup> Ha kaapo-apoan ni Juda 12,000, ha kaapo-apoan ni Ruben 12,000, ha kaapo-apoan ni Gad 12,000, <sup>6</sup> ha kaapo-apoan ni Aser 12,000, ha kaapo-apoan ni Neftali 12,000, ha kaapo-apoan ni Manases 12,000, <sup>7</sup> ha kaapo-apoan ni Simeon 12,000, ha kaapo-apoan ni Levi 12,000, ha kaapo-apoan ni Isacar 12,000, <sup>8</sup> ha kaapo-apoan ni Zabulon 12,000, ha kaapo-apoan ni Jose 12,000, haka ha kaapo-apoan ni Benjamin 12,000.

### *Ya nipanambut, ya a makwan mabilang, ya ubat ha balang bansa*

<sup>9</sup> Pangayarin habayto, ay nahêlêk koy kakal-atan ya tawo ya a makwan mabilang hêñ hinoman! Ubat hila ha balang bansa, láhi haka habi. Nakairêng hila ha arapan hêñ hatoy nakaikno hêñ ampamaala ha pibonakan, haka ha arapan nan Biseron Tupa. Nakatakop hila hêñ naputsi haka ampanalan hilan bulong, ya palatandaan hêñ mahigla hila ha pamanambut la. <sup>10</sup> Haka impakakhaw lan hinabi, “Ya namiligtas kantamo ay hi Apo Namalyari ya nakaikno hêñ ampamaala, haka ya Biseron Tupa!” <sup>11</sup> Naubuh hêñ nakairêng ya anghel hêñ nakapalibot bayro ha nakaikno, haka hilay lowampo boy apat ya nipagtungkulon, haka hatoy apat ya angkabiyay ya napnoan mata, ay nandoko hêñ nakadêngdêng ha pamagsimba la kan Apo Namalyari, ya nakaikno, hêñ ampamaala ha pibonakan. <sup>12</sup> Wanla, “Amen! Pêtêg ya! Pahalamatan tamo hi Apo Namalyari, ya anhuyuêñ tamo! Puriêñ tamo ya

---

<sup>‡</sup> 6:14 dasay.

gawan ha kamwangan, tungkulan haka kapangyarihan na! Purién haka galangén yan magpa ayn angga! Amen!”

<sup>13</sup> Namakonkaynaman ay kinotang akon miha kanlan hatoy lowampo boy apat ya nipagtungkulan, “Muwang mo no hino hilay nakabaro hén naputsi, haka no ay idi ya ubatan la?” <sup>14</sup> Noa, wangko kana, “Apo, a ko muwang. Habién mo raw kangko.” Haka hinabi nay na kangko, “Hilay habaytsi ay nakatéêh ha panaon hén hadyay parusa. Nanad pinipi lay takop la ha daya nan Biseron Tupa ta ya pangamatsi na, ay namaputsi hén takop la. <sup>15</sup> Kabay atsi hila ha Templo, ha arapan nan nakaikno hén ampamaala, ya hi Apo Namalyari hén ampaghuyo kana hén allo yabi, haka hiyay panay lan kalamo haka ampangillag kanla. <sup>16</sup> A hilay na oman lonohén o maangan man, haka a hilay na etaman maiyaw hén allo o hinon naomot. <sup>17</sup> Gawan hatoy Biseron Tupa, ya atsi ha dani nan nakaikno ha pibonakan, ya manayhay kanla, boy hiyay nay mangilamo kanla ha laném sibol ya ampam-in biyay. Haka hi Apo Namalyari ya mamunah hén luwa ha mata la, haka a hilay nan manangih oman.”

## 8

### *Inalíh hén Biseron Tupa ya ikapiton patak talo*

<sup>1</sup> Hén alihén nan Biseron Tupa ya hatoy ikapiton patak talo ha naka-tsili-tsili ya kahulatan, ay nagkamain kapatékbékan ha langit hén manga kapitnan oras. <sup>2</sup> Pamakayarin habayto, ay nahélék ko ya pitoy anghel ya nakairéng ha arapan ni Apo Namalyari, ya dinyanan hén tambuyok ya balang miha.

<sup>3</sup> Main etaman nilumaténg ya miha pon ya banal ya anghel, ya main anggétan ya paypaahukan hén pabango, ya dyag ha ginto, ya niréng ha arapan hén paybul-ihan\* hén paypaahukan hén pabango ha pamagsimba kan Apo Namalyari. Dinyanan ya anghel hén mal-at ya pabango, ya iparaép na kan Apo Namalyari hén ipahan ha halangin lan pinili ni Apo Namalyari hén mag-in kana, bayro ha paybul-ihan hén paypaahukan hén pabango, ya dyag êt ha ginto ya atsi ha arapan ni Apo Namalyari. <sup>4</sup> Hatoy ahuk hén pabango ya angkaubat ha antalanén nan anghel, kalamo hén halangin lan pinili ni Apo Namalyari hén mag-in kana, ay ampakanawan milako kan Apo Namalyari. <sup>5</sup> Bayo nangwa ya anghel hén baya ha paybul-ihan hén paypaahukan pabango ha pamagsimba kan Apo Namalyari, ta pinno nay habaytoy paypaahukan hén pabango, ya antalanén na. Pangayari, ay intapon nay habayto ha luta. Namakonkaynaman ay nanélégédéh haka nagdili-kidik ya kilat, nangimat haka nagkalayon.

### *Pinahyépan lan anghelya pitoy tambuyok*

<sup>6</sup> Hilay pitoy anghel ay ampaglén ha pamahyép hén mamatonoy, hén tambuyok la.

<sup>7</sup> Hén pahyépan nan unan anghel ya tambuyok na, ay nanguran hén tagunlinaw, haka apoy ya main kalamo hén daya, ya nakaualam hén ikatlon katsiwih hén luta, kayo haka hinon tanaman bayro.

<sup>8</sup> Hén pinahyépan nan ikalwan anghel ya tambuyok na, ay main mihay nanad bapan hélay tawtgug ya angkaulam ya man-alob, ya intapon ha dagat.

<sup>9</sup> Ya ikatlon katsiwih hén dagat ay nag-in daya. Ya angkabiyay bayro ay nangamatsi, haka hilay bangka haka barko bayro, ay nangahira.

<sup>10</sup> Hén pahyépan hén ikatlon anghel ya tambuyok na, ay natata ya bapan hélay bêtewén hén naubat ha langit, ya êmén ha atáng ya man-alob, ya natata

\* **8:3** Hélkén ha panlêkan labay habién hén habi.

ha ikatlo hên kabooan hên ilog haka lanêm sibol.<sup>11</sup> Napait ya langan nan hatoy bêtêwêñ, ta ya ikatlon katsiwih hên lanêm ay kinumait. Mal-at ya natsi gawan nakainêm hilan habaytoy lanêm.

<sup>12</sup> Hêñ pahyêpan hêñ ikaapat hêñ anghel ya tambuyok na, ay nahugat ya ikatlon katsiwih hêñ allo, haka ya ikatlon katsiwih hêñ buwan, haka ya ikatlon katsiwih hêñ bêtêwên. Nangaalihan hêñag ya balang ikatlon katsiwih, kabay ya ikatlon katsiwih hêñ yabi haka allo, ay ayn hêñag.

<sup>13</sup> Hén nanlék kon oman, ay main akon nahélék ya lawin ya ampangalilang ha langit, haka nagilam koy angaw na, ya wana, “Kaingalon taganá ya atsi ha luta, ha hadyay maranasan lay kapapalimo uston pamatonoy lan humonoy tatloy anghel ha tambuyok la!”

9

<sup>1</sup> Hêñ pinahyêpan nan ikaliman anghel ya tambuyok na, ay nahêlêk ko ya mihay bêtêwên ya natatay na ha luta. Indin kana ya susi ta êmêñ na maloat ya kabat hêñ ayn anggay kalalêan lubot, ya pinayhukulan kanlan nangarawak ya a angkahêlêk. <sup>2</sup> Niload nay na ya kabat hêñ lubot ya ayn anggay kalalêan, haka inumawah ya hadyay ahuk, ya nanad naubat ha bapan hêlay ya pogun. Habaytoy ahuk ay nakatagpêñ ha allo, kabay dinumiglêm. <sup>3</sup> Nipan-umawah bayro ha ahuk ya doron, hêñ nipan-umugpa ha luta. Dinyanan hilan kapang-yarihan hêñ nanad ha pamangyat lan mahlay ya konipit. <sup>4</sup> Inutuhan hila ya paan lan hiraêñ ya kayo, lamon, o hinon tanaman, noa, ya pakahakitan lan bêngat ay hatoy tawoy ayn tatak ni Apo Namalyari ha dampal la. <sup>5</sup> Pinaulayan hilan mamairap ha boon limay buwan, noa, a hila pinaulayan hêñ mamatsi. Ya pamairap la ay nanad kahakit hêñ pangayat hêñ mahlay ya konipit ya manayêngtêng. <sup>6</sup> Habayton limay buwan hêñ hadyay pamairap, ay labay lay nan taganán matsi ya hilay ayn tatak ni Apo Namalyari ha dampal, noa, a taganán malyarin magbitkê.

<sup>7</sup> Hilay doron ay nanad ha kabayo ya in-il-an ha pamakilaban. Ya atsi ha ulo la ay nanad korona ya ginto. Ya lupa la ay nanad lupan tawo. <sup>8</sup> Ya habot la ay hadyay karang ya nanad ha habot hēn babayi haka ya gogot la ay nanad hēn gogot hēn leon. <sup>9</sup> Ha pagaw la ay main hilan halanggo ya dyag ha bakal haka ya tonoy hēn puwal la, no anlumpad hila, ay nanad hēn tonoy hēn kalan kalesa ya angguluyēn hēn kabayo ya ampamwayun makon makilaban. <sup>10</sup> Main hilan ikoy ya nanad ha ikoy hēn mahlay ya konipit ya main tsimēd. Ya tsimēd la, ay yabay ya kapangyarihan lan mamairap ha tawo ha boon limay buwan. <sup>11</sup> Main hilan poon ya ayn kaatag no alwan hatoy narawak ya anghel ya ampamaala bayro ha ayn anggay kalaléan lubot. Ya langan na ha habin Hebreo ay Abadon, haka ha habin Griego ay Apolion, ya labay habiēn Māpanira.

<sup>12</sup> Habayto ya unan kapapalimoy pamairap ya impahalumata kangko, noa, main pon lowa ya lumatêng, ya kapalimo êt bayro.

<sup>13</sup> Hêñ pinahyêpan nan ikaanêm hêñ anghel ya tambuyok na, ay main akon nagilam ya habi, ya angkaubat ha apat ya duyo hêñ gintoy paybul-ihan\* hêñ paypaahukan pabango, ya atsi ha arapan ni Apo Namalyari. <sup>14</sup> Wana kanan ikaanêm hêñ anghel ya namahyêp hêñ tambuyok na, “Okalêñ mo hilay hatoy apat ya anghel ya nakagapoh ha danin mahlay ya ilog, ya nag langan Eufrates.” <sup>15</sup> Kabay hilay apat ya anghel ay imbuhan, ta hilay in-il-an ni Apo Namalyari para ha habaytsi ya oras, hêñ habaytsi ya allo, hêñ habaytsi ya buwan, hêñ hata taon, hêñ mamatsi ha ikatlon kabooan hêñ tawo ha luta.

\* 9:13 Hêlkên ha panlêkan labay habiên hên habi.

<sup>16</sup> Ya inhabi kangko ya bilang lan hundaloh lan anghel ay 200,000,000 ya nakakabayo. <sup>17</sup> Ha halumata ko ay nahêlêk koy habaytoy kabayo haka hilay nakahakay bayro ya nipagkalahag ha pagaw ya main tatloy kulay: kakulay hêñ apoy, ka-uyang hêñ sapiro, haka kahêlyaw hêñ sulpud. Ya ulo hêñ kabayo la ay nanad ha ulon leon haka ampangiahbo hila hêñ apoy, ahuk, haka sulpud. <sup>18</sup> Habaytoy apoy, ahuk haka sulpud, ay yabay ya tatloy salot, ya pinamatsi la ha ikatlo hêñ kabooan hêñ tawo ha luta. <sup>19</sup> Ya kapangyarihan lan habaytoy kabayo ay atsi ha bêbêy la haka atsi ha ikoy la, ya nanad ha ulon utan ya anggamitên la hêñ mamahakit.

<sup>20</sup> Hilay hatoy a pinatsi ha salot, ay a la pon ampaghêhêan hêñ antalibatokan ya karawakan dyag la. Yan inhundo la pon êt ya pamagsimba la kanlan nangarawak ya a angkahêlêk, haka ha alwan pêtêg ya diyos, ya a kahêlêk, a kagilam haka a kabita, nanad ha rebulto ya dyag ha ginto, pilak, tangso, bato haka kayo. <sup>21</sup> A la êt pinaghêhêan hêñ tinalibatokan ya kaatag pon ya karawakan dyag la, nanad ha pamatsi la ha kapareho, pamandanga, pamabayi, pamakilalaki, haka pamanakaw.

## 10

### *Ya anghelya main nanaway papel ya main kahulatan ya naka-tsili-tsil*

<sup>1</sup> Pamakayarin habayto, ay main a êt hêñ impahalumata kangko ya miha pon ya makapangyarihan ya anghel ni Apo Namalyari. Antumaoy yan ubat ha langit hêñ nakakolob hêñ ginêm. Main yan buwangaw ha ugton ulo na, ya lupa na ay nanad allo, haka ya bitsih na, ay nanad ha tarêk ya man-alob. <sup>2</sup> Main yan antalanêñ ya nanaway, naka-tsili-tsil ya kahulatan, ya binuhal na. Ya panabtab hêñ bitsih na ay intuk-o na ha dagat, haka ya uki hêñ bitsih na ay intuk-o na ha luta. <sup>3</sup> Nan-angaw ya hêñ makhaw hêñ nanad ha paman-êngêl hêñ leon, bayo nangilat bayto hêñ katapito. <sup>4</sup> Hêñ pamakayarin hatoy kilat, ay ihulat ko dayi ya napoliah ko, noa, main akon nagilam ya habi ya ubat ha langit, ya wana, “Paan minan ihulat ya hinabi hêñ habaytoy pitoy kilat ta idin mo tana ha nakêm mo!”

<sup>5</sup> Hato etaman ya anghel ya nagtok-o ha dagat haka ha luta, ay intagay na ha langit ya panabtab hêñ gamêt na, <sup>6</sup> ta ha langan ni Apo Namalyari, ya ampam-in biyay hêñ ayn angga, ya nanyag hêñ langit, luta, dagat, haka kaganawan atsi bayro ay naghumpa ya, ya wana, “Taganán a yay na mangênggan hi Apo Namalyari! <sup>7</sup> No pahyêpan nan ikapiton anghel ya tambuyok na, ay tuparêñ nay na ya a nan impamwang ha kal-atan, ya impamwang nan bat kanlan mâmipamwang ya naghuyo kana.”

<sup>8</sup> Pamakayari, ay nagilam kina êt ya habaytoy habi ya ubat ha langit, ya wana, “Hali, kowêñ minay habaytoy papel ya nakabuhal ya antalanêñ nan anghel ya nakatok-o ha dagat haka ha luta.” <sup>9</sup> Kabay nilako kinan pinakikwaan kanan anghel ya hatoy papel ya nakabuhal. Wana kangko, “Kowêñ mina haka mon kaêñ. Napait ya habain ha bitoka, noa, kaban atsi ya ha bêbêy mo ay nanad yan ayang pulot panilan.” <sup>10</sup> Ginawang kina ta kinnan ko ya. Habayto ay nanad ha ayang pulot hêñ atsi ya ha bêbêy ko, noa, hêñ naiboon kina, ay nangayabaab ya bitoka ko.

<sup>11</sup> Haka main namiutoh kangko, “Ipapêt mon oman ya tungkol ha malyari kanlan ari haka hilay tawo ya ubat ha balang láhi, ha balang bansa, haka ha balang habi.”

## 11

### *Ya loway mamaptêg ya in-utoh ni Apo Namalyari*

<sup>1</sup> Pamakayarin habayto, ay dinyanan ako hēn panukat ya nanad ha tēkēn haka inutuhan ako hēn ēmēn di, “Mirēng ka ta hukatēn moy Templo ni Apo Namalyari haka ya paybul-ihan\* hēn paypaahukan hēn pabango ha pamagsimba kana, ya dyag ha ginto, ya atsi ha arapan na. Haka mo bilangēn ya atsi bayron ampipagsimba kana. <sup>2</sup> Noa, paan mon hukatēn ya plasa ya atsi ha dungla hēn ilwangan Templo, ta habaytoy indin kanlan a ampagpalokop kana, ta anggan Jerusalem, ya banal ya balayan na, ay hambutēn la ha apatapo boy loway buwan ya kabooan hēn 1,260 ya allo. <sup>3</sup> Ha kabooan hēn habaytoy 1,260 ya allo, ay mangiutoh hi Apo Namalyari hēn loway māmaptēg ya māmipamwang hēn ipaihip na kanla. Hila ay nakatakop hēn nahala, ya palatandaan hēn ampagluksa hila.”

<sup>4</sup> Hatoy loway mamaptēg, ay yabay ya hilay in-alimbawa hēn haton lagi, ha loway poon olibot† haka ya loway pamyanan solo‡ ya nakairēng ha arapan ni Apo Namalyari, ya Panginoon, ya main tungkulon hēn mamaala ha boon luta. <sup>5</sup> No main bat hēn manabla hēn mamakahakit kanla, ay ipapakaawah lay apoy ha bēbēy la, hēn pangulam ha kaganawan labay mamakahakit kanla. <sup>6</sup> Main hilan kapangyarihan hēn mamawal ha uran ha allon pamipamwang la hēn ipaihip ni Apo Namalyari kanla. Main hila etaman hēn kapangyarihan hēn daygēn lan daya ya lanēm, haka mamagtan hēn hinon salot ya pamairap ha luta ha kata-ungnon labay la.

<sup>7</sup> Pamakayari hēn pamaptēg la, ya pamipamwang hēn impaihip kanla, ay main umawah bayro ha ayn anggay kalalēan lubot ya mihay kapapalimoy nanad ayop lalē, ta makilaban ya kanlan lowa. Mahambut hila hēn angga ha mapatsi hila. <sup>8</sup> Ya bangkay la ay atsi tana ha dann ha Jerusalem, ya pinaypakoan êt kanan Panginoon la ha koros. Habaytoy balayan ay nibahwag ha karawakan dyag ya kaalimbawaan ha balayan Sodoma o bansan Egipto ya parehon ampibahwag ha karawakan dyag. <sup>9</sup> Ha boon tatloy allo haka kapitna, ay poliahēn ya bangkay la hēn hilay tawo ya ubat ha balang láhi, inapopo, habi, haka bansa. Ayn mabay hēn mamilbēng bangkay la. <sup>10</sup> Mipaghiglan taganá ya hilay ayn paniwala ha pangamatsi lan lowa. Ha kahiglaan la ay mididigalo hila ha miha ta miha, ta habaytoy loway mamaptēg ay hadyay namairap kanla. <sup>11</sup> Noa, pamakayarin tatlo haka kapitnan allo, ay biniyay hilan oman ni Apo Namalyari ya hatoy lowa. Hēn nirēng hila, ay hadyay limo lan nakahēlēk kanla. <sup>12</sup> Bayo nagilam lay makhaw ya habi ya ubat ha langit, ya wana, “Munik kaw bayri!” Hēn anhēlkēn hila hēn kapatsi la, ay anggētan hilay na hēn ginēm hēn palako ha langit. <sup>13</sup> Ha oras ya habayto ay nanlayon hēn hadyay hēkaw, ya ingkahira hēn ikamapo hēn habaytoy balayan. Piton libo ya tawo ya natsi hēn habaytoy layon, haka nalinwan hilay kaatag, haka la sinimba hi Apo Namalyari ya atsi ha langit.

<sup>14</sup> Habaytoy ikalwan kapapalimoy pamairap ya impahalumata kangko. Biglan lumatēng ya ikatlon kapapalimoy pamairap.

### *Ya pamahyēp nan ikapiton anghel hēn tambuyok na*

<sup>15</sup> Hēn pahyēpan nay nan ikapiton anghel ya tambuyok na, ay main makhaw ya habi ya naubat ha langit, ya wana, “Ya pamamaala bayri ha boon luta ay indin kan Apo Namalyari, ya Panginoon tamo, haka kanan Mesias, ya Cristo, ya impangakon Mámiligtas ya pinili nan mamaala. Ayn kaatag ya mamaala hēn ayn angga.” <sup>16</sup> Hatoy lowampo boy apat ya nipagtungkulon ya

\* **11:1** Hēlkēn ha panlēkan labay habiēn hēn habi. † **11:4** Zacarias 4:3-14. ‡ **11:4** kingki.

nakaikno ha pag-iknoan hēn mamaala ha dani ni Apo Namalyari ay nandoko hēn nakadēngdēng hēn nagsimba kana,<sup>17</sup> ya wanla,  
“Hikay ay ampam-in pahalamat kamo Panginoon Diyos, ya makapangyarihan ha kaganawan.

Hika ya Diyos hēn haton lagi, amēhēn, haka magpa ayn angga.  
Ya pamamaala mo hēn kapangyarihan mo, ya ayn kapantag, ay nag-umpisay na.

<sup>18</sup> Hilay a ampagpalokop kamo, ay hadyay tobag, noa, marani ya panaon hēn pamanatol mo kanlan natsi.  
Marani etaman ya panaon hēn dyanan mon primyo hilay māmipamwang ya naghuyo kamo,

haka hilay pinili mo hēn mag-in kamo, ya ampam-in galang kamo,  
ya hilay main tungkulon haka hilay ayn tungkulon.

Marani etaman ya panaon hēn parusaan mo hilay ampanira ha boon luta.”

<sup>19</sup> Pangayarin habayto, ay naloat ya kabat hēn Templo ni Apo Namalyari ha langit, haka nahēlēk ko bayro ya Baol hēn Kahundoan, ya pinamihinēpan hēn tsipan ni Apo Namalyari. Bayo nangimat haka nanēlēgēdēg haka nagdili-kidik ya kilat, haka nanlayon haka nanguran hēn tagunlinaw.

## 12

### *Impahalumata kan Juan ya mihay babayi haka ya nanad ha mihay hadyay hēlay dapo*

<sup>1</sup> Impahalumatay na êt kangko ya mihay kapapaêpapah ya palatandaan, ya nilumtaw ha pibonakan hēn angkahēlēk ha langit. Main bayro hēn mihay babayi, ya takop na ay kapahilēw ya nanad allo. Ya buwan ay atsi ha aypan bitsih na, haka ya ulo na ay nagkorona hēn labinloway bêtêwēn. <sup>2</sup> Hiya ay maranin manganak, kabay ampiangaw-angaw ya, ha hadyay ilab ya angkatananam na.

<sup>3</sup> Main êt mihay nilumtaw bayro ya kapapaêpapah ya palatandaan. Main bayron mihay nanad bapan hēlay dapo ya hadyay orit. Main yan pitoy ulo, ya nipag nanaway korona, haka main ya êt hēn mapo ya hongay. <sup>4</sup> Ya ikatlo hēn kabooan hēn bêtêwēn ya angkahēlēk ha langit ay kinaêhkêh nan ikoy na hēn intata ha luta. Bayo nirêng ya ha arapan nan hatoy babayi ya maranin manganak ta uston miawah ya hatoy anak, ay imokok na dayi. <sup>5</sup> Lalaki ya naiyanak nan hatoy babayi. Hēn mianak nay na, ay main biglan nangwa kanan hatoy anak ta gintan kan Apo Namalyari ya ampamaala. Habaytoy anak ya lalaki ay pinili ni Apo Namalyari, ta êmén ya mamaala lano ha balang bansa, hēn hambutêna hilay anhumalanghang kana. <sup>6</sup> Hatoy babayi etaman, ay nuwayun nako ha kaatag ya legal ya in-il-an kana ni Apo Namalyari. Hinayhay ya bayro ha boon 1,260 ya allo.

<sup>7</sup> Pamakayarin habayto, ay nagkamain gulo ha langit, ta hi Miguel ya miha kanlan pinakapoon lan anghel ni Apo Namalyari haka hilay kapareho nan anghel, ay nilumaban kanan hatoy nanad hadyay hēlay dapo haka hilay nangarawak ya anghel ya kalamo na. <sup>8</sup> Nahambut lan Miguel ya nanad dapo haka hilay kalamo na, kabay hatoy nanad dapo, haka ya kalamo na, ay ayn nanan karapatan hēn makapaidi bayro ha langit. <sup>9</sup> Hilay innabo lan Miguel ha luta. Hatoy nanad dapo ay ayn kaatag no alwan habaytoy toan utan, ya nag langan Diyablo, o Satanas, ya ampanloko ha kaganawan tawo ha boon luta.

<sup>10</sup> Haka nagilam koy mihay makhaw ya habi ya ubat ha langit, ya wana, “Habaytsi ya panaon hēn pamilitgas ni Apo Namalyari. Impahlēk nay na ya kapangyarihan nan mamaala. Impahlēk na etaman ya tungkulon hēn

mamaala nan Mesias, ya Cristo, ya impangakon Mámiligtas, ya pinili na hén mamaala. Ta innabo hi Satanas, ya allo-yabin ampamiarap kan Apo Namalyari hén an-ibara na kanlan patêl tamo ha Panginoon. <sup>11</sup> Hinambut hi Satanas gawan ha daya nan hatoy Biseron Tupa, haka gawan ha panoro lan patêl tamo hén tungkol kan Apo Jesu-Cristo, hén patsén hila man. <sup>12</sup> Kabay maghigla kaw ya atsi ha langit, noa, taganán kaingalo kaw ya atsi ha luta haka ha dagat, ta hadyay nay huluk ni Satanas ya ibunton na kamoyu, gawan muwang nay na ya ahina mabuyot ya panaon na.”

<sup>13</sup> Hén namwangan nan nanad hadyay hélai ya dapo ya hiyay innabo ha luta, ay kinolimêt nay na ya habaytoy babayi ya namiyanak hén hatoy lalaki. <sup>14</sup> Noa, ya hatoy babayi ay dinyanan yan loway mahlay ya pakpak hén hadyay hélai lawin, ta êmén ya nakalpad hén nagtaglo bayro ha legal ya in-il-an kana, ta bayro yay na pon hén hayhayén ha tatloy taon boy kapitna, ta êmén ya miligtas ha pamangolimêt hén hatoy nanad hadyay hélai dapo, ya utan, ya nag langan Satanas. <sup>15</sup> Kabay ya dinyag nan hatoy utan, ay namiilwa yan laném ya nanad kahlay ilog ya palako kanan hatoy babayi hén mangianol kana dayi. <sup>16</sup> Noa, hinawpan yan hatoy babayi hén biglan nilumtak ya luta hén hinaléphêp ya hatoy laném. <sup>17</sup> Kabay ha hadyay tulaw nan utan do ha babayi, ay nilako nay nan nilabanan ya kaatag hén anak nan babayi. Yabay ya hilay ampanhumonol ha Kautuhan ni Apo Namalyari, haka ampamaptèg ha intoro ni Panginoon Jesus. <sup>18</sup> Bayo nirêng ya ha laylay hén dagat.

## 13

### *Impahalumata kan Juan ya loway kapapalimoy nanad ayop lalê*

<sup>1</sup> Pamakayari ay nahélék kina êt ya mihay kapapalimoy nanad ayop lalê ya an-umawah ha dagat. Main yan mapoy hongay, haka pitoy ulo. Hatoy mapoy hongay ay nipagkorona. Balang ulo na ay main hulat. Ya nakahulat do ha pitoy ulo ay langan ya pamusmus kan Apo Namalyari. <sup>2</sup> Habaytoy kapapalimoy nanad ayop lalê ya nahélék ko ay main kokó ya kapapalimo. Ya bêbêy na ay nanad hén bêbêy leon. Habayto etaman ya nanad hadyay hélai dapo, ay dinyag na yan kalamo na ha kapangyarihan haka tungkulnan mamaala. <sup>3</sup> Ya miha kanlan pitoy ulo nan hatoy kapalimoy nanad ayop lalê, ay nahugatan hén angga ha ingkamatsi na. Noa, nabiyay yan oman, haka nabawo ya hugat na. Naubuh hén nipag-êpapah hila ha boon luta, haka hinumonol hila kanan hatoy kapapalimoy nanad ayop lalê. <sup>4</sup> Sinimba lay hatoy nanad hadyay hélai dapo gawan dinyag na yan mag-in kalamo na ha tungkulnan mamaala hén hatoy kapapalimoy nanad ayop lalê. Sinimba lay na êt ya habaytoy kapapalimoy nanad ayop lalê, ya wanla, “Ayn yan kapantag ya hata kapapalimoy nanad ayop lalê haka ayn makalaban kana!”

<sup>5</sup> Habaytoy kapapalimoy nanad ayop lalê ay ampaglamburg yay na, haka ampaghabi yan pamanira kan Apo Namalyari, noa, ampaulayan ya pon hén mamaala ha apatapo boy loway (42) buwan. <sup>6</sup> Panay pamanira ya panhabién na kan Apo Namalyari haka kanlan kaatag ya ampaidi bayro ha langit. <sup>7</sup> Noa, ampaulayan ya pon êt hén manggulo kanlan pinili ni Apo Namalyari hén mag-in kana, angga ha hambutén na hila hén habayto. Haka dinyanan ya pon êt hén tungkulnan hén mamaala bayri ha kaganawan láhi, habi, haka bansa. <sup>8</sup> Hilay kaatag ya atsi bayri ha luta ay magsimba kana, noa, hilay main langan ha libron biyay, ya nag langan lan main biyay ya ayn angga, ay a magsimba kana. Bayo dinyag ya luta, ay naihulat nay na ni Apo Namalyari ya langan lan main biyay hén kalamo na ha langit, bayro ha libro nan Biseron Tupa ya in-átang.

<sup>9</sup> “Hikaw ya ampanggilam, ay pakaihipêñ yoy habaytsi: <sup>10</sup> Hilay tinalagá ya dakpêñ hila, ay taganán dakpêñ hila. Hilay tinalagá ya patsêñ hila hêñ êetak, ay taganán patsêñ hila ha êetak. Kabay hilay pinili ni Apo Namalyari hêñ mag-in kana, ay dapat magtêéh hêñ kairapan haka magpakataniêh ha paniwala.”

<sup>11</sup> Pamakayari, ay nahêlêk kina êt ya mihay kapapalimo ya nanad ayop lalê ya inumawah ha luta. Main yan loway hongay ya nanad hêñ hongay hêñ biseron tupa, noa, ya pamaghabi na ay nanad pamaghabi hêñ habaytoy nanad hadyay hêlay dapo. <sup>12</sup> In-ubuh nan ginamit ya kapangyarihan nan unan kapapalimoy nanad ayop lalê ya nahugatan hêñ angga ha natsi, ta êmêñ hila ha luta ay magsimba do ha unan kapapalimoy ayop ya nabawo ya hugat. <sup>13</sup> Nanyag ya êt hêñ kapapaêpapah. Namaaypa yan apoy hêñ naubat ha langit ha arapan lan kal-atan ya atsi ha luta. <sup>14</sup> Gawan ha kapapaêpapah ya dinyag nan hatoy ikalwan kapapalimoy nanad ayop lalê ha kapangyarihan nan hatoy unan kapapalimoy nanad ayop lalê, ay naloko na hilay tawo ha luta. Kabay naamuyot na hilan pinadyag hêñ rebulto nan hatoy unan kapapalimoy nanad ayop lalê ya nahugatan hêñ hundang haka natsi, noa, nabiyyay oman. <sup>15</sup> Hatoy ikalwan kapapalimoy nanad ayop lalê etaman, ay dinyanan nan kapangyarihan hêñ mam-in biyay kanan hatoy rebulto, kabay nakapaghabi ya rebulto, haka an-ipapatsi na hilay a mabay magsimba kana. <sup>16</sup> Ampilitêñ nan habaytoy ikalwan kapapalimoy nanad ayop lalê hêñ tatakan ya kaganawan hêñ bilang nan unan kapapalimoy nanad ayop lalê ha panabtab gamêt o ha dampal, main hilan tungkul man o ayn, mabandi man o mairap, ipoh man o alwa. <sup>17</sup> Hilay hatoy ayn tatak hêñ bilang nan langan hêñ habaytoy unan kapapalimoy nanad ayop lalê, ay a malyarin manaliw o makapihaliw.

<sup>18</sup> Dapat magpakagaling ya balang miha, ta hilay main pamangintindi ay mamwangan lay na bayto ya labay habiêñ hêñ bilang anêm ya gatoh boy anêmapo boy anêm (666), ta habaytoy bilang nan unan kapapalimoy nanad ayop lalê, haka bilang ya êt hêñ mihay lalaki.

## 14

### *Ya Biseron Tupa haka hilay hatoy 144,000 ya katawo ya inligtas na*

<sup>1</sup> Hêñ nanlêk kinan oman ha halumata ko, ay nahêlêk ko ha marayo-dayo ya Biseron Tupa ya nakairêng ha Tawgtug Sion haka atsi hila êt bayro hêñ kalamo nay dinalan boy apatapo boy apat ya libo (144,000) ya katawo ya inligtas na. Nakahulat ha dampal la ya langan nan Biseron Tupa haka langan ni Apo Namalyari, ya Tatang na. <sup>2</sup> Haka nagilam koy mihay habi ya angkaubat ha langit ya nanad ha lanêñ ya man-awk, nanad êt ha kilat ya magdili-kidik, haka nanad êt ha tonoy hêñ alpa ya antsig-tsigêñ la. <sup>3</sup> Hilay dinalan boy apatapo boy apat ya libo (144,000) ya katawo ay nakaarap kanan hatoy nakaikno, hêñ ampamaala, haka kanlan hatoy apat ya angkabiyyay, ya napnoan hêñ mata, anggan kanlan hatoy lowampo boy apat ya nipagtungkul. Ampipagkanta hila hêñ bayon kanta. Hilan bat ya habaytoy 144,000 ya inakbus ha karawakan dyag ya makaluta, ya makapagkantan habaytoy kanta. <sup>4</sup> Hilay habaytoy lalaki ay a naamuyot hêñ magsimba ha alwan pêtêg ya diyos, ya nanad ha a hila nakitakêh ha alwa lan ahawa. Anhumonol hila kanan Biseron Tupa, ay idi man ya lakwêñ na. Hila ya kauna-unaan hêñ inahig, hêñ inakbus ha kaganawan tawo. Hila ya nag-in digalo kan Apo Namalyari haka kanan Biseron Tupa, ya nanad ha kauna-unaan nagapah, ya an-idin kan Apo Namalyari hêñ pahalamat ha nagapah. <sup>5</sup> A hila naghabin kalaraman, gawan ayn hilan kapintasan.

*Ya pamwang lan tatloy anghel ni Apo Namalyari*

<sup>6</sup> Bayo nahêlêk koy miha pon ya anghel ya anlumpad ya ampantan hên mangangêd ya habi ya a mangoman hên magpa ayn angga. Impamwang nay habayto ha kaganawan bansa, láhi, haka ha kaganawan habi ha boon luta. <sup>7</sup> In-ikhaw nay pamaghabi na, ya wana, “Dapat magkamain kaw hên pamanggalang haka pamagsimba kan Apo Namalyari, ta nilumatêng ya panaon hên pamanukom na. Awbay, dapat yon puriêñ ya nanyag hên langit, luta, dagat, haka lanêm sibol!”

<sup>8</sup> Bayo nahêlêk koy miha pon ya anghel, ya ikalwa, ya ampamiangaw hên êmén di, “Taganán ulamên ya balayan Babilonia, ya bantog, gawan hiyay nangamlug kanlan tawo ha balang bansa hên magsimba ha alwan pêtêg ya diyos, kabay ulamên na ni Apo Namalyari hên ayn ingaloy pamarusa.”

<sup>9</sup> Haka ampamiangaw hên ikatatlon anghel, ya wana, “Hilay hatoy ampagsimba kanan habaytoy unan kapapalimoy nanad ayop lalê, haka ha rebulto na, ya hilay tinatakan ha dampal o ha gamêt, <sup>10</sup> ay maranasan lay nay ayn ingaloy pamarusa ni Apo Namalyari kanla. Parusaan hila ha apoy haka sulpud ha arapan lan anghel ni Apo Namalyari, haka hatoy Biseron Tupa. <sup>11</sup> Ya ahuk ya ubat ha apoy ya ampamairap karla ay a maanggaan. Allo yabi hên magpa ayn angga ya pamag-irap hên hilay nipagtatak hên langan hên hatoy unan kapapalimoy nanad ayop lalê, ya ampagsimba kana haka ha rebulto na.”

<sup>12</sup> Kabay hikaw ya pinili ni Apo Namalyari hên mag-in kana, ya anhumonol ha an-iutoh na, haka ampaniwala kan Panginoon Jesus, ay pagtêéhan yoy kairapan haka pakataniêhêñ yoy paniwala yo.

<sup>13</sup> Pamakayari ay nagilam koy mihay habi ya ubat ha langit, ya wana, “Ihulat moy habaytsi: Iningalwan hilay matsi paubat amêhêñ, ya main pakikimiha kan Panginoon Jesus.”

“Awbay!” wanen Espiritu ni Apo Namalyari. “Makapagpainawa hilay na ta tumbahan hila ha kangêran ya dinyag kanla.”

*Ha panaon hên pamanggapah ni Apo Namalyari*

<sup>14</sup> Hêñ mangoman akon nanlêk ha halumata ko, ay main akon nahêlêk ya ginêm ya bapan putsi, haka ya nakaikno bayro ya nanad tawo, ya nakakorongan ginto, ya ampanalan êt hên gagapah ya hadyay tarêm.

<sup>15</sup> Haka main kaatag ya anghel ya inumawah ha Templo ya namikhaw hên naghabi kanan hatoy nakaikno ha ginêm, “Gamitêñ minay gagapah mo gawan panaon hên pamanggapah hên tsiponêñ hilay tawo ha luta.” <sup>16</sup> Kabay ginamit nay nan hatoy nakaikno ha ginêm ya gagapah na ha panipon ha malyarin gapahêñ ha luta.

<sup>17</sup> Pamakayari, ay main inumawah ha Templo ha langit ya miha pon ya anghel ya nakatalan hên gagapah ya hadyay tarêm.

<sup>18</sup> Inumawah êt ya mihay anghel ya ubat ha paybul-ihan\* hên pay-paahukan hên pabango, ya ampamaala ha apoy, haka na in-ikhaw ya baêg na do ha kalamo na ya ampanalan gagapah ya hadyay tarêm, ya wana, “Gamitêñ minay gagapah mo hên pamutsin kumpol ubas ha luta ta nawtoy na.” <sup>19</sup> Kabay ginamit nay nan hatoy anghel ya gagapah na hên pinamutsi hên ubas ha boon luta haka na inhamwag ha pay-unaban. Ya in-alimbawa di, ay êmbayroy iparanas ni Apo Namalyari ya hadyay pamarusa na ha kaganawan nanalanghang kana bayri ha luta. <sup>20</sup> Hatoy pay-unaban ay atsi ha ilwahan hên balayan, haka ya habaw hên ubas etaman ya ampihipwak, ay alwan kaatag no alwan ya daya ya in-alimbawa ha habaw hên habaytoy

\* **14:18** Hêlkêñ ha panlêkan labay habiêñ hên habi.

ubas, ya ampanlanab hên ampidaoh hên mamêrad tanan mag tatlon gatoh ya kilometro haka mamêrad tanan mihay metros<sup>†</sup> haka kapitna ya kalaléan.

## 15

### *Ya Pitoy anghel ni Apo Namalyari ya ampantan hên pitoy katatawlian salot ya pamairap*

<sup>1</sup> Pamakayari, ay main kina êt hên nahêlêk ha langit ya kapapaêpapah ya palatandaan. Main bayro hên pitoy anghel ya ampantan hên pitoy katatawlian salot ya pamairap. Habayto ay katatawlian salot ni Apo Namalyari ya ilatêng na ha luta.

<sup>2</sup> Haka nahêlêk koy nanad solamin ya kakwalan dagat, ya main man-alob, ya dêkêt. Nahêlêk ko hila êt ya nipaambut ha unan kapapalimoy nanad ayop lalê, gawan a la ya sinimba, haka a la sinimba ya rebulto na, haka a hila nagpatatak hên bilang hên langan na. Nakairêng hila ha dani hên hatoy nanad solamin ya kakwalan dagat haka nakatalan hilan alpa ya indin kanla ni Apo Namalyari. <sup>3</sup> Ingkanta la, ya kinanta ni apo Moises ya naghuyo kan Apo Namalyari hên hato, ya kanta etaman hên Biseron Tupa, ya wanla, “Apo Namalyari, hika ya Panginoon, ya makapangyarihan ha kaganawan, kapapaêpapah ya andaygên mo ya ayn kapantag.

Hika ya Ari ya ampamaala ha kaganawan bansa.

Pêtêg, haka makatoynungan ya andaygên mo.

<sup>4</sup> Panginoon, balang miha ay magkamain pamanggalang kamo, haka magsimba kamo,

gawan hikan bêngat ya banal, ya ayn hinon kasalanan!

Kabay hilay atsi ha balang bansa ay dapat dumani kamo,

hên magsimba kamo,

ta nahêlêk lay na ya hêpat, haka makatoynungan ya balang andaygên mo.”

<sup>5</sup> Hên nayari kon nahêlêk ya habayto, ay nakit ko ya naloat ya ilwangan hên Templo ha langit. Napoliah ko Ya Toldan Tsipan ni Apo Namalyari, ya pagsimbaan kana.\* <sup>6</sup> Inumawah ha Templo ya hatoy pitoy anghel ya main kapangyarihan ha pitoy salot ya pamairap kanlan anhumalanghang kan Apo Namalyari. Nakatakop hilan naputsi ya kapahilêw, haka main hilan takop ya kulay ginto ya nakakâbat ha pagaw la. <sup>7</sup> Ya miha kanlan habaytoy apat ya angkabiay, ya napnoan hên mata, ay nam-i kanlan pitoy anghel hên pitoy silyaw ya dyag ha ginto, ya napno hên pamarusa ya ubat kan Apo Namalyari ya angkabiay hên ayn angga. <sup>8</sup> Hatoy Templo ay napno hên ahuk ya palatandaan hên kapapaêpapah ya kapangyarihan ni Apo Namalyari. Ayn makahowêñ bayro ha Templo, angga ha a nayari ya habaytoy pitoy salot ya gintan lan hatoy pitoy anghel.

## 16

### *Ya pamarusa ya ubat kan Apo Namalyari ya atsi ha pitoy silyaw*

<sup>1</sup> Bayo main akon nagilam ya hadyay hêkaw habi ya ubat ha Templo, ya ampamiutoh kanlan pitoy anghel ni Apo Namalyari, ya wana, “Hali ibullog yoy na ha luta ya hatoy pamarusa ya ubat kan Apo Namalyari ya atsi ha pitoy silyaw.”

<sup>2</sup> Amêhêñ, hatoy unan anghel ay nakoy nan namibullog ha luta hên hatoy atsi ha unan silyaw. Namakonkaynaman ay nagkamain kuyapêh

---

† 14:20 hukat. \* 15:5 Ya pinamidyanan hên Mapoy Kautuhan ya indin ni Apo Namalyari kan apo Moises.

ya manguwêk-uwêk ya ilab ha lawini lan hatoy nipagtatak hên hatoy unan kapapalimoy nanad ayop lalê, ya hilay ampagsimba ha rebulto na.

<sup>3</sup> Pamakayarin habayto, ay imbullog hên ikalwan anghel ya laman hên hatoy antalanêن nay silyaw ha dagat. Bayo nag-in nanad daya hên tawoy natsi, ya habaytoy dagat, kabay kaganawan ya main biyay ha dagat ay natsi.

<sup>4</sup> Pamakayarin habayto, ay imbullog hên ikatatlon anghel ya laman hên antalanêن nay silyaw, ha kaganawan ilog haka sibol, kabay nag-in daya ya lanêm. <sup>5</sup> Bayo nagilam koy hinabi nan hatoy anghel ya ampamaala ha kaganawan lanêm, ya wana,

“Apo Namalyari, hika ya makatoynungan haka banal, ya atsi yana hên haton lagi, angga amêhêن!

Hêpat ya pamarusa mo kanla,

<sup>6</sup> gawan pinatsi lay mampipamwang mo haka hilay kaatag pon ya pinili mo hên mag-in kamo,

kabay hêpat kanla ya dinyanan mo hilan daya ya ininêm la!”

<sup>7</sup> Main akon nagilam etaman ya habi ya ampangubat ha paybul-ihan\* hên paypaahukan hên pabango ha pamagsimba kan Apo Namalyari, ya wana, “Awbay, Apo Namalyari, hika ya Panginoon, ya makapangyarihan ha kaganawan! Taganán pêtêg ya hinabi nan habaytoy anghel gawan makatoynungan haka hêpat ya pamarusa mo kanla.”

<sup>8</sup> Bayo namibullog ya habaytoy ikaapat hên anghel, hên laman hên hatoy antalanêن nay silyaw bayro, ha allo, ta êmén lalo inumomot ya habayto, hên pinangiyaw ha balang miha. <sup>9</sup> Nangaiiyaw hila, noa, kanan simbaên la hi Apo Namalyari, ya ampamaala bayro ha salot ya pamairap kanla, ay minusmus la ya pon êt, haka a la pinaghêhêan hên tinalibatokan ya kasalanan la.

<sup>10</sup> Haka na etaman imbullog hên ikaliman anghel ya laman hên antalanêن nay silyaw ha angkalokopan hên hatoy unan kapapalimo ya nanad ayop lalê. Kabay dinumiglêm ya boon angkalokopan nan habayto. Ampang-ngêngêt hilay tawo gawan ha hadyay ilab ya angkatanam la. <sup>11</sup> Noa, a la pon êt pinaghêhêan ya andaygên lay kasalanan, yan minusmus la ya pon êt hi Apo Namalyari ya atsi ha langit, gawan ilab hên pangaiyaw haka kuyapêh la, haka kaatag pon hên hakit ha balat, ya angkaranasan la.

<sup>12</sup> Bayo namibullog ya hatoy ikaanêm hên anghel, hên laman hên hatoy antalnêن nay silyaw, do ha mahlay ya ilog Efrates, kabay ya lanêm bayro ay kinumlang, ta êmén main hilan danan ya ampamaala, kalamo lay hundaloh la, ya maubat ha dahon awahan allo. <sup>13</sup> Pamakayari ay nahêlêk koy tatloy nangarawak ya espiritu ya nanad togak. Ya miha ay inumawah ha bêbêy hên habaytoy hadyay hêlay nanad dapo, ya ikalwa ay inumawah ha bêbêy hên hatoy unan kapapalimoy nanad ayop lalê, haka ya ikatatlo ay inumawah ha bêbêy nan ikalwan kapapalimoy nanad ayop lalê, ya propeta ya malaram.

<sup>14</sup> Habaytoy nangarawak ya espiritu ya ubat kan Satanas, ay bat hên ampi-pangyag kapapaêpapah ha arapan lan ampamaala ha boon luta, ta êmén la hila tsiponêن hên lumaban ha gulo ya intakda ha maalagáy allo ni Apo Namalyari ya makapangyarihan ha kaganawan.

<sup>15</sup> Wani Panginoon Jesu-Cristo, “Manggilam kaw na, ta bigla kon mako bahêن hên êmén ha biglan pamanlumatêng hên manakaw. Iningalwan hilay malatngan ya panay hên nakal-an, hên nakatakop, ta a hila mipakarêng-êy hên ibita-bitâ hên nakalaboh ha arapan hên kal-atan.”

\* <sup>16:7</sup> Hêlkêن ha panlêkan labay habiên hên habi.

**16** Amêhén, ay naka-tsipon hilay ampamaala ya nilako lan hatoy nan-garawak ya espiritu ha legal ya ambaégén Armagedon ha habi lan Hebreo.

**17** Pamakayarin habayto, imbullog hén ikapiton anghel ya laman hén hatoy antalnén nay silyaw ha angin, haka wanay na ni Apo Namalyari hén namikhaw hén naghabi ya naubat ha Templo, “Nayari yana.”

**18** Namakonkaynaman ay hadyay nay kimat haka manélégédéh haka magdili-kidik ya kilat. Nanlayon êt hén hadyay hékaw. Babayon nanlayon hén êmbayroy kakakhawan, ta paubat hén dinyag ya tawo ay ayn êmbayro.

**19** Ya kahlayan balayan Babilonia ay nag-in tatloy atag hén napihiyay, haka ya balayan ha balang bansa ay nigéyma. A na niliwaan hén pinarusaan hén ayn ingalo ni Apo Namalyari ya balayan Babilonia gawan ha hadyay huluk na bayro ha kal-atan kasalanan na. **20** Hilay pulo ha dagat haka hilay tawtgug ay bat nangaplak. **21** Bayo nanguran hén pangahlayan tagunlinaw ya ampagtimbang hén pérad tanan mag limampoy kilo ya balang miha. Nangadug-anan hilay atsi ha luta, kabay minusmus la hi Apo Namalyari ha hadyay pamarusa na kanla ha kapalimoy tagunlinaw ya nilumaténg kanla.

## 17

### *An-ialimbawa ha hostis ya balayan Babilonia*

**1** Pamakayari, ay nilako na ko hén miha kanlan habaytoy pitoy anghel ya ampanalan hén pitoy silyaw ya dyag ha ginto, ta wana kangko, “Galing mo di, ta ipahlék ko kamo, no ay-émén amparusaan ya hatoy balayan, ya an-ialimbawa ha hostis, ya atsi ha danin mal-at ya lanêm. **2** Hilay kaganawan tawo bayri ha luta anggan hilay ampamaala bayri, ay naamuyot na hén magsimba ha alwan pêtég ya dijos, hén nanad hilan nanakéh kana.”

**3** Ha kapangyarihan hén Espiritu ni Apo Namalyari, ay gintan na kon hatoy anghel ha kabalah-balahan, haka na impahlék kangko ya hatoy hostis ya nakahakay ha naorit ya kapapalimoy nanad ayop lalê, ya main pitoy ulo haka mapoy hongay. Napno yan hulat, ya langan, ya panay pamusmus kan Apo Namalyari. **4** Kakulay moradoy ubi\* haka naorit ya pinagtakop nan habaytoy hostis. Nakauno haka naka-tsingga yan ginto haka kaatag pon ya mangaálagá ya hino-hino kay na hén. Ampanalan yan baso ya dyag ha ginto, ya napno hén hadyay kapapadiri, ya karawakan dyag na, nanad ha pangaa-muyot nan kaatag hén magsimba ha kaatag kan Apo Namalyari. **5** Nakahulat ha dampal na ya mihay langan ya malaléy labay habiên, ya wana, “Balayan Babilonia ya pinakaindo lan mapanyag karawakan kalabayan lawini, haka ya hino-hino kay na hén ya karawakan ha boon luta.” **6** Bayo nahélék ko yan nalahing ha daya lan pinili ni Apo Namalyari hén mag-in kana, ya pinatsi gawan ha paniwala la kan Panginoon Jesus.

Hadyay êpapah ko hén nahélék ko ya. **7** Noa, wanana anghel kangko, “Awta ampag-êpapah ka? Ipamulah ko kamo no hino ya labay nan habiên, anggan hatoy anhakyan na ya unan kapapalimoy nanad ayop lalê ya pitoy ulo haka mapoy hongay. **8** Hatoy kapapalimo ya nanad ayop lalê, ya una mon nahélék, ya atsi pon hén hato ya pinatsi, ay maranin umawah hén maubat ha ayn anggay kalaléan lubot ya pinayhukulan kana, bayo yay na bayto ipalako ha kaparusaan ya ayn angga. Mipag-êpapah kana ya balang miha ya atsi bayri ha boon luta ya a nakahulat ya langan ha libron biyay,† ya atsi yana hén paubat hén dinyag ya luta. Mipag-êpapah hila kana gawan nabiyyay yan oman.”

\* **17:4** ya kulay hén takop lan mabandi haka takop lan ampamaala. † **17:8** Ya libro ya nag langan lan main biyay ya ayn angga.

<sup>9</sup> Inhundo nan anghel ya pamipamwang na, “Kabay kailangan ya galing haka pamangintindi. Ya pitoy ulo, ay yabay ya pitoy tawtgug ya pan-iknoan nan habaytoy hostis. <sup>10</sup> Ya an-ialimbawa êt bayro ha pitoy ulo, ay pitoy ari. Ya lima kanla ay nahambut, noa, ya miha ay ampamaala pon. Hatoy ikapito, ay a pon nilumatêng. Uston lumatêng yan mamaala, ay a mabuyutan ya pamamaala na. <sup>11</sup> Habayto etaman ya kapapalimoy nanad ayop lalê, ya atsi pon hên hato, ya natsi, ay kalamo ya do ha pitoy ari, kabay hiyay ikawalo la. Hiyay mipalako ha impiyerno, ya kaparusaan ya ayn angga.

<sup>12</sup> “Hatoy mapoy hongay ya nahêlêk mo, ay hila ya mapoy ari ya a pon ampamaala, noa, idin kanla haka kanan hatoy kapapalimoy nanad ayop lalê ya tungkulon hên mamaala ha kabooan bat hên mihay oras. <sup>13</sup> Mimihay kaihipan lan habaytoy mapoy ari hên ipakaaypa lay kapangyarihan haka ya tungkulon la ha aypa hên kapangyarihan nan habaytoy kapapalimoy nanad ayop lalê. <sup>14</sup> Daygên lay habayto, ta êmén la labanan ya Biseron Tupa. Noa, manambut ya kanla gawan hiyay makapangyarihan ha kaganawan panginoon ya main tungkulon, haka ha kaganawan ari. Ya kalamo nan Biseron Tupa ha pamanambut, ay hilay tapat ya mahonol kana, ya pinili na, haka pinaihipan nan magpalokop kana.”

<sup>15</sup> Wanay na êt kangko hên anghel, “Ya mal-at ya lanêm ya nahêlêk mo ya atsi ha danin habaytoy hostis, ay yabay hilay tawo ya ubat ha balang láhi, ha balang bansa, haka ha balang habi. <sup>16</sup> Lumatêng ya allo, ay humêmêk kanan habaytoy hostis ya hatoy mapoy ari haka hatoy kapapalimoy nanad ayop lalê. Manamham hila hên pibandian na angga ha nakalaboh ya. Hila êt ya mangnan laman na, haka ya matagan ay ulamên la. <sup>17</sup> Gawan impaihip ni Apo Namalyari kanla hên magmimiha hilan nakêm hên idin la ha aypa hên kapangyarihan nan kapapalimoy nanad ayop lalê, ya pamanlokop la angga ha matupad ya tinalagá na, ya impahulat na kanlan mámpamwang hên impaihip na kanla.

<sup>18</sup> “Hatoy hostis ya nahêlêk mo, ay yabay ya hadyay hêlay ya balayan bayri ha luta ya ampamaala ha kaganawan ampamaala ha luta.”

## 18

### *Impahalumata kan Juan ya balayan Babilonia ya inulam*

<sup>1</sup> Pamakayarin habayto, ay main akon nahêlêk ya mihay na êt ya anghel ya matag-ay ya tungkulon, ya an-umaypa, hên ubat ha langit. Nahawangan ya boon luta ha hadyay hawang na. <sup>2</sup> Impakaangaw nan hinabi, “Taganán inulam ya balayan Babilonia, ya bantog ha karawakan! Nag-in logal yay na hên labwad luta haka kaatag pon ya nangarawak ya a angkahêlêk, haka hino-hino kay na hên ya kapadiri ya manok lalê ya mipanalay bayro. <sup>3</sup> Inulam ya balayan Babilonia gawan habaytoy nangamlug ha balang bansa haka hilay ari la hên magsimba ha alwan pêtêg ya diyos, ya nanad ha pamangamlug na kanla hên manyag hên karawakan kalabayan lawini! Hilay nangalakal bayro, ay nag-in mabandi gawan a ya napda ha hinoman.”

<sup>4</sup> Bayo main kina êt nagilam ya kaatag ya habi ya angkaubat ha langit, ya wana,  
“Umalih kaw na bahêñ ha balayan Babilonia ya hikaw ya pinili ko hên mag-in kangko!

Paan kaw makilamo ha pamanyag nan kasalanan,  
ta êmén a kaw milamo ha salot ya pamairap kana!

<sup>5</sup> Gawan hadyay nay kasalanan na, ya nakabunton hên angga ha ampiabot ha langit, kabay parusaan yay na ni Apo Namalyari.

**6** No ay-êmén ya pamairap na ha kaatag,  
ay igit pon bayro ya pamaghigantsi ni Apo Namalyari kana,  
hén ayn ingaloy pamarusa.  
**7** No ay-êmén yan nagpakahigla, haka nagpaketpa ha balang hino,  
ay-êmén êt bayro ya iparanas kanay hadyay kalungkutan haka hadyay  
pamairap.

Ta ampandayêw yan sarili na, ya wana ha ihip na,  
'Hiko ya ampamaala.'

Yarin bawo ko!

Magpa ayn angga, ay a ko maglungkot!'

**8** Gawan êmbayroy atsi ha ihip na, ay biglan lumatêng kana ya hadyay salot ya  
pamairap kana,  
ya hino-hino kay na hén, ya mangaldêg ya hakit, hadyay kalungkutan, haka  
mamapitay ya lonoh,  
angga ha iulam ya ha apoy,  
gawan makapangyarihan hi Apo Namalyari ya Panginoon ya mamarusa  
kana."

Habaytoy anggaan hén habi ya naubat ha langit.

**9** Kaban anhêlkên lay hadyay ahuk ya ubat kana, ay mipanyêngêñ ya hilay  
ari bayri ha boon luta ya nakilamo kana ha pamagsimba ha kaatag kan Apo  
Namalyari, ya nanad nipanakêh kana haka nagpaketpa. **10** Mipammirêng  
hila tana ha marayo-dayo, gawan malimo hilan midamay ha parusa kana.  
Anhabiên la tana, "Taganán kaingalo ka, ya kakahlayan balayan Babilonia  
gawan biglan nilumatêng ya parusa kamo! Kakahlayan mo man, ay ha  
mihay oras bat, ay inulam kay na!"

**11** Hila etaman ya mangalakal ha boon luta ay mipanyêngêñ, haka mi-  
paglungkot gawan ha nalyari ha balayan Babilonia, gawan ayn nanan  
manaliw hén kalakal la. **12** Ayn nanan manaliw hén perlas, ginto, pilak,  
haka hinon mangaalagáy bato. Ayn nanan manaliw hén pangahampatan  
binara ya tela ya naputsi, o kakulay moradoy ubi, o naorit, o sida. Ayn  
nanan mipanaliw hén hino-hino kay nahén ya nabango ya kayo, o dyag ha  
bangil hén elepante, dyag ha mangaalagáy kayo, tangso, bakal, haka dyag  
ha baton marmol. **13** Ayn nanan manaliw hén pampalahap kaêñ, nanad ha  
kanela. Ayn nanan manaliw hén pabango nanad ha libanon\* haka mira. Ayn  
nanan manaliw hén alak, taba, arina, trigo, baka, tupa, kabayo, kalesa, haka  
ipoh. **14** Kabay wanlan hatoy mangalakal ubat ha boon luta kana, "Sayang!  
Ya hinon labay mon makwa ay ayn ana! Pibandian mo, haka kahampatan  
mo, ay ahina mahêlêk hén oman!" **15** Hilay hatoy mangalakal ya nibandi  
kana, ay mipammirêng ha marayo-dayo, hén angkalimon pakarani bayro,  
ta a la labay milamo ha pamarusa kana. Mipanyêngêñ haka mipaglungkot  
hila tana, ya wanla, **16** "Hay! Taganán kapaingalo ya nalyari ha hadyay hêlay  
balayan Babilonia! Hén hato ay pangahampatan takop ya naputsi, o kakulay  
moradoy ubi, o naorit ya an-itakop lan tawo bayro. Nakauno haka naka-  
tsingga hilan ginto haka kaatag pon ya mangaalagá ya hino-hino kay na hén  
ya nanad ha perlas! **17** Ha mihan bêngat ya oras ay inulam ya habayto!"

Hilay kapitan, haka hilay mangalakal ha dagat, haka kaatag pon ya  
nakahakay ha kaganawan barko ya atsi ha marayo-dayo, **18** ay mipan-angaw  
uston hêlkên lay ahuk ya ubat bayro ha angkaulam, ya wanla, "Ayn ana ya  
balayan Babilonia ya ayn kapantag ha kahlayan!" **19** Tsikpaêñ lay pagaw  
la ha hadyay panyêngêñ la, haka pamag-lungkot la, ta wanla, "Taganán

\* **18:13** Hêlkên ha panlêkan labay habiên hén habi.

kaingalo ya kahlayan balayan Babilonia! Naubuh hilan nibandi ya main barko ha bandi na! Noa, mihan bat ya oras ay naulam ya!”

<sup>20</sup> Dapat maghigla kaw ya atsi bahêñ ha langit gawan ha nalyari kana! Dapat maghigla kaw ya apostol, haka hikaw ya mâmipamwang hên impaihip kamoyu ni Apo Namalyari, haka hikaw ya kaatag pon ya ampaniwala kan Apo Namalyari, ta pinarusaan yay na ni Apo Namalyari gawan ha dinyag na kamoyu hên hato!

<sup>21</sup> Pamakayarin habayto, ay hinapwat nan mihay makapangyarihan ya anghel ni Apo Namalyari ya mihay hadyay hêlay bato haka na intapon ha dagat, ta wana, “Embairo ya pangaulam hên kahlayan balayan Babilonia, hên ahina mahêlêk oman. <sup>22</sup> Ayn nanan kagilaman hên alpa ya antsigtigêñ, pamagkanta, pamagbulongudyong, haka pamanugtog hên torotot. Ahina mahêlêk ya mangagaling hên manyag hên hinoman, haka ayn nanan kagilaman hên hêneg hên pambayo. <sup>23</sup> Ayn nanan kahêlkan hên dêkêt solo, haka ayn nanan magilaman ya kahiglaan habi lan bayon kasal. Ta habaytoy pamarusa kamo gawan matag-ay ya nakêm lan hinabi hên hilay mangalakal bahêñ ya mabandi hila ha hinoman, haka gawan niloko moy balang bansa ha kalokwan mo.”

<sup>24</sup> Pamarusa ya habayto ha Babilonia gawan ha kal-atan mâmipamwang, haka kaatag pon ya ampaniwala kan Apo Namalyari, ya pinatsi na, anggan hila ya pinatsi ha boon luta.

## 19

### *Impahalumata kan Juan ya pamagsimba kan Apo Namalyari ha langit*

<sup>1</sup> Pamakayarin habayto, ay main akon nagilam ya nanad ha kal-atan ya ampipagkanta ha langit, ya wanla, “Aleluya! Purién ya hi Apo Namalyari gawan hiyay Mámilitas! Purién ya gawan ha kahampatan haka kapangyarihan na ya ayn kapantag! <sup>2</sup> Makatoynungan haka hêpat ya pamanatol na, gawan pinarusaan nay na ya habaytoy hostis, ya nangamlug kanlan tawo ha kaganawan bansa hên magsimba ha kaatag kan Apo Namalyari, ya nanad ha pamakipaglalaki na kanla. Nayari ya pamaghigantsi kana ha pamamatsi na kanlan naghuyo kan Apo Namalyari.” <sup>3</sup> Nangoman hilay na êt hên nagkanta, ya wanla, “Aleluya! Purién ya hi Apo Namalyari gawan ya ahuk hên pangaulam hên habaytoy balayan Babilonia ay ayn angga.” <sup>4</sup> Hilay hatoy lowampo boy apat ya nipagtungkulon, haka hilay apat ya angkabiyay ya napnoan mata, ay ampipandoko hên nakadêngdêng hên nagsimba kan Apo Namalyari ya ampamaala, ya wanla, “Amen! Aleluya!”

### *Impahalumata kan Juan ya kasal nan Biseron Tupa*

<sup>5</sup> Pamakayarin habayto, ay main akon nagilam ya habi ya angkaubat ha dani ni Apo Namalyari, ya wana, “Purién tamo hi Apo Namalyari ya Diyos tam, hikaw ya main tungkulon man o ayn, ya ampaghuyo haka ampaggalang kana!” <sup>6</sup> Bayo nakagilam akon habi ya nanad ha makhaw ya lanêm ya man-awk haka kilat ya magdili-kidik, ya namiangaw hên êmên di, “Aleluya! Ampanlokop hi Apo Namalyari ya makapangyarihan ya Panginoon tamo!

<sup>7</sup> Maghigla kitamon magpuri haka mam-in galang kana, ta ya kasal nan Biseron Tupa ay marani, haka nakaléan ya an-ikasal. <sup>8</sup> Ya an-ikasal na etaman ay nagbaro hên mahampat ya naputsi ya takop ya ampakapahilêw.” Ya mahampat ya naputsi ya takop ya kapahilêw ay yabay ya mangangêd ya dyag lan pinili ni Apo Namalyari hên mag-in kana.

<sup>9</sup> Bayo hinabi na kangko hên mihay anghel ni Apo Namalyari, “Êmên di ya ihalat mo: Iningalwan hilay hinagyat ha kasal nan Biseron Tupa.”

Haka wanay na êt kangkon hatoy anghel, “Habaytoy pêtêg nan hinabi ni Apo Namalyari.” <sup>10</sup> Bayo nandoko kon nakadêngdêng hên magsimba kanan anghel, noa, wana kangko, “Paan mo kon simbaén ta kapareho katan tagahuyo ni Apo Namalyari, hên nanad êt kanlan patêl mo ya ampamaptêg ha intoro ni Panginoon Jesus. Yabay ya impamwang êt hên mámipamwang ni Apo Namalyari hên hato. Ya simbaén moy naman ay, hi Apo Namalyari.”

*Impahalumata kan Juan ya nakahakay ha kabayoy naputsi*

<sup>11</sup> Bayo nahêlêk kina êt ya nagloat ya langit, haka main akon nahêlêk ya mihay kabayoy naputsi ya main nakahakay ya ambaégén Tapat haka Pêtêg. Makatoynungan ya pamanatol na haka makatoynungan ya pamanlumaban na ha kapatsi na. <sup>12</sup> Ya mata na ay nanad dêkêt apoy haka malat ya korona ya nakahuklot ha ulo na. Main nakahulat kana ya langan ya hiyan bat ya makamwang no hinoy labay habiên hên habayto. <sup>13</sup> Ya takop na ay napnon daya, haka ya pamaég la kana ay Habi ni Apo Namalyari. <sup>14</sup> Ampipanhemonol hila kana ya kal-atan tawo ya a makwan mabilang ya atsi ha langit, ya nakatakop hên bapan putsi ya mangahampat. Nakahakay hila êt ha nangaputsi ya kabayo. <sup>15</sup> Ubat ha bêbêy nan pinata-ngalanan Habi ni Apo Namalyari, ay main matarêm ya hundang, ya gamitênan panambut ha kaganawan bansa ya a nagpalokop kana. Mamaala ya ha balang bansa, hên hambuten na hilay anhumalanghang kana. No ay-êmén ampêhpêhén ya ubas ha pay-unaban, ay êmbayroy iparanas nay hadyay parusa ni Apo Namalyari ha kaganawan ya nanalanghang kana. <sup>16</sup> Ha takop na haka ha paa na ay nakahulat ya hata langan, “Makapangyarihan ha kaganawan ari haka panginoon.”

<sup>17</sup> Bayo nakahêlêk kina êt hên mihay anghel ni Apo Namalyari ya nakairêng ha allo. Binaég nay manok ya ampipanlumpad, ya wanana makhaw, “Magtsipon kaw bayri ha mahlay ya kaluto ni Apo Namalyari, <sup>18</sup> ta tuktukén yon kênaén ya bangkay lan nanalanghang kana, ya bangkay lan namaala ha kaganawan bansa, ya hundaloh, kapitan haka kabayo la. Tuktukén yon kênaén ya bangkay lan kaganawan a nagpalokop kan Apo Namalyari, ipoh man o alwa, main tungkul man o ayn.”

<sup>19</sup> Bayo nahêlêk ko ya hatoy kapapalimoy nanad ayop lalê, haka hilay ampamaala ha boon luta, haka ya kal-atan hundaloh la hên naka-tsipon, ta êmén la labanan ya hatoy nakahakay ha kabayoy naputsi haka hilay kal-atan tawo ya a makwan mabilang ya ampipanhemonol kana. <sup>20</sup> Nadakêp ya una haka ya ikalwan\* kapapalimoy nanad ayop lalê. Habaytoy ikalwa, ay yabay ya propeta† ya malarom, ya nanyag hên kapapaépapah ha kapangyarihan hên habaytoy una. Naloko na hilay main tatak hên hatoy una, hên magsimba ha rebulton una. Inhamwag hilay lowa ya angkabiyay pon bayro ha sulpid ya mamaalob-alob ya nanad kahlayan dagat-dagatan. <sup>21</sup> Ya kal-atan lan hundaloh lan hatoy lowa ay pinatsi hên hundang ya ubat ha bêbêy nan nakahakay ha kabayoy naputsi. Nagpakapda hilay hatoy manok ha bangkay lan pinatsi.

## 20

*Impahalumata kan Juan ya malyari ha maliboy taon*

<sup>1</sup> Pamakayari habayto, ay main akon nahêlêk ya mihay anghel, ya angkaubat ha langit, ya ampanalan hên mahlay ya taykala. Main ya etaman antalanén ya susi hên hatoy lubot ya ayn anggay kalaléan. <sup>2</sup> Dinakêp nay

\* **19:20** Impamwang 13:14-17. † **19:20** Impamwang 16:13.

habaytoy nanad ha hadyay hêlay dapo, ya toan utan, ya Diyablo, ya hi Satanas. Hiyay inggapoh pon ha boon maliboy taon. <sup>3</sup> Inhamwag na yan hatoy anghel ha lubot ya ayn anggay kalaléan, haka na inhara ya ilwangan bayo nan insusi ya habaytoy kabat. Bayo na tinatakan ya habayto, ta êmén a ya makaawah hên manloko ha kaganawan bansa, angga ha a mayari ya maliboy taon. Pangayarin habaytoy maliboy taon, ay ibuhan ya pon saguli.

<sup>4</sup> Pamakayari, ay nakahêlêk akon iknoan lan ampamaala. Hilay nakaikno bayro, ya dinyanan tungkulân hên manatol, ay habaytoy kaêlwa lan pinatsi gawan ha pamaptêg la ha intoro ni Panginoon Jesus, haka ha pangipamwang lan habi ni Apo Namalyari. Hila ay a nagsimba ha unan kapapalimoy nanad ayop lalê, haka a nagpatatak hên tatak na ha dampal o ha gamêt la. Hilay biniyay oman hên mamaala hên kalamo ni Panginoon Jesu-Cristo ha boon maliboy taon. <sup>5</sup> Hên haton biniyay hilan oman, ay habaytoy kaunaunaan hên pamamiyay oman kanlan natsi. Hilay kaatag ya hilay natsi ay biyayê oman pangayarin habaytoy maliboy taon. <sup>6</sup> Hilay habayto ya pinili ni Apo Namalyari hên makilamo ha unan pamamiyay oman lan natsi, ay iningalwan gawan a lay na maranaasan ya ikalwan kamatsan ha kaparusaan ya ayn angga, ta maghuyo hila kan Apo Namalyari haka kan Panginoon Jesu-Cristo, haka mamaala hila hên kalamo ni Panginoon Jesu-Cristo ha boon maliboy taon.

#### *Impahalumata kan Juan ya pangahambut ni Satanas*

<sup>7</sup> Pangayarin habaytoy maliboy taon, ay ibuhan yay na hi Satanas ha pangahukul kana. <sup>8</sup> Umawah yay na bayto ta lokoën na hilay nay balang bansa ha boon luta, ya a nagpalokop kan Panginoon Jesu-Cristo. Hila ya pinata-ngalanan Gog haka Magog. Tsiponêna hilan lumaban ta hilay habayto ya mag-in hundaloh na. Hila ay a makwan mabilang ta hilay nanad kal-atan balâh ha laylay hên dagat. <sup>9</sup> Haka nahêlêk ko hilay habayto ya ubat ha boon luta. Nangapitbêng hila hên pinalibutan ya hilay pinili ni Apo Namalyari hên mag-in kana ya atsi bayro ha balayan ya anlugurêni Apo Namalyari. Noa, namakonkaynaman, ay main apoy ya naubat ha langit ya nangulam kanlan kalamo ni Satanas. <sup>10</sup> Hi Satanas ya nanloko kanla, ay inhamwag bayro ha sulpud ya mamaalob-alob ya nanad kahlayan dagat-dagatan, ya dyanan lan hatoy una haka ikalwan\* kapapalimoy nanad ayop lalê. Habaytoy ikalwa, ay yabay ya propeta† ya malaram. Bayro hilan parusaan hên allo yabi, hên magpa ayn angga.

#### *Impahalumata kan Juan ya katatawlian pamanatol ha balang miha paubat kanlan Adan ya nunan natsi angga kanlan angkabiyay pon*

<sup>11</sup> Pamakayarin habayto, ay main akon nahêlêk ya kahlayan iknoan ari ya naputsi, haka hatoy nakaikno bayro. Ya luta haka langit ay biglan naplak ha arapan na, angga ha a hilay na mahêlêk oman. <sup>12-13</sup> Nahêlêk ko bayro ha arapan nan habaytoy nakaikno ya hilay biniyay oman ya ubat ha boon luta haka dagat, main tungkulân man o ayn, ya hilay ubat ha Hades.‡ Hinatolan hilay balang miha do ha dinyag la, ya nakahulat bayro ha libro ya nikabuhal. Bayo binuhal pon êt ya libron biyay, ya libro ya nag langan lan main biyay ya ayn angga. <sup>14</sup> Bayo inhamwag ya Kamatsan haka Hades§ bayro ha sulpud ya mamaalob-alob ya nanad kahlayan dagat-dagatan. Habaytoy ikalwan kamatsan, <sup>15</sup> haka hilay ayn langan bayro ha libron biyay, ya nag langan lan

\* **20:10** Impamwang 13:14-17. † **20:10** Impamwang 16:13. ‡ **20:12-13** Hêlkên ha panlêkan labay habiêñ hên habi di ha bokotan hên hata Bibliya. § **20:14** Hêlkên ha panlêkan labay habiêñ hên habi di ha bokotan hên hata Bibliya.

main biyay ya ayn angga, ay ihamwag bayro ha sulpud ya mamaalob-alob ya nanad kahlayan dagat-dagatan.

## 21

### *Impahalumata kan Juan ya pinahilyan bayro ha unan luta haka ha angkahêlêk ha langit*

<sup>1</sup> Pamakayari, ay nahêlêk koy pinahilyan bayro ha unan luta haka ha angkahêlêk ha langit. <sup>2</sup> Haka nahêlêk koy bayoy balayan ni Apo Namalyari, ya bayoy Jerusalem, ya an-umaypan angkaubat ha langit, kan Apo Namalyari. Habaytoy nanad ha mihay babayi ya inlêan hên binaroan hên manupa ha lalaki ya an-ikasal kana. <sup>3</sup> Bayo main akon nagilam ya makhaw ya habi ya naubat bayro ha iknoan mamaala, ya wana, “Amêhêen, ampaidi yay na hi Apo Namalyari hên kalamoy pinili na hên mag-in kana. Hiyay na ya makalamo la, haka panay la yay nan makalamo. <sup>4</sup> Hiyay mamunah hên luwa ha mata la. Ayn nanan makaranas hên kamatsan, pamanyêngêñ, pamanangih haka ilab, ta habayto ay ayn ana.”

<sup>5</sup> Wanay na êt hên naghabi hên hatoy nakaikno hên ampamaala, “Ambayoêñ ko ya kaganawan.” Wana êt kangko, “Thulat moy habayto ta habaytoy mapaypaniwal-an haka pêtêg.” <sup>6</sup> Bayo wana kangko, “Nayari ngan ya habayto! Hiko ya Alpha haka Omega, ya labay habiêñ, ya hikoy ampangubatan haka ya anggaan hên balang hino. Hilay angkaangan, ay digaloan kon lanêm ya ubat ha sibol ya ampam-in biyay. <sup>7</sup> Habayto ya idigalo kanlan mipanambut ha kaganawan karawakan, haka hikoy mag-in Diyos la haka hilay mag-in anak ko. <sup>8</sup> Noa, hilay ampamipuglaoh hên paniwala la, hilay ayn paniwala, hilay ampanyag hên kadêng-éyan, hilay mamatsin kapareho la, hilay manyag karawakan kalabayan lawini, hilay mapandanga, hilay ampagsimba ha alwan pêtêg diyos, haka hilay malaram, ay ihamwag bayro ha sulpud ya mamaalob-alob ya nanad kahlayan dagat-dagatan. Habaytoy ikalwan kamatsan.”

### *Impahalumata kan Juan ya bayoy balayan Jerusalem*

<sup>9</sup> Bayo napaidani kangko ya miha kanlan pitoy anghel ni Apo Namalyari ya ampantan hên habaytoy pitoy silyaw ya napnon salot ya pamairap, ta wana kangko, “Galing mo di, ta ipahlêk ko kamo ya babayi, ya an-ikasal nan Biseron Tupa.” <sup>10</sup> Haka ha kapangyarihan hên Espiritu, ay gintan na kon hatoy anghel ha bapan tag-ay tawtgug, ta impahlêk na kangko ya bayoy balayan ni Apo Namalyari, ya bayoy Jerusalem, ya an-umaypan angkaubat ha langit, kan Apo Namalyari. <sup>11</sup> Ya kahawangan nan habaytoy balayan ay ampangunilap hên êmén ha haspe ya maalagáy bato, haka kalinaw ya êt hên kristal, gawan atsi kana ya kahampatan ni Apo Namalyari. <sup>12</sup> Habaytoy bayoy balayan Jerusalem, ay nakapalibot hên bapan tag-ay bakod ya main mapo boy loway awahan. Ha balang payhowênan ay main anghel, haka nakahulat ha balang payhowênan ya langan hên mihay anak ni apo Israel. <sup>13</sup> Ya tatloy payhowênan ay atsi ha durunglaan allo, tatlo ha dapit timog, tatlo ha dapit hilaga, haka tatlo ha dapit kanaboan allo. <sup>14</sup> Habaytoy bakod ya dyag ha bato ay main labinloway pampah-êy haka ha balang pampah-êy, ay main mihay langan lan labinloway apostol nan Biseron Tupa.

<sup>15</sup> Hatoy anghel ya naghabi kangko, ay main yan antalanêñ ya panukat ya dyag ha ginto, ya nanad têkêñ, ya panukat hên habaytoy balayan, bakod haka ya labinloway payhowênan. <sup>16</sup> Kwadrado ya pangipairêng hên habaytoy balayan, kabay no ay-êmén ya karang ay, êmbayro êt ya lawang. Hêñ hinukat nan têkêñ na, ya balayan, ay manga 2,400 kilometro ya kakarang na haka êmbayro

êt ya katag-ay na. <sup>17</sup> Hêñ hinukat na êt ya bakod, ya nakway nay hukat ay maigit ha 216 dangan. <sup>18</sup> Hatoy bakod ay dyag ha mangaalagá ya batoy haspe. Ya balayan etaman ay dyag ha naahig ya ginto, ya ampangunilap hêñ nanad ha kristal. <sup>19</sup> Habaytoy labinloway pampah-éy hêñ bakod ay main hino-hino kay na hêñ ya mangaalagáy bato. Haspe ya una, sapiro ya ikalwa, kalsedonia ya ikatlo, esmeralda ya ikaapat, <sup>20</sup> onise ya ikalima, kornalina ya ikaaném, krisolito ya ikapito, berilo ya ikawalo, topasyo ya ikasiyam, krisopraso ya ikamapo, hasinto ya ikalabinmiha, haka amatista ya ikalabinlowa. <sup>21</sup> Perlas ya labinloway kabat hêñ payhowênan. Ya balang payhowênan ay dyag ha mihay kahlayan perlas. Ya dann bayro ha balayan ay dyag ha naahig ya ginto, ya ampangunilap hêñ nanad ha kristal.

<sup>22</sup> Ayn akon napansin ya Templo bayro ha balayan, gawan hi Apo Namalyari, ya makapangyarihan ya Panginoon haka ya Biseron Tupa, ya pinaka-Temploy na bayro. <sup>23</sup> Ahina kailangan ya allo o buwan man, gawan ya kahampatan ni Apo Namalyari haka ya Biseron Tupa ay ampam-in hawang bayro. <sup>24</sup> Hila ha boon luta ay mahawangan ha hawang hêñ hêñag na. Haka gêtan la bayro hêñ hilay ari ha balang bansa ya pibandian la haka iiintsilga lay na ya habayto kan Apo Namalyari. <sup>25</sup> Panay nakaloat ya payhowênan hêñ habaytoy balayan gawan ayn nanan yabi bayro. <sup>26</sup> Gêtan bayro ya pibandian haka ya pamagpuri lan ubat ha balang bansa kan Apo Namalyari. <sup>27</sup> Noa, ayn nanan makahowêñ bayro ha balayan ya hinon narêmêk ha hêlêk ni Apo Namalyari, nanad kanlan ampanyag hêñ kadêng-éyan o kanlan maglaram. Ya makahowêñ bat bayro ay hilay habaytoy nag langan ha libro lan main biyay ya ayn angga, ya libro ya an-illagan nan Biseron Tupa.

## 22

### *Impahalumata kan Juan ya ilog ya ampam-in biyay*

<sup>1</sup> Bayo impahlék nay na êt kangko hêñ habaytoy anghel ya mihay ilog ya ampam-in biyay. Ya lanêm nan habaytoy ilog, ya kalinaw hêñ kristal, ay angkaubat ha iknoan lan ampamaalaan lan Apo Namalyari haka ya Biseron Tupa. <sup>2</sup> Ya ilog ay ampagdann ha bonak hêñ kalsada hêñ habaytoy balayan. Ha parehon pingit na ay main kayo ya ampam-in biyay. Buwan-buwan, ay ampanagéy hila hêñ bayoy tagéy, haka ya bulong la ay ampakapidayon hakit ha kaganawan. <sup>3</sup> Ayn ana bayron mahêlêk ya a na labay ni Apo Namalyari.

Atsi ya bayro hêñ ampamaala hêñ kalamo nan Biseron Tupa. Haka hilay ampaghuyo kana, ay magsimba kana. <sup>4</sup> Mahêlêk la ya lupa na, haka atsi ha dampal la, ya langan na. <sup>5</sup> Ayn ana bayron yabi. Ahina kailangan ya hawang hêñ allo o solo man, gawan hi Apo Namalyari, ya Panginoon, ay magin hawang la, haka hilay ampaghuyo kana, ay mamaala hêñ ayn angga.

### *Impahalumata kan Juan ya pamanlumatêng ni Apo Jesus*

<sup>6</sup> Wana êt kangkon anghel, “Habayto ay mapaypaniwal-an haka pêtêg. Ta hi Apo Namalyari, ya Panginoon, ya nampaihip kanlan mâmipamwang na, ya dapat lan habiên, ay namiutoh ya hêñ anghel na hêñ namipamwang kanlan ampaghuyo kana, ya bigla hêñ malyari, ya tinalagá na.”

<sup>7</sup> Wani Apo Jesus, “Manggilam kaw! Bigla kon lumatêng! Iningalwan hilay ampanhumonol ha impapêt ya inhulat bayri ha libro.”

<sup>8</sup> Hiko hi Juan, ya nakapoliah haka nakgilam hêñ habayto. Hêñ nagilam haka napoliah kinay habayto, ay nandoko kon nakadêngdêng hêñ magsimba dayi kanan anghel ya nampahlék kangko hêñ habayto, <sup>9</sup> noa, wana kangko, “Paan mo kon simbaên, ta kapareho katan tagahuyo ni Apo Namalyari,

nanad ha kapareho mon ampamipamwang hên an-ipaihip ni Apo Namalyari kanla, haka hilay ampanhumonol ha nakahulat bayri ha libro. Hi Apo Namalyari ya dapat mon simbaén!” <sup>10</sup> Haka wanay na êt kangko, “Paan mon ipokok ya impahalumata, ya impapêt, ya inhulat bayri ha libro, noa, ipamwang mo, ta ahina mabuyot, hên matupad ya habayto. <sup>11</sup> Kabay, hilay mapanyag karawakan kalabayan lawini, haka kaatag pon ya karawakan, ay paulayan nan mamihundo hên andaygênlâ, ta no a hila tunggênlâ, ay parusaan hila. Hila etaman ya mahonol kan Apo Namalyari, ay dapat pakikwanan lan ihundo ya pamimiyay lan mahonol kana.”

<sup>12</sup> Wani Apo Jesus, “Manggilam kaw! Bigla kon lumatêng! Anggêtan kinay idin kanlan ampanhumonol kangko do ha dinyag nan balang miha. <sup>13</sup> Hiko ya Alpha haka Omega, ya labay habiênlâ, ya hikoy ampangubatan haka ya anggaan hên kaganawan.”

<sup>14</sup> Iningalwan hilay ampamipi hên takop la, ya labay habiênlâ, ay hilay mapaghêhê ha balang nadyag lay kasalanan, ta êmênlâ hila mapatawad ni Apo Namalyari, ta idin kanla ya karapatan hên humwênlâ bayro ha balayan, haka mangan hên tagêylâ lan habaytoy kayo ya ampam-in biyay. <sup>15</sup> Noa, a makahowênlâ bayro hilay mapanyag hên kadêng-éyan hên nanad ha dyag aho, hilay mapandanga, hilay manyag karawakan kalabayan lawini, hilay mamatsin kapareho la, hilay ampagsimba ha alwan pêtêg diyos, hilay maglaram haka hilay ampanyag kalokwan.

<sup>16</sup> Wana êt ni Apo Jesus, “Hiko hi Jesus ya namiutoh hên anghel ko kamohênlâ impamwang kamohênlâ, ya ipamwang mo kanlan angkapi-tsi-tsipon ha pagtsiponan hên pagsimbaan kangko. Hikoy taganán kaapo-apoan ni Arin David, hikoy manwatah, ya andumlag ha hanib.”

<sup>17</sup> “Galing mina!” wanana Espiritu ni Apo Namalyari haka hilay pinili na hênlâ mag-in kana, ya an-ialimbawa ha babayi ya ikasal ha Biseron Tupa. Haka hila ya makagilam hênlâ nakahulat di ay dapat maghabî kan Panginoon Jesu-Cristo, “Galing mina Panginoon!”

Paidani kaw ya angkaangan, ta minênlâ hênlâ lanênlâ ya ayn bayad, ya ampam-in biyay ya ayn angga hênlâ kalamo ni Apo Namalyari.

### *Tawlin aral ni Juan*

<sup>18</sup> Hiko hi Juan ya ampam-in payo ha kaganawan ya nakagilam hênlâ hatoy papêt ya atsi bayri ha libro, ya parusaan hilay mamioman hênlâ nakahulat bayri. Ya pamarusa kanla ay mag-in nanad ha hino-hino kay na hênlâ ya salot ya inungkat di ha libro. <sup>19</sup> Haka hinoman ya mamaw-ah hênlâ habi ya atsi bayri ha libro, ya impapêt, ay alihan ni Apo Namalyari hênlâ karapatan hênlâ makapakiatag do ha tagêylâ lan kayo ya ampam-in biyay, haka do ha banal ya balayan na, ya inungkat di ha libro.

<sup>20</sup> Wani Apo Jesus ya ampamaptêg hênlâ habayto, “Awo, bigla kon lumatêng!” Amen! Galing mina, Panginoon Jesus!

<sup>21</sup> An-ihalangin kataw ya pinili ni Apo Namalyari hênlâ mag-in kana, ya ingalwan na kaw ngan ni Panginoon Jesus. Amen.